

El Nuevo Testamento en mixe de Coatlán

Coatlán Mixe New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

| | |
|------------------------|-----|
| SAN MATEO..... | 4 |
| SAN MARCOS..... | 38 |
| SAN LUCAS..... | 62 |
| SAN JUAN | 96 |
| HECHOS | 126 |
| ROMANOS..... | 158 |
| 1 CORINTIOS | 176 |
| 2 CORINTIOS | 193 |
| GÁLATAS | 204 |
| EFESIOS | 211 |
| FILIPENSES..... | 218 |
| COLOSENSES | 223 |
| 1 TESALONICENSES | 227 |
| 2 TESALONICENSES | 231 |
| 1 TIMOTEO..... | 233 |
| 2 TIMOTEO..... | 237 |
| TITO | 240 |
| FILEMÓN | 243 |
| HEBREOS..... | 244 |
| SANTIAGO..... | 256 |
| 1 PEDRO | 260 |
| 2 PEDRO | 265 |
| 1 JUAN | 268 |
| 2 JUAN | 273 |
| 3 JUAN | 274 |
| JUDAS..... | 275 |
| APOCALIPSIS | 277 |

SAN MATEO

Je Jesucristo ymij'ap ymijteedy

1 Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhu'i'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc.

³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías miid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimiy yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypiigaangixy miid José; e ma anajty ca'ni ñaybudigíyigixy, chi María oy y'ungdzimígy miid yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyoty. Hue' janchtiy yhuinma'ñybaty co ixmadza'ñ ayüch ameech ca' pin yajnejhuñhua'ñ.

²⁰ Huin'it ma jadu'n anajty nihuinmayäy, chi Huindzin

Dios tüg y'ángel ñayquëxici cumäyoty ma José, chi ñi-maayi:

—José, David y'ap y'oc, ca' mijcajee mdzachhuinmay nej m'octöxyijc'adiyb María, com yi' y'ung huidibi yajma'xung'adamy hue' miid Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuiy Jesús. Jadu'n yi' xii'adiyb com jégéx co yi' yajpocyñihuadzam ñaax ycajp.

²² Tüg'ócüy jada ytundaayi yajtaayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxyiyip ma anajty jadu'n yjaybetyty:

²³ Je töxyjäy huidibi ca' yëdyjc miiddzinäy hue' je' ung tzimäcip. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbizimiy Dios miid ñich ajt.

²⁴ Co José ymäyhuiy, chi cuyduñ jadu'n nej anajty Dios y'ángel ti nimäy, chi huoy María jadu'n nej jihuiy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yximoy Jesús.

Madza' ni'ixpigíyib oy co'ixiyigixy pi'c'ung

2 Jesús yma'xung'ajty ma tüg cajp huidi yxii Belén, jim ma Judea ñaaxjot, huin'it co anajty Herodes grey'aty ma yi jimbi naaxjot. Chi huin'it yja'ty ma Jerusalén cajp nijëjty yëdyjctijc huidibi anajty ti choñ ma xii ypidzimiy, yi huidibi anajty ajcxy xii madza' ti ni'ixpigíyigixy. ² Chi ajcxy yajtiy:

—¿Ma je judíojäy grey tibi yma'xung'aty? Ti ñich ajcxy ni'ixxi yi' ymadza' jim ma xii ypidzimiy, e yi' ñich ajcxy ya miñ nhuindzigíhuaangixy.

³ Co je rey Herodes jadu'n midooy, chi ooy ytigíy tajpi maybi miid tüg'ócüy cajpjäy jim Jerusalén. ⁴ Huin'it je rey huomujctay tüg'ócüy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcapxyiybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti ixcixy yi madza'. Chi tiybijcy yajxon mina anajty oga'n ti ixcixy je madza'. ⁸ E huin'it ajcxy quejxy jim Belén. Chi jadu'n nimay:

—Níxcix jim e ocnidiu ocajtiugixy je pi'c'anäg; e co anajty ti mbatcixy, miñ miich ajcxy xyajni máaygixyich jaydëbi ñich nicxy nañ jadu'n nhuindzigíyich.

⁹ Co jadu'n rey najtzcapyday, chi ajcxy choñ. E je madza' tñibi anajty ijxcixy ma xii ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpicytjic jadu'n ijxy yi madza', chi ajcxy oy janch jotcuje ñayjihuñii. ¹¹ Co ajcxy ytjctigñy, chi ajcxy ijxy je pi'c'anäg mñd ytaj je María. Chi jada' ajcxy ñaygojxti-naydaaci huindzigñy ojadajty ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tñg tzoj huidi yxñ mirra. Chi ajcxy moy je pi'c'anäg. ¹² Chi cumäyjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuñicx.

Co José etz María yqueegyñicxixy Egipto

¹³ Co je rey ixpicytjic ajcxy yhuimbijtaayñi, chi cumäyjoty José ijxy tñg Dios y'ángel, chi ñimaayi:

—Pidñg, nicx jim Egipto ñaaxjot mñd yi pi'c'anäg etz mñd yi' ytaj, e jim mhui'mipy ixti cooni ñch miich nimähuiy. Com yi Herodes y'ixtahuamy yi' yi pi'c'anäg e yaj'öga'ñ yi'.

¹⁴ Chi huin'it José ypidñgy mñd tzoñ coodz je pi'c'anäg mñd ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuynun jadu'n nej Dios anajty ti ymñañ ma yi' y'ayucnajtzcapyñy: "Jim Egipto ñch n'ung ti nhuoy."

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'ññyii je rey ixpicytjic ajcxy co ca' anajty ti ñihuimbidyii, chi ooy yjot'ambijcy, chi ni'ane'mdñy co huen nicxy jim Belén etz majaty cajp mihuingon Belén, yaj'öctaaygixy tñg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuynun jadu'n nej anajty Dios y'ayucnajtzcapyñy, je Jeremías, anajty ti cojaay:

¹⁸ Jim Ramá yajmidoy co anajty chachjñy chachyäxy jäy ajcxy; yi Raquel tzachjñyb tzachyaaxp mñd y'ung ajcxy ycipñi, ca' ajcxy anajty yjotcuje'aty mñd co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tñg y'ángel ñayguëxñi cumäyjoty ma José. Chi ñimayi:

²⁰ —Pidñg, mñdnicx yi pi'c'anäg etz yi' ytaj jim ma yi' Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

²¹ Huin'it José ypidñgy, mñd nicxy yi pi'c'anäg etz yi' ytaj jim ma Israel ñaaxjot. ²² Per co José nejhuiy co je Arquelao yi' anajty jim ane'mb jadu'n nej anajty je yteedy Herodes, ooy chigñy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. ²³ Co jim yjäty, chi jim chinaydacpijcy ma je cajp huidi yxñ Nazaret. Jadayaabi je' jadu'n tun jajtñ jadu'n nej anajty ycojaayty ma Dios y'ayucnajtzcapyñy ñey co Jesús xñ'adñyb Nazareno.

Juan el Bautista y'ayuc capxhuäcxy ma tñdz naax it

3 Huin'it tiempo nañ jadu'n Juan je Bautista (huidibi jäy yajñibejtpi) ymññ tñg tñgdum ma Judea ñaaxjot capxhuäcx Dios y'ayuc, ² ymñañ:

—Jothuimbijtcix ma Dios com yi Dios y'ane'min huin-goniñ yi'.

³ Jada Juan yi' je' huidibi je profeta Isaías nigapxy ymñañ:

Jim mñtjgdum yajmidoy tñg ayuc mñañ: "Ni'ixñygyixy yi mHuindzin ytü'aa, ni'ixñygyixy tñg tü'aa tñybi."

⁴ Je Juan hue' anajty yhuin'ip iyujc ac, e yi' anajty yjicxy'ajtpy mu' etz tijaty iyujc päg jim tñg tñgdum. ⁵ Chi choñ jim Jerusalén jäy etz tñg'óciy huidijaty tzi-naayb ma Judea ñaaxjot, nañ jadu'n huidijaty tzi-naayb ma Jordán mññiba', ñicx ajcxy ma Juan amido'ñtiy yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajñibedyii ma Jordán mij ñi.

⁷ Per yi Juan y'ix co may fariseo jäy etz saduceo jäy miñ anajty ajcxy ñibejtcixy, chi ajcxy nimay:

—iMiich ajcxy, m'ajuugy m'amigüg ahua'n iyujc! ¿Pin ti xyajni'ixñygyixy nej jëbi huaad mgögueeccixy yi ayo'n huidibi huigomb? ⁸ Yajxon jäy'ajtcix tiydudägy huen niguëxgy co ti mjothuimbijtcixy. ⁹ Ca' jadu'n mdzch-mñnaangixy co Abraham xy'ap'adyii xy'oc'adyii. ñch miich ajcxy yam ndimñimaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydñ miich ajcxy. ¹⁰ Yi jach ni'ixñ yi' y'ijtni ma quipy y'ijx, tñg'óciy quipy huidi ca' oy ytim'aty yajpujxp yi', e chi jada' yajñögy jñnjoty. ¹¹ ñch, janch yajñibejtpich mñd ñi, yi' yi' jadu'n nej tñg ixpejt co ti mjothuimbijtcixy; per jacminamb tzoj huidi ajcxy xyajñibejtpy mñd Dios yjihu'ñ etz mñd jñn. Je' ymñd mic'ajtn etz cötujeñ, ñigi ca'ydñ ñch, ni xycapaadyich nicxy y'cñ nyajtecyjendü-gyich. ¹² Ymñd mic'ajtn pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögñhua'ñ yi moc actz moc jaam jñnjoty ma je jñn huidibi nicamñnaaxñ ycapñch.

Co Jesús ñibejty

¹³ Huin'it Jesús choñ ma Galilea ñaaxjot, chi ñicxy ma Jordán mij ñi ma anajty Juan yjäyñibejty, ñibe-dam anajty yi' nañ jadu'n. ¹⁴ Juan ca'jadim'a'ixñy, chi ni-may Jesús:

—ñch miich ixipy xyajñibejtpich, ¿e miich mimb ma ñchñ?

¹⁵ Chi Jesús y'adzooy:

—Jadachambñ oc'a'ixñ jadu'n, com ooy yi' ycopityty co nguydundayim tñg'óciy tñbi Dios xyaj'ane'mim.

Huin'it Juan a'ixñy chi yajñibejty Jesús. ¹⁶ Co Jesús ñibejttay, chi Jesús ijxy Dios yjihu'ñ ñigidägyii jadu'n nej tñg pi'cmuuxy. ¹⁷ E huin'it yajmidoy tzajpcixy tñg ayuc ymñañ:

—Jada je' ñich n'ung'ajtypich huidibi ooy ndzocyich huidibi ooy mïd jotcuyc nayjihuñyijich.

Je mujcu' tuñ ijxta'ni Jesús

4 Chi Dios yjihuñ ñajnicxy Jesús mijtigëduum jay-dëbi je ca'oybi yjot'ixiñyb yhuinma'ñ'ixiñyb. ² Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi nimay:

⁴ —Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jay tzaj-caagyti'ajty nitzinähuiipy, nañ jadu'n nitzinähuiipy tüg'óciy yí ayuc huidibi Dios ycapxp.”

⁵ Chi je ca'oybi mïdnicy Jesús jim Jerusalén, chi ymïdpejty tzajptijc cöduum. ⁶ Chi nimay:

—Pen janch co miich Dios xy'ung'adyii, cödijpnax jii-by naaxcxy, ca' yí nej mjadipy com jaybety jadu'n ymiñ co jadu'n ymina'ñ:

Dios yquexyp yí y'ángeles jigix xycuend'adipy xy-huidzipy mïd yci', ca'ydí ninej mgönepý ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mjot'ixiipy mhuinma'ñ'ixiipy yí mhuindzin Dios.”

⁸ Jadüg'oc je ca'oybi ymïd'ajty Jesús ma tüg copñicx janch cijxpi, e jim yajni'ixiñyday tüg'óciy naax cajp co ooy mïdity oy'ajtin etz mic'ajt. ⁹ E chi nimay:

—Ñich jada miich nmoydähuiipy tüg'óciy, pen miich cojxtina' xyhuindzigëyich xy'ojadatyich.

¹⁰ Huin'it Jesús y'adzooy:

—Huinhuäctucich miich mujcu', com jadu'n yjaybetyity: “Tügpaic yí mhuindzin Dios yí' mhuindzigëhuipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini ángeles ycuend'ajti.

Jesús ytung yajtzondacy jim Galilea

¹² Co Jesús nejhuñy co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhuñ'miñy jim Nazaret, chi ñicxy jim Capernaum, jim ma Zabalón etz Neftalí y'it. ¹⁴ Jada je' jadu'n tuni jajtí jadu'n nej Dios y'ayucnajtzcapxiñyb Isaiás anajty ti cojaay:

¹⁵ Zabalón etz Neftalí ñaaxjot. Je tú'aa huidibi mejypa' huidibi a'oy'amy ma Jordán mij niñ. Jim Galileajäy chinäy huidibi ca' yjudiojäyity.

¹⁶ Yí jay ajcxy huidibi jim tzinaayb agootztuuby ijxpaty ajcxy tüg tiicxin jajin. Je huidijaty anajty ajcxy tzinaayb ma je jibicpi y'anicxy, chi ajcxy ycodicxiy tugi tiicxin jajin.

¹⁷ Ixti huin'it Jesús ytigëy ayuccapxhuäcxp yminañ:

—Jothuimbijtcix, yajmingix yajmejtzcix mjot mhuinma'ñ ma Dios, com yí Dios y'ane'min huingonip yí.

Jesús nimay nimidaax je acxmajtzpi: “Pajamgich”

¹⁸ Jesús tüyöyb anajty ma Galilea mejypa', co ijxpaty metz yëydijc ac tüg quëxpi, hue' anajty yí' je' je Simón,

huidibi nañ jadu'n yxii Pedro, e je jadügpi hue' je' anajty Andrés. Acxmadziñ anajty ajcxy yí' ytung'ajty e jim anajty ajcxy yí' tzachñigöhuich y'acxmadzi'ñ. ¹⁹ Chi Jesús nimay ajcxy:

—Pajamgich, ñich miich ajcxy nyajni'ixiñhuipy nej jäy myaj'ixpiçipy je Dios ytiy'ajt.

²⁰ Huin'it je' ajcxy ixmajtzatay tüg'óciy yí y'acxtzaay, chi ajcxy panicy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yí' ajcxy ma tüg barco mïd yteedy, yí' anajty ajcxy yí' jim chach'adagiiyb yí huidibi mi'acxmajtzciy. Chi ajcxy Jesús yhuoohui. ²² E huin'it ajcxy ixmajtzatay je barco etz yí' yteedy, chi ajcxy panicy Jesús.

Jesús yaj'ixpiçy mayjäy

²³ Huidijttay Jesús ma tüg'óciy Galilea ñaaxjot, yaj'ixpiçy jäy majaty je naymujctac cajp cajp. Capxhuäcxy yí Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy ymïd. ²⁴ Chi Jesús oy yajnejhuñyñi ma tüg'óciy yí Siria ñaaxjot, e chi ajcxy mïdmiñ ma Jesús tüg'óciy huidijaty anajty ajcxy ca'oybi mïd, etz huidijaty anajty ajcxy cixuxy tecyxuxy, chi Jesús yajzoooy. ²⁵ Huin'it Jesús ypanicxi mayjäy huidijaty anajty ajcxy tzinaayb ma Galilea ñaaxjot etz yí Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij niñ.

Je tiy'ajt huidibi Jesús ycapx ma tüg cögot

5 Co Jesús ijxy tüg'óciy je mayjäy, chi nicxy ma tüg copñicx, e chi jim y'ixtacy. E huin'it je' y'ixpiçpiçijc ajcxy yjübigiyy. ² Chi Jesús ytigëy yaj'ixpiçp yminañ jadu'n:

Je pinjaty ajcxy jotcúçip

³ —Janch jotcuyc je jäy ajcxy huidibi nejhuñy co yajmayjajtpy Dios y'oy'ajt, yí' ajcxy paatip Dios y'ane'min.

⁴ Janch jotcuyc je jäy ajcxy huidi yajpatp taj may, yí' ajcxy yajmöhüam jotcuyc'ajtin.

⁵ Janch jotcuyc je jäy ajcxy huidibi yung naxpy jäy'ajtp, yí' ajcxy padaamb tüg'óciy je huidi Dios ti yaj'ahuanñyii.

⁶ Janch jotcuyc je jäy ajcxy huidibi cuydunamb huidibi Dios chojcpy, Dios yí' ajcxy pubedñb.

⁷ Janch jotcuyc je jäy ajcxy huidibi pa'ayoob huenyitim-pinjäyity, Dios nañ jadu'n ajcxy pa'ayohuñb.

⁸ Janch jotcuyc je jäy ajcxy huidibi huädz yjot yhuinma'ñ, yí' ajcxy y'ixiipy yí Dios.

⁹ Janch jotcuyc je jäy ajcxy huidibi ca' ti tzip tzojccixy, com yí' ajcxy Dios ung'adñb.

¹⁰ Janch jotcuyc je jäy ajcxy huidibi yajnixiicp yajni-gapxp mïd je Dios ytiy'ajt yciçpi. Yí' ajcxy idamb ma Dios y'ane'min.

¹¹ Janch jotcuyc miich ajcxy co jäy jibic xytungixy co ni-goob xyñihuambejtcixy etz capxcixy huidijaty ca' ytiy'ajty mïd ñich yciçpi. ¹² Xondaaccix jotcuç'ajtcix co mbadaangixy tüg oy'ajtin jii by tzajpjoty. Nañ jadu'n

ajcxy ixhuidijty pahuidijty je Dios y'ayucnajtzcaxpiybi jecy'ajty.

Miich ajcxy je tudägyjäy ya naaxhuif

¹³ Jadu'n nej caan ca' yajpüch je tzüch jicxy tim jadu'n miich ajcxy myajpaady ya naaxhuif. Pen je caan ca' mhid ti xücx'ajtin, znej jebi nyajtuunim? Ca' y'oc'oyaj-tunity, chi yajnajtzcaxpiyfi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jebi mhuijtzüdzim mgoyüdzim. ¹⁵ Co tüg jin nyajtoyicim, ca' huaad tu'tz ngöjupim. Hue janchtiy co nyajtixcim cix, huin'it jebi xycodicxtaayim jadu'n nej ajt nyajpaatim ma tijc.

¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydebi ajcxy ixipy je oybi huidi miich ajcxy mdumyb. Huin'it ajcxy ojadadipy je mDios teedy huidibi jii by tzajpjoty.

Jesús yaj'ixpicy nej yi' yi Dios ycötujcin

¹⁷ Ca' mhuiinmay co ich ti nmiñich ya co nbiganich je Dios y'ayuc je' huidibi anajty ti jaay Moisés etz je profetitjc. Ca' ich nyajmijaagixa'ñ je cötujcin, ich ti nmiñich co nguyduna'ñich jadu'n nej ymiñ jaaybety.

¹⁸ Janch tiy'ajt jadu'n nej nimaaygixy, je huidibi mimb jaaybety jadu'n tundahuam jaitahuam. Ni tüg letra oy mabaad ymüdzity nicxy ycayajcuyduñ. ¹⁹ Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiy-dac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Ich miich ajcxy nimaayb, pen ca' miich ajcxy jac'oy mdungixy ca'ydí fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuigyxy jadu'n nej yi m'ap mdeedy ajcxy ayuc yajhu'i'my: "Ca' jäy myaj'ögip; e pin anajty jäy yaj'öcp ypaadip je tzaachypi." ²² Ich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xiidijp tzuudijp, yajtiy-dunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuidzigi'ñ ma Dios ytijc, e pen jim jäy metzgodyii co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhu'i'm je huindzigi'ñ ma je altar yhuinduu, e nicx jayijp nayaj'oyihuñ mhid je migüg, huin'it mhuiimbedip e chimgyeyecy je mhuidzigi'ñ.

²⁵ Tzocj naygapxjotcidägi mhid je midzip, pen yam mhid tüyöy ni'am tü'am, ca' jecyity co je midzip xy-cäyegip ma juez, e je juez xycäyegip ma je policia, e je nicxy xypidägy pujxtigoty. ²⁶ Janch tiy'ajt ich miich nimäy co ca' jii by mbidzimipy ixti cooni mgüejtahuipy je meeñ.

Jesús yaj'ixpicy co ca'p ndundigóoyimipy mhid huingbi töxyjäy

²⁷ Miich ajcxy mnejhuigy co jecyip tiy'ajt ymina'ñ: "Ca' mhidundigoyipy huingbi töxyjäy." ²⁸ Ich miich ajcxy nimaayb, pen ji pin huindicxy tüg töxyjäy, e jot'adiyb nejaty, ti je' anajty ñitundigooyfi ma yjot yhuinma'ñ.

²⁹ Pen yi mhuiin a'oy'amybi xyajtundigoyamb tim yajpidzim; jac'oy co tüg'idu'mbi mhuiin ytigoyipy ca'ydí co cixyca'px mnicxipy jinjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydí co mminicxipy metz mgi' jinjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: "Pin ixmajtzp ytöxyijc, huen möhuipy tüg necy ti ycixpi co ñay'ixmajtzigixy." ³² Ich miich ajcxy nimaayb, pen ji pin ixmach ytöxyijc, e ca' anajty ti ytundigooy mhid huingbi yeydijc, je yeydijc anajty nigiydeyiyb ytöxyijc co anajty ytundigooy mhid huingbi yeydijc; pin yeydijc pijcp mhid je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tiibi n'ahuaniyim ma Dios yhuinduu

³³ Miich ajcxy mnejhuigy nej jecy'ajty m'aptijc mdeedytjc ajcxy yajnimay: "Ca' nigo ti m'ahuanihuipy, mguydunipy jadu'n nej anajty ti mmina'ñ." ³⁴ Per ich miich ajcxy nimaayb: ni mga'ñbaadip ni mgacapxpaadip; ni mgamina'nip; "y'ijxpy tzajpjotypt," com yi' Dios chinaydac. E ni mgamina'nip, "y'ijxpy naaxhuif-ybi," com Dios yajpatp oy ytimymaajty. E ni mgami-na'nip; "y'ijxpy Jerusalén," com jim je' Dios chajptijc; ni mga'ñbaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minangixy: "oy" o "ca'." E pen miich ajcxy anaxy jaccapx jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuigy co jecy'ajty yajmina'ñ: "Pen ji jäy mhuiin xyajpidzimi, nañ tim jadu'n yhuin myajpidzimipy; pen ji migüg mdiitz xyajpidzimi, nañ jadu'n myaj'ahuimbidity." ³⁹ Per ich miich ajcxy nimaayb: Ca' myaj'ahuimbidity jibicpi ma migügtijc; pen ji pin xy-coxy ma mhuiñyijp tüg adu'mbi, jac tim mo' jadüg adu'm'amybi. ⁴⁰ Pen ji pin xyxxy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tzimy xyajminicxa'ñ tüg kilómetro jiguemity, yajnicx jac tim jadüg kilómetro. ⁴² Pen tijaty xypijct-zoohui, mo'. E pen ji pin xyminuucxa'ñ, yajnuucx.

Co ndzojcm nmidzip

⁴³ Jadu'n ymiñ jaabyety nej jecyip Moisés yjay: "Migüg'adii yi' huidibi xymigüg'ajtp, e midzip'adii yi' huidibi xymidzip'ajtp." ⁴⁴ Iich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohuñ ma Dios huen y'oy'ajtin paady yi' huidibi xyñigapx xyni'ojiiyb, e nañ m'oyjyäy'at yi' huidibi xyca'ixamb. ⁴⁵ Huin'it miich ajcxy xy'ung'adii by yi' Dios tzajpjoty pi' hidibi yxii yajtiicxp yajjajp ma oyjäydijc etz ma jibicjäy-dijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je hidibi xychojcp, ¿ti jäygidacacn yi' m'ocpadamyb? Nañ jadu'n yi' ajcxy yja'idiitcp yi' pocyjäydijc etz yi' yajcogüejtpidijc. ⁴⁷ Pen miich ajcxy mgapxocxyp yi' mjugymigüg, ¿ti oybi yi'? Nañ jadu'n ajcxy yi' yja'idiitcp yi' hidibi ajcxy ca' Dios nejhuñygyx. ⁴⁸ Jäy'ajtcix tudägy jadu'n nej ajcxy yi' mdeedy tzajpjoty pi' ytudägy.

Jesús yaj'ixpicy co nduunim oy yjäy'ajtin

6 Ca' mdungixy je oybi ma jäy y'ixy yhuindixy miid co mdzachyahuindicxaangixy co mdungixy oybi. Pen jadu'n m'idiitczixy mDios Teedy huidi jii by tzajpjoty tzinaayb, ca' ajcxy xymöhuañ je oy'ajtin. ² Paady co mbubedipy mmigüg, je ayooobi jäy huidi yajmayajtpy tijaty, ca' huaad mnigapxy mnimiydägy o mnaygö-mayii co anajty ti mmöy tijaty. Yi' jadu'n idiitcp je jäy huidi mij cix nayjihuiyip huidi anidaacp co huen jäy y'ixyii mijpidägyii co anajty jadu'n y'idich. Janch iich miich ajcxy jadu'n nimaaygix co yi' ti patcixy je oy'ajtin. ³ Co miich mmöhuiipy mmigüg tijaty yajmayajtpy, hue' janchtiy mdunipy ca' myajnejhuñhuipy huidi miid mnaymigüg'adyii. ⁴ E co miich amoñ m'idipy, mDios Teedy huidi ijxp co amoñ tijaty mduñ, je' xymöhuamb tüg oy'ajtin mayjäyduum.

Jesús yaj'ixpicy nej Dios mmibijctzoohuim

⁵ Co miich ajcxy Dios mmibijctzoy, ca' jadu'n m'idiitczixy jadu'n nej je jäy hidibi capxtacp ma Dios huin aguy ahuac aguy. Yi' ajcxy capxtacp ma Dios huäctina' jii by tzajptigoty jaydebi jäy y'ixiiyb etz ymijpidägyiib. Iich jäy jadu'n nimaayb, co jadu'n oy'ajtin'adii by. ⁶ E co miich Dios mmibijctzoy, nicx tigoty etz m'agähuipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtin xymöhuiipy mayjäyduum.

⁷ Com Dios mmibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idiitczixy huidi ca' nejhuñygyx Dios ytiy'ajt. Yi' ajcxy huinma'ñ ypidägy co miid ajcxy ymay'ayuc huin'it ajcxy ymidoohuiiyb.

⁸ Ca' jadu'n m'idiitczixy jadu'n nej je' ajcxy; mDios ñe-jhuñyib ti miich ajcxy myajmayajtpy ma anajty ca'ni mbijctzooyñi. ⁹ E jadu'n miich ajcxy Dios mibijctzoohuipy, jadu'n mina'nip:

Dios Teedy, miich hidibi tzajpjoty tzinaayb; huindzigäy miich mxii y'ity.

¹⁰ Huen miñ ya miich yi' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jii by tzajpjoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey hidibi iich ajcxy ndundigooyb, jadu'n nej iich ajcxy meecxyich hidibi ajcxy xymidundigooybich.

¹³ Ca' m'a'ixii co iich ajcxy nhuinma'ñ tigoyipich. Yajnihuaatzcich ajcxy ma yi' jibicpi. Co miich yi' mje' je cö-tujcin, je mic'ajtin etz je oy'ajtin huinixii huinitiempo. Amén.

¹⁴ Pen miich ajcxy mhuinmeecxyp je hidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtim jaygaay

¹⁶ Com ajcxy m'ida'nip jaygaay jay'ügy (mñna Dios mmibijctzoogixy), ca' m'nyabidäaccigixy tajy may, jadu'n nej ajcxy idiitczixy yi' hidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuñyijp jigix jäy ajcxy oc'ixiiyb co jaygaay jay'ügy y'ijtcixy; jäy jadu'n oy'ajt'adii by. ¹⁷ Miich ajcxy co m'idipy jaygaay jay'ügy jotcujc naybidägi, caax mgo-huajc etz puj mhuin mjijp, ¹⁸ ca'ydi myajnigüexigü mayjäyoty co m'ity jaygaay jay'ügy, hue' janchtiy myaj-nigüexigü ma je mDeedy hidibi ca' yaj'ixy; e je mDeedy hidibi ijxp hidibi miich ajcxy ca' mduñ ijxna' quëxna' yi' xymöhuiipy oy'ajtin mayjäyduum.

Je jugy'ajtin tzajpjoty pi'

¹⁹ Ca' nigü m'adzocy hidibi ya naaxhuñ, je' co ya huindigooyb oy ytimtijity hidibi yi' huech yajhuindi-gooyb, hidibi tougaayip etz ma je meetzpi ajcxy meetzcixy pigicxixy tijaty. ²⁰ Je' miich nijot'ajtcixy je' oy'ajt hidibi miich ajcxy Dios xymöhuamb jii by tzajpjoty ma ca' huech yajhuindigooy ni ti, e nañ ni yca-tougaayii ni ti, etz ma je meetzpi ca' ajcxy meetzcixy pigicxixy tijaty. ²¹ Ma miich ajcxy miidity je oy'ajt nañ jii-by ajcxy mjot mhuinma'ñ pidäg.

Yi' mhuin jadu'n yi' nej tüg tiicxin

²² Yi' mhuin yi' yi' jadu'nip nej tüg tiicxin jajin ma mninix, e paady pen ca' miich yi' mhuin xyajtundigoy, tüg'ócixy mjot mhuinma'ñ huädz yi'. ²³ Pen miich mhuin xyajtundigoyb nañ jadu'n mjot mhuinma'ñ huidi miich miid ca' y'oyity, jadu'n yi' nej coodzpi ijac tim nigü ca' y'oyity ca'ydi je coodzpi!

Dios etz je comeñ'ajtin

²⁴ Ni tüg pin ca' huaad miid tuñ metz huindzin com mijotma'ti tüg je', e jadügpi chogipy; o ixtijipy tüg e jadüg ymigüg'adii by. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yí' yjáy

²⁵ Paady iich miich ajcxy nimaaygixy: Ca' mdzachuinaaygixy ti ajcxy mnitzináhuipy, ti ajcxy mgayipy m'ügipy o ti ajcxy mhuit'adhiyb mducxy'adhiyb. MDios yí' ti xymoogygixy je mjogy'ajtín, e paady ycixpi yí' nejhuiyb ti ajcxy myajmayajtpy. ²⁶ Oc'ix miich ajcxy yí' joon huidi queec-huidijtp. Yí' ajcxy ycaniipcixy ycatungixy, nañ ni ca' yí' ajcxy yujcpijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yí' yjicxyp. E miich ajcxy mjactzoobatp ca'ydi yí' joon. ²⁷ ¿Pin ji ma miich ajcxy, ooy mij jahuinmay, jébi tüg nuux yjacyeegyí?

²⁸ ¿E na'amý co miich ajcxy mdzachnidajy mdzachnimý mïd je mhuit mducxy ycixpi? Oc'ix miich ajcxy nej yoñ tüg je pijy huidi yajpatp tun nigap. Ni yí' ycatuñ ni piidy. ²⁹ Per janch tiy'ajt jadu'n nej nimaaygixy, ni je comeefyjáy huidi yxí rey Solomón, ni ycaquixy je' yxojin mïd je pijy. ³⁰ E pen mDios xojxpy jadu'n je aay ujtz cham etz tzojcy ytíztáy ñicxtáy, jac nigí miich ajcxy Dios xymöhua'ñ huidibi myajmayajtpy, miich ajcxy huidibi hueeni mmibijcin. ³¹ Paady ca' nigoobi mdzachuinaaygixy ma ajcxy mbaadip ti mgayipy m'ügipy o ti mhuit'adhiyb mducxy'adhiyb. ³² Yí' jáy ajcxy huidibi ca' mibicy yí' Dios oy tzach nijot'ajtcixy jadaayaabi, per miich mDeedy huidibi tzajpjoty je' ñejhuíyb ti miich ajcxy myajmayajtpy. ³³ E pen miich ajcxy mbidacpy Dios jayijp ma mjot mhuinma'ñ etz mguydun ajcxy yí' y'ane'min, huin'it miich ajcxy Dios xymöhuiipy tijaty myajmayajtpy. ³⁴ Paady ca' mhuinmaaygixy cham mïd je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huidi cham nminajx nyajnaxim.

Ca' mbocy icy yí' mmigüg

7 Ca' m'ix'ijxpy mba'ijxpy ti mmigügtijc ytundi-gooyb, jigix ca' Dios xytydunipy chaachytunipy. ² Pen miich m'ix'ijxpy mba'ijxpy mmigügtijc ti ytundi-gooyb, nañ jadu'n miich Dios xytydunipy xychaachytunipy, e yí' quipxi'ñ huidibi miich mhuaamyb quipxi'ñ, nañ yí' Dios yajtunamyb ma miich. ³ ¿Nej co miich m'ixy huidibi mmigüg ytumy e hueeni ytundigooyb, e ca' mnay'ixyii huidibi miich jac mij mdundigooybi? ⁴ ¿Nej jébi mmigüg m'ocnimäy: "Nbubedamybich miich ca'ydi mjacocytuñ", e miich yam m'ocmïdpi jac mij pocy? ⁵ Miich c'm mnayhuin'iiñy. Nicx jayijp mbocy mgaydey ocyajhuadz, huin'it jébi mbubety je mmigüg. ⁶ Ca' mmöy yí' jibicjädyijc huidibi Dios yjé'ajty co nicx camij'ix camijpidaaccixy; ni mgayegipy Dios y'ayuc ytiy'ajt ma yí' jáy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yí' Dios e yí' xymöhuiipy ajcxy; ix-taaygix, huin'it mbáatcixipy; cogapxiygix e ahuadzíp ajcxy mdijc aguu. ⁸ Com pin tijaty pijctzoob ypaatyp yí';

e pin tijaty ixtaayb ypaatyp yí'; e pin cogapxiyb ma tijc aguu, yaj'ahuaatzip ytijc aguu.

⁹ ¿Nej ji jada' miich ajcxy nidügti co m'ung pijt-zoohuiipy tzajcaagy nej mmöhuiipy tüg tzaaji? ¹⁰ ¿O pen ypijctzooby tüg acx nej mmöhuiipy tüg tza'ñi? ¹¹ Miich ajcxy oy m'ibicjäyity e m'ajtpy ajcxy nej m'ung m'anäg mmöhuiipy je oybi. ¿Nigí Dios Teedy tzajpjoty möhua'ñ je oybi pinjaty pijctzoob!

¹² Tzinaaygix tiydudägy mïd je mmigügtijc, pen miich ajcxy mdzojcpy co je mmigügtijc chinähuiipy tudägy mïd miich ajcxy; com jadu'n y'ane'my Moisés yley etz yí' Dios y'ayuc najtzcapxiyb ajcxy ñecy.

Je xützpi tü'aa

¹³ Tigiygix ma yí' tigiyiydac xützpi: yí' tigiyiydac etz yí' tü'aa huidibi ja'tp ca'oydactuuby mij huin yí', e may jáy ajcxy oy ji ytigiyiygixy. ¹⁴ E janch je tigiyiydac etz yí' tü'aa huidibi ja'tp ma je jugy'ajtín huinixibi, xüdz je' etz tzip naxiyñi; janch tim hueeni jáy huidibi ji nicxiyb.

Yí' jáy yhuinma'ñ mïd ñiguëxgy pen oyjäy o pen ca'

¹⁵ Nayguend'ajtigix mïd yí' jáy anijatyipi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ mïdity; nigoobi ajcxy jadu'n ñaybidägyii, ymïd ajcxy jibic-huinma'ñ. ¹⁶ Miich ajcxy jébi m'ijxcapy nejaty ajcxy mïdity chinaayin yjugy'ajtín; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huidibi ooy y'oyity, oy yí' ytiim'aty. Je quipy huidibi ca' y'oyity, ca' yí' oy ytiim'aty. ¹⁸ E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹ Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jébi mnejhuüy jadu'n nej jáy yjáy'aty co m'ixipy nej chinäy.

Ca' nidüg'óciy jáy ajcxy ytigëhuipy ma Dios

²¹ Ca' m'inaanim nidüg'óciy jáy ajcxy ytigëhuipy jii by tzajpjoty huidibi xyñimaaybich: "Huindzin, Huindzin", jéda'ajty ajcxy tigëhuamb huidibi ycapxymidooyb je Dios chojcin y'ane'min. ²² Mayjáy oy mina'na'ñ huin'it xí huin'it tiempo: "Huindzin, Huindzin", ti iich ajcxy ngapxhuäcxy miich m'ayuc, e mïd miich mxí ti iich ajcxy nyajpidzimy je ca'oybi; etz mïd miich mxí ti nduñ iich ajcxy mij huinma'ñ. ²³ Huin'it nimähuiipy: "Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy."

Je mejtznajxpi je tiy'ajt cop

²⁴ Nidüg'óciy pinjáy huidibi xymibijcpich etz midooyb jadu'n nej iich n'ane'myich yí' ajcxy quipxyjaty mïd je jáy huidibi cohuinma'ñ huidibi ytijc ycojy ma yhuingixity. ²⁵ Co ymicpojtüy etz ycomy je mij ñí, ca' ypadyii ñigom je tijc, je' co anajty cixy je' ycojyity. ²⁶ Per yí' ajcxy huidibi midoob e ca' cuyduñ huidibi ngapxpih, je' jadu'nip nej tüg jáy huidi janch loci huidi ytijcco ma

pu' jot. ²⁷ Co ymiñ je mic poj tuu, chi ycomy je mij nii. Chi yciday je ytijc; mij ayo'n oy yjajti.

²⁸ Co Jesús ycapxtay ymiydactay, chi je jāy ooy huin-may jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tūg huídibi cōtujcin miid, ca' yjadu'nity nej je escribas ajcxy.

Jesús yajtzögy tūg jibic nibützpa'mm#dipi

8 Co Jesús oy chooni ma je cōgop, chi ypagidaci mayjāy. ² Huin'it ñimiini tūg jāy jibic pützpa'mm#dipi. Chi ycojxtinay'ahuñy ma Jesús yhuinduu. Chi minañ:

—Huindzin, pen m'a'ixiyb jēbi xyajtzögyich.

³ Huin'it Jesús nidoon je jāy. Chi nimay:

—Ndzojcpych, jēbi mdzögy.

Co Jesús jadu'n nimay je pa'mjāy huin'ityi je ypützpa'm oy ytigooy. ⁴ Chi Jesús nimay:

—Ca' pin myajnimāy; nicx janchtiy ma je teedy.

Minicx tūg huindzigi'ñ huídi Moisés y'ane'my. Huin'it jēbi yi jāy ajcxy ixipy co ti m'agidāgy.

Jesús yajtzögy tūg capitán romano ymang

⁵ Co Jesús yja'ty jim Capernaum huin'it tūg capitán ñimiini e ycohuanñy. ⁶ Chi ñimaayi:

—Huindzin, jim ñich tūg ndumbi ma ñich ndijc huídi tim cōcnaayñip, ca' y'ocyücxni.

⁷ Chi Jesús minañ:

—Ñich nicxy nyajtzögy.

⁸ Chi je capitán y'adzooy:

—Huindzin, ca'p ñich n'oyjāyity, ca' yhuaadity mdigihuiipy ma ñich ndijc, jēyi miich nigoo capxy e ti anajty ñich ndumbi chōgy. ⁹ Ñich nañ jadu'n ane'my n'ityich, e nañ nm#didich soldadtijc c'ā'm. Co ñich nimāy: "Ñicx", nicxp; e co ñich nimāy: "Min", mimb; e co n'ane'myich je nbōdumbich huen tijaty tun, ytumyb.

¹⁰ Co Jesús jadu'n midooy, chi nigoobi ycijxy ycuejty. Chi ajcxy nimay huídi pahuidijtip:

—Janch tiy'ajt jadu'n nej nimaaygixy, ma Israeljāy ymiñ, ca' jadu'n ti nbaadyich huídi oy mibicy jadu'n nej jadyaabi yēydijc. ¹¹ Ñich jadu'n nimaayb co mayjāy oy miinaangixy x#pidzimy'amy x#cidāgy'amy, chi ixtāga'ñ quipxyi mid Abraham, Isaac etz Jacob jiiiby ma Dios y'ane'min. ¹² Je judío jāy huídibi ixipy ajcxy jēbi yjatzināy jiiiby tzajpjoty, je' ajcxy nicxamb agootztuuby, jiiiby ajcxy yj#huiipy yāxipy etz y t#tzmúcxipy yt#t#zueedipy.

¹³ Huin'it Jesús nimay je capitán:

—Ñicx ma mdijc. Jadu'n nej miich xymibicyich, ti ñich yam nguyduñ.

Chi je tumbi oy chōgy tim huin'it hora.

Jesús yajtzögy Pedro ym#d töxyjāybi

¹⁴ Chi Jesús ñicxy ma Pedro ytijc. Chi ijxy je Pedro ym#d co jim cijx'am ycōcnāy miid je toyba'm. ¹⁵ Co Jesús c#nixajy huin'it je toyba'm ñajxy. Chi pid#gy. Chi mic'amy ni'ixiy je caayin uucin.

Jesús yajtzögy mayba'mjāy

¹⁶ Co oy chu'ñyñi ycoodziñyñi huin'it yajmimiñ ma Jesús may je huídi ca'oybi miid. E miid yi' y'ayuc yjē-da'ajty ypidzimday je ca'oybi, e huin'it tūg'ócyi je pa'mjāy chooctay. ¹⁷ Jadyaabi je' ytuni yjajti jigix yajcuyduñ jadu'n nej je profeta Isaías minañ: "Yi' c'm ajt nyuu nba'm ti xyajtzocaaayim etz yi pijcin ixin ti yajnicxtāy."

Je pinjaty anajty panicxam Jesús

¹⁸ Co Jesús ijxy janch mayjāy anajty ti yjübigiyii, chi nimay co huen nájxcixy jim'amy mejy ninaxy. ¹⁹ Huin'it ñimiini tūg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ype'ñ. Per ñich, je jāy huídibi tzoon jiiiby tzajpjoty, ca' nm#didyich ma nmähuibich ma nbócxibich.

²¹ E jadügp#i ydiscípulo yminañ:

—Huindzin, nicx jayijp ndeedyich n'ocyajnaaxtigyich huin'it nbanicxip.

²² Huin'it Jesús y'adzooy:

—Pamiingich, ixmajtzicx yi öcpi huen ym#öcpi yajnaaxtigyii.

Jesús j#pcogapx#y je micpoj etz je mejy co anajty ooy ypid#gy

²³ Huin'it Jesús oy ybarcotigñyñi. Chi ypadzooni je ydiscípulos ajcxy. ²⁴ E jim anajty ytüyöy mejyhuingxy, huin'it mic poj ñaymibidzimi. Janch mic y'ocpidicni je mejy jig#o jig#o je barco cayajnidigoy, pero Jesús anajty chachmaab. ²⁵ Huin'it oy ym#gapxyii yajmäybid#gyii je' ydiscípulos ajcxy. Chi ñimaayi:

—Huindzin, ocyajtzooqich ajcxy! ¡Cheeby ñich ajt n'ocquiinim!

²⁶ Huin'it Jesús y'adzooy:

—¿Na'amy co mdzachtzigñygyixni? ¡Miich ajcxy hueeni m#dity mibijcin!

Huin'it Jesús ypid#gy. Chi m#gapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occx y'occuejtni chachminaangixy:

—¿Pin yēydijc jada jada', co je mejy je poj ti ycapxym#doyii?

Je Gadara jāy ajcxy huídibi anajty ca'oybi miid

²⁸ Co Jesús yja'ty ma yi ñiba' ma yi Gadara ñaax ycapj, chi metz yēydijc, huídi anajty ca'oybi miid oy yjijp-coyöy#yii anajty ajcxy, ti choon ma je öcpi jut. Yi jāy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ym#gapxqueeci:

—¿Ti miich mdunamyb miid ñich ajcxy, Jesús, miich Dios y'ung? ¿Nej ti mmiñ jayijp co xychaachtungixich ma ca'ni x# tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi yminañ:
—Pen miich xyajpidzim ñich ajcxy, xyaj'adigiigixy xyajjottigiigixy yi may'idzim.

³² Chi Jesús ñimay yi' ajcxy:

—Nicxcix.

Huin'it ñihuaatzi je yëdyjc je ca'oybi. Chi oy ytigiiygixy je ca'oybi ma je idzim. Huin'it je idzim oy ñiigöböyictäy. Jiilby ajcxy yjictäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy miid je tzig'iñ. Chi co ajcxy yja'ty cajpjoty, huin'it ajcxy ytigiiy miydaacpi jadu'n nej anajty ti ytuñyii ti yjadyii. ³⁴ E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaniiy co huen pidzimni ma je naax je cajp.

Jesús yajtzögy tüg jäy cämätpi tecymätpi

9 Chi Jesús ybarcitiigiiy. Chi ñicxy jim'amy mejyñaxy. Chi oyjäty ma yci'mgajp. ² E jim yajmimiñ tüg yëdyjc huidibi anajty cämät tecymät. Yajciy ymiñ ma'ndza-ayjoty. E co Jesús ijxy co ymiid je miibijcin, chi nimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijëjty je escribas ajcxy, je ley yhuindzin, jot'ajti: "Jadayaabi yëdyjc capxtigooyb yi' ma Dios co jadu'n yminañ." ⁴ Com Jesús ñejhuñy jadu'n nej anajty ajcxy je jäy tzachjot'ajtigixy, chi ajcxy nimay:

—¿Nej co ajcxy jibic mdzachjot'ajtigixy jotjoty huinma'ñyoty? ⁵ ¿Huidibi ca' chipity, co nminá'ñibich: "Ti yi mbocy nhuinmeecxyich", o co nminá'ñibich: "Pidëg etz tyyöy"? ⁶ Ñich ndzojpcyich co miich ajcxy mhuiñhuñy co ñich ti ndzoñich tzajpjoty e paady nmñdich je cötujcin ya naaxhuiñ e jëbi nhuinmeecxyibich pocyjäy ajcxy.

Huin'it Jesús nimay je cämätpi tecymätpi:

—Pidëg, huijtzëg yi mdögy etz nicxni ma mdiç.

⁷ Chi je cämätpi tecymätpi ypidëgy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuñy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nimay Mateo: "Pajamgich"

⁹ Co Jesús oy chooni jim, huin'it ijxy tüg yëdyjc, yxñ Mateo, huidibi anajty ifaayb ma yajcogüejttac. Chi nimay:

—Pajamgich.

Huin'it Mateo ytinayëgy. Chi panicxy Jesús.

¹⁰ Jadu'n ytuni yajti co Jesús jim ycaay ma Mateo ytijc, e may nañ jadu'n ymiñ yajcogüejtpidëc etz pocyjädyjc. Chi ajcxy jim tú'ciy y'ixtactay miid Jesús etz miid yi' ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mhuindzin ycaymucy miid je yajcogüejtpidëc je pocyjädyjc?

¹² Co Jesús jadu'n midooy huin'it nimay ajcxy:

—Ca' yajmayjaty tzoydumbi huidi ca' ajcxy ypigyii, jëyi huidi ajcxy pijcip. ¹³ Nicx ixpijccixy nej ymiñ jaaybety ma Dios ñecy: "Ñich ndzojpcyich co miich ajcxy miid'adipy je pa'ayo'n, ca'ydí co myajhuindzigëy tijaty iyujc." Ca' ñich ti nmiñich ma je jäy ajcxy huidibi ca' pocy miidty. Ñich ti nmiñich miid yi pocyjäy ycipi co huen jothuimbijttaaygixy ma Dios.

Amidoogixy Jesús miid je' ycipi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co ñich ajcxy etz fariseo ajcxy ayuu'ijtcixy, e yi' ajcxy huidibi xymiidhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcip yajnixiñduñy, pen quipxy yam yajpaady miid je huidibi pijcip? Minamb je xi' je tiempo mina je pijcip yajzoniiyb, huin'it janchtiy ajcxy jëbi y'ayuu'ajtcixy.

¹⁶ Ni pin tuc huit ca' agiyiiy miid tüg pedas jemyhuit, com nigí je tuc huit ñajtzchdzëy, chi nigí o'ctiy yajtni.

¹⁷ Ca' pin pidägy vino ñi ma tucpi cochac, ychdzip je', e tüg'öciy anajty ti y'ayoodäy je vino ñi miid ñigochac. Pidägipy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñiix, etz je töxyjäy huidibi Jesús yhuit niidoni

¹⁸ Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuñy ma Jesús yhuinduu. Chi yminañ:

—Nniixich ti y'ögy. Nicx ma ñich ndijc etz mgñixajipy, jugypigipy ya.

¹⁹ Huin'it Jesús ypidëgy. Chi ñicxy miid je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxi' ybo' ti mi'ijtiyñi majmetz jimijt. Chi niidoni Jesús yhuitpa'. Huin'it ñajxy je' ypa'm. ²¹ Jadu'n anajty ti yjot'adyii: "Oy Jesús jëda'ajty yhuitpa' nnidónibich, ti ñich anajty n'agidägyich." Huin'it Jesús yhuac-huimbijty. Chi huindixpejty je töxyjäy. Chi nimay:

—Jotcujc'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc miid je ymigügtijc ajcxy huidi chachyaaxcixy co anajty ti y'ögy je töxy'anäg. ²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigiiy ma anajty je töxy'anäg huijznäy. Chi majch ma yci'. Chi ypidëgy.

²⁶ Chi je jäy oy yajnejhuñydaayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadu'n:

—iPa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytigüy tigoty, chi Jesús yajtiüy:

—¿Nej mmibijcipy miich ajcxy co jëbi nyajhuindicxë-cixy?

Huin'it je' ajcxy y'adzooy:

—Mibijcy ïch ajcxy, Huindzin.

²⁹ Huin'it Jesús nidoñ je jäy ajcxy huintzpi ma yhuuin. Chi nimay ajcxy:

—Jadu'n nej miich ajcxy mmibicy, jadu'n ytuniib yjadiib.

³⁰ Chi je' ajcxy y'ijxëgy. Huin'it Jesús y'ane'min pidacy:

—Ca' huaad pin myajnejhuüigixy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxëcigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi mïid. ³³ E co Jesús yajpidzimy je ca'oybi, chi je mayjäy ooy ycixy ycuejty ajcxy. Chi ajcxy minaangixy:

—Ni camina jadu'n ycajay'ixy ya ma jada Israel naax cajp.

³⁴ Per je fariseos jadu'n yminaangixy co Jesús je' mïid je ca'oybi ymic'ajt yajpidzimy ca'oybi ma jäy.

Jesús ymïid pa'ayo'n ma mayjäy

³⁵ Jesús jadu'n yhuidijty cajp cajp yaj'ixpijcy majaty tzajptijc. Yajhuingapxëy je jäy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity. ³⁶ Co Jesús jadu'n ijxy je mayjäy, chi oy pa'ayooni co y' ajcxy ca' mïidity ni pin huidibi jëbi ñajtzcapxëy Dios y'ane'min. Y' ajcxy jadu'n yajpatp nej cöbixy huidi ca mïidity cuend'ajtpi. Ca' nejhuüigixy pin y'ane'mip e pin ypanicxip. ³⁷ Huin'it Jesús nimay y' ydiscipulos ajcxy:

—Tiy'ajt y', janch mij je tung e hueeni je tumbidijc.

³⁸ Paady pijctzou miich ajcxy ma Dios co huen quexy tumbidijc ma y' ytung.

Jesús huin'ixy je majmetz ydiscipulos

10 Huin'it Jesús huoy je nimajmetz discipulos. Chi moy ajcxy cötujcin jëbi huaad yajnihuäch je huidi ca'oybi mïid. Etz nañ jadu'n yaj'agidägip huen ytim huidi yuu huen ytim huidi pa'mity.

² Jada je' je nimajmetzp yxii: Simón, huidi nañ jadu'n yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi ycëyjc Jesús agojix.

Jesús quejxy je' ydiscipulos ajcxy ayuccapxhuäcxpi

⁵ Chi Jesús quejxy y' nimajmetzpi, e jadu'n najtzcapxëy ajcxy:

—Ca' ajcxy mnicxipy ma je naax cajp ma ajcxy je jäy chinäy huidibi ca' ajcxy Israeljäyity. Ni mgatigëhuipy ajcxy ma Samaria naax cajp. ⁶ Nigi jac'oy co ajcxy

mnicxipy ma je Israeljäy huidibi ca' nejhuüy huidibi ca' paduñ Dios ytiy'ajtin. ⁷ Nicx miich ajcxy capxhuäcx Dios y'ayuc co ti yhuingoní Dios y'ane'min. ⁸ Yaj'agidaaccixy yuujäy pa'mjäy huidijaty pützpa'm ymïid. Myajjugypjccixy tibi ögy. Myajnihuädzip huidi ca'oybi ymïid. Ninigoobi miich jada cötujcin ti myajmooygixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'amgixpi. Mminicxcixy jëda'ajty y' mhuit huidi mïid ma mniñicx. Ni mgaminicxip huingbi mgig etz mdajc; com ycopicity co je cajpjäy xyajcäygyixy xyaj'üuccixipy miich ajcxy.

¹¹ Co anajty mjäty miich ajcxy ma tüg cajp nidu yajtju pinjäy jim tudäcyip. Jim ajcxy mhui'mipy ma je' ytiyc ixti cooni ajcxy mdzoonip. ¹² Co anajty miich ajcxy mdigëy tigoty huin'it mgapxpcxcixipy je codijc jadu'n nej tzo-cy. ¹³ E pen je codijc ymihuaad'ajtpy, yejccixy jim ñbocxin capxpoocxin. E pen je jäy ca' ytudägyity, ñaadig'adip huidi anajty ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tijc o ma je cajp. Chi ajcxy mdecy huinnebipy, je' je' je tiy'ajt co ca' miich ajcxy ti pocy mïidity. ¹⁵ Janch tiy'ajt jadu'n nej nimaaygixy co anajty je xii tiempo paady ma anajty yajtiyduna'ñ je naax-huüijy, jac nigi yajtzaachytuna'ñ y' ajcxy ca'ydi y' jäy ajcxy huidibi tzinaayb ma Sodoma cajp etz ma Gomorra cajp.

Ixhuidijtin pahuidijtin

¹⁶ ¡Ocmidoogix! ñich yam miich ajcxy nguejxyp majaty y' jäy huidi jibic-huinma'ñ mïid. Jadu'n nipaady nej ñich nguexyich cöbixy ma je lobi. Huijy cujc ajcxy mnaypidägëb jadu'n nej tza'ñ, per yung naxy jadu'n nej muuxy. ¹⁷ Mnayguend'adib ajcxy je' co y' jäy ajcxy xycëyegaangixy ma ajcxy mijtungmïidpi etz myajhuobaangixy ma je judiojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiy ajcxy mïid ñich ycixpi; e jim ñich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huidibi ca' yjudiojäyity. ¹⁹ Co anajty ajcxy xyajcädigëy je mijtungmïidpi, ca' ajcxy oy mhuinmaayipy nej m'ocnimähuipy. Co anajty paady je tiempo, huin'it ñich miich ajcxy myajnimähuipy nej ajcxy mgapxipy. ²⁰ E je ayuc huidibi miich anajty ajcxy mgapxpy, ca' miich anajty je' ajcxy m'ayuc'ajtigixy, je Dios Teedy anajty yjihui'ñ, je Espiritu Santo, xyajcapx miich ajcxy.

²¹ Huin'it y' jäy ajcxy ñaygëyegánigixy miñ xyipy tüg quëxtijc co huen yaj'ögyii. E je ungdeedy cëyega'ñ y'ung; je ung'anäg mibidiga'ñ je ytaj yteedy etz yaj'öcpi ajcxy. ²² Tüg'öciy je jäy ajcxy ca' ajcxy xy'ix'anipy xy-choga' nipy mïid ñich nxii ycixpi. E pin xymibijcpich amumdügjot ixti mabaad y'ögy, y' ajcxy y'alma tzögipy. ²³ E co anajty miich ajcxy jäy xy'ixhuidity xypahuidity ma tüg cajp, nicxix ma huingbi cajp. Janch tiy'ajt jadu'n nej nimaaygixy co ca'ni anajty mgapxhuäcxtäy ayuc tiy'ajt ma tüg'öciy je Israelcajp co nhuimbiditych, ñich, je jäy huidibi tzoön tzajpjoty.

²⁴ Tüg yaj'ixpijcpí jac nigí mij'ajtin mîdity ca'ydi je hui-di ixpijcp, e tüg huindzin jac nigí mij'ajtin mîdity ca'ydi je' ytumbi. ²⁵ Jêb jotcuic idipy je discípulo co jadu'n yajpaadipy jadu'n nej yhuindzin, e je tumbi jotcuic idipy nej yhuindzin. Pen jây minamb co ñich nmîdich ca'oybi, jac nigí ymina'na'ñ co miich ajcxy mîdity.

Pin jêbi yajtzigÿ

²⁶ Ca' ajcxy mdzigÿ yí jây ajcxy. Ca' ji ni ti yûch ity nicx ycaniguëxÿ; nañ ni ti ji ycayajtuñ ayûch ameech nicx ycayajnejhuÿ. ²⁷ Huidi ñich miich ajcxy ayûch nyajni-maayb, capxpîdzimgix miich yí' mayjäyoty, e huidi ajcxy midooyb ameech, capxpîdzimgix miich yí' mic ma tüg cögop. ²⁸ Ca' ajcxy mdzigÿhuip je jây huilib ninicx yaj'öcp etz ca' huaad yí' ajcxy yaj'ögy je alma. Yí' miich ajcxy mdzigÿyigix je Dios huilib pidacp je alma etz je ninicx mijjînjoty.

²⁹ ¿Nej ca' jây ajcxy toogy metz pi'cjoon mîd tügpi pi'cmeñi? Per ca' ni tüg huaad ycäy naaxhuiñ, pen ca' tzocy je mDios Teedy huidi jii by tzajpjoty. ³⁰ Miich ajcxy mgöhuay ac michoy yí'. ³¹ Paady miich ajcxy ca' mdzigÿhuipy, jac nigí miich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyoty

³² Yí jây ajcxy huidi xymibijcpich etz xyñidiy'ajtyich ma jây yhuinduu, nañ jadu'n ñich yí' nidiy'ajtyich ma ñich nDeedy huilibi jii by tzajpjoty. ³³ Per je jây ajcxy huidi ñich xycoyützpich ma mayjäy ajcxy yhuinduu, nañ jadu'n yí' ngoyützip ma ñich nDeedy yhuinduu huilibi jii by tzajpjoty.

Mîd Jesús ycixpi yjiioty naymidzip'adii

³⁴ Ca' miich ajcxy mhunmay co ñich ya ti nmiñich mîd co nmöhuaangixy jotcuic'ajtin ya naaxhuiñ. ³⁵ ñich ti nmiiñich co nyajtziptunipyich jây mîd yteedy; töxyjây mîd ytaj etz xecy mîd yxecy. ³⁶ E jadu'n miich ajcxy mdzip'adiiyb mgí'mjuogy mgí'mmigüg.

³⁷ Yí jây ajcxy huilibi tzojcp ytaj yteedy jac nigí ca'ydi ñich, ca' yí' ypaadyii co njây'adiybich; e pin ymang o ñiix tzojcp nigí ca'ydi ñich, ca' ypaadyii co njây'adiybich; ³⁸ e pin ca' yci'mdzojcin y'ijxmajtztây etz ca' ñaybidägyii yci'xjot huinjot ma ñich, ca' mihuaadity nicx njây'adiybich. ³⁹ Pin yjogy'ajtin najtztzogyib, yajtigoyipy yí'; e pin yjogy'ajtin tigooyb mîd ñich ycixpi, ypaadipy ju-gy'ajtin huinixi tzajpjoty.

Premio nganar'ajtim

⁴⁰ Pin miich ajcxy xycöbijcp, ñich yí' anajty xycöbijcp; e pin ñich anajty xycöbijcp, nañ ycöbijcipy anajty je huilibi ñich ti xyquejxyich ya naaxhuiñ. ⁴¹ Je huilibi cöbijcp je jây huilibi Dios y'ayuc capxhuacxip, je' co yí' ymiñ mîd Dios ycixpi, yí' jadu'mbi je oy'ajtin ypaadipy. Nañ jadu'n je huidi cöbijcp je oybi jây mîd co oy yjäy-ty, yí' jadu'mbi oy'ajtin ypaadipy. ⁴² Je huidi yaj'ucp tüg vaso ñi ma huenyimpinjây mîd co xymibicyich, janch ñich miich nimaaygixy, ypaadipy oy'ajtin.

Juan je Bautista yquexyöybi

11 E co Jesús anajty ti najtzcaxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuyi tijaty mijhuinma'ñ anajty Jesús ytumyib, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huilibi anajty minamb o jêbi ñich ajcxy huingbi n'ahuixcixy?

⁴ Chi Jesús y'adzooy:

—Ñicxcix miich ajcxy nimaaygix yí' Juan, je Bautista, tijaty miich ajcxy m'ijxpy mmidooyb co ndumyibich.

⁵ Miich ajcxy yajmîdmîydäg je Juan, jadu'n nej je huintzpi nyajhuindixcÿyich; je cîmät tecymät nyajt-zoocypich; je huilibi jîbic nibützpa'm ymîd nyajt-zoocypich; je' ajcxy huilibi cönat nyajmidohuëcypich; je öcpi ajcxy nyajjugypijcypich; etz je ayoohtijc, je huilibi yung naxy yjothuinma'ñ nyajmîdmîydacypich Dios y'ayuc. ⁶ Jotcuic yí' ajcxy pinjaty xymibijcpich amumdüjot etz ca' ni nej yjotmetzci' mîd ñich.

⁷ Co Juan je Bautista ydiscípulos ajcxy ñicxni, chi Jesús ytigÿy nimiydaccoty Juan je Bautista ytung ma je mayjäy, chi yminañ:

—¿Ti miich ajcxy oy m'ixy jîm mijtigÿduum? ¿Tüg nähuaax huilibi poj xijpi? ⁸ ¿Ti ajcxy oy m'ixy? ¿Ti oy m'ixy, tüg jây huilibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxiybi? Janch co ti m'ixcixy tüg jây jac mij ca'ydi tüg Dios y'ayucnajtzcaxiybi. ¹⁰ Je' jada je jây huilibi Dios nigapxy ma ñecy co Dios jadu'n yminañ:

Cham nguexyich ñich nguexyöyp jayijp ma miich. Je' yaj'oyÿhuip je jây yjot yhuinma'ñ mîd ñich ycixpi, tim jadu'n nipaady nej jihuÿ jây tü'aa yaj'oyÿy co rey ymina'ñ.

¹¹ Co yí jây ajcxy huilibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty ñich xymibijcp, yí' jac mij naxam ma Dios y'ane'my ca'ydi Juan.

¹² Maabi Juan je Bautista ytundigÿy, ixti chamni janch mayjäy amumdüjot ñejhuÿhua'ñ Dios y'ayuc, je' co ajcxy ytigÿhua'ñ ma Dios y'ane'my. ¹³ Tüg'óciy ajcxy je Dios y'ayucnajtzcaxiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcipy Moisés ycötujcin etz Dios y'ayucnajtzcaxiybi ajcxy, Juan je Bautista je' je' je Elías huilibi anajty miinamb. ¹⁵ Pinjaty mido'n mîd huen mido'mbigipy ñich n'ayuc.

¹⁶ Jesús yjacminañ:

—¿Pin mîd n'ocajtügÿhuibyich yí jây huidi ajcxy cham tzinaayb? Tim jadu'n yí' ajcxy nej pi'ctijc huilibi ajcxy iyÿy ma mayjäy yjuygixy ytoocixy, miyaaxcixy midinaaygixy ymîgügtijc: ¹⁷ "Ti njayajxüxyich flauta e ni ca' ti m'ejtzcixy; ti ñich ajcxy öcpi njahuinyäxich, e miich ajcxy ca' ti myäxy." ¹⁸ Chi Juan, je Bautista, anajty miiñ, e je' ca' yca'y'ügy. E miich ajcxy minangixy co Juan

ca'oybi ymiidity. Jada pi'c'anäctijc nipaady nej miich ajcxy. ¹⁹ Chi ñich je' je jäy huidibi tsoon tzajpjoty nmi-iñich, e caaybich uucpich, e miich ajcxy minaangixy: "Ijxcix, cha tüg yëydijc, janch cax janch vino'ucp huidibi migüg'ajtpy yajcuetpñidijc etz pocyjäydijc." Je Dios tiy'ajt ji je' ñiguëxigy.

Je cajp huidibi ca' ycapxymidoogixy

²⁰ Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuim-bidaangixy ma Dios. Chi Jesús yminañ:

²¹ —¡Ay miich ayoob ajcxy huidibi tziinaayb jim Corazín! ¡Ay miich ayoob ajcxy huidibi tziinaayb jim Bet-saida! Co ixypy ñich ti nduñich jecy'ajty je mijhuinma'ñ mijtzög'ajtin ma je Tiro etz Sidón cajp, jadu'n nej ñich ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ññaangixy sacco nijen nicuyjam icxuyjam, je' je tiy'ajt co ooy ytajcixy ymaygixy miid ypocy ycixpi. ²² Paady miich ajcxy yam nimaangixy. Co anajty Dios tiyduna'ñ je naaxhuiñybi jäy, huin'it miich ajcxy Dios xychaachytuna'ñ jac nigí, ca'ydí je jäy ajcxy huidibi jecy'ajty tzinay jim Tiro etz Sidón.

²³ Miich ajcxy, Capernaum jäy, mnaybidáacigixy jadu'n nej jihuüy mdigëhuaangixy jiiiby tzajpjoty. Per ca' yjadu'nity. Mdigëhuam miich ajcxy ayoodactuuby. Ayo'n tzaachypí mbadaangixy. Co ixypy ñich ti nduñich jecy'ajty je mijhuinma'ñ mij tzög'ajtin ma Sodoma cajp, jadu'n nej ti nduñich ma miich ajcxy mgajp, chambaad ixypy ity yi jadu'mbi cajp, ca' ixypy Dios cayajtigooy. ²⁴ Paady ñich miich yam nimaangixy. Co anajty Dios tiyduna'ñ je naaxhuiñyjäy, huin'it miich ajcxy myajtza-achytuna'ñ jac nigí, ca'ydí je jäy huidibi jecy'ajty tzinay ma Sodoma ñaaxjot.

Mingixy ma ñich e mbóocxcixipy

²⁵ Chi Jesús ytigiiy Dios mibijctzooyb, yminañ:

—Dios Teedy, ñich miich n'ñbaatpich ngapxpaatpich. Miich miid je mij cötujcin jiiiby tzajpjoty etz ya naax-huiñ. Com miich ti mnajtzcapxixy yi m'ixpijcin ma je ay-oobtijc huidibi tziinaayb jotxeemy, e ti myüch yi m'ix-pijcin ma yi ixpicytijc cohuinma'ñydijc. ²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacminañ:

—Ñich nDeedy ti xyajcñidigiydäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tügpaic. Ni pin ca' ijxcapy pin je' nDeedy'ajtpyich, jëyi ñich, je Dios y'ung tügpaic, etz jacjadyii huidibi ñich, je Dios y'ung, nyajñiguëxigamyich. ²⁸ Min ma ñich nidüg'óciy miich ajcxy huidijaty taj mayb myajpatp ma mjot mhuinma'ñ, ñich miich ajcxy nmöhuamyb jotcu-jc'ajtin. ²⁹ Cöbic miich ajcxy ñich n'ane'min ñich ngötu-jcin, jadu'n nej huaaj yuub ajcxy cöbicy ycögi'. Ijxpí ajcxy ñich ndiy'ajt etz cuydun ñich n'ayuc, com ñich nmñidich mecxtujcin etz ca' ñich amij agix nayjihüyijich. ³⁰ Ca' ñich n'ane'min ymicity, e ñich ndung ca' nimi-jaajty.

Je discípulos ajcxy moc cojc yajmujcp pocxñiduum

12 Chi tüg xii Jesús yhuidity miid ymigügtijc ma tüg camjot. E hue' anajty sábado xii, je pöocxin xii. Chi Jesús ydiscípulos ajcxy oy anajty yubögyii. Chi ajcxy ytigiiy trigo ñim nixajtzutp etz yñicxy ajcxy je ypajc. ² E co je fariseos ajcxy ijxy nej Jesús ydiscípulos ajcxy y'idñitcixy, chi ajcxy nimay Jesús:

—Oc'ix nej miich mdiscípulos ajcxy y'idñich. Hue' ajcxy tumyb huidibi ca' huaad ma sábado xii yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymigügtijc ajcxy idñich jecy'ajty co yubö-coti? ⁴ Pues yi' ajcxy tigiiy ma Dios ytijc. Chi cay ajcxy je tzajcaagy huidibi anajty jäy ajcxy ti yajhuindzigäy Dios. Je' je tzajcaagy huidibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytijc sábado xii, e ca' nan tundigooyb je' ajcxy?

⁶ Ñich miich ajcxy nimaangixyp, jac nigí mij cötujcin nmñididyich, ca'ydí je cötujcin huidibi je teedy ajcxy yaj-tuñ ma Dios ytijc. ⁷ Pen miich ajcxy ti mhujñihuüy nej yhuimbizimy jada Dios y'ayuc, co Dios jadu'n yminañ: "Ñich ndzojcpy co miich ajcxy mñididy pa'ayo'n ca'ydí co ajcxy myegipy huindzigí'ñ." Pen miich ajcxy ti mhujñihuüy jada ayuc, ca' ixypy mbocy'ixy ma ñich nmigügtijc huidibi ca' ma ti ytundigooy. ⁸ Ñich, je jäy huidibi tsoon tzajpjoty, nmñidich ane'min, jaydëbi nmäyich je jäy ajcxy ti jëbi tungixy sábado xii.

Je yëydijc huidibi anajty ycñitdzip

⁹ Chi Jesús choñ jim, ñicxy ma je judíojäy ñaymujctac. ¹⁰ E jiiiby ma je naymujctac anajty tüg yëydijc huidibi ycñitdz. Je fariseo ajcxy xñhuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiiji?

¹¹ Chi Jesús y'adzooy:

—Pen ya ma miich ajcxy ji tüg jäy huidibi cöbixy yjutcögäy sábado xii, ¿nej ca' je' nicxy yajpidzimy mic'amy? ¹² Nigí tzobaatp tüg yëydijc ca'ydí tüg cöbixy, paady Moisés ycötujcin ca' capx'aducy co tüg oy'ajtin nduunim sábado xii, je pöocxin xii.

¹³ Chi Jesús nimay je yëydijc:

—Xajtiu yi mgí'.

¹⁴ Co xajtiy yci', chi choocy, e huim'y quipxyjaty miid je yci' oybi. Chi je fariseos ajcxy yjotmätcoty, yhuin-ma'ñ ixtaangixy ajcxy nej huaad Jesús ocyaj'o'ccixy.

Tüg ayucnajtzcaxiiyin miid Jesús ycixpi

¹⁵ E co Jesús nejhuüy nej yi' ajcxy yhuinma'ñ miidity, chi jim choñ. E ooy mayjäy ypanicxi Jesús, Jesús yajt-zoocpy anajty tüg'óciy pinjaty pa'm miid. ¹⁶ Jesús ane'my je pa'mjäy ajcxy co ca' huaad nigapxy nimiydä-gy co yi' je' je Cristo. ¹⁷ Jadu'n Jesús ane'my je pa'mjäy jigix ycixipy ycá'pxipy je ayuc huidibi je profeta Isaías yjaay jecy'ajty, co Dios jadu'n yminañ:

¹⁸ Jada je' ñich ndumbi huidi ti nhuin'ixyich. Yí' ñich ooy ndzocyich ñijhuñyich etz ooy njotcujcich miid yí'. Ñich yí' nmöhuamybich ñich ñijhuñ'ñ mic'ajt. Yí' capxhuäcxip ñich n'ayuc jadu'n nej ndzaachytuna'ñich naaxhuiñyäj ajcxy miid ajcxy ypocy ycxip.

¹⁹ Yí' ni ymígügtijc ca' oja'ñ, ni ycayäxa'ñ, ni ycatinähua'ñ, ni pin ca' midoohuipy ma cajp cujc.

²⁰ Ca' yí' tzaachytuna'ñ ayoo-bitijc etz huidibi ayo'ndumb ijtp. Etz nañ ni ca' yajtigoya'ñ huidibi ayoo-bitijc yco'ögy'ungdijc yjijp'ijxpy. Jadu'n nej jäy caya-jhuindigoy tzaicapy huidi huidiyip etz ni cayajpich je mecha huidibi uuxy uuxy tiicxp. Ixti mabaad anajty yaj-copicy y'ane'min tudägypi.

²¹ E yí' mayjäy ooy yjijp'ixa'ñyii.

Xëgixy Jesús co miidity mujcu' ymic'ajt

²² Chi miid miñ ajcxy ma Jesús tüg jäy huidibi huintzip etz uum. Je' anajty miid ca'oybi. Chi Jesús yajt-zoogy, e chi y'ijxëgy etz ycapxëgy. ²³ Co Jesús jadu'n tuñ, chi je mayjäy ytigëy huinmay'ahuidij, chi ajcxy ymi-nañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuiy nej je jäy huinmay, chi ajcxy yminañ:

—Jadaabi yëdyjc yajpidzimy ca'oybi miid je mujcu' huindzin ymic'ajt (ca' yí' yjëjty je Cristo).

²⁵ Per Jesús ñejhuiyb anajty ti je fariseos ajcxy yhuin-maayb, chi yminañ:

—Pen tügpicy tungmiidpi ixipy ñaybijc-huäcxigixy, etz ñaymidziptzoonigixy ixipy ac jëyi, pues cixipy yí' ajcxy y'ane'min. Pen tüg cajp o tügpicy jugymigüg ixipy ñaybijc-huäcxigixy, pues ca' ajcxy y'idaangixy tügmucy. ²⁶ Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybijc-huäcxigixy, e je Satanás ymic'ajt ca' y'ida'ñ. ²⁷ Miich ajcxy minamb co ñich nyajpidzimyich ca'oybi miid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mina'ñ, je jäy ajcxy huidibi xymijnicxpejt miich ajcxy, ¿nej yí' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yí' ajcxy tiy'ajt yejcp co miich ajcxy ti mgapxtigoy co yminaangixy co ñich nya-jpidzimyich ca'oybi miid Satanás ymic'ajt. ²⁸ Per ñich nyajpidzimyich ca'oybi ma pa'mjäy miid Dios yjihui'ñ ymic'ajt. Paady miich ajcxy nejhuiyb co ti ymiñ yjäty je Dios y'ane'min ma miich ajcxy.

²⁹ (Dios ycötujcin jac mic ca'ydí je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigëy ma tüg micpi jäy ytijc etz pigaani tijaty yí' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymiid. ³⁰ Pinjaty ca' xymijnicxpetyich, xymidzipich yí'. Pinjaty ca' tuñ miid ñich co jäy nyaj'ixpicyich, hue' je' ajcxy jäy yajhuin-ma'nydigooyb.

³¹ Janch ñich miich ajcxy nimäy co Dios jëbi huin-mecxip tüg'óciy pocy huidibi jäy ytungixp etz tüg'óciy jibicpi huidibi jäy ycapxcixp. Jëyi janchtiy co pinjaty capxtigooyb miid je Espiritu Santo, je Dios yjihui'ñ

ymic'ajt, ca' Dios huinmecxip nimina. ³² Pinjaty jibic xyñigapxpich xyñimiydaccpich, je' huinmecxam. Per je huidibi jibic ñigapxpy je Espiritu Santo, je' ca' huin-mecxa'ñ ni jadachambi tiempo, etz ni camina xii.

Yi quipy yí' ytëm yí' miid yaj'ijxcapy

³³ Pen miich ajcxy mnejhuñhuamy je quipy pen oy quipy, o pen ca', jëbi mnejhuñhuipy co je quipy nicxy ytëm'aty. Pen oy je ytëm, miich mina'ñip co oy je quipy. E pen ca' oy ytëm'aty, huin'it miich ajcxy mina'ñip co ca' y'oyity je quipy. ³⁴ Jibic jäy miich ajcxy, jadu'n nipaady nej jihuñy ahua'n iyujc xy'ung'ajtp. Pen miich ajcxy jibic jäy'ajtp, ¿nej jëbi miich ajcxy oybi ayuc mgapxipy? Jadu'n nej jäy ajcxy yjot yhuinma'ñ miidity, ac tim jadu'n ajcxy ycapxy. ³⁵ Je jäy huidibi oy ayuc ycapxpy, ymiid oyjot oyhuinma'ñ paady oy ayuc capxy. Je jäy huidibi jibic ayuc capxp, ymiid jibic jot jibic huinma'ñ, paady jibic ayuc capxy. ³⁶ Ñich miich ajcxy nimay co anajty paady je xii je tiempo mina Dios tiyduna'ñ je naax-huiñyäj, huin'it ajcxy y'adzohuipy miid huen tim huidibi ayuc huidibi anajty ajcxy ti mgapxy. ³⁷ Com nej-jaty miich anajty ajcxy ti mgapxy je m'ayuc jadu'n miich ajcxy Dios xytidunip. Com miid yí' mgi'm ayuc yí' miid m'oybidzimipy mhüatzpidzimipy. E nañ jadu'n miid yí' mgi'm ayuc yí' miid mbocycähuipy.

Jibicjädyjc ajcxy pijctzoogixy tüg ijxpejt mijhuinma'ñy-bi

³⁸ Chi nijëjity fariseos ajcxy etz escribas ajcxy Jesús ni-may:

—Huindzin, n'ixamy ñich ajcxy miich tüg m'ijxpejt.

³⁹ Chi Jesús y'adzooy:

—Yí' jibic jädyjc ajcxy etz ajcxy huidibi ca' mibiga'ñ Dios ypijctzooyb tüg ijxpejt huidibi tzomb tzejpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yecy co y'ijty tugëg xii tugëg tzuu mejjoty ma acx ymoxac, nañ tim jadu'n ñich, je jäy huidibi tzuon tzejpjoty, nyegamy ijxpejt jadachambi tiempo co n'idipyich tugëg xim etz tugëg tzuu naaxjoty. ⁴¹ Je mayjäy huidibi anajty tzinaayb ma Nínive cajp, ti jothuimbi-jtcixy etz ti ixmach ajcxy huidijaty jibicpi ajcxy ytumy co Jonás capxhuäcxy Dios y'ayuc ma yí' ajcxy. Cha ñich ngapxhuäcxyich Dios y'ayuc ma miich ajcxy, etz jac nigí cötujcin nmiididyich, ca'ydí Jonás; e ca' miich ajcxy mjothuimbity. Paady co anajty Dios tiyduna'ñ je naax-huiñyäj, je Nínive jäy miich ajcxy xyajpocycähuam.

⁴² Nañ jadu'n je töxyjäy reina huidibi tzinay jecy'ajty ma madza'cruudz ypidzimy, yí' je' xidähuam je jäy ajcxy huidibi tzinaayb jadachambi tiempo, etz yajpocycähuib ajcxy. Je reina tzuon jiguëgy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmidpi jac nigí ymijity, ca'ydí Salomón anajty, e ca' je jäy ajcxy mijpidä-ga'ñ.

Je jibic espíritu co jadüg'oc yhuimbity

⁴³ Yi jäy ajcxy huidibi cham tzinaayb, quipxyjaty ajcxy miid je ca'oybi. Co je ca'oybi ypidzimy ma je jäy, chi je' ñicxy jim mijtig'itudum y'ijxtacy. Co ca' paty ypoctac, huin'it ymina'n: "Huimbidaambich ma je jäy yjot yhuinma'n ma ñich ti n'octzombi." Co je ca'oybi yjäty ma anajty ti chinäy, chi paty je jäy yjot yhuinma'n ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzoñ jahuixtuc ca'oybi jac jibicpi ca'ydi je'. Chi ajcxy ytigiy ma je jäy yjot yhuinma'n, e chinay ajcxy jiiby. Huin'it je jäy jac'octiy oy yajtni, ca'ydi jadu'n nej anajty jayjip'aty.

Jesús ytaj etz y'uch miguëx ajcxy

⁴⁶ Jesús yaj'ixpijcy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhuim'y t'iba'y. Je' ajcxy anajty ymigaaxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy t'iba'y, miich xyjamigapxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pin jäy miich ajcxy mdijy co ñich ndaj'adyii etz ñich n'uch'adyii nmigüg'adyii?

⁴⁹ Huin'it Jesús nitziihuüy je' ydiscipulos ajcxy e ymina'n:

—Jada ñich ndiscipulos ajcxy jadu'n nipaady nej ñich ndaj etz ñich n'uch nmiguëx. ⁵⁰ Huen ytipin'ity huidibi ytumyb ñich nDeedy chojcin, huidibi jiiby tzajpjoty, pues jadu'n yi' ajcxy nipaady nej ñich ndaj etz ñich n'uch miguëx.

Je ayuccapxhuäcxi y'ijxpejt (niipi ijxpejt)

13 Je huin'it xi Jesús choñ ma je tijc. Chi ñicxy ma je mejypa' jim oy y'ñay'ihuüy. ² E co mayjäy ooy ñaymujci jim ma anajty Jesús ññay, chi Jesús ytigiy barcojoty. Per tüg'óciy je mayjäy yhuim'day ma mejypa'. ³ Jesús ytigiy jäy yaj'ixpijcp miid jihuimbit ayuc, ymina'n:

—Tüg jäy choñ trigotim huijp. ⁴ E ma anajty jim ytimhuijy, huin'it je ytim oy naagity ycäy ma t'ü'aa. Chi jada' je joon ajcxy oy ymiñ etz ypihuügy je tim. ⁵ Nijëjity ytim ycäy ma tzaan'icx ma anajty hueeni naax. Jada tim tzojc ymujxy. ⁶ Com hueeni anajty je naax ma je tzaan'icx, chi co oy xi'an ypanyii, chi ytitztay, com ca' anajty je ytictz yeegity. ⁷ Nijëjity tim oy ycäy ma ujtzaayjot ma apyjot, e ujtzoctay je trigo mang. ⁸ Per je tim huidibi ca'u ma oy ñaax, je' yon yajxon e tim'ajt may'amy; tüg ypi'cpajc iipxmajc oy yco'ity, jadüg pi'cpajc tugip'x oy yco'ity, jadüg pi'cpajc migo'px oy yco'ity. ⁹ Pinjaty mido'n miid huen mido'mbicy jada ayuc.

Ti ycixpi je ijxpejt

¹⁰ Chi je' ydiscipulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpijcy je mayjäy?

¹¹ Chi Jesús y'adzooy, ymina'n:

—Miich ajcxy jaydeb mnejhuühuipy huidibi Dios ñigapxyp ñimiydacy coyuch'amy ma y'ane'min. Jacjadyii jäy ca' ajcxy huinjihuüipy. ¹² Pinjaty ymiid yajmöhüp nigü, pinjaty hueen miid yajpigipy nigü, oy ixipy hueen jadim miidity. ¹³ Paady jihuimbit'amy nyajnimaaayich; jaydeb pinjaty ijxcixy, ñipatpy nejihuiy ca' ti ijxcixy; etz co ajcxy midoogixy, ca' ajcxy huinjihuüy, ñipatpy nejihuiy ca' ti midoogixy. ¹⁴ Jadayaabi ytunyii yjadyii jadu'n nej je profeta Isaias jaaybejty yajhui'my ma jadu'n ymina'n:

Miich ajcxy midohuamy, per ca' mhujinjuhuühuangixy. Miich ajcxy m'ixamy, nañ ca' mhujinjuhuühuangixy huidibi ti m'ijxcixy.

¹⁵ Com jadayaabi jäy ooy ajcxy yjot yhuinma'n ti y'ahuimbity juuñ. Nej ajcxy yjamidoy, ca' ajcxy ymidohuim'igixy. Nej ajcxy ja'ixy, ca' y'ijxhuim'igixy. Nej ajcxy yjahujinjuhuüygixy, per ca' yhuinjihuüy ma yjot yhuinma'n. Yi' ajcxy ca' yjothuimbidaangixy ma ñich, jaydeb nyajnidzögibich ajcxy.

¹⁶ Per jotcujc miich ajcxy, co miich ajcxy ijxhuim'y miid mhuiin huidibi ndumybich, e mido'mbicy ajcxy ñich n'ayuc. ¹⁷ Janch tiy'ajt jadu'n nej ñich miich ni-maaygixy. Janch tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy ix. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxäy je ijxpejt ma je niipi

¹⁸ Amido'it miich ajcxy, jadu'n nej yhuimbizim'y jada jihuimbit ayuc maabi je tim huijpi. ¹⁹ Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'n, jadu'n ajcxy nipaady nej trigo tim huidibi cäb tügujy, e je joon ajcxy mic'amy ypiimujctay. ²⁰ Je jäy ajcxy huidibi amido'ijtp Dios y'ayuc janch jotcujc, per co agapxiyb paady, co tzaachypi minaxy yajnaxy miid Dios y'ayuc ycixpi, chi mic'amy ajcxy ixmajtzn Dios y'ayuc, jadu'n ajcxy nej je trigotim huidibi ti ycäy ma tzaan'icx, huidibi ca' oy ytictz miidity. ²² Je jäy ajcxy huidibi amido'ijtp Dios y'ayuc, e co ñicxni, chi jäy digooñi Dios y'ayuc miid jotcujc'ajtin tzinaayin, comeen'ajtin etz adzojcin. Jadu'n ajcxy nipaady nej trigotim huidibi ti ycäy ujtzjoty, e ca' ytim'aty miid co oy y'ujtz'ögy. ²³ Je jäy ajcxy huidibi amido'ijtp etz cöbijcp yajxon Dios y'ayuc amumdügjot etz Dios y'ayuc ytumyb ma ajcxy yjot yhuinma'n, jadu'n ajcxy nipaady nej je tim huidibi ti ycäy ma oy ñaax etz ti ytim'aty may'amy. Tüg pi'cpajc iipx majc oy yco'ity, etz jadüg pi'cpajc tugip'x oy yco'ity, etz jadüg pi'cpajc migo'px oy yco'ity.

Je ijxpejt co je jibic ujtz ymuxy ma je trigo cam

²⁴ Chi Jesús yaj'ixpijcy jadüg jihuimbit ayuc, ymina'n:

—Je Dios y'ane'min jadu'n nipaady nej tög yëydijc huidibi trigo tïm huijp ma je' ycam. ²⁵ Per co ajcxy yma'öctay nidüg'öciy je cogam, chi ytigiy tög ymidzip ma je ycamjot. Chi je midzip jibic ujtz tïm oy huijy ma je trigo cam. Chi ñicxñi. ²⁶ E co je trigo oy yooñ, chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzin yajnimay: "Huindzin, ¿nej ca' ti mnipy ac trigotïm? ¿Nej co jim nañ jadu'n jibic ujtz yajpaady?" ²⁸ Chi je cogam yminañ: "Huen jada' nmidzipich jadu'n ti y'idich." Chi je tumbidijc y'amidoohui: "¿Nej mdzojcpy co ñich ajcxy nhuijxigibich je jibic ujtzi?" ²⁹ Chi je cogam yminañ: "Ca'. Pen miich ajcxy mhuijxicy je jibic ujtz, ca' jecyity co m'ahuijx-mugipy nañ jadu'n je trigo. ³⁰ Ixmatz, huen je jibic ujtz yeegy tög mucy miid je trigo, ixti cooni anajty ypidigy je cosecha. Co cosecha paty, huin'it nguexañich je ndumbidijc co huen jayijp pujxigy je jibic ujtz etz axotzipy etz nögy. E co yajpidictay je jibic ujtz, chi yajpidigy je trigo e pidagy ma je tze'x."

Je ijxpejt ma je mostazapajc

³¹ Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tög mostazapajc huidibi tög jäy ñiip ma je' ycam. E je mostaza ytïm je' jac tïm mutz ca'ydi ni huidibi ujtz tïm. Per co je mostaza ytïm ymujx etz yoñ, chi y'ahuimbijty jac mij ca'ydi jacjadyii ujtz. E hue' ñicxy yjaty janch mij, ixti joon ajcxy oy yqueec miñ yqueec xijpy jim, pidägy je ype'ñ ma je mostaza y'aacx.

Je ijxpejt ma je levadura huidibi ca' y'oyity

³³ Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej levadura huidibi tög töxyjäy ypidacpy miid je harina, jigix je harina oy ypidigy.

Nej anajty Jesús yajtuñ je ijxpejt

³⁴ Tög'öciy Jesús yaj'ixpijcy je mayjäy, jihuimbit'amy yaj'ixpijcy, e ni ti ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuoñ, jigix yajcuyduñ je ayuc huidibi je profeta Isaías yjaayhuim jecy'ajty, co jadu'n yminañ:

Ñich ngapxamyich ac tïm jihuimbit ayuc. Ñich nigapxamybich tijaty huidibi ca' pïn nejhuÿ, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic ujtz ma je trigo cam

³⁶ Chi Jesús capxycijxy miid je mayjäy, chi ñicxy ma tög tijc. Chi ytigiy tigoty miid je' ydiscipulos ajcxy. Chi Jesús ydiscipulos ajcxy nimijhua'cy Jesús, yminañ ajcxy:

—Tun may'ajt ñich ajcxy xyajhuinjhuÿy je jihuimbit ayuc co ti mnigapxy je jibic ujtz ma je trigo cam.

³⁷ Chi Jesús yajnimay:

—Ñich, je jäy huidibi tsoon tzajpjoty, jadu'n ñich nipaady nej je jäy huidibi niip je oybi tïm ma je ycam. ³⁸ Je cam jadu'n nipaady nej tög'öciy naaxhuiñy. Je oybi tïm jadu'n nipaady nej je jäy ajcxy huidibi cöbijcp Dios y'ane'min. Je jibic ujtz jadu'n nipaady nej je jäy ajcxy huidibi cöbijcy ajcxy je mujcu' y'ane'min. ³⁹ Je jäy huidibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpujxigy etz yajpidacy jijnjoty, nañ tïm jadu'n ñicxy yjaty miid je jäy ajcxy huidibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ñich, je jäy huidibi tsoon tzajpjoty, nguexamyich n'ángeles huen yajmujctäy je jäy huidibi je ymögüg yajtundigooyb, etz yi' huidibi ajcxy jibic-huinma'ñ tumb. ⁴² Co yajmujctähuipy je jibicjäydijc, chi ajcxy yajpidagy miijijnjoty, jiiby ajcxy yäxa'ñ etz ytitzmucxy ytitzqueecy miid je ayo'n ycixpi. ⁴³ Per je jäy ajcxy huidibi cuydumb Dios chojcin, idam ajcxy miid Dios Teedy jiiby tzajpjoty. Ymiidamy ajcxy tög oy'ajti, jadu'n nipaady nej je xii ytixcin yajjin. Pen miich ajcxy mido'n miid, mido'mbijc ajcxy ñich n'ayuc.

Je y'ijxpejt je meeñ huidii yüchp

⁴⁴ Je Dios y'ane'min jadu'n nipaady nej meeñ huidibi yüch ijtp ma tög cam. Per co tög jäy paady je meeñ, chi mic'amy jadüg'oc yüdztigach. Chi ooy yxondägy. Chi ñicxy etz tooctäy tög'öciy huidibi ymiid etz juy je naax.

Je y'ijxpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tög ajuuyb adoocpi huidibi ijxtaayb tög oybi perla huidibi tzoobatp. ⁴⁶ E co anajty paady tög perla huidibi janch tzou, chi ñicxy tooctigoydäy tög'öciy huidibi ymiid etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'min jadu'n nipaady nej tög acxmadzi'ñ huidibi jäy miid ycojibiby mejyjoty. Chi jiiby ytigiy huen ytïm huidibi acxity. ⁴⁸ E co anajty je acxmadzi'ñ y'uch miid je acx, chi je jäy ajcxy yajpidizimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypí acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tïm jadu'n nej ti yjaty miid je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jijnjoty. Jiiby jijnjoty ajcxy yäxa'ñ ytinähua'ñ etz ytitzmucxaangixy ytitzqueedaangixy miid je ayo'n miid je tzaachypí ycixpi.

Je jāy huidibi jātp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujnihuüyb miich ajcxy tüg'óciy huidibi ñich ti ngapxich?

Chi ajcxy y'adzooy:

—Huindzin, ti mhujnihuüy ñich ajcxy.

⁵² Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huidibi tzajpjoty tzoön, hue' jadu'n ni-paady nej tüg codijc comeñybi huidijaty ymiid yajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytiñy ma je judio ñaymujctac, e ytiñy yaj'ixpijcp. Chi je mayjäy jiiyby ooy jihuüy huinmay nej y' yaj'ixpicy, yminañ ajcxy:

—¿Ma jada' jada yeydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ? ⁵⁵ Jada-dayaabi yeydijc hue' yteedy'ajtpy je tzejtzpi, etz ytaj'ajtpy María. E ñich ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyity tüg'óciy je mayjäy ajcxy ooy yajmij'aty yi jäy ajcxy huidibi najtzcapxiyb Dios y'ayuc, ca'ydi huidibi y'ayucnajtzcapxiyb ma yci'mnaax yci'mgajp yci'mjiin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, miid co je jāy ajcxy ca' mijpidägyii.

Juan el Bautista co y'ögy

14 Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ. ² E y' ni-may je ymidungmiidpidijc:

—Yijibi jāy huidibi tzachtumb mijhuinma'ñ, y' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt miid jaydëb mijhuinma'ñ tuñ.

³ Herodes ti anajty ni'ane'mdäy co Juan huen yajmach, e yajpidägyipy pujxtigoty. Jadu'n Herodes tuñ miid Herodías ycxpi. Je Herodías je' anajty miid jayijp'aty ti ypiy Felipe, je Herodes y'ajch, chi ti ixmajch Felipe, chi ypijcy miid Herodes. ⁴ Juan ti anajty nimäy Herodes co ti ytundigooy co ti picy miid Herodías.

⁵ Je rey Herodes ooy anajty jajaj'öga'ñ yi Juan, per tzigiiyb anajty miid je mayjäy. Com je mayjäy ti anajty mibicy ajcxy co Juan hue' anajty tugi Dios tiy'ajt miidpi, tüg profeta. ⁶ Co Herodes yjimijtpety, chi anajty ñayñixiuduñyii, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'eich. Paady Herodes Herodías ñix nimay:

⁷ —Dios ñich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojcpich co miich xymöhuip Juan, je Bautista, ycohuajc ma tüg texy.

⁹ Co jadu'n midooy je rey, chi ytiñy tajp maybi mijcajee. Per co ti anajty Dios capxpaatni, yminaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen ñicxy yajtzoñyii Juan ycohuajc, e möhuipy Herodías ñix. ¹¹ Huin'it je soldado oy je Juan ycohuajc yajminajci jiiyby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscipulos ajcxy yja'ty. Chi ajcxy oy yajnaaxtigiy je Juan ñinix. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii miid Juan, chi ytiñy ma tüg barco naydüg, e ñicxni ma tüg it ma ca' pin chinäy. Co je mayjäy nejhuüy co Jesús ti ñicxy, chi ajcxy chonday canaag agajp, ñicxy ajcxy ma Jesús yajpaady, hue' tecygi'm ajcxy ñicxy. ¹⁴ Co Jesús ypidzimy barcojoty, chi ijy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymiid miiñ. ¹⁵ Com ti anajty chuu'ñi, paady je' ydiscipulos ajcxy nimijhua'cy Jesús, e nimay ajcxy:

—Ti chuu'ñi, e ca' ya pin china'y, paady capxcxy miid jada mayjäy ajcxy, jaydëb ajcxy ñicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyty co ajcxy ñicxy jicxy ixtäy. Miich ajcxy möhuip caayin uucin.

¹⁷ Chi je' ajcxy yminañ:

—Per ñich ajcxy jëyi yeeby nmidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen iñay'ihuüydaaygixy ma pi'cmiiy'ung ñicx. Huin'it Jesús je migooxpi tzajcaagy conigy etz je metzpi acx. Chi ypa't'ijy jiiyby tzajpcxy, e yajnajxy Dioscojuyipy. Chi tujc-huäcxy je tzajcaagy etz moy je' ydiscipulos ajcxy, co huen yajhuäcxycxy ma je mayjäy. ²⁰ Nidüg'óciy je mayjäy ajcxy ycaayin cüxyi. Co je mayjäy ycaayin, chi je discipulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yeydijctijc huidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy ñihuingixy

²² Chi Jesús ane'my y' ydiscipulos ajcxy co huen barco tigiygixy mic'amy, jigix ñicxy ajcxy jim mejy ñinaxy. Namí y' ydiscipulos ajcxy choñ barcojoty, Jesús ycapxcxy miid je mayjäy huen ñicxixni. ²³ Co anajty Jesús ti ycapxcxy miid je mayjäy, chi ñicxy naydüg ma

tüg cögor Dios miibijctzoobi. Co ycoodziñ Jesús naydüg anajty yajpaady. ²⁴ Co ycoodziñ, meju cujc anajty je barco cujc nicxy. E je ni ooy anajty ymijjéztpey ma je barco, je' co ooy anajty mic yjanchpojoy. ²⁵ E co oy ymoñiy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiñ mejyhuingíxy, chi ajcxy ooy ñay'adzigiñi. Ooy ajcxy yaaxqueecy yminañ ajcxy:

—Hue' iich ajt ijxmaniñiyim.

²⁷ Chi Jesús mic'amy ymígapxy ajcxy etz nimay:

—Huinmic jotmic naybidáacigíxy, iich yí'. Ca' mdzigñiygíxy.

²⁸ Chi oy Pedro Jesús ymígapxyii, nimaayi:

—Huindzin, pen janch miichity, ane'mgich co huen iich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybijcy jadu'n nej anajty ooy mic yjanchpojoy, chi ooy chigiy, chi oy oga'n ytigñiyñi quimbi, chi yaaxqueecy, yminañ:

—Huindzin, iich yajtzóocigich!

³¹ Huin'it Jesús oy yci' mimajtzí, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigñiy barcojoty, huin'it je mic poj ñajxy. ³³ Huin'it je' ajcxy jiby barcojoty ycojxtinay'ihuiydaay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

Jesús yajtzooctay je pa'mjäy ajcxy jim Genesaret

³⁴ Co ajcxy ymejñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuñy co Jesús ti yjäty ma yí' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy miid miñ tüg'óciy je pa'mjäy ma Jesús. ³⁶ Chi ajcxy cohuanñy Jesús, pen jeb je pa'mjäy ñidoñyii je yhuit. E tüg'óciy je huidijaty ñidonip je' yhuit, je' ajcxy chooctay y'agidactay.

Huidi jäy yaj'ahuimbijty janch jibic

15 Chi ymiñ ma Jesús nijëjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miñ nijëjity escribas, je huindzindijc huidibi ajcxy nijaydutp anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yi' ajcxy ycaaygixy y'uuccixy, e ca' jayjip ycibujcixy, ca' ixpujicixy ixjéztzicy ypocy.

³ Chi Jesús y'adzooy, yajtiñy:

—¿Na'amy co miich ajcxy mgapxycömíodögy Dios? Mdzachcuydungixy mgi'mgostumbre ma yjapadyii mguydungixy ixypy Dios ycötújcin. ⁴ Com Dios ti y'ane'my ma ycötújcin: "Yajmij'at mdaj mdeedy, e pinjaty jibic nigapxy ni'ojñyb ytaj yteedy, ögipy yí'." ⁵ Per

miich ajcxy minamb co tüg je yëdyjc jëbi nimäy ytaj yteedy: "Ca' iich miich ajcxy nbubeda'ñ, com ti n'ahuanñyich ma Dios tüg'óciy tijaty nmíidich." ⁶ Chi huen ytipinñity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'mgostumbre. ⁷ Miich ajcxy naybidaacip jadu'n nej jihuiy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhuim'y co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyot huinijot.

⁹ Naadigi' co ajcxy xyhuin'ñiygixyich xyhuinyáax-cixyich. Mnayyaj'ixpíjicigixy ayuc tiy'ajt huidibi jäy ajcxy ti coy ti maacxy.

¹⁰ Huin'it Jesús huomujctay je mayjäy, yminañ:

—Amídooy'itcixy iich n'ayuc etz mhujñihuñiygixip.

¹¹ Ca' ji ni ti jicxy huñi jäy ypidacpy ma y'ahuac nicxy yajpocycäy. Yi' janchity je jibic ayuc huidibi pidzim ma jäy ajcxy y'ahuac, yí' ajcxy yajpocycähuñib.

¹² Chi ymiñ ma Jesús je' ydiscípulos ajcxy, chi ajcxy ñimaayi:

—¿Nej miich mnejhuñyb co je fariseos ajcxy ñijot-ma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ:

—Huen tim huidibi ane'min huidibi ca' Dios ti pidägy, Dios yajtigoyam, tim jadu'n nej jäy ajcxy huixigiy ujtz huidibi ca' y'oy'ujtzity. ¹⁴ Imajtzicix yí fariseos etz escribas ajcxy. Ca' ajcxy huinñihuñy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huñitzhuidity jadüg huintzpi, chi nimetz nicxy yjutcögägixy.

¹⁵ Huin'it Pedro nimay Jesús:

—Yajhuinñihuñyg iich ajcxy jada jihuibit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhujñihuñy jada jihuibit ayuc? ¹⁷ ¿Nej ca' miich ajcxy mnejhuñy co tüg'óciy huidibi tigñyb ma miich ajcxy m'ahuac, je' nicxp ma miich ajcxy mjot etz ypidzimy ma ajcxy mninix? ¹⁸ Per je jäy huidibi jibic capxp, capxp je' je jibic ayuc huidibi ymiid ma yjot yhuinma'ñ. Jada jibic ayuc yajpocychimécp je jäy. ¹⁹ Yi' jibicpi huidibi tzomb ma jäy ajcxy yjot yhuinma'ñ, yí' je' jäy'aj'ögñ huinma'ñ, je töxyjäy migapxtigoyñ huinma'ñ, meedzi huinma'ñ, je indägñ huinma'ñ, je piitz capx huinma'ñ. ²⁰ Yjadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'nñ ajcxy pocy ixpujicixy jayjip, ca' je' ypocycäy ajcxy ma Dios.

Tüg töxyjäy huidibi ca' judíojäy mibijc Jesús

²¹ Chi Jesús jim chooñ, nicxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíojäy. Chi yí' nimiiñ Jesús, chi nimay:

—Huindzin, David y'ap y'oc, pa'ayoogich. Iich nmíidich tüg niix huidibi ymiid ca'oybi etz oy tzaachypí paady.

²³ Per ca' ni nej Jesús y'adzoohui. Huin'it je' ydiscípulos ajcxy miñ ma Jesús, e ycohuanñy, minañ ajcxy:

—Capxycíx miid jada töxyjäy, com nigo xypayaax xypadinaayim.

²⁴ Chi Jesús yminañ:

—Dios ñich ti xyquexyich jëda'ajty ma je israelitasjäy huidibi y'alma tigoyam.

²⁵ Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich mina'ñ, per ixti ycaayb je uc je tzajcaagy y'abu'x huidibi cáb ma yhuindzin mesa.

²⁸ Chi Jesús je töxyjäy nimay:

—Janch mij mmibijcin. Ñich ndunaamybich jadu'n nej miich mdzocy.

Huin'it hori je töxyjäy ñiix choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim ñay'ihuiy. ³⁰ E huin'it oy mayjäy miidmiñ pa'mjäy huidibi huintz, uum, cämucy tecmucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e y' yajtzoocay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ixigy, je cämucy tecmucy ti yöygy. Chi je mayjäy ytigiy ñbaady capxpaady Dios, je Dios huidibi je Israel jäy ymijpidacpy.

Jesús yajcay midaax mil jäy

³² Chi Jesús mijhuoy je' ydiscipulos ajcxy, nimay:

—Ooy nba'ayooyich jadyaab jäy ajcxy. Com cujc midugig xii ijtcixy ya miid ñich etz ca' ajcxy midity ti ycaayipy. Ca' nguexhuimbida'ñich ajcxy ayuu ma ytijc, ca' yjetyty yajpa'mgojip ajcxy tü'am.

³³ Chi je' ydiscipulos ajcxy minañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jiliby tzajcaagy miich ajcxy mjacmidity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen ñay'ihuiy daagyixy naaxcixy. ³⁶ Chi Jesús conigy je huixtujcpi tzajcaagy etz je hueenip acx, e yajnax Dioscojuyip ma Dios. Chi tujc-hua'cx etz moy je' ydiscipulos ajcxy. E y' ajcxy yajhua'cx je jicxy picy ma je mayjäy. ³⁷ Chi je mayjäy nidüg'öciy ycaay cuxi. Jesús ydiscipulos ajcxy yajpidigy huixtujc cach cayduc uuctuc tibi anajty yconaxy. ³⁸ E je huidibi ajcxy cay hue' anajty naybátigyixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycixy miid je mayjäy huen ajcxy

ñixcixyñi ma ytijc. Chi Jesús ytigiy barcojoty etz ñicxni ma Magdala naax jot.

Je fariseos etz je saduceos ajcxy pijtzoogixy tüg ijxpejt mijhuinma'ñybi

16 Chi je fariseos etz saduceos y'oy ajcxy ixty Jesús.

Yi' ajcxy ijxta'n octunaangixy miid Jesús, paady ajcxy pijtzooy co Jesús huen yaj'ixyii ajcxy tüg ijxpejt huidibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu yi tzajp tzaptz, chi miich ajcxy mina'ñ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy mina'ñ co ca' y'oyity yi tiempo. Miich ajcxy ooy mnaybidägyii nejihuüy ooy m'ixpicity ma Dios ytiy'ajt, e ca' yjanchity. Miich ajcxy jëbi yi tzajp myajcapxy, per ca' mnejhuüygixy nej yhuimbizimy yi mijhuinma'ñ ijxpejt huidibi Dios ytumyb ma jadachambi xii tiempo.

⁴ Yi jäy ajcxy huidibi cham tzinaayb, ooy yjibicjyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com miid miich ajcxy jaybetyty je mijhuinma'ñ ijxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijcin

⁵ Co Jesús etz ydiscipulos ajcxy yja'ty ma jadüg niiba', chi je' ajcxy yjäydgoy je tzajcaagy. ⁶ Chi Jesús yminañ: —Naygüend'ajtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscipulos ñayñimáayigixy miñ xyipy:

—Paady jadu'n yminañ, je' co ti ñich ajt je tzajcaagy njäydgooym.

⁸ Jesús nejhuüy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy minangixy co ca' ajcxy tzajcaagy midity? Janch hueeni miich ajcxy mmibijcin.

⁹ ¿Nej ca'ni miich ajcxy mhujhuüy? ¿Nej ca' mjäymechyii co ñich migoox tzajcaagy nyajhuäcxy etz ni migoox mil je yëydijctijc anajty huidibi ajcxy cay? ¿E ni mga'ajihuüyii ajcxy naag cach cayduc uuctuc ti myajpidigy? ¹⁰ ¿E ni mga'ajihuüyii ajcxy co huixtujc tzajcaagy nyajhuäcxyich ma nimidaax mil yëydijc ajcxy huidibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhujhuüy, co ca' ñich yam nigapxy yi tzajcaagy huidibi miich ajcxy ti mjäydgoy, co ti nyajnimaygyixy je levadura huidibi je fariseos etz saduceos ajcxy ymid?

¹² Huin'it Jesús ydiscipulos ajcxy huinjhuüy co Jesús ca' anajty je' ti yajnimayii ajcxy co huen naygüend'ajtigixy miid tzajcaagy levadura. Hue' janchity Jesús yajnimay ajcxy co huen naygüend'ajtigixy miid je fariseos etz saduceos ajcxy y'ixpijcin.

Pedro nidiy'aty co Jesús yí' je' je Cristo

¹³ Co Jesús yja'ty ma Cesarea Filipino naaxjot, chi Jesús y'amidooy je' ydiscípulos ajcxy:

—¿Nej jāy ajcxy ymīna'ñ, pīnic ñich?

¹⁴ Chi ajcxy ymīna'ñ:

—Nijējity jāy ymīna'ñ co miich je' Juan je Bautista. Nijējity jāy ymīna'ñ co miich je' Elías, e nijējity ymīna'ñ co miich je' Jeremías o jadüg profeta (huidibi tzinay jecy'ajty).

¹⁵ Chi Jesús ymīnañ:

—¿E miich ajcxy nej mīnaangixy, pīn ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xy-cayajnimāy jada tīy'ajt, tūgpajc je Dios Teedy nDeedyich huidibi jīlby tzajpjoty, yí' tī xyajnejhuīy jada tīy'ajt. ¹⁸ ñich miich nīmaayb co miich mxī'adiīyb Pedro, e hue' yhuimbizīmy tzaa (hue' je', je tzaa tija'ñ je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptjic (hue' yhuimbizīmy, ma ñich n'ane'mīn chondāga'ñ), e ni ca' oybī ymīc'ajt ycamīmadāgīpy. ¹⁹ ñich miich nmōhuamyb je cōtūjcīn jadu'n nīpaady nej tūg ahuaast huidibi mīd myaj'ahuādzipy Dios y'ayuc ytiy'ajt. Tūg'óciy huidibi mīich mgapx'adujcpy ya naaxhuiñ, Dios nañ jadu'n capx'adugīpy jīlby tzajpjoty, e huidibi miich ya naaxhuiñ ca' capx'aducy, Dios nañ ca' capx'adugīpy jīlby tza-jpjoty.

²⁰ Huin'it Jesús nīmay je' ydiscípulos ajcxy, co ca' huaad ni pīn nīmāy co yí' je' je Cristo.

Jesús nigapxy je' y'öcīn

²¹ Ixti huin'itni Jesús ytiģīy yajnimay je' ydiscípulos ajcxy co nīcxamb jīm Jerusalén etz co jīm ooy y'ay-oohua'ñ. Jīm Jerusalén je judío mījjāydījc, je teedytīc huidibi tungmīdīpī, etz yī escribas ajcxy ooy chaachytuna'ñyī etz yaj'ōga'ñyī. Per codugīģ xī huin'it yjugypīga'ñ jadüg'oc. ²² Huin'it Pedro mīdnicxy Jesús ahuingujc, e oy oiy, ymīnañ:

—Huindzīn, ca' Dios tzocy nīcx jadu'n mjaty. Mīd mīich ca' jēbī jadu'n mjadīpy.

²³ Per Jesús yhuāc-huimbijty, chi nīmay Pedro:

—Huinhuāctuatcīch Pedro, je mujcu' miich jadu'n xyajcapxp. Ca' nīgoo xy'adzīpyīch. Ca' miich mhuinma'ñybidāgy nej Dios tzocy. Yí' janchtīy miich mhuinma'ñ'ajtpy nej jāy ajcxy tzocy.

²⁴ Huin'it Jesús je' ydiscípulos ajcxy nīmay:

—Pen je pīnjaty xypamīna'ñich, huen yci'mdzojcīn ixmajtztāy etz huen yhuinma'ñyīdāgy co ayoohuīpy mīd ñich ycīxpī, ixti mabaad y'ōgy. ²⁵ Huen pīnjāy huidibi ca' ayoohua'ñ mīd ñich ycīxpī, hue' je' yajtigoyamy yí' yjugy'ajtīn. Per pīnjaty xypanīcxpīch oy nej ytimyjadīpy, hue' je' ypadamyb yjugy'ajtīn huidibi ca' ycīxīpy ytiģoyīpy nīmīna. ²⁶ ¿Tī jāyģīdaacīn yí' co tūg jāy y'ocnāyājpādīy yī meeñ etz mīc'ajtīn huīndu'my

ñāaxhuiñyī, e yjugy'ajtīn cīxīpy tiģoyīpy tūccī'y? ¿Jadu'ñyī jēbī jāy y'alma yjugy'ajtīn occojuyī? Nīģī choohuīty jāy ajcxy y'alma yjugy'ajtīn, ca'ydi jac ni tī. ²⁷ ñich, je jāy huidibi tzoōn tzajpjoty, mīnaambīch jadüg'oc ya naaxhuiñ mīd je ángeles ajcxy etz mīd nDeedyīch y'oy'ajtīn. Huīn'it micuejtāhua'ñ tūg'óciy je jāy nej anajty tī ytuungīxy, pen oy, o ca' y'oyīty. ²⁸ Janch tīy'ajt jadu'n nej nīmaayģīxy co jī ya naagīty huidibi ca' y'ōga'ñ ixti coōnī xy'ixīpyīch jadüg'oc co ñich anajty nmīīñ ane'mbī.

Co Jesús ñīnicx yajtigach

17 Codudujc xī huīn'it Jesús mīdnicxy Pedro, Jacobo, etz y'uch Juan ma tūg mījcop, ma tūg cop huidibi ooy ycīxīty. ² E jīm copcīxy Jesús ñīnicx ñayģojtīgajtzī ma Pedro, Jacobo etz Juan ajcxy yhuīnduu. Jesús yhuīñyījīp ytiģīy adīcxp nej je xī ytīcxīn. E Jesús yhuīt y'ahuīmījty janch poob jadu'n nej tūg tīcxīn. ³ E tīmetīnī oy ixcīxy Moīśēs etz Elías ycapxy mīydāgy anajty mīd Jesús. ⁴ Chi Pedro nīmay Jesús:

—Huīndzīn, oy y'oyīty co ñich ajt ya. Pen mīich mdzojcy jēbī ñich ajcxy nyaj'oyīy tūģīģ tījquemy. Tūg mīich mjē', tūg Moīśēs yje', etz tūg Elías yje'.

⁵ Pedro capxp anajty, tīm huīn'ítīy tūg joc yajnīdīgoyday je' ajcxy huidibi ooy adīcxp anajty. E ma je joc yajmīdoy tūg ayuc huidibi ymīnañ:

—Jadayaabī yēydījc ñich je' n'ung'ajtpy huidibi ooy ndzocy njīhuīyīch etz yí' ñich mīd njotcujcity. Amīdoo'it mīich ajcxy yí' y'ayuc.

⁶ Co Pedro, Jacobo, etz Juan jadu'n mīdooy je ayuc choōñ jocjoty, chi ajcxy ooy chīģīy etz ñayñītzītzīdaacī ajcxy.

⁷ Huīn'it ajcxy Jesús ñīmīnī etz nīdoñ ajcxy, e ymīnañ: —Pīdīccīx, ca' mdzīģīyģīxy.

⁸ E co ajcxy y'ījxīgy, ca' anajty jīm Elías etz Moīśēs. Naydūgpajc Jesús yjac-huī'my mīd je' ajcxy. ⁹ E co ajcxy ymīnajcy ma je cop, chi ajcxy Jesús nīmay:

—Ca' ni pīn mīich ajcxy nyajnīmāhuīpy jadu'n nej tī m'ījxcīxy cham, ixti coōnī ñich anajty tī njugypīcyīch jadüg'oc ma anajty tī n'ōģīch.

¹⁰ Huīn'it je' ydiscípulos ajcxy yajtīy Jesús:

—¿Nej co yī escribas, yí' ajcxy huidibi nījaydūtp etz yajnīģuejp Dios y'ayuc, ymīnaangīxy co Elías yí' mīinaam jāyījy etz axam je Cristo?

¹¹ Chi Jesús y'adzooy:

—Janch tīy'ajt co Elías ymīna'ñ etz yaj'oyīydāhuamy tūg'óciy mīd Dios ycīxpī. ¹² Per ñich mīich ajcxy nīmaayb co Elías tī y'oy. E je jāy ajcxy ca' nejhuīy pīn yí', e ooy jībīc tuuñ ajcxy, nej tīm tzojccīxy. E nañ jadu'n ñich, je jāy huidibi tzoōn tzajpjoty ayoohuaambīch ma yí' ajcxy.

¹³ Huīn'it je' ydiscípulos ajcxy huīnjīhuīy co Jesús hue' anajty ñīgapxyp je Juan, el Bautista.

Jesús yajtzögy tüg jäy mo'tpa'mmüdpí

¹⁴ Co Jesús, Pedro, Jacobo etz Juan yjäty jim ma je mayjäy ajcxy, chi ñimiini tüg jäy. Chi je jäy ycoxtinay'ihuiy ma Jesús yhuinduu, chi yminañ:

¹⁵ —Huindzin, ñich nmang pa'ayoohuic. Je' co ymiid mo'tpa'm etz oy yaj'iyoooyii. Canaag'oc ti ycäy jijnjoty ñijoty. ¹⁶ Paady ñich ti nmüdmiiñich ma miich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich ajcxy mmibiga'ñ Dios, ca' miich ajcxy mgapxymidoohua'ñ Dios. ¿Naag xii naag tiempo ñich miich ajcxy njacmimectugipy? Yajmiingix yi yeeg'anäg.

¹⁸ Co je yeeg'anäg yajmüdjaty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy müdmüdac Jesús ahuingujc, chi ajcxy yajtiy ma Jesús:

—¿Nej co ñich ajcxy ca' ti nmadägy nicx nya-pidzimmgixyich je ca'oybi ma je yeeg'anäg?

²⁰ Chi Jesús yminañ:

—Je' co miich ajcxy hueeni mmübjcin. Janch tiy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtztim, huin'it jëbi ixypy mnimäy jadaaabi cop co huen jihuäcy ya etz huen nicx huingduum, chi ñicxip je cop. Ni ti ji ycatzipity pen janch miich ajcxy müdity mübjcin. ²¹ Jadaaabi picy ca'oybi pidzimipy co Dios nmübjctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

²² Co anajty ajcxy yhuidity tügmucy jim ma Galilea y'it, chi Jesús nimay je' ydiscípulos ajcxy:

—Ñich, je jäy huidibi tzoon tzajpjoty, yajcäyegipyich ma jäy. E yi' ajcxy xyaj'ögibich etz codugig xii njugyigipyich jadüg'oc. Co je' ydiscípulos ajcxy jadu'n müdooy, chi ajcxy ooy yjotmaybaty.

Je cogüejtin ma je tzajptijc

²⁴ Co Jesús yja'ty müd je' ydiscípulos ajcxy jim ma je Capernaum cajp, chi huidi anajty ajcxy meeñ yajmujcp müd tzajptijc ycixpi, oy ajcxy ijxcixy je Pedro, chi ajcxy y'amidooy:

—¿Nej miich mhuindzin ycuejcpy meeñ müd tzajptijc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytigxy tigoty, chi Jesús yajijp ymügapxy, ñimay:

—Simón, ¿nej mmina'ñ? ¿Pin je rey ajcxy yajcuejcpy? ¿Yi' yjäy o huingjäyi?

²⁶ Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. ²⁷ Per ca' ndzocyich co je cogüejtpi nyajcapxmayiim, nicx miich ma yi' mij laguun e cohuidzi' jiiy mxu'ñ, e je acx huidibi anajty yajijp huomb, je' myajpidzimipy, e ma y'ahuac jiiy mbaadipy tüg meeñ, yajpidzim je meeñ e nicx cuet müd ñich ycixpi etz müd miich ycixpi.

¿Pin je' jac nigü mijp?

18 Je huin'it hora je' ydiscípulos ajcxy ymijhuäctay Jesús etz yajtiy:

—¿Pinjäy je'jac nig ymiid je mij'ajtin ma Dios y'ane'my jiiy tzajpjoty?

² Chi Jesús mijhuoy tüg je pi'canäg. Chi pidacy je pi'canäg cujc'amy ma yi' ajcxy. ³ Chi Jesús yminañ:

—Janch tiy'ajt ñich miich ajcxy nimäy, pen ca' miich ajcxy jothuimbijtcixy etz naybidaaccixy mhuiñma'ñ jadu'n nej jada pi'canäg huinma'ñ müd, pues ca' mdigihüipy ma Dios Teedy y'ane'my jiiy tzajpjoty.

⁴ Paady, pinjaty müd yhuinma'ñ yung nax jadu'n nej jadaaabi pi'canäg müd yhuinma'ñ yung nax, je' je' je' huidiib jac nigü mij'ajtin ymiid jiiy ma Dios y'ane'my.

⁵ Hueñypinity huidibi müd ñich ycixpi cöbigipy etz tzogipy tüg pi'canäg, jadu'n nej jada pi'canäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinma'ñ ymübdzimy, e yajpocycäy yi' jadu'mbi pi'ctijc huidibi ajcxy xymijnicx-pejtpich, jac'oy ixypy co yi' jadu'mbi jäy ytimyñayyöcx-odzyii tüg paandzaa etz ñayñajtzjibibihüipy mejyoty.

⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' ti-goy y'idipy tijaty huidi yajtundigoy je jäy ajcxy. Per mij ayo'n pada'ñ müd yi' Dios pinjaty cojp tundigooyi.

⁸ Pen miich mgü' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigü oy co mdigihüipy ciduc tecytuc jiiy tzajpjoty etz ca'ydí co mdigihüipy müd metz mgü' etz metz mdecy mijjijnjoty huidibi nimina ycapich. ⁹ E pen yi' mhuiin tug xyajpocycähuamb, tim yajpidzim etz ixcätz jiguem. Com jac'oy mdigihüipy müd tüg mhuiin ma jugy'ajtin huinixiibi, ca'ydí co mdigihüipy müd metz mhuiin ma yi' jijn huidibi camina xii ycapich.

Je y'ijxpejt, je cöbixy huidibi tigooy

¹⁰ Ca' m'ixtijcixy ni tüg pi'canäg huidibi xymübjcpich. Yi' ajcxy je' y'ángeles tim ijtüib jiiy tzajpjoty ma Dios Teedy, ñich nDeedy yhuinduu. ¹¹ Ñich je jäy huidibi tzoon tzajpjoty, ti nmiiñich ya naaxhuiñ, je' co nayajntzöga'ñich je jäy ajcxy y'alma huidibi tigoyam. ¹² ¿Nej miich ajcxy mina'ñ? Pen tüg jäy ymiid migo'px cöbixy, etz pen yöyigooyb nidügti cöbixy, ¿nej ca' jëbi ixmach je nimüda'px majmocx müdaax cöbixy etz nicx ixtäy je jadügpi huidibi yöyigooy? ¹³ E pen ypatpy je tügpi huidibi yöyigooyb, chi ooy xondägy müd co anajty ti paady huidibi anajty ti ytigooy, ca' jadu'n yxondägy

míid je nimída'px majmocx mídaax huídibi ca' anajty ti yóytigoogyíxy. ¹⁴ Tim jadu'n nipaady míid Dios Teedy jiby tzajpjoty, ca' tzocy co ni tóg jáy y'alma tigoyípy.

Nej huaad tóg mmigüg nhuinmeecxim

¹⁵ Pen miich mmigüg xytuñ jibic, míidmiydac ahuin-gujc e yajhuinjihu' ma ti ytundigooy, pen xy'ayuchuin-jihuñy ti anajty mmínaymigügpigyíi je mmigüg. ¹⁶ Pen ca' xy'ayuc-huinjihuñy, chi huoominipy tóg o metz mmigüg huídibi jébi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuñhua'ñ, míidnicxip ma mibijcpidijc yömujectac e jim ajcxy myajnaxipy jadu'n nej tóg huídibi ca' Dios mibicy etz jadu'n nej tóg yajcogüeipti huídibi ooy pocymíidity. ¹⁸ Janch tiy'ajt ñch miich ajcxy nimäy, tóg'óciy huídibi miich ajcxy mgapx'adujcyp ya naaxhuñ, Dios nañ jadu'n capx'adugipy jii by tzajpjoty, e huídibi miich ajcxy ya naaxhuñ ca' capx'aducy, Dios nañ ca' capx'adugipy jii by tzajpjoty. ¹⁹ E nañ jadu'n ñch miich ajcxy nimäy, pen ya naaxhuñ miich ajcxy nimetz mnaygápxigixy co tijaty mmibijctzohuaangixy ma Dios, Dios, ñch nDeedy huídibi jii by tzajpjoty, xymöhuipy huídibi ajcxy mbijct-zooyb. ²⁰ Com ma miich ajcxy nimetz o nidugñg naymújcigixy, jim ñch n'ity cujc'amy ma miich ajcxy.

²¹ Chi Pedro y'amídooy Jesús ymíañ:

—Huindzin, ¿naag'oc huaad nhuinmeecxyich yí' ajcxy huídibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy mídaax mígo'px jamída'px majmocx mídaax'oc.

Je tumbi y'ixpejt huídibi ca'p ymigüg huinmeecxy

²³ Dios y'ane'mín jii by tzajpjoty jadu'n nipaady nej tóg rey huídibi huijtz'oyñy bíid je ytumbidijc jajadu'ñi ajcxy yjacmínucxy'adyii. ²⁴ Je rey ytimyhuijtz'oyñychondacyñi anajty cuentas, co oy yjädý tóg ytumbi huídibi anajty mínuucxy'ajtíp canaag millón. ²⁵ Com je' ytumbi ca' anajty míidity ti míid migüedñb je' yhuindzin. Huin'it je huindzin ane'my co huen je' ytumbi yajtooc-nax quipxyí míid y'ungdöxyijc etz tóg'óciy tijaty ymíid, jaydéb ñuucxy y'adujctähuipy. ²⁶ Huin'it ytumbi ycoxtinay'ihuñy ma yhuindzin yhuinduu etz nimay:

“Huindzin, pa'ayoogich, etz ñch miich nmigüejtähuiipy.”

²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi ymínaybati tóg ymigüg huídibi anajty míid quipxyí ti ytuñ. Je' anajty mínuucx'ajtíp tim hueeni, chi je' yöcmíadziy je' ymigüg huídibi míid ytuuñ, chi nimay: “Cuet huídibi mnucx'ajtípy ma ñch.” ²⁹ Huin'it ymigüg ycojxtinay'ihuñy ma je' yhuinduu. Chi mínuucxtaacy nimay: “Pa'ayoogich. ñch miich nmigüejtähuiipy.” ³⁰ Chi je jadügpí ca' mecxtujcín yajtuñ. Chi oy ymigüg pidägy pujxtigoty, ixti cooni anajty micuedyíi. ³¹ Co je jacjadyii ymidumbidijc oy ixý jadu'n nej ti yajtuñ je' ymigüg, chi ooy ajcxy jihuñy. Chi ajcxy nicx ma je yhuindzin etz ya-

jnimayday tóg'óciy nejaty anajty ti ijxcixy. ³² Huin'it je' ajcxy yhuindzin oy yajhuoyii je huídibi mínuucx'ajtíp canaag millón. Chi nimay: “Miich ooy mdzachjibicjáyity. Ti ñch miich nhuinmeecxi tóg'óciy je mnucxy, míid co miich pa'ayoohuin mbijctzooy ma ñch. ³³ E miich nañ jadu'n ixýpy ti mba'ayoy je migüg huídibi míid mmíduñ, huídibi xymínuucxy'ajtíp, jadu'n nej ñch miich ti nba'ayooy.” ³⁴ Chi je huindzin ooy chachjotma'ty, chi pí-dacy ane'mín co huen yajtzaachytuñ je' ytumbi mabaad cuejtäy tóg'óciy huídibi ñuucxy'ajtípy. ³⁵ Chi Jesús ycapxycjñxi, míañ:

—Tim jadu'n nej jada rey ti tuñ míid je ytumbi, nañ tim jadu'n Dios tunipy míid miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdüjgot.

Jesús yaj'ixpicy míid co jáy ytöxyijc ixmach

19 E co Jesús capxtay jada ayuc, chi choñ Galilea, chi oy yjädý ma Judea it jim Jordán mij ññ ninaxy.

² Chi ooy mayjáy ypanícxí, e jim yajtzoocy huídijaty anajty yuu míid pa'm míid.

³ Huin'it nijéjity je fariseos ajcxy nimíñ Jesús co yajmachcähuaangixy anajty. Chi ajcxy y'amídooy:

—¿Nej janch co Dios ti xymooyim cötujcín co jébi tóg yéydijc ixmadzip ytöxyijc míid tim hueeni ti capxy ti ayuc?

⁴ Chi Jesús y'adzooy:

—¿Nej ca'ní miich ajcxy m'ixy mgapxy ma ymíñ jaybety ma Dios ñecy co je naaxhuñybi chondacy, co Dios oga'ñ yajcoy tóg'óciy tijaty huídibi jil'ajtp co “Dios yajcoy tóg yéydijc etz tóg töxyjäy”? ⁵ Nañ jadu'n Dios ymíañ: “Je yéydijc y'ixmadzip ytaj yteedy etz pudigñhuipy je' ytöxyijc. E je yéydijc etz ytöxyijc tú'ciy idaangixy.”

⁶ Paady ca' ñimetzity ajcxy, com je yéydijc etz ytöxyijc tógmucy y'idaangixy. Com Dios ti huijtmucy je yéydijc míid je töxyjäy, paady ca' huaadity co jáy ajcxy huijtzhuäcxyp tñbí Dios huijtmucy.

⁷ Huin'it je fariseos ajcxy y'amídooy Jesús:

—¿Na'amy co Moisés cötujcín ti yejcy jecy'ajty co tóg yéydijc jébi huaad ixmach ytöxyijc, e möhuipy ñinecy ñidiy'ajt e jadu'n jébi ixmach?

⁸ Chi Jesús ymíañ:

—Moisés jada cötujcín ti xymooygixy co jébi m'ixmajtzcxxy mdöxyijc míid co miich ajcxy mdzachcöjuuñity, ca' mgapxymídohuaangixy Dios. Per co je naaxhuñybi chondacy ca' anajty jadu'nity. ⁹ Janch tiy'ajt jadu'n nej ñch miich ajcxy nimaaygixy co je yéydijc huídibi yajjayhuäcxp míid je ytöxyjäy, e je ytöxyjäy ca' anajty ti ytundigooyb míid huingbi yéydijc, hue' je' yéydijc ytundigooy co ixmach ytöxyijc etz ypijctigach míid huingbi. Nañ tim jadu'n pen tóg yéydijc ypicy míid tóg töxyjäy huídibi ñäy ti y'ixmachyíi, hue' tundigooyb anajty je yéydijc.

¹⁰ Co Jesús ydiscípulos ajcxy mídooy jada ayuc, chi ajcxy ymíañ:

—Pen jadu'n jédu'n je tiy'ajt co je yéydijc ca' huaad ixmadzip ytöxyjäy, jac'oy co ca' nbijcím.

¹¹ Chi Jesús ymíañ:

—Ca' tūg'óciy je jāy huinjihuūy jadayaabi tiy'ajt. Jēyī ajcxy huinjihuūy pīn ajcxy Dios pidaaci co huinjihuūy. ¹² Ji canaagnax je ayuc je huinma'ñ nej ca' yjēbity ypīgipy je yēydijc. Naagity pi'ctijc yma'xung'aty e ca' yca'pxity ñinīcxy, paady ca' pīcy ajcxy. E nijējity je yēydijc ca' huaad ypīcy, mīd jēgīxpi co anajty je' ti ymījaapīgīyī. E nijējity yēydijc huī'my jaybīcy mīd jēgīx co ajcxy ytuñ ma Dios ytung, je Dios huidibī ane'myb tza-jpoty. Pinjaty cōbigamy ñich n'ayuc huen cōbīcy.

Jesús conucxy maybi'ctijc

¹³ Chi naagity je jāy mīdnīcxy y'ung y'anāg ma Jesús jaydēb yajcīnixajipy etz Dios mībijctzoy mīd yī' ajcxy ycīxpi. Chi Jesús ydiscīpulos ajcxy ogy je jāy ajcxy huidibī anajty mīd mīimb je y'ung y'anāg, nīmaaygīxy co ca' jadu'n y'oyity. ¹⁴ Per Jesús ymīnañ:

—Huen mīd mīñ ajcxy pi'c'anāg ma ñich, ca' mījīpco-gapxīygyxy. Com pinjaty ymībijc ñich ngapxy n'ayuc, jadu'n nej jadayaabi pi'c'anāg ajcxy ymībīcy, je' ajcxy tīgīhuam ma Dios y'ane'my jīby tza-jpoty.

¹⁵ Chi Jesús cīnixajy je pi'c'anāg ajcxy. Chi ñīcxni.

Tūg yeeg'anāgnīp comeēñybi mīdmīydāgy Jesús

¹⁶ Chi tūg yēydijc oy ixy Jesús. Chi y'amīdooy:

—Huīndzīn, ¿ti jada' co oy ñich ndunīpyīch jaydēb nbaadībīch jugy'ajtin huīdibī ca' ycīxipy ytīgoyipy?

¹⁷ Chi Jesús y'adzooy:

—¿Na'amy co xyñīmāyīch co oy huīndzīn ñich? Dios tūgpajc oyīp, ca' jac pīn. Pen mīich mdzōjcpy co mba-da'ñ jugy'ajtin huīdibī ca' ycīxipy ytīgoyipy nīmīna mguydunīpy je Dios ycōtūjcin huīdibī Moīśēs ycojaay jecy'ajty.

¹⁸ Chi je yeeg'anāg yajtīhuīmbijty:

—¿Huīdibī cōtūjcin mīich mdījp?

Chi Jesús ymīnañ:

—Ca' mīgūg myaj'ōgīpy. Ca' mīgūg ytōxyīc mīgapxtī-gooyīpy. Ca' mmeedzīp. Ca' mmīgūg mhuīn'ñnīp. ¹⁹ Yajmīj'at mdaj mdeedy. Mdzogīpy mījihuūy mīich mmīgūgtīj, tīm jadu'n nej mīich cī'm mnaychogyī.

²⁰ Chi je yeeg'anāg Jesús nīmaayī:

—Tī nguydūndāyīch jadayaabi cōtūjcin ajcxy maabi ñich nbi'c'atyīch. ¿Ti jada njacyajtīgoy'ijtpyīch?

²¹ Chi Jesús jadūg'oc y'adzooy:

—Pen mīich m'īdam tudāgy, nīcx tooctīgoyda' huīdī-jaty mīich mīd, etz mo' je meeñ je jāy ajcxy huīdījaty ayooob. Co jadu'n mdunīpy, chi mbaadīpy oy'ajtin jīby tza-jpoty. Co jadu'n mdooctāhuīpy tījaty mīich mīd, chi mīnīp jadūg'oc ma ñich nyajpaadyīch, e pajamgīch.

²² Co je yeeg'anāg jadu'n mīdooy, chi ñīcxni taj may com ooy anajty chachcomeēñity.

²³ Huīn'it Jesús nīmay je' ydiscīpulos ajcxy:

—Janch tiy'ajt jadu'n nej nīmaaygīxy co ooy ymījhuīn-ma'ñity co tūg comeēñyāy ytīgīhuīpy ma Dios y'ane'my jīby tza-jpoty. ²⁴ Jadūg'oc nīmīna'ñīch co ooy chipīty co tūg comeēñyāy tīgīhuīpy ma Dios y'ane'my, nīgī ca' chipīty co tūg camello ñaxīpy ma tūg xu'ñījx yxutity.

²⁵ Co Jesús ydiscīpulos ajcxy jadu'n mīdooy, chi ajcxy ooy jīhuīy huīnmay. Chi ajcxy ñay'amīdoohuī mīñ xyīpy:

—¿Pīn jēbī paady je' y'alma nīdzoocīn?

²⁶ Chi Jesús ajcxy huīndīcxpejty etz nīmay:

—Je huīdibī jāy ajcxy chipjīhuīyb, mīd Dios ca' nī ti chipīty.

²⁷ Huīn'it Pedro ymīna'ñ:

—Huīndzīn, ñich ajcxy tī n'ixmajtztāyīch tūg'óciy huīdī-jaty anajty ñich ajcxy nīmīd etz nbanīcx ñich ajcxy mīich. ¿E ti jada' ñich ajcxy nbaadaamybīch?

²⁸ Chi Jesús y'adzooy:

—Janch tiy'ajt nīmīna'ñīch co anajty je xīi je tiempo paady mīna Dios yajtīgajtztāhuīpy je tza-jp etz naax-huīñybi, co anajty ñich, je jāy huīdibī tzoon tza-jpoty, n'ityīch ma ngōtūjctacīch oybī jīby tza-jpoty, chi mīich ajcxy huīdī tī xypahūdītyīch, mīich ajcxy mbadamy ma-jmetz cōtūjctac, e mīich ajcxy mīdydunīpy je majmetz pīcypī Israeljāy ajcxy. ²⁹ E tūg'óciy jāy ajcxy huīdibī tī ix-majtztāy yjīn ytīj, y'uch ymīgūg, y'ung ytōxyīc, y'ung y'anāg, ytaj yteedy, o ycam ytu' mīd ñich ycīxpi, yī' ajcxy ypadamyb mīgo'px'oc, ca'ydi huīdibī tī ixmach. E ypadamy je jugy'ajtin huīdibī ca' ycīxipy ytīgoyipy nī mīna. ³⁰ Mayjāy ajcxy huīdibī cham ymīd mīj'ajtin cōtūjcin, tza-jpoty ca' ajcxy mīd'ada'ñ mīj'ajtin cōtūjcin. E mayjāy huīdibī cham ca' mīdīty ajcxy mīj'ajtin cōtūjcin, tza-jpoty ymīd'adamy ajcxy mīj'ajtin cōtūjcin.

Je naymīdunīptīj y'ijxpejt

20 Jadu'n Jesús ymīnañ:

—Je Dios y'ane'mīn jīby tza-jpoty jadu'n nīpaady nej tūg cogambī huīdibī ooy mīj cam mīdīty. Chi je cogam jopyñī choñ ma oy nīcxy ixtāy tumbīdj ajcxy huīdibī yajpīdīgīpy yī uva cosecha. ² Chi ycapxytuñ mīd nidūg nidūg ytumbī co mujuya'ñ tūg denario meeñ tūg xībī. Chi quejxy nidūg nidūg ytumbī ma je uva cam. ³ Chi petyxīi je cogam ñīcxy jadūg'oc tumbī ix-taayb. Chi paty cajp cujc nijējity tumbī huīdibī ca' ti tung mīdīty. ⁴ Chi je cogam je tumbī ajcxy nīmay: "Nīcx mīich ajcxy tuñ ma ñich ngosecha. Cham nmujuyīpy jadu'n nej ytiy'ajtīty." Chi ñīcxy ajcxy mīdumbī. ⁵ Chi je cogam ñīcxy jadūg'oc cujcxīi tumbī ijxtaayb. Nañ jadu'n nīcxy jadūg'oc mīnacxyī. ⁶ Nañ tīm jadu'n tzuu jadūg'oc je cogam ñīcxy tumbī ijxtaayb, chi paty nijējity cajpcujc huīdibī ca' ti tung mīdīty ajcxy, chi ajcxy nīmay: "¿Na'amy co mīich ajcxy myaajty? ¿Nej co ca' mīnīcxy mdungīxy?" ⁷ Chi je' ajcxy y'adzooy: "Je' co ca' ñich ajcxy pīn tī ycapxytuñ." Chi je cogam ajcxy nīmay: "Nīcx mīich ajcxy tun ma ñich nnaaxjot. Cham iya nmujuyīpy jadu'n nej ypaadyī." ⁸ Co oy ycodzīyñī, chi je huīndzīn nīmay je huīdibī nīgop'ajtp je tung: "Nīcx mījhuoodāy je tumbīdj etz mujuyīpy. Mujuy jayīp huīdibī tī ymīñ axam tumbī etz jīm nīcxy myajcogīxīy ma huīdibī anajty tī mīñ jayīp tumbī." ⁹ Chi ajcxy jayīp yajmujuy je tumbī ajcxy huīdibī anajty tī ytīgīy tumbī axam. Chi yajmujuy ajcxy jadu'n nej anajty jāy ñaymujuyīi je tūg xībī. ¹⁰ Co mīñ je tumbī ajcxy je huīdibī ajcxy jayīp tīgīy tumb. Chi ajcxy jot'ajti co jac'anaxy ya-

jmujuya'ñ. Per quipxyjaty ajcxy paty tüg meeñ nidüg'ócijc je tumbidijc. ¹¹ E co ajcxy quipxyjaty yajmujuy, chi ajcxy ytigüy jotma'tpi. ¹² Chi ajcxy nimay je cam huindzin: "¿Na'amy co quipxyjaty ñich ajcxy ti xymujuyich mïd je huidibi ti miñ axam tumbi? Yi' ajcxy tüg jaxigüy ti ytuñ, e ñich ajcxy tüg xñ je anbi ti ngöbicyich." ¹³ Chi je cam huindzin y'adzooy, nimay nidügti je' ajcxy: "Miich, ñich nmigüg, ca' ñich jibic ti nduñich mïd miich. ¿Nej ca' ñich ajt ngapxytuunim co jadu'n nmujuya'ñ tüg denario meeñi? ¹⁴ Con yi mmeeñ, e nicxni. Jadu'n ndzoocyich co quipxyjaty nmujuya'ñich miich mïd huidibi ti ymiñ axam ma je tung. ¹⁵ ¿Nej ca' huaad ñich nduñich mïd ñich nmeeñ nej ndzócyich? ¿O co xyajca'oy'ixyich, co ñich ooy n'oyjäyity?" ¹⁶ E huidibi ajcxy jaccogixiyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixihuamb. May ooy yjayajhuoomiñ e hueeni huidi huin'ijxipy.

Jesús capxypidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi mïd nicxy ahuingujc je nimajmetzpi ydiscípulos. Chi ajcxy nimay:

¹⁸ —Jadu'n nej miich ajcxy m'ijxy mnejhuüy cham ñich ajt nba'ttigüyim jim Jerusalén. Jim Jerusalén ñich, je jäy huidibi tzoon tzajpjoty, xyajcäyegaamich je teedy mijtungmïdpi etz escribas ajcxy. Nyajtyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xy-cäyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcru-utzpedipich ajcxy. E co n'ögibich, chi njugypigipyich co dugüg xii.

Huidibi Jacobo etz Juan ytaj ypijctzou

²⁰ Chi je Zebedeo ytöxyijc nimiiñ Jesús mïd metz je ymang; Jacobo etz Juan. Huin'it je ungdaj huingoxtinay'ihuüy Jesús, pijctzoy may'ajt. ²¹ Chi yajtiy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ñich metzpi yi nmang yi jacmijtung ma miich m'ane'min, jaydëb ññahuipy ma miich mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhujijhuüy ti ajcxy mbijctzooyb. ¿Nej mminaxa'ñ myajna'ñ miich ajcxy je tzaachypi huidibi ñich nminaxamy nyajna'amyich? Jadu'n nej jihuüy m'üga'ñ ajcxy je ta'm nñi huidibi ñich n'ügamy e mbaada'ñ je ñibejtin huidibi ñich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch tiy'ajt nej miich ajcxy mina'ñ co mmináxcixipy myajnájxcixipy je tzaachypi huidibi nnaxa'ñich. Per ca' ñich cötujcin nmïdidyich co ñich miich ajcxy nbidägipy mijtungmïd, co myajpaadip tüg ma ñich nmijc a'oy'amy e jadüg anajty'amy. Hue' janchtiy Dios Teedy ymïd ni'ixi' pinjaty ti huin'ixy jaydëb yajnicxip je mijtung ma ñich n'ane'mdac.

²⁴ Co je nimajcpi ydiscípulos ajcxy nejhuüy jadu'n nej Jacobo etz Juan pijctzoy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuüy co yi jäy ajcxy huidibi mijtungmïdpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt mïd ma je maybi naax cajp, mic ajcxy ane'my je jäy ajcxy. ²⁶ Per miich ajcxy ca' mjadu'nity nej je mijtungmïdpi ma je maybi naax cajp. Pinjaty miich ajcxy je mij tung yajnicxip, copicy ñaybidägüyb nej tüg tumbi. ²⁷ Pen ji miich ajcxy nidüg nigohuajc'ada'ñ, copicy ñaybidägüyb nej tüg tumbi. ²⁸ Com ñich nañ jadu'n, je jäy huidibi tzoon tzajpjoty, ti nmiiñich ya naaxhuiñ jaydëbi nbubedipyich yi mayjäy ajcxy. E canan yi' ajcxy xypubedipich. Ngäyegaamyich njugy'ajtin ma yi o'cin mïd je mayjäy ycxipi, jaydëbi ngohua'ñich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjäy. ³⁰ E jim anajty iñaaay nimetz huintzpi tüba'áy. E co ajcxy nejhuüy co jim anajty ñaxy Jesús, chi ajcxy yaaxpi jojcpí:

—Huindzin, David y'ap y'oc, tun may'ajt ñich pa'ay-oog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi nigü mnan'idich:

—Huindzin, David y'ap y'oc, tun may'ajt ñich pa'ay-oog.

³² Huin'it Jesús ytinayxijp, e ymina'ñ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich mïd miich?

³³ Chi ajcxy ñimaayí:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nidoni ma je yhuin, e mic'amy je huintzpi ajcxy y'ijxigüy. Chi Jesús ajcxy panicxy.

Jesús ytigüy jim Jerusalén

21 E co anajty Jesús etz je mayjäy ajcxy ti mihuin-goni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Nicxcix ma je cajp huidibi jim'amy. E jim tüg burro ycoxochity mïd y'ung. Coguejtüdip ajcxy je burro e yajmiingix ya ma ñich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadaayaabi oy jadu'n ytuñyii yjadyii yxicy yca'pxy jadu'n nej je profeta jecyip jaay, co jadu'n ymina'ñ:

⁵ Yajnima' je jäy ajcxy huidibi tzinaayb jim Sión (Jerusalén), oc'ijxcix, chi miñ ajcxy je mrey, yung nax yjot yhuinma'ñ mïdity je mrey, etz burrocxy miñ. Ma tüg burro mang huidibi ytaj tziy yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro mïd ymang. Chi Jesús ydiscípulos ajcxy jïbe'ñ je metzpi burro mïd ajcxy yjocxhuit, chi Jesús yaj'iñay je burro mang. ⁸ E je mayjäy ooy yajhuinyëbiy ajcxy je tü'aa mïd yhuit, chi ajcxy oy ypxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nicxp jayijp, e nañ jadu'n huidibi anajty mimb axam, ooy ajcxy ytigiïy huambi jihuiïyb, chach minangixy:

—¡Hosana! ¡Gloria a Dios! ¡Ooy ycömayity Dios! Huen capxpaady idipy jada yëydijc huidibi mimb ma yï nHuindzin Dios yxï etz mïd ymic'ajt. ¡Gloria a Dios!

¹⁰ Co Jesús ytigiïy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pïn yï' yijibi jäy?

¹¹ Chi mayjäy y'adzooy:

—Yï' je' je profeta Jesús huidibi tzoon ma Nazaret cajp ma Galilea it.

¹² Huin'it Jesús ytigiïy ma Dios ytijc. Chi ixquejxtay tüg'óciy je ajuybi adoocpi huidibi anajty yajpatp jiiiby. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi iñaybejt. ¹³ Chi jadu'n nimay ajcxy:

—Jaaybety jadu'n ymiñ ma Dios ñecy: "Ëch ndijc je' yï' ma jäy ajcxy Dios mibijctzoy", per miich ajcxy hue' yï' mhua'ñ meetzpi tijc.

¹⁴ E co anajty jiiiby tzajptigoty Jesús, chi jiiiby ñimiini huidijaty anajty huintz, huidijaty anajty cïma'ty tecy-ma'ty, chi Jesús yajtzoocytay. ¹⁵ Per je teedy ajcxy huidibi mijtungmïd etz je escribas ajcxy ooy mijot-ma'ty Jesús co ajcxy ijxy nejhuïy jadu'n nej Jesús anajty tuñ mijhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuiïygixy jiiiby tzajptigoty, yminaangixy: "¡Huen cömay'idipy je rey David y'ap y'oc!" ¹⁶ Chi je teedy etz escribas ajcxy Jesús ni-may:

—¿Nej ca' miich mmidooy nej je pi'c'anäg chach minangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiñ jaaybety co jadu'n ymina'ñiyi?:

Ti myaj'ixpicy ñy ma je pi'ctijc ma'xungdijc jaydëbi ajcxy ñbaadip capxpaadip Dios.

¹⁷ Chi Jesús ycapxycïjxy mïd je teedy etz escribas ajcxy etz choon jiiiby tzajptigoty. Chi ñicxy ma Betania cajp, e jim yajnaxxy je tzumbi.

Jesús capxpojcy je higeri ca'p anajty ytiim'aty

¹⁸ E co yxiimiy ytïcxïgy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higeri quipy. Chi ninicxy. Chi pä't'ijxy, per ca' anajty ni tüg ytiim, jëda'ajty je' y'aay. Chi Jesús nimay je higeri quipy:

—¡Ni ca' minaa xï mdïm'adipy!

E mic'iciyi je higeri quipy ytïch. ²⁰ E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yï higeri quipy mic'amy ti ytïch?

²¹ Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy mïd je mibijcin, etz ca' ajcxy mmibicy aametz jot-metz, jëbi mijhuinma'n mdungixy nej ñch ti nduñich. E nañ jadu'n jëbi jac mijpi mijhuinma'ñ mdunipy ajcxy. Jëbi ajcxy tun cop mnimäy: "Quëg ya, tigi' mejyoty" e xycapxymidohuipy ajcxy je tun je cop. ²² E tüg'óciy tijaty miich ajcxy mbijctzooyb huen ytimytijyity, pen mmibijcp ajcxy, mbaadip ajcxy.

Jesús ycötujcin

²³ Co Jesús yja'ty Jerusalén, chi ytigiïy jadüg'oc ma Dios ytijc. E jiiiby anajty yaj'ixpicy je mayjäy, chi ñimiini je teedy mijtungmïdpi etz judío mijjäydijc ajcxy. Chi ajcxy y'amidoohui:

—¿Ma cötujcin ti mbaady co jadu'n mduñ tzajtigoty? ¿Pïn jada cötujcin ti xymöy?

²⁴ Chi Jesús y'adzooy:

—Nañ jadu'n ñch miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ñch miich ajcxy nyajnimahuipy ti cötujcin ñch mïd nduñ huidijaty. ²⁵ ¿Pïn quejxy je Juan, je Bautista, yajñbejt, Dios o jäy ajcxy?

Chi ajcxy ñayñimáayigixy miñ xyipy:

—Co ixipy ajt n'adzoohuim co Dios Juan quejx, huin'it xy'adzoohuim: "¿Na'amy co miich ajcxy ca' mmibijcy Juan?" ²⁶ Per nañ jadu'n ca' huaad nmi-naanim co jäy ajcxy yajñbijcy Juan, com nejhuïyim co yï mayjäy mibijccixy co je' anajty Dios tüg y'ayucnajtzcaxiïybi.

²⁷ E paady ajcxy jadu'n adzooy Jesús:

—Ca' ñch ajcxy nejhuïygixy.

Huin'it Jesús yminañ:

—Nañ jadu'n ñch ca' nigapxa'ñich pïn je' ycötujcin mïd nduñich huidijaty.

Je metzpi ung ijxpejt

²⁸ Chi Jesús yminañ:

—¿Nej m'oc'ixy m'ocjaygugi' jadyaabi ixpejt? Tüg je yëydijc ymïd anajty metz je' ymang. Chi nimay je mijpi: "Nïcx cham m'octuñ ma ñch n'uva cam." ²⁹ Huin'it je' ymang y'adzoohui: "¡Ca' nñicxa'ñich!" Chi jaccohueeñyi je' ymang yhuinmaydigajch, chi ñicxy tumbi. ³⁰ Chi je ungedeedy oy ixxy je ymang mutzpi. Chi nañ jadu'n nimaay co huen nicxy tuñ. Chi je' ymang mutzpi y'adzooy: "Oy, cham nïcxibich." Per ca' ñicxy. ³¹ ¿Huidi je' nidügti ycuuyduñ nej anajty yteedy tzocy?

Chi ajcxy yminañ:

—Je' ymang mijpi huidibi jayijp nimay.

Huin'it Jesús nimay ajcxy:

—Janch tiy'ajt jadu'n nej nimaaygixy co je huidibi ajcxy yajcogüejtpi etz je töxyjäy ajcxy huidibi tundi-gooyb mïd yëydijc, je' ajcxy tigëhuamb jayijp ma Dios y'ane'my jiiiby tzajptoty, ca'ydï miich ajcxy. ³² Paady ycixpi oy ymiñ je Juan huidibi jäy ajcxy yajñbejt, Juan yajni'ixiïygixy je mayjäy nej ajcxy jëbi yjothuimbidity ma Dios. E miich ajcxy ca' mibijcy jadu'n nej Juan yminañ.

Per je' ajcxy huidibi yajcogüejtp etz je töxyjäydijc huidibi tundigooyb mïd yëydijctijc, ymïbijc je' ajcxy Juan. Oy miich ajcxy mja'ixy, per ca' mjothuim-bidaangixy etz ca' mïbigaangixy.

Je naymiduuniptijc jïbicjäybi ajcxy y'ixpejt

³³ Chi Jesús ymïnañ:

—Oc'amïdoo'ijtcix jadayaabi iixpejt. Ji anajty tüg je huidibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiïy ma anajty jëbi je uvas ñiï yajniçdägaani. Nañ jadu'n cojy tüg tzaaboch cixpi, jïgix jëbi cuend'aty ycam. Co yaj'oyiyday, chi je cogam yejcy pijctzoy je ycam ma je jäy ajcxy huidibi naymidunaanip. Chi oy chooni je cogam nicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyïi je huidibi yi' paadaanip. ³⁵ Per je jäy huidibi anajty ti naax pijctzoy, chi ajcxy majch je tumbi. Chi ajcxy ooy huinhuojpy jïphuojpy tüg. Chi ajcxy hu-ingäch jïpcäch jadüg. Chi ajcxy je midugïgpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je yajijp'atypï. ³⁷ Chi yci'm'ung oy quejx cogixiïyñi. Hue' jot'ajti co yajmij'adiïyb je' y'ung. ³⁸ Per co ajcxy je tum-bidijc iixpaty je cogam je' y'ung, chi ajcxy ñaygapxi: "Tzoc ajt yaj'o'cim je cogam ymang, com yi' je' mïhui'mamb je' yteedy je yjugy'ajtin je ypidägy. E co ajt nyaj'o'cim, chi iïch ajt nmïhui'mim je cam." ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús ymïnañ:

—Co anajty ti miiñ je conaax je cogam, çti jada' y'oc-tunipy mïd je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögipy yjiïbi jïbicjäydijc, ca' ajcxy pa'ay-oohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴² Chi Jesús ymïnañ:

—¿Nej ca'ni miich ajcxy mgapxy ma miiñ jaaybety ma Dios ñecyï? Jadu'n ymïnañ:

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oy-bi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyty. Je Huindzin Dios jada tung ti tuñ, e ooy oy n'ixim yi' ytung.

⁴³ E paady jadu'n iïch miich ajcxy nimäy co miich ajcxy myajpiga'ñ yi m'it mlugar jiiiby tzajpjoty ma Dios y'ane'my etz yajmöhua'ñ je huingbi jäy je huidibi amuumdügjot naygyejcip ma Dios. ⁴⁴ Pinjaty ca' cöbi-ga'ñ jada mij'ane'mbi, ayo'n ypadaamb, ytimnipatp nej jihuïy jim yciïxciday ma je tzaa nicx, tijhuïdz yja-jtähuipy. O pen je mij'ane'mbi midziptzoñ je jäy, chi yti-goydähuipy ajcxy, tim jadu'n nej jihuïy je tzaa ñigidaa-goodyïi ajcxy, e janch jaam pux nicxy yjaty.

⁴⁵ Co ajcxy mïdooy, chi je teedytjic etz je fariseostijc huijihuïy co yi' ajcxy yajniçapxyp, ⁴⁶ chi Jesús ajcxy jamadzaañ. Per tzigiyb anajty ajcxy mïd je mayjäy, je' co

je mayjäy anajty mïbijccixy co Jesús najtzcapxiïyb Dios ytiy'ajt.

Je iixpejt ma jäy anajty pijcpidijc nixiïduuñ

22 Chi Jesús jadüg'oc ytiçiy capxp mïd iixpejt, ymï-nañ jadu'n:

² —Je Dios y'ane'min jadu'n nipaady nej je rey ymang ocnixiïduñ co ti ypicxy. ³ Chi je rey quejxhuäcxtay je ytumbi co huen nicxy huoomujctaaygixy je huidijaty anajty ti yaj'nimaaygixy co mïingixipy ma ytuna'ñyïi yjada'ñyïi je pijcin. Per ca' je' ajcxy ymïina'ñ ma je pijcin nixiïduñ. ⁴ Chi quejxnip huingbi ytumbi, nimay ajcxy: "Nimaaygix je tïbi oy yajijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Tï je huaj nicxpi nyaj'ögyich. E ni'ixi' ijtaayñi, huen miiñ ajcxy ma je pijcin ytuna'ñyïi yjada'ñyïi." ⁵ E je' ajcxy tïbi anajty yaj'nimaaygixy, ca' ajcxy je' ytimy tuñ cuendi. Ni-jëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybï ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyïi je jäyyaj'öcp ajcxy etz ytoydhuij je ycajp. ⁸ Chi je rey nimay je ytumbi ajcxy: "Ni'ixi' ijttäy ma jadayaabi je pijcin yajniçiduna'ñ. Per je huidibi ajcxy ti yajnimäy ca' ajcxy mïhuaadity co ymïingixipy. ⁹ Nicx miich ajcxy majaty jäy yjiin ytiç. Nimaaygixy tüg'öciy pinjaty ajcxy mbaty, co huen miingixy ma je pijcpi." ¹⁰ Chi ñicxy je rey ytumbi ajcxy. Chi ajcxy mïd-miïnday je mayjäy, je oyjäybi etz je jïbicjäybi. Chi y'ujtz-tay je rey ytiç mïd je mayjäy. ¹¹ Huin'it je rey ytiçiy mayjäyjoty, ixa'ñ anajty huidijaty ti yajhuomiñ. E jiiiby tüg yëydijc ti iixpaty huidibi ca' anajty ti ñayxoxoyïi, jadu'n nej jäy nayxójxigixy co ajcxy nicxy ma tüg pijcin. ¹² Huin'it je rey mïnañ: "Mïgüg, çnej ya ti mdïgïy tigoty, e ca' mxojx mïdity nej ypaadyïi?" E je yëydijc amoñyï je' yhuï'my. ¹³ Chi je rey nimay huidibi anajty jim pubejtp: "Cïxotz tecyotz jada yëydijc etz pidäg agootztuuby. E jiiiby yjïhuipy yäxipy, jiiiby ytiç huinqueedip mïd jot-may." ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xïhuaangixy nihuambadaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi mijnicxpejt je Herodes ytiy'ajt. Chi ajcxy Jesús nimay:

—Huindzin, nejhuïybich iïch ajcxy co miich mgapxy je tiy'ajt. Tudägy myaj'ixpicxy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy ymïnaangixy. Tú'ciy miich mduñ mïd comeeñyjäy etz mïd ayoobtijc, ca' huin'ixpety myaj'ix-picy. ¹⁷ Nejhuïhuamy iïch ajcxy nej miich mïna'ñ pen tiy'ajt jadu'n: ¿Nej ndundigooyim ma Dios yçötuçin, co ngüejtim ma César, je romano mij'ane'mbi?

¹⁸ Per Jesús ñejhuïyb anajty ajcxy yjïbic-huinma'ñ, e chi ajcxy nimay:

—Ooy miich ajcxy naybidáacigixy nej jihuüy ooy mdudägyity, e ca' yjanchity. ¿Na'amy co ajcxy xychachjot'ixy xychachhuinma'ñ'ixyich? ¹⁹ Yaj'ijxcich tüg meeñ huidi mïd migüéjtigixy César.

Chi ajcxy mimiiñ tüg meeñ. ²⁰ Chi co Jesús y'ijxy je meeñ, chi yajtiy:

—¿Pin y'ahuinax e pin yxi cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuinax etz y' yxi.

Huin'it Jesús je' ajcxy nimay:

—Mo' je César huidibi y' yjé'ajtpy, etz mo' Dios huidibi Dios yjé'ajtpy.

²² E co ajcxy jadu'n midooy, chi ajcxy ooy jihuüy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy ixxy Jesús. Y' ajcxy ymina'ñ co ca' yjugypiga'ñ je öcpi ajcxy. E jadu'n ajcxy huinma'ñ pidägy, e yminaangixy:

²⁴ —Huindzin, jadu'n miiñ ma Moisés ycötújcín co je yëydijc huidibi ypijychinaayb mïd ytöxyijc, e pen öcp je yëydijc, e ca' ni tüg y'ung yajhu'i'my, copicy co co'öcytöxyjäy ypijctigadzipy mïd je yëydijc ymiguëx.

²⁵ Pues jii ma ñich ajcxy anajty tüg quëx je yëydijc ni-huixtujc. Je ungoob ypijcy, e chi ix'ögy ytöxyijc, e ca' ni tüg y'ung yajhu'i'my. Chi je migüëx ypijctigajch mïd je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugügpi yëydijc ix'o'cy ytöxyijc. E jadu'n oytuñyii yjadyii mïd je töxyjäy co ti anajty mïddzinay'abidzimday je ni-huixtujcpi yëydijc tüg quëxpi. E je ni-huixtujcpi ajcxy ix'o'cy je töxyjäy, e ca' ni tüg y'ung ajcxy yajhu'i'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy y' tibi ajcxy y'ögy, ¿huidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n ni-huixtujcpi mïddzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuüy je tiy'ajt, com ca' mnehuüygixy Dios y'ayuc ytiy'ajt, e com ni ca' mnehuüygixy je mic'ajt huidibi Dios ymïd. ³⁰ Pues co anajty yjugypijccixy je jäy tibi y'öccixy, chi ca' ajcxy ypijga'ñ, e nañ jadu'n ni ca' ajcxy ñaymöhüiyb y'ung huen pijcixy. Hue' ajcxy yjugy'adaangixy chinähuaangixy jii by tzajpjoty, tim jadu'n nej je ángeles ajcxy chinaangixy jugy'ajtcixy. ³¹ Per je tiy'ajt co jäy ajcxy tibi y'öccixy yjucypigaangixy jadüg'oc, jëbi mbaatcixy jada tiy'ajt ma Dios ñecy. Dios c'i'm jadu'n minañ: ³² "Ñich je' je Dios huidibi Abraham, Isaac etz Jacob yDios'ajtpy." Com y' Dios ca' y' yDios'aty ma y' öcpi ajcxy. Y' Dios Dios'ajtp y' ma y' juugyp' ajcxy.

³³ E co je mayjäy jadu'n midooy, chi ajcxy ooy tzachjihüiy tzachhuinmaay je Jesús y'ixpijcin.

Je ane'min huidibi ooy ycopicyity

³⁴ E co je fariseos ajcxy nejhuüy co Jesús anajty ti yaj'amoñyii je saduceos ajcxy, chi ajcxy ñayyöymujc-

taayi. ³⁵ E jim anajty tüg leyhuindzin huidibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, ¿ma y' maybi Dios ycötujcin, huidibi y' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios mïd tüg'öcy m'aa mjot, etz mïd tüg'öcy m'alma, etz mïd tüg'öcy mhuinma'ñ. ³⁸ Jada je' jadu'n je Dios ycötujcin huidibi jaccopicyip, etz huidibi tim yajijp. ³⁹ Je mimetzpi Dios ycötujcin jahueengi tú'cy ñaybadyii mïd je yajijpi, y' huidibi jadu'n minamb: "Tzojccix jihuüygix y' mmigügtijc, tim jadu'n nej mnyachogyii nayjihüiyii c'i'm." ⁴⁰ Jada Dios metzpi ycötujcin jaccopicy jacmic'ajt mïd ca' jac huidibi cötujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tügmucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay mïd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' y' yhuindzin? Jadu'n ti capxy David anajty mïd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay ñich nHuindzin: "Ñña' ma ñich n'a'oy'amy, ixti cooni ñich miich nyajmimadägip ma je mmidzip ajcxy."

⁴⁵ ¿Nej jëbi David ymij'ap'adyii je Cristo? Com David c'i'm ymina'ñ co Cristo y' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huidijaty ayuc.

Jesús xiy ajcxy je fariseos etz escribas

23 Chi Jesús nimay je mayjäy etz y' ydiscipulos ajcxy:

² —Je escribas etz je fariseos ajcxy chachnaygömáayigixy co y' ajcxy jajtp nej capxti'cxipy je cötujcin huidibi Moisés yjaay jecy'ajty. ³ Oy co ajcxy mguydunipy jadu'n nej y' ajcxy xyaj'ixpijccixy Dios y'ayuc, capxymidoogix nej xyñimaayigixy per ca' mdungixy huidibi y' ajcxy ytumb, com y' ajcxy oy ycapxcixy e ca' ajcxy cuydungixy. ⁴ Y' ajcxy nigo yajcojicixy canaag costumbre huidi je jäy ajcxy ca' mimadäga'ñ, e ca' ajcxy pa'ayoy je jäy, tim jadu'n nipaady nej jihuüy tüg tzimty ti mooygixy jemxypi huidibi ca' je jäy ajcxy mimadäga'ñ, e y' escribas etz fariseos ajcxy ni ca' ycñhuax yajpaadaangixy je tzimty. ⁵ Tüg'öcy huidi y' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Y' ajcxy yajhuimboc-huññiyigixy etz ñayyajcñhuññiyigixy Dios y'ayuc. Nayxojaxcixy mïd huit yooñjatyp' co chachcö-mayaangixy. ⁶ Ooy ajcxy tzocy ñaybejt ma je' ññay je ane'mbi ma jäy ajcxy yxñduñ. Ooy ajcxy tzocy y' cö-

dumbi iñaybejt ma je naymujctac. ⁷Yi escribas etz fariseos ajcxy oy tzojccixy co ajcxy yajcapxpooxip huindzig'iñ'amy mayjäyduum. Etz nañ jadu'n ajcxy tzo-cy co jäy ajcxy yajmij'adiiyyb nej huindzindijc ixpicytjic. ⁸Miich ajcxy ca' jadu'n m'a'ixihuiipy co ajcxy xytijipy huindzin com nidüg'ócij miich ajcxy mnaymügüg'ájtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹E nañ jadu'n miich ajcxy ya naaxhuiñ, ca' oy ni pin mdeedy'adiiyyb co miid miich ajcxy tügpajc je mDeedy, huidibi jilby tzajpjoty. ¹⁰E nañ ni mganaydijiiyyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹Je pin jaccapxymidoob ymügügtijc, je' je' mij'ajtin miid ma miich ajcxy. ¹²Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³¡Ay miich ayoob ajcxy fariseos etz escribas ajcxy! Miich ajcxy mnaybidaacigixy nej jihuüy ooy mdudä-gyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytigixy jilby tzajpjoty ma Dios y'ane'my. Ni miich ajcxy mgatigiiygixy, e nañ ni mga'a'ixiiygixy co huingbi ytigihuiip.

¹⁴¡Ay miich ayoob ajcxy fariseos etz escribas ajcxy! ¡Miich ajcxy m'aaniidacp! Miich ajcxy myajcijxtaayi yi co'ögy ytöxyjäy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nigü chaachytunip miich ajcxy miid mbocy ycixpi, ca'ydi jac pin jäy.

¹⁵¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpä jäy. E co ajcxy je' myajmibicy, huin'it mejtz jadu'ñyi je pocy anajty mñidity je jäy, ca'ydi miich ajcxy.

¹⁶¡Ay miich ayoob ajcxy huidibi jadu'n idiitzp nej tügü huintzpi huinhuoy! Miich ajcxy minamb co pen tüg jäy tuñ yhuandaacin, e ñbaati capxpaati Dios ytijc, chi ca' cuyduñ je huandaacin. Per pen ñbatpy capxpatpy je oori huidibi jilby ma Dios ytijc, huin'it janchity cuyduñ je huandaacin. ¹⁷Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytijc ma je oori yoxy ity?

¹⁸Nañ jadu'n miich ajcxy mina'ñ: "Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzig'iñ tzüch ma je altar ma Dios yajhuindzigiy, chi cuyduñ yhuandaacin." ¹⁹¡Tzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymiid je huidibi ti yajyoxo o je altar? ²⁰Pinjaty capxpatp je Dios ytijc ma Dios yajhuindzigiy y'agapxmuctaayb anajty huidijaty jilby yajpaatp ma Dios yajhuindzigiy. ²¹Pinjaty capxpatp je Dios ytijc, ca' anajty jeyi capxpaady Dios ytijc, nañ ycapxpatp anajty Dios huidibi jilby tzinaayb. ²²Pinjaty capxpatp je tzajp, nañ capxpatp anajty Dios y'ane'mdac quipxyi miid Dios huidi tzinaayb jilby.

²³¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti

yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cötujcin huidibi jaccopicyity. Miich ajcxy ca' mdzinäy tiydudägy miid je mügügtijc. Miich ajcxy ca' mmidity pa'ayo'n miid je' ajcxy huidibi ayoob jottigooyb, etz ca' mmibijccixy Dios. Jada ixipy ajcxy mbaadumyb, e mooygixy Dios je tügpicy je majcpi. ²⁴¡Tzuudijc locitijc! Miich ajcxy ti m'anajxyp je uux, e mgojñnaaxcixy je camello, je mijpi iyujc.

²⁵¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jilby jotjoty huinma'ñyoty miich ajcxy mñidity jibicpi. Miich ajcxy miid je ca'oy'ixi etz je adzojcin. Tim jadu'n nipaady nej jihuüy myajhuächpy ajcxy yi tasi ninixx yi tery ninixx, e chi myajhui'my jibicpi ma tasiyot ma teryyot. ²⁶¡Tzuudijc miich ajcxy! Jayijp yajhuadz jilby jotjoty tery tasi, huin'it huim' nañ jadu'n huadz nigix'amy.

²⁷¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxgy, per jilby jutjoty ujtz jilby miid je öcpi pajc etz miid jibicpi. ²⁸Jadu'n ajcxy mguëxgy mayjäyduum nej jihuüy ooy m'oyjäyity, per jilby jotjoty miid jibic-huinma'ñ.

²⁹¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtcixy yajxon je öcpi jut ma profeta ajcxy ñaaxtigiiy, etz mxoxy ajcxy miid je pijy ma ñaaxtigiiy je tudägy jäy ajcxy, ³⁰e miich ajcxy nayñi-maayigixy miñ xyipy: "Co ixipy anajty n'octzinaayim jecy'ajty ca' ngapubejtim co ajt nmij'ap nmijteedy yaj'ögy je profetas ajcxy etz je tudägy jäy ajcxy." ³¹Miid jada ycixpi miich ajcxy nejhuüyb co miich ajcxy m'ap'adyii mdeedy'adyii je jibicjäydijc ajcxy huidibi yaj'öc je profetas. ³²¡Miich ajcxy yajcixcixy je jibicpi huidibi ajcxy mmij'ap mmijteedy yajtzondac!

³³¡Jadu'n miich ajcxy nipaady nej mayxoox! Ca' miich ajcxy madägipy cöguëgipy je tzaachyp jilby ayoodactuuby. ³⁴E paady nguexaamybich ma miich ajcxy profetas etz huidibi ixpicyip ma Dios y'ayuc, etz huidibi xyaj'ixpigamb ajcxy yi Dios ñecy. Per miich ajcxy myaj'ögamyb myajcruutzpedamyb nijëjity, etz nijëjity mgoxamyb mhuobamyb ajcxy jilby tzajtigoty etz m'ix-huidida'ñ mbahuidida'ñ ajcxy cajp cajp. ³⁵Je mijpocy xyñigidaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy miid je oyjäy Abel etz ycogixy miid Zacarías, je Berequías y'ung huidibi miich ajcxy mmij'ap mmijteedy myaj'o'c jilby tzajtigoty ma altar. ³⁶Janch tiy'ajt jadu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

Jesús yäxy miid Jerusalén cajp ycixpi

³⁷¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njayajtügmujtähua'ñich miich ajcxy, jadu'n nej tzeyday yajtügmujtäy je' y'ung ma yqueec pä, per miich ca'

m'a'ixiŋygyxy. ³⁸ Oc'ix miich ajcxy nej mdiyc abac yhui'maangixy. ³⁹ Janch tiy'ajt jadu'n nej nimaaygyxy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'nipy: "Cö-may yi huidibi miimb miid nhuindzin Dios yxii etz ymic'ajt."

Jesús ymina'n co Dios ytijc yhuindigoyipy

24 Ma anajty Jesús ti ypidzimni ma Dios ytijc, nicxp anajty, huin'it Jesús ydiscipulos ajcxy ñimijhuäci. Yi' ajcxy anajty yaj'ixiydahuamyb je Dios ytijc, com ooy anajty chachmijtycity.

² Chi Jesús ymina'n:

—Huindicx miich ajcxy jada maybi mijjaty ytijc. Miinipy xii tiempo mina tüg'óciy jada tijc nicxy yhui'my tajxit, ca' ma tzaamacxy. Huindigoydahuipy tüg'óciy.

Je tiy'ajt ma ca'ni naaxhuiñybi ycixa'ñiyi ytigoya'ñiyi

³ Chi oy ñicxni ajcxy ma Olivos cögop. E co anajty jim, Jesús y'ñäy, chi ñimaayi ameech je' ydiscipulos ajcxy:

—Iich ajcxy nejhuñhuamyb mina jedu'n ytuna'ñiyi yjada'ñiyi. ¿Ti je' quëxgamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adhib ajcxy, ca'ydi pin xyhuin'ingixy.

⁵ Ooy mayjäy ñaybidägáangixy miid iich nxii, naybidägáangixy co je' ajcxy je Cristo, ymina'na'ñ ajcxy: "Iich je' je Cristo." ⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya, chi ca' ajcxy mdzigigixy, com ooy ycopicyty co jadu'n jayijp ytunihy yjadihyb. Ca' nan hue' je' anajty tim cijxp tim ti-gooyb je xii je tiempo. ⁷ Nayñibidigib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypí ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajcicyegipy, jigix xy-chachytungixy e xyaj'ogixy. E tüg'óciy je maynaaxhuiñyjäy xyca'ixáangixy, miid iich nxii ycxip. ¹⁰ Je huin'it tiempo may je jäy ajcxy yajtigoya'ñ ymibijcin. E nañ jadu'n ñayca'oy'ixáangixy etz ñayñigapxáangixy ñi'ojñhuáangixy miñ xyipy. ¹¹ Ooy may quëxgaangixy aaniidaacpidijc mina'naangixy co Dios y'ayuc ytiy' ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtnicxiiñiyi jac tim nigí jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibijcin, je' ajcxy ypaadip y'alma nidzoocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jäy ajcxy nidüg'ociy nejhuñy Dios ytiy'ajt. Huin'it je naaxhuiñybi ycijxni ytigooyñi.

¹⁵ Je profeta Daniel jaay jecy'ajty jada ayuc (miich ajcxy pinjaty capx jada necy huinjhuñygyxy) ma mina'n: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytijc, huidibi ooy ycodzigijity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixy mic'amy ma tungop. ¹⁷ Pinjaty

huidibi yajpatp ma ytijcnicx ca' nicxy tijaty yajpidzimy ma ytijc. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytijc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytunihy yjadihyb ma anajty ytiichtiempojity, etz ma anajty pocxinxiijoty. ²¹ Huin'it oy ayo'n jotmay ytuna'ñiyi yjada'ñiyi huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactunihy ycajadjahy. ²² Pen ca' Dios capx'aduga'ñ yijibi ayo'n xii ayo'n tiempo, ni pin ca' chögipy. Per Dios ycapx'adugamy yijibi ayo'n tiempo miid je mibijcpidijc ycxipí huidibi Dios ti huin'ixy. ²³ Co yi jadu'mbi xii tiempo anajty ymiin, ca' mmibijcixipy, pen ji pinjaty xyñimaaygyxy: "Ijxcix, cha yajpaady je Cristo", o "Jim'amy yajpaady je Cristo." Ca' mmibijcixipy. ²⁴ Pues miinip jäy ajcxy huidibi huin'inaangixy ymigügtijc. Cí'm ñayajnaxáangixy jadu'n nej jihuñy je' yCristity, e ymináangixy co capxhuäcxy ajcxy Dios y'ayuc, e ca' yjánchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixy je mayjäy huidibi Dios ti huin'ixy. Per ca' Dios a'ixihuipy co yhuin'inihyb yi' yjäy. ²⁵ Ti iich yi' jayijpni nigapxich. ²⁶ E co pinjaty ajcxy xyñimahuipy: "Chim je' je Cristo mijtigidumb", ca' ajcxy mninixip. O co pinjaty ajcxy xyñimahuipy: "Chiiby je' tigoty yhuingoyüch", ca' ajcxy mmibigipy. ²⁷ Iich je' je jäy huidibi tzoon tzajpjoty, nhuimbidaambich ya naaxhuiñ miid je tixcin je jáñ, jadu'n nej je huidzuc huidi tixcp xibidzimyb ixti xiigidägy. ²⁸ Ma je öcp ninicx yajpaady jim ñimujctähua'ñ je luud ajcxy.

Nej jada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodziygidäga'ñ, je po' ca' ytixca'ñ, je madza' ycadähua'ñ etz janch mic je tzajp yücxa'ñ. ³⁰ Co yi jadu'mbi ytunihy yjadihyb, chi quëxga'ñ tzajpjoty je ijxpejt co iich, je jäy huidibi tzoon tzajpjoty, nhuimbida'ñich ya naaxhuiñ. E chi tüg'óciy je mayjäy tájip máyip yjihuñhuipy yäxy, chi ajcxy ixipy je jäy huidi tzoon tzajpjoty miñ anajty jocjoty miid ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix yömujectahuipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jñboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higeri quipy jadu'n nej je xii tiempo ymiin cidägy. Co je higeri quipy jadüg'oc pidägipy je' y'aay'ung, huin'it miich ajcxy nejhuñhuipy co yhuingoni mina ypottigiiñi.

³³ Tim jadu'n nej tiy'ajt mbijccixy ma je higeri quipy co jada ajcxy jadu'n ixipy nejhuñhuipy co yhuingoni anajty je xii je tiempo jñn'aguy tijc'aguy. ³⁴ Janch tiy'ajt jadu'n nej nimaaygyxy co tüg'óciy ytuna'ñiyi yjada'ñiyi ma ca'ni anajty je jäy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam ti-goyam yi', per iich n'ayuc ca' ycixa'ñ ytigoya'ñ nimina.

³⁶ Ca' ni pin nejhuüy je xii je hora mina nhuimbi-da'ñich ya naaxhuiñybi. Ni je ángeles ajcxy canejhuüy, ni je Dios y'ung canejhuüy. Tügpaic je Dios Teedy nejhüy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuim-bityich, yi jäy huidibi tzoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñy-bi, hue' je' mayjäy ajcxy chinay agujc jotcuic, ycaaygixy y'uuccixy etz yajpajccixy je y'ung y'anäg, ixti cooni paty je xii tzuu co ytigüy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e octay ajcxy je jäy niijoty. Jadu'n nej yja-jty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinahuip jac jiini co ñch anajty nhuim-bityich ya naaxhuiñ jadüg'oc. ⁴⁰ Je huin'it tiempo co nhuimbidipyich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhuima'ñ. ⁴¹ E mejtz töxyjy yajpaadip anajty yjich, tüg je' yajminicxa'ñ, e tüg je' yhuima'ñ.

⁴² E paady miich ajcxy ni'ixi ijtcix, xyjijp'ixipyich com ca' mnejhuüygixy mina miich ajcxy je mHuindzin ymi-na'ñ. ⁴³ Mnejhuüygixy miich jada co ixipy je ungedeedy nejhuüy ti hora je meetzpi miina'ñ, ca'p je' ymähuipy, e ca'p a'ixihuipy co je meetzpi ytigühuipy tigoty. ⁴⁴ Nañ tim jadu'n miich ajcxy ni'ixi ijtcix, je' co ñch, je jäy huidibi tzoon tzajpjoty, nhuimbida'ñich ma ca' ni pin anajty nejhuüy.

Je tumbi tudägyipi etz je huidibi ca'p ytudägyity

⁴⁵ Huidibi tumbi je' ya huidibi tumb miid yhuindzin janch cixyot huinjot huidibi miid xpijcin, huidibi je' yhuindzin moopy ane'min ma ytijc, huidibi ya-jnigidagühuipy ma ymigügtijc caayin uucin mina ypadyii? ⁴⁶ Janch jotcuic je tumbi co yhuimbidipy je' yhuindzin, e je' cuyduñ jadu'n nej je' yhuindzin ti ñimäy. ⁴⁷ Janch tij'ajt jadu'n nej nimaaygixy co je huindzin ytumbi yajnegohuajc'adyii tüg'ocyi huidibi ymiid. ⁴⁸ Pen je tumbi jibicjybi miina'ñ jotjoty huin-ma'ñyoty: "Huäcxijpni ñch je nhuindzin." ⁴⁹ E chi nima-jtztagip ymigügtijc, e ytigühuip caaybi uucpi miid amü-gyjäydijc; ⁵⁰ chi je tumbi yhuindzin minipy ma ytijc hui-di xii mina je tumbi ca' anajty aa'ixy jijp'ixy e ni je hora anajty canejhuüy. ⁵¹ Chi huindzin tzaachytunip je' ytumbi, etz ypidägipy miid je jacjadyii jäy ajcxy yajpaady huidibi naybidäacigixp nej tudägyjyity e ca' yjanchity. Jiiby ayoodactuuby yjähua'ñ yäxa'ñ etz huinmucxa'ñ huingueeda'ñ ytitz miid jotmay.

Je ijxpejt ma je majcpi töxy'anäg

25 Co anajty nhuim-bityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjijpobadähuäänigixy miid je yëydijc hui-di pigamb. Chi minicxy ajcxy aceite lámpara co yajtcx-aangixy. ² Nimigoox je töxy'anäg hui-di cohuinma'ñity etz ahuing minicxy jadüg quiig ujtz miid aceite. E nimi-

goox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigüyñi mä'uuybi. ⁶ E mijcuctz ajcxy midoy co tüg jäy mic mina'ñ: "Chi miid je yëydijc huidibi pigamb, ñicx jijpobadäygixy." ⁷ E huin'it je nimajcpi töxy'anäg ajcxy ypidictay. Chi ajcxy yjin ni'ixiy nidüg nidüg. ⁸ Chi je nimigooxpi huidibi ca' ycohuinma'ñity nimay je nimi-gooppi huidibi cohuinma'ñip: "Ñich ajcxy hueeni mooygich yi m'aceite, co pidzaanip ñch ajcxy njñn." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñch ajcxy nje' yhuaadähuia'ñ. ñicx miich ajcxy juy jim ma ytoogyii." ¹⁰ E ti anajty ajcxy ñicxy aceite ju-uyb je huidibi ajcxy ca' ycohuinma'ñity, co oy yjaty je yëydijc huidibi pigaanip. Chi je cohuinma'ñybi ajcxy miid tigiy tigoty je yëydijc huidibi pigaanip. Chi tijc yaj'agüy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "ñHuindzin, Huindzin, ocyaj'ahuadz mdiic!" ¹² Chi je' y'adzooy: "Ca' ñch miich ajcxy n'ixy'adyii."

¹³ Chi Jesús yminañ:

—Nayñi'ixiyigix, je' co ca' mnejhuüygixy mina ñch nhuimbida'ñich jadüg'oc ya naaxhuiñ.

Je ijxpejt ma je meeñ

¹⁴ Co ñch anajty nhuimbida'ñich jadüg'oc ya naax-huiñybi, jadu'n nipaadip nej jadaaabi ijxpejt, co anajty tüg comeeñyjäy chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mimetzpi moy mejtz mil. E je ymidügpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cädigüy mi-goos mil meeñ, ytigiy ajuybi adoocpi. Chi je' ymeeñ y'ung'ajty jamigoos mil. ¹⁷ Nañ jadu'n huidibi cädigüy mejtz mil, ytigüy tumbi miid je meeñ. Chi je' ymeeñ y'ung'ajty ja mejtz mil. ¹⁸ Je huidibi cädigüy tüg mil hue' oy pidägy je meeñ tützjoty. Chi tajiy, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytigüy cuenta yaj'oyyib miid je ytumbi ajcxy. ²⁰ Chi miid jayijp je huidibi anajty ti cädigüy mi-goos mil meeñ. Chi je tumbi yajcädigüy je' yhuindzin majc mil meeñ. Chi yminañ: "Miich ti xymooyich mi-goos mil meeñ, e ñch ti nyaj'ung'atyich jamigoos mil."

²¹ Chi je' yhuindzin minaañ: "Janch jotcuic ñch cham co jadu'n ti mduñ miid je hueenbi meeñ. Miich ooy mdudägy etz oy ti mduñ, e paady njacmöhuaamyb jac-may. Tigü' ma ñch, e xondäg miid ñch." ²² Chi ymiñ je huidibi anajty ti cädigüy mejtz mil meeñ. Chi nimay je yhuindzin: "Miich xymooyich mejtz mil meeñ, e ti nyaj'ung'atyich jamejtz mil." ²³ Huin'it je' yhuindzin ñi-maay: "Janch jotcuic ñch cham, co jadu'n oy ti mduñ miid ñch nmeeñ, e paady njacmöhuaamyb jac-may. Tigü' xondäg miid ñch."

²⁴ E co oy yja'ty je huidibi cädigüy tüg mil meeñ, chi nimay je' yhuindzin: "Huindzin, hue' ndijyich miich myëydijc'aty janch jibic jäy. Miich cosecha myajpidicpy ma ca' ti mnipy etz miich mgosecha myajpidicpy ma

ca' ti ti mhuijy. ²⁵ Paady ooy ndzigyich co je meeñ ngayaj'ung'adipyich. E co miich mhumbida'ñ, md-zogamy je mmeñ, e paady je mg'imeñ ti nyüchich, je' co ndzigyich co nicxy nyajtigooyich miich mmeñ. Cha je meeñ huidibi ti xymooyich."

²⁶ Chi je' yhuindzin ñimaayi: "Jibic tumbi miich, ooy mnuuxity. ¿Nej ti mnejhuñy miich co ñich cosecha nyajpidigyich ma ca' ti ti nñiñyich, etz cosecha nyajpidigyich ma ca' ti ti mhuijyich? ²⁷ Oy co ixypy miich je ñich nmeñ ti myejc'anuuçy, e jim ixipy y'ung'at. E cham co ti nhuimbityich cham ixypy je nmeñich xy-cidigyich miid nimeñ'ung."

²⁸ Chi je huindzin ñimay je jacjadyii tumbidijc: "Pijci ajcxy yi meeñ huidi ymiid, e mooygix yi huidibi majc mil ymiid. ²⁹ Je huidibi oy tumb jacyajmõhuamb je' anaxy, e ymiid'adamy je' conaxpi. Je' huidibi hueen miid yajpigamb je' huidi ymiid, je' co ca' oy ti ytuñ miid je hueenbi. ³⁰ Yi jilbi tumbi huidibi ca' oy ytuñ, pidäg ajcxy agootztuuby ma yñhuipy yäxipy, ma ytiitz huinmuucx huingueedip miid jotmay."

Co anajty naaxhuñyñyäj ajcxy yajtyduñ

³¹ Co ñich, je jäy huidibi tzoon tzajpjoty, nhuimbity ñich anajty jadüg'oc ya naaxhuñyñy, huin'it n'ixtäga'ñich ma ñich n'ane'mdac etz ane'ma'ñich miid ñich nmij'ajtín etz n'oy'ajtín. ³² Chi tüg'óciy je naaxhuñyñy yajtügmujctähua'ñ ma ñich. Nhuäcxamybich jadüg jadüg jadu'n nej jäy ajcxy huäçy je cöbixy etz je chiibo ajcxy.

³³ Nbidägaamybich a'oy'amy je jäy ajcxy huidibi oy ti ytungixy miid ñich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy miid ñich. E yi' ajcxy jadu'n nipaadip nej chiibi.

³⁴ Chi nñimähuiñyñy yi jäy ajcxy huidibi a'oy'amy: "Mingix miich ajcxy huidibi Dios Teedy ti xyconuucy ajcxy. Je'ajtigix ane'mdac huidi ijt n'ixä miid miich ajcxy ycixpi maabi naaxhuñyñy chondägy. ³⁵ Ma anajty ñich nyuubögyii miich ajcxy ti xyajcaayich; ma anajty ñich ndidzäyii, miich ajcxy ti xyajñ'ügyich; ma anajty ñich nihuidityich, miich ajcxy jättac ti xymöyich; ³⁶ ma anajty ñich je nhuit ti nyajmayjatyich, miich ajcxy ti xymöyich je huit; ma anajty ñich nbigyijich, miich ajcxy ti xycuend'atyich; etz co anajty ñich pujxtigoty nyajpaady, miich ajcxy ti xycogapxäyich."

³⁷ Huin'it ymina'na'ñ je jäy ajcxy huidibi oy ti ytungixy miid ñich: "Huindzin, ¿mina ñich miich ajcxy ti n'ixy ayuu, e ti nyajcay? O ¿mina ñich miich ajcxy ti n'ixy co mdidzäyii, e ti nyajñ'ügy? ³⁸ ¿Mina ñich miich ajcxy ti n'ixy co miich mñihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñich miich ajcxy ti n'ixy, co miich mbigyii, e oy ti ngüend'aty? etz ¿mina ñich miich ajcxy ti n'ixy co pujxtigoty myajpaady, e oy ti ngogapxäy?" ⁴⁰ ñich, je mij'ane'mbi, n'adzohuimbidityich: "Janch tiy'ajt jadu'n nej nñimaaygixy co yi jäy ajcxy huidibi oy ti ytungixy miid pinjaty huidi xymijnicxpejtpich, nañ jadu'n oy ti ytungixy miid ñich. Ca' ñejity co jäy ajcxy yminañ co ca' ypinity je jäy huidi xymijnicxpejtpich."

⁴¹ Chi ñich, je mij'ane'mbi, nñimähuiñyñy je jäy ajcxy huidi yajpatp: "Huinhuäctuatcich miich ajcxy jibicjäy-dijc. Nicxy miich ajcxy mijjñjoty, huidi ijt n'ixä miid je mujcu' ycixpi etz miid je' y'angeles ajcxy ycixpi. ⁴² Ma anajty ñich nyuubögyii, ca' miich ajcxy xyajcaayich; ma anajty ñich ndidzäyii, ca' miich ajcxy xyajñ'ücyich; ⁴³ ma anajty nñihuidityich, ca' miich ajcxy xyajjättägyich; ma anajty ñich nhuit xytigoy'ijtigich, ca' miich ajcxy huit xymooyich; etz ma anajty ñich nbigyii e nyajpaadyich pujxtigoty, ca' miich ajcxy xycogapxäyich." ⁴⁴ E chi je' ajcxy ymina'na'ñ: "Huindzin, ¿mina ñich ajcxy miich ti n'ixcixy co anajty miich yubögyii tidzäyii, o co anajty mñihuidity? ¿Mina ti n'ixcixy co ca' mhuit miidity, o co mbigyii, o co anajty pujxtigoty myajpaady, e ca' ñich ajcxy miich nbubejty?"

⁴⁵ Chi ñich, je mij'ane'mbi, n'adzohua'ñich: "Janch tiy'ajt jadu'n nej nñimaaygixy. Huen tim pinity huidi ca' miidity pa'ayo'n miid je' ajcxy huidi xymijnicxpejtpich, oy jäy yjamina'ñ co ca' ypinity, ñich miich ajcxy anajty jadu'n ti xytuñich." ⁴⁶ E jada ajcxy nicxip huinixii ayoodactuuby, e yi tudägyi ajcxy nicxip ma yi ju-gy'ajtín huinixibi.

Je huinma'ñ nej anajty Jesús madzaangixy

26 Co Jesús nigapxtay tüg'óciy jadayaabi ayuc, chi ñimay yi' ydiscipulos ajcxy:

² —Miich ajcxy mnejhuñyñy co huixtic je amayxi, je pascua xi. Pascua xi joty ñich, je jäy huidi tzoon tzajpjoty, nyajcäyega'ñich ma nmidzipich etz xyajcruutzpeda'ñich, xyaj'öga'ñich ajcxy.

³ Je huin'it xi je teedy huidi tungmiid ajcxy, je escribas, etz je mijjädijc ajcxy ñayyömuçtayı ma je' ytiba' je teedy huidi jacmijtungmiid huidi anajty yxi Caifás. ⁴ E jim ma Caifás ytiba' jim ajcxy huinma'ñy'ix-tay nej jebi yajmachycägy Jesús miid anii etz yaj'ögaangixy. ⁵ Chi ajcxy ñayñimaayi miñ xyipy:

—Ca' y'oyity co xijoty nmajzim Jesús. Ca' jecyity co je mayjäy xymijotma'ttayim etz ytiñhuip ajcxy huambi jihuñyñy.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidi anajty ymiid je jibic nibüdç pa'm. ⁷ E ma anajty Jesús ycaj, huin'it ymiid tüg töxyjäy miid tüg quiig ujtç miid perfume huidi ooy oy yxuugy, jada perfume ooy anajty choohuity. Chi je töxyjäy yaj'ahuäch je quiig, e yajcöyogy Jesús je perfume huidi ooy oy yxuugy. ⁸ Co Jesús ydiscipulos ajcxy jadu'n ixxy, chi ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huidi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy miid yajpubet je ayoobtijc.

¹⁰ E co Jesús nejhuñyñy nej ajcxy yminañ, chi ñimay: —¿Na'amy co m'amayñy jadayaabi töxyjäy? Yi' huidi ti tuñ, je' yi' tüg oybi. ¹¹ Je ayoobtijc ca' ytigoy'ida'ñ ma miich ajcxy nñimä. Huen huidi xi huen huidi tiem-

po jëbi miich ajcxy mbubedipy ayoobtjic. ðich ca' n'ida'ñich jecy ya miid miich ajcxy. ¹² Jada tõxyjäy ti pidägy ma ðich nninixc perfume huidibi ooy oy xuugy, jayjip ca'ni nnaaxtigÿyich. Jadu'n je' jijp'ijxpy mina nnaaxtigÿhua'ñich. ¹³ E huentimma'amyitye je Dios y'ayuc anajty yajcapxhuäcxy huindu'my naaxhuiñ jim yajnigapxa'ñ jadu'n nej je tõxyjäy ti tuñ cham miid ðich, e jadu'n je mayjäy jäymedzipy jada tõxyjäy.

Judas cÿecy yi Jesús ma ymidzip agojñx

¹⁴ Chi nidüg je' ydiscipulos huidibi yxñ Judas Iscariote oy nimäy je teedy migtungmiidpi, ¹⁵ nimay ajcxy:

—¿Ti ajcxy xymöhuibich co ngÿyegipyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñixtay nej jëbi cÿecy Jesús ma ymidzip.

Jesús y'adzuu'ajty pascua xijoty

¹⁷ Je ymidügpi xñ, je amayxñ, je pascua xñ ma anajty yajcay je tzajcaagy huidi ca' levadura miidity, huin'it je' ydiscipulos ajcxy nimiiñ Jesús. Chi ajcxy yajtiy:

—¿Ma mdzocy co ðich ajcxy ni'ixñhuip huidi mgayamy je pascua xñ cixpi?

¹⁸ Chi Jesús y'adzooy:

—Nixc miich ajcxy jim Jerusalén ma tüg jäy ytjic, e mñimähuiip: “ðich nHuindzin jadu'n minamb co yhuin-goñ je' yxñ yhora, e paady ma miich mdjic yi' tuna'ñ je pascua xñ adzuu'ajtin miid ydiscipulos ajcxy.”

¹⁹ Huin'it Jesús ydiscipulos ajcxy cuyduñ jadu'n nej Jesús anajty ti ñimäy. Chi ni'ixñy ajcxy je pascua adzuu'ñbi.

²⁰ E co chu'ñy, chi Jesús y'ixtacy ma je mesa miid je nimajmetzpi ydiscipulos. ²¹ E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xycÿyegaambich ma nmidzipich.

²² Huin'it ajcxy yajtay taj may. Chi ajcxy yajtiy:

—Huindzin, ¿nej ðich jada'ji?

²³ Chi Jesús y'adzooy:

—Yi huidi miid ndocxmucyich, yi' je' jadu'n xycÿyegaambich ma nmidzipich. ²⁴ Janch tiy'ajt co ðich n'öga'ñich, jadu'n nej je profeta jaay jecy'ajty. ¡Ay ay-oob je yëydjic huidi xycÿyegaambich! Jac'oy co ca' yca-ma'xung'aty je huidibi xycÿyegaambich.

²⁵ Chi Judas ymñañ:

—Huindzin, ¿nej ðich jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy ycaay, huin'it Jesús tzajcaagy conÿgy. Chi yajnajxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e ymñañ:

—Cay miich ajcxy jadayaabi tzajcaagy, yi' je' ðich je nninixcixch.

²⁷ Huin'it Jesús cÿygy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e ymñañ:

—Üc miich ajcxy jadayaabi ügy, ²⁸ yi' je' ðich je nñi'pyich. Yi' ñigapxy co Dios ti yaj'aducy je jemybi ayuc. E ðich nñi'py ytema'ñ yoga'ñ miid je mayjäy ycixpi, jaydëbi ajcxy paadip je huinmeecxin miid je ypocy ycixpi. ²⁹ Janch tiy'ajt jadu'n nej nñimaaygixy, co ca' n'oc'ügaanich jadüg'oc je pascua xñ ügy, ixti coonì je xñ tiempo paadip co ðich ajt n'uucim huinjemybi je pascua xñ ügy ma ðich nDeedy y'ane'min.

Jesús nigapxy co Pedro ycoyütza'ñyii

³⁰ E co ti y'ñdäy, chi ajcxy choon ñicxy ma Olivos cö-gop. ³¹ Chi Jesús je' ydiscipulos ajcxy nimay:

—Nidüg'óciy miich ajcxy xy'ixmajtztähua'ñich cham coodz. Je' co jaaybejty jadu'n miñ ma je Dios ñecy:

“Ögip je cuend'ajtpi, huin'it je cöbixy yöyhuäc-tähua'ñ.” ³² E co anajty ðich njugypicyich jadüg'oc ma anajty ti n'ögyich, chi yajjipni nñicxa'ñich ma Galilea, e jim naybaatim nidüg'óciy.

³³ Chi Pedro ymñañ:

—Oy yi jacjadyibi migtigtjicich xyjadim'ixmajtztäy, per ni camina xñ ðich miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxÿgy, miich tugñg'oc minañip co ca' xy'ixy'adyijich.

³⁵ Chi Pedro ymñañ:

—Oy ðich ndim'ögip miid miich, ni camina ngaminá'ñibich co ca' miich n'ix'adyii.

E nidüg'óciy je' ydiscipulos ac tim jadu'n ymñañ.

Jesús mibijctzoy Dios jim Getsemaní

³⁶ Chi Jesús ñicxy miid je' ydiscipulos ajcxy, oy yja'tcixy jim Getsemaní. Chi jim Jesús nimay je ydiscipulos ajcxy:

—Ya miich ajcxy oc'ñña', miin ðich n'ocñicxyich jim'amy Dios mibijctzoobi.

³⁷ E chi Jesús ñicxy miid Pedro etz nañ jadu'n miid je Zebedeo ymang nimetzpi. E jim Jesús ñayjihuiñy janch tajy may mij cajee. ³⁸ E chi jim yajnimay je nidugñgpi discipulos:

—Nayjihuiñyich taj may ma njot nhuinma'ñ, ixti mabaad anajty n'ögich miid tájin máyñ. Hui'm miich ajcxy ya miid ðich etz ca' mmaagixy.

³⁹ Huin'it Jesús ñajtzoyöyñy mijci'm jahui'. Chi jim ñaygojtinaydací naaxcixy, e ytigñy Dios mibijctzoobi, ymñañ:

—Dios Teedy, ðich nDios, pen jëbi jadu'n, mduñ may'ajt píjicgich jadayaabi tzaachypí ayo'n, per ca' yjadu'nity nej ðich ndzojcin mdunipy, jadu'n mdunipy janchty nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugñgpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ miich ajcxy co m'idipy juugy tüg hora miid ðich ycixpi? ⁴¹ Hui'mi' ya, juugy m'idipy etz mibijctzoo Dios, jaydëb ca' je ca'oybi xymimadägip. Janch tiy'ajt co jotjoty ooy mñijot'ajtcixy com tu-

naangixy yi oybi. Per yi mninix ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, ymi-nañ:

—Dios Teedy, pen copicy co ñich nbaadibich je ayo'n, huen jadu'n yjadiyb mñid ñich nej miich mdzojcin.

⁴³ Chi jadüg'oc Jesús huimbijty ma je nidugigpi discipulos, e oy pátnibi maab ajcxy, je' co ca' anajty ajcxy mimadägy mähuñ. ⁴⁴ Chi yajhui'my ajcxy, e midugig'oc ñicxy Dios mibijctzoo. E nañ tim jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jim ma je nidugigpi, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mina ñich, je jäy huidibi tsoon tzajpjoty, nyajcýega'ñich ma yi jibicýajdyijc ajcxy. ⁴⁶ Pidëccix, tzoc jámim, chi ymiñ je huidibi xycýegaambich ma nmidzipich.

Tzумы mach ajcxy Jesús yajnicxy

⁴⁷ Jesús capxni anajty jim co yjaty je Judas. Judas hue' je' nidügti je majmetzpi discipulos huidibi Jesús yhuin'ijx. E je Judas mñid ja'ty mayjäy, je huidibi anajty ti quexy je judío teedy migtungmñidpi etz je mijjäydyijc. E je mayjäy hue' anajty ajcxy mñid ypujx etz quipy. ⁴⁸ Judas, je huidibi anajty cýejc Jesús, ti anajty jayijp yecy tüg ijxpejt huidibi mñid jëbi ajcxy ijxcapy Jesús. Jadu'n jayijp Judas ycapxtuñ mñid je' ajcxy, e ymiñañ:

—Je jäy huidibi anajty ndzücxpich, yi' je' Jesús.

Májtzcix.

⁴⁹ Huin'it Judas nimijhuägy Jesús co capxpocxa'ñ, chi ymiñañ:

—¡Huindzin!

Chi tzücx.

⁵⁰ Chi Jesús ñimay:

—Migüg, ¿na'amy co xyñimijhuägyich?

E co jadu'n nimay, chi mic'amy yi' ajcxy majch Jesús. Chi ajcxy yajnicxy tzумы mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy migtungmñidpi ytumbi. ⁵² Chi Jesús nimay je' ydiscipulo:

—Pidäg yi mbujx ma ytijc. Com pinjaty tziptumb mñid pujx, nañ jadu'n y'ögipy mñid pujx. ⁵³ ¿Nej ca' mnejhuñ co ñich jëbi nbijctzooyich cham adzu'x may ángeles, je huidibi xyñihuá'ñibich ma nmidzipich? ⁵⁴ ¿Per nej ycxipy yca'pxipy nej miñ jaaybety, jadu'n nej cham ytuñyii yjadyii mñid ñich ycxipi?

⁵⁵ Chi Jesús nimay je mayjäy:

—Miich ajcxy ti xyñidzonñyich mñid je pujx mñid je quipy. ¿Nej mdijy ñich meetzpi o jäy yaj'öcpich? ñich jabom jabom anajty ññayich nyaj'ixpicyich miich ajcxy jiiiby ma Dios ytijc. E ca' miich ajcxy xymajchich. ⁵⁶ Huinjhuñ' miich ajcxy co tüg'óciy yam ytuñyii yjadyii ca'px tim jadu'n nej je profeta ajcxy cojaay jecy'ajty.

Huin'it nidüg'óciy je' ydiscipulos ajcxy yqueectay. Chi Jesús yhuñmy naydügpajc.

Jesús ma naymujcpidijc yhuinduu

⁵⁷ Je' ajcxy huidibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayyöymujctáayigixy je escribas etz je mijjäydyijc ajcxy. ⁵⁸ E je Pedro anajty axam nicxy jigügy jihuñy, ixti cooni yajja'ty ma Caifás ytiba'. Chi jim ytigiy. Chi ixtacy mñid je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹ Je teedy ajcxy migtungmñidpi etz tüg'óciy je judíojäy migtungmñidpi ajcxy huinma'ñ ixtaayigixy nej jëbi Jesús yajpocýagixy mñid ajcxy xñhuñ, e jadu'n jëbi mooygixy yi o'cin. ⁶⁰ Mayjäy nihambejty Jesús mñid añi, per ni pin anajty ca' mñidty tiy'ajt co Jesús anajty ti ytundi-gooy mñid judíojäy ajcxy ycötujcin. Jac com jecy miin metz testigos mñid aanñ. ⁶¹ Je' ajcxy ymiñañ:

—Jadayaabi yëdyijc miñañ co jëbi nyajhuindigooyich Dios ymijtzajptijc, e codugig xii ti anajty nyaj'oyñyich jadüg'oc.

⁶² Huin'it je teedy migtungmñidpi ytñaygy, e nimay Jesús:

—¿Nej co ca' m'adzooy? ¿Nej janch tiy'ajt nej jadaayaabi metzpi testigo ymiñañ?

⁶³ Per Jesús ca' y'adzooy. E huin'it je teedy migtungmñidpi ñimaay:

—Ñimaay ñich ajcxy Dios ycxipi, pen janch miich je' je Cristo je Dios y'ung.

⁶⁴ Chi Jesús ymiñañ:

—Miich jadu'n minamb. Nañ jadu'n ñich miich ajcxy nimäy, co ñich je jäy huidibi tsoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocoty co anajty nhuimbityich jadüg'oc ya naaxhuñ.

⁶⁵ Chi je teedy jacmigtungmñidpi oy yhuñ huindzeczy huinma'ch, chi ymiñañ:

—Jadayaabi yëdyijc ti capxtigooy Dios. ¿Ti testigo njac-huaanim? Miich ajcxy c'm ti mmidoogixy co yi' ti ycapxytigooy ma Dios, e miñañ: ⁶⁶ ¿Nej miich ajcxy minangixy?

Chi ajcxy ymiñañ:

—Ti ycapxytigooy, copicy co y'ögipy.

⁶⁷ Chi ajcxy huindzuju jijptzuyj etz cojxy ajcxy. Chi jacjadyii huingojxy jijpcojxy. ⁶⁸ E chi ajcxy nimay:

—Pen janch co miich je' je Cristo octiygapx pin ti xycocy.

Pedro ymiñañ co ca'p Jesús ix'yadyii

⁶⁹ Je huin'it moñi Pedro anajty ññay tibäguj. Chi ñimiñi tüg töxy'anäg tumbi, chi ñimaay:

—Miich nañ jadu'n ti mhuidity mñid Jesús je Galilea jäy.

⁷⁰ Chi Pedro ymiñañ mayjäyoty:

—Ca' nhuinñihuñyich ti mgapxy.

⁷¹ Pedro hue' anajty pidzimñip co ñimiñi huingbi töxy'anäg. Chi je töxy'anäg nimay je' ymigügtijc:

—Jadayaabi yëdyijc ti yhuñity nañ jadu'n mñid Jesús je Nazaretpi.

⁷² Chi Pedro jadüg'oc coyüch je Jesús cixyot huinjot ymínañ:

—Ca' n'ixy'adyijich yijibi yëdyjic.

⁷³ Jac co hueeni, je jäy huidibi anajty ajcxy jimip ñi-may ajcxy je Pedro:

—Janch co miich nañ jadu'n anajty mïd mhuidity yi Jesús, com yi m'ayuc yi' xyajniquëxëcp.

⁷⁴ Chi Pedro tigüy capxi janch oy ñinej mínañ huinjot:

—Ca' n'ixy'adyijich yi yëdyjic.

E tim huin'ítü je tzey yaxügy. ⁷⁵ Chi Pedro jäymejtz-coody jadu'n nej anajty Jesús ti ñimäyü: “Ma ca'ni anajty tzey yaxügy cham coodz, miich tugüg'oc xy-coyützibich.” Chi Pedro pidzimy tiba', e jüby oy yäxy mibaad yjotcidägy.

Chi Jesús yajcäyejcy ma Pilato

27 E co oy yximäy yticxü, chi je teedy mijtungmïd-pi etz je mijjäydijc ajcxy quipxycapxy co yaj'ögaangixy Jesús. ² Chi ajcxy yajnicxy cïxoch oy ajcxy cïyey ma Poncio Pilato je gobernador.

Judas ñayyöctüyi

³ Co je Judas je huidibi anajty ti cïyey Jesús, co ijxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meeñ ma je teedy mijtungmïd-pi etz mijjäydijc ajcxy. ⁴ Chi Judas nimay je teedy mijtungmïd-pi etz je mijjäydijc ajcxy:

—Ïch ti ndundigooyich co ti ngïyeyich yi tudägyjäy ma miich ajcxy.

Chi je' ajcxy y'adzooy:

—Ti ñich ajcxy n'occuent. Miich yi' mnigixp tübi mduñ.

⁵ Huin'it Judas cohüjy je meeñ jüby tzajtigoty. Chi ñicxy. Chi ñayyöctüyi.

⁶ Huin'it je teedy mijtungmïd-pi yajpidügy je meeñ. Chi ajcxy ñayñimaayi miñ xyipy:

—Jadayaabi meeñ ca' yjëbity co nbidaacim ma ofrenda ñigidägy. Je' co yi' yjëjity je huidi n'py ti tzo'adyii.

⁷ Huin'it je teedy ajcxy tuñ je quipxycapxy co juyaangixy mïd je meeñ tüg naax huidibi jäy ytiip, tütznaax it, ma ajcxy yajnaxtigühuipy pinjaty ca' ycogajpity jim Jerusalén. ⁸ Ixti chambaad jadu'n xü'adyii je-jimbi it: N'py naax. ⁹ E jadu'n ycijx yca'px nej je profeta Jeremías ymínañ: “E jadu'n ajcxy je' yajpidügy meeñ iipx majcpi plata meeñ (je' choou nej anajty ajcxy Israeljäy ti yajniödügy), ¹⁰ e mïd je meeñ ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amidoohü:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmïd-pi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxüyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuüñi ti ycapxipy.

Jesús ycödujcy y'o'cin

¹⁵ Je gobernador jadu'n anajty ycostumbre mïdity co jimijt jimijt najtzmazdüy tüg machyjäy pascua xijoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'yajttaayb, e yxijity Barrabás. ¹⁷ E co anajty jim ti ytügmujtaaygixy, chi Pilato ajcxy y'amidooy:

—¿Pïn miich ajcxy mdzojcpy co ñich nnajtzmazdühuibich? ¿Najtzmazdüyich Barrabás o Jesús huidibi jäy ajcxy ytiipy je Cristo? ¹⁸ Pilato ñejhuüyb anajty co mañ'ájtingix anajty ti cïyey Jesús.

¹⁹ Jimni anajty iñäy Pilato me je ycötujtac co je ytöxyjic tiy'ajt quejxy ma yi', ymínañ: “Ca' huaad myajtzaachytuñ yi tudägyjäy. Je' co ñich amygoodz ti ngumäyich janch jibic mïd yi' ycixpi.”

²⁰ Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmazdüy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazdühuibich?

Chi je mayjäy y'adzooy:

—Najtzmazdüy Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huidibi jäy ytiipy Cristo? Huin'it ajcxy nidüg'óciy y'adzoday:

—¡Yajcruutzpet yi Jesús!

²³ Chi Pilato ymínañ:

—Pues, ¿nej ti ytundigooy?

Per je mayjäy nigoob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuüy co je mayjäy ca' ni nej niducy. Hue' ajcxy oy ytigüy huambi jihuüybi, chach ñayñajtzijigixy mïd jot'an. Huin'it Pilato capxyñiguejxy je huadz ni. Chi ytigüy cïbüjp ma je mayjäy yhuinduu, e ymínañ:

—Ca' ñich ngo'adzohuipyich jadayaabi tudägyyëdyjic y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ïch ajcxy ngo'adzohuipyich yi' y'o'cin mïd n'ung anäg etz n'ap n'oc.

²⁶ Chi Pilato najtzmazdüy je Barrabás. Per Pilato ane'my co huen Jesús yajhuojp. E co yajhuojptay, chi cïyeycy, co huen yajcruutzpedyü. ²⁷ Chi Pilato ysoldados ajcxy yajnicxy Jesús ma agujctijc. E jüby tüg'óciy soldadtijc ñayyöymujci ma Jesús. ²⁸ Chi je soldado ajcxy je' yhuít yajniënducy. Chi ajcxy yajniëny je tzapx huit huidibi je rey ajcxy yajtuumyb. ²⁹ Chi ajcxy tacy tüg corona mïd apy. Chi ajcxy yajcöjeny ma Jesús. E huin'it ajcxy a'oy'amy yajcögabüy tüg je paxy. Chi ajcxy huingojxinay'ahuüy. Chi ajcxy nixiicy yajxiicy, e ymínaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huindzuju jįptzuju. Chi ajcxy yajcįgajptucy je paxy, e yajcōhuojpįgy ajcxy. ³¹ E co ajcxy nixiictay yajxiictay, chi yajnijenducy je rey yhuit etz yajnijenių je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejtį

³² E jįm ma anajty hueeni ti ytųyų, jįm ti paty tųg Cirene yędyjįc anajty yxįjįty Simón. Chi ajcxy adzip ni-may Simón co huen jaccapi Jesús ycruudz.

³³ E co ajcxy yja'ty ma tųg je it yxįjįp Gólgota, jadu'n yhuimbįdzim Ōcpi Cohuajc Cōgop. ³⁴ E jįm ajcxy Jesús jayaj'uga'ń vino temhuidity mįd tzooy, jįgix ca' jįhuųhuįp je tzaachypi. Per co uucmajch, chi jįhu'ńybjįc co ca' y'oy'uucnity.

³⁵ E co anajty ajcxy yajcruutzpejty Jesús, chi je soldadtįc suerte iįxy, pin jębi ocję'adyii Jesús yhuit, chi ycįjxy yca'pxy jadu'n nej je profeta cojaay jecy'ajty: "Ya-jhuęcįpy ajcxy ńch nhuit e mįd ńch nhuit ycįxpi iįxy ajcxy suerte." ³⁶ E jįm anajty ajcxy ńaaygixy cuend'ajtcįxy. ³⁷ Je xįhuin ayuc huidibi ajcxy yjaay ma Jesús ycōduu jadu'n yminań: "Jadayaabi je' Jesús, je judíos ajcxy je yrey."

³⁸ Quipxy mįd Jesús ajcxy yajcruutzpejty metz meetzpi. Tųg a'oy'amy, e jadųg anajty'amy. ³⁹ Je mayjįy huidibi ajcxy naxįyb anajty ma Jesús, ooy anajty oy ycōjįgįń, nixįgy yajxiįgy ajcxy Jesús, ⁴⁰ ymina'ń ajcxy:

—Bah, miich huidibi Dios ytįc jidaanių, e codugįg xį huingbi myajpidįga'ń. Miich ci'm cham naygohuąń, e minac cruudzcįxy, pen janch miich Dios xy'ung'adyii.

⁴¹ Nań jadu'n je teedy ajcxy huidibi mįtungmįdpi, etz je escribas, etz je fariseos ajcxy etz je mįjįdyjįc nixiicy yajxiicy ajcxy Jesús, ńayńmąayįgixy miń xyįpy:

⁴² —Huingbi ti cohua'ń, e ca' jaty nej ci'm ńaygo-hua'ńyib. Pen janch co y' jęjįty je Cristo je Israel jįy rey, huen minacy jadachambi ma cruudz, huin'it nmįbjįcim. ⁴³ Y' ti pidągy ymįbjįcin ma Dios; huen jadachambi je Dios yajnidzųgyii, pen janch Dios chogyii; y' ti ymina'ń co Dios y'ung'adyii.

⁴⁴ Nań jadu'n je metzpi meetzpi ajcxy huidibi cruudzpejt quipxy mįd Jesús nixiicy yajxiicy ajcxy ooy Jesús.

Jesús y'ųgy cruudzcįxy

⁴⁵ Co ycuįcxįjįy, chi ycoodzyday tųg'ųcių naaxhuińybi. E jadu'n je naaxhuińybi y'įjty coodz, ixti minacy yxį.

⁴⁶ Huin'įty Jesús ycapxyqueecy janch mic yminań:

—Elí, Elí, ¿lama sabactani? —y' jadu'mbi ayuc hue' yhuimbįdzimy: Dios Teedy, Dios Teedy, ¿ti co ti xy'ix-machich?

⁴⁷ Nįjįjįty jįy huidibi anajty jįm yajpatp huington ma Jesús co jadu'n mįdoogixy Jesús y'ayuc, chi ajcxy yminań:

—Jadayaabi yędyjįc cham yaaxtaayb je profeta Elías.

⁴⁸ Huin'it nidųg jįy ńicxy janch poyįgy etz oy yajtzoof je pixy. Chi je pixy yajxoogy mįd je xun vino. Chi pidacy je pixy ma je paxyjįp. Chi yujctįjy ma Jesús y'ahuac co huen ũgy. ⁴⁹ Huin'it nįjįjįty ajcxy yminań:

—Ixmatz, tzoc ajt oc'įxim, pen nimiinių Elías, pen janch yajnidzųgyii.

⁵⁰ Jadųg'oc Jesús yaaxqueegy janch mic. Chi oy y'ocni. ⁵¹ Co Jesús y'ocy, tim huin'įty jįm ma Dios ytįc je mapxy yhuit yciįtzhua'cxy tiną'amy. E nań jadu'n je naaxhuińybi ooy chuyuy mįd ujx micpi etz je mįjįjįty-chaa oy jįitzhua'cxy. ⁵² May ōcpi jut y'ahuach etz yjy-gypįcy mayjįy tiibi anajty y'occiųy tiibi anajty mįbjįc-cįxy Dios. ⁵³ Co Jesús yjugypįcy, chi je may'ōcpi tiibi anajty jugypįccįxy etz tiibi anajty pidzimgixy ma ōcpi jut, chi ajcxy ytįgįy ma je Dios ycajp, je Jerusalén. E mayjįy ajcxy iįxy. ⁵⁴ Co je mic ujx oy ńaxy etz jac tijaty anajty ti ytuńyii ti yjadyii, chi je capitán etz mįd jadyii ymįgųgtįc huidibi anajty cuend'ajtp Jesús ooy ajcxy chįgy yjįhuy, e minaangixy:

—Janch tiy'ajt co yjįibi yędyjįc Dios y' anajty y'ung.

⁵⁵ May anajty nań jadu'n tųxyjįdyjįc ymį'įjxcįxy jįguem huidibi anajty ajcxy Jesús ti mįddzoon jįm Galilea. Y' anajty ajcxy Jesús ypubejtp. ⁵⁶ E ma je' ajcxy jįm anajty chońty, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigįy

⁵⁷ Co oy chuu'įyńi ycoodzįyńi, huin'it choń ma Arimatea tųg comeńjįy huidibi yxį José. E je' ymįjńicx-pejty anajty Jesús. ⁵⁸ Chi José ninicxy Pilato oy pijctzou Jesús ńinicx. Huin'it Pilato pidacy y'ane'min co huen mųyii. ⁵⁹ Chi José ycđįgįy Jesús ńinicx. Chi huinmojch mįd tųg poob sábaana. ⁶⁰ Chi yajnaaxtigįy ma je yci'm jut jemybi huidibi anajty ti yajtzejztųty ti yajpądųty ma tųg tzahuingueetz. Chi adįguejctųcy je ōcpi jut mįd tųg tzaa. ⁶¹ Chi José ńicxn. E jįm yhu'įmy María Magdalena etz je jadųgpi María, y'ńąy ajcxy ymįhuington ōcpi jut.

Je cuend'ajtpi ajcxy ma Jesús ńaaxtigįy

⁶² E com jabom ma anajty Jesús ixįybi ti y'ųgy, ma anajty ti ni'ixiydąy mįd je sábaado xį ycįxpi, chi je teedy ajcxy huidibi tungmįd etz je fariseos ajcxy ńayyųymu-įci ma je Pilato. ⁶³ Chi ajcxy yminań:

—Huindzin, y' ńch ajcxy nįymejchpyich co je ani-dacpi yminań ma anajty yjuogyty co codugįg xį jygypįga'ń jadųg'oc co anajty ti y'ųgy. ⁶⁴ E paady tun-may'ajt quexįpy soldados ajcxy ma Jesús ti ńaaxtigįy huen cuend'ajtcįxy ixti cooni tugįg xįbi paadıpy. Ca' yjcyty co ńiminńb adzuum agoodz je' ajcxy huidibi mįjńicxpejtįp etz tzmįguęgįpy ajcxy Jesús ńinicx. E chi nicxy jįy ymina'ń: "Ti yjugypįcy je ōcpi." Chi anajty jac'anaxy je ani ti yjajtni ca'ydį je jayjįpi.

⁶⁵ Chi Pilato ajcxy nimay:

—Miich ajcxy mįd tųg picy soldados huidib cuend'ajtp ma miich ajcxy. Nįcxcįx miich ajcxy yaj'adu-jccįxy je ōcpi jut, jadu'n nej m'a'ixįygixy.

⁶⁶ Chi ajcxy choni ma je Pilato. Chi ajcxy quejxy je tųg pįcypį soldados ma je ōcpi jut. Chi ajcxy pidacy iįx-hui'min ma je tzaa huidibi ajcxy je jut yaj'adįguejctųcy.

Co Jesús yjugypijcy

28 E com jabom co yximäy yticxägy je domingo xii, huin'it ñicxy María Magdalena etz je jadügpí María ma Jesús ñaaxtigäy. ² Chi tüg mij uix ñajxy. Huin'it ycidacy Dios tüg y'áγγελ huidibi tzomb tzajpjoyty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. ³ Janch adicxp je áγγελ anajty yhuinjijp jadu'n nej huidzuc, e je yhuít janch poob'ögy. ⁴ E co je soldados ajcxy ijxpaty je áγγελ, chi ajcxy ooy chuyuygooty. Chi ajcxy yhuímy jahuengi ögy. ⁵ Huin'it je áγγελ y'adzooy je metz töxyjäy:

—Ca' miich ajcxy mdzigäy. ñich nejhuíybich co miich ajcxy m'ixtäy Jesús je huidibi ajcxy yajcruudzpejty. ⁶ Per ca' je' cham ya. Tí je' yjugypicy, jadu'n nej yminañ. Min miich ajcxy oc'ix ma ñaaxtigäy. ⁷ Ñicx miich ajcxy jottigooyb ma je' ydiscípulos ajcxy e nima': "Tí Jesús yjugypicy jadü'oc, e yí' ñicxip jim Galilea e jim ajcxy mmíidnaybadíyb." ñich miich ajcxy yam nmímaaygixy.

⁸ Huin'it je töxyjäy ajcxy chooñ janch poyägy ma anajty tí ñaaxtigäy Jesús. Chi ajcxy ñicxy míid tzigi'ñ, per agujc jotcujc. Poyägy ajcxy oy tíy'ajt yecy ma je discípulos ajcxy. ⁹ E jim anajty je metzpi töxyjäy ytüyöy, tímētini Jesús ñayguëxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz míneeni je' ytecy. Chi ajcxy huindzigíygyxxy. ¹⁰ Jesús mínañ:

—Ca' mdzigíygyxxy. Ñicx miich ajcxy nima' je nmígügtjicich co huen ajcxy ñicxy jim Galilea, e jim naybadíybich míid yí' ajcxy.

Huidibi ajcxy je soldadotjic ñigapx

¹¹ E tüyöybñi anajty je töxyjäy nimetzpi co nijëjity je soldados ajcxy chooñ ma Jesús ñaaxtigäy ñicxy jim

Jerusalén, míidmíydäga'ñ je teedy huidibi tungmíidpi nej anajty tí ytuñyíi tí yjadyíi ma Jesús ñaaxtigäy. ¹² E huin'it je teedy ajcxy ñayyöymujctayí míid je míjjäydtjic, tunaangixy quipxy capxy. Huin'it je teedy ajcxy etz je míjjäydtjic moy ajcxy je soldados may meeñ. ¹³ Chi ajcxy nímáy:

—Miich ajcxy mína'ñip co maab anajty miich ajcxy mójcoodz co ymíiñ Jesús ydiscípulos ajcxy etz tzingueeci Jesús ñinícx. ¹⁴ Etz pen ymídooyb anajty yí gobernador, ñich ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados ycidigíyí je meeñ. Chi ajcxy ñicxy cuyduñ jadu'n nej anajty ajcxy tí ñimäyíi. E ixti chambaad jadu'n judíojäy capx je ayuc.

Huidibi Jesús yajnibijc ydiscípulos ajcxy

¹⁶ E jadu'n ajcxy ñicxy je nimajctügpí Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús tí ñimáayigixy. ¹⁷ E co ajcxy ijxpaty Jesús, chi ajcxy oy huindzigíy. Per jim nijëjity huidibi ca' mibijcy co anajty yjëjity. ¹⁸ Huin'it Jesús ymíjhua'cy ma yí' ajcxy, e nímáy:

—ñich tí nyajmüyich je cötujcin jíiby tzajpjoyty etz ya naaxhuiñ. ñich tí nyajmüyich je mij cötujcin, jaydëbi n'ane'myich jíiby tzajpjoyty etz ya naaxhuiñ. ¹⁹ E paady ñicx miich ajcxy huindu'my naaxhuiñ capxhuäcxix je ayuc, jaydëbi jäy ajcxy xymíbigipyíich. Tüg'ócíy jäy ajcxy huidibi xymíbigipich myajñíbedípy ajcxy míid Dios yxí, Dios y'ung yxí, etz míid je Espíritu Santo yxí. ²⁰ Miich ajcxy myaj'ixpígipy je mayjäy co copicy cuydunípy ajcxy ñich ngötujcin tüg'ócíy jadu'n nej tí n'ane'myich miich ajcxy. E miich ajcxy mnejhuíyb co nmíid'ityíich miich ajcxy huiníxií huinítiempo, ixti mabaad naaxhuiñybi anajty ycixpi ytigooy. Jibaad ycíxy. Amén.

SAN MARCOS

¹ Jadu'n oga'n chondacy je oybi ayuc tiy'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzcaxpiybi je Isaías jecy'ajty jay-hui'my jadu'n nej Dios nimay je Cristo:

Nguexaamyich ñch ngogapxy jayijp ma nidüg nidüg cajp ma miich mnicxa'ñ jac'axam, jigix jëb je cogapxy nimähuipy je jäy ajcxy co huen nayñ'i'ixiyigixy ma yjot yhuinma'ñ mïd miich ycixpi, jadu'n nipaady nej jihuüy jäy ajcxy ni'ixiy tü'aa co tüg rey yjäda'ñ.

³ Nañ jadu'n jadüg it Isaías jayhui'my jada ayuc ma jadu'n yminañ:

Jim mijtigëduum jäy ajcxy midoy co tüg jäy y'ayuc-caxhuäcxy, jadu'n yminañ: "Nayñ'i'ixiyigix ma mjot mhuinma'ñ ajcxy jaydëb naybaatim mïd ajt nHuindzin Dios. Ixmájtzcixy y' mjbicjot mjbic-huinma'ñ. Jadu'n nipaady nej jäy ajcxy yajtiy tü'aa huidibi ooy y'adijy y'a'och."

⁴ Jim mijtigëduum anajty Juan je Bautista miñ e ytigüy mayjäy yajniibejtpi. Chi Juan capxhuäcxy Dios y'ayuc ma je mayjäy ajcxy huidibi anajty mimb niibejtp. Juan ayuc capxhuäc co copicy co jäy ajcxy huen jothuimbijtcixy etz ixmájtzcixy ajcxy je yjibichuinma'ñ, etz niibejtcixy, jigix jëbi Dios yhuinmecxib ajcxy ypocy. ⁵ Tüg'óciy je mayjäy ajcxy huidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je'y'ayuc. Co je jäy ajcxy capxpizimmy nej anajty ypocytungixy, chi Juan yajniibejty ajcxy ma je Jordán mijni.

⁶ Juan hue' anajty yhuít'ajtpy camello nibijc, e nañ jëyim anajty mïd ñayhuüñy, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e yminañ:

—Ñich jayijp ti nmiñich ngapxhuäcxy Dios y'ayuc. Jac'axam minipy tüg jäy huidibi jacnigi mic'ajt mïdity ca'ydi ñch, ca' xypaadyich nicxy nguejyich y' ycighuin.

⁸ Ñich ti nyajniibetyich miich ajcxy mïd ni. Per je jäy huidibi yjacmïd Dios ymic'ajt, ca'ydi ñch. Y' xyaj'adigihuiip xyajjotigihuiip Dios yjihu'ñ ymic'ajt, jadu'n nipaadip nej jihuüy xyajniibedip mïd Dios yjihu'ñ ymic'ajt.

Co Jesús ñibejty

⁹ Je huin'it xii huin'it tiempo Jesús chooñ ma je cajp huidibi yxii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xii Juan yajniibejty Jesús ma je Jordán mijni. ¹⁰ Pidzimb anajty Jesús ma je mijni, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty,

e ycidägy ma y'. Jadu'n je Espíritu Santo yquëxigy anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyii:

—Ñich miich n'ung'ajtpy. Ooy ñch miich ndzocy njihuüy. Ooy jotcuyc nayjihuüyijich mïd miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajnicxy Jesús mijtigëduum. ¹³ E hue' Jesús yhuimiy jim mijtigëduum huixchiguipx xii ahua'n iyujc agujc. Huin'it je mujcu' jot'ijxy yhuinma'ñ'ijxy je Jesús. Chi je ángeles ajcxy miñ ypubejty ypodigüy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz y' Dios y'ané'min. ¹⁵ Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'ñ y' y'ané'min ya naaxhuiñ. Jothuimbijtcix ajcxy, etz ixmájtzcix ajcxy mjbicjot mjbic-huinma'ñ. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzooñ midaax jäy huidibi anajty acxmajtzp

¹⁶ Jesús huidijtp anajty ma je mejypa' huidib yxii Galilea mejy, co oy'ijxpaady Simón etz y'uch Andrés. Simón etz Andrés acxmadziñ anajty ytung'ajtpy, ytipi-dacpy anajty y'acxmadzi'ñ mejyjoty co ajcxy Jesús iixpaty. ¹⁷ Chi Jesús nimay Simón etz Andrés:

—Min mïd ñch. Ñich miich ajcxy huingbi tung nmöhuipy. Jadu'n mdung nipaadip nej jihuüy mjäymájtzcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy mïd Jesús.

¹⁹ Chi Jesús yjacyöy anajty hueen, e iixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen nicxy mïd y'. Mic'amy je' ajcxy ixmajch yteedy, je Zebedeo, barcojoty mïd ytumbi, chi ajcxy ñicxy mïd Jesús.

Tüg jäy huidibi anajty jibic espíritu mïd

²¹ Huin'it Jesús mïd ymügügtijc yja'ty jim Capernaum. Je huin'it sábado, je poocxin xii, Jesús ytigüy ma je judíoäy ajcxy ñaymujctac jim Capernaum, chi yjyayaj'ixpjctzondacy. ²² Je mayjäy ooy ajcxy jihuüy

huinmay je ayuc huidibi Jesús anajty ajcxy yaj'ixpíjicp. Com Jesús hue' anajty yaj'ixpícy jadu'n nej jihuiy yci'm'ané'min miidít. Ca' Jesús anajty yaj'ixpícy jadu'n nej je jāy ajcxy huidibi yaj'ixpíjicp anajty Moisés ycötújcin je jécyí. ²³ E ma je naymujctac tūg yēydijc huidibi miid anajty ca'oybi. Chi je ca'oybi ooy mic ycapxcoody, e ymīnañ:

²⁴ —¿Tí co xy'amayy iich ajcxy, Jesús huidibi tzomb jim Nazaret? ¿Nej tí mmiñ co xyajhuindi-goyáangixyichi? Íich n'ixcajpy miich, e nejhuibich co miich je' je Huátzpi Dios.

²⁵ Chi Jesús ix'ojy je ca'oybi, e nimay:

—Amon miich, e pidzimb ma jada yēydijc.

²⁶ Huin'it je ca'oybi yajyajch yajquidy je yēydijc, e mic yaaxqueegy, e ypidzimy ma je yēydijc. ²⁷ Tūg'óciy je mayjāy jiiiby ma je naymujctac ooy ajcxy ñay'adzigiñi, e ñayñimaayi ajcxy miñ xyípy:

—¿Tí jada' yí? Jada yēydijc ymiid jemybi ixpíjcin. Yí miid mic'ajt etz ane'm'ajt, paady ycixpi yí' ane'my yí ca'oybi, e ycapxmidoohuip.

²⁸ Mic'amy je mayjāy ajcxy huidijaty tzinaayb ma tūg tūg cajp jim Galilea nejhuibí ajcxy nej Jesús ytuñ, e cō-maaygixy Jesús.

Jesús yajtzōgy Simón Pedro ymīd tōxyjāybi

²⁹ Tim huin'ítíy Jesús ypidzimy ma je naymujctac, chi ñicxy miid Jacobo etz Juan jim ma Simón etz Andrés ytíj. ³⁰ Simón ymīd tōxyjāybi píjicp anajty. Cijx'am anajty y'ity, e mic anajty ooy ytoyí. Tim huin'ítíy Jesús ñi-maayi co Simón ymīd ooy mic ypiyí. ³¹ Chi Jesús nimijhuāgy je pa'mjāy. Chi majtzi yci', e huiztēgy. Tim huin'ítíy yí toyí y'ixmajtzi, e chi yajcay yaj'uucy Jesús etz ymīgúgtíj.

Jesús yajtzōgy may pa'mjāy

³² Co xii oy ycidacni, e chuu'ñiñi, chi je mayjāy miid miñ ajcxy ma Jesús tūg'óciy pa'mjāydíj, etz huidijaty ajcxy ca'oybi ymiid. ³³ Tūg'óciy je mayjāy ajcxy ma je jimbi mij cajp nimujcy je tíj ma Jesús anajty tí yjättāgy. ³⁴ Jesús yajtzōoctay tūg'óciy je may pa'mjāy huenyitimiibá'mity, etz yajpidzimy may ca'oybi majaty jāy ajcxy. Per Jesús ca' anajty a'ixy nicxy je ca'oybi ñi-gapxyii, com y'ixy'ajtaayb anajty ajcxy Jesús.

Jesús y'ayuc tíy'ajt capxhuācxy jim Galilea

³⁵ Tim mooñi Jesús ymaybidēgy, ca' anajty yxiimñiñi, e ypidzimy ma je cajp. Chi ñicxy ma tūg mijtēgduum Dios miibíjctzoobi. ³⁶ Huin'it je Simón etz je ymīgúgtíj ooy ajcxy ja'ixtāy Jesús. ³⁷ Co ajcxy paty je Jesús, chi ajcxy nimay:

—Tūg'óciy je mayjāy xyjadim'ixtāy.

³⁸ Chi Jesús nimay Simón etz je ymīgúgtíj ajcxy:

—Tzoc ajt jámim ma yí jacjadyii cajp huinduy agonbi, jaydēb ngapxhuācxiibich Dios y'ayuc nañ jadu'n ma yí jāy ajcxy jim. Paady ycixpi ndzooñich tzajpjoty, jigix jēbi ngapxhuācxiibich Dios y'ayuc.

³⁹ Jesús nicxp anajty ma nidūg nidūg cajp jim Galilea ycapxhuācxy anajty Dios y'ayuc ma nidūg nidūg judío-jāy ñaymujctac, e yajpidzimy anajty ca'oybi majaty jāy.

Jesús yajtzōgy tūg jāy nībützpa'mmīdipi

⁴⁰ Tūg jāy huidibi ymiid anajty jibic pützpa'm, je micpi, chi nimijhuāgy Jesús, e ycojxtinay'ahuñy ma Jesús yhuinduu, ymīnañ:

—Pen miich jadu'n tzojcpy, jēb xyajtzōgich.

⁴¹ Chi Jesús pa'ayoy je pa'mjāy, e pidacy yci' ma je pa'mjāy ñinícx, e ymīnañ:

—Ndzojcpyich, cham nyajtzōgy.

⁴² Co Jesús jadu'n ymīnañ, chi mic'amy je jāy huidibi anajty miid je jibic pūdch chōgy. ⁴³ Mic'amy Jesús ycapx-cíjxy miid je jāy huidibi anajty tí chōgy, e nimay:

—Ix pin myajnimāy co tí mdzōgy. Nicx jayíj jiiiby ma Dios ytíj ma je judío teedy ajcxy, e mo' Dios yhuindzigiñ jadu'n nej Moisés ycötújcin ane'my, jigix jēbi huādz mbidzimípy ma Dios ycötújcin. Cuydun mi-ich huidibi Moisés ñajtz'ane'mñy jecy'ajty, jigix jēbi je mayjāy ajcxy nejhuñhuip co tí mdzōgy.

⁴⁵ Per je yēydijc ca' capxymidooy Jesús. Co ñicxy, chi ytigñy capxy yajyōybi jadu'n nej anajty tí yajtzōgyii. Com je mayjāy nejhuñyb huidibi anajty Jesús tí tuñ, paady ycixpi Jesús ca' anajty ocjajtni nej ytigñhuipy iix-na' jigue'xna' majaty cajp. Hue' anajty huidity ma ca' pin chināy. Per miñ anajty y'oy'ixyii huenyitimpinjäyity, chooñ ma nidūg'óciy cajp huinduy agonbi.

Jesús yajtzōgy tūg jāy cīma'tpi tecyma'tpi

2 Tí anajty xii tiempo ñajtzñinícxiiñi co Jesús yhuimbijty jadūg'oc jim Capernaum. Je mayjāy ñe-jhuñyb anajty co Jesús yajpaady ma tūg tíj. ² Chi mic'amy mayjāy ñayyōymujci ma anajty Jesús yajpaady, e ca' anajty tígydac ma je tíj, miid co tzach mayjāy anajty tí miingixy. Y'aductaayb anajty ajcxy je tíj'aguu. E Jesús ycapxhua'xyp anajty Dios y'ayuc.

³ Huin'it xii, mīdaax yēydijc cymīñi cijx'am ma Jesús yajpaady tūg pa'mjāy huidibi yci' ytecy tí yxujtāy anajty.

⁴ E com ca' anajty ni nej y'oyy nej yajjādip ajcxy ma Jesús je pa'mjāy, je' co anajty chach útztzy je tíj miid je mayjāy, chi ajcxy yajcōhuaach hueeni je tíjnicx ma anajty Jesús yajpaady. Chi ajcxy cōdiyñajxy je pa'mjāy cijx'am. ⁵ Co Jesús íjxy je jāy ajcxy ymībíjcin, chi nimay je pa'mjāy:

—Mīgúgich, yí mbocy tí yajhuinmecxtāy.

⁶ Per nijējty huindzindíjc huidibi ajcxy nijaydutp anajty Dios ñecy co ajcxy midoy nej Jesús ymīnañ, chi ajcxy ymīnañ jototy huinma'ñyoty: ⁷ “¿Nej co jada jāy jadu'n ymīnañ co tí yajhuinmecxy jada pa'mjāy ypocy? Capxtígooyb yí' miid Dios. Com ca' nipinjāy jēb ypocy-huinmecxy. Tūgpajc Dios yí' huidibi jēb ypocyhuinmecxy.” ⁸ Per Jesús ñejhuñyb anajty nej je' ajcxy chachmīnañ jototy huinma'ñyoty, paady mic'amy ymīnañ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimāyich yí pa'mjāy: “Tí mbocy yajhuin-

mecxytäyí." O jac'ooy co nnimähuibich: "Pidig, e yajpidig yi mdögy, e tüyöy?" Tú'ciy yi'.

¹⁰ Chi Jesús yjacmínañ:

—Jadachambi janchtiy nyajquëxiga'ñich co ñich, je jäy huidib tsoon tzajpjoty, e huidibi cham yajpaady ya naaxhuiñ, nmíidich mic'ajt jaydeb nhuinemecxyich jäy ypocy.

Co Jesús jadu'n ymínañ, chi nimay je pa'mjäy huidibi yci' ytecy anajty xuxy:

¹¹ —Ñich miich yam jadu'n nimäy: "Tinayig, yajpidig yi mmabejt e nicx ma mdijc."

¹² E mic'amy je pa'mjäy ypidigy, e yajpidigy ymabejt, chi ytüyöychoñ jiiby ma je mayjäy ajcxy anajty y'ixy yhuindicy. Paady ycipi tüg'óciy je mayjäy ooy jihuiy huinmay etz jäymejch ojadajty ajcxy Dios, ymi-naangixy:

—Nimínaabi ajt jadu'n nga'íxim mijhuinma'ñ jadu'n nej cham ti n'íxim.

Jesús nimay je Leví: "Pajamgich"

¹³ Chi jadüg'oc Jesús ycajppidzimy, ñicxy jim ma mejy-pa'. E co mayjäy ñayöymujcy jim ma Jesús anajty yajpaady, chi Jesús yaj'ixpijcy je mayjäy. ¹⁴ Co Jesús yjac-tüyöy anajty, chi iixpaady Leví je Alfeo ymang. E Leví ñaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'ítíy Leví ytinayigy, ixmajch ytung, e panicxy Jesús.

¹⁵ Jadu'n yjajti co tüg xii Jesús caayb anajty me Leví ytijc. Mayjäy huidibi ytung'ajtpy anajty yajcogüedii, etz jacjadyii jäy huidibi anajty tundigooyb miid judío jäy ycostumbre y'ñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huidíjtcixy. ¹⁶ Jim anajty ma Leví ytijc nijéjty fariseojäy, je huindzindijc huidibi tzach padumb judíojäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huidibi tundigooyb miid judíojäy yti'ajt ycötújcín, etz yajcogüejtpidijc, chi ajcxy migapxy Jesús ydiscípulos, je' ajcxy huidibi mijnicxpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huidibi tundigooyb miid judíojäy ycötújcín?

¹⁷ Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzozdumbi yi jäy ajcxy huidibi mic'ajtp oy'ajtp. Yi' janchtiy yi huidibi ajcxy yuuba'm ymiid chojpy ajcxy tzozdumbi. Nañ tim jadu'n yi jäy ajcxy huidibi ca' ypocymiidity, ca' ajcxy tzocy pocyhuin-meecxín. Ñich ti nmiñich co nyajjothuimbidipyich pocyjäydijc. Ñich ca' ti nmiñich co nyajjothuimbidipyich ocyjäydijc tudägyjäydijc.

Jesús yaj'amidoogixy nej co jäy y'ity jaygay

¹⁸ Jadu'n yjajti tüg tiempo ayuu'ijtp anajty je jäy ajcxy huidibi mijnicxpejtp anajty Juan je Bautista. Nañ jadu'n

ayuu'ajtp anajty je fariseojäy ajcxy. Chi nijéjty ajcxy ymiñ ma Jesús e amidoy:

—¿Nej co yi jäy ajcxy huidibi mijnicxpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huidib miich xymijnicxpejtp, ca' y'ayuu'ajtcixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ñich ndiscípulos ajcxy y'ayuu'adip. Jadu'n nipaady nej jäy ajcxy huidibi pñjcín nixiidumy ca' ajcxy y'ayuu'aty ma yam yi pñjcín nixiiduñ, e peni ca'ni je pijcpi ymigügtijc y'ixmajztäyíi. Namí je pijcpi ca'ni choñ, chi ca' pín y'ayuu'ada'ñ huidibi nixiidum je pñjcín. ²⁰ E paadip je xii je tiempo mína ca' nmíid'ida'ñich ya naax-huiñ yi' huidibi ajcxy xymijnicxpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpicpyich, paady ca' ytügüy miid je jécyip ayuc huidibi je fariseo jäy ajcxy yaj'ixpijcy. Jadu'n nej miich ajcxy mnejhuüy co ni pín ca' agiyüy Tuc huit miid tüg pedaas jemy huit, con je' co je jemy huit niimujcp je', e chi nigí najtzczdžhuip je Tuc huit. ²² E nañ ni pín ca' jéb huaad pidägy jemy vino ma Tuc cochac. Je' co je vino jemybi ycídzamy je Tuc cochac, e chi y'ixyojctähuip je vino etz je cochac ñiti-goydähuip. Hue' janchtiy jéb ajcxy pidacy jemy vino ma jemy cochac.

Je discípulos ajcxy yajmújcixy je moc cojc sábado xii

²³ Tüg sábado xii Jesús miid ydiscípulos ajcxy ñaxíy ma tüg trigo cam. E huin'ítíy je ydiscípulos ajcxy ytigüy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tim, chi ajcxy nimay Jesús:

—Ix miich. ¿Na'amy co miich mdiscípulos túngixy huidibi judío ycötújcín cap'adujcpy sábado xii?

²⁵ Per Jesús ymínañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymigügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar mijtungmiid-pi anajty ma Dios ytijc, chi David ytigiy ma Dios ytijc, e caay je tzajcaagy huidibi ti anajty yoxy ma Dios yhuindu. Dios ycötújcín ymínañ co je teedy ajcxy ycaagy'ajtpy jada tzajcaagy, ca' jac'ooyñipín. Nañ jadu'n David moy je tzajcaagy je jäy huidib anajty ajcxy ymiid.

²⁷ Nañ jadu'n Jesús yjacmínañ:

—Ñich, je jäy huidibi tsoon tzajpjoty, nmíidich ané'mín, jaydeb nimäyich je jäy ajcxy ti jéb túngixy sábado xii. ²⁸ Com Dios ti ixmach je sábado xii, paady ycipi, ñich je jäy huidibi tsoon tzajpjoty, nmíidich ané'mín jaydeb nimayich jäy ajcxy co jéb tijaty tuñ sábado xii.

Je yëydijc huidibi anajty yci' tädzíp

3 Jesús ytigiy jadüg'oc ma je judío naymujctac. Jiiby anajty tüg yëydijc huidibi anajty ymiid tüg yci' tätz.

² Je fariseojäy jii by ma je naymujctac y'ijx'ijtpy anajty Jesús, co anajty nejhuñhua'ñ pen Jesús yajtzögamy je pa'mjäy sábado xii, jigix jëbi ajcxy xñhuip Jesús co ti ytundigoy mñid judíojäy ycötújcín. ³ Jesús nimay je jäy huídibi mñid tüg yci' títz:

—Pidñg, min ya ma ñich.

⁴ Huin'it Jesús y'amídooy je jäy ajcxy e nimay:

—¿Nej miich ajcxy mñinaangixy: Nej jëbi jada nduñich je oybi o je jibicpi sábado xii joty? ¿Jëbi nyajtzögich jäy o jëbi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy.

⁵ Huin'it Jesús huindicxpejty je jäy ajcxy mñid chip y'ahua'n, e mñid jotmay, je' co ooy ajcxy jotjuuñity, e chi nimay je yëdyjc:

—Xajtiu yi mgi'.

Chi je yëdyjc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip mñid je jadügpicy judío huindzindijc huídibi ymijnicxpejt je rey Herodes. Huin-ma'ñ ixtaayb anajty ajcxy nej jëb ocyaj'ögip Jesús.

Mayjäy ma tüg niiba'

⁷ Per Jesús chooñ mñid yi' ydiscípulos ajcxy, ñicxy ma mejypa'. E ooy mayjäy huídibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huídibi ajcxy tzomb jim Jerusalén, huídibi ajcxy tzomb jim Idumea ñaaxjot, huídibi ajcxy tzomb jim Jordán mijñiñ ninaxy ma xii ypidzimyb, huídibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñe-jhuñiyb anajty ajcxy je mijhuinma'ñ huídibi Jesús anajty ytumyb. ⁹ Com tzach mayjäy anajty ymiingixy, paady Jesús ni'ane'mdiy ma yi ydiscípulos ajcxy tüg barco ma jëb iñäy, ca'ty je mayjäy ooy y'adijñy y'agodñy. ¹⁰ Com Jesús ti anajty yajtzögy may jäy, paady yci'pí tüg'óciy je pa'mjäy nimujcy Jesús, adzip tzachnidonaangixy. ¹¹ Co je jäy ajcxy huídibi ca'oybi ymñid ijxpaty Jesús, chi ajcxy ñayhuiojtaci ma Jesús yhuinduu, e mic ycapxcooty, ymñinaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yi' je ymígügtijc huídibi yhuin'ixamy co ytunam mñid yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huídibi ymñid'idamy, e huídibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huídibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶ Jada je nimajmetzpi discípulos ajcxy yxii nidüg nidüg: Simón, je huídibi Jesús yximoy Pedro; Jacobo mñid y'uch Juan, yi Zebedeo y'ung y'anäg, je huídibi ajcxy Jesús yximoy Boanerges (je ayuc Boanerges jadu'n yhuimbizimy: "Enee ymang"). ¹⁸ E jacjadyii huídib

Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huídibi Alfeo ymang'ajtpy; Tadeo; e je jadügpí Simón, je cananista. ¹⁹ Nañ jadu'n Jesús huin'ijxy Judas Iscariote, je huídibi agojñix cñeyjc Jesús ma ymidzip.

Yajñibijccixy Jesús co mñidity mujcu' ymic'ajt

(Co jadu'n huin'ijxtaay je majcmetzpi discípulos ajcxy), Jesús ytigñiy ma tüggtijc mñid yi' ajcxy. ²⁰ Huin'ityi tzach mayjäy ñayyöymújcigixy ma je tijc ma Jesús y'ity, xti Jesús etz ymígügtijc ca' y'oyñy nej jëb ycaaygixy y'uuccixy. ²¹ Co Jesús y'amígügtijc jadu'n nejhuñy, chi ajcxy nimiiñ Jesús yajñicxaangixy anajty mach, com hue' anajty tijcixy co Jesús ylocñb.

²² Nijjityy escribas ajcxy, je huindzindijc huídibi nijjaydudp anajty Dios ñecy, miin ma Jesús co choñ ajcxy Jesusalén, ymñinaangixy:

—Jada Jesús ymñid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ mñid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmñidmiydacy ajcxy tüg jihuimbit ayuc. Chi Jesús ymi-nañ:

—¿Nej tiy'ajt jada nej miich ajcxy mñina'ñ co Satanás jëb cñ'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mñina'ñ. ²⁴ Pen tügpcy tungmñidpi xiyipy ñaybijc-huá'cxigixy, etz ñaymidziptzóonigixy xiyipy ac jëyi. Pues cixip yi' ajcxy y'ané'mñ. ²⁵ Nañ jadu'n pen tügpcy tüg juogy tüg migüg xiyipy ñaybijc-huá'cxigixy, ca' ajcxy y'idaangixy tüg mucus. ²⁶ Nañ jadu'n pen Satanás xiyipy ti ñaybijc-huäcxyyii, e cñ'm xiyipy ti nayñibidñgyii, ca' xiyipy yi' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ájtity nej miich ajcxy ymñinañ.) ²⁷ Ca' ni pin jëb huaad ytigñhuip ma tüg micpi jäy ytijc etz meedzipty tijaty ymñid, pen ca' jayijp cñoch tecyoch je jäy micpi. Pen ti cñoch tecyoch xiyipy je micjäy, huin'it janchtiy mñimadägipy, e pñijcpi tijaty ymñid.

²⁸ Janch ñich miich ajcxy nimäy co Dios jëb huin-meecxip tüg'óciy pocy huídibi jäy ytungixp etz tüg'óciy jibicpi huídibi jäy ycapxp. ²⁹ Jëyi janchtiy co pinjaty capxtigooyb mñid je Espíritu Santo, je Dios yjihui'ñ ymic'ajt, ca' Dios huinmecxi nimina. Huinixii y'ida'ñ pocymñid.

³⁰ Mñid co jäy ajcxy chach ymñinaangixy co Jesús anajty mñidity ca'oybi, paady Jesús jadu'n ymñinañ.

Jesús ytaj etz y'uch migüexy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty yti-naaygixy tiba'y, e chi ajcxy capxñiguejxy Jesús. ³² Je mayjäy huídibi anajty ajcxy iñaaayb juhuiditi ma Jesús, ymñinañ ajcxy:

—Miich mdaj etz m'uch cheeby ajcxy tiba'y miich ix-taayb.

³³ Chi Jesús ymñinañ:

—¿Pínjāy miich ajcxy mdijy co ñich ndaj'adyii etz ñich n'uch'adyii?

³⁴ Huin'it Jesús huindixpejty je jāy ajcxy huidibi anajty iñaayb ajcxy jūhuidity ma je', e ymīnañ:

—Tūg'óciy jada jāy ya jadu'n ajcxy nipaady nej ñich ndaj etz ñich n'uch. ³⁵ Huenytipmīnity huidibi ajcxy cuydumb yí Dios chójcin, yí' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

Je niipi y'ijxpejt

4 Jadūg'oc Jesús ytiñiy yaj'ixpijcpī ma mejypa'. E ooy mayjāy ymujpejty ma anajty Jesús yajpaady. Miid co ooy anajty chachmayjāyity, paady Jesús ytiñiy ma tūg barco jahuengi mejyjoty. Jesús iñaayb anajty barcojoty, e je mayjāy iñaayb anajty ajcxy ma mejypa'. ² Huin'it Jesús yaj'ixpijcy je mayjāy miid canaag jihuimbit ayuc. Co yaj'ixpijcy, chi ymīnañ:

³ —Amīdoo'ijtcix miich ajcxy ñich jada n'ayuc. Tūg jāy chooñ niipi. ⁴ Co je niipi yhuijpy anajty trigo tīm, chi je trigo tīm nijējity oy ycāy tīm tūguj. Chi je joon ajcxy ymiñ jicxy je trigo tīm huidibi tūguj ti ycāy. ⁵ E nijējity trigo tīm oycāy ma tzaanīcx, ma nihueeñ oyñaax yajpaady. E je trigo tīm ca' tzip mujx je', je'co ca'anajty ooy naax mápxity. E co je xī ypidzimy, chi no'cy je trigo mang, com ca' anajty ytictz miidity naaxjoty, chi ytīch. ⁷ E nijējity trigo tīm oycāy ma apyjot. Co jada trigo tīm ymujxy, chi y'ujtz'ógtāy je trigo mang, e ca' ytīm'ajty. ⁸ Per jacjadyii trigo tīm oycāy ma oyñaax, chi ymujxy, e ytīm'ajt may'amy: tūg pi'c pajc iipxmajc oyco'ity, jadūg pi'c pajc tugī'px oyco'ity, jadūg pi'c pajc mīgo'px oyco'ity.

⁹ Co Jesús je miydāgī yajmay, chi ymīnañ:

—Pínjaty miid ytāzacc, pín midohuamy, huen mido'mbicy jada ayuc.

Ti yí' ñigapxyp yí' ijxpejt

¹⁰ Co je mayjāy ñicxni, e Jesús yhui'my naydūg, chi je nimajmetzpi ydiscipulos ajcxy etz jacjadyii huidib mijnicxpejt Jesús ñimijhua'cy, e amīdooy nej yhuimbidzimy je jihuimbit ayuc. ¹¹ E Jesús ymīnañ:

—Miich ajcxy jaydēb mnejhuñhuipy huidibi Dios ñigapxyp ñimiydacpy coyūch'amy ma y'ané'min ycotūjcin. Jacjadyii jāy ajcxy jihuimbit'amy nyajmiidmiydaacyich. ¹² Jadu'n jihuimbit'amy nyaj'ixpijcpīyich je mayjāy, jaydēb co pínjaty ijp, ca' ajcxy ixīpy; etz pínjaty midoob, ca' ajcxy mido'mbigīpy. E jadu'n ca' ajcxy jothuimbidip, e nañ ni ycajameecīpy ajcxy ypocy.

Jesús najtzcapxī nej yhuimbidzimy je niipi y'ijxpejt

¹³ Chi Jesús yjacmīnañ:

—¿Nej ca' miich ajcxy mhuiñjihuñy jada jihuimbit ayuc? Pen ca' miich ajcxy mhuiñjihuñy jada jihuimbit ayuc, ca' miich ajcxy mhuiñjihuñy yí' jacjadyii jihuimbit ayuc. ¹⁴ Je huidibi capxhuācxp Dios y'ayuc, jadu'n yí' nipaady nej je huidibi niip trigo tīm. ¹⁵ Je jāy ajcxy huidibi amīdoo'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n

ajcxy nipaady nej trigo tīm huidibi cāb tūguj, e je joon ajcxy mic'amy piimujctay. ¹⁶ Je jāy ajcxy huidibi amīdoo'ijtp Dios y'ayuc janch jotcuj, e miñjccīy tzojccīx, chi ajcxy ixmajtzi Dios y'ayuc co agapxīyb paady, e co tzaachypī minaxy yajnaxy miid Dios y'ayuc ycipī. Jadu'n ajcxy nipaady nej je trigo tīm huidibi ti ycāy ma tzaanīcx. ¹⁸ Je jāy ajcxy huidibi amīdoo'ijtp Dios y'ayuc, e co ñicxni, chi jāydgoooyñi Dios y'ayuc miid jotcujc'ajtīn tzaaayin, etz comeeñ'ajtīn etz adzójcin. Jadu'n ajcxy nipaady nej trigo tīm huidibi ti ycāy ujtzyoty, e ca' ytīm'aty miid co oy y'ujtz'ogy. ²⁰ Je jāy ajcxy huidibi amīdoo'ijtp etz cōbijcp Dios y'ayuc amumdūgjet etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tīm huidibi ti cāb ma oyñaax etz ytīm'aty may'amy: tūg pi'cpajc iipxmajc, etz jadūg pi'cpajc tugī'px, etz jadūg pi'cpajc mīgo'px.

Je lámpara ñi'ijxpejt

²¹ Chi Jesús yjacmīnañ:

—Co jāy ajcxy jīndicxi'ñ nōctzoy, chi canan ajcxy cōjuyjy miid tu'tz, ni ca' ajcxy pidacy cijxpa'tci'py, hue' janchtiy pidaaccīy ma jīndicxpejt jaydēb mij ytīcxy.

²² E nañ ni ca' ni pín ni ti jēb ameech tunīpy, e nicxy ycajajnejhuñy. E ca' ni pín ni ti ayūch tunīpy, e nicxy ycajajnejhuñy. ²³ Pínjaty ytāzacc ymīd, pín midoohuamb, huen mido'mbījccīy ñich n'ayuc.

²⁴ Nañ jadu'n Jesús ymīnañ:

—Cuendtūngīx jada ayuc huidibi miich ajcxy yam mmīdooyb. Yí quipxi'ñ huidibi ajcxy myajquipxīyb, nañ jadu'n yí' miid Dios ajcxy xyquipxyhuimbidipy, e ixti jacajmōhuip ajcxy huidijaty midoob ñich n'ayuc. ²⁵ Pínjaty ymīd, yajmōhuip nīgī, pínjaty hueen miid, yajpigīpy nīgī (oy ixīpy hueen jadīm miidity).

Je tīm huidibi yeecp ñi'ijxpejt

²⁶ Nañ jadu'n Jesús ymīnañ:

—Yí Dios y'ané'min jadu'n yí' nej co tūg jāy nicxy ñīpy ma ycamjot. ²⁷ Chi jada' co ñiipstay ñicxni ma ytīc e ymī'o'cni ymāybīdīgnī com jabom, e jadu'n yajnaxy canaag xī tzuu. E je moc pajc mujxp je' etz yomb. Per je cogam ni ca' nejhuñy nej je moc yoñ, ma mic'ajt paady. ²⁸ Je' co yí naax cī'm mic'ajt miidity jaydēb yajyoñ je moc. Jayijp ypidzimy je moc ung, jac'axam ypidzimy yí' moc pijy, e chi jada' ytīm'ajtīn. ²⁹ Co je moc ymajaani, chi je jāy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús ymīnañ:

—¿Nej m'oc'a'ixīygyxy yí' Dios y'ané'min? ¿Ti miid n'ocyajquipyxīhuībich? ³¹ Jadu'n Dios y'ané'min nipaady nej mostaza pajc huidibi tūg jāy nicxy niipy ma ycam. Yí mostaza pajc jacnīgī ymūtzyty ca'ydi jacjadyii ujtzpajc huidibi yajpatp ya naaxhuiñ. ³² E co yajniipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tūg'óciy yci' y'aacx, ixti joon ajcxy pe'mb ma je yci'y'aacx y'anicīy.

Nej anajty Jesús yecy je tiy'ajt mïd je ijxpejt ycixpi

³³ Jadu'n anajty Jesús yaj'ixpicy je mayjäy ajcxy Dios ytiy'ajt mïd canaag jihuimbit ayuc, ixti mibaad ajcxy jëb huinjihuïy. ³⁴ Ac jihuimbit ayuc Jesús yajnimay je mayjäy. Per mïd yi'ydiscipulos Jesús ycapxtëcxtaayb anajty je jihuimbit ayuc.

Jesús capxtëcx nej huimbidzimy je ijxpejt

³⁵ Je huin'it xii co ycoodziy, chi Jesús nimay yi ydiscipulos ajcxy:

—Tzoc ajt jámim jim'amy ahuin ma yi jadügpï mejy-pa'.

³⁶ Huin'it Jesús ydiscipulos ajcxy ixmajtztay je mayjäy, e mïd tzoon Jesús barcojoty. Nañ jadu'n jacjadyii barco ajcxy choñ quipxy mïd Jesús ydiscipulos ajcxy ybarco.

³⁷ Je huin'it coodz tüg poj miiñ janch mic. E je mejy nigoo anajty y'ocpidëgni. Janch tigiiyb anajty nii barcojoty, jagoo jagoo yca'ujtztay je barco mïd nii. ³⁸ Jesús maab anajty ma je barco ijx ma tüg mabejt. Chi yajmäybidëgi, e nimay ajcxy:

—Huindzin, ¿nej ca'mduñcuend co ñich ajt yam nguinaanim?

³⁹ Huin'it Jesús ymäybidëgy, e jijpcogapxyi je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ymïnañ:

—¿Na'amy co mdzachtzigiiygixy ajcxy? ¿Nej ca' mmibëjccixy co nmïdich Dios ymic'ajt?

⁴¹ Jesús ydiscipulos ajcxy ooy chigiïy, e ñayñimaayi ajcxy miñ xyipy:

—¿Pin jäy jada' jada Jesús? Ooy chachmijhuinma'ñ co yi poj etz je mejy ycapxymidoyii.

Je Gadarajäy huidibi anajty ca'oybi mïd

5 Chi Jesús mïd ydiscipulos ajcxy oyja'tcixy ma je mejy-pa' ma je Gadara jäy ñaaxjot. ² Tim mic'amy co Jesús ybarcobidzimy, chi nimiiñ tüg jäy huidibi ca'oybi mïd anajty. Hue' anajty choon ma öcpi jut. ³ Je yëydijc, ca'oybimïdipi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cëxoch tecyoch jada je ca'oybimïdipi, e ni ca' ajcxy mïmadacy mïd cadena. ⁴ Canaag'oc ajcxy jacëxojch jate-cyxojch mïd cadena, e ypojtaayb anajty je cadena. Ni pin camihuinma'ñybaady nej jëb ocmimadaaccixy je ca'oybimïdipi. ⁵ Je ca'oybimïdipi xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayajtzaachëyii anajty mïd tzaa.

⁶ Jiguëgy anajty je ca'oybimïdipi ymiiñ, co ijxpaty Jesús, chi poyëgy ninicxy Jesús, e ycojtinay'ahuïy ma Jesús yhuinduu. ⁷ Je ca'oybimïdipi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidzipt-zooñich? May'ajt nbijctzooybich ma Dios co ca' ñich jëb huaad xychaachytuñich. ⁸ Je ca'oybi jadu'n ymïnañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ñich nxii hue' je' "ni may", com ni may ñich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar.

¹¹ Huingon anajty je cop ma anajty may idzim yjicxcixy.

¹² Chi je ca'oybi ajcxy may'ajt pijctzoy, e nimay ajcxy:

—Najtzquexëyig ma yi may idzim, jigix jëbi n'adigëyich njottigëyich yi may idzim.

¹³ Chi Jesús jadu'n a'ixiy co jëbi adigëyigixy jotigëyigixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjydaay, e ycögänaxtaay ajcxy ma tüg tzajijp, e oy ycädaaygixy nijjoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiïy, e nicxtay ajcxy poyëgy ma ytijc. E oy nimiydaaccixy cajpjoty etz majaty tundac nej anajty ajcxy y'idzim y'öc-taaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymïd. Ijxy ajcxy co iñay huit mïd etz huijycujc, ti anajty y'oyëy. E huin'it ooy ajcxy je mayjäy ñay'adzigiïy.

¹⁶ Je jäy ajcxy huidibi anajty huindicxp co anajty je ca'oybimïdipi ti y'oyëy, etz ijxcixy nej ti ytunyii ti yjadyii mïd je may idzim, chi yajmiydactay je mayca-jpjäy jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzoon ma ajcxy je ñaaxjot.

¹⁸ Co Jesús ytigëy jadüg'oc ma je barco, chi je yëydijc huidibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixëy möhuip co huen mïd'idyii Jesús. ¹⁹ Per Jesús ca' a'ixëy co ymïd'idyii, chi nimay:

—Huimbit ma mdijc etz mjugymigüg, e yajmïdmïy-däg jada mijpi tung mijpi huinma'ñ huidibi je Huindzin Dios ti tuñ mïd miich. Mïdmïydägipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuïy huinmay.

Je Jairo ñiix etz je töxyjäy huidibi Jesús yhuit nïdoni

²¹ Co Jesús huimbijty barcojoty ma je mejy-pa' ma anajty ti choon, chi mayjäy ymiiñ ma Jesús yajpaady, chi Jesús yhuäcxijpy ma je mejy-pa'. ²² Huin'it Jesús ñija'ti tüg mijtungmïdipi ma yi judíojäy ajcxy ñaymujctac. Je yëydijc hue' anajty xijjty Jairo. Co Jairo ijxpaty Jesús, chi ñayhuïjotac ma Jesús yhuinduu. ²³ Jairo may'ajt pijctzoy, ymïnañ:

—Huindzin, ögaanip ñich nniix. Tun may'ajt nicxy ma ñich ndijc, e mgëñixájip ma ñich nniix, jigix jëbi myajtzögip, e yjactzinähuip.

²⁴ E Jesús nicxp anajty mïd Jairo, e mayjäy panicxy anajty Jesús. E je mayjäy ooy anajty tzach'adijty

tzach'agodi'y Jesús. ²⁵ E ma je mayjäy ymiiñ anajty tüg töxyjäy pa'm miid, jécyiñ anajty ymijtacni. Majmetz jimijt yxi ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ miid may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigä anajty ypa'm mijhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiiñ etz nimijhua'gy jiih-ci'py'amy, chi nidooni Jesús yhuitpa'. ²⁸ Jada töxyjäy nayñimaayi jotjoty huinma'ñyoty: "Co nnidónibich Jesús yhuitpa', miid tim y'i'ndzögibich." ²⁹ Co je töxyjäy nidoñ Jesús yhuitpa', tim huin'ity mic'amy yhuäcxijp je ni'py. Huin'it je töxyjäy jihuiy co anajty ti chögy.

³⁰ E Jesús jihuiy co anajty ti yajtzögy tüg jäy miid ymic'ajt, paady ni'ixhuimbijty je mayjäy huidibi anajty paminiip, y'amidooy ajcxy:

—¿Pin ich nhuit ti xyñidoni?

³¹ Huin'it Jesús ñimaayi ajcxy ydiscipulos:

—Miich m'ixxy co yi mayjäy xychach'adijy xychach'agodi'y, e miich mina'ñ: "¿Pin ti xyñidónich?"

³² Per Jesús huindixypejty je mayjäy jühuidity ma y'i' oc'ixa'ñ ocnejuhühua'ñ pin anajty ti ñidonyii. ³³ Huin'it je töxyjäy, com ñejhuhüy anajty jadu'n nej Jesús ti yajtzögyii, paady nimijhua'cy Jesús janch tziyuuyb miid tzig'iñ ñayhujotjací ma y'i' yhuinduu. ³⁴ Jesús yminañ:

—Töxyjäy huidibi ooy ndzóyich, ti mdzögy miid co ti xymibícyich. Nicx agujc jotcujc, ti mba'm ñaxy.

³⁵ Capxp miydacp anajty Jesús miid je töxyjäy co nijéjity jäy ñimiini, choñ ma je judío jäy ñaymujctac mijtungmiidpi ytijc, e nimay je töxy'anäg yteedy:

—Yi mniix ti je y'ögy. Ca' huaad mjac'amayy nig yi Huindzin Jesús.

³⁶ Per Jesús ca' tuñcuend jadu'n nej ajcxy yjamina'ñ, chi nimay je naymujctac huindzin:

—Ca' mdzigy, mibic nigoda'ajty.

³⁷ E ni ca' jac'a'ixiy nicxy yjacmiidnicxyii jacpinjaty. Jéda'ajty miidnicxy je Pedro, Jacobo etz Juan, je Jacobo y'uch. ³⁸ E co Jesús ytijctigiy ma yi naymujctac huindzin ytijc, chi ijxy jadu'n nej jäy jiiby chachne'mgixy chachjiygixy chachyaaxcixy. ³⁹ Co Jesús tijctigiy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáax-cixni? Yi pi'c töxy'anäg ca' y'i' ti y'ögy, maab y'i'.

⁴⁰ Per nigoo ajcxy Jesús nixiicy co jadu'n ymina'ñ. Huin'it Jesús yajpidzimday tüg'ócy pinjaty anajty jiiby tigoty, e miid tijc tigiy jéda'ajty je ungedeedy etz ungdaj, e nañ je tugigpi ydiscipulos huidibi anajty ti miid miñ. Chi ajcxy ytigiy jiiby ma anajty je töxy'anäg yajpaady.

⁴¹ Chi Jesús májtzij y'i' töxy'anäg yci', e chi nimay:

—Talita, cumni —jadayaab ayuc hue' y'i' yhuimbizimy: Töxy'anäg, ich miich yam nimaayb, pidäg.

⁴² Huin'ity je töxy'anäg, je huidibi anajty majmetz yjimijt, ypidägy e ytüyöchoñ. E tüg'ócy yi mayjäy ooy ajcxy jihuiy huinmay. ⁴³ Huin'it Jesús najtzcapxiy co ca' huaad pin yajnimay jadu'n nej je töxy'anäg ti chögy,

nañ jadu'n ni'ane'mdiy co huen ajcxy yajcay je pi'c töxy'anäg.

Jesús yajpaady jim Nazaret

6 Huin'it Jesús choñ ma je jimbi it lugar, e yhuimbijty ma yci'mgajp. E miid ñicxy y'i' ydiscipulos ajcxy. ² Sábado xijoty Jesús ytigiy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidooy'itp anajty ooy jihuiy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpigiy jadayaab ix-píjcin? ¿Ma ti paady jada huivy'ajt cujc'ajt huidibi ymiid? ¿Ma jada' ti paady y'i' mic'ajt huidibi miid mijhuima'ñ tumyb? ³ Je' jada je tzejtzpi, y'i' María y'ung. Yi' y'uch ymigüg, y'i' Jacobo, y'i' José, y'i' Judas, etz y'i' Simón. Nañ jadu'n y'i' y'uch töxyjäybi cha ajcxy chinäy quipxy miid ich ajt.

E je mayjäy ca'ajcxy anajty ixa'ñ cöbiga'ñ Jesús.

⁴ Huin'it Jesús nimay je mayjäy ajcxy:

—Huenma'amyity tüg'ócy je mayjäy ooy yajmij'aty je jäy ajcxy huidibi najtzcapxiyb Dios y'ayuc. Jéyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ ytim jadu'n y'i' y'amigügtijc etz ymijñ ymidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy miid co ca' ajcxy mijpidägyii. Jéyi ycipidacy ma nijéjity pa'mjäy etz yajtzöocy. ⁶ Jesús ooy jihuiy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús choñ jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscipulos ayuccapxhuäcxp

⁷ Huin'it Jesús mijhuoy je majmetz ydiscipulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jéb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscipulos ajcxy co ca' huaad ti miníxcixy tü'amgixpi, jéyi jéb miníxcixy tüg tajc nidüg nidügti. Ca' huaad miníxcixy ymoral, e ca' huaad miníxcixy ycaagy, e ca' huaad miníxcixy ymeeñ. ⁹ Jéyi je yci'g etz je yhuit huidibi anajty ajcxy ymiid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhuñmipy ixti coon mdzóonip ma yijimbi cajp. ¹¹ Pen mdigiygixp ma tüg cajp, e je jäy ajcxy ca' ajcxy xycöbi-ga'ñ, ca' ajcxy amido'ida'ñ miich m'ayuc, mbidzimix ma je cajp, chi mhuinhuójpcixipy mgig. Jada je' je tiy'ajt co ca' ajcxy mjotcújcity. Janch ich miich ajcxy nimäy co Dios anajty ytiyduñ jada naaxhuiñ jäy, jacni'gi tzaachypí paada'ñ y'i' jäy ajcxy huidibi ajcxy anajty ca' xycöbjcixy, ca'ydí je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbijtcixy, huen ixmajt-taaygixy y'i' pocytuni. ¹³ Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzöocixy anajty.

Co Juan je Bautista y'ögy

¹⁴ Huin'it je rey Herodes nejhuüy co Jesús canaag mijhuinma'n tzychytuñ anajty, com tüg'óciy je mayjäy anajty nimiyaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt miidity jaydëb mijhuinma'n tuñ. ¹⁵ Nijëjity jäy yminaangixy:

—Jesús yí' je' Elías.

E naagity jäy yminángixy:

—Yí' je' tüg Dios tiy'ajtmidpi huidibi quipxyiiby miid je Dios ytiy'ajtmidpi huidibi tzinay jecy'ajty.

¹⁶ Co Herodes nejhuüy nej je mayjäy nimiyaaccixy Jesús, chi yminañ:

—Janch jada co Juan ti yjugypicy, je huidibi nni'ane'mdiyich co huen yajmínagyii ycohuajc.

¹⁷ Miid Herodías, Herodes ytöxytjic ycixpi, Herodes n'ane'mdiy co Juan yajmach, e pidägyii pujxtigoty. Jada Herodías jayjip ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yí' m'ajch Felipe ytöxytjic miich m'iddzinaayi.

¹⁹ Paady ycixpi Herodías mijotma'ty Juan, e ytimi yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuüyb co tudägy jäy huädz jäy anajty je Juan, e tziigyb anajty miid Juan. Paady ycixpi anajty je rey Herodes Juan miidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcuyc anajty amido'ijty.

²¹ Huin'it Herodías ypat huinma'n nej jëb yaj'ögy Juan je huin'it xi co je rey Herodes anajty ñayñixiuduñy. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yí' mic'amy jäydijc huidibi ajcxy tzinaayb naag naag cajp jim Galilea. ²² Xiuduñyoty anajty co Herodías ñix oy y'ech ma je rey anajty yajpaady miid je may jäy huidibi anajty yajcaayb yaj'uucy. E jadu'n nej je Herodías ñix y'eich, ooy je rey jadu'n jäygidacy, etz tüg'óciy je jäy je huidijaty anajty miid ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojcyp, ñich miich nmöhuipy.

²³ Je rey nigí capxcödujcy janch cixyot huinijot co möhua'n ti ytimi ypijctzooyb, ixti jëb jamöy cujhuäcxy yí' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuípich?

Chi je' ytaj y'adzooy:

—Pijctzoohui yí' Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcpich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigüy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuaníy je

töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcädigiy je töxy'anäg, e je töxy'anäg yajcädigiy ytaj.

²⁹ Co je jäy ajcxy huidibi anajty mijnicxpejtp Juan ñejhuüy ajcxy co je rey ti yaj'ögy Juan, chi ajcxy y'oy e yajpidíci Juan ñinícx, e yajnaaxtigüy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huidibi anajty Jesús ti quexy y'ayuccapxhuäcxi ma canaag cajp, chi ajcxy yajmídmíydacy Jesús tüg'óciy tijaty anajty ti tüngixy, etz tüg'óciy ayuc huidijaty ti yaj'ixpíjccixy.

³¹ Huin'it Jesús nimay je nimajmetzpi huidibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xi metz xi.

Paady ycixpi Jesús jadu'n yminañ, com tzach mayjäy ja'ttíib tzondíib ma Jesús yajpaady, e ca' ajcxy tiempo anajty miidity mina ycaaygixipy y'úuccixipy miid je mayjäy ycixpi. ³² E Jesús miid ydiscípulos ajcxy ñicxy barcojoty ma ca' pin. Ac jëyí ajcxy nicxy ca' jac pin jäy miid nicxy. ³³ E mayjäy ijxy co Jesús ajcxy choñ, e nañ ijxcaypy pin anajty tzoñ barcojoty. Paady mayjäy choñ ma canaag cajp tegyi'm, ñíxcixy poyigy anajty ma Jesús ñicxa'n. Mayjäy oy yja'ty jayjip ca'ydi Jesús ajcxy, e jim ajcxy yöymujctay. ³⁴ Co Jesús ybarcopídzimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huidibi ca' miidity ycuend'ajtpi. Chi Jesús ytigiy yaj'ixpijcp, canaag nax ixpíjcin anajty yecy. ³⁵ Co anajty ti chu'iyñi, chi Jesús ydiscípulos ajcxy ñimaayi:

—Ca' ni pin chinäy ma jadyaabi it lugar, e ti chu'iyñi. Capxycíx miid jada mayjäy ajcxy, jaydëb ñíxcixyñi ma yí' cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yí' ydiscípulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad ñich ajcxy nicxy njuy mejtz migo'px denario tzajcaagy, jigix ycaipy y'ügipy jada mayjäy?

³⁸ Chi Jesús y'amidooy ydiscípulos ajcxy:

—¿Naag tzajcaagy miich ajcxy miidity ya? Nicx íjxcix.

Co ajcxy tiy'ajt paty, chi ajcxy Jesús nimay:

—Ñich ajcxy nmíid migoox tzajcaagy etz metz acx.

³⁹ Chi Jesús ni'ane'mdiy co je mayjäy huen ixtaaccixy naaxcxy tügpijaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguípxmajjatypi.

⁴¹ Chi Jesús conígy je migooxpi tzajcaagy etz je metzpi acx, e ypa't'ijxy tzajpcíxy, e yajnaxy Dios cojuyip ma Dios miid je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcädigiy je' ydiscípulos ajcxy, jaydëb ajcxy yajhuäcxi ma je mayjäy. Nañ jadu'n Jesús yajcädigiy je metzpi acx je' ydiscípulos ajcxy, jaydëb yajhuäcxi ma je mayjäy. ⁴² Nidüg'óciy

je mayjäy ajcxy yca y'uucy cüxyi. ⁴³ Co je mayjäy yca yday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yëydijctijc huidibi cay uuc.

Jesús yöy niñhuingíxy

⁴⁵ Huin'it Jesús ane'my je' ydiscípulos ajcxy co huen barcotigíygyxy mic'amy. Huen nicxícicxy jayijp jim Bet-saida jim mejy ñinajxy. Co yi discípulos ajcxy ybarcotigiyday, chi Jesús ycapxycíjxy mïd je mayjäy. ⁴⁶ Co anajty Jesús ti ycapxycíxy mïd je mayjäy, chi ñicxy ma tüg cögop Dios mibijctzoob. ⁴⁷ Co ycoodziyñi je discípulos ajcxy anajty yajpaady mejyoty ma je barco. Jesús naydüg anajty yajpaady mejypa'. ⁴⁸ Jesús y'ijx co je ydiscípulos ajcxy anajty ti y'anucxíygyxy mïd mejycabi, je' co je barco anajty chachjijpcobojty. E co oy moñi, chi Jesús ymijhuägy ma je barco. Jesús yöp anajty mejyhuingíxy, e hue' anajty jüyöñaxamy je discípulos ajcxy. ⁴⁹ Co ajcxy ijxpaty Jesús yöp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañíygyxy. ⁵⁰ Com tüg'ócxy yi discípulos ajcxy anajty ti ijxcxy Jesús, e ooy ajcxy chigíy, paady mic'amy Jesús migapxy je' ydiscípulos ajcxy, e nimay:

—Jotmic naybidáacigíxy, ca' mdzigíygyxy. Ich yi'.

⁵¹ Huin'it Jesús ybarcotigíy, e mic'amy je poj yxeemy, e je discípulos ajcxy ooy jihuix huinmay. ⁵² Ooy ajcxy jihuiygyxy huinmaaygyxy, com ca' ajcxy huinjihuixgyxy anajty nej Jesús je mayjäy yajcay mïd je migooxpi tzajcaagy. Com je'ni anajty ajcxy ooy yjotjuuñity ycojuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim ijxajpy Jesús. ⁵⁵ Poygy je jäy ajcxy choon, e yajyöñajxtay je cajp ajcxy huinduy agonbi, capxhuäcxicy co Jesús anajty ti yjädy jim. E jäy ajcxy yajmiindzondacy may pa'mjäy cij'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccxy pa'mjäy majaty majaty yi mij tūba', e cohuaníygyxy Jesús co huen nidoñiyi yi yhuitpa', e tüg'ócxy huidijaty anajty ajcxy nidomb, najxp ajcxy anajty je' ypa'm.

Huidi jäy yaj'ahuimbijty pocyjayty

7 Huin'it ymiiñ ma Jesús nijëjty fariseojäy ajcxy, je huindzindijc huidibi tzachpadumb judío ycostumbre. Nañ jadu'n mïd miiñ nijëjty escribas, je huindzindijc huidibi ajcxy nijayduty anajty Dios ñicy. Hue' je fariseos etz escribas ajcxy anajty ti choongíxy Jerusalén. ² Je fariseos etz escribas ajcxy ijxy co Jesús ydiscípulos ajcxy ytiñy caaybi uucpi jaygëbuju, ca' anajty cuydúngíxy judíojäy ycostumbre. ³ (Com yi fariseojäy etz jacjadyii judíojäy ajcxy cuydumby anajty ajcxy

ñi'ap costumbre, e ixpocypújcxy jayijp ma ca'ni ytiñygyxy caaybi uucpi. Com yi judíojäy ajcxy co ajcxy ñicxy mayjäyoty etz yhuimbijctxy jadüg'oc ma ytiñy, ca' ajcxy yca yixti cooni jayijp ajcxy yciñbújcxy canaag'oc. ⁴ Yi judíojäy ymïd canaagnax costumbre huidibi cuydúngíxyp jadu'n nej ajcxy yajhuaatzcxy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngíxy judíojäy ñi'ap costumbre? ¿Na'amy co ajcxy ycaaygyxy y'úccxy, e ca' jayijp ixpújcxy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmïdipi Isaías jayhui'my jecy'ajty mïd miich ajcxy yciñpi. Miich ajcxy huidibi naybidaacip jadu'n nej jihuiy ajcxy tudägyjäy, e ca' yjánchty. Com jadu'n Isaías jaybejty co Dios jadu'n yminañ:

Jada jäy jadu'n ajcxy ycapxcxy ymiydaaccxy jadu'n nej jihuiy xyajmij'atyich. Per ca' ajcxy xyajmij'atyich cixyjot huinjot.

⁷ Naadigí co ajcxy xyhuin'ñigíxich xyhuinyáaxcixich. Ñayaj'ixpéjcgíxy ayuc tiy'ajt huidibi jäy ajcxy ti cojy ti macxy.

⁸ Chi Jesús yminañ:

—Miich ajcxy ti m'ixmájtzcxy Dios ycötújcín, e myajmij'ajtcxy ayuc huinma'ñ huidibi jäy ci'm ti cojy ti macxy. ⁹ Miich ajcxy ca' mgüendtúngíxy Dios ycötújcín Dios ytiy'ajt jigix jëbi cuydúngíxy mgi'm costumbre.

¹⁰ Com Moisés je cötújcín ypidac jecy'ajty: "Yajmij'at mdaj mdeedy", e "Pinjaty jibic nigapx ni'ojyib ytaj yteedy, copicy y'ögip." ¹¹ E miich ajcxy mīnañ co tüg jäy nimähuip ytaj yteedy co ca' pubeda'ñ ajcxy jadu'n nej padyii, mïd co tüg'ócxy tijaty yi' ymïd huidibi ytaj yteedy jë'adánip, hue' ti ahuanxy nigoo ma Dios. ¹² E pen jadu'n mīnañ, chi miich ajcxy mīnaangíxy co ca' copícyity mbubéjtcixipy mdaj mdeedy. ¹³ Miich ajcxy midundigooyb Dios ycötújcín mïd mgostumbre huidibi myajnajxyp myajtiñy, etz jacjadyii jibic-huinma'ñ myaj'ixpéjccxy.

¹⁴ Jadüg'oc Jesús mijhuoy yi mayjäy ajcxy, e chi nimay:

—Mido'mbéjccxy miich ajcxy ñich n'ayuc, e mhuiñihuip ajcxy. ¹⁵ Ca' yi' yajpocycähuixy hidibi jäy ajcxy ypidacy ma yhuin y'ahuac. Yi' janchty hidibi pidzim ma jäy ajcxy yjot yhuinma'ñ, yi' yi' yajpocycähuixy. ¹⁶ Miich ajcxy mmïd mdätzac, mido'mbéjccxy ñich n'ayuc.

¹⁷ Co Jesús ixmajch je mayjäy, e ytiñygyxy, chi je discípulos ajcxy yaj'amidoohi nej yhuimbizimy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuiñihuixy jada ayuc? ¿Nej ca' mhuiñihuixygyxy co hidibi tiñy ma yi jäy y'ahuac (yi caayin uucín), ca' yi' yajpocycäy yi jäy?

¹⁹ Yi caayin uucín hue' yi jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n yminañ, chi nejhuixy co Dios ca' capx'aducy ni ti caayin ni ti uucín. ²⁰ E Jesús yjacmīnañ:

—Dios yajpocycāhuip jāy ajcxy mīd huídibí pidzimb ma ajcxy yhuinma'ñ. ²¹ Ma yí jāy ajcxy yhuinma'ñ jiiiby chooñ jibic-huinma'ñ; jiiiby chooñ migapxtigoyi tōxyjāy yhuinma'ñ; jiiiby chooñ je tundigooyi yēdyjic mīd tōxyjāy etz tōxyjāy mīd yēdyjic huinma'ñ; jiiiby chooñ jāyyaj'ōgi huinma'ñ; jiiiby chooñ meedzi huinma'ñ; jiiiby chooñ mūgi huídidi huinma'ñ; jiiiby chooñ jibic-huinma'ñ; jiiiby chooñ je huin'ñi huinma'ñ; jiiiby choñ nayca'oy'ixi huinma'ñ; jiiiby chooñ je piitzcapxi huinma'ñ; jiiiby chooñ je amij agix huinma'ñ; jiiiby chooñ je tzuu huinma'ñ je loci huinma'ñ. ²³ Yi jadu'mbi jibicpi jiiiby chooñ ma jāy ajcxy yjot yhuinma'ñ, paady jibicpi jāy ajcxy túngixy, e ypocycāy ajcxy ma Dios.

Tüg tōxyjāy huídi ca' yjudiojāyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tūg jāy ytijc, e ca' anajty tzocy co je mayjāy ñejhuñhuñyb ma y'ity. Per ca' jajty nicx yhuingoyūch. ²⁵ Mic'amy tūg tōxyjāy ñejhuñy ma Jesús anajty yajpaady. Hue' je tōxyjāy ypi'cnix ymīd anajty ca'oybi. Je tōxyjāy ymiñ ma Jesús, e ycojxtinay'ahuiy ma yí' yhuinduu. ²⁶ Je tōxyjāy hue' anajty ycojāpity Sirofenicia (e hue' anajty griegojāy). Yi tōxyjāy may'ajt pijctzoy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je tōxyjāy nimay:

—Ooy ycopicyty co nbubedipyich jayijp Dios yjāy (yí judiojāy). Jadu'n nipaady nej tūg ungedeedy. Tim copicy co je ungedeedy yajcayipy jayijp yci'm ung, e ca' mōhuip uc je huídibí y'ung yajjicxaamy.

²⁸ Chi je tōxyjāy y'adzooy:

—Huindzin, tiy'ajt nej miich mmina'ñ, per nañ jadu'n yí uc ajcxy yjicxyp je caagy abu'x huídi cāb naaxcīxy ma mesipa't ma je jāy y'ung ajcxy ycaay.

²⁹ Chi Jesús je tōxyjāy nimay:

—Tiy'ajt jadu'n nej ñich miich ti xy'adzooy, paady yci-xpi jēb mhuimbidity ma mdiyc jotcuyc, je ca'oybi ti ypidzimy ma mñix yjot yhuinma'ñ.

³⁰ Co je tōxyjāy huimbijty ma ytijc, chi paty ypi'cnix cijx'am, ti anajty je ca'oybi ñibidzimyii ycōbidzimyii.

Jesús yajtzōgy tūg jāy huídibí cōnat etz ahui'mb

³¹ Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tú'aa huídibí najp Sidón etz je cajp huídibí yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy mīd miñ tūg jāy huídibí cōnatip etz aahuim'b. Chi ajcxy may'ajt pijctzooy ma Jesús huen cñixajy je pa'mjāy. ³³ Chi Jesús mīdnicxy je pa'mjāy ahuingujc ma ca' mayjāy, e pidacy ycihua'x ma je pa'mjāy ytātzac. Chi chujy, e huin'it nidoni je ytoodz. ³⁴ Chi Jesús ypa't'ijxy tzajpcix, e ymicxejy, e chi yminañ Aramaico'amy:

—Efata —jada ayuc hue' yhuimbidity: Ahuädz.

³⁵ E mic'amy je jāy cōnatpi ytātzac y'ahuaach etz ytoodz yungiy etz ycapxni yajxon. ³⁶ Chi Jesús ane'my je pa'mjāy etz ymīgügtijc co ca' huaad ni pin yajmīdmiydāgipy jadu'n nej anajty ti chōgy. Co Jesús jadu'n

mictāgy ane'my co ca' huaad ni pin yajmīdmiydāgipy je mijhuinma'ñ huídibí ytumy, chi nigí je pa'mjāy etz ymīgügtijc mīdmiydaaccixy hueñypínity. ³⁷ Je mayjāy ooy tzachjihuiy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymimadactaayb yí'huenytimytijity, ixti yajmidohuicpy yí' yí cōnatpi etz yajcapxigy yí uumbi.

Jesús yajcay midax mil yēdyjic

8 Je huin'it xi je huin'it tiempo mayjāy anajty ti ñaymūjicigixy ma Jesús yajpaady, e ca' anajty je mayjāy ajcxy mīdity ti ycaaygixipy y'uccixipy. Jesús capxyñiguejxy je' ydiscípulos ajcxy, co huen miingixy ma yí' yajpaady. Co ajcxy ymiñ, chi nimay:

² —Ooy nba'ayooyich yí mayjāy. Yí' co cham midugig xi maabi ya mīd y'ityich je mayjāy, e ni ca' ajcxy mīdity ti ycaipy. ³ Co ixipy nguexhuimbityich ajcxy ma ytijc ayuu, ca' yjēcyty yajpa'mgōjipy ajcxy tú'am, com nijējity ajcxy jiguēgy ti choongixy.

⁴ Chi je discípulos ajcxy Jesús adzooy:

—¿Ma ñich ajt nbaatim je caayin uucin huídibí jēb mīd nyajcaayim nyaj'úucim jada mayjāy? Com mijtigēduum ya nyajpaatim ma ca' pin chināy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy mīdity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjāy, co huen ñay'ahuiygixy naaxcīxy. Huin'it Jesús conigy je huixtujc tzajcaagy, e yajnaxy Dioscojuyip ma Dios mīd tzajcaagy yci-xpi. Chi tujc-huācxy je tzajcaagy, e moy je' ydiscípulos ajcxy, e je' ydiscípulos ajcxy yajhuācxy je tzajcaagy ma je mayjāy. ⁷ Je Jesús ydiscípulos ajcxy ymīd anajty nijējity pi'c acx. Chi Jesús yajnaxy Dioscojuyip ma Dios mīd je pi'c acx yci-xpi, e moy je' ydiscípulos ajcxy huen yajhuācxtaygixy ma je mayjāy. ⁸ Chi je mayjāy nidūg'ōciy ycaay cūxyi, e co ajcxy ycaaday, chi je Jesús ydiscípulos ajcxy yajpidigy huixtujc cach cayduc jicxtuc tiibi anajty yconaxy. ⁹ Jahueeni anajty ycamidaaxmility je jāy huídibí ajcxy cay uuc cūxyi. Chi Jesús ycapxy yci-xy mīd je mayjāy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy mīd ydiscípulos ajcxy, e chi ñicxy ajcxy jim Dalmanuta ñaaxjot.

Yí fariseos ajcxy tūg ijxpejt pijctzoob mijhuinma'ñybi

¹¹ Nijējity fariseos ajcxy, je huindzindijc huídibí padumb judío ycostumbre, ymiñ ajcxy ma Jesús yajpaady, e ytigiy ajcxy ijxquixcixy y'ixpijin mīd Jesús. Pijctzoogixy co Jesús huen yaj'ixyii ajcxy tūg ijxpejt huídibí tzomb tzajpjoty. Ijxta'n octunaangixy mīd Jesús. ¹² Chi Jesús tajy may ñayjihuiyi jotjoty huinma'ñyoty, chi ymicxejy, e yminañ:

—¿Na'amy co jada jāy ajcxy huídibí jugy'ajtp cham, pijctzoogixy ijxpejt huídibí tzomb tzajpjoty? Janch ñich miich nimaaygixy co ca' nyaj'ixaangixy ijxpejt huídibí tzomb tzajpjoty.

¹³ E Jesús ytimycapxycíxy miid je fariseos ajcxy, e chi puyöduuty ajcxy. Chi Jesús ybarcotigiy, e ñicxy miid ydiscípulos ajcxy ma mij laguun ñinaxy.

Fariseojäy ajcxy yaj'ixpíjcin

¹⁴ Je' ydiscípulos ajcxy ti anajty jaydigoygíxy je jicxy picy co ajcxy ybarcotigiy. Jëyi ajcxy mimiiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymiñañ:

—Ca' mmijpidaaccíxy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimiydaaccíxy Jesús y'ayuc ñayñimáayigíxy ajcxy miñ xyípy:

—Je' co ca' ñich ajt nmimiinim caayin uucin.

¹⁷ E Jesús ñejhuiyb anajty nej je' ydiscípulos ajcxy ñayñimaayí miñ xyípy, paady ymiñañ:

—¿Na'amy co mdzachnimiydaaccíxy je caayin uucin huidibi ti mjäy digooygíxy? ¿Nej ca' mhujñihuiygíxy e ca' mguenditungíxy ñich n'ayuc? ¿Nej co ajcxy mdzachcöjuuñity? ¹⁸ Miich ajcxy miid mhuiin: ¿Nej co ca' m'ijxcíxy huidibi ndumybich? Miich ajcxy miid mdäz Zac: ¿Nej co ca' mmido'mbíjccíxy ñich n'ayuc? ¿Nej co ca' mjäyméztzicxy ti ti nduñich? ¹⁹ Jayhuin co ndujc-huäcxyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich majmetz cach cayduc jicxtuc.

²⁰ Chi Jesús ymiñañ:

—E jayhuin co ndujc-huäcxyich je huixtucpi tzajcaagy, e nyajcaayich midaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' ñich ajcxy nyajpidígyich huixtuc cach cayduc jicxtuc.

²¹ Chi Jesús ymiñañ:

—¿Nej chambaad miich ajcxy ca' mhujñihuiy?

Jesús yajtzögy tüg jäy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijëjity jäy miid miñ ma Jesús tüg huintzpi, e pijtzoy ajcxy may'ajt co huen nidoñ jigix je huintzpi y'ijxigípy. ²³ Huin'it Jesús huijtztzooñ je huintzpi ma yci', chi miid cajppidzimy. E chi Jesús yajjaaxy yi chujyñi je huintzpi yhuin, etz cñixajy, e chi amidoy pen y'ijxpy anajty tigati yinjaty huenjaty. ²⁴ Chi je huintzpi huindicxpejty Jesús, e nimay:

—N'ijxypich yëdijctijc, e jadu'n ajcxy yquëxígy nej quipy, per yöyp ajcxy.

²⁵ E jadüg'oc Jesús yci' pidacy ma je huintzpi yhuin, e chi je huintzpi yhuindicxpejtpy anajty, e chi yhuin y'oyñy yajxon, huin'it oy huädz y'ijxy. ²⁶ E Jesús ycapxycíxy miid je', e quejxhuimbijty ma ytijc. Chi ymiñañ:

—Ca' mdigíhuip cajpjoty, e ni pin jada mgayajmídmíydägípy.

Pedro capxypidzimy co Jesús yi' je' je Cristo

²⁷ Chi Jesús ñicxy miid ydiscípulos ajcxy jim ma nijëjity mutz cajp mihuingon je mij cajp Cesarea Filipino. E tüt'am Jesús amidoy ajcxy ydiscípulos, nimay:

—¿Nej jäy ymiñangíxy pin ñich?

²⁸ Chi ajcxy je' ydiscípulos y'adzooy:

—Nijëjity jäy ymiñangíxy co miich je' je Juan, je Bautista. E nijëjity ymiñangíxy co miich je' je Elías. E jacjadyi ymiñangíxy co miich je' tüg Dios y'ayucnajtzcapxíybi huidibi tügíyb miid nijëjity Dios ytiy'ajtmídpí huindibi tzinaay jecy'ajty.

²⁹ Jesús y'amidooy je' ydiscípulos ajcxy:

—Miich ajcxy, ¿nej miich mmiñangíxy pin ñich?

Chi Pedro y'adzooy:

—Miich je' je Cristo.

³⁰ Chi Jesús nimay je' ydiscípulos ajcxy co ca' huaad ni pin nimaaygíxy, co yí' je' je Cristo.

Jesús capxypidzimy co y'öga'ñ

³¹ Chi Jesús jacyaj'ixpijcy je' ydiscípulos ajcxy, e ymiñañ:

—Copícy co ñich, je jäy huidi tsoon tzajpjoty, nyaj-naxípyich mij tzaachpyi etz mij ayo'n. Yí mijjäydijc ajcxy, yí judío teedy mjtungmídpí, etz yí escribas, je huindzindijc huindibi nijayduutcíxyp Dios necy, ca' ajcxy xy'ixa'ñich, e xyaj'öga'ñ ajcxy, e codugíig xii njugyigípyich jadüg'oc co ñich anajty ti n'ögy. ³² Co Jesús jadu'n nigapxy nimiydacy huädz huädz nej yjada'ñyii anajty, chi Pedro huobibzimy Jesús ahuingujc, chi ooy ooy. ³³ Chi Jesús ni'ijxhuimbijty ydiscípulos ajcxy, e ooy je Pedro, ñimay:

—Huinhuäctuutcích, miich Satanás. Com miich ca' mhujñañ mbidägy nej Dios tzocy. Yí janchtiy miich mhujñañ'ajtpy nej jäy ajcxy tzocy.

³⁴ Huin'it Jesús huoomiñ yí' ydiscípulos ajcxy etz yí mayjäy, e chi nimay:

—Pen ji pinjaty xypaníxcá'ñich, huen jäy digoydäy yci'mdzójcín etz huen xypaníxcích jabom jabom. Oy nej ytimyjadípy ytimy'ayoohuípy. Jadu'n nipaady nej jihuíy ajcxy anajty mgruudz mgabíccíxy, etz naygíyéjicigíxy ma yí ó'cín huen ytimyñëjity miid ñich ycixpi. ³⁵ Huenpinjäy huindibi ca' yega'ñ yí yjugy'ájtín ma yí ó'cín miid ñich ycixpi, hue' je' yajtigoyamy yí yjugy'ájtín. E huenpinjäy huindibi yegamy yjugy'ájtín ma yí ó'cín miid ñich ycixpi etz ñich y'ayuc oybi ycixpi, hue' je' ypadamy yí jugy'ájtín huindibi ca' cixípy tigoyípy ni mīnaa. ³⁶ ¿Ti oy'ájtín yí' co tüg jäy y'ocnayyapadñiyb yí meeñ etz mic'ájtín (huidi yajpaatp ya ñaaxhuiñybi) e y'alma yjugy'ájtín cixípy tigoyípy tügçy? ³⁷ ¿Jadu'ñyí jëb jäy y'alma yjugy'ájtín occojuyí? Nigí tzoohuin mīdity jäy ajcxy y'alma yjugy'ájtín, ca' jac ti. ³⁸ Huentimpíñty yí huindibi xymidzo'ydúnibich yí n'ayucích ndiy'ájtích ma yí pocyjäydijc yhuinduu huindibi tzinaayb cham ma jada naaxhuiñybi. Pues ñañ jadu'n ñich, je jäy huindibi tsoon tzajpjoty, nmidzo'ydúnibich yí jadu'mbi jäy co ñich anajty nhuimbity ya naaxhuiñybi miid ñich nDeedy, je Dios

Teedy, ymic'ajt y'oy'ajt etz mïid tüg'óciy yi may'ángeles ajcxy tudägypí.

9 Jadu'n Jesús yjacminañ:

—Janch tiy'ajt jadu'n nej ñich miich ajcxy cham nimäy, co nijëjity miich ajcxy huidibi cham ma ñich nhuinduu, ca' m'ögaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinicx yajtigajch

² Co tuctujc xii naxy, chi Jesús mïid tzoof Pedro, Santiago etz Juan, e mïidpa'ttigiiy ma tüg mijcop ma tüg it ooy ycáxity. E jim copcáxy Jesús ñinicx naygojtigajtzni ma Pedro ajcxy yhuinduu. ³ Chi Jesús yhuít oy y'ahuimbity janch poob, e janch adíxcp. E ni pin jadu'n yhuít cayajhuäch janch poob jadu'n nej je' anajty yhuít mïidty. ⁴ E chi oy nayguëxgyii ma ajcxy yhuindu Elías etz Moisés. Elías etz Moisés miydacp anajty ajcxy mïid Jesús. ⁵ Huin'it Pedro nimay Jesús:

—Huindzin, janch oy jadu'n co ñich nyáajity. N'occojyich ajcxy tugig tijcquem: tüg miich mje'; tüg Moisés yje'; etz tüg Elías yje'.

⁶ Com Pedro, Jacobo etz Juan ooy anajty chigiiygyxy, paady Pedro ca' anajty nejhuüy ti ycapxyp. ⁷ Tim huin'ítiy tüg joc yajnidigoy je' ajcxy, e mïdooy ajcxy ayuc jocjoty, e je ayuc yminañ:

—Jada je' ñich n'ung, huidibi ooy ndzocyich. Mïdo'mbic miich ajcxy Jesús y'ayuc.

⁸ E tim huin'ítiy Pedro, Jacobo etz Juan ajcxy yujc'ijxy, e yja'ijxhuidijty ajcxy, e ca' ni pin ma ocjac'ijxni, jeda'ajty Jesús naydügpajc.

⁹ Ti anajty choongixy copcáxy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmïidmiydaaccixy pinjaty huidibi ajcxy anajty ti ijxcixy, ixti cooni ñich, je jäy huidibi tzoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmiydägy mïid jacpinjaty huidibi anajty ti ijxcixy. Per ooy ajcxy huinmay etz naymïidmiydácigixy miñ xyipy ti Jesús ytijamy co yminañ: "N'ögibich etz njugypigipyich jadüg'oc." ¹¹ Huin'it ajcxy Jesús y'amïdooy:

—¿Na'amy co yi escribas yminañ co yi Elías huidibi chinay jecy'ajty jayijp miinañ ca'ydí je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydí je Cristo, e yaj'oyiydähuiy huinjemybi tüg'óciy mïid Dios ycáxpi. E nañ tiy'ajt jadu'n co jaybety ymiiñ ma Dios ñecy co je Cristo, je jäy huidib tzoon tzajpjoty, yajnaxa'ñ ayo'n etz tzaachypí etz mayjäy ca' y'ixa'nñby. ¹³ ñich miich ajcxy nimaayb co je Elías ti je' yhuimbity ya naaxhuiñ, e je mayjäy ti túngixy mïid Elías nej anajty tim tzójixy. E cuyduñ ajcxy nej jaybety miiñ ma Dios ñecy mïid Elías ycáxpi.

Jesús yajtzögy tüg mutz'anäg huidibi ca'oybi mïid

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuimäy, chi ajcxy ijxy mayjäy juhuidity ma Jesús ydiscípulos ajcxy.

Etz ijxy ajcxy nijëjity escribas huidibi ayuc tzachyajt-ibiiyb mïid Jesús ydiscípulos ajcxy. ¹⁵ E co je mayjäy ijxcixy nejhuüygyxy co Jesús ti yhuimbity anajty, chi mic'amy ajcxy ninicxy Jesús poyëgy, e capxpoocxixy, e may je' ajcxy ooy jihuiy huinmay. ¹⁶ Chi Jesús y'amïdooy je mayjäy, nimay:

—¿Ti ayuc miich ajcxy mdzachyajyomyb mïid ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïidmiiñ ñich nmang huidibi ymïid ca'oybi, e je ca'oybi ti yaj'umëyii. ¹⁸ E janam jadzoc je ca'oybi yajyachyii yajquidyii ñich nmang, e oy cäy naaxcáxy, e ooy y'aa'opy ypidzimy, e nañ jadu'n oy ytíitz queety etz ñinicx janch ögy yhuimäy. Ti nbijctzoyich may'ajt mïid miich mdiscípulos ajcxy co huen yajpidzimgyxy je ca'oybi ma ñich nmang, e ca' ajcxy ymadacy nicxy yajpidzimgyxy.

¹⁹ Jesús nimay je mayjäy:

—Miich ajcxy huidibi jugy'ajtp jadachambi xii tiempo huidibi ca' mijpidägy Dios y'ayuc, ¿naag xii naag po' ñich njac-huimäyhuibich mïid miich ajcxy? ¿Naag xii naag po' n'ocmimexxtuguipich miich ajcxy? Mïidmiin yi mmang ya ma ñich nhuinduu.

²⁰ Chi ajcxy mïidmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquidy je pa'mjäy, e chi oy ciday naaxcáxy, e ooy yajch yquidy, yajpidzimy ooy y'aa'opy ma y'ahuac. ²¹ Jesús y'amïdooy je pa'mjäy yteedy:

—¿Minaag jimijt cujc yöy maabi mmang ypa'mbety? Chi je ungededy y'adzooy:

—Ma'xung anajty co pa'mbetyii. Canaag'oc je ca'oybi yajyachyii yajquidyii ñich nmang, ixti ti oy ycogidahuiy jijnjoty etz nijoty. Je ca'oybi canaag'oc jayaj'ögy ñich nmang. Pen miich mïid tzó'ajt mic'ajt jaydeb xypubedipyich, tun may'ajt pa'ayoogich etz pubejtcich.

²³ Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

²⁴ Mic'amy je pa'mjäy yteedy mic ycapxy yminañ:

—Nmibijcyich, pubéjtcich nej huaad jacmij nmibicyich.

²⁵ E co Jesús ijxy co nigí mayjäy chach ymiiñ poyëgy ma yi', chi ix'ojy je ca'oybi, e yminañ:

—Miich ca'oybi huidib ti yajhuimäy jada pi'canäg uum etz nat, ñich miich yam n'ane'myb: "Pidzim ma yi pa'mjäy, e ca' mjactigihuiy ma yi' yjot yhuinma'ñ jadüg'oc."

²⁶ Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinicx yhuimäy nej jihuiy ti y'ocni. Je mayjäy huidibi anajty ajcxy jim huindíxcp yminaangixy:

—Ti ayoob y'ögy.

²⁷ Chi Jesús majtz je pa'mjäy yci', e yajpidëgy e huin'it je pa'mjäy ytinayëgy mic oy.

²⁸ Co Jesús ytigiiy ma tüg tijc, chi je' ydiscípulos ajcxy y'amïdou ameech, minañ ajcxy:

—¿Na'amy co ñich ajcxy ca' ti nmadägyich nej nya- jpidzimip ñich ajcxy yi ca'oybi?

²⁹ Chi Jesús y'adzooy:

—Yijiibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi' jadu'mbi ca'oybi, jëyi co Dios nmibijctzoohuim n'ijtim ayuu.

Jesús capxidzimnip jadüg'oc co y'öga'ñ

³⁰ Chi Jesús mïd yi' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuñhuñyb ma yi' ñicxy. ³¹ Com Jesús hue' anajty yaj'ixpicy yi' ydiscípulos ajcxy, co ooy ycopícyity co yi' jäy huidibi tsoon tzajpjoty, yajcäyegipy ma yi' ymidzip, etz yaj'ögñyb, e co anajty ti y'ögy co-dugñg xii jadüg'oc yjugypigipy. ³² Jesús ydiscípulos ajcxy ca' huinjihuñy anajty Jesús y'ayuc, e nañ jadu'n tzigñyb anajty ajcxy co Jesús yaj'ójip, paady ca' ajcxy amidoy nej huimbizimiy yijiibi ayuc.

¿Pin je' nigí jacmíjip?

³³ E Jesús mïd ydiscípulos ajcxy oyjäty jim Capernaum. Co ajcxy ytictigñy, chi Jesús yaj'amidoy ydiscípulos ajcxy, nimay:

—¿Ti ayuc miich ajcxy naymïdmiydáacigixy jim ma anajty mdüyöygixy?

³⁴ Per amonday ajcxy, com jëgixpi co anajty ajcxy ooy ti ñaymïdmiydáacigixy tüyöyjoty co pin jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pin nayyajnaxaanip mij, huen ity nej jihuy ca' ytiijity e huen capxmidoy ymügügtijc.

³⁶ Chi Jesús tzenigý tüg pi'c'anäg, e chi pidacy cu-jc'amy ma yi' ydiscípulos ajcxy. Chi tzenigý jadüg'oc, e nimay ajcxy:

³⁷ —Pin cöbije tügpajc pi'c'anäg jadu'n nej jada pi'c'anäg mïd ñich nxii ycipi, ñich yi' anajty ti xycöbicyich, e pin ñich xycöbijcpich, ca nan ñich anajty naydügpajc ti xycöbijcyich, nañ jadu'n anajty ti cöbicy huñdi ti xyquejich.

Pin ñich ajt xycamidzip'ájtím, ñich ajt je' mïd y'ity

³⁸ Juan Jesús nimay:

—Huindzin, ti ñich ajcxy n'ixpaady tüg jäy co ca'oybi yajpidzimiy mïd miich mxii, e ti ngapxaducyich mïd co ca' yi' ñich ajt xypahuidíjtím.

³⁹ Per Jesús ymínañ:

—Ca' mgapxadugipy yi' jadu'mbi jäy, com huenpínity huidibi mijhuinma'ñ tumb mïd ñich nxii, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' mïd ñich ajt nbidzímim. ⁴¹ Janch janch ñich miich ajcxy jadu'n nimäy co huenpinjäy huidibi ixypiy miich ajcxy xyajni'uucp tüg vaso nii mïd co miich ajcxy ti mmijnicpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáyity co nicxy nbocycähuim

⁴² Huenpínity huidibi jibic-huinma'ñ mibidzimb, e yapocycäy yi' jadu'mbi pi'ctijc huidibi ajcxy xymijnicxpejt-pich, jac'oy ixypiy co yi' jadu'mbi jäy ytimyñayyayjyöcx-odzïyii tüg paandzaa etz ñayñajtzjibibihuyb mejjoty.

⁴³ Pen miich mgi' xyajtundigoyamb jac'oy co mdím'ix-puxipy, com jac'oy co mdigñhuipy ma yi' jugy'ájtín huinixibi c'duc, ca'ydi co Dios xypidägip mïd metz mgi' jiiy jijnjoty ca'oydactuuby, ma yi' jijn ni camina ycapich. ⁴⁴ Jiiy ca'oydactuuby yi' ucxyting ca' y'ögy etz ni jijn ycapich nicaminaaxii. ⁴⁵ E pen miich yi' mdecy xyajpocycähuamb, ixpux, com jac'oy co mdigñhuip ma yi' jugy'ájtín huinixibi tecytuc ca'ydi co mdigñhuip mïd metz mdecy jiiy ca'oydactuuby, ma yi' jijn ni camina ycapich. ⁴⁶ Jiiy ca'oydactuuby yi' ucxyting ca' y'ögy etz ni jijn ycapich ni caminaaxii. ⁴⁷ E pen yi' mhuiin tüg xyajpocycähuamb, tim yajpidzim, jac'oy yi' co mdigñhuip ma yi' Dios y'ane'mdac mïd tügpajc mhuiin, ca'ydi co mdigñhuip ca'oydactuuby mïd metz mhuiin. ⁴⁸ Ma yi' ucxyting ni caminaaxii yca'ögy etz yi' jijn ni caminaaxii ycapich, ⁴⁹ e ma nidüg'öcyi ñi'cägooda'ñ jijn xut jijn ye'n tim jadu'n nej jäy tzüch caan xiducy. ⁵⁰ Yi' caan ooy yi' y'öyity, pen ymïd xücx'ájtín. Co je caan ytigoy yxücx'ájtín, ca' ji ni ti huidibi jëb mïd nyajxücxñiyim. Mïd'ájtíx ñich n'ayuc ma mjot mhuiinma'ñ, jadu'n ñich n'ayuc nipaady nej caan, e tzina' miich ajcxy jotcuic mïd mmügügtijc nidüg nidüg.

Jesús yaj'ixpicy mïd co jäy ytöxyijc ixmach

10 Chi Jesús choñ jim Capernaum, nicxy jim Judea ñaaxjot ma je it lugar Jordán mijniñ nínaxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpicy je mayjäy jadu'n nej anajty yaj'ixpicy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pi-daaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, ymínañ:

—¿Nej Moisés ymína'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jëb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyy nej jëb yi' ytöxyijc ixmach.

⁵ Chi Jesús ymínañ:

—Moisés cojaay jada ycötújcín mïd miich ajcxy ycipi, co ooy miich ajcxy mdzachcapxycömídodaaccixy ca' mgapxymidohuaangixy Dios. ⁶ Per co je naaxhuiñyb chondacy, co Dios oga'n yajcojy tüg'öcyi tijaty huñdi j'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytaj yteedy etz pudigñhuipy yi' ytöxyijc. ⁸ E je yëydijc etz ytöxyijc tú'cyi idaangixy. Paady je yëydijc tügmucy yajpaady mïd ytöxyijc. ⁹ Com yi' huidibi Dios ti huijtmucy, ca' ni pin huaad huijtzhuägy.

¹⁰ Co Jesús mïd ydiscípulos ajcxy yhuimbijt ma anajty ti yjättaccixy, chi Jesús ydiscípulos ajcxy yajtihuimbi-

jtcixy je ayuc huidibi anajty ti yaj'ixpicy ma je pñjcin.

¹¹ Chi Jesús yminañ:

—Je yëydijc huidibi ti ixmach yi ytöxyijc, e picy mñd huingbi, hue' yi' anajty ymidundigooyb yi ytöxyijc huidibi mñd jayijp ypijcy. ¹² Nañ tim jadu'n co tüg töxyjäy ixmach je yëydijc huidibi mñd ti ypicay jayijp, e ypijctigach mñd huingbi yëydijc, hue' ymidundigooyb je yëydijc huidibi mñd ti ypicay jayijp.

Jesús conucxy pi'ctijc

¹³ Je huin'it tiempo jäy ajcxy mñd miñ pi'ctijc ma Jesús, jaydeb cñixajy etz conuucxp. Co Jesús ydiscípulos ajcxy jadu'n ijxy co jäy ajcxy nimijhuägy Jesús mñd ajcxy ypi'c'ung, chi je' ydiscípulos ajcxy ix'ojy je jäy ajcxy. ¹⁴ Co Jesús jadu'n ijxy nejhuñy nej yi' ydiscípulos ajcxy y'idich, chi ogy ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapxaducy. Com yi jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ñch miich ajcxy nimäy co pinjaty huidibi ca' cöbigañ Dios y'ané'min, jadu'n nej pi'ctijc cöbjccixy Dios y'ané'min, hue' yi' jadu'mbi jäy ajcxy ca' ytigihuañ ma yi' Dios y'it lugar.

¹⁶ Chi Jesús aminenmujctay je pi'ctijc ajcxy, e chi cñixajiy etz conuucxcixy.

Tüg mutz'anäg comeeñybi ymiydägy mñd Jesús

¹⁷ Co Jesús chooñ jadüg'oc, chi ñimiini poyëgy tüg yëydijc, ycojxtinay'ahuñy ma Jesús yhuinduu, e yminañ:

—Miich, oybi Huindzin, çti huaad ndunipyich jigix jëbi nbadipyich jugy'ájtin huidibi ca' ycixipy ytigoyipy?

¹⁸ Chi Jesús yminañ:

—¿Na'amy co xyñimäyich co oy huindzin ñch? Dios tügpaic óyip, ca' jac ni pin. ¹⁹ Miich mnejhuñyb Dios ycötújcin huidibi jadu'n minaam: “Ca' mmigapxtigoyip töxyjäydijc; ca' mjäyay'ögipy; ca' mmeedzip; ca' m'ñndaacip; ca' pin mhuin'ñip; etz myajmij'adip mdaj mdeedy.”

²⁰ Chi je jäy Jesús nimay:

—Huindzin, ti nguydundäyich jadyaab cötújcin ajcxy maabi ñch nbi'c'atyich.

²¹ Chi Jesús huindcxpejty je yëydijc mñd tzójcin jihuiñy, e chi nimay:

—Per jactigoy'ijtni jadügnax. Nícx toog tüg'óciy huidijaty miich mñd, etz mo' yi' ayoobtjic. Co jadu'n mdunipy, chi mbaadipy oy'ájtin jiiy tzajpjoty. Co jadu'n mdooctahuipy tijaty miich mñd, chi minip jadüg'oc ma nyajpaadyich, e xypanéxcibich, e mnaybidägñb cixyjot huinjot oy nej mdimyjadipy mñd ñch ycixpi.

²² Co jadu'n je yëydijc midoy nej anajty Jesús ti ñimäy, chi yhu'i'my taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixy co je comeeñybi taj may yhuimbijtni, chi huindcxpejty je' ydiscípulos ajcxy huidibi tinaayb juhuidity ma yi', e yminañ:

—Ooy chachtzipity co tüg comeeñybi ytigihuiipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuidity mñd jada ayuc nej Jesús anajty ti yminañ. Paady Jesús yjacminañ jadüg'oc:

—Miich ajcxy migügtijc huidibi ooy ndzocyich, ooy chachtzipity co ytigihuiip ma Dios y'ane'mdac tüg comeeñyjäy huidibi tzachnijot'ajt ycomeeñ'adi. ²⁵ Nigi chípity co tüg comeeñ jäy ytigihuiip ma Dios y'ane'my, ca'ydi co tüg camello ñaxipy ma tüg xu'ñ'ijx yxúity.

²⁶ Co jadu'n ajcxy midoy nej Jesús yminañ, chi ooy ajcxy yhuinmay'ahuidijty, e nayñimäyigixy miñ xyipy: —Pen janch tiy'ajt jadu'n, çpinjäy jada' huaad jëb y'al ma ñidzögipy?

²⁷ Je huidibi jäy ajcxy ca' ni minaxi huaad ca' yaj'oyëy, Dios yi' yaj'oyëhuy, com mñd Dios ca' yi' ni ti chípity.

²⁸ Chi Pedro yminañ:

—Huindzin, occuendtun, ñch ajcxy ti n'ixmajtztäyich tüg'óciy tijaty anajty nmiidich, e ñch ajcxy nbanicxpich miich.

²⁹ Chi Jesús y'adzooy, minañ:

—Janch tiy'ajt nej ñch miich ajcxy nimäy co huenpñity huidibi mñd ñch ycixpi ti ixmach ytjic, ti ixmach y'uch ymigüg ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti ixmach ycam ñch ycixpi, etz ñch n'ayucich etz mñd Dios ytiy'ajt ycixpi, yi' ypadamy nigí oy'ájtin ya naaxhuiñ, ixti ypadamy migo'px jadu'ñyi ytjic ajcxy, y'uch ajcxy, ytaj ajcxy, y'ung ajcxy, etz ypadamy nigí ymij cam, mñd tzaachypi mñd ayo'n mñd ñch n'ayuc ycixpi. Etz nañ jadu'n ma je xi tiempo huidibi mimb cidacpi ypadamy jugy'ájtin huidibi ca' ycixipy ytigoyipy. ³¹ Ji yajpaady ya naaxhuiñ nijëjity jäy huidibi cömay ijtp, e co yjäty ajcxy tzajpjoty, chi ca' ajcxy cömay idañ. Nañ jadu'n ji yajpaady ya naaxhuiñ nijëjity huidibi ca' cömay y'ity, e co ajcxy yjadipy tzajpjoty, chi jiiy ajcxy cömay y'idipy.

Jadüg'oc Jesús capxidzñip co y'ögañ

³² Jesús mñd ydiscípulos tüyöyp anajty ajcxy, hue' anajty ypättigiygixy jim Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjäy panicxy anajty ajcxy Jesús. Je Jesús ydiscípulos ajcxy ooy chachhuinmay'ahuidijtcixy, e jacjadyii jäy huidibi anajty ypanicxy Jesús ooy ajcxy chigiygixy. Chi Jesús huodzoñ abicy je majmetzpi ajcxy, e yajmñdmjadtay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nima-jmetzpi nimay:

—Miich ajcxy m'ijxpy mnejhuñyb co nnéxim cham jim Jerusalén. E jim Jerusalén, ñch je jäy huidibi tzoon tzajpjoty, nyajcëyegañich mach ma yi' Teedy mijtungmñdpi, etz ma yi' escribas ajcxy. E chi ajcxy ane'min pidägañ co huen xyaj'ócixich. Nañ jadu'n xycëyegaangixich mach ma yi' ajcxy huidibi ca' yjudiojäyity. ³⁴ Yi' ajcxy xyñixigipy xyajxigibyich, xyhuobipyich ajcxy mñd coochac, xyhuindzuj xyjijptzújibich ajcxy, e xyaj'ögibich ajcxy. Codugñg xi maabi anajty xyaj'ócixyich, chi njugypigipyich jadüg'oc.

Jacobo etz Juan pijctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich miid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuibich yi mij tung ma m'ané'min jaydéb n'iñähuibich ma miich mmijc. Nidügti ich ajcxy n'iñähuiy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuüy ti ti mbijctzóogixy. ¿Nej myajnaamyb miich ajcxy je tzaachypi ayo'n huidibi nyajnaamybich, jadu'n nej jihuüy m'üga'ñ ajcxy ich n'ügy e mbaada'ñ ajcxy ich nnibéjtín?

³⁹ Jacobo etz Juan y'adzooy:

—Ich ajcxy nmimadägibich minaxipyich nyajnaamybich ajcxy yi tzaachypi huidibi mminaxamyb myajnaamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaangixy yi tzaachypi jadu'n nej ich mminaxaamyich nyajnaamyich yi tzaachypi, tim jadu'n nej jihuüy m'ügaangixy ich n'ügy, e mbadaangixy ich nnibéjtín. ⁴⁰ Per ca' ich cötújcin nmídidyich co ich miich ajcxy nbidägipy tungmiid, co myajpaadip tüg ma ich nmijc a'oy'amy, e jadüg anajty'amy. Hue' janchtiy Dios Teedy ymíid ni'ixi' pinjaty ti huin'ixy jaydéb yajnécxip je migtung ma ich n'ané'min.

⁴¹ Co je jacjadyii Jesús ydiscípulos ajcxy nejhuiy jadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan. ⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuüygyixy, yi jäy ajcxy huidibi migtungmiid ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt miid ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej migtungmiidpi ma je maybi naax cajp. Pinjaty ma miich ajcxy migtung yajnicxaamb, copicy ñaybidägiiyb nej tüg tumbi.

⁴⁴ Pinjaty miich ajcxy huidibi nigohuajc'ajtp, copicy ñaybidägiiyb nej tüg tumbi. ⁴⁵ Com ich nañ jadu'n, je jäy huidibi tzoon tzajpjoty, ti nmiiñich ya naaxhuiñ jaydéb nbubedipyich yi mayjäy ajcxy, e ca' nan yi mayjäy ich xypubedipy. Ti nmiiñich jaydéb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'na'ñich yi jäy ajcxy y'alma.

Jesús yajtzögy Bartimeo huidi anajty huíntzpi

⁴⁶ Chi oy jäty Jesús miid ydiscípulos ajcxy jim Jericó. E co Jesús tzoon Jericó ytübijcy jadüg'oc, chi yi' ydiscípulos ajcxy etz janch mayjäy ñéxcixy anajty miid Jesús. Co ajcxy ycajp pidzimy, chi tūba'ay anajty yajpaady tüg huíntzpi huídibi limosna anajty ypijctzooyb jabom

jabom. Hue' anajty yxii Bartimeo, e Timeo anajty xiijity yi' yteedy. ⁴⁷ Co Bartimeo nejhuiy co Jesús je Nazaretpi najxp anajty ma je tū'aa, chi mic yaaxqueegy yminañ:

—Jesús, David y'ap y'oc, tun may'ajt ich pa'ayoog.

⁴⁸ Chi je mayjäy ajcxy ogy je huíntzpi, nimay ajcxy co huen amoñ. Per je huíntzpi nigí yminan'idích:

—Miich, David y'ap y'oc, tun may'ajt ich pa'ayoog.

⁴⁹ Chi Jesús ytinayxijpy, e yminañ:

—Huomiingix yi huíntzpi.

Chi je jäy ajcxy oy yajtzooogixy je huíntzpi, ni-maaygixy:

—Jotcugi', e pidig, com Jesús xyaaxtzoob.

⁵⁰ Chi mic'amy je huíntzpi, najtz'oxiiy je ñibe'ñ, chi ypidig, e ninicxy Jesús. ⁵¹ Chi Jesús je huíntzpi y'amidooy:

—¿Ti mdzojcpy ndunipyich miid miich ycixpi?

Chi je huíntzpi yminañ:

—Huindzin, ndzojcpyich co xyajhuindicxigibich.

⁵² Chi Jesús je huíntzpi nimay:

—Jeb mnicxy ma mdijc. Com ti xymibicyich, paady ti mhuindicxigy.

Tim huin'it je huíntzpi yhuin'oyiiy, e yhuindicxigy, e panicxy Jesús co ytübijcy jadüg'oc.

Jesús ytigy jim Jerusalén

11 Co Jesús etz je mayjäy oyjá'tcixy huíngon ma je Jerusalén cajp ma yajpaady mejtz mutz cajp huídi xiijity Betfagé etz Betania, huíngon ma je cop huídibi xiijp Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nícx miich ajcxy ma yijmbi cajp huíngonbi. Co jim mjády, chi mic'amy mbaadip tüg burro ycoxóchity huídibi ca' pin yaj'iñayñi chambaad. Coguejtuuticx je burro e yajmiingix ya ma ich. ³ Pen jim pinjaty xy'amidoogixy: "¿Na'amy co mmiidzonaangixy yi burro?" Chi miich ajcxy mñimähuiy: "Je Huindzin (Jesús) yajtu-namyb tzojc, e yajhuimbidamy mic'amy."

⁴ Chi je metzpi ydiscípulos ñicxy ma je cajp huíngonbi, e oypaatcixy tüg burro ycoxóchity huíngon ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijjity jäy jim huíngon yminañ:

—¿Ti mdungixyp? ¿Na'amy co mgoguejtuuticxy yi burro?

⁶ Chi je metzpi Jesús ydiscípulos je jäy ajcxy yajmiid-miydacy Jesús y'ayuc nej anajty ti ñimäyii. Je jäy ajcxy yminaangixy co jeb yajnéxcixy je burro. ⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibe'ñ je burro ajcxy miid yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tügujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tügujc.

⁹ Je mayjäy huídibi anajty ajcxy nícxp jayijp etz axam ma Jesús, chi ajcxy ytigiiy capxp mic, yminaangixy:

—¡Hosana! ¡Gloria a Dios, ooy ycómáyity Dios! Huen cappaady y'idipy jada yëydijc huídibi mimb miid yi nHuindzin Dios yxii etz ymic'ajt. ¹⁰ Huen cappaady y'idipy je ané'min huídibi jada Jesús yajtzondacp cham.

Jada je' je ané'min huidibi nmij'ap nmijteedy David anajty ym'iid. Hosana, huen je tzajpjoty tzinaayb ajcxy #baatcixy capxpaatcixy jada mij'ane'mbi.

¹¹ E jadu'nji Jesús ycajptigiijy jim Jerusalén, e ytigiiy ti-goty ma Dios ytijc. Co huindixtay tüg'óciy tijaty jiiby tzajtigoty, chi chooñ jiiby, e ñicxy jim ma je cajp huidibi yxii Betania. Chi Jesús je majmetz ydiscipulos ajcxy m'iidnicxy.

Jesús capxpcy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús iixpaty jigüegy tüg higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ym'iid ytiim. Co Jesús ymech ma je higueri, chi iixy co je higueri ca' anajty ytiim m'iidty, jëyi m'iidty anajty y'aay, com ca' anajty ni timpity m'ina higo ytiim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tiim ma miich.

Chi Jesús ydiscipulos ajcxy midoy nej Jesús nimay je higueri.

Jesús quejpidzimday ajuybi adoocpi ma Dios ytijc

¹⁵ Co ajcxy oy yjädy jim Jerusalén, co Jesús ytigiy jadüg'oc jiiby ma Dios ytijc, chi Jesús yajpidzimday je ajuybi adoocpi ajcxy jiiby tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuiipy juydoogy ma Dios ytijc. ¹⁷ Jesús yaj'ixpijcpj anajty je mayjäy, e yminañ:

—Ma Dios y'ayuc necy Dios jadu'n yminañ: "Ñich ndijc hue' je' tzajpcapxcapxtac ma tüg'óciy jäy ajcxy chooñ ma nidüg'óciy naax cajp ymiingixy Dios ojadajtp", per miich ajcxy hue' yi' mhua'ñ meetzpitiijc.

¹⁸ Co ajcxy je teedy m'ijtungm'iidpi etz je escribas nejhuiy nej anajty Jesús ti y'id'ich jiiby ma Dios ytijc, chi ajcxy ooy iixtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigiiyb ajcxy m'iid je mayjäy com je mayjäy ooy tzachijhuiy huinmay jadu'n nej Jesús yaj'ixpijcgixy.

¹⁹ Co oycoodziyñi, chi Jesús ycajppidzimy.

Je higueri ytiitzni

²⁰ Je com jabom Jesús m'iid ydiscipulos ajcxy najxp anajty tim jopyñi ma je higueri anajty ytinäy. E je higueri ti anajty ytiitztay mabaad ytictz. ²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huidibi ixiy mgapxpoj, ti yi' yt'ich.

²² Chi Jesús Pedro nimay:

—Mibic yi' Dios. ²³ Janch ñich miich ajcxy nimäy, co ixyipy pin migapxy jada huinonbi cop, e nimäy ixyipy: "Miich cop pid'ig, e ñicx cidäg mejyjoty", pen ca' ti mijotmetzciiy, e mibicy co jadaanip nej yi' ti ane'my je cop, chi jadu'n ytuniiyb yjadiiyb. ²⁴ Paady ñich miich

ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huidibi ti mbijctzoogixy. Pen janch miich ajcxy mibicy co Dios ti xymooygixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy m'iid tüg jäy, huinmécxcix yi' mmidzip tim jayijp, jigix jëbi Dios Teedy huidib jiiby tzajpjoty xyhuinmeecxip miich ajcxy ma ti mdundigooygixy. ²⁶ Pen ca' miich ajcxy mhuinmecxy yi' mmidzip huidibi ti xymidundigooygixy, ca' miich ajcxy xyhuinmecxa'ñ Dios Teedy huidibi yajpatp tzajpjoty.

Jesús je' ycötújcín

²⁷ Je huin'it tiempo Jesús m'iid je' ydiscipulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëjity huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiiñ ajcxy Jesús, e yminañ ajcxy:

—¿Pin cötújcín ti xymöy huidibi ti mduñ ya tzajtigoty? ¿Ma cötújcín ti mbaady co jëb m'ane'my ya tzajtigoty?

²⁹ Chi Jesús yminañ:

—Ñich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuiipy ma ñich ti nbaady yi' mic'ajt etz yi' cötújcín, co jadu'n nduñich jiiby tigoty ma Dios ytijc. ¿Pin yajnim'ijc Juan, je Bautista, co huen jäy yajnim'ibety? ¿Dios, o naaxhuiñyjäy? Adzoogich ajcxy.

³¹ Chi ajcxy ytigiiy huinmay'ahuidijtpi, ñayñimáayigixy miñ xyipy:

—Pen m'inaanim co Dios tzajpjotypi ti yajnim'ibicy Juan, chi Jesús xyñimáayimipy: "¿Nej co ca' miich ajcxy mibijcy Juan y'ayuc?" ³² Nañ ni ca' jëbi ñich ajt m'inaanim co jäy ajcxy ti quejxy Juan.

Com chigiiyb anajty jäy com ñejhuiyb anajty ajcxy co Juan je Bautista Dios anajty ytiy'ajt ym'iid. ³³ Chi ajcxy Jesús nimay:

—Ca' ñich ajcxy nejhuiy pin ti yajnim'ibicy Juan.

Chi Jesús yminañ:

—Ñich nañ jadu'n ca' nnigapxa'ñich pin ti xycötu-jcmöyich co jëb nduñich huidibi ndumyibich.

Je naymidúniptijc jibicjäybi ajcxy y'ixxpejt

12 Je huin'it xii Jesús jacmigapxy je mayjäy miid jihuimbit ayuc, yminañ:

—Ji yajpaady tüg yëydijc huidibi camuuxy ti cojy ma ycam, e ti co'aguemy je camuuxy cam, e yaj'oyiiy tügi tang ma huinmicxa'ñ je camuuxy. Nañ jadu'n je yëydijc tüg poch yajpid'igy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yeycy ajuyducy ma nijëjity tumbidijc. Chi chooñ viaje tumbi jigüegy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ m'iid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jiphuojpy ajcxy. Chi ajcxy

quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy ogy oyñinej.

⁵ Chi je cogam jacquejxy jadüg ytumbi e ajcxy tumbidijc yaj'o'cy je midugiipgi quexyöpy. Chi je cogam jac tim quejxy jadyii ytumbi. Chi je tumbidijc ajcxy je cogam ytumbi huinhuojpi jijphuojpi nijëjity, e nijëjity ajcxy yaj'o'cy.

⁶ Je cogam ymiid anajty tügpajc ymang huidibi anajty ooy tzocy jihuiy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adiiyb je' ymang. ⁷ Chi je tumbidijc ajcxy ñayñi-maayí miñ xyipy: "Jada yëydijc je cogam jada ymang huidibi jë'adaanip je yteedy ypidägy. Tzoc yaj'o'cim, e jadu'n je cam një'ájtím." ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajixc'ipy.

⁹ Co Jesús jadu'n miydactay je jihuibit ayuc, chi ymi-nañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam miid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n ymiñañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypí huidibi je pojtzpidijc ca' ajcxy yajtuna'ñ, e je' oy ti yhuimni ma anajty yjaccop'icyty.

¹¹ Jada tung je Huindzin Dios ti tuñ, e ooy oy n'ijxim njäygidacim.

¹² E huin'it je judíojäy ajcxy ytungmiidpi ooy jamadzaañ anajty Jesús, com ñejhuñiyb anajty ajcxy co Jesús ñigapxyii yi' ajcxy. Com tzigiiyb anajty ajcxy miid je mayjäy, chi ajcxy tim huinyöyducy, chi ñicxcixni.

Yajnidiiygixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytjic. Tügpicy anajty ñaygomájtzigixy miid yi fariseos ajcxy, etz jadügpicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús. ¹⁴ Jada mejtzpicyi ixpicytjic ñicxy ajcxy ma Jesús, e ymiñañ ajcxy:

—Huindzin, ñich ajcxy nejhuñiyb co myaj'ixpijcy je tiy'ajt, ca' jäy mdzigëy, com ca' huin'ijxpety myaj'ixpicy. Tú'ciy miich mduñ miid mic jäy, miid comeëñyjäy, etz miid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios ytiy'ajt. Ne-jhuñhuaamybich ajcxy nej miich yaj'ixpijcy je mayjäy. ¿Nej tundigooyim miid yi Dios ycötújcin co nmigüéjtim César, je romano jäy mij'ane'mbi, o ca'ji? ¿Nej jëb nmigüéjtim, o ca'ji?

¹⁵ Per Jesús ñejhuñiyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'ixyich? Yajmiingix tüg meeñ jigix n'oc'ixipyich.

¹⁶ Chi ajcxy mimiñ tüg meeñ e co Jesús ijxy je meeñ, chi ymiñañ:

—¿Pin y'ahuanax etz pin yxiñ ijtp ma jada meeñ?

Chi ajcxy y'adzooy:

—Hue' yi' César.

¹⁷ Chi Jesús ymiñañ:

—Mo' je César huidibi yi' yjë'ajtpy, e mo' Dios huidibi Dios yjë'ajtpy.

Chi ajcxy ooy jihuiy huinmay jadu'n nej anajty Jesús ti y'adzooy.

Yajnidiiygixy pen je tiibi öccixy jugypigipy jadüg'oc

¹⁸ Je huin'it tiempo nijëjity saduceos ajcxy ymiñ ma Jesús. Yi saduceos ajcxy ymiñangixy co ca' pin yjugypiga'ñ tiibi y'o'ccixy. ¹⁹ Chi je saduceos ajcxy Jesús ni-may:

—Huindzin, Moisés jayhuim'y je cötújcin co tüg yëydijc y'ögy, e co'ögy yhuim'y je ytöxyjic e ca'ni ytöxyjic ung'ixy. Pues copicy je co'ögy ytöxyjäy ypigipy miid ñay y'uch yëydijcpi jigix jëbi je töxyjäy y'ung'ixipy huidibi huim'ñhuip jadu'n nej codijc cobidägy ma je yteedy y'ajch ypidägy. ²⁰ Pues jim ma tüg cajp anajty chinäy huixtujc yëydijc tüg que'x. Je ungoob ypijcy, e chi ix'o'cy ytöxyjic, e ca' ni tüg y'ung yajhuim'y. ²¹ Je mimetzpi yëydijc ypijcy miid je co'ögytöxyjäy, e nañ jadu'n ix'o'cy ytöxyjic e ca' ni tüg ung yajhuim'y. E nañ jadu'n je midugiipgi miid ypijcy je töxyjäy, e nañ jadu'n ix'o'cy je ytöxyjic, e ca' ni tüg y'ung yajhuim'y. ²² E jadu'n oytuñyii yjadyii miid je töxyjäy co ti anajty miid-dzinay'abidzimdäy je nihuixtujcpi yëydijc tüg que'xpi. E je nihuixtujcpi ix'o'cy ajcxy je töxyjäy, e ca' ni tüg y'ung ajcxy yajhuim'y. E chi je töxyjäy oy y'öcni. ²³ E co anajty xiñ tiempo paaty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidücti je yëydijc töxyjic'adaanip je töxyjäy? Com ti ajcxy jadu'n nihuixtujcpi miid tzinay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhuinjihuñy je tiy'ajt, com ca' mhuinjihuñyigixy Dios y'ayuc ytiy'ajt, e com ni ca' mnejhuñyigixy je mic'ajt huidibi Dios ymiid. ²⁵ Pues co anajty yjugypijccixy je jäy tiibi y'o'ccixy, chi ca' ajcxy ypigañ, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jilby tzajpjoty, tim jadu'n nej je ángel ajcxy chinaaygixy yjugy'ajtcixy. ²⁶ Per je tiy'ajt co jäy ajcxy tiibi y'o'ccixy yjugypigaangixy, ¿nej ca'ni mgapxyñi Moisés ytiy'ajt ma anajty Dios ymigapxyii co je aay ujtz anajty chachtoy? Chi ymiñañ: "Ñich je' je Dios huidib Abraham, Isaac etz Jacob yDios'ajtpy." ²⁷ Com yi Dios ca' yi' yDios'aty ma yi öcpi ajcxy huidibi y'alma ti ycixy ti ytigoy. Yi Dios Dios'ajtp yi' ma yi juugypí ajcxy. Paady miich ajcxy ooy mij mdundigooygixy co ca' mhuinjihuñyigixy Dios ytiy'ajt.

Je ané'min huidibi ooy nigí ycop'icyty

²⁸ Nañ jadu'n je huin'it tiempo nimiñ Jesús tüg escriba. E yi' anajty y'amido'ijtpy co Jesús adzooy je jäy

huidibi ca' mibicy co yi öcpi yjugypigipy ajcxy jadüg'oc. Jada escriba ñejhuuñyb co Jesús ooy oy ti y'adzooy je sa-
duceos ajcxy, paady yi' Jesús amidooyi:

—¿Huidibi je' Dios y'ané'min jacmijpi?

²⁹ Chi Jesús y'adzooy:

—Yi Dios ycötújcín huidibi jaccopicyip, yi' je' huidibi minamb: “Midoogix Israel jäy, je Huindzin Dios huidibi nDios'ájtím, yi' je' ajt nHuindzin Dios tügpajcpi. ³⁰ Tzoc jihui' etz yajmij'at mHuindzin Dios miid tüg'óciy m'aa mjet etz miid tüg'óciy m'alma, etz miid tüg'óciy mhuinma'ñ, etz miid tüg'óciy mmic'ajt.” Jada je' je jaccopicyip ané'min. ³¹ Je mimetzpi Dios ycötújcín jahueengi tú'ciy ñaybadyii miid je jayijpi, yi' huidibi jadu'n minamb: “Tzojccix jihuiyigix yi' mmigügtijc tím jadu'n nej mnaychogyii mnayjihuiyii cí'm.” Jada metz Dios ycötújcín jaccopicy jacmic'ajt miid ca'ydí jac huidibi cötújcín.

³² Chi je escriba yminañ:

—Ooy oy ti m'adzooy. Janch tiy'ajt jadu'n nej miich mina'ñ, co ji yajpaady tügpajcpi Dios, e ca' ji jadüg Dios mic'ajt miidpi. ³³ E janch tiy'ajt co copicy nmijpidaacim nyajmij'ájtím Dios cixyot huinijot miid tüg'óciy ajt huinma'ñ, miid tüg'óciy ajt n'alma, etz miid tüg'óciy ajt nmic'ajt. E copicy ndzójcím njihuiyim nmigügtijc tím jadu'n nej naychójcím nayjihuiyim cí'm. Jactzoobatp jada ca'ydí co tüg'óciy yi' huindzigi'ñ huidibi anajty yajno'cpi miid Dios ycixpi.

³⁴ Co Jesús ixy jadu'n nej je escriba tiydudägy anajty ti y'adzoyii, chi yminañ:

—Jahuenjaty miich mibíjcin ytigoy'ityñi jaydeb mdigihuiipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amidoohui.

¿Pin je' y'ung je Cristo?

³⁵ Jesús yaj'ixpijcpy anajty je mayjäy jii by ma Dios ytijc, e yminañ:

—¿Na'amy co yi' escribas ajcxy yminaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n yminañ:

Yi Huindzin Dios nimay ñch nHuindzin: “Iña' ya a'oy'amy ma ñch nmijc, ixti cooni anajty miich mmidzip ti nmimadactäyich, jadu'n nipaadipy nej jihuiy ti nbidägyich miich mmidzip jadu'n nej tüg tinaybejt.”

³⁷ ¿Per nej co yjadu'nity co jäy ajcxy yminaangixy co je Cristo David je' y'ap y'oc? ¿E David cí'm yminañ co je Cristo yi' yHuindzin'ajtpy?

Jotcuyc anajty je mayjäy amidoo'ijti Jesús y'ayuc.

Jesús ca'p jäygidaci leyhuindzin ajcxy yhuinma'ñ

³⁸ Jesús yaj'ixpijcpy anajty je mayjäy, e yminañ:

—Naycuend'ájtigix miid yi' escribas ajcxy. Com yi' escribas ajcxy ooy jotcuyc co nayxóxigixy miid yhuít oyjatypí yoñjatypí. Ooy ajcxy tzocy co yajcapxópccixipy huindzigi'ñ'amy mayjäyduum. ³⁹ Yi escribas ooy ajcxy tzójccixy yi' cödumbi ñaybejt ma je naymujctac, etz ooy ajcxy tzójccixy ñaybejt ma yi' cömaybi jäy ñay ma

jäy ajcxy yxiiduñ. ⁴⁰ Yi escribas ajcxy yajcixtaayipy yi' co'ögy ytöxyjäy ypidägy miid ajcxy y'adzójcin. Yi' ajcxy ooy túngixy jecy tzajpcapxycapxi' jigix ajcxy capxpaady idipy. Dios nigí tzaachytunipy yi' escribas ajcxy miid ypocy ycixpi, ca'ydí jac ni pin.

Je ayoobi töxyjäy y'ofrendi

⁴¹ Tüg xii anajty Jesús ñay jii by tigoty ma Dios ytijc. Ñaayb anajty ma je limosna caja huinduu. Jesús yhuindixcyp anajty je jäy ajcxy huidibi meeñ pidaac-cixp ma je ofrenda caja. E maycomeeñyjäy ooy ymeeñ pidaaccixy janch may. ⁴² Tím huin'ítiy yja'ty tüg co'ögy töxyjäy janch ayoob pidacy metz pi'c meeñhuäcxy, huidibi ca' ooy choobaady. ⁴³ Chi Jesús huomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ögy ytöxyjäy ayoob jac'anaxy jada ti pidägy ofrenda, ca'ydí jac ni pin. ⁴⁴ Tüg'óciy comeeñydic ajcxy ypidacpy ma y'ofrenda yi' meeñ huidibi yajconajcyp. Jadayaabi co'ögytöxyjäy ti pidacy tüg'óciy huidibi anajty ymiid, je meeñ tüg'óciy huidibi anajty ñigayamy yi' ymooyb Dios.

Jesús ymina'ñ co Dios ytijc yhuindigooyipy

13 Co Jesús ypidzimy ma Dios ytijc, chi nidügti ydiscípulos ñimayi:

—Huindzin, ix jada maychaa mijjatypí etz jada maybi tijc ooy y'oy'oydúñity.

² Per Jesús y'adzooy, yminañ:

—Huindix miich ajcxy jada maybi mijjaty ytijc. Minip tiempo mina tüg'óciy jada tijc nicxy yhuí'my taj xit, ca' ma tzaa macxy. Huindigoydähuip tüg'óciy.

Je tiy'ajt ma ca'ni naaxhuiñybi ycixa'ñi ytigoya'ñi

³ Jesús miid ydiscípulos ajcxy ñicxy ma je cop huidibi xiijp Olivos. Jim ajcxy co'ixnaxy je Dios ytijc. Ñaayb anajty Jesús jim copcixy co Pedro, Jacob, Juan etz Andrés ameech migapxy Jesús, yminaangixy:

⁴ —Tun may'ajt ñch ajcxy yajnimaaayg mina jada ytuna'ñyii yjada'ñyii co huindigoydähuip Jerusalén cajp. ¿Ti iixpejt'adam co anajty jada yaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos yminañ:

—Ix pinjaty xyhuin'ñgixy. ⁶ Ooy jäy may ymiinañ miid ñch nxñ. Naydijáanigixy co je' ajcxy je' je Cristo, ymina'na'ñ ajcxy: “Ñich je' je Cristo.” E ooy jäy may huin'ñaangixy.

⁷ Co miich ajcxy ayuc mmidohuiipy co jäy chachchip-túngixy xii ya, ca' mdzigíyigixip, com ooy ycopícyty co jada jadu'n jayijp ytuníyb yjadiyb. Ca' nan hue' je' anajty tím cijxp tím tigooyb je xii je tiempo. ⁸ Nayñibidigib tüg naax cajp miid huingbi naax cajp, e gobierno miid huingbi gobierno. E minipy mic uyx canaag'it etz mij yuu mijpa'm xii ya. E jäy ajcxy ooy yhuäniipy yjihuihuipy ycanaymijotcuyc'ájtigixipy. Jada tzaachypí ayo'n tzon-dacni yi' anajty.

⁹ Chi Jesús yjacminañ:

—Nayguend'ájtigix miich ajcxy, com yi mmidzip ajcxy xymájtzcixip, e xycy'éjccixip ma tungmiidpidijc, e xychachytúngixip xyhuópcixip ma yi judíoájy ñaymujctac ajcxy. Xyajnécxixip mach ma rey etz ma gobernador ajcxy yhuinduu m'iid ñich ycixpi com miich ajcxy xymibi-cyich. E miich ajcxy tiy'ajt myegipy m'iid ñich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycixa'ñ naaxhuiñybi, chi ajcxy capxhuäcxtähuipy ñich n'ayuc huindu'myb ñaax-huiñ ma tüg'óciy naax cajp. ¹¹ Co jäy ajcxy xyajnécxip mach ma codungdijc co xtytydúngixipy, chi ca' ni nej m'jot'adiyb, ni ca' mhuinmayipy nej m'adzóogixipy. Mgápxcixipy je ayuc huídibi Dios xymóoygixipy, com je ayuc huídibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydijc ajcxy ycíyegamyb ma tungmiidpi yci'm y'uch ajcxy co huen yaj'ogyii. E nañ jadu'n je ungeeedy ycíyegamy yci'm y'ung ajcxy ma tungmiidpi. Nañ jadu'n yi' y'ung ajcxy cýyegipy yci'mdeedy co huen yaj'ogyii. ¹³ May naaxhuiñjäy ca' xychogipy xyjihuihuipy miich ajcxy m'iid ñich ycixpi. Pen miich ajcxy mmicti-naayb ma mmibíjcin, ypaadip miich ajcxy m'alma nid-zocin.

¹⁴ Chi Jesús yjacmínañ:

—Co anajty m'íjxcixy je huídibi Daniel ñimíydac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huídibi ooy ycodzigíjity. Miich ajcxy huídibi tzinaayb jim Judea, co jadu'n m'íjxcixipy, chi nicx mgueectzoocix ma tungop. ¹⁵ Yi jäy ajcxy huídibi yajpatp ma ytjcnicy ca' ñíxcity tígoty ma ytijc. E ni ti jii-by cayajpidzimipy. ¹⁶ Yi jäy ajcxy huídibi yajpatp camjoty, ca' ajcxy nihuimbidity je' yjocxy huit huídibi ym'iid. ¹⁷ Huin'it xii huin'it tiempo ayo'n pada'ñ je töxyjäy huídibi anajty ti y'ungtzimígy, e nañ jadu'n yi' ajcxy huídib m'iid y'ung ma'xung yajtzitzp. ¹⁸ May'ajt ajcxy mbijctzoohuipy ma Dios, co jada jadu'mbi ayo'n ca' ytuníyb yjadíyb ma anajty ytíich tiémpity. ¹⁹ Yi jadu'mbi xii tiempo jäy ajcxy ayo'n tzaachypí minaxipy yajnaxipy. Ni camínaaxii jäy jadu'n tzaachypí mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E camínaaxii jadüg'oc ycajadiyb jadu'n. ²⁰ Pen ca' Dios capx'aduga'ñ yijibi ayo'n xii ayo'n tiempo, ca' ni pin chögipy. Per Dios ycapx'adugamyb yijibi ayo'n tiempo m'iid je m'ibijcpidijc ycixpi huídibi Dios ti huin'ixy.

²¹ Co yi jadu'mbi xii tiempo anajty ymiiñ, ca' mmibigipy, pen ji pinjaty xyñimaaygixy: "Íjxcix, cha yajpaady je Cristo", o "jim'amy yajpaady je Cristo." Ca' mmibíjccixipy jäy y'ayuc. ²² Minip jäy ajcxy huídibi ñayajnaxáanigixy nej Cristo, e ymináangixipy co capxhuäcxy ajcxy Dios y'ayuc, e ca' yjánchity. Ytunipy ajcxy mij huinma'ñ etz mijpi iixpejt, ixti jahuin'ina'ñ je mayjäy ajcxy huídibi Dios ti yhuin'ixyii.

²³ Nayquend'ájtigix m'iid yi jadu'mbi jäy ajcxy, com yajjip ñich miich ajcxy yi' ti nyajmiidmiydägy.

Nej jada' je Dios y'ung yminipy jadüg'oc

²⁴ Chi Jesús yjacmínañ:

—Co anajty yi jadu'mbi ayo'n tiempo ti ñaxy, ycoodzíhua'ñ etz je po' ca' y'ana'ñ. ²⁵ Maymadza' ycähuip, e nañ yücxiy huídijaty mic'ajt m'iid tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, ñich je jäy huídibi tzoon tzajpjoty, co ñich anajty nmiiñich jocjoty m'iid tüg'óciy nmic'ajt n'oy'ajtich. ²⁷ Co jadu'n anajty nmiiñich, chi mic'amy nguexipyich ñich n'ángeles ajcxy ma xii ypidzimy, ma xii ycidägy, ma jimboj ypidzimy etz ma tichpoj ypidzimy. N'ángeles ajcxy yajmuga'ñ tüg'óciy ñich njäy, huídibi ti nhuin'ixyich, xim yam ma ajcxy yajpaady ya naaxhuiñ, etz jiiiby tzajpjoty.

²⁸ Chi Jesús yjacmínañ:

—Jéb miich ajcxy tiy'ajt mbigipy ma yi higueri jadu'n nej je xii je tiempo mimb cidaacni. Co je higueri jadüg'oc ñihuamíy, chi miich ajcxy mnejhuíy co ti yhuingoni mina ypottigíyñi. ²⁹ Nañ tim jadu'n co m'ixipy tuníyb yjadíyb tüg'óciy iixpejt nej ti nni-maaygixy, chi mnejhuíhuip co ti yhuingoni je tiempo mina nhuimbiditych jadüg'oc ya naaxhuiñybi. ³⁰ Janch ñich miich ajcxy nimäy co jada huídibi ti nniimiydacyich tuníyb jadiib ca'ni anajty y'óctay je jäy ajcxy huídibi jacjogy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. ñich n'ayuc huídibi ngapxyich, ca' ycixipy ytigoyipy ni camínaaxii. ³² Ca' ni pin nejhuíy je xii je tiempo mina ytuna'ñyii yjada'ñyii jadu'n nej ti ñich miich ajcxy nñimaaygixy. Ni je ángeles ajcxy jiiyb tzajpjoty ca' nejhuíygyx, nañ ni ñich, Dios y'ung', ca' nejhuíyich. Jéy Dios Teedy tügpaajc nejhuíy.

³³ Ni'ixi' ahuíjxcix. M'ibijctzoogix Dios jabom jabom, com ca' mnejhuíygyx mina anajty ytuna'ñyii yjada'ñyii yi huídibi ti nyajnimaaaygixy. ³⁴ Yi xii yi tiempo huídibi minip jadu'n nipaady nej tüg comeeñyjäy huídibi ñíxcxa'ñ ma tüg it lugar huídibi jigüegy yajpatp. Jayjip ca'ni anajty chooñ, chi yajnibijcy je ytumbi ajcxy nidüg nidüg je' ytung. E nimay je' ytumbi huídibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy miich ajcxy. Com ca' mnejhuíygyx mina je codijc yhuimbida'ñ ma ytijc, pen namgodzxy, o mij coodz, o moñi, o ma anajty ti xyimíyñi. ³⁶ Ca' jécyity co yjadipy timetiini, e xyajyöybéjtcixipy anajty mdzach-maagixy. ³⁷ Yi huídibi ñich miich ajcxy ti nyajnimaaaygixy, nañ jadu'n nimäyich tüg'óciy jäy co huen ajcxy nidüg'óciy ahuíjxcixip ni'ixi' je xii je tiempo mina nhuimbiditych jadüg'oc ya naaxhuiñ.

Xicmujccixy capxmujccixy co Jesús madzaangixy

14 Tigoy'ijtni anajty mejtz xii co judíoájy ajcxy nixii-duna'ñ je pascua xii, mina ajcxy tzajcaagy cay huídibi ca' levadura m'iidity. Je judío teedy ajcxy huídibi jacmijtungm'iid etz je escribas ajcxy huinma'ñ'ix-taaygixy nej jéb ameech májtzcixipy Jesús, e yaj'ogaangixy, ca'ydi je mayjäy nejhuíy. ² Chi ajcxy ñayñimayí miñ xyipy:

—Ca' y'óyity co nmájtzim Jesús xiioty. Com ca' yjécyity co je mayjäy yjotmátcottähuipy, e ytigíhuip huambi jihuíyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiid nibüdz pa'm. Jesús iñaayb anajty ma caydac co ymiin tüg töxyjäy miid tüg tzaadüdz quiig ujtz miid perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁴ E nijëjity jäy ajcxy huidibi anajty jim, ca' anajty ajcxy yjotcújcity miid huidibi je töxyjäy ti tuñ, e ñayñimayt ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixipy yajtoogy yi perfume tugiiig migo'px peexy, jigix yajpubedipy ayoobtjic.

E ca' jadu'n ajcxy tim jäygidacy nej je töxyjäy ytuuñ miid Jesús, chi ix'ojy ajcxy je töxyjäy ayoob.

⁶ Chi Jesús yminañ:

—Ixmajtcix jada töxyjäy. ¿Nej co m'amayñigixy? Yi huidibi ti tuñ miid ñich, ooy yi' y'óyity. ⁷ Je ayoobtjic ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoobtjic. Per ñich ca' n'ida'ñich ya jecy miid miich ajcxy. ⁸ Jada töxyjäy ti tuñ miid ñich jadu'n nej ti ymadägy. Yi' ti pidägy ma ñich nninix perfume huidibi ooy oy yxuugy. Yi' jip'ixpy m'ina naaxtigihua'ñich. ⁹ Janch ñich miich ajcxy ni-maaygixy co huen yma'amyity ya naaxhuiñ ma anajty yaj'ihuäcxy yajcapxhuäcxy jada ayuc jada tiy'ajt huidibi nidzoocin miid, yajnimiydägipy huidi jada töxyjäy ti tuñ, jigix capxpaady y'idipy.

Judas cäyecy yi Jesús ma ymidzip

¹⁰ Huin'it tiempo je Judas Iscariote, nidüg je nima-jmetzpi huidibi Jesús anajty ti huin'ixy, oy miid ñay-gapxyii je teedy mijtungmiidpi nej jëb cäyecy Jesús ma yi teedy ajcxy. ¹¹ Co je teedy mijtungmiidpi ajcxy jadu'n midoy, co je Judas cäyega'ñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'ñixtay nej jëb occäyecy Jesús ma yi' ajcxy.

Co Jesús y'adzu'ajty pascua xiioty

¹² Chi paty je mij xii mina je xii'ajtpidijc tzajcaagy cay huidibi ca'p levadura miidity, e yaj'öccixy je cöbixy huidibi ajcxy yajhuindzigiib anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ájtín?

¹³ Chi Jesús quejxy metz ydiscípulos ajcxy cajpjoty, chi nimay:

—Jim miid mnaybadiyb tüg yëydijc huidibi niñ tzim-nixp ma tüg majt. Miich ajcxy mbanixiiyb je yëydijc.

¹⁴ Mbanixiiyb ajcxy je yëydijc, ixti coon mbajädipy ma ytijc. E miich ajcxy mnimähuiy je codijc: “Je Huindzin Jesús ñejhuñhuam ma miich miidity tüg cuarto ma je Huindzin Jesús miid ydiscípulos ajcxy jëb caaygixy yi pascua xii adzu'ájtín.” ¹⁵ Je codijc c'i'm xyajni'ixiiyigixyip

tüg cuarto mijpi ma je mimetz piso huidibi ti yajni'ixiiy. Ma yijimbi cuarto miich ajcxy mni'ixiihuiy yi pascua xii adzu'ájtín.

¹⁶ Chi je metz Jesús ydiscípulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixiiy je pascua xii adzu'áibi.

¹⁷ Nam coodziiyiñi anajty co Jesús yja'ty ma je cuarto miid jacjadyii ydiscípulos ajcxy. ¹⁸ Co anajty jim ycaaygixy ma je caydac, chi Jesús yminañ:

—Janch ñich miich ajcxy nimay co nidüg miich ajcxy huidibi cham caayb miid ñich, xycäyegaambich ma nmidzipich.

¹⁹ Co je Jesús ydiscípulos jadu'n midooy, chi ooy ytigiiy tajpi maybi ajcxy, e ñay'amidóohuigixy miñ xyipy, e tüg yminañ:

—¿Nej ñich jada'ji?

E jadüg yminañ:

—¿Nej ñich jada'ji?

²⁰ Chi Jesús yminañ:

—Yi' yi' nidügti yi nimajmetzpi huidibi tocxmujcp miid ñich ma tügpi texy. ²¹ Pues janch ñich je', je jäy huidibi tzoon tzajpjoty, nbadaamybich tzaachyipi ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huidibi xycäyegaambich ma ñich nmidzip. Jac'oy co ca' ycadimma'xung'ajty jada yëydijc.

²² Caayb ajcxy anajty, co Jesús conigy tüg tzajcaagy, e jayijp yajnax Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi yminañ:

—Caaygix jada tzajcaagy. Jada tzajcaagy ñich jada nninix.

²³ Chi Jesús conigy je ügy vaso, e co Dioscojuyip yajnaxxy, chi moyday ajcxy je ügy, e nidüg'ócixy ajcxy uucy je ügy. ²⁴ Chi Jesús yminañ:

—Jada ügy ñich nni'py'ajtpy huidibi temamb yogamb. Je' jada jemybi Dios ycotújcin huidibi Dios yejc miid jäy ajcxy ycixpi. ²⁵ Janch tiy'ajt jadu'n nej ñich miich ajcxy ni-maaygixy, co ca' jadüg'oc n'üga'ñich vino niñ, ixti cooni anajty njädyich tzajpjoty ma yi Dios y'ane'my.

Jesús capxidzimy co Pedro ymina'na'ñ co ca' y'ixy'adyii

²⁶ E co Jesús etz ydiscípulos ajcxy iiy tüg himno, chi ñicxy ajcxy ma je cop huidibi xiiip Olivos. ²⁷ Chi Jesús yminañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n yminañ:

“Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuiy.” ²⁸ Per co ñich anajty nju-gypícyich jadüg'oc, co ñich anajty ti n'ögyich, nícxibich jim Galilea jacjayijp, ca'ydí miich ajcxy.

²⁹ Chi Pedro Jesús nimaayi:

—Oy ixipy yi jacjadyii miich mdiscípulos ajcxy xycöguetäy, per ñich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambí coodz ma ca'ni anajty tzeyaxigy mejtz'oc miich xy-

coyüdza'ñich tugig'oc, mina'na'ñ co miich ca' xy'ixy'adyiijich.

³¹ E Pedro ca' anajty cöbiga'ñ nej Jesús yminañ, chi mictägy minañ:

—Ca' ñich miich ngoyüdzan, oy ixyipy ndim'o'c'ich quipxy miid miich.

E nañ actim jadu'n jacjadyii Jesús ydiscipulos ajcxy yminañ nej Pedro ti yminañ.

Jesús mibijctzoy Dios jim Getsemaní

³² Jesús miid ydiscipulos ajcxy oyja'ty ma tög it huidibi xijip Getsemaní, chi Jesús je ydiscipulos ajcxy nimay:

—Íña' miich ajcxy ya, namí n'ocnicxyich jim'amy Dios mibijctzoo.

³³ Chi Jesús miid nicxy jeda'ajty Pedro, Jacobo etz Juan ma tög it ahuingujc. Chi Jesús ytiigiy tajpi maybi jihuüy jotmay. ³⁴ Chi Jesús yminañ:

—Njihuiybich tög jotmay nej n'öga'ñich. Hu'imgix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixyipy ca' minaxy yajnaxy je tzaachypí huidi anajty ypadamy je huin'it hora. ³⁶ E Jesús anajty Dios mibijctzoy yminañ:

—Dios, miid miich ca' ni ti chípity. Píjtcigich jadyaabi tzaachypí ayo'n, per ca' yjadu'nity nej ñich ndzójcin, huen tuñyii jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'óccixy. Chi Jesús Pedro ni-may:

—Simón, ¿nej ti mmi'ögy? ¿Nej ca' mmadäga'ñ m'idipy juugy tög hora? ³⁸ Jugy'íjtcix, e mibijctzoogix Dios ca'ydi jibictuuyb mdigüygixy. Janch tiy'ajt co jotjoty ooy mnijot'ájticy mdunaangixy yi oybi. Per yi mninix oy amaayity.

³⁹ Chi Jesús jadüg'oc huinhuäctuity je' ydiscipulos ajcxy, e jadüg'oc ñicxy Dios mibijctzoo. May'ajt pijctzoy tim jadu'n nej je jayijp'atypí anajty ti yminañ. ⁴⁰ Chi Jesús yhuimbijty ma anajty ajcxy ydiscipulos yajpaady, e jadüg'oc oy pátcixy ti anajty ymi'öccixy, com ca' ajcxy mímadağy máhuü, e ni ca' ajcxy jayty nej adzohuipy Jesús. ⁴¹ Midugig'oc Jesús ñicxy ma je' ydiscipulos ajcxy, e yminañ:

—¿Nej ya mjacmáagixp mjacpooxcixp? Maagix pooxcix jadachambi. Ti miid jadu'ñyi. Ti je tiempo huaad'ájtñi mina ñich, je jay huidibi tzoon tzajpjoty, xycyegipy ajcxy ma yi jibic jaydjic. ⁴² Maybidigcix, tzoc jámim. Chi ymiiñ je jay huidibi xycyegaambich ma nmidzipich.

Mach ajcxy Jesús yajnícxcixy

⁴³ Capxp anajty Jesús, co Judas oyjäty ma Jesús yajpaady. Judas hue' je' nidügti je majmetzpi huidibi Jesús yhuin'ijx. Judas miid miñ mayjäy huidibi ajcxy miid pujx etz quipy. Je teedy mijtungmiidpi, je escribas ajcxy, etz je mijjäydijc ajcxy ti anajty quexy je mayjäy huidibi anajty madzamb Jesús. ⁴⁴ Judas, je huidibi anajty

cýegamb Jesús, hue' anajty jayijp ti moy je mayjäy tög ijxpejt huidibi miid jeb ajcxy ijxcabip Jesús. Jadu'n jayijp Judas ycapxytuñ miid yi' ajcxy, e yminañ:

—Je jay huidibi anajty ndzücxpich, yi' je' anajty Jesús. Madzipy ajcxy, e myajnícxp miich ajcxy yajxon cuend'aty.

⁴⁵ Mic'amy co Judas oyjäty ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n yminañ, chi Judas Jesús tzücx. ⁴⁶ Chi mic'amy je mayjäy Jesús mach, e yajnicxy ajcxy mach.

⁴⁷ Per nidügti Jesús ydiscipulos juudy ypujxy ma ytijc, chi je teedy mijtungmiidpi tög ytumbi yajzaachüyi, quejtzpujxi tög ytätzac. ⁴⁸ Chi Jesús je mayjäy nimay:

—¿Ti co miich ajcxy xyñimiiñich miid pujx etz quipy, jadu'n nej jihuüy ñich tög meetzpi? ⁴⁹ Jabom jabom nyaj'ixpicyich jay jilby ma Dios ytijc ma miich ajcxy yajpaady, e ni ca' miich ajcxy xymajchich. Paady jadu'n ytunyii yjadyii jigix yi' yajcuydumb nej ity jaybety ma Dios ñecy.

⁵⁰ Chi je' ydiscipulos ajcxy yajhui'my Jesús naydügpajc. Chi je' ajcxy yqueegy.

Je jay mutz'anägnip huidibi quectzög

⁵¹ Per tög yujcyeeg anäg huidibi anajty payöy Jesús nimóchity anajty miid tög sábana. Chi Jesús ymidzip ajcxy majch je yujcyeegpi. ⁵² Chi je yujcyeegpi cäqueeg-tuty je mayjäy, yajhui'my ysábana, e yquecytzögy nihuädz ixhuädz.

Jesús mij juntajoty

⁵³ Chi ajcxy yajnicxy Jesús mach ma je teedy mijtungmiidpi yajpaady. Chi mic'amy ñaymujci tög'óciy teedy ajcxy huidibi mijtungmiidpi, e tög'óciy mijjäydijc, etz tög'óciy escribas ajcxy. ⁵⁴ Chi Pedro jigüegy anajty panicxy je mayjäy ajcxy ixti oy yja'ty ma je teedy mijtungmiidpi ytiba'. E jim ixtacy quipxy miid policia ajcxy aguyc, yxaamgixy anajty ma jinba'.

⁵⁵ Je teedy ajcxy mijtungmiidpi etz tög'óciy je judíoäy ytungmiidpi ajcxy yhuinma'ñ'ixtaaygixy nej ajcxy jeb Jesús yajpocycy' miid ajcxy yxñhuin, e jadu'n jeb mooygixy yi' ócin. Per ca' ajcxy paady huinma'ñ.

⁵⁶ Mayjäy nihuambejty Jesús miid anñ, e ca' ajcxy y'ayuc ytügy. ⁵⁷ Nijjity jay ytinayigy juntajoty, e nihuambety ajcxy Jesús, yminaangixy:

—Ñich ajcxy amido'ijt Jesús y'ayuc tög tecz, co jadu'n yminañ: "Njidaamybich jada Dios ytijc huidibi jay ti cójicy, e codugig xii gojtigadzipich huingbi huidibi ca' jay cojy."

⁵⁹ Per ni ca' ytügüy ajcxy y'ayuc nej ajcxy Jesús nihuambejty, ac tigachjaty nidüg nidüg yminañ ajcxy.

⁶⁰ Chi je teedy huidibi je jacmijtungmiid ytinayigy juntajoty, chi y'amidooy Jesús e nimay:

—Jesús, ¿ca' nej m'adzohua'ñyí? ¿Ca' mmidooy nej xychachxigixy?

⁶¹ Per Jesús amon y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús ymíñañ:

—Janch jadu'n, ñich je' je Cristo, je jäy huidibi tzoon tzajpjoty, e miich ajcxy xy'ixipich ññayich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuiñ.

⁶³ Chi je teedy huindzech huinhuocy yci'm yhuit, je' je' tity'ájtíp co ca' anajty yjotcújcíty mñid Jesús y'ayuc, chi ymíñañ:

—¿Ti testigo njac-huaanim? ⁶⁴ Miich ajcxy ci'm ti mmi-doogixy yí' y'ayuc, jadu'n nej ycapxtigoy mñid Dios. ¿Nej miich ajcxy mínaangixy?

Chi nidüg'óciy ajcxy ymíñañ co janch jadu'n Jesús mij oy ti ycapxtigoy mñid Dios ytiy'ajt, paady huaad mooygixy yí' o'cin.

⁶⁵ Chi nijéjity jäy yhuindzujégy Jesús. Chi ajcxy huin-goxodziy, cójxcixy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuiñyijp.

Pedro ycoyüch Jesús

⁶⁶ Pedro tibäy anajty y'ahuixy. Chi ñimijhuäci tüg tumbi töxyjäybí huidibi anajty tumb ma je teedy ytiç.

⁶⁷ Co je töxyjäy iixpaty Pedro ññay anajty jñnba'áy, yx-aamb anajty. Chi huindixpejty Pedro, e nimay:

—Miich nañ mñidhuidijtpy anajty je Jesús yí' Nazaret-pí.

⁶⁸ Per Pedro ca' cöbijcy je töxyjäy y'ayuc, e ymíñañ:

—Ca' n'ixy'adyijich jada Jesús. Ni ca' nhuinjihuñyich ti miich nimíydacpy.

E mic'amy Pedro ypidzimy jiiiby, e tim huin'ítity tüg tzeyñ'aa oy yaaxégy. ⁶⁹ Chi jadüg'oc je tumbi töxyjäybí huindixpejty Pedro, e nimay je jäy ajcxy huidibi jim yajpatp huingon, e ymíñañ:

—Jada je' nidügti huidi anajty mñid huidity Jesús.

⁷⁰ Chi Pedro jadüg'oc ymíñañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmidooybich miich m'ayuc nej Galileo jäy ycapxcixy.

⁷¹ Co ajcxy jadu'n ymíñañ, chi Pedro mictägy ñay-gogapxi co ca' yí' mñidhuidity Jesús, ymíñañ:

—Dios y'ijxpy ñejhuñyb co tity'ajt ngapxyich, co ca' n'ixy'adyijich yí' Jesús huidibi miich ajcxy mnigapxyp.

⁷² Co Pedro ycapxymaayi tim huin'ítity tüg tzeyñ'aa yaaxégy mímeytz'ocpi. Huin'it Pedro jäy metzcoody nej Jesús ñimäyii: "Cham coodz jayijp ca'ni anajty tzeyñ'aa yaaxégy metz'oc, ti anajty miich mínañ tugi'oc co ca' xy'ix'adyijich." Co Pedro jadu'n jäy metzcoody Jesús y'ayuc, chi tajy may ñayjihuiyi, e ytiçiy yaaxpi.

Jesús ma Pilato yhuinduu

15 Co yximíy, chi je teedy ajcxy huidibi mij tung mñid, je mijjäydijc, je escribas ajcxy, etz tüg'óciy judíojäy huidibi mij tung mñid yöymujctay ajcxy. Chi nidüg'óciy ajcxy yajñcxcixy Jesús cixoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yí' judíojäy ajcxyi?

Chi Jesús ymíñañ:

—Miich jadu'n minamb.

³ Je judío teedy ajcxy huidibi mijtungmñidpi mictägy tzachxigixy Jesús mñid canaagnax xñhuin. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohuañi? Ix nej yí' mñidzip ajcxy xy-chachxigixy.

⁵ Chi Jesús ca' ni nej y'adzooy. E Pilato ooy chachhuin-may'ahuidijty.

Jesús yajmoy ysentencia co y'ögipy

⁶ Com xijoty anajty, je gobernador Pilato najtz-madziy tüg machyjäy, je huidibi je mayjäy anajty ypiçtzooçixyp. ⁷ Pujxtijc ññaayb anajty jim Jerusalén tüg machyjäy huidibi anajty yxñ Barrabás. Barrabás pujxtijc ññaayb anajty quipxy mñid jacjadyii jäy huidibi anajty ti midziptzoon je gobierno romano, e ti anajty yjäy yaj'óccixy. ⁸ Co anajty je may yxñ'ajtpidijc may'ajt piçtzooçixy ma Pilato co najtzmadzñhuip tüg machyjäy, chi Pilato ymíñañ:

—¿Nej mdzojccixyp co nnajtzmadzñhuibich je judío-jäy ajcxy yrey?

¹⁰ Pilato ñejhuñyb anajty co mañ'ajtingéxy anajty ajcxy je teedy mijtungmñidpi ti cñeyccixy Jesús. ¹¹ Per co Pilato jadu'n ymíñañ, chi je teedy ajcxy mijtungmñid-pi ooy ajcxy yajhuamgoty yajjihuiygoty je mayjäy co huen je Pilato najtzmadzñy je Barrabás. ¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich mñid jada yey-dijc huidibi jäy ajcxy ytiçpy co yrey'aty ma yí' judíojäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato ymíñañ:

—Per çti yí' ti tundigoy?

Huin'it je mayjäy nigí mic ymíñañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcujc'adaangixy je mayjäy, chi najtz-madziy je Barrabás. E co yajc'ajttay yí' Jesús, chi cñeyc-ni co huen yajcruutzpedyii.

¹⁶ Chi je soldados ajcxy yajnicxy Jesús ma je agujctijc tñba', e jim ñaymujci tüg'óciy soldados ajcxy huidibi yaj-patp anajty jim Jerusalén. ¹⁷ Chi ajcxy yajñijeníy je Jesús tüg rey yhuit, color ucypí e yajcojeníy ajcxy apy corona. ¹⁸ Chi je soldados ajcxy ymíñañ:

—¡Viva jada judío rey!

¹⁹ Chi je soldados ajcxy huoçpy Jesús ma ycohuajc mñid paxy, e huindzuj jijptzujcixy ooy, e huingojxti-nay'ahuñyigixy janch ypaad nej jihuiy ooy huindzigíygixy. ²⁰ Co je soldados ajcxy nixiictay yajxiic-tay Jesús, chi ajcxy jeeni je yreyhuit color ucypí, e yajñi-jeniíy ajcxy yci'm yhuit jadüg'oc. Chi ajcxy Jesús mñidca-jppidzimy co anajty yajcruutzpedaangixy.

Co Jesús yajcruutzpejti

²¹ Tü'am ajcxy tüg jäy mïdñaybati, hue' anajty yxii, Simón, ycogájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

²² Chi ajcxy yajnicxy Jesús ma tüg it lugar huidibi yxii Gólgota, je ayuc Gólgota jadu'n yhuimbídzimyo o'cpi co-huajc. ²³ Chi ajcxy moy Jesús vino huen ügy tem huidity mïd mirra tzoy. Per ca' Jesús cöbicy je vino ni. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuít yajhuäcxaani, oc'ixaangixy pin anajty ocjé'ájtíp.

²⁵ Petyxii anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n yminañ:

—Je judíojäy ajcxy yRey. ²⁷ Quipxy mïd Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n yminañ: "Yaj'amichoomujc je Cristo mïd je pocyjäy ajcxy."

²⁹ Je mayjäy huidibi ajcxy naxiiyb anajty ma Jesús yajpaady cruutzcäxy, ooy anajty ajcxy ycöjigiiyñ, nixiicy yajxiicy ajcxy Jesús, yminañ ajcxy:

—Bah, miich huidibi Dios ytijc mjidaanip, e codugiiñ xii huingbi myajpidäga'ñ, miich c'i'm cham naygo-huaani, e minac cruutzcäxy.

³¹ Nañ jadu'n je teedy ajcxy mïjtungmïdipi etz je escribas ajcxy nixiicy yajxiicy ajcxy Jesús ñayñimayí miñ xyipy:

—Jada Jesús ti cohua'ñ jacjadyii jäy, e ca' jaty nej c'i'm ñaygohua'niyb. Pen janch, co jada Jesús yjéjity je Cristo huidibi rey'adamb ma yi judíojäy ajcxy, ymïd ixipy mic'ajt jaydéb c'i'm yminagipy cruutzcäxy. Co jadu'n ixipy n'ijxim co c'i'm ti yminacy cruutzcäxy, huin'it mibíjicim co janch jada jéjity je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy mïd Jesús nixiicy yajxiicy ajcxy je Jesús.

Co Jesús y'ögy

³³ Co yucjxiijiiy, chi ycoodzyigiday tüg'óciy naaxhuiñ. E jadu'n je naaxhuiñ y'ijty coodz ixti minacyxii. ³⁴ Mina-cyxii Jesús mic yminañ mïd aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbídzimyo: Tat Dios. Tat Dios. ¿Na'amy co ti xy'ix'ixyich?

³⁵ Nijéjity jäy huidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy yminañ:

—Midoogix, Elías yi' yaaxtaayb.

³⁶ Chi nidügti ajcxy ninicy Jesús poyigy, ti anajty yajxoogy pixy mïd vinonii ta'mbi, e yajjijpxodzyi je pixy ma tüg paxy, e jadu'n yajja'ty je vino ni ta'mbi ma Jesús y'ahuac, huen muucip je vino ni ta'mbi. Co jadu'n tuñ, chi yminañ:

—Tzoc oc'ahuíxim pen mimb Elías, e miñ yajminagyii ma yi cruudz.

³⁷ Chi Jesús mic ycapxueegy, chi y'o'cy. ³⁸ Co Jesús y'o'cy, chi je mapxhuit ycäitzhua'cxy tinä'amy huidibi anajty mïd y'adiydútyity je Dios ycuarto ma je teedy mïjtungmïdipi ytigiy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuindu, co jadu'n midoy nej Jesús mic yaaxxueegy, e ijxy nej y'ögy, chi yminañ:

—Janch co jadyaabi yéydijc anajty Dios ung'adyii.

⁴⁰ Nañ jim anajty nijéjity töxyjäydijc ymij'ijxcixy jigüegy. Jim anajty yajpaady María Magdalena, etz je jadügpi María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadyaabi töxyjäy ajcxy mïdhuidijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy mïd Jesús.

Jesús yajnaaxtigiiy

⁴² Paady co chu'iiyñi hue' anajty viernes mina judíojäy ñayyajpocyñihuáatzigixy, jaydéb anajty amay'adaangixy je sábado xii je com jabom. Chi José huidibi anajty cogajp Arimatea yjotmictuñ, chi ytigiiy ma je gobernador Pilato, pijctzooy may'ajt co yajnaaxtigihuaani Jesús ñinixc. E hue' je' José anajty tungmïd ma yi judíojäy ajcxy. José yjijp'ijxpy anajty mina Dios pidäga'ñ yi' y'ané'min ya naaxhuiñ. ⁴⁴ Pilato ooy tzach-huinmay co Jesús tim mic'amy ti y'ögy anajty, paady huoodzoy je soldado huindzin, e tiy'ajt pijctzoy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuiipy Jesús. ⁴⁶ Chi José juy poob huit, e co yajminajcy Jesús ñinixc, chi mo'ñ mïd je poob huit, e chi pidacy ma tüg tzaajut huidibi anajty ti yajtze-jtztüdy ti yajpadüdy ma tüg tzaahuingueetz. E chi yaj'adujcy je öcpi jut mïd tüg mij tzaa. ⁴⁷ E je metzpi töxyjäy María Magdalena etz je jadügpi María huidibi José ytaj'ajtpy huindicxp anajty ajcxy co Jesús ñaaxtigiiy.

Jesús yjugypijcy jadüg'oc

16 Com jabom jopy, domingo, chi je tugiiñ töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinixc. ² Je tugiiñ töxyjäy chooñ domingo, seaman ixtigi', tim jopyñi. Ti anajty ypidzimni je xii co ajcxy oyjädy ma je öcpi jut. ³ Chi je tugiiñ töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huidibi mïd agiiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agiiydujcp. ⁵ Chi ajcxy ytigiiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymïd. Co ajcxy jadu'n ijxy

je yeeg'anäg jii by jutjoty, chi je töxyjäy ajcxy ooy chigiiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yi jacjadyii Jesús ydiscípulos ajcxy co Jesús níxcip jayijp jim Galilea, e jim Galilea ñaybadiiyb ajcxy mïd Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy mïd tzig'iñ. E ni ca' ajcxy nimay ni pin nej anajty ti ijxcixy, com ooy anajty chigiiygixy.

Jesús ñaygue'xíci ma María Magdalena

⁹ Je domingo, semana ixtigi', co Jesús yjugypicy, chi ñayguëxíci jayijp ma María Magdalena, je' je' je töxyjäy huidibi anajty Jesús ti yajpidzimi huixtuc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi mïd yhuidijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxíci ma metz ydiscípulos

¹² Co hueeñi, Jesús ñayguëxíci nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti ijxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajniibijc

¹⁴ Jac com jecy, Jesús ñayguëxíci ma je majtügpi discípulos ajcxy ma anajty y'ñaaaygixy ma caydac. Chi Jesús ooy ajcxy co ca' ajcxy mibíjccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'ijxcixy Jesús. ¹⁵ Jesús je' ydiscípulos ajcxy nimay:

—Níxcix miich ajcxy ma tüg'óciy naaxhuiñyjäy, ma tüg'óciy naax cajn, e capxhuäcxix ajcxy je oybi ayuc nej jäy ajcxy jëb y'almanidzögipy. ¹⁶ Pinjaty mibijc etz ñibejtcixy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip mïd ypocy ycixpi. ¹⁷ Yi jäy ajcxy huidibi mibijcp, ooy ajcxy ijxpejt túngixipy. Mïd ñich nxi ñich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n yápxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtcixipy. E co ajcxy veneno ügip, ca' ajcxy ypa'mdunñib. E co ajcxy cñixájipy pa'mjäy, tzögip je pa'mjäy.

Jesús ypätigiiyñi tzajpjoty

¹⁹ E co je Huindzin Jesús ycapxy ycixy mïd je' ydiscípulos ajcxy, chi ypätigiiyñi tzajpjoty. Jii by tzajpjoty Jesús yajpaady ma Dios ymijc a'oy'amy, mïd mij'ane'min. ²⁰ Chi Jesús ydiscípulos ajcxy chooñ ñíxcixy cajn cajn capxhuäcxy ajcxy Jesús y'ayuc ma nidüg'óciy naax cajn. E je Huindzin Jesús ooy ajcxy ypubejti ypuđigiiyi, mic'ajt moy je' ajcxy mïd je ijxpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

1 Mayjäy ti cojaay je ayuc je tiy'ajt huidi ñich ajt ne-jhuiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuiñ ixti mabaad ycocigixiy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocigixiy, je' ajcxy huidibi capxhuäcxy Jesús y'ayuc ytiy'ajt. ³ Ñich nañ jadu'n ti nyajcäyöyich ti nyajte-cyyöyich yajxon je tiy'ajt nej Jesús chondacy je' chi-naayin ya naaxhuiñ ixti mabaad ycocigixiy. Paady ycixpi ñich nhuinma'ñ pidägy co ñich miich nyajnijayñhua'ñ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuñhuipy yajxon je tiy'ajt, jadu'n nej miich ti m'ixpicy.

Tüg ángel nigapxy co Juan el Bautista ypi'c'ada'ñ

⁵ Jadu'n ytuni yjajti co anajty Herodes yrey'aty ma Judea naax cajp, jim anajty tüg judío teedy hue' anajty yxñ Zacarías. Je' anajty semandumb miid Abías y'aju-gytijc y'amigügtijc. Je Zacarías ypijcy miid Aarón y'oc-niix, hue' je' anajty yxñ Elisabet. ⁶ Dios y'ijxyp ñejhuiy co je' anajty ajcxy ytudägyjäyity nimetz. Je' ajcxy ycu-ydumyib tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyññ nimetz.

⁸ Chi tügtecy Zacarías miid y'ajugy y'amigüg yteedy'ájticy anajty ma Dios ytijc. ⁹ Jadu'n nej teedy ajcxy ycostumbre miidty, chi ñigooti tung je Zacarías mina ypoomjogipy jiiiby ma yi Huindzin Dios ytijc.

¹⁰ Tüg'óciy je mayjäy ooy anajty Dios miibijctzoogixy ti-ba'y. Yam Zacarías tzajtigoty ypoomjocy, ¹¹ co ñayquëxici Huindzin Dios y'ángel tüg ytinäy a'oy'amy ma je poomjocac. ¹² Co Zacarías ijxy je ángel, chi ooy chigixiy. ¹³ Chi je ángel nimaay Zacarías:

—Ca' mdzigëy, ti Dios midooy yi mjuydácin mnucx-tácin. Yi mdöxyijc Elisabet ypaadipy tüg ung yëydijcpi, e mximöhuiipy Juan. ¹⁴ Mjotcujc'adip mxondägip miich etz mdöxyijc, nañ may yi jäy yjotcugñhuipy co anajty m'ung ti ypi'c'aty. ¹⁵ Chi yi m'ung ycomay'ida'ñ ma Dios. Ni ca' ügipy vino ni jocñi. Ma ca'ni anajty yma'xung'aty ymiid'adipy yi Dios yjihui'ñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycocapxy'aty ma yi jäy ajcxy huinmic jotmic miid Dios yjihui'ñ ymic'ajt, tim jadu'n nej Elías je-cy'ajty ycocapxy'ajty huinmic jotmic miid Dios yjihui'ñ ymic'ajt. Je' m'ung yajjothuimbidipy je ungdeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycöbicy yi Dios, jigix ajcxy paadipy

oyjot oyhuinma'ñ. Nañ m'ung ñimähuipy je jäy ajcxy huen nayñi'ixíyigixy miid yHuindzin Dios ycixpi.

¹⁸ Chi Zacarías nimay je ángel:

—¿Nej jada ñich nejhuñhuipy peni janch huidibi xya-jnimaaybich? Ti nmijjäyññich, cham ndöxyijcich nañ ti ymijjäyññi.

¹⁹ Chi je ángel y'adzooy:

—Ñich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhuñ'mipy uum, ni ca' m'ocjájtñip nej mgápaxy, miid co ca' mmibicy jada ñich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuíjxcixy Zacarías, ooy anajty ajcxy tzachhuinmaaygixy ti co chachhuäcxiy jiiiby ma Dios ytijc. ²² Co Zacarías ypidzimy, chi ca' anajty y'occapxni. Chi je jäy ajcxy huinjihuüy co ti anajty ixy ti-jaty jiiiby ma Dios ytijc. Hue' je' yjacmiydacy a'ixy'amy, e oyhuim'ixy uum.

²³ Co je semandung yajmay, chi Zacarías ñicxni ma ytijc. ²⁴ Co jadu'n yjajty, chi Elisabet jihuiy co ti anajty y'ung tzimëgy ciyë gy. Chi yüch'ijty migoox po', e ymi-nañ: “Jadu'n yi Huindzin Dios ti ytuñ miid ñich jadachambi tiempo, ti xyjäytechich ti yajquëgy ñich ndzöydu'n ma yi mayjäy ajcxy.”

Tüg ángel nigapxy co Jesús ypi'c'ada'ñ

²⁶ Co tudujc po' maabi Elisabet anajty y'ungtzimëgy, chi Dios quejxy je' y'ángel Gabriel jim Galilea naaxjot ma je cajp huidi anajty yxñ Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ miid tüg yëydijc huidi yxñ José. José hue' anajty David y'ap y'oc. Je töxy'anäg hue' anajty yxijity María. ²⁸ Co je ángel ytigixy ma anajty María, chi nimay:

—María, Dios ti xy'ijxty, je Huindzin Dios y'oy'ajt miid miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigixy miid je' y'ayuc, chi huinmay ooy miid jada copxpócxin nej co yjadú'ñity. ³⁰ Chi je ángel yminañ:

—María, ca' mdzigëy, miich Dios ti xy'ijxty.

³¹ Jadachambi, m'ungdzimëgip, myajpi'c'adipy tüg mang, huidibi mximöhuiipy JESUS. ³² Je Jesús mij y'idipy, hue' je' yajtíjipy Dios tzajpjoty y'ung. Chi je Huindzin Dios möhuüyb je ané'min huidi yi' ymij'ap ymijteedy David ymiid anajty. ³³ Je Jesús ané'mip huinixi ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaay:

—¿Nej jada co yjadú'nity? ñich ca'ni nyëydijc miid tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma miich, je Dios tza-jpjotypi ymic'ájtín xyajnídujttáhuip, je oyjäybi jäy huidi pi'c'adam, hue' yajtíjipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäyñi. Cham midudujc po'bi maabi y'ung tzimígy je huidibi jäy ytipy ca' y'ung'ixaani, ³⁷ com miidi Dios ca'ni ti chípity.

³⁸ Chi María yminañ:

—Jotcujc nguydunipyich yí Huindzin Dios chójcin, huen jadu'n tuñyí jadyí ma ñich jadu'n nej miich m'ayuc xymöyich.

Chi je ángel ñicxni.

María y'oy cogapxë Elisabet

³⁹ Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigíy ma Zacarías ytijc, e capxocxy Elisabet. ⁴¹ Chi jadu'n yajty co Elisabet midoohui María ycapxpócxin, chi jihuüy co y'ung yücx ma yjot. E chi je Elisabet ooy yjotcugiy miid je Dios yjihui'ñ ymic'ajt. ⁴² Chi yminañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴³ ¿Nej ñich jada co jadu'n ti n'ahuägë co nHuindzinich ytaj miñ xy-co'ixëyich? ⁴⁴ Co ti nmidooyich yí mgapxpócxin, ti ñich n'ung yücx ma ñich njot co chachjotcújcity. ⁴⁵ Jotcujc'adip pinjaty ti ymibicy, co cuyduñ y'ida'ñ je ayuc miid je Huindzin Dios ycixpi. ⁴⁶ Chi María yminañ:

Ooy mij n'ojadatyich yí Huindzin Dios.

⁴⁷ Ooy nxondägyich miid Dios ycixpi, ñich nnihuambi nyajtzoocpi,

⁴⁸ co yí ti xyñi'ijxcidägyich, co ñich ayoobi xytumbi'adyíjich. Jadachambi etz jacnicxp xii tiempo, tüg'óciy jäy ajcxy oy mina'nip co jotcujc'ájtich.

⁴⁹ Yí Dios tüg'pajc mñjip, tñbi tun miid ñich, ooy yí yxii ymíjity.

⁵⁰ Dios ypa'ayooyb hueñypínity huidibi huindzigíyip jadachambi etz jacnicxni xii tiempo.

⁵¹ Dios ti ooy tuñ mijpi huinma'ñ, ti jñbicy pinjaty amij agix nayjihuiyip ma yjot yhuinma'ñ.

⁵² Dios ti yajpidzimy yí mijpi rey ma y'ane'my, ti mij'ajt möy ayoobidijc.

⁵³ Pinjaty ayuu'ijtp anajty ymooy ti miid yjotcujc'adip, etz yí comeeñyädijc ajcxy ti ixmach ca' ni ti.

⁵⁴ Dios ti pubety yí Israel jäy, yí ajcxy ytumbi, miid co anajty ti pa'ayogoty je' ajcxy,

⁵⁵ jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb miid je' ajcxy huinixii.

⁵⁶ Chi María tugüg po' jim y'ijty miid Elisabet, chi yhuimbijtni ma ytijc.

Juan el Bautista co ypi'c'ajty

⁵⁷ Co je Elisabet oy yajhuaad'ajtni xii tiempo, chi yajpi'c'ajty tüg ymang. ⁵⁸ Chi ayuc midooy ajcxy je ymijñ

ymidijc etz y'ajugy y'amigüg jadu'n nej Dios may'ajt ti tuñ miid Elisabet. Chi ajcxy ooy yjotcugiy miid je' ycixpi. ⁵⁹ Chi jadu'n yajty conductujc xii je ymijñ ymidijc etz y'ajugy y'amigüg miñ ma Zacarías ytijc co anajty tiy'ajttñhuaangixy je pi'c'anäg. Chi ajcxy yajxi'ada'ñyí anajty jadu'n nej yteedy yxii Zacarías. ⁶⁰ Chi ytaj yminañ:

—Ca' xii'adiyb Zacarías, hue' yí huen xii'adyii Juan.

⁶¹ Chi je' ymigügtijc ajcxy yminañ:

—¿Na'amy? Ni tüg miich m'amigüg jadu'n ca' xíjity.

⁶² Chi ajcxy y'amidoohui je' yteedy jadu'n a'ixë'y'amy, nej yí yajxi'ada'ñyí. ⁶³ Chi Zacarías pijctzoy tüg necy, e jaay jadu'n: "Juan huen xii'adyii." Chi je ymigügtijc ajcxy nidüg'óciy ooy jihuiy huinmaay. ⁶⁴ Chi mic'amy Zacarías y'ahuac ahua'cxy e ytoodz yungíy, chi oy ycapxígy e jäymejch cömay yí Dios. ⁶⁵ Chi tüg'óciy ymijñ ymidijc ooy chigíy. Chi ajcxy nimiydactay nej Zacarías ti yjaty ma tüg'óciy jäy huidibi tzinaayb Judea yuugjotypi tzinaaydac. ⁶⁶ Tüg'óciy pinjaty anajty midoob je ayuc, chi jäymejtzhui'm ajcxy ma yjot yhuinma'ñ, chi ñayñimáayigixy:

—¿Ti jada' ytunamyb jada pi'c'anäg?

Com je Huindzin Dios je' miid y'ity.

Je Zacarías y'iy

⁶⁷ Chi je ungededy Zacarías miid je Dios yjihui'ñ ymic'ajt Dios y'ayuc najtzcapxiy yminañ:

⁶⁸ Cömay yí Israel jäy yHuindzin Dios, co ti ni'ijxcidägy, ti cohua'ñ yí ñaax ycajp,

⁶⁹ Dios ti quexy tüg mij nihuaambi yajtzoocpi, ma yí ytumbi, David y'ap y'oc ajcxy.

⁷⁰ Com Dios jadu'n yminañ jecy'ajty miid yí y'ayuc najtzcapxiyb huidibi huätzjäyip;

⁷¹ je' xyñihuánaanim ma ñich ajt nmidzip, nañ xypubedaanim xypudigíhuanaanim ca'ydi xycgáhuüyím huidibi ca' xy'ixaanim xychogaanim.

⁷² Jaydëbi pa'ayoohuipy ñich ajt nmij'ap nmijteedy, etz jäymedziyb jadu'n nej ayuc ahuaníy miid je' ajcxy.

⁷³ Jadu'n nej Dios janch huinijot y'ayuc ahuaníy miid ñich ajt nmij'ap nmijteedy Abraham jecy'ajty huidi anajty xymöhuaanim.

⁷⁴ Co nihuätzëctuum ma nmidzip, huin'it jaydëbi miyaaxim n'ojadájtím ca' ma tzigí'ñ jihui'ñ,

⁷⁵ miid huätzhuinma'ñ etz tudägy huinma'ñ ma yí yhuinduu jabom jabom ixti mibaad ndzinaayim.

⁷⁶ Miich ma'xung, jäy hue' myajtijip mijpi Dios y'ayuc najtzcapxiyb. Miich ñicxip cogapxy, nicx yajni'ixë jäy miid Huindzin Dios ycixpi.

⁷⁷ Yajni'ix' yí cajpjäy jadu'n nej huaad ajcxy y'alma paadípy nihuaanim yajnidzoocin, etz jadu'n nej huaad ajcxy ypocy huinmecxiyb.

⁷⁸ Jadu'n nej Dios ñich ajt ti xypa'ayoohuim co ti xyñi'ijxcidaacim etz xymooyim tiicxin jájin huidibi tzomb tzajpjoty,

⁷⁹ jaydëbi yajmöhuiy jäy ajcxy Dios ytiy'ajt huidibi ajcxy tzinaayb agootztuum etz o'c jijp'am, jigix ajcxy xytümooyim ma je tudägypí tü'aa.

⁸⁰ Je pi'c'anäg yeeg yjodijy huinmic jotmic miid yí Dios yjihui'ñ ymic'ajt. Chi chinaay adügtuum ma ca' pin, ixti

cooni xii tiempo paty mina ñicxipy cogapxy ma Israeljäy ajcxy.

Jesús yma'xung'ajty

2 Huin'it xii Augusto César pidacy y'ane'min huen tüg'óciy jäy nicxy necypejttaaygixy. 2 Je jayijp'atypí padrón hue' je'yaj'oyiyy Cirenio huídibi anajty gobernador'ajtp jim Siria ñaaxjot. 3 Chi jäy ajcxy nidüg'óciy ñicxtay yajcojayiyybi nidüg nidüg ma yci'mgajp. 4 Chi José chooñ jim Galilea naaxjot ma je cajp huídi yxii Nazaret, ñicxy ajcxy jim Judea naaxjot ma je David ycajp, huídi yxii Belén. Yi José ñicxy jim Belén com ymij'ap'ajtpy ymijteedy'ajtpy je David. 5 Chi José yajcojayiyy padrónjoty miid María, je töxyjäy huídibi anajty ymiid capxytuñ, huídi anajty ung tziim'ijtp. 6 Chi jadu'n yjajty co ajcxy anajty yjímity Belén, chi oyhuaad'aty co María paadípy y'ung. 7 Chi yma'xung'ajty je ungoob, e chi nibe'ñ nimüxy miid ymotz, e chi agög'iyy ma iyujc pëcxí'ñ, co ca' anajty ti paady jättac.

Je ángeles ajcxy etz je cöbixy cuend'ajtpi ajcxy

8 Chi mihuigon je cajp anajty jäy ycöbixy cuend'aty. Hue' anajty ajcxy yhuin'inaayb huintzuumnajxyp je' ycöbixy ajcxy. 9 Chi Huindzin Dios tüg y'ángel ñigidaaci je' ajcxy, e yi Huindzin Dios y'oy'ájtín y'adixcoody jühuidity ma je' anajty ajcxy ymijc, chi ajcxy ooy chigiiy. 10 Huin'it je ángel yminañ:

—Ca' mdzig'iyygixy, cham iich miich nyajnimaaaygixy oybi ayuc huídibi yajjotcug'ihiipy tüg'óciy naax cajp. 11 Miid miich ajcxy ycixpi ti ypi'c'aty cham ma je David ycajp tüg jäy huídibi miich ajcxy xyñihuänaam xycohuänaam ma ajcxy mmidzip. Hue' je' je CRISTO, je Huindzin Dios. 12 Yi' je' iixpéjtíp huídi miid m'ijxcabipy. Mbáadípy ajcxy je ung ma'xung ñimóchity miid ymotz, ycöcnäy ma iyujc pëcxí'ñ.

13 Chi janch mic'amy ñayguëxíci miid je ángel may yi tzajpjoty chínaaybi, chach Dios ojadájticy ymináangixy:

14 ¡Ooy ycömáyity ooy ymíjity yi Dios tzajpjoty, ji naaxhuíñ jotcuyc'ajt miid jäy ajcxy ycixpi huídibi Dios yjäygidacy!

15 Jadu'n yjajty co je ángel ajcxy ñicxtay tzajpjoty, chi je cöbixy cuend'ajtpi ajcxy ñayñimay:

—Tzoc jámim jim Belén, jaydëbi n'ijxim ti ti ytunyii ti yjadyii huídibi nHuindzin'ájtím Dios ti xyajnimáayim.

16 Chi ajcxy ñicxy jottigoy, chi oy pátcixy María, José etz je ung ma'xung y'agög'iyyity ma je iyujc pëcxí'ñ.

17 Co ajcxy ijxy je María etz je ung ma'xung, huin'it ajcxy nigapxtay nimiydactay jadu'n nej je ángel ajcxy ñimayí miid je pi'c'anäg ycixpi. 18 Tüg'óciy jäy huídi midou ooy jihuüy huinmay jadu'n nej je cöbixy cuend'ajtpi ajcxy yminañ. 19 Chi María mido'mbijctay, e yajhuí'my ma yjot yhuinma'ñ. 20 Chi yhuimbijty je cöbixy cuend'ajtpi ajcxy cömay jäymeck ajcxy yi Dios, etz ooy alabanza ajcxy iyy miid Dios ycixpi miid tüg'óciy jadu'n nej anajty ti ijxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxgy ma Dios ytijc

21 Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxii moy JESUS, jadu'n nej je ángel anajty jayijp ti ymina'ñ ca'ni anajty chimigiyii yciygyii.

22 Co je xii oypaatni mina je María anajty yhuätzpidzi maamni, jadu'n nej Moisés ycotújcín je jécyip yminañ. Chi ajcxy miidnicxy je ung ma'xung jim Jerusalén capxquëxigaangixy ma yi Huindzin Dios yhuinduu. 23 Com jadu'n anajty yjaybétyity ma Huindzin Dios ñecy:

Tüg'óciy ungoob yëydijcpi huídi ma'xung'ajtp, abicy yhuí'mipy miid je Huindzin Dios ycixpi.

24 José etz María oy yéjccixy huindzig'i'ñ jadu'n nej Huindzin Dios ñecy ymina'ñ co jëbi yecy metzc jam muuxy o pajctza'm muuxy.

25 Jim Jerusalén anajty chinäy tüg jäy huídi anajty yxii Simeón, tudägyjäy je', etz ooy Dios jäymeck. Simeón y'ahuixyp anajty mina Dios miñ yajjotcuyc'ada'ñ Israeljäy ajcxy, e miid je' anajty Dios yjihui'ñ ymic'ajt. 26 Dios yjihui'ñ ymic'ajt ti anajty yajnejhuüyii co ca' chojc öga'ñ, jayijpni oc'ixipy je Huindzin Dios yCristo. 27 Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymiidnicxi ma Dios ytijc, cuyduñ ajcxy jadu'n nej Dios ñecy y'ane'my. 28 Chi Simeón tzendzoy etz capxpaady je ung ma'xung, e chi Dios mibijctzoy miid je' ycixpi, chi yminañ:

29 Jadachambi capxcix jotcuyc, Huindzin Dios, miid iich miich mdumbi, com ti mguyduñ jadu'n nej ti xyñimäyich co n'ixipyich je Cristo.

30 Cham ti n'ixyich je nihuambi cohuambi,

31 huídibi ti mni'ixy ma tüg'óciy jäy ajcxy yhuinduu.

32 Jada ung ma'xung ytiy'ajt yegip ma yi jäy ajcxy huídi ca' yjudiojäyity. Jadu'n yi' nipaady nej tüg jün huídi codicxyp je jäy. Cömay y'idipy yi Israel jäy miid yi' ycixpi.

33 José etz Jesús ytaj ooy jihuiy huinmaay jadu'n nej Simeón ñigapxy je pi'c ma'xung. 34 Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminy co may Israel jäy yjothuinma'ñ yaj'oy'ihiipy miid yi Dios etz nañ jadu'n may Israel jäy yjothuinma'ñ ca' yaj'oy'ihiipy miid yi Dios. Yi' je' tüg iixpejt co ca' jäy y'ixa'niiyb choga'niiyb, e jadu'n tüg'óciy yajnejhuüyii nej ajcxy nidüg nidüg yjothuinma'ñ miidity. E miich m'idipy jotmaymiid jadu'n nejihuüy tüg espada ti xyajtzaachy.

36 Nañ jim Jerusalén anajty tüg töxyjäy huídibi anajty yxii Ana, Dios je' anajty y'ayucnajtzcaxiyybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jëyi huixtujc jimijt chinay miid yña'y, mada'px madaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xiiim tzuum jopy ayuu anajty ycapxtägy. 38 Chi Ana nimiñ José etz María jilby ma Dios ytijc, e quipxy miid ajcxy huingapxtacy je Huindzin Dios. Chi je Ana nimiydacy je pi'c Jesús miid

tüg'óciy jäy jim Jerusalén huidi anajty ajcxy jijp'ijxp mi-na Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñcxixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy mïd huijy'ajt cujc'ajt, etz ymïd je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungdeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiïy jim Jerusalén jadu'n anajty ajcxy costumbre mïdity co xii paady. ⁴³ Co je xii ñaxtäy, chi ajcxy huimbijtcixni, e Jesús yhui'miïy je' jim Jerusalén. Ca' José etz ytaj nehuiïy ajcxy co ti anajty yhui'miy. ⁴⁴ Hue' ajcxy anajty tijj je' ymiñ axaam mïd ymigügtijc. Co tüg xii yöyigixni, chi ajcxy ixtay je' y'ung ma y'amigügtijc ajcxy, etz huidi mïd ñay'ixy'adyii ñaymigüg'adyii. ⁴⁵ Co ca' ajcxy y'ung paady, chi yhuimbijtcixni jim Jerusalén ung ixtaaybi.

⁴⁶ Chi jadu'n yjajty codugig xii oypaatcixy jim ma Dios ytijc, Jesús y'ñäy anajty agujc'amy ma je huindzindijc. Yi' anajty y'amido'lijtyp yi huindzindijc y'ayuc, e nañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuiydäy etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiïy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz ñich yam tzachjottigooyb nay'adzigyijijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnehuiïygixy co copity n'ida'ñich ma nDéedyich ytung?

⁵⁰ Chi ajcxy ca' huinjihuiïy Jesús y'ayuc huidibi ycapxy.

⁵¹ Chi Jesús mïd nicxy je' ajcxy jim Nazaret. Chi Jesús capxymidoy ytaj yteedy. Chi yi' ytaj yajhui'mday ma yjot yhuinma'ñ tüg'óciy nej ytunyii yjadyii. ⁵² Chi Jesús ixpijc'adiitzp anajty ooy, etz yeegy yjygojy huijycujc. E yi Dios etz jäy ajcxy ooy anajty jäygidaccixy.

Juan el Bautista y'ayuccapxhuäcxy mijtigëduum

3 Ma anajty je Tiberio César yjimijtjoty, mimajmocx jimijt anajty maabi y'ane'mtigëy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisanas anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmïd ma Dios ytijc. Je huin'it tiemp Dios y'ayuc yja'ty ma je Juan, Zacarías ymang, huidibi anajty tzinaayb mijtigëduum. ³ Chi Juan choñ ñicxy ma tüg'óciy cajp mihuingon je Jordán mijni, capxhuijy je jäy ajcxy, co huen jothuimbijttaaygixy etz

huen niibejtcixy jigix ajcxy ypocy yajhuinmeecxip. ⁴ Jada jadu'n tuni jajti nej je ayucnajtzcaxhiybi Isaías anajty ti cojaay:

Jim mijtigëduum yajmidooy tüg jäy mina'ñ:

“Yaj'oyiïygix yi Dios ytü'aa, tim jadu'n nej jäy ajcxy yaj'oyiïygixy yi jibic tü'aa co tüg rey mina'ñ.” Yajtiïygixy yi tü'aa huidibi ooy y'adijy y'a'och.

⁵ Tüg'óciy anii ahuoc huen joyiïydäy, tüg'óciy tungop huen nañ jadu'n joyiïydäy. Tüg'óciy ni'aa tü'aa huidibi tijmin tijxijp huen tiïydäy. Yi tü'aa huidibi ca' quipxyjatyty huen quipxyjaty tiïydäy.

⁶ Tüg'óciy yi jäy ajcxy ixipy ñejhuïhipy nej Dios yega'ñ je nihuambi cohuambi.

⁷ Chi Juan oiy ajcxy je jäy pinjaty anajty miimb niibejtpi, yminañ:

—iMiich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quëg ma yi ayo'n huidibi Dios yquexaamy? ⁸ Túngix oybi, jothuimbijtcix, ca' ajcxy mi-naangixy miñ xyipy: “Abraham ñich ajcxy n'ap'ajtpy ndeedy'ajtpy”. ñich miich ajcxy nimaayb co Dios ixti jëbi yi' yaj'ung'adyii yaj'anäg'adyii Abraham jada tzaa ca'ydï miich ajcxy. ⁹ Dios ni'ixi y'ity jaydëbi yajcödïgoyipy jäy ajcxy y'alma huidibi jibic-huinma'ñ mïd. Tim jadu'n nipaady nej jäy ni'ixi y'ity mïd jacha co pujxga'ñ tüg quipy huidi ca' oy ytiim'aty, etz yajnög'tähua'ñ.

¹⁰ Chi je mayjäy ajcxy y'amidooy je Juan:

—¿Ti ñich ajcxy jëbi nduñ?

¹¹ Chi je Juan y'adzooy, yminañ:

—Pinjaty yhuitt mïd metz, jaydëbi möy pin ca' mïdity ni tüg. Etz pinjaty caagy mïd nañ jadu'n möhuipy pinjaty ca' mïdity.

¹² Chi miñ jadyii yajcogüejtpi co anajty ñibe-daangixy, yminañ ajcxy:

—¿Ti huaad ñich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' nëgi anaxy myajcogüety jadu'n nej je cötújcïn y'ane'my.

¹⁴ Chi soldado ajcxy yminañ:

—¿Ti ñich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapjicipy, ni mganihuambedipy ajcxy. Nañ jadu'n mijotcujc'ajtcixy nej myajmujuuygixy.

¹⁵ Je mayjäy yjijp'ijxyp anajty ajcxy ooy, etz ooy jihuiïy huinmaay nejhuïhuaangixy pen yi Juan je' anajty Cristo. ¹⁶ Chi Juan nimay ajcxy nidüg'óciy:

—ñich janch nyajniibéjtypich jäy mïd ni. Miimb je' axaam huidibi jacmij ca'ydï ñich, ca' huaad yi' ycëghuin ngejich. Je' miich ajcxy xyajniibedipy mïdi Dios yjihui'ñ ymic'ajt etz mïdi jin. ¹⁷ Je Cristo ni'ixi y'ity co oybi möhua'ñ je jäy huidibi ajcxy oyhuinma'ñ mïd, etz ymöhuaamy tzaachypï je jäy ajcxy huidibi jibic-huinma'ñ mïd, tzaachypï huidibi nicamina ycxipy. Tim jadu'n nipaady nej tüg jäy ni'ixi y'ity co ymoc-huimboja'n, e chi je oybi mocpajc pidäga'ñ ma che'x, etz je mocjaam ninög'hua'ñ, e caminaxi ycapidza'ñ je jin.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yí' ooy je rey Herodes, co y'uch Felipe ytöxyjic Herodías miid tzinaayi, etz jacjaydiiby jibic-huinma'ñ tibi Herodes anajty tuñ. ²⁰ Chi je rey Herodes nigí pocytuñ co Juan pidacy pujxtigoty.

Je Jesús ñiibejtín

²¹ Chi jadu'n yjajty co jadu'n tüg'óciy jäy ñiibejtay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihui'ñ ymic'ajt ymí-najcy ma Jesús ycüduu miid ñinix jadu'n nej muuxy ñinix. Nañ jadu'n yajmidoy tüg ayuc choñ tzajpjoty yminañ:

—Miich n'ung'ajtpy, ooy iich miich ndzocy ooy njihuüy, ooy njotcújcidyich miid miich.

Jesús ymij'ap ymijteedy

²³ Jesús hue' anajty yjimijit oy ni iipxmajc co ytungtigíy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé

yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

Je mujcu' tuñ ijxta'ni ma Jesús

⁴ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij ñi, chi je Dios yjihui'ñ ymic'ajt yajnicxi mijtigíduum. ² Jesús y'ijty huixchigui'px xi jim mijtigíduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xi ñajxi, chi oy yuuböccodyii. ³ Chi je mujcu' ñimay: —Peni janch miich Dios xy'ung'adyii, ñimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy t'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' miidpejty Jesús ma tüg cop janch cixpi, chi tüg jaxgy yajni'ixiy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—Iich miich möhui'py tüg'óciy mic'ajtín ané'min etz oy'ajtín, com iich ng'iam y'ity tüg'óciy, e nmöhuibich hueñyimpñity. ⁷ Pen xyhuingoxtinaybich xy'ojadajtpich miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuägtuutich miich mujcu', com jadu'n jaybéty y'ity: “Co yí Huindzin miich mDios mhuingoxtinahui'py m'ojadadipy, etz yí' je' tüg pajc myajmij'adipy.”

⁹ Chi je mujcu' miidnicxy Jesús jim Jerusalén, chi miidpejty ma Dios ytijc coduu, e ñimay:

—Pen Dios miich xy'ung'ajtp cödi'pnax naaxcxy, ¹⁰ com jaybety jadu'n y'ity ma Dios ñecy co quexipy Dios yí' y'ángeles ajcxy e xycuend'adipy. ¹¹ Cigíxy ajcxy xyhuidzi'py, ca'ydí mdzaachy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' m'ot'ixipy mhuinma'ñ'ixipy yí mHuindzin Dios.

¹³ Co je mujcu' yajcixy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymiiñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty miidity pocxiiduum. Chi ytinaay'ahuiy, chi ytigiy necycapxi. ¹⁷ Chi ajcxy mooy je necy huidibi je Dios

y'ayucnajtzcaxiibi Isaiás yjaay. Chi ciyhuäcxy je necy, paty jiiiby tüg it ma anajty yjaybétyity jadu'n:

¹⁸ Je Huindzin Dios yjihui'ñ ymic'ajt xymi'd'ajtpich, co xyajni'bicyich co nyajnimähuibich ayoo'bitijc je oybi ayuc. Ti xyquexyich co nyajjotcug'ihuibich je jäy ajcxy huidi jotmay ymi'd, etz nhuinméecxibich huidibi ajcxy pujxtigótyip, nañ jadu'n ajcxy je huidibi huiintzip nya-jhuindi'xcigibich, e nbidägibich ahuätztuum huidibi ya-jtzaachytumb.

¹⁹ Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'ñ mi'd je jäy ajcxy ycixpi.

²⁰ Chi jada' Jesús abidijty je ñecy, yajc'idig'iy je tung-mi'dpi, huin'it y'ixtacy. Chi tüg'óciy mayjäy jiiiby ma naymujctac ooy ajcxy huind'icy je Jesús. ²¹ Chi Jesús ymindacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmi'dooy.

²² Chi nidüg'óciy ajcxy ooy jäygidacy nej Jesús mina'ñ, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús ymina'ñ:

—Ca' yjécyity miich ajcxy xyajnimähuibich jada ayuc: "Tzoydumbi naychoy'ihu'ñ c'i'm. Tüg'óciy jadu'n nej ñich ajcxy nmi'dooyich ti mduñ jim Capernaum, nañ jadu'n miich octun ma mgi'mgajp."

²⁴ Chi Jesús yjacmina'ñ:

—Janch ñich miich ajcxy nnimäy co ni tüg jäy huidibi Dios y'ayucnajtzcaxiiby ca' jäy ajcxy cöbicy ma yc'i'mgajp. ²⁵ Janch ñich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tug'ig jimijt jatudujc po', co oy yuu miññ ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjäy püdz pa'm mi'dity ya Israel jecy'ajty co je Dios y'ayucnajtzcaxiiby Eliseo chinay. Chi ni tüg jäy huin'it catzoocy, jeyi tügpajc choocy pa'mjäy huidibi anajty yxi Naamán huidi tsoon Siria naaxjot.

²⁸ Huin'it tüg'óciy jäy huidi anajty jiiiby ma naymujctac ooy yjotma'tcoty co jadyaab ayuc ajcxy midooy. ²⁹ Chi je mayjäy ajcxy nibid'igy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödiypnax-aangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty mi'd jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpijcy pocx'i'duum. ³² Huinmay ooy ajcxy jadu'n nej je' yaj'ixpicy. Ñayñimáayigixy co je Jesús yaj'ixpicy nejihu'ñ mijtung mij'ané'min mi'dity.

³³ Jiiiby ma je naymujctac jiiiby anajty tüg yëydijc huidibi mi'd tüg ca'oybi, chi je ca'oybi mic yaaxqueecy ymina'ñ:

³⁴ —Ixmajtzcih ajcxy, ¿ti mdunamy mi'd ñich ajcxy Jesús je nazaretpi? ¿Nej ti mmiñ co xyajhuindi-goyáanigixyich? ñich miich n'ijxcapy co miich je' je Huätzpi Dios.

³⁵ Chi Jesús je ca'oybi ooy, nimay:

—Amon, pidzim ma yi jäy.

Chi je ca'oybi najztijiy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶ Tüg'óciy jäy jim ooy ajcxy ñay'adzigi'iyi miñ xyipy yjanayñimáayigixy:

—¿Ti ayuc jada' yi'? Co mi'd y'ané'min etz mic'ajt ane'my ca'oybi etz yajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymi'd töxyjäybi

³⁸ Chi Jesús ypid'igy choñ ma naymujctac, ytig'iy ma Simón ytijc. Jadu'n anajty Simón ymi'd töxyjäybi mic ytoyii. Chi ajcxy cohuan'iy Jesús mi'd je' ycixpi. ³⁹ Chi Jesús yhuindacy ma je' yhuinduu, ix'ojy je toyñ, e jadu'ññ ñajxy. Chi je' mic'amy ypid'igy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmi'dpi ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihui'y, ymina'ñ:

—Miich je' Dios xy'ung'ajtp.

Chi Jesús ñigi ix'ojy, ca' anajty yajhuäcxipy nicxy yjac-capxy, com ti anajty nejhu'igixy co yi' je' je Cristo.

Jesús y'ayuccapxhuäcxy jim Galilea

⁴² Co yxi'mi'y, chi choñ Jesús, ñicxy mijtig'iiduum. Ooy jäy yja'ixtäyii, chi ajcxy oy paatc'xy, yajhuäcxijpy ajcxy ooy, ca' anajty oc'ixmadzáangixni. ⁴³ Chi Jesús ymina'ñ:

—Ooy jada chachcop'icyity co canaag agajp ñich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

Je acxmajtzin mijhuinma'ñybi

5 Tügtecy jadu'n yjajt, jim anajty Jesús ma je Gensaret mejypa', co jäy ñimiini janch ñay'adiji'y ñay'agod'iyigixy, tzach'amidohuaangixy Dios y'ayuc. ² Chi yi' i'xpaty mejtz barco jahueengi mejypa'áy. Je acxmajtzpidijc ti anajty ypidzimgixy ma je barco, jim anajty y'acxuumy p'jccixy. ³ Chi Jesús yajtigiyiy tüg barco huidi Simón anajty je'ajtpy. Chi may'ajt pijctzoy co huen yajjihua'gy hueeni yi' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴ Co ycapxymaayí, chi Jesús Simón nimay:
—Nicx pidäg m'acxmadzi'ñ mejjoty, jaydebí m'ajtzci'ixy acx.

⁵ Chi Simón y'adzooy:

—Huindzin, ti ñich ajcxy ooy njatuñ tüg tzuum, ni ti ti ngapáatcixyich. Per miid miich m'ayuc ycixpi yí acxmadzi'ñ nbidägibich mejjyoty.

⁶ Co ajcxy pidacy je acxmadzi'ñ mejjyoty, chi yaj-co'adujcy ooy may acx, jahueeni acxmadzi'ñ ycacich miid je may acx ycixpi. ⁷ Chi Pedro yemi ymigügtijc huidi anajty jim ma je jadügpí barco, huen miñ ajcxy pubedyii. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiiñ je barco miid may acx ycixpi. ⁸ Co Simón Pedro ijxy jadu'n, chi ycojxtinaay'ahuüy ma Jesús yhuinduu, nimay:

—Huinhuaätúutcich, Huindzin, com ñich pocyjäy ñich.

⁹ Com Pedro janch tzigüyb anajty, etz nañ tzigüyb tüg'óciy huidi anajty miid ti ytuñ, co anajty ooy may acx tzachyajñibéjtcixy. ¹⁰ Nañ jadu'n tzigüyb anajty je Jacobo etz Juan je Zebedeo ymang ajcxy huidibi Simón anajty ti pubety. Chi Jesús ñimay Simón:

—Ca' mdzigüy, jadachambi etz jacnicxni xii tiempo mdunipy jaymadziñ.

¹¹ Co je barco yajmejpidzimy, chi ajcxy y'ixmajch tüg'óciy, chi ajcxy panicxy Jesús.

Jesús yajtzögy tüg jäy nibützpa'mmiidpi

¹² Chi jadu'n yjajti co anajty Jesús yjímity ma tüg cajp, co ñimiini tüg yëydijc ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, nimay:

—Huindzin, pen mdzojpcy jëbi xyajtzögibich.

¹³ Chi Jesús yci' najtzaxiñy nidooñ, nimay:

—Ndzojpcyich, huim huädz.

Chi mic'amy je jäy choocy. ¹⁴ Chi Jesús ane'my, nimay:

—Ca' ni pin myajnimähuipy, nicx janchtiy nayguëxgiñb ma teedy, jaydëbi möhuipy Dios huindzig'iñ, jadu'n nej Moisés ycötüjcin je jécyp y'ane'my, miid yí ycixpi co ti mhuaätzpidzimy, jaydëbi jäy ajcxy nejhuñhuipy co ti mdzögy.

¹⁵ Je capxy'ayuc ñigi y'oc-huäcx'aditzi, e janch mayjäy y'ocnimújcin, jim pin ayuc midohuaam, e jim huidi tzögaam. ¹⁶ Jesús ycögueecpy anajty je mayjäy, ñicxy anajty mijtigiiduum Dios ojadajtpi.

Jesús yajtzögy tüg jäy cixuxypi tecyxuxypi

¹⁷ Tüg teci yjajti, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty anajty ti choon Jerusalén. E Jesús ymiid anajty Huindzin Dios ymic'ajt co jäy yajtzögipy. ¹⁸ Chi nijëjity jäy yajja'ty cijx'am tüg pa'mjäy yëydijcpi huidi ca' anajty yci' ytecy yücxy. Chi ajcxy ixtaay ma yajtijc-tigühuipy pidäga'ñ anajty ajcxy je pa'mjäy ma Jesús yhuinduu. ¹⁹ Com ca' anajty ni ma tigiyidac miid co je tijc anajty ooy y'újtzity miid mayjäy. Chi ajcxy miidpejty tijc nigixy, chi ajcxy tijc yajcöhuach, e chi ajcxy cödiyña-jxy cijx'am je pa'mjäy ma Jesús yhuinduu. ²⁰ Co Jesús ijxy jadu'n nej je' ajcxy ymibicy, chi nimay:

—Yëydijc, yajmeecxp mbocy.

²¹ Chi je' ajcxy huidi yaj'ixpijcp Dios ñecy etz je judío ixpicytijc huidi naydijigixp fariseojäy huinmaygoty, ñayñimáayigixy: "Jada Jesús ooy ycapxtigoy miid Dios. Ni pin yëydijc huaad ca' ti pocymeecxy. Tügpaic nHuindzin'ájtím Dios huidi pocyhuinmecxp."

²² Jesús ñejhuñy je' ajcxy yjot yhuinma'ñ, paady ajcxy nimay:

—¿Ti mdzachhuinmaayb ajcxy ma mjot mhuinma'ñ?

²³ ¿Ti jactzip co minaaním co ti mbocy yajmeecxy o minaaním: "Pidig etz nicxni"? ²⁴ Jaydëbi miich ajcxy mnejhuñhuipy co ñich je' je jäy huidi tzoon tzajpjoty, nmíidich ané'min etz mic'ajt ya naaxhuiñ jëbi jäy nbocyhuinmeecxyich, paady cham nnimäyich yí pa'mjäy: "Pidig etz yajpidig mmaabejt, nicx ma mdijc."

²⁵ Chi mic'amy je pa'mjäy ytinayigy ma je jäy ajcxy yhuinduu, etz yajpidig y je' ymaabejt ma anajty ycögnäy. Chi ñicxni ma ytijc, chi ooy cömay jaymejch Dios. ²⁶ Huin'it nidüg'óciy je mayjäy ooy ajcxy jihuiy, e chi ajcxy ooy cömay etz jaymejch Dios. Chi ajcxy ooy chigüygixy, yminaangixy:

—Cham janchtiy n'ijxim mijhuinma'ñ.

Jesús huodzooñ je Leví

²⁷ Co jadu'n ytuni yjajti, chi Jesús jim choñ, chi ijxy tüg yajcogüejtpi huidi anajty yxi Leví. Leví jim anajty iñäy ma yajcogüejttac. Chi Jesús nimay je Leví:

—Pajaamgich.

²⁸ Chi je Leví ixmajtztay huidi anajty ytuumy etz padzooñ je Jesús.

²⁹ Chi Leví mayjäy yajcay yaj'uucy ma ytijc, cham may yajcogüejtpi ajcxy etz jacjadyii jäy huidi iñaaayb ma yí mesa miid Jesús etz yí ydiscípulos ajcxy. ³⁰ Chi je' ajcxy huidibi yaj'ixpijcp Dios ñecy etz je ixpicytijc huidi naydijigixp fariseojäy tzachni'ameechycápcixy ni'ojüygixy je Jesús ydiscípulos ajcxy, yminaangixy:

—¿Na'amy co mgaaygixy m'uuccixy miid yajcogüejtpi etz miid pocyjäy ajcxy?

³¹ Chi Jesús yminañ:

—Ca' yajmayjaty tzojdumbi huidibi ca' ajcxy ypigiyii, jëyi huidi ajcxy pijcip. ³² Ca' ñich ti nmiñich ma je jäy ajcxy huidibi ca' pocy miidity. ñich ti nmiñich miid yí pocyjäy ycixpi co huen jothuimbijttaaygixy ma Dios.

Yaj'amidooy ajcxy Jesús ti co jäy ajcxy y'ayunas'ájtixy

³³ Chi je mayjäy ajcxy Jesús nimay:

—Nej co yí (Juan) ydiscípulos ajcxy janam jadojcp jaygay y'ijtcixy etz ycapxtáccixy, nañ jadu'n je fariseojäy ydiscípulos ajcxy janam jadojcp jaygay y'ijtcixy. Chi miich mdiscípulos ajcxy ca' ajcxy jaygay y'ijtcixy, caaby uucp ajcxy jabom jabom.

³⁴ Chi Jesús yminañ:

—¿Nej jëbi yaj'ayuu'aty jäy ajcxy huidi yajpatpi ma je pijcpi yajnixiñduñ, pen quipxyi yam yajpaady miid je huidibi pijcpi? ³⁵ Minamb je xii je tiempo mina je pijcpi yajtzoniyb, huin'it janchtiy ajcxy jëbi y'ayuu'ájtixy.

³⁶ Nañ jadu'n ajcxy yajnimay tüg jihuibit ayuc:

—Ni pin ca' huaad agiyäy Tuc-huit miid jemyhuit, canaan jäyi yčidzip yi jemybi, nañ jadu'n je tucpi ca' oy yhuima'ñ miid je jemyhuit agiyi'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yčidzip je tucpi cochac, chi y'ixyojctähuipy je vino etz je cochac ñitigoydähuipy. ³⁸ Pidägyipy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzoocy vino jemybi, pen ti anajty ügy vino tibi yjejni, co jadu'n ymina'ñ co jac oy je tibi yjejni.

Je discipulos ajcxy yajmújccixy trigo cojc pocxñiduum

6 Chi jadu'n yjajti tüg pocxñiduum co Jesús oy ñaxy ma tüg trigo cam, e yi' ydiscipulos ajcxy oy anajty yajminájccixy trigo tñm, chi ajcxy ñixajztüdy, e chi ajcxy jñcxy. ² Chi nidügti fariseojäy yminañ:

—¿Ti co ajcxy jadu'n mdundigooy co mdungixy huidi ca' ñigodúcyity ajcxy mdunipy pocxin xñiduum?

³ Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñy? ¿Nej ca' mnejhuñygyx ty David ytuun co anajty yuubögyii etz nañ co ymügügtijc anajty yuubögyii? ⁴ David ytigñy ma Dios ytijc, chi congy je tzajcaagy huidibi anajty jilby ma Dios yhuinduu, chi caay, nañ jadu'n moy je ymügügtijc ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Iñch je' je jäy huidibi tzoon tzajpjoty, jëbi nnimäyich je jäy ajcxy ti jëbi huaad ytungixy sábado xñ.

Je yëydijc huidibi anajty yci' tñdzip

⁶ Chi jadügtecy yjajti tüg pocxñiduum, co Jesús ytigñy ma tüg naymujctac, chi jäy yaj'ixpijcy. Jilby anajty tüg yëydijc huidi y'a'oygi' anajty tñdzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'ijxcixy Jesús nej pen jäy yajtzögam pocxñiduum, e je' ajcxy anajty miid ycxpi xñhua'ñ. ⁸ Jesús ñejhuñyb je' anajty ajcxy yjot yhuinma'ñ. Chi Jesús ñimay je yëydijc huidibi anajty yci' tñdzip:

—Pidig, tinayig mayjäy'agujc.

Chi je' ytinaayigy. ⁹ Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy ymina'ñ, jëbi oybi nduunim pocxñiduum o jëbi jibicpi nduunim, nyajtzoocim jäy o nyajtigooyim jäy yjugy'ajt?

¹⁰ Chi Jesús ajcxy huindixpejtay nidüg'óciy, chi ñimay je pa'mjäy:

—Xajtu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpicytjic huidi ajcxy mijpidacp judío ycostumbre ooy ajcxy yjot'ambijcy, ñayñimäyigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discipulos ajcxy

¹² Jadu'n yjajti huin'it xñ Jesús ñcxy mijtigiduum Dios ojajajtpi. Tüg tzuun ooy Dios mibijctzooy. ¹³ Co yxñmñy, chi Jesús huomiñ yi' ydiscipulos ajcxy. Chi huin'ixy je majmetzpi, etz yxñmoy ajcxy, apóstoles.

¹⁴ Chi Jesús yhuin'ixy je Simón huidi yxñmoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytijpy Zelote; Judas, Jacobo y'uch; etz Judas Iscariote huidibi nañ jadu'n Jesús cñeyc ma ymidzip.

Jesús yaj'ixpicy mayjäy

¹⁷ Chi Jesús miid'idacy je discipulos ajcxy, chi oy yhuäcxipy ma tüg ajoy miid ydiscipulos ajcxy etz mayjäy huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co amidoo'idáani Jesús y'ayuc etz nañ chögaangixy je pa'm huidi ajcxy ymiid. ¹⁸ Cham je huidi anajty ayo'n tzachpaatp miid ca'oybi, nañ tzoocp je' anajty ajcxy. ¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymiid mic'ajt co jäy tüg'óciy yajtzög.

Je jotcuyc'ajt etz je cajotcuyc'ajt

²⁰ Chi Jesús huindixpejtay je mayjäy huidi ajcxy ixpi-gaam yi' y'ayuc, e yminañ:

—Jotcuyc miich ajcxy ayoobtjic, com miich ajcxy cham xypaat Dios y'ané'min.

²¹ Jotcuyc miich ajcxy huidi cham yuubó'cip, co mgüxñb miich ajcxy. Jotcuyc miich ajcxy huidi cham jotmay miid, co ypáadip xñ tiempo mña mxondáaccixipy.

²² Jotcuyc miich ajcxy mña anajty jäy ca' xy'ixáangixy, co pin xy'ixtjicixipy, e co jäy ajcxy jibic xyñigapxa'ñ xyñixiga'ñ miid ñch ycxpi, je jäy huidi tzoon tzajpjoty.

²³ Mxondäg miich ajcxy huin'it xñ, etz mjotcugñygyixip, com ooy chachmñjity huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixaangixy je huidi anajty Dios y'ayucnajtzcaxñyipy.

²⁴ Miich ayoob ajcxy comeñyjäy, com ca' ti jotcu-jc'ajtin mjacpadaangixy huin'it xñ (co Dios tiydunip je naaxhuiñyjäy).

²⁵ Miich ayoob ajcxy huidi cham oc'agujc'ajtp ocjotcu-jc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajni-gapxy myajni-miydägipy, com jadu'n jecy'ajty miich ajcxy mmij'ap mmijteedy ñimay je jäy ajcxy co ooy y'oyjäy huidi ajcxy anajty najtzcaxñyib ayuc huidibi ca' ytiy yjanchity.

Nej huaad nmigüg ndzójcm

²⁷ Chi Jesús yjacminañ:

—Miich ajcxy huidi cham amido'ijtp ñch n'ayuc, ñch miich ajcxy ñimaayb: Tzójccix mmiidzip, mi'oyjäy'ajtcix huidijaty ca' xy'ixáangixy. ²⁸ Migapx je jäy ajcxy miid oyjot oyhuinma'ñ huidi ajcxy jibic xyñigapxp xyñi'ojñyb.

Mibijctzoogixy yi Dios miid je' ajcxy ycixpi huidibi xyñi-gapxp xyñi'ojiiyb. ²⁹ Pen ji pin xycojxy ma yi mhuiinjip, mo' jadug adu'm'amy ahuiñ hueñ coxy. Pen ji pin xypigaani yi mjocxhuit, jactimmo' mnijen huen yajnicx. ³⁰ Pin xypijctzohuip tijaty, mo'. Pin xypijcip huidi miich mjë'ajtpy, ca' mbijctzohuipy jadug'oc. ³¹ Nej mdzocy tunipy jäy miid miich ajcxy, nañ jadu'n miich ajcxy mdunipy miid yi' ajcxy.

³² Pen miich ajcxy jëyi mdzojccixpy pinjaty xychojccixp, ¿ti ojjäy'ajtín jada' miich ajcxy m'ocpaadipy? Nañ jadu'n je pocyjäy ajcxy chojcpy pinjaty yi' ajcxy tzójcip. ³³ Pen mdumyb oybi huidi jaty mmiid ooy mnaymígüg'adyii. ¿Ti ojjäy'ajtín jada' miich ajcxy m'ocpaadip? Nañ jadu'n je pocyjäy ajcxy tuñ oybi miid ymígügtijc. ³⁴ Pen myejcpijctzou miid je jäy huidibi miich ajcxy mjijp'ijxpy co nañ jadu'n xymöhuipy tigatii, ¿ti ojjäy'ajtín miich ajcxy mdumyb? Nañ jadu'n yi jibic jäydijc jayejcpí tijaty pijctzoy co nañ jadu'n jijp'ijxcixy co ymöhuiipy tigatii. ³⁵ Miich ajcxy, tzójccix mmidzip, mi'ojjäy'ajtcix mmidzip, yajpijctzoogix tijaty, e ca' ni ti mjijp'ijxcixipy co ajcxy jac mij mbaadip. Jadu'n miich ajcxy mij mbaadip oy'ajtín e mnaydijiiyb ajcxy je mijpi Dios y'ung. Com Dios pa'ayoodaayb tüg'óciy yi jäy ajcxy huidibi ca' ti jäygidägy, etz huidi jibicjäy. ³⁶ Miich ajcxy pa'ayoo migügtijc ajcxy, jadu'n nej mDios Teedy tzajpjoty ypa'ayooy huenyimpínity.

Ca' mmígüg ni ti myaj'ix'ixipy myajpa'ixipy

³⁷ Ca' mmígüg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmígüg mbocy'ixipy, e huin'it ca' pin xypocy'ixipy. Huinmecx mmígüg, e huin'it nañ jadu'n Dios myajhuinmeecxip. ³⁸ Mo' mmígüg etz huin'it miich ajcxy Dios xymöhuiipy quipxy ooy tijtäch etz janch yajxon y'újtzy cödínaayb. Com yi quipx'iñ tibi myajquixxëy, nañ yi' miid xyquixhuimbidipy.

³⁹ Chi Jesús yajnimay je mayjäy tüg jihuimbit ayuc: —¿Nej jëbi tüg jäy huintzpi ymígüg huintzpi huityöyñi? ¿Nej ca' mdijy nimetz yjutcögägixipy? ⁴⁰ Ca' ji ni tüg ixpijcpí huidi nigí ixpicyip ca'ydí yhuindzin, pen ji pin huädz yjadim'ixpicy najtzpadihuiipy yhuindzin.

⁴¹ ¿Na'amy co mic'amy mbocy'ixy mmígüg co hueeni ytundigoy, e miich jac mij ooy mdundigoy, e ca' mjihu'ñybicy? Tim jadu'n nipaady nej jihuüy ti m'ixy pi'cpüx ma mmígüg yhuin, e ma miich mgí'mhuin jac jiiiby mij quipy, e ca' m'ixy je quipy ma mgí'mhuin.

⁴² Ca' huaad mnimähuiipy mmígüg: "Nayyegí miñich püx n'ocyajpidzim maabi mhuiin", e miich ca' m'ijxy mij quipy ma mgí'mhuin. Jibicjäy miich. Jayijp miich myajhuädzip mjot mhuiñma'ñ, huin'it jëbi mmígüg m'ihuüjip mgapxhuüjip, jadu'n nipaady nej jihuüy ti myajpidzimy je quipy maabi mhuiin, jachuädz m'ijxigipy e chi jëbi yi' pi'cpüx myajpidzimipy maabi mmígüg yhuin.

Je quipy je ytiim, yi' miid ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tiim'ajtp, nañ jadu'n ni ca' yjibicquipyity huidi oy tiim'ajtp. ⁴⁴ Com ni je' quipy yaj'ijxcapj miid ytiim ycixpi. Ca' pin higueri tiim tucy ma quipy apymidpi. Nañ ni pin ca' uvas cha'm piy ma aadz apymidpi. ⁴⁵ Je jäy ojjäybi ma yjot yhuinma'ñ yajpidzimy oybi. Je jibicjäybi ma yjot yhuinma'ñ yajpidzimy jibicpi. Huidibi yhuinmaayb jotjoty huinma'ñjoty yi' ycapxyp.

Je mejtznajxpi poch y'ijx

⁴⁶ Chi Jesús yjacmínañ:

—¿Nej co nigo minangixy: "Huindzin, Huindzin", ni ca' ajcxy mdungixy huidi nyajnimaaaygixy? ⁴⁷ Tüg'óciy jäy huidi xyñimimbich etz xymidoohui ñich n'ayuc etz cuyduñ, ñich nyajni'ixihuipy pin je' ymidügnax. ⁴⁸ Quipxyiib tüg yëydijc huidibi ytijccoyp ma tzaa nixcy, chi nidajëy ooy cixy, chi pidägy poch'ijx tzaa nigixy, co mijni ycomy nimiñ je tijc, miid tüg'óciy ymijaa jaya-jpidiga'ñ je tijc, e ni ca' jadu'ny yajyüxcy, com tzaagixy anajty ypojtztzooñity. ⁴⁹ Yi jäy huidi midoob ñich n'ayuc e ca' cuyduñ, midquixiipy jadu'n yi' nej tüg yëydijc co ti ytijccoyp. Ni ca' poch cixy ypojtztzooñity, jëyi naax-huingixy nidajëy hueeni. Co je mijni ymiñ miid ymijaa, chi yajpidigy je tijc, chi oy yhuindigoydäy.

Jesús yajtzögy tüg mijtungmiidpi Romano ytumbi

7 Co Jesús ycapxtaay ymiydactaay miid je mayjäy huidi anajty jim amido'ijtp, chi ytiigiy jim Capernaum. ² Jim anajty tüg Capitán tüg ytumbi hue' anajty pijcip, janch tim ögaanip anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judío mijjäydijc, huen nixcy minuucxtaaccixy Jesús co je' yminipy ma ytijc yajtzögiiyb je' ytumbi. ⁴ Chi je mijjäydijc ajcxy ymiñ ma Jesús, chi ajcxy cohuaniiy ooy, pijctzou may'ajtp, nimay:

—Jadayaabi capitán ymihuaad co mbubedipy, com yajmij'ajtpy ñich ajcxy ngajp, ti cojy ñich ajtp naymujctac.

⁶ Chi Jesús ñixcy miid je' ajcxy. Co ajcxy mihuingooñ je tijc, chi je capitán quejxy ymígüg huen nixcy jijp-cobadëy Jesús, nimähuiipy:

—Huindzin, ca' nej mnayjihuüyii, ca' ñich mihuaadity co mdigihuipy ma ñich ndijc. ⁷ E paady ca' ñich njot ti mictuñ co ñich miich c'm nixc n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n ñich nmidich soldados ajcxy huidi ajcxy xycapxcöbipcpich. Nimäyich tüg: "Nixc", e nixcp; nimäyich jadug: "Min", e mimb; nimäyich ndumbi: "Tun jada", e ytumyb.

⁹ Co Jesús midoy nej je capitán ymínañ, chi jihuüy ooy, chi ni'ijxhuimbijty nimay ajcxy huidi pamiinip:

—Ñich miich yim nimaaygixyp co ca' nbaadyich Israel jäy huidibi xymibijcpich jadu'n nej jadayaab agatz jäy.

¹⁰ Co ajcxy je quexyöybi yhuimbijtcixni ma je tijc, chi oy paatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tibi anajty y'ögy

¹¹ Chi jadu'n yajty huin'ti xii co Jesús anajty ñicxy ma tüg cajp huidi anajty yxii Naín. Miid anajty ñicxy jadyii ydiscipulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jäy ajcxy, ñicxy anajty ajcxy tüg öcpi yajnaaxtigiiygixy, huidi anajty ungdaj tügpaic y'ung'ajtpy. Hue' je' anajty co'ögy je töxyjäy, e miid anajty ñicxy maycajppjäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi ciyñicxp. Chi Jesús yminañ:

—Yëydijc, ñich miich yam nimaayb, pidig.

¹⁵ Chi je yëydijc ññayigy huidi anajty ti y'ögy, e ytigiiy miydaacp. Chi Jesús yajcädigiiyñi je' ytaj. ¹⁶ Chi ajcxy nidüg'öciy ooy ñay'adzigiogoty, e Dios jäymejch cömay, yminaangixy:

—Tüg mijpi Dios tiy'ajtmiiñpi cham yajpatp ma ñich ajt.

Nañ jadu'n ajcxy yminaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcömay ma tüg'öciy Judea naaxjot, etz ma tüg'öciy jac huinduy agonbi naax cajp.

Je Juan je Bautista yquexyöybi

¹⁸ Chi je jäy ajcxy huidi anajty Juan je Bautista yaj'ix-pijcyp ni miydactay jadu'n nej miid ytuni yajti Jesús. Chi Juan huoooy metz yi' ydiscipulos ajcxy, e quejxy ma Jesús yajpaady. Chi Juan nimay co huen ñicxy amidoogixy Jesús, pen yi' je' je Cristo huidi anajty miinaam, o pen n'ahuixpy ajcxy huingbi. ²⁰ Chi je Juan yquejxyöybi miin ma Jesús nimay:

—Yi Juan je Bautista ñich ajcxy ti xyquexyich ma miich amidohua'ñ pen miich je' je Cristo huidi minaamb, o zn'ahuixypich ajcxy huingbi?

²¹ Tim huin'itiiy Jesús ooy mayba'mjäy yajzoocy. Yajzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—Ñicx nimaaygix je Juan jadu'n nej ti m'ijxcixy ti mmidoogixy, co yi' huintzpi ti yhuindicxigy, yi tecomat'pi ti yöyigy, yi nibützpa'mmiidpi ti chögy, je cönatpi ti ymidohuicxixy, je öcpi ajcxy ti yjugypijcy, e ngapx-huäcxyich oybi ayuc ma ayoohtijc. ²³ Jotcujc yi' ajcxy huidi ca' huinma'ñyigoogyixy miid ñich ycixpi.

²⁴ Co je Juan yquexyöybi yhuimbijttay, chi Jesús ni miydaccoty je Juan ma je mayjäy ajcxy, yminañ:

—Co ajcxy ti m'oy mijtigüduum, zti ti m'ijxcixy? zNej ti m'ijxcixy tüg jäy ametz jotmetz, jadu'n nejhuixy tüg nähuaax huidi pojmiimb pojxijp? ²⁵ Chi jada', zti oy ti m'ijxcixy? zTüg yëydijc huidi miid oy yhuin yxöxyty? Yi jäy ajcxy oy yxoxypí huidi agujc jotcujc tzinaaygixp hue' ajcxy yajpaady ma yi rey ytijc. ²⁶ zTi ajcxy ti m'ixy

jim mijtigüduum? zTüg jäy huidi Dios ytiy'ajt miid? Janch ti m'ijxcixy tüg Dios ytiy'ajtmiiñpi, etz jacniigi ymijity je' ca'ydi Dios y'ayucnajtzcapxiybi huidi jecy'ajty tzinay. ²⁷ Je' jada je jäy huidi Dios ñigapxyp ma ñey ma Dios jadu'n yminañ:

Cham nguejxyich ñich nguexyöybi jayijp ma miich, je' yaj'oyihuij je jäy ajcxy yjot yhuinma'ñ miid ñich ycixp, tim jadu'n nipaady nej jihuixy jäy tü'aa yaj'oyiy co rey yminañ yjädä'ñ.

²⁸ ñich miich ajcxy yam nimaayb co huudijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcapxiybi huudibi jacniigi ymí jity ca'ydi Juan, je Bautista. Chi jada' je jac mutzpi huidi jilby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty niibéjtcixy ma Juan, chi ajcxy minañ co Dios ytudägyty. ³⁰ E je fariseos ajcxy etz je escribas ajcxy huidi anajty ca' niibéjtcixy ma Juan, ca' ajcxy mijpidacy huidi anajty Dios ytunamy miid je' ajcxy ycixpi. ³¹ Chi je Huindzin Jesús yminañ:

—zTi miid nyajquipxihuibich jadayaabi jäy huidi tzi-nayb ma jadachambi tiempo? zHuidi miid nya-jtügihuibich? ³² Jadu'n nej pi'ctijc huidi ajcxy iyiiyb ma jäy yjuygixy ytoocxixy. Mijhuan mijjihuiygixy ymígügtijc: "Ti njayajxüxich flauta e ni ca' ti m'éjtcixy; ti nja'ñhui ajcxy ñy jotmaymiidpi, e ca' ti myaaxcixy."

³³ Chi Juan je Bautista ymiiñ, e je' ca' anajty cay, ni ca' vino ügy, chi miich ajcxy minaangixy co Juan ymiid ca'oybi. ³⁴ Chi ñich, je jäy huidi tzoön tzajpjoty, nmiñich, chi caaybich uucpich, e miich ajcxy minaangixy: "Ijxcix, cha tüg yëydijc janch cax janch vino uucp, huidi migüg'ajtpy yajcujtpidijc etz pocyjäydijc." ³⁵ Je tiy'ajt ji je' ñiguexigy ma je pinjaty nigapxp ni miydaacp tiy'ajt.

Jesús ma Simón je fariseojäy ytijc

³⁶ Chi tüg fariseojäy may'ajt pijctzoy, co Jesús anajty miid ycaya'ñ. Chi Jesús ytiigiyy ma je fariseojäy ytijc, chi ññay'ahuixy ma mesa. ³⁷ Chi jim anajty tüg töxyjäy huudibi anajty jibic tzinaayb jibic jugy'ajtp ma je jimbi cajp. Co je' nejhuixy jilby Jesús ma fariseojäy ytijc ññay ma mesa, chi mimiin tüg quiig aceite huudibi ooy oy xuugy, chi midigiiy tigoty. ³⁸ Chi ypiguetz'ahuixy ma Jesús ytecy ymijc, e chi yajxooci Jesús ytecy miid huinñi e yajpöt miid ycöhuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huudibi anajty ti huoy Jesús, chi jot'ajti yminañ:

—Co ixipiy jada Jesús y'ocjéjity Dios ytiy'ajtmiiñpi, y'ijxcajpy ixipiy pin jäy nejpy jäy yi töxyjäy huudibi niidooñ co yi' yjibictzinäy yjibicjugy'aty.

⁴⁰ Chi Jesús yminañ:

—Simón, cham ñich tüg ayuc nmídidyich huidi nyajnimahuamy.

Chi je' y'adzooy:

—Yajnimaaaygich, Huindzin.

⁴¹ Chi Jesús yminañ:

—Tüg comeefiyjäy ymiid anajty metz jäy huidi ti ñuucxy. Tüg jäy anuucxy migoox migo'px denario meeñ, e je jadügpí anuucxy huixchigui'px majc. ⁴² Com je'

ajcxy ca' anajty mīdity ti mīd cuedip, chi je comeeñjāy huinmecxy nimetz. Miich ocnīmaaygich, zje metzpi jāy huīdi nuucxy, huīdibi je' nīgī chojpy?

⁴³ Chi Simón y'adzooy:

—Hue' n'a'ixiīyich je tībi huinmecxy jac'anaxy.

Chi Jesús yminañ:

—Tī mdiygapxy.

⁴⁴ Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadyaabi töxyjäy? Co ndigīyich ma mdiyc, ca' miich nī xymooyich co ndecy nbūjibich. Jadyaabi töxyjäy iich ndecy ti xypūjip mīd yhuinnī, e ti xymēxyich ndecy mīd ycōhuay. ⁴⁵ Ca' iich miich ti xychūcx-tīyb iich ndecy. ⁴⁶ Iich miich ca' aceite mīdāgy ma iich ngohuajc. Jada töxyjäy ti xyajjaaxi ndecyich aceite huīdi ooy oy xuugy. ⁴⁷ Paady iich miich nyajnimāy co jada töxyjäy huinmeecxi yi' ymaybocy, co tībi oyhuinma'ñ yajtuñ cīxyjot huinijot. Pinjaty hueeni ypocy yajhuinmeecxi, hueeni yi' chōjcin yajniquēxgy.

⁴⁸ Chi Jesús je töxyjäy nimay:

—Tī miich mbocy yajhuinmecxtāy.

⁴⁹ Pinjaty anajty iñaayb ma je mesa ñayñimāyigixy miñ xyipy:

—¿Pin jāy jada jada' co nañ yhuinmeecxi py jāy ypocy?

⁵⁰ Chi Jesús nimay je töxyjäy:

—Tī m'alma ñīdzōgy co ti xymībicyich. Nicx jotcujc.

Töxyjäydijc huīdibi anajty Jesús pubejtp

8 Co jadu'n yjajti, chi Jesús ñīcxy ma tūg'óciy je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscipulos ajcxy mīd ñīcxy. ² Etz nañ ymīdnīcxi nijējity töxyjäydijc huīdi anajty Jesús ti yajtzōgy huīdi ca'oybi anajty ymīd etz jac tijaty pa'm. Hue' je' ajcxy anajty je María je töxyjäy huīdi anajty xījip Magdalena, je huīdibi Jesús yajpidzimi huixtucj ca'oybi ma je'; etz Juana, je huīdibi ñāy anajty xiijip Chuza, e je Chuza hue' je' je rey Herodes ytungmīdipi; etz Susana, etz jacjadyii ajcxy huīdi anajty ajcxy pubejtp Jesús mīd tijaty anajty ajcxy ymīd.

Je niipi y'ijxpejt

⁴ Co mayjäy ooy ñayyōmujc ma Jesús yhuinduu huīdi tzoony ma tūg tūg cajp, chi Jesús nimay je mayjäy ajcxy:

⁵ —Cha tūg ayuc nyajnimāhuaangixy. Jadu'n jāy tūg choñ niipi, ñīcxy trigo tīm huijpi. Co je trigo tīm huijy, chi nijējity ypajc oy yāy mījtūguj, chi je jāy ajcxy yajhuägpejty, e huīdi ca' yajhuägpejty, chi joon piihuīgy.

⁶ Chi nijējity trigo pajc oycāy ma tzaa nīcx. Co ymujxy chi je' ytīch, je' co anajty naax ca' yxoogity. ⁷ Chi nijējity trigo pajc oycāy ma apyot, chi ymujxy quipxy mīd apy'ung, chi y'ujtz'o'ctay. ⁸ Chi nijējity trigo pajc oycāy ma je naax oybi huinnātzcuyc, chi ymujxy, chi yeectzooñ, ytīm'ajty oyjaty, tūg trigo pajc mīgo'px oyco'ity.

Co Jesús je mīydāgī yajmay chi yjactīmcapxcoty, yminañ:

—Pin midohuamb jada ayuc, huen mīdooy.

Nej yhuimbizimy je niipi y'ijxpejt

⁹ Chi je discipulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰ Chi Jesús yminañ:

—Miich ajcxy jaydēbi mnejhuīhuipy huīdi Dios ñīgapxpy ñīmīydacpy coyūch'amy ma y'ané'min ycotūjcin. Jacjadyiibi jāy jihuimbit'amy nyajnimayich, jaydēbi pinjaty huīdi iixp ca' ajcxy y'ixipy, etz pinjaty mīdoob, ca' ajcxy mīdo'mbigipy.

Jesús capxtīcxy je niipi y'ijxpejt

¹¹ Jadu'n je jihuimbit ayuc yhuimbizimy: Je trigo pajc Dios je' y'ayuc. ¹² Je trigo pajc tībi tūguj yāy, je' je' jadu'n nej jāy huīdi mīdoob Dios y'ayuc, chi mic'amy ñīmīnyii je ca'oybi, e piibizimdāy je Dios y'ayuc ma yjot yhuinma'ñ, ca'ydi mībic etz ca'ydi y'alma yajnidzōgyii. ¹³ Je trigopajc huīdi cāhui ma tzaajot, je' y' ajcxy huīdi je ayuc mīdoob, chi cōbicy jotcujc, chi je' ca' ytictztigīy, tzojccīy y'ocmībicy, co agapxiyb paaty chi ixmajtzni. ¹⁴ Je trigo pajc huīdi ti cāhui apy'agujc, je' je' ajcxy huīdibi mīdoob, chi co ñīcxni jāydgooñi Dios y'ayuc mīd jotcujc'ājtin tzinaayin etz jugy'ājtin etz comeeñ'ājtin, e chi ca' Dios y'ayuc yhui'my ma yjot yhuinma'ñ. ¹⁵ Je trigo pajc huīdi cāhui ma oyñaax huinnātzcuyc, je' ajcxy huīdi oy etz tudāgy yjot yhuinma'ñ mīdity. Chi je Dios y'ayuc midohuī'my, e oñdāgy'amy Dios y'ayuc ymayy ma yjot yhuinma'ñ.

Je lámpara ñī'ijxpejt

¹⁶ Co jāy ajcxy jīndīcxīñ nōctzoy, chi ca' ajcxy cōjupy mīd tu'tz, nañ ca' huaad pidāgy cījx pātci'py, hue' janchtīy pīdaaccīy ma jīndīcxpejt, co pin ytīgīy jēbi ixy je jīn. ¹⁷ Ca' ni pin ayūch tunīpy e nīcxy ycajaynejhuīy, ca' ni pin ti tunīpy ameech e nīcxy ycaniquēxgy.

¹⁸ Paady miich ajcxy mīdoogīx yajxon co pin tijaty mīd, jacajmōhuip yi'. Pin ti camīd, yajpīgipy je' huīdi anajty yjamīd.

Jesús ytaj etz je jugymīgūg

¹⁹ Chi Jesús ytaj etz y'uch ajcxy ñīmīni, ca' ajcxy nīmejch Jesús yajxon mīd mayjäy ycxpi. ²⁰ Chi Jesús yñīmaay:

—Cheeby mdaj etz m'uch ajcxy tība'y, miich ajcxy xyjamīgapxam.

²¹ Chi Jesús yminañ:

—Yi jāy ajcxy huīdibi Dios ayuc mīdoohuipy etz cuyduunip, yi' iich ndaj'ājtypich etz n'uch'ājtypich.

Jesús yajxemy je poj etz je nī co anajty chachpidīggy

²² Chi tūg tecy yjajti Jesús ytīgīy ma tūg barco mīd ydiscipulos ajcxy, chi Jesús yminañ:

—Tzoc jim'amy ñīnaxy nājxim.

Chi ajcxy chooñ. ²³ Chi ñīguj anajty ñīcxīcy co Jesús ymīōgy. Chi tūg mic poj miñ ma je mejy. Chi je barco

ñii yajtigiyi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyüxcy ajcxy nimaaygixy:

—¡Huindzin! ¡Huindzin! Cham ajt n'ocquiinim.

Co Jesús oy ymäyhuijy, chi jijpcogapxiy je poj etz je mejy co anajty chachmijjéztpey ma barco. Chi je poj yhuäcxijtay, y'amoonday. ²⁵ Chi Jesús yminañ:

—¿Ma miich ajcxy je mmibjcin?

Chi ajcxy yjanchchigiygoty janch yhuinmay ajcxy ñayñimáayigixy miñ xyipy:

—Pin yëydijc jada jada' co je poj etz nii jiguexy, etz yajhuäcxipy, etz ycapxycöbigiyi.

Je Gadarajäy huidibi anajty ca'oybi miid

²⁶ Chi ajcxy ymejch ma je gadarenos naaxjot, huidi hui'm jim'amy ñinaaxy ma je Galilea mijlaguunba'. ²⁷ Co Jesús ñibidzimy, chi jijpcobadiy tüg yëydijc huidi anajty ti choñ ma je Gadara cajp. Je' anajty ymiid ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytijc, öcpijut anajty yajzinähuib. ²⁸ Co je' ixyaty Jesús, chi yaaxqueecy, e ycoxtinay'ahuüy ma Jesús yhuinduu, yminañ janch mic:

—¿Ti ñich miich co xyñimiiñich, Jesús, tügpajc mijpí Dios y'ung? Tun may'ajt ca' nijot xy-chachchaachytúñich.

²⁹ Jadu'n mīnañ com co anajty Jesús ixquexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymigügtijc ymiid'adyii miid cadena. Janch ypojtpy cadena, chi ca'oybi anajty yajnicxyii mijtigēduum. ³⁰ Chi Jesús y'amidooy je locijäy:

—¿Ti miich mxii?

Chi je ca'oybi yminañ:

—Ñich nxii Legión (hue' yhuimbizimy nimay).

Jadu'n mīnañ com nimay anajty ca'oybi ti ytiigiygixy ma je jäy. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjixcixy ma je ujtjot. Chi je ca'oybi may'ajt pijctzoy co huen yajtigiyñhuipy je' idzim. Chi Jesús ni'adzooy. ³³ Co je ca'oybi ypidzimy ma je jäy, chi ytiigiy ma je may'idzim. Huin'it je may'idzim ñayña-jtzjibibiyaayi ajcxy ma tüg ahuoc, chi oy ajcxy ycadäy nijoty, chi y'ögtay.

³⁴ Chi je idzim cuend'ajtpi ajcxy co ixu jadun nej ti yjadyii miid ajcxy y'idzim, chi ajcxy yqueecy, oy nimiy-daaccixy cajpjoty etz majaty tundac. ³⁵ Chi mayjäy ajcxy choñ oy ijxcixy jadun nej anajty ti ytunyii ti jadyii, oya'tcixy ma Jesús. Chi je mayjäy ajcxy paty je yëydijc, tñbi anajty ca'oybi ñibidzimyii ycöbidzimyii, ñäy ma Jesús yhuinduu, huit miid etz huijy quejy, chi ooy je jäy ajcxy chigiy. ³⁶ Chi pinjaty ajcxy iix miid miydacy jadun nej yi' choocy, je jäy huidi anajty ca'oybi miid. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigiygixy. Chi Jesús ytiigiyñi barcojoty yhuimbijtni. ³⁸ Chi je jäy tñbi anajty ca'oybi ñibidzimyii ycöbidzimyii pijctzoy may'ajt co miid'dan Jesús. Chi Jesús miid capxycjxy, nimay:

³⁹ —Nihuibit mdijc, etz nimiydäg jada mijpí tung huidibi Dios ti tuñ miid miich ycixpi.

Chi je' ñicxy capxhuäcxxy je tiy'ajt cajp jadu'n nej anajty mijhuinma'ñ Jesús ti tuñ miid je' ycixpi.

Je Jairo ñix etz je töxyjäy huidibi Jesús yhuitpa' nīdoni

⁴⁰ Jadu'n yjajti co Jesús yhuimbijty co choñ Galilea, chi je jäy ajcxy cöbijcy Jesús janch agujc jotcujc, com nidüg'óciy anajty ooy jijp'ijxcixy. ⁴¹ Chi tüg yëydijc huidi anajty yxi Jairo huidibi anajty mijtungmiid ma judíojäy ñaymujctac ymiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymiid anajty tügpajc ñix, hue' anajty yjimijt majmetz, janch tim ögaanip anajty. Co Jesús ñicxy miid je', chi janch mayjäy anajty chach'adijyii chach'agodiyii.

⁴³ Chi tüg töxyjäy huidi anajty yxi ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzoymbi ajcxy, etz ni pin anajty ycajatzögyii. ⁴⁴ Chi je töxyjäy nimijhuägy je Jesús, chi nīdoni yhuitpä. Janch mic mic je yxi ybo' oy yhuäcxipy.

⁴⁵ Chi Jesús yminañ:

—¿Pin xyñidoñ ñich nhuit?

Chi ajcxy y'adzooy co ca' pin. Chi Pedro etz tüg'óciy miid je' yminañ:

—Huindzin, jäy ti xy'adijy ti xy'abodiy etz miich mīnañ: “¿Pin ti xyñidoñich?”

⁴⁶ Chi Jesús yminañ:

—Nidügti ti xyñidoñich. Nnejhuñybich co miid nmic'ajtich ti nyajtzögyich pinjaty.

⁴⁷ Co je töxyjäy jihuüy co ca' coyüch yhui'mañ, chi nimiiñ janch tziyuuyb. Chi yhuindacy ma Jesús yhuinduu, chi capxpizimy mayjäy'agujc ti ycixpi anajty co ti nīdooni Jesús yhuitpa', e co anajty mic'amy ti chögy.

⁴⁸ Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcujc.

⁴⁹ Yam Jesús anajty ycapxy, co ymiñ tüg jäy huidi anajty ti choñ ma Jairo ytijc; je Jairo nihuindzin'ajtp anajty je judiojäy naymujctac, chi nimaay:

—Ti y'ögy miich mñix, ca' mjac'amayy nigiy y Huindzin Jesús.

⁵⁰ Co Jesús jadun midooy, chi yminañ:

—Ca' mdzigy, mibijcich janchtiy, etz tzögip yi mñix.

⁵¹ Co Jesús ytiigiy ma je tijc, chi ca' a'ixiy nicxy ytiigiy hueñpñity miid je'. Jëyi Pedro, Jacobo, Juan etz je töxy'anäg ytaj yteedy ytiigiy miid Jesús. ⁵² Chi tüg'óciy je mayjäy ajcxy janch yaaxp, janch ñé'mgixy miid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³ Chi nigoob ajcxy nixiicy com ti anajty nejhuüygyxy co ti y'ögni. ⁵⁴ Chi Jesús majch je töxy'anäg ma yci', chi migapxy mic, yminañ:

—Töxy'anäg pidig.

⁵⁵ Chi je' yjugypijcy, e mic'amy ypidigy. Chi Jesús yminañ co huen yajcaaygixy yaj'uuccixy. ⁵⁶ Chi ytaj yteedy ajcxy ooy chigiy yjihuüy. Chi Jesús nimay co ca' huaad pinjaty miidmiydägipy jadun nej ti ytuñiy jadyii.

Jesús quejxy ayuccapxhuäcxp je nimajmetzpi ydiscípulos ajcxy

9 Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújcín co ajcxy ix-quexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzoocixy pa'mjäy. ³ Chi Jesús yminañ:

—Ca' ni ti tü'amgixpi mminíxcixy; ni mgaminíxcip mdaic, ni mmorral, ni mgaagy, ni meeñ, e ni mgaminíxcixipy ajcxy metz mhuit. ⁴ Huen tím huidi tijc ma anajty mdigíygyixy, jim ajcxy huí'mgixipy, e jim ajcxy nayyöyhuäcxíyb. ⁵ Hueñyma'amyity ma ca' jäy xycöbñjccixy, co ajcxy mbidzímgyixy ma je' cajp mhuiñéjpcixipy mhuiñjáxcixipy je naaxjoc ma mde-cy. Jada je' tiy'ájtíp co Dios tzaachytunipy yí jadu'mbi jäy ajcxy.

⁶ Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzoocixy pa'mjäy hueñytimma'ámyity.

Co Juan el Bautista y'ögy

⁷ Je rey Herodes co nejhuñy jadu'n nej Jesús anajty mijhuinma'ñ tuñ, chi ooy anajty tzachnejhuñhua'ñ pin je' anajty. Com nijëjity jäy anajty yminaangixy co ti Juan jugypicy. ⁸ Chi jacnaagity yminaangixy co Elías ti ñayguëxígyii, e jacnaagity yminaangixy co tüg Dios y'ayucnajtzcaxíybi je' ti yjugypicy huidi jecy'ajty octzi-naybi. ⁹ Chi Herodes yminañ:

—Ñich yí' ni'ane'mdiy co huen ajcxy Juan ycohuajc yaminajci. ¿Pin jada jada' huidi ñich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmídmidactay ajcxy Jesús tüg'óciy tibi anajty túngixy. Chi ac jëy ydiscípulos mñd'ajty Jesús migtigíduum huingon ma tüg cajp huidi yxí Betsaida. ¹¹ Co je mayjäy ajcxy nejhuñy, chi ajcxy panixy Jesús. Chi Jesús je mayjäy cöbijctay etz yajmídmidacy ajcxy Dios y'ayuc ytiy'ajt nej ané'mín cötújcín mñdity. Jesús nañ yajtzöcpy anajty huídijaty yajtzoñhuaam.

¹² Co oy chu'íyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycijxni mñd jadayaabi mayjäy ajcxy, jaydëbi ajcxy ñicxipy ma yí cajp huidi huinduy agon yajpaatpi, huen nicxy ixtaagyixy jättac etz jim ajcxy paadipy caayín uucín. Com hue' jada it ma ñich ajt yam nyaj-paatim migtigíduum.

¹³ Chi Jesús yminañ:

—Mooygix miich yí' ajcxy ycaayín y'uucín.

Chi je' ajcxy y'adzooy:

—Jëy ñich ajcxy nmídidyich migoox tzajcaagy e mejtz acx, nigo co ca' ñich ajcxy njuy caayín uucín mñd jada-dayaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yí mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús conígy je migooxpi tzajcaagy, etz je metzpi acx, chi ypa'tíjxy tzajpcíxy conuucy je tzaj-caagy etz acx, huin'it tujc-huäcxxy moy je' ydiscípulos ajcxy, huen yajhuäcxixy ma tüg'óciy mayjäy. ¹⁷ Chi ajcxy ycaayí, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yí' je' je Cristo

¹⁸ Chi jadu'n yajti co Jesús anajty ycapxtägy ahuingu-jc mñd je' ydiscípulos ajcxy, chi Jesús je' ajcxy y'amídoy:

—¿Pin ñich jäy xytijy?

¹⁹ Chi ajcxy y'adzooy:

—Nijëjity jäy xytijy co miich je Juan je Bautista; nijëjity yminaangixy co miich je' Dios y'ayucnajtzcaxíybi hu-di jecy'ajty tzínay e ti yjugypicy.

²⁰ Chi Jesús yminañ:

—¿Miich ajcxy, pin ñich miich ajcxy xytíjicy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹ Chi Jesús pidacy ané'mín etz cötújcín co ca' ajcxy ni pin yajnimähuiip co yí' je' Cristo. ²² Chi Jesús yminañ:

—Ooy ycopícyty co ñich, je jäy huidi tzoon tzajpjoty, canaag nax ayo'n nbáadibich, ca' xymijpidägibich je mijjäydiy, je teedy tungmídpi, etz je' ajcxy huidi yaj'ix-picy Dios ñicy, e co n'ögip njugypigípyich codugíig xii.

²³ Chi Jesús nimay ajcxy nidüg'óciy:

—Pen ji pin xypanicxa'ñich, huen jäydigoydäy yci'm tzójcín etz huen xypanicxyich jabom jabom, oy nej ytimyjadipy ytimy'ayoohuipy, tím nipaady nej jihuñy ti cabígy mgruudz jabom jabom etz pajamgich. ²⁴ Huen pinjäy huídibi ca' yega'ñ yí yjugy'ájtín ma yí o'cín mñd ñich ycixpi, hue' je' yajtgoyamy yí yjugy'ájtín. E huen pinjäy huídibi yegamy yjugy'ájtín ma yí o'cín mñd ñich ycixpi hue' je' ypadamy yí jugy'ájtín. ²⁵ ¿Ti tüg jäy ypat-py, pen ti paady tüg'óciy cohuit'ájtín comeeñ'ájtín ya naaxhuiñ e nayyajtigoyii, etz ca' y'alma yajnídzögy?

²⁶ Yí jäy ajcxy pinjaty xymídzöydúnibich n'ayuc, ñich je' je jäy huidi tzoon tzajpjoty, nañ nmídzöyduníyibich je' ajcxy co anajty nhuimbityich ya naaxhuiñ, mñd ñich n'ané'mín etz nmic'ajtich etz nDéedyich y'ane'm'ajt, etz ymic'ajt, etz mñd je ángeles ajcxy ymic'ajt huídibi huadz yjot yhuinma'ñ. ²⁷ Janch ñich miich ajcxy nimäy co ji jäy ma miich ajcxy huídibi ixipy Dios y'ané'mín yajijp ca'ni anajty y'ögy.

Jesús yajtigach je ñicx

²⁸ Chi miductujc xíbi maabi anajty jada ayuc jadu'n capxy, Jesús huodzoñ Pedro, Juan etz Jacobo, chi mñd'ajtpy jim ma tüg copjijp Dios mibijctzoob. ²⁹ Yam anajty Dios ooy mibijctzoy, co Jesús yhuñyijp oytigach, e je yhuít yajty janch poob janch adícxp. ³⁰ Chi

metz jäy ñayguëxici, miidgapxy miidmiydägy Jesús, Moisés je' anajty etz Elías. ³¹ Huidi ajcxy naygëxici janch jühuidityi anajty ajcxy je tiicxin jájin miidity, nigapxcixy nimiyaaccixy je o'cin huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmahuaní, chi ajcxy mi'ogtigooy. Co oy ymähuijixy, ijxy ajcxy Jesús y'adiicxin y'ajajin, etz nañ jadu'n ijxy ajcxy je nimetzpi jäy ajcxy huidi anajty Jesús miidmiydäcxy. ³³ Jadu'n yjajty co yi jäy ajcxy puyöyduutni Jesús. Chi Pedro Jesús nimay:

—Huindzin, jotcuje ñich ajt ya. Tzoc tugiig tijc yaj'oyiyim, tüg miich mjëdiiby, jadüg Moisés jëdiiby, etz jadüg yi Elías jëdiiby.

Pedro ca' anajty nejhuiy ti ycapxy. ³⁴ Yam nigí anajty ycapxy co joc ñaaxcidacy huidi yajnidigoy je' ajcxy. Chi ajcxy ooy chigiiy co oy joc yajnidigoydáayigixy. ³⁵ Chi tüg ayuc yajmidooy ma je joc yminañ:

—Ñich jada n'ung'ajtpy, ooy ndzocyich njihuüyich. Amido'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhu'i'my, chi ajcxy nañ jadu'n amoñ. Huin'it xii ni ca' ajcxy miydacy miid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi miid

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijp-cobadüyii. ³⁸ Chi nidügti jäy ycapxy janch mic, yminañ:

—Huindzin tun may'ajt ix ñich n'ung, yi' ñich tügpajc n'ung'ajtpy. ³⁹ Huen mináajity ca'oybi ymachyii, chi timetiini yaaxquëgy yajyachyii yajquidyii, etz yajpidzimy oy yhuin'opy y'aa'opy e adzaach y'ixmachyii. ⁴⁰ Ti ñich may'ajt nbijctzooyich ma yi mdiscipulos ajcxy, co huen yajpidzimy je ca'oybi, per ca' yi' ajcxy ti mi-madägy.

⁴¹ Chi Jesús yminañ:

—Miich jäy ajcxy huidibi ca' miibijcp ca' ajcxy mmijpidäga'ñ yi tiy'ajt! ¿Naag xii ñich njac'idipy ma miich ajcxy nmimecxtüjccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojy je ca'oybi, e yajtzooxy je yeeg'anäg, chi yteedy yajcëdigiiyñi.

⁴³ Chi tüg'óciy je mayjäy ajcxy ooy chigiiy miid je mijhuinma'ñ huidi Dios ytuun.

Jesús capxidzimy jadüg'oc co y'öga'ñ

Jesús ydiscipulos ajcxy ooy jihuiyigixy huinmaaygixy co Jesús jadu'n yminañ:

⁴⁴ —Miich ajcxy yajxon mido'mbëjccix jada ayuc. ñich je' je jäy huidi tzoon tzajpjoty, hue' nyajcëyega'ñich ma pocyjäydijc ajcxy yci'am.

⁴⁵ Je' ydiscipulos ajcxy ni ca' anajty huinjhuuyigixy, tzigiiyb anajty ajcxy, paady ca' ajcxy jaty nej yaj'amidóogixipy.

¿Pin je' nigí jacmíjip?

⁴⁶ Chi Jesús ydiscipulos ajcxy ytiigiiy huinmay'ahuidi-jtp, nejhuihuaangixy pin je' jacmij'idam. ⁴⁷ Jesús nejhuiy je' ajcxy yjot yhuinma'ñ huidi nayyajmiidmiydäacip ajcxy, chi tüg pi'c'anäg huijtzëgy, ypidacy ma ymijc. ⁴⁸ Chi Jesús yminañ:

—Pinjaty xycöbijcpich jadu'n nej jada pi'c'anäg xycöbicyich miid ñich nxii ycxipi, ñich yi' anajty ti xycöbicyich; je huidibi ñich xycöbijcpich, cöbigib je huidi ti xyquexyich ya naaxhuiñ. Yi' huidibi jacmützip ma miich ajcxy, yi' je' jacmijpi.

Pin ñich ajt ca'p xymijotma'tim, je' ajt xymijnicxpejtim

⁴⁹ Chi Juan yminañ:

—Huindzin, ti ñich ajcxy n'ijxcixy co tüg jäy ti yajpidzimy ca'oybi miid miich mxii miich mmic'ajt. Ti ñich ajcxy yi' nyaj'ojyich com ca' yi' ñich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, ñich ajt yi' nmiiid.

Jesús jijpcogapxiy Jacobo etz Juan

⁵¹ Jadu'n yjajti co tiempo yhuingoni mina Jesús ñicxip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytiigy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuuyigixyp co Jesús etz ymüggtijc ñicxy anajty ajcxy jim Jerusalén. ⁵⁴ Co jadu'n Jesús ymigüg ajcxy nejhuiy co je samaritano jäy ca' jättac yega'ñ, chi Jacobo etz Juan nimay Jesús:

—Huindzin, ¿nej m'a'ixiyb ñich ajcxy n'oc-ni'ane'mdüyich huen jin cäy huidibi tzomb tzajpjoty, jigix yi samaritano jäy ajcxy yciyxtähuiy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, ogy Jacobo etz Juan, nimay:

—Miich ajcxy ca' mnejhuuyigixy ti jot ti huinma'ñ miich ajcxy miid. ⁵⁶ ñich, je jäy huidi tzoon tzajpjoty, ca' ti nmíñich ya naaxhuiñ co jäy yjugy'ajt miñ nyajt-gooyich, hue' jánchty ti nmíñich co jäy yjugy'ajt nyajtzóogibich.

Chi ajcxy ñicxni huingbi cajp jättacp.

Je pinjaty anajty Jesús panicxam

⁵⁷ Jadu'n yjajti co anajty ñicxcixy ma tüg tü'aa, chi tüg jäy Jesús nimay:

—Huindzin, ñich miich nbanicxaamy oy tim ma'amy miich mnicxy.

⁵⁸ Chi Jesús y'adzooy:

—Yi' huaax ymiid yi' ajcxy yjut, etz yi' joon ajcxy ymiid ajcxy ype'ñ, ñich je jäy huidi tzoon tzajpjoty ca' nmídidyich ma nmähuiibich ma nböcxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ñich ndeedy n'ocyajnaaxtigñhuipy.

⁶⁰ Chi Jesús ymíñañ:

—Jébi yajnaaxtigñhuipy huídibi ca' xypanícxa'ñich. Nícx miich capxhuäcxí Dios y'ayuc y'ané'mín.

⁶¹ Chi jadüg jáy ymíñañ:

—Huindzin, nbanícxamy yam. Tun may'ajt ocnaajt-madziygich nícx n'ocmídcapxycíxyich njuugy nmígügich huídí jim ma ñich ndíj.

⁶² Chi Jesús ymíñañ:

—Pinjaty yhuinma'ñ tí pidägy co Dios ytung tunaani, ca' huaad ixmach je tung, tím jadu'n nipaady nejihuñy tüg jáy tí ytigñy naaxjdzijtzpi míd arado, e ca' huaad y'ijxhuimbity com co huinduum arado nícxñhuipy.

Jesús quejxhuäcxy je nidugi'pxmajcpi

10 Huin'it co jada jadu'n tí ñaxy, chi je Huindzin Jesús huin'ijxy jatugi'pxmajc y'ixpijcpidíj, chi quejxgy cogapxy metz metz ma tüg tüg cajp majaty ñícx'a'ñ. ² Chi Jesús nímay yí' ajcxy:

—Janch je cosecha ooy tí yhuindñy, yí midumbi janchtñy hueeni. Chojcpi co nbijctzóohuim ma nHuindzin Dios co huen quexy ytumbidíj ma yí cosecha. ³ Nícxícx, ñich miich ajcxy nguejxpy jadu'n nej cöbixy y'ung yhuidity pa'uc aguic. ⁴ Ca' mminícxícx mbijty, ni mxäcxuumy, ni mgñg, e ni pin ca' mgapx-pöcxícxipy tü'am. ⁵ Co ajcxy mdigñhuipy huenytmítíjci-ty, jayijp ajcxy mináangixípy: "Ji jotcuic'ájtín ma jada tíj." ⁶ Pen yung naxy je' ajcxy yajpaady, miich ajcxy je mgapxpoocxín jotcuic'ajt myegípy ma je' ajcxy; pen ca' ajcxy yjadú'nity, naadigñ'adíp huídí anajty tí mgápícxí. ⁷ Nañ huí'mgíx ma je tíj, chi ajcxy mgayípy m'ügípy huídí je jáy anajty ajcxy xymooyb, com je tumbi paatíp je' je ymuju'ñ. Ca' ajcxy mhuididípy jayjñ jaydíj. ⁸ Huenytmíyhuídí cájpity ma anajty mdigñygyxy, pen je jáy ajcxy xycöbíjcp, caaygíx uuccíx huídí anajty jáy ajcxy xymooyb. ⁹ Yajtzóocíx yuujáy pa'mjáy huídijaty jim ma je' ajcxy yajpaady, etz yajnímaaygíx: "Je Dios y'ané'mín huigóníñ yí' ma miich ajcxy." ¹⁰ Huenytmíyhuídí cájpity ma anajty mdigñygyxy, e ca' anajty jáy xycöbígaaangíxy, co ajcxy mdzanaaníp, nimaaygíx: "Yí mgajp naaxjoc huídí tí ypety ma ñich ndecy nhuin-nebáamyíx, yí' je' íjxpejt co Dios ajcxy xychaachytunípy. Chi nejhuñygyxy miich ajcxy jada co je Dios y'ané'mín tí ymíhuingoní." ¹² Ñich miich ajcxy nímayb co huin'it xí co anajty yajhuaad'aty, Dios nígi tzaachytunaangíxy je jáy huídí ajcxy ca' miich ajcxy xycöbíg'a'ñ, ca'ydí Sodoma cajpjáy.

Je cajp huídijaty ca'p ycapxymidoy

¹³ Chi Jesús yjacmíñañ:

—Jímiich ayoob ajcxy Corozín jáy! Jímiich ayoob ajcxy Betsaida jáy! Co jim ma je Tiro cajp etz Sidón cajp caytuní cayjajtí je Dios ymíjhuinma'ñ huídí tí ytunyí tí yjadyí ma miich ajcxy, jécyípy íxyípy ajcxy yjothuimbijtní, etz tí yajníquëxcíxy íxyípy míd je yhuít íñaaygíxy sací níjen nícuycam íxcuyjam (je' je tíy'ajt co ooy yta-jcíxy ymaygíxy míd ypocy ycíxpi). ¹⁴ Janch jadu'n

yjadípy co anajty Dios yajnígödugñy, nígi o'ctíy miich ajcxy ayo'n mbaadñyb ca'ydí jadu'n nej Tiro jáy etz Sidón jáy. ¹⁵ E miich ajcxy Capernaum jáy ajcxy, ¿nej mmínaangíxy mjátcíxípy tzajpjotyí? Hue' m'ídaaccíxy miich ajcxy ma yí ayoodactuuby.

¹⁶ Je jáy ajcxy huídí miich ajcxy m'ayuc xymídoohuip, nañ xymídoohuñb yí' ajcxy ñich n'ayuc. Je jáy ajcxy huídí miich ajcxy ca' xy'íxa'ñ, nañ ca' je' ajcxy xy'íxa'ñíx; e pinjaty ca' xy'íxa'ñíx, nañ ni ca' yí' íx-aangíxy je Dios je huídí tí xyquexyíx ya naaxhuíñ.

Chi ajcxy je nidugi'pxmajcpi yhuimbíjtcixní

¹⁷ Chi je nidugi'pxmajcpi huídí Jesús yquejx ayuccapx-huäcxpi yhuimbíjtay ajcxy janch jotcuic, ymínaangíxy: —Íxtí je ca'oybí tí ñich ajcxy xycapxycöbíjccíxy míd miich mxí.

¹⁸ Chi Jesús ymíñañ:

—Tí n'íxyíx nej je ca'oybí yhuindzin tí ycáy, jadu'n nej jíhuñy tí ycáy tí ycödígñy tzajpcíxy, jadu'n nej tüg huídí. ¹⁹ Ñich miich ajcxy mic'ájtín tí nmooygíxy, jay-débi ca'oybí ca' xymímadáaccíxípy, tím jadu'n nipaady nej jíhuñy tza'ñ etz ca'ty myajhuäc'éjtcíxy e ca' nej mjájtícxí. ²⁰ Nígi miich ajcxy jotcuic'ájtíx co ajcxy mxí y'íjtcíxy cojay jíiby tzajpjoty, ca'ydí co ajcxy ca'oybí xycapxymídoogíxy.

Chi ooy Jesús yjotcugíy

²¹ Huin'it Jesús yjotcugíy míd je Dios yjíhuí'ñ ymic'ajt, ymíñañ:

—Nyajnajxypíx Dioscojuyp ma miich, Dios Teedy, tzajpjotyí Huindzin etz je naaxhuíñybi Huindzin, co tí myüch jada míjhuinma'ñ ma yí cohuinma'ñ jáydíj, etz tí myajnejhuñy je jáy huídí ca' y'ixpícyty. Dios Teedy, jadu'n miich tí mduñ com jadu'n miich tí mjáygidacy.

²² Ndéedyíx tí xyajcídígíydyíx tüg'ócy tíjaty mic'ajt oy'ajt. Ni pin ca' íjxcajp pin je' Dios y'ung'ajtpy, jéyí nDéedyíx tügpaicí pin xy'íjxcajpíx. Ni pin ca' íjxcapy pin je' nDéedy'ájtípy, jéyí je Dios ung tügpaicí huídí íjxcajp, etz jacjadyí ma je ung yajníguëxíga'ñ.

²³ Chi Jesús ní'íjxhuimbijty yí' ydiscípulos ajcxy, ahuin-gujc ajcxy nímay:

—Jotcuic ajcxy je jáy ajcxy huídí íjxcíx jadu'n nej mí-ich ajcxy tí m'íjxcíxy. ²⁴ Ñich miich ajcxy nímayb co ooy may Dios y'ayucnajtzcaxñyb etz rey ajcxy ja'íxa'ñ huídí miich ajcxy m'íjxpy, e ni ca' ajcxy íxy; etz jamí-doo'ída'ñ huídí miich ajcxy mídooyb, e ni ca' ajcxy mí-dooy.

Íjxpejt ma tüg samaritano oyjáybi

²⁵ Chi tüg jáy huídí yaj'ixpijcp Dios ñecy ytínaay'ahuñy jot'íxy huinma'ñ'íxy Jesús, chi y'amídooy:

—Huindzin, ¿tí huaad ndunípxíx co ñich jugy'ajtní huiníxíbi nbáadíbxíx?

²⁶ Chi Jesús y'adzooy:

—¿Tí jaybétyíx ma yí Dios ñecy? ¿Nej mhujñhuñy co mnecycapxy?

²⁷ Chi je ley huindzin y'adzooy:

—Mdzogipy mjihuñhuipy mHuindzin Dios miid tüg'óciy m'aa mjot, miid tüg'óciy m'alma, miid tüg'óciy mmijaa, etz miid tüg'óciy mjot mhuinma'ñ, e mdzogipy yi mijijn midijc jadu'n nej miich cí'm naychogyii.

²⁸ Chi Jesús y'adzooy:

—Tí ooy yajxon m'adzooy. Tun yi', e mdzinähuip huinixii.

²⁹ E je' nañ jadu'n tím tiy ñejhuñhua'ñ, nimay Jesús:

—¿Pín ñich nmídjic'ajtpy?

³⁰ Chi Jesús y'adzooy:

—Tüg jáy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuít e tijaty yi' anajty ymiid pijtaayi. Chi ajcxy ooy huinhuoopy jiphuoopy huingoxy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiiy ma je jimbi tú'aa. Co y'ijxy je tzaachijäy, chi jüyöyñajxy. ³² Nañ jadu'n yminagiiy ma je jimbi tú'aa tüg levita jáy huídí tuumb ma Dios ytijc, co jim yjaty mihuingon je tzaachijäy, co oy ixy, nañ chi jüyöyñajxy (ca' pa'ayooy). ³³ Chi tüg samaritano jáy anajty jim naxii, co mihuingoñ je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaach'au, nañ tzooyii chaach'au miid aceite etz vino. Chi yaj'iyujcpety, e yajnicxy jim ma yjätac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: "Cuend'at jadaayaabi tzaachijäy, jadu'n nej anajty mjacmeeñyajtuñ, co ñich anajty nhuimbityich huin'it nmigüedipy." ³⁶ ¿Ma je nidugiiipi jáy pín je oybi tí tuñ miid je jáy huídí anajty je meetzpi tí ymeechyii tí yajtzaachiyii?

³⁷ Chi je jáy huídí Dios ñecy yaj'ixpijcp Jesús y'adzooy:

—Je huídí tí yajtuñ je pa'ayo'ñ.

Chi Jesús yminañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huídí anajty yxii Marta, yi' yajjättaci ma ytijc. ³⁹ Je Marta ymiid anajty tüg y'uch töxyjäybi huídí anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuyiiji co ñich naydüg yam tzach nayyajtuñyijichi? Nima' yi' María co huen xy-pubétyich.

⁴¹ Chi Jesús yminañ:

—Marta, Marta, yi' maytung miich mdzachmijotti-gooyb. ⁴² Tügpajc ji, huídíbi ooy ycopícyip. Yi' María tí yi' huin'ixy je oybi huídí ni pín ca' ypigiiyb.

Jesús yaj'ixpijic nej jébi mibijctzoohuim Dios

11 Jadu'n yajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi: —Huindzin, yajni'ixiiygich ajcxy tzajcapxycapxi, jadu'n nej Juan yajni'ixiiy yi' ydiscípulos ajcxy.

² Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huídí tzajpjoty tzinaayb, huindzigiiy miich mxii y'ity. Huen miñ ya miich yi' m'ané'min. Huen mdzócin yajcuyduñ ma je jáy yjot yhuinma'ñ jadu'n nej yajcuyduñ jiiyby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huídíbi ñich ajcxy ndundigooyb, jadu'n nej ñich ajcxy nmeecxyich huídíbi ajcxy xymídundigooybich. Ca' m'a'ixii co ñich ajcxy huinma'ñ tigoyipich. Yajnihuaatzcich ajcxy ma yi' jibicpi.

⁵ Chi Jesús yjacminañ:

—Pínjaty ji ma miich ajcxy huídí tüg ymígüg mñd, co ninícxipy mijcood e mnimähuiy: "Mígüg, tun may'ajt yajpijctzoogich tugiiig mdzajcaagy. ⁶ Tüg ñich nmígüg tí xyñimiñich huídí tüyöyp, etz ca' nmídidyich tí nmöhuibich." ⁷ Chi je jáy y'adzooy jiiyby tigoty, yminañ: "Ca' xy'amayiiyich. Tí ñich ndijc n'agiiyñi, etz n'ungich yam nmídidich cijx'am; ca' njatyich nej nbídidigibich etz nmöhuipy huídí mbijctzooyb." ⁸ ñich miich nimaayb, oy ca' tzojz nipídigañ ymöhuamy huídí pijctzou co mígüg'adyii, hue' ymöhuamy jaydébí ca'ydi yjac'amayii, chi yegipy tüg'óciy huídí yajmayjajtpy.

⁹ ñich miich ajcxy nimaayb: Pijctzóogix, e myajmöhuiy ajcxy. Ixtaaygix, e mbaadiy ajcxy; cogapxiygix, ahuädzip ajcxy mdijc'aguu. ¹⁰ Tüg'óciy je' pín pijctzoob tijaty ma Dios, cädigñhuñb; pín y'ixtaayb, ypaadiy; pín cogapxiyb, yaj'ahuatziiyb ytijc'aguu.

¹¹ ¿Pín ungedeedy ji ma miich ajcxy pen y'ung ypijctzoob tzajcaagy, nej mmöhuiy tüg tzaaji? ¿E pín ypijctzooyb acx, nej jébi mmöhuiy tüg tza'ñi? ¹² ¿Pen ypijctzoyb tzeydüty, nej jébi mmöhuiy ca'ty? ¹³ Pen miich jibicjäy ajcxy mnejhuñyb nej oybi m'ung móoygixipy, ¿nej ca' mdijy yjánchity co mDios Teedy tzajpjotypí xymóoygixipy je Espíritu Santo, pen miich ajcxy mmibijctzohuipy?

Yajniñijccixy Jesús co miidity mujcu' ymic'ajt

¹⁴ Chi Jesús anajty yajpidzimy tüg ca'oybi ma tüg jáy huídí anajty uumip. Jadu'n yajty co je ca'oybi ypidzimy, chi je uum ycapxigy. Chi je mayjäy ooy jihuiy huinmay.

¹⁵ Nijjity jáy yminaangixy:

—Jesús mijhuinma'ñ ytumyib miid je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jáy ajcxy co jot'ixaangixy huinma'ñ'ix-aangixy Jesús, pijctzooy ajcxy Dios tüg ymijhuinma'ñ.

¹⁷ Co Jesús nejhuñy nej je' ajcxy jot'adyii huinma'ñ'adyii, chi nimay:

—Co tüg gobierno ñaybajc-huäcxii, chi ñaychiptúnigixy miñ xyipy; ñayyajcixigixy ñayyajtigóoyigixy; co tüg quèx jáy ñaybajc-huäcxii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybajc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich miid ndüñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yi', ¿pín je mic'ajt mooyb huídí miich ajcxy xypahuídjtp co

yajpidzimy je ca'oybi? Paady yi' ajcxy ci'm yajniquëxëcp co miich ajcxy mdundigooygixy mgapxtigooygixy.

²⁰ Pen ñich miid Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tüg micjäybi miidity maydujt, e ñaycuend'adyii yajxon, ca' je' ytigoyipy tijaty ymiid. ²² Co yjaty jadüg jäy jacmicpi ca'ydí je', chi ymimadägyii, e ypijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymiid.

²³ Pinjaty ca' xymijnicxpétyich, nmidzipich yi'. Pinjaty ca' ytuñ miid ñich co jäy nyaj'ixpicyich Dios ytiy'ajt, hue' je' ajcxy jäy yajhuinma'ñyidigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim tütznaax ijxtägy co ypocxa'ñ. Co ca' paty ypocxtac, huin'it ymína'ñ: "Huimbidaambich ma je jäy yjot yhuinma'ñ ma ñich ti n'octzombi." ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuädzity janch ooy jadu'n nej tüg tijc huidi janch huädz pedigity. ²⁶ Chi je ca'oybi ñicxy, e miid miñ jahuixtucj ca'oybi jacjibicpi ca'ydí je'; chi ajcxy ytiigiy ma je jäy yjot yhuinma'ñ, e chinay ajcxy jiiiby; huin'it je jäy jac'octiy oy yjajtni ca'ydí jadu'n nej anajty jayjip'aty.

Huidi ajcxy janch jotcújcip

²⁷ Co Jesús jadu'n anajty ymína'ñ, chi tüg töxyjäy mayjäy agujc mic ymína'ñ:

—Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ymína'ñ:

—Je' jacjotcujc pinjaty Dios y'ayuc midoohuip etz cuyduunip.

Jibicjäydijc pijctzoogixy tüg tiy'ajt mijhuinma'ñyibi

²⁹ Co je mayjäy ajcxy jübigiy, chi Jesús ymínanadacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuüyb ijxpejt, jëyi tügpaic Jonás y'ijxpejt yajmöhuiip. ³⁰ Com jadu'n nej je Jonás jecy'ajty ijxpejt yeycy ma je Nínive jäy, nañ jadu'n ñich, je jäy huidi tzoontzajpjoty, nyegaamyich ijxpejt jadachambi tiempo miid jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'ñ mayjäy, etz yajpocycähuiipy ajcxy. Ixti ma naaxhuiñyibi ycgixiy jim je reina choon co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmidpi jacniigi ymíjity ca'ydí Salomón anajty. ³² Co anajty Dios tiyduna'ñ yi' may naaxhuiñyjäy, chi je jäy ajcxy huidibi anajty cogajpip jim Nínive pidigaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijty je' ajcxy co Jonás Dios y'ayucnajtzcaxiyi. Ji jadachambi tüg Dios y'ayucnajtzcaxiyibi jacniigi ymíjity ca'ydí jadu'n nej anajty je Jonás.

Je tiy'ajt huidibi nipaady nej lámpara ma ajt nninixc

³³ Ni pin ca' yüch je jün huidi ti nögpity, ni ca' pidägy jiiiby cajón pa'tci'py, jëyi janchtiy pidägy je jün ma jüindicxpejt, jaydëbi co pinjaty ytiigihuiipy tigoty, codicxib je jün. ³⁴ Je jün ma miich ajcxy mninixc je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninixc ymiid yi' tiicxin. Pen ca' y'óyity mhuiin, nañ jadu'n ajcxy yi' mninixc yajpaty agootztuum. ³⁵ Cuend'ájtciy yi' tiy'ajt huidi miich ajcxy miid, ca' mgoyütczixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codicxycy y'ity miid Dios ytiy'ajt, tüg'óciy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy miid cayii. Co Jesús ytiictigiy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyhuächyii miid ñi jayjipni ma anajty ca'ni ycaayñi. ³⁹ Chi je Huindzin Jesús ymína'ñ:

—Miich ajcxy fariseojäy, ooy mnyabidaaccixy tudägyjäy ma jäy ajcxy yhuinduu e ca' yjánchity; chi jada' ma mjot mhuiinma'ñ miich ajcxy ooy m'adzocy, etz miid ajcxy jibic-huinma'ñ; tim jadu'n nipaady nej myajhuäch ajcxy yi' tasi ninixc, yi' txyñinixc e chi ajcxy yajhu'mgixy jibicpi je tasioty je txyjoty. ⁴⁰ ;Miich ajcxy ca' Dios y'ayuc huinjihuuybi! ¿Ca' mnejhuuygixy co yi' pin ti txyñinixc yajcojy nañ ti yajcojy txyjoty? ⁴¹ Tun miich ajcxy oojäy'ájtín, huin'it janchtiy anajty ajcxy mhüädzity ma mjot mhuiinma'ñ.

⁴² ;Ay miich ayoobi ajcxy fariseojäy! Com mbidaaccixy abicy tüg picy je majcpi miid yi' Dios ycixpi ixti yi' tzajnimang, yi' ruda, etz tüg'óciy aay ujtz. Chi jada' ca' mduñ je oojäy'ájtín etz tiy'ájtín jadu'n nej Dios tzocy. Hue' je' oy mduñ co tijaty abicy mbidägy miid Dios ycixpi, nañ jadu'n copicy oojäy'ájtín mdunipy etz Dios ytiy'ajtmgyudunipy.

⁴³ ;Ay miich ayoobi fariseojäy ajcxy! Co ooy m'adzójccixy je ñaybejt huidi cöduum ma naymujctac, etz ooy m'adzójccixy co huen jäy ajcxy xycapxpocxcixy oy huindzigiy mayjäy agujc.

⁴⁴ ;Ay miich ayoobi ajcxy huidi yaj'ijxpjcp Dios yley etz miich fariseojäy ajcxy! Oy mjanaybidáacigixy oojäy e ca' yjánchity, ca' mgyudungixy Dios ytiy'ajt, jadu'n nipaady miich ajcxy nej ócpi jut huidi ca' yquëxigy, chi jäy yöy nigix, com co ca' ñiguëxigy.

⁴⁵ Chi tüg jäy huidibi yaj'ixpijcp Dios y'ayuc ymína'ñ: —Huindzin, co jadu'n miich mina'ñ, nañ jadu'n ñich ajcxy ooy jibic nayjihuiyigixy.

⁴⁶ Chi Jesús ymína'ñ:

—;Ay ayoob miich ajcxy Dios y'ayuc huindzin! Miich ajcxy mgójccixyp canaag costumbre huidi je jäy ajcxy ca' mimadäga'ñ, e ca' ajcxy mba'ayoogixy, tim jadu'n nipaady nej jihuy tüg tziy ti mmooygixy jemxypi hui-

di ca' je jāy ajcxy mīmadāga'ñ, e miich ajcxy ni ca' mgāhuāx jēda'ajty mgayajpadaangixy je tziy.

⁴⁷ Ay miich ayoob ajcxy! com myajcojciy je ōgpi jut ma je Dios ayucnajtzcaxiibi naaxtigiy, je huīdi m'ap mdeedy ajcxy yaj'o'c. ⁴⁸ Jadu'n yajhuinjihuīy nej jihūy miich ajcxy ooy mjāygidāgy jadu'n nej ajcxy m'ap mdeedy ytundigoy. Janch yī' ajcxy yaj'ōgy Dios y'ayucnajtzcaxiibi, e miich ajcxy myajcoj je ōcpi jut ma ajcxy je' ñaaxtigiiy.

⁴⁹ Paady yī Dios jadu'n huinmay, e mīnañ: Nya-jniguexipyich miich ajcxy profetas etz y'ayuccapx-huācxpi, e miich ajcxy myaj'ōgip nijējity, etz jacnaagity mbahuidijttāccixipy. ⁵⁰ Dios yajcomidohuīpy jadachambi tiempo jāy ajcxy je ypocy huīdi y'ap yteedy ajcxy ytuñ, com maabi naaxhuiñ chondāgy, yī' ajcxy yaj'ōgy Dios ytiy'ajtmīdipi. ⁵¹ Janch nīmaaybich miich ajcxy co Dios yajcomidohuīpy jadachambi tiempo jāy ajcxy je y'ap yteedy ypocy co ajcxy yaj'o'cy Dios ytiy'ajtmīdipi chondāgy ma Abel, ixti Zacarías huīdi jāy yaj'o'c ma Dios ytiy'ajtmīdipi.

⁵² Ay miich ayoob ajcxy Dios y'ayuc huindzin! Ca' miich ajcxy m'ixpīga'ñ Dios ytiy'ajt, nañ ca' mdzocy co yī jāy ajcxy ixpīgipy; tim jadu'n nīpaady nejihuīy tī mbicy je tījc ahuāast e ca' miich ajcxy mdīgīhua'ñ, e ni mgatzojccixy co huingbi nicxy ytiy'ajtmīdipi.

⁵³ Co Jesús anajty jadayaab ayuc yajnimaygixy, chi je Dios y'ayuc huindzin etz yī fariseojāy ajcxy jotmātcooty chi yaj'amidogoty ajcxy may ayuc. ⁵⁴ Ñayñimāyigixy miñ xyīpy co huen amido'ijt Jesús y'ayuc, jigix jēb páatcixipy huīdi jēb mīd xīgixipy.

Jesús yaj'ixpīcy co ca' huaad pinjaty naybīdaaci oyjāy pen ca' yjānchity

12 Chi je mayjāy ooy nimujcy Jesús, janch jadu'n ñay'adijy ñay'agodīyigixy, chi Jesús nīmaydacy je' ydiscīpulos jayjip:

—Nīgūendi mīd yī fariseojāy ajcxy nej ajcxy yjāy'aj'ixpīccixy. Yajxon yī' ajcxy ycapxy ymīydāgy, chi ca' cuydungixy. ² Ca' ji tī huīdi ijtp ayūch nicxy ycayajnejhuīy, nañ ni ca' ji tī huīdi ijtp ameech nicxy ycaniguēxīgy. ³ Huen huīdi ayuc miich ajcxy ameech mgapxy, yajnejhuīhuip yī'. Huen huīdibi ayuc huīdi tī mnayajnimāyigixy ameech jīiby tīgoty, mic yajcapx-huācxip tījc nīgīxy.

Pīn jēbi huaad ndzīgīyīm

⁴ Chi Jesús yjacmīnañ:

—Miich ajcxy nmīgūgtījc, iich miich ajcxy nīmaayb co ca' mdzīgīyigixy yī jāy ajcxy huīdibi nīnīcx yaj'o'cp, com ca' jac ni tī ajcxy tunīpy. ⁵ Ich miich ajcxy nya-jnī'ixīhuīpy pīn huaad jēbi mdzīgīyigixy. Yī' janch mdzīgīyigixy yī Dios huīdibi jugy'ajt pījcp, e huīn'it mīd je' ymic'ajt jēbi quexipy m'alma ma je mij jīn. Yī' janch mdzīgīyigixy yī'.

⁶ ¿Nej ca' jāy ajcxy ytoogyī mīgoox joon mīd metz pī'cmeēñ? Dios ni tūg yī' ajcxy ca' jāydgoooyty. ⁷ Ixti mgōhuay ajcxy ac mīchoy Dios mīdity. Ca'

mdzīgīyigixy, jactzou nīgī miich ajcxy ma Dios ca'ydi pī'cjoon ajcxy.

Je pīnjaty ca'p midzōyduñyī Jesús mayjāyoty

⁸ Ich miich ajcxy nīmaayb co pīnjaty ma miich ajcxy huīdi capxpīdzimp mayjāyoty co xymībīcyich xymījpidāgyich, iich, je jāy huīdi tzoon tzajpjoty, ngapxpīdzimīpyich co tī ngōbīcyich jadu'mbi jāy ma Dios y'āngeles ajcxy yhuīnduu. ⁹ Pīnjaty ca' xycōbīcyich mayjāy'aguīc, nañ jadu'n iich yī' ca' ngōbīgīpyich jīiby ma Dios y'āngeles ajcxy yhuīnduu.

¹⁰ Tūg'ōcīy jāy huīdi jadu'n iich, je jāy huīdi tzoon tzajpjoty, xyñīgapxp xyñī'ojīybich Dios huīnmecxīb. Chi jada' pīnjaty nīgapxp nī'ojīyb je' Dios yjīhuī'ñ (je Espīritu Santo), yī' janchty Dios ca' yhuīnmecxīyb.

¹¹ Co mīdzīp ajcxy xyajñīcxīp ma naymujctac, ma codungdījc, etz tungmīdipi yhuīnduu, ca' mdājīp mmāyīp nej m'adzōogixipy, e ca' mhuīnmayīpy nej ajcxy m'adzohuīpy. ¹² Com je Dios yjīhuī'ñ huīn'īty ajcxy xyajni'ixīhuīp nej huaad m'adzoogixy.

Naygūend'ajtigixy ca'p adzōjccixy comeēñ' adīi

¹³ Chi nīdūgtī je mayjāy ymīnañ:

—Huīndzin, nīma' n'ajchīch co huen yajhuācxī mīd iich huīdi ndaj ndeedyich ñīdungiy.

¹⁴ Chi Jesús ymīnañ:

—Yēydījc, ca' iich ni pīn tī xypīdāgyich ane'mbi ma miich ajcxy etz yajhuācxīp.

¹⁵ Chi Jesús nīmay je jāy ajcxy:

—Ijxcīx naygūend'ajtigīx, ca' m'adzōjccixy comeēñ'adīi, com je m'alma yjugy'ājtin ca' je' nīdzōcīn'adyī huīdījaty miich ajcxy mīd.

¹⁶ Chi ajcxy yajnimay tūg ayuc, ymīnañ:

—Jīm anajty tūg comeēñyāy huīdibi anajty ooy mij ypidāgy yajpidīgy. ¹⁷ Je comeēñyāy anajty ooy cī'm huīnmay ma yjot yhuīnma'ñ, ymīnañ: "¿Tī n'octunīpīch com ca' nmīdīdyich ma nyajnīgīdāgībīch yī tībi y'ity?"

¹⁸ Chi ymīnañ jotjoty huīnma'ñyoty: "Nyajpīdīcnībīch ndzēx, e ngōjībīch jacmījpi, chi tūg'ōcīy jīiby nīdīctāhuībīch tībi y'ity." ¹⁹ Co jadu'n ndunīpyīch, chi jēbi jotcujc ndzīnāhuībīch, com ooy anajty nmīdīdyīch pīdāgy yujcīpy, jēbi canaag jīmījt nīboocxyīch etz jēbi ngay n'ūgyīch jotcujc. ²⁰ Chi Dios nīmay je comeēñyāy: "Ooy jībīc-huīnma'ñ miich mīdity. Cham coodz iich miich nībjctzohuīhuaanīy yī m'alma (m'ōgīp), e co anajty tī m'ōgy yī huīdibi tī myujcīpy, ¿pīn yī' je'adīb?"

²¹ Jadu'n yajty yī' ajcxy huīdibi ymēēñ'īdī'ñ cī'm yujcījcp, ca' yī' ajcxy jīiby ycomeēñyīty ma Dios yhuīnduu.

Dios ycuend'ajtpy y'ung y'anāg

²² Chi Jesús nīmay je y'ixpījcpīdīj:

—Paady ajcxy nīmaaygixy co ca' huaad mjottī-googyīxīy ma yī mdzīnāayīn yī mjugy'ājtin, huīdi mjīcxīcīxīpy mgāaygīxīpy, huīdi mīd mīnīnīcx mxōjxcīxīpy.

²³ Yī jugy'ajt jacnīgī tzou yī', ca'ydi yī caayīn uucīn, etz je mīnīnīcx jacnīgī choohūty ca'ydi huit. ²⁴ Ijxcīx yī joogy

ni ca' ñiipy, ni ca' chijccixy, ni ca' mīdity ytiyc ni chēx, e Dios yī' ajcxy mooyipy huīdi yjīxcixyp, ¿nej cayjacnīgi miich ajcxy mdzoohuīty ca'ydi' joon ajcxy? ²⁵ Ca' ji ni pin ma miich ajcxy pin jadipy nej ñayjijptzomēhuīb jadug cīnuux. ²⁶ Pen ca' mjaītcixy nej mdūngixipy huīdi hueen huīnma'ñ, ¿nej co mdzachimjottigooygixy yī tzi-naayin yī comeēñ'ájtīn?

²⁷ Ijxcix yī aaybijy nej xóxyity, ca' ytaaccixy ni ca' yxu-uygixy. Iich miich ajcxy nimaayb, co ni je rey Salomón mīd tūg'óciy ymeeñ ca' ñayxoxi' jadu'n nej jada aaybijy uītzpijy. ²⁸ Pen jadu'n Dios xoxy yī aay yī uītz huīdibi cham jaitip ma yī tungop, e com jabom ti anajty ñi-icxni, Dios xypubedipy xypudigīhuīpy nīgi miich ajcxy huīdi hueen mībijcp. ²⁹ Ca' miich ajcxy mhuīn-may'ahuīdījtcixipy ajcxy ti mgāaygixipy m'úuccixipy. ³⁰ Yī naaxhuīñyāy ajcxy ymījottigoyb anaxy tūg'óciy caayin uucīn, huit etz tijaty. Miich ajcxy huīdi mījpidacp Dios, Dios Teedy ñejhuīyb co copicy ajcxy mīd'adipy caayin uucīn etz huit tucxy. ³¹ Jayijp mījottigooygix Dios y'ayuc ytiy'ajt, chi jada' tūg'óciy huīdi ajcxy myajmayjajty mbáatcixipy yī'.

Jugy'ájtīn mījpi jīby tzajpjoty

³² Chi Jesús yjacmīnaañ:

—Ca' miich ajcxy mdzigīygyx, miich ajcxy mni-hueēñity, per mDios Teedy yega'ñ ane'mdac tzajpjoty mīd miich ajcxy ycixpi. ³³ Toocix tijaty miich ajcxy mīd, nimooygix ayoobījic. Yaj'oyīygyx meeñ'idi'ñ huīdi ca' y'amījīhuīpy ni camīna. Yaj'oyīygyx tūg pidāgy, janch mij e janch oy, jīby tzajpjoty huīdi ca' ycixipy yti-goyipy, ma ca' meetzpi huaad ytiyīy, ni ucxyting ca' ya-jhuīdīgoyipy. ³⁴ Pen miich ajcxy mīd mgomeēñ'ájtīn ya naaxhuīñ, yaayī je mjot mhuīnma'ñ ajcxy. Pen md-zojcpy ajcxy je oybi huīdibi Dios yegamy, nañ mīd'ájtīcixy jīm jabom jabom mjot mhuīnma'ñ ajcxy ma Dios.

Tzoc ijtīm ni'ixi'

³⁵ Chi Jesús yjacmīnaañ:

—Ni'ixīygyx mjot mhuīnma'ñ jadu'n nej jihuīy mhuit myujc'ameetcixy co mdunaangixy, etz jadu'n nej jihuīy lámpara mnōgpijccixy co mdzumnaxaangixy m'ahuix-aangixy je huīndzīn. ³⁶ Ni'ixī'ijtcix jadu'n nej jāy huīdi yhuīndzīn ahuijxp, co anajty yhuimbity co anajty ti y'oy ma jāy ti ypic, chi co anajty minipy ycocapxīy, mic'amy myaj'ahuādzity ytiyc. ³⁷ Jotcujc ajcxy je tumbi co je yhuīndzīn anajty yjādy, e paady chumnajx juugy. Janch nimaaybich miich ajcxy co je tumbi ajcxy yhuīndzīn anajty yjādy, chi yhuīt yujc'ameedipy, chi ajcxy yaj'ixtāgipy ma caybejt, yajcayipy yaj'ūgipy. ³⁸ Oy miinipy je huīndzīn mījcoodz o moñyī, e páadip je tumbidījc ajcxy jīm chumnājxcixy juugy, jotcujc je' ajcxy je jadu'mbi tumbidījc. ³⁹ Nejhuīygyx jada co je codījc ixipy nejhuīhuīpy ti hora ymīna'ñ je meetzpi, chi juugy ixipy chuumnaxa'ñ, e ca' cīyegipy ytiyc nīcxy jāy tigoty ymeech. ⁴⁰ Miich ajcxy nañ jadu'n ijtīcixy ni'ixi', mīna

anajty ca' ti mhuīnmaaygixy, huīn'it mīna'ñich iich, je jāy huīdi tzoon tzajpjoty.

Je tumbi tudāgyipi etz je tumbi ca'pi ytudāgyity

⁴¹ Chi Pedro Jesús nīmay:

—¿Pin jada ti myajnīmaayb jada ayuc huīdi ti mgapxy, iich ajcxy, o nidūg'óciy jāy?

⁴² Chi je Huīndzīn Jesús ymīnaañ:

—Huīdibi tumbi je' ya huīdi tumb mīd yhuīndzīn janch cixyot huīnijot huīdi mīd yhuījy'ajt ycuīc'ajt huīdi je yhuīndzīn mooyip ané'mīn ma ytiyc, huīdi ya-jnīgīdāgīyb tumbidījc nej ypaadyī. ⁴³ Jotcujc je tumbi co anajty je' yhuīndzīn yhuimbity e padīyb ti cuyduñ jadu'n nej anajty ti ñīmāyī. ⁴⁴ Janch iich miich ajcxy nīmāy co je tumbi huīndzīn yajmīhuī'mdāhuīpy jada ytumbi tūg'óciy pidāgy huīdi ymīd. ⁴⁵ Pen je tumbi yhuīnmaayb jotjoty huīnma'ñyoty co je yhuīndzīn yhuācxījpnī mīna ymīna'ñ, chi mīdzīptzoonī jacjadyīi tumbidījc ajcxy, huojpnī, cojxnī, nañ ytiyīyñī caayb uucp anaxy etz ymūgyī. ⁴⁶ Chi je tumbi yhuīndzīn mī-inipy ma je xī hora anajty ca' jīj'ixy e ni canejhuīy ana-jty, e huīn'it ooy tzaachytunipy yī tumbi e chi pidāgipy ma je huīdi ajcxy ca' ytudāgyity.

⁴⁷ Je tumbi huīdi nejhuīyb nej yhuīndzīn chójcīn, e ca' cuyduñ, ni ca' ycapxymīdoy, ni ca' ni'ixi' ity co yhuīndzīn anajty yhuimbity, je' je' nīgi yajtzaachytunīp. ⁴⁸ Je tumbi huīdi ca' yajxon huīnjīhuīy nejīhuīy yhuīndzīn chójcīn, hueenī je' yajtzaachytunīpy. Huen-pīnīty huīdi may yajmooyb, may yī' yajmībijctzohuīyb; etz huenpīnīty huīdi ti mīhuī'my ooy, yajmībijctzohuīb nīgi.

Jesús ycixpi ñaybijc-huācxīyī jāy

⁴⁹ Chi Jesús yjacmīnaañ:

—Iich ti nmiīñich ya naaxhuīñ co jīn nbīdāgībīch. ¡Ooy njadzocyīch jī ixipy ñitooyñī! ⁵⁰ Nyajnaxīpyīch tūg tzaachypī, e ¡ooy ndajy nmayīch ixtī mabaad yajcuy-undāy! ⁵¹ ¿Nej miich ajcxy mdījy co ti nmiīñich ya naaxhuīñ co nyajcīxīpyīch je tzipī? Iich miich ajcxy nī-maayb co ca'. Hue' janchtiy nyajnaybijc-huācxāanībīch jāy ajcxy. ⁵² Jadachambi etz yjacnīcxi' xī tiempo jī mī-goox tūg quēxjāydījc huīdibi ajcxy ñaybijc-huācxīb, tugīg mīd je metzpi, e metzpi mīd je tugīgpi. ⁵³ Je ungedēdy tziptunīp mīd ymang etz je mang mīd yteedy. Nañ je ungdaj tziptunīp mīd yñīx etz je nīx mīd ytaj. Nañ jadu'n je xecy tziptunīp mīd yxecy.

Je xī tiempo ytiy'ajt

⁵⁴ Chi Jesús nīmay je mayjāy ajcxy:

—Co ajcxy m'ixy je joc ypidīgy ma xī ycidāgy, chi mī-naangixy co tūhuaam, e janch jadu'n yjadyī. ⁵⁵ Co ymī-iñ je jīnboj, chi miich ajcxy mīnaangixy co ambīgaamb, chi janch jadu'n yjadyī. ⁵⁶ ¡Miich jībīc jāy ajcxy! Ooy mjaītcixy nej myajcapxcixy yī xī tiempo huīdi ajcxy m'ijxpy tzajpcīxy etz ya naaxhuīñ: ¿Nej co ca' mjaītcixy nej myajcāpxcīxipy xī tiempo ymīñ ycidāgy?

Naymi'oyǎhui miid midzip

⁵⁷ ¿Nej co miich ajcxy ca' ci'm mnaydiydúunigixy nej ystudägyity je tiy'ajt? ⁵⁸ Co mnícxipy ma yi codung miid yi mmidzip jac'oy co mnayyaj'oyǎhuipy miid yi mmidzip tú'am, ca'ydi miid mjädip ma yi codung, e chi je codung xycíyegipy ma je xueetz, e je xueetz xypidägip pujxtigoty. ⁵⁹ ñich miich nimaayb co ca' jilby mbidzimipy, ixti cooni mgüejttáhuipy tüg'óciy.

Ooy ycopícyity nyajtigajtzim nhuinma'ñ

13 Huin'it jäy miidmiydacy Jesús jadu'n nej je gobernador Pilato yaj'ögy nijéjity jäy jim Galilea, chi tem huidijti ajcxy ñi'py miid iyujc ñi'py huidi je' ajcxy miid huindzig'iñ tuuñ. ² Chi Jesús y'adzooy nimay ajcxy: —¿Nej mdijy, niği anajty yocymiidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ ñich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigi'igixy ma Dios, nidüg'ociy miich ajcxy mgijxtáhuip mdigoydähui. ⁴ E je' ajcxy je majmocxtugigpi huidi je mijtjic jim Siloé nigidaagootti, yaj'óci ajcxy. ¿Nej mdijy niği ajcxy yocymiidity, ca'ydi nidüg'óciy je jäy huidi tzinayb jim Jerusalén? ⁵ ñich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtáhuip mdigoydähui miich ajcxy nidüg'óciy, jadu'n nej je' ajcxy.

Ijxpejt ma je higueri ca'pi anajty ytiim'aty

⁶ Chi Jesús yajnimay ajcxy jada ayuc: —Tüg jäy anajty miidity higueri cojy ma y'aguemy, chi ñicxy jilby ma y'aguemy higueri tiim ijxtaaybi, ni ca' paty. ⁷ Chi nimay je' ytumbi: “Cham midugig jimijt miñich ya higueri tiim ijxtayb ma jada higueri cop, ni tüg ngapaadyich. Huen yajpujxciday jada higueri cop, nej co ni goobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jeyi ocjactinäy, octajyich jayjip yi naax jühuidityi, etz oc'abonijyich. ⁹ Pen tiim'ajt ca' nyajpuxipy, pen ca' ytiim'aty jebi nbújxigipy.”

Jesús yajtzögy pocxñduum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxñduum. ¹¹ Jim anajty tüg töxyjäy huidi anajty mi-majmocxtugig jimijt cujc mi'ijtni yjiibojpa'm, agojojy anajty yöy, ni nej anajty yca'oyy nej ytiinaaygugǎhuipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjiix, e chi je' yjiix ytiy, huin'it ytiigy Dios ojadajtpi. ¹⁴ Huin'it je naymujctac huindzin ooy yjotmäty miid co anajty Jesús jäy ti tzoyy pocxñduum. Chi je naymujctac huindzin nimay ajcxy je mayjäy:

—Jéyi tudujc xi jäy huaad ytuñ, huen miñ semaanjoty pin yajtzoyǎhuam, ca' yocxñduumity.

¹⁵ Chi je huindzin Jesús ymíñañ:

—Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmigüejty mhuajyuubi,

etz mburro ma ypécxtac pocxñduum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugig jimijt, ¿nej ca' ypadyyi nyajtzögibich pocxñduum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugigixy miid je oybi huidi Jesús ytuun.

Ijxpejt ma je mostaza pájc

¹⁸ Chi Jesús ymíñañ:

—¿Nej m'oc'a'ixiygixy yi Dios y'ané'min? ¿Huidi miid n'ocyajquipxǎhuibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc ymíñañ:

—¿Huiddibi miid n'ocyajquipxǎhuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytijhuiddit miid tugig quipxi'ñ harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nidzögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügjet, jebi ajcxy m'alma ñidzögipy, jadu'n nipaady nej jäy ajcxy ñaymic'ijxigixy co ytiğǎhuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixy ytiğǎhuaangixy ma Dios y'ane'my e ca' ajcxy jadipy nej ytiğǎyigixipy. ²⁵ Co je codijc ypidigipy etz agiyñip ytiç, huin'it miich ajcxy pinjaty tibäy huim, chi jilby tibäy miich ajcxy mmíandägipy: “Huindzin, yaj'ahuädz”, e chi je tijc huindzin miich ajcxy xy'adzo-huipy: “Ca' ñich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmíidgaaygixy ti nmíid'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “ñich miich ajcxy nimayb co ca' nnejhuüyich ma miich ajcxy mdzoongixy. Jiñuäcix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdájcxipy mmáygixipy, myáacixipy mdíttzquécixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtcapxiybi jilby ma Dios y'ane'my, e miich ajcxy tibäy anajty ti mhuim'gixy. ²⁹ Minip yi jäy ajcxy huiddibi tzoomb ma xi ypidzimy, ma xi ycidägy, ma jayhuixtujc ypidzimy, etz cham ma madzäcruudz ytiinaay'ahuüy, chi y'ixtáaccixipy ma je caydac jilby ma Dios y'ane'my. ³⁰ Paady ji jäy ajcxy huidi cham axam'ajtp, je' ajcxy jayjip'adip, etz ji jäy ajcxy huiddibi cham jayjip'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nícx nimaaygix yijiibi huaax co nyajpidzimybich ca'oybi etz nyajtzoocypich jäy cham etz jabom, co-dugüig xii ti ndung mayijich. ³³ Ooy ycopicyity co ich njactüyöyibich cham, jabom etz huixtic. Com ypaadyii co Dios y'ayuccapxhuäcxpi y'ögip ajcxy jim Jerusalén.

Chi Jesús yjacmínaañ:

³⁴ —¡Jerusalén jáy! ¡Jerusalén jäy! huidibi yaj'o'cp Dios y'ayucnajtzcaxpiyb ajcxy, etz ycögädz ajcxy je jäy huidibi Dios ti xyajniguéjx ajcxy. Janch canaag'oc ich miich ajcxy njahuijtzmuga'n jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiigixy.

³⁵ Chi jada' ixcix cuenditungix, com jadachambi mgajp yhui'my najtz'ixi'. Ich miich ajcxy nimayb co ca' xy'ixipyich jadügtecy, ixti cooni anajty tiempo paaty m'ina mmináangixipy: "Capxpaaty je' huidi miimb miid Huindzin'ájtín Dios ycixpi."

Jesús yajtzögy tüg yëydijc quixypa'mmiidpi

14 Chi jadu'n yjajti co tüg pocxxiuduum Jesús ytigiy ycaya'n anajty ma tüg fariseojäy ytijc, hue' anajty judío tungmiidpi. Chi yi judío ixpicytjic ajcxy tzach'ix'ijtcixy Jesús, amidoo'ijtcixy Jesús y'ayuc.

² Huin'it tüg jäy huidibi ymiid anajty quixypa'm miin ma Jesús yhuinduu. ³ Chi Jesús ymigapxi je' ajcxy huidibi yaj'ixpijc Dios ñecy etz yi fariseojäy ajcxy, ni-may:

—¿Nej je Dios ytiy'ajt ymínañ? ¿Huaad o ca' huaad chögy jäy pocxxiuduum?

⁴ Chi ajcxy y'amonday. Huin'it Jesús cñixajjy je pa'm jäy, chi yajtzoocy. ⁵ Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhuaajuubí o mburro pocxxiuduum, nej ca' mic'amy nícx yajpidzimigixy oy y pocxxiuduumi?

⁶ Chi ca' ajcxy jajty nej y'adzohuimbíjtcixipy.

Je pinjaty huodzoönyip ma je pijcpi yajnixiuduñy

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajni-maayi, je tibi anajty yajhuomiingixy:

⁸ —Co miich myajhuoohuipy ma pijcpi yajnixiuduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaybejt ymihuaad. ⁹ Chi jada' xyñimähuipy je huidi anajty ti xyhuoomiñ: "Mo' jada migüg jada iñaybejt cödumbi." Chi miich tzöydu'n miid mnicxpy ma je' iñaybejt axambi. ¹⁰ Co jäy xyhuoohuipy ma je pícin yajnixiuduñ, jim m'ixtägip ma je axambi iñaybejt, e co yminiipy je huidi anajty ti xyhuomiñ, chi xyñimähuipy: "Migüg, nax ma yi iñaybejt cödumbi." Huin'it capxpaady m'idipy ma je' ajcxy huidi anajty iñayb ma caybejthuinduu miid miich.

¹¹ Pinjaty c'm naygómáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyii:

—Co miich mxiiiduunipy ca' mhuoohuipy je jäy ajcxy huidi ooy miid mnaymigüg'ájtigixy, ni mmidügquëx, ni m'ajuugy m'amigüg, ni mmidijc comeeñybi, ca' jécyity co nañ jadu'n xyhuoohuipy, e chi anajty jac mij yejchuimbijty. ¹³ Co mxiidunipy, chi huoohuipy ayooobitjic, tzaachjájäy ajcxy, tecymätpi ajcxy, etz jäy huiintzpi.

¹⁴ Huin'it miich mjotcuyc'adipy co yi' ajcxy ca' jadipy nej yejchuimbidipy. Jiini Dios xymigüedipy co anajty yajjuygipy je tudägyipi jäy ajcxy.

Je iixpejt ma tüg adzoo'ájtín mijpi

¹⁵ Tüg jäy huidi anajty iñayb miid Jesús ma caybejt huinduu co midooy nej Jesús ymínañ, chi nimay Jesús:

—Jotcuyc je jäy ajcxy huidi cayip jiiby ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'ada'n, chi jayijpni oy mayjäy nimay co anajty yaj'adzu'ada'n. ¹⁷ Co je adzoo'ibi paty, chi quejxy tüg cogapxy huen nícx huogixy je tibi anajty ajcxy yajnimäy, nimay ajcxy: "Jámgix, ti jim yajni'ixy je caayin uucin." ¹⁸ Chi ajcxy nidüg'óciy yminandacy: "Tun may'ajt meecxcich, ca' y'oyy nej nyajni'ixibich." Chi je' jayijp jäy y'adzoy: "Ti njuyich tüg rancho je' copicy jayijp nícx n'ixyich, paady ca' nícxan'ich; tun may'ajt meecxcich." ¹⁹ Chi jadüg jäy ymínañ: "Ti njuyich migoox par huaj yuubi, nícx n'oc'ijxmadza'nich jayijp, paady ca' y'oyy nej nícxibyich, tun may'ajt meecxcich." ²⁰ Chi jadüg jäy ymínañ: "Tim chamni nbicyich, paady ca' oyy nej nícxibyich." ²¹ Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: "Nícx tzojcyi cajpjoty ma yi jäy ajcxy yöygixy ñajxcixy etz ma yi mij tü, e chi huomiinipy pin mdimypaatyp ayooobitjic, yi tzaachjájäy etz huiintzpi." ²² Chi je' ytumbi ymínañ: "Huindzin, ti nduñich jadu'n nej ti xyñimäyich, etz jac chiini iñaybejt." ²³ Chi je huindzin nimay je' ytumbi: "Nícx ma yi mij ni mij tü yajmin je jäy ajcxy adzip, huen ich ndijc uch. ²⁴ Chi ich miich nimäy co ni tüg yi jäy ajcxy huidi jayijp yajnimay, ca' ajcxy y'adzuu'adipy miid ich."

Nej ooy chípity co Cristo nbanicxim

²⁵ Chi may anajty jäy nícx miid Jesús, chi Jesús yhuäc-huimbijty, nimay ajcxy:

²⁶ —Pen ji pin xypamiñich, e ooy nigí tzocy yi' ytaj yteedy, yi' ytöxyijc, yi' y'ung, y'ajch o chí', etz nañ ooy nigí tzocy yi' yjugy'ájtín, ca' ich yi' huaad ndiscípulo'adyijich. ²⁷ Yi jäy ajcxy huidi xypamiimbich huidi ich ndiscípulo'adaanip, copicy yajnaxipy ajcxy ayo'n, jadu'n nipaady nejihuüy ycruudz ti cabëccixy e nícx yajcruudzpeda'ñy. ²⁸ Co miich ajcxy mmijitjic mgoja'n, chi miich ajcxy jayijp m'ixtaaccixy e m'a'ixiigixy jadu'ñyi meeñydunaangixy, nej pen miid ajcxy huidi jëbi miid myajmaaygixy je mmijitjic, o peni ca'. ²⁹ Ca' yjécyity co anajty je tijc ti yajpojtzjgy, chi anajty ca' m'ocjajtni nej

myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymina'nip: "Jadayaabi yëydijc nigoo ti yajtzondägy tijc poch, e ca' ti ocyajmaayñi." ³¹ O huidi rey ji co chona'n tziptumbi mïd huingbi rey, zca' jayijp huinmayipy pen jëbi chip-tuñ mïd majc mil jäy, pen je ymidzip miimb mïd iipx mil jäy? ³² Ca' yjécyty co je tügpi rey jiguemni anajty miñ, chi quexipy tüg huingapxpi pijctzohuipy may'ajt ca'ydi yi tzip yjadyii. ³³ Hueñypñity ma miich ajcxy pen ca' m'ixmájtzcixy tüg'óciy tijaty miich ajcxy mmiid, ca' ñich yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtin. Co je caan ytigoy ytamtz'ájtin ca' ji ni ti xücx'ájtin yegipy. ³⁵ Yi caan huidi ti ytigoy ytamtz'ájtin ni ca' y'oybidägnity ma je naax, ni ma je püx huidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

Ijxpejt ma je cöbixy huidibi tigooy

15 Chi ajcxy je yajcuetpidijc etz pocyjäydijc nimijhuágtay ajcxy Jesús tzach'amidoo'idaani ajcxy je' y'ayuc. ² Chi ajcxy huidi ooy tzachmijpidägy judíojäy ytiy'ajt etz huidi ajcxy yaj'ixpijc Dios ñecy ameech nigapxcixy ni'ojñiygixy je Jesús, chi ajcxy ymiñañ:

—Yi Jesús pocyjäydijc ajcxy ymígüg'ajtpy, e yi' mïd ycaaygixy.

³ Chi Jesús jadayaabi ayuc ajcxy yajnimay:

—Huidi jäy ji ma miich ajcxy pen ymiid migo'px cöbixy co ytigoy nidügti, znej ca' yajhui'mipy je mada'px majmoxc midaaxpi jim ma chinaaydac, chi nicxy ixtäy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcu-jc. ⁶ Co yajjädip ma ytijc, chi huomucy ymígügtijc etz ymijñin ymidijc, nimähuipy ajcxy: "Jotcugñygix mïd ñich, ti ñich ngöbixy nbaady huidi anajty ti ytigooy." ⁷ ñich miich ajcxy nimaayb co nañ jadu'n tzajpjoty ooy jotcu-jc'ájtin nigä mïd co tüg pocyjäy yjothuimbity, ca'ydi mïd mada'px majmoxc madaax tudägyti jäy huidi ca' ytundigoy.

Ijxpejt ma je meeñ huidibi tigoy

⁸ Chi Jesús yjacmíñañ:

—¿Huidi töxyjäy ji pen ymiid majc ymeeñ, co ytigooy tüg meeñ, nej ca' jñin nöctzohuipy, e ytigñihuipy pedigpi ixtähuipy ymeeñ oñydägy ixti cooni paadipy? ⁹ Co paady, chi huomucy ymígügtijc etz ymijñin ymidijc, e chi nimähuipy: "Xondaaccix mïd ñich, ti ñich nmeeñ nbaty huidibi ñich anajty ti nyajtigoy." ¹⁰ Jadu'n ñich miich ajcxy nimäy co nañ jadu'n Dios y'áñgeles ajcxy ooy yjotcújcity co yjothuimbity tüg pocyjäy.

Ijxpejt ma je ung huidibi ymeeñ yajtíctay

¹¹ Nañ jadu'n Jesús yjacmíñañ:

—Tüg yëydijc ymiid anajty metz ymang. ¹² Chi je jacmutzpi nimay yteedy: "Tat, mooygich yi pidägy huidi xypaatpich." Chi je' yteedy je pidägy yajhuäcxy.

¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huidi yi yjé'ajtpy, chi chooñ ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymiid. ¹⁴ Co anajty ymeeñ tüg'óciy yajtundäy, chi miñ tüg mij yuu ma je cajp. Chi ooy je mang mutzpi caayin uucin huit meeñ jayajmayajtni. ¹⁵ Chi je' ninicxy tüg jäy ma je jimbi naaxjot ymiduna'n anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii mïd je pëtztiim huidi anajty idzim y'ojcpy. Chi ni pin anajty ni ti ycamöyii. ¹⁷ Co yhuinma'n yajmejch, chi ymiñañ ma yjot yhuinma'n: "Jim janch maytumbi ma ñich ndeedy ytijc, ymiid ajcxy jñicxy picy janch may'amy. ñich ya tzach'ayoob mïd yuu xii. ¹⁸ Tzonaambich ya, nicxa'ñich ma ñich ndeedy, nimähuibich: Tat, ti ndundigóyich mïd Dios tzajpjotyti etz mïd miich.

¹⁹ Cham ca' ypadyii miich mína'nip co miich xy'ung'adyijich. Yajtungich jadu'n nej mdumbidijc."

²⁰ Chi je' choñ, ñicxy ma yteedy. Jegügyñi anajty ymiñ co yteedy y'ijxpaati. Chi yteedy ypa'ayogoti, e ñicxy poygy oy jipcobadñy. Chi yögminennajxy etz tüzcxxy.

²¹ Chi je ung ymiñañ: "Tat, ti ndundigooyich mïd Dios tzajpjotyti etz mïd miich. Cham ca' ypadyii nicxy miich mína'n co ñich miich xy'ung'adyii." ²² Chi je ungedeedy nimay je' ytumbi: "Yajpidzim je huit oybi, mic'amy yajniñenygix jada n'ungich, chi mooygix yi cñijit etz ycñg. ²³ Nicx yajtzoongix yi huaj mang nicxpi, yaj'öccix, chi ngaayim n'uucim e nxñduunim. ²⁴ Jada n'ungich jadu'n nipaady nejñihuñy anajty ti y'ögy, e chi ti yjugypicy. Ti-gooy yi' anajty e ti yjädy." Chi ajcxy ooy yjotcugñy.

²⁵ Chi je ymang mijpi camjoty je' anajty. Co yja'ty mñhuigon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: "¿Ti yi' túnip jájtíp?" ²⁷ Chi je tumbi y'adzooy: "Ti yjädy m'uch, ti mdeedy yaj'ögy tüg huaj nicxpi, co ymang ti huimbity juugy." ²⁸ Chi je ungoob ooy yjotmäty, ca' anajty ytigñhua'n tigoty. Huin'it je yteedy ñibidzimi, yco-huanñyi co huen tigäy tigoty. ²⁹ Chi je' y'adzooy, nimay yteedy: "Janch micanaag jimijt ñich miich mïd nduñ, ni ca' ngapxhuimbityich. Ca' chambaad miich ni xycamooyich tüg pi'ccöbixy jaydëb njotcujc'adipyich nxñdunipyich mïd nmígügtijc. ³⁰ Per co yi' mmang ti yjädy huidi oy ti yajtundäy yi ymeeñ mïd jibic-huinma'n mïd jibic töxyjäydijc ajcxy, chi ti myaj'ögy huaj mang nicxpi mïd yi' ycixpi." ³¹ Chi je ungedeedy nimay je' ymang: "Miich ung huinixñ ya mïd n'ity. Tüg'óciy huidi nmñdich miich yi' mje". ³² Ooy ycopécyty co nxñduunim etz njotcugñyim, co yi' m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady."

Je ijxpejt ma je mayordomo huidibi ca' yhuindzin mïduñ tudägy

16 Nañ jadu'n Jesús nimay yi' ydiscípulos:

—Jim anajty tūgjāy comeeñybi, ymiid tūg ytumbi hui-di yí' ypidāgy cuend'ájtíp. Chi oy nimāyíi co tūg je ytumbi nigoo anajty tzachyajuñ je meeñ ma yca-paadyíi. ² Chi je huindzin oy yajhuoyíi je' ytumbi, chi ni-may: “¿Nej jada co ñich jadu'n nimāyíiñich miid miich yciñpi? Ya yí' cuenti cimoaydaaygich nej ti mduñ, etz ca' ñich miich n'ocjactumbi'adaañin.” ³ Chi je pidāgy cuend'ájtíp jot'ájtí: “¿Ti ndunipich? co yí' nhuindzin xya-jpidzima'ñich ma yí' ytung. Juttajíi ca' njatyich, co limosna nbijctzohuipiyich tzöydúmbich. ⁴ Nejhuuyibich ti ndunipich jaydéb jāy ajcxy xycöbigipyich ma ajcxy ytíjic.” ⁵ Chi tūg tūg huoy pin anajty minuucx'ajtp je' yhuindzin; chi y'amidooy je jayíjpi: “¿Jadu'ñyi miich minuucx'adyíi ñich nhuindzin?” ⁶ Chi je' y'adzooy: “Migo'px garafón aceite.” Chi nimay: “Matz mnecy, ñña' mic'amy, e cojayí' huixchiguipxmajc.” ⁷ Chi jadüg ni-may: “¿Miich jadu'ñi mminuucx'adyíi?” Chi je' y'adzooy: “Migo'px quipxi'ñ trigo.” Chi nimay: “Matz mnecy, cojayí' mda'px.” ⁸ Chi je pidāgy huindzin capxpaaty je jibicjāybi huidi cuend'ajtp yí' ypidāgy co oy yhuin-ma'ñybaady mij; co jadachambi naaxhuiñyājy huidi ca' mibicy Dios, ñigi ajcxy ypegyity miid yhuinma'ñ, ca'ydí yí' jāy ajcxy huidi huinjihuñyb Dios ytiy'ajtp.

⁹ ñich miich ajcxy yam nimaayb migüg'ájtigixy yí' jāy ajcxy miid yí' meeñ huidibi ca' ytimytiijyity, jigix co je meeñ anajty myajmayajtcixy ji pin miich ajcxy xycöbigip ma jugy'ajttac huinixíibi.

¹⁰ Je' jāy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijtp. Je jāy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min.

¹¹ Pen ca' mjaajtcixy nej mgüend'ájtixipy yí' jugy'ájtín huidibi ya naaxhuiñ yajpatp, ¿pin miich ajcxy m'ocya-jmihu'mamy je jugy'ájtín je riqueza oybi janchypí?

¹² Pen ca' mjaajtcixy nej mgüend'ájtixipy tiibi mihu'mgixy huidi huingjāy yje'ajtpy, ¿pin miich ajcxy xymöhuip huidibi ajcxy yje'ajtpy?

¹³ Ni tūg tumbi ca' jēbi ytuñ miid metz yhuindzin; com tūg je' ixtijipy etz jadüg mijñicxpedipy; o tūg huidi ycapxycöbigipy, etz jadüg ca'. Miich ajcxy ca' huaad mijpidāgipy Dios etz nañ jadu'n mijpidāgipy yí' comeeñ'ájtín.

¹⁴ Nañ jadu'n midooy jada ayuc yí' fariseojāy ajcxy, com ooy anajty ajcxy meeñ adzójccixy. Chi ajcxy ooy nixiici yajxiici Jesús y'ayuc. ¹⁵ Chi Jesús yminañ:

—Miich ajcxy fariseojāy jadu'n mnaybidáacigixy ma jāy ajcxy yhuinduu nejihuñy ajcxy ooy m'oyjāyity. Dios ñejhuñydaayb co miich ajcxy miid jibicpi ma mjot mhuinma'ñ. Tijaty huinma'ñ huidi jāy ya naaxhuiñ y'oy'ijxyp, Dios ca' yí' oy'ixy.

Je Dios ycötújcín etz je Dios y'ane'mdac

¹⁶ Chi Jesús yjacmínañ:

—Je taabi je Juan anajty yjiijity, jii'ajtp anajty Moisés ycötújcín etz je y'ayucnajtzcaxpiybi ajcxy y'ixpíjcín. Huin'it tiempo etz ixti jadachambi jadu'n yajnajtzcaxpiy je Dios y'ané'min, e mayjāy ooy ñaybidáacigixy co ytigíhuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtāhuipy, pero je Dios ycuydunāhuamy tūg'ócíy jadu'n nej ñecy ymina'ñ. Ni tūgí letra oy mabaad ymúdzity nicxy ycaya-jcuyduñ.

Jesús capxticxy nej ypöcyity co jāy ytöxyijc ixmach

¹⁸ Chi Jesús yjacmínañ:

—Huenpinjāyity co ytöxyijc ixmach etz ypicy miid huingbi töxyjāy, ooy anajty mij pocy tuñ. Nañ huenpin-jāyity huidibi pijcp miid je töxyjāy huidi ñāy ti y'ix-machyíi, nañ mij anajty ypocytuñ.

Je comeeñyājy etz je Lázaro

¹⁹ Chi Jesús yjacmínañ:

—Ji anajty tūg jāy comeeñybi ñayxoxyíi anajty janch ooy miid oyjatypí huit, etz janch oy yca'y'ügy jabom jabom. ²⁰ Nañ ji anajty tūg ayoobi jāy huidi limosna pijctzoob, hue' anajty yxíi Lázaro. Lázaro jabom jabom anajty ycögnāy ma je comeeñyājy ytíjic'agu, janch nībuutzp anajty ooy. ²¹ Lázaro ooy anajty jani'ixy caya'ñ je cayduc tzütztuc huidibi cāb ma je comeeñyājy yca'y-bejt. Oy uc anajty ymíiñ yhueyíi je ñibüdz. ²² Chi jadu'n yjajti co oy y'o'cní je jāy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cní, e oy yaj-naaxtigixyíi. ²³ Chi je comeeñybi jiiiby ca'oydactuuby tzaachypí anajty jihuñy, chi mij'ijxy jiguēgy je Abraham etz je Lázaro. ²⁴ Chi je comeeñybi ycapxy janch mic, ymi-nañ: “Apteedy Abraham, ñich pa'ayoog. Tun may'ajtp quex Lázaro, huen yí' ycíhuāx yajxoogy miid ñíi etz xyajtíjtzibich ndootz, co ñich ooy ayo'n nbaadyich ma jada mij jiiñ.” ²⁵ Chi Abraham y'adzooy: “Oc'ungich, ajihuñhuí co ti mdzināy ti mjogy'aty miid mhuit mmeñ aguyc jotcujc, e yí' Lázaro ooy ayo'n paty. Jadachambi Lázaro yjotcujc'aty, etz miich jiiiby mbatpy tzaachypí. ²⁶ E jadügnax, ji tūg mij huoc ma ñich ajcxy etz miich ajcxy. Pen ñich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ñich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajtp quex yí' Lázaro ma ñich ndeedy ytíjic. ²⁸ Jim ma ñich ndeedy ytíjic jim migoox miguēx nmídidyich, huen nicxy yajmídmíydaaccixy, ca'ydí je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yí' ajcxy ymiid necy huidibi Moisés etz Dios y'ayucnajtzcaxpiybi ycojaay, huen cuydungixy.” ³⁰ Chi je comeeñybi ymi-nañ: “Janch jadu'n apteedy Abraham. Pen nidüg yí' ögpi ñicxy ma je' ajcxy, jothuimbidiy yí' ajcxy.” ³¹ Chi Abraham yminañ: “Pen ca' je' ajcxy mijpidāgy Moisés y'ayuc je jécyp etz huidi ajcxy jecy'ajtp Dios y'ayucnajtzcaxpiy, nañ ni ca' mibíjccixipy pen nidüg ögpi yjugypicy.”

Huidibi ooy ycodzigíjity co n'agánáxim ma pocy

¹⁷ Chi Jesús nimay yí' ydiscípulos:

—Janch tiy'ajtp jadu'n co yminip jāy ajcxy huidi yajhuinma'ñydidigoyip yí' mayjāy ajcxy miid aaniñ. ¡Ay yí' ayoob ajcxy! pinjaty jāy ajcxy yajhuinma'ñydidigoy-

aangixy. ² Nigi y'oyity co ixipy yajyo'cxodzyii tög tzaa janch mijpi, e chi yajcöjibijpnaxipy mejyjoty, ca'ydí co yajhuinma'nydigoyipy jada jäy ajcxy huidibi xpfjcin hueeni miid ma Dios ytiy'ajt. ³ Naygüend'ájtigix miich ajcxy co ca' mgapxtigóoygixipy.

Co m'uch xymidundigooyipy, e chi mgapxhuijp, e pen jothuimbijit, chi mbocymeecxipy. ⁴ Pen m'uch huixtujc'oc xymidundigooy tög xiibi, nañ huixtujc oc xyñimiiñ tög xiibi, e ymina'nipy: "Ti njothuimbityich", huinmeecxipy miich yi', chi jada' miich huixtujc'oc mbocymeecxip.

Je mibjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ñich ajcxy nmibjcin.

⁶ Chi je Huindzin Jesús y'adzooy:

—Co ixipy miich ajcxy mmibicy Dios jadu'n nej tög pi'c mostaza pajc, e mnima' ixipy jada paadzim quipy: "Nayyajpidigii, nicx tina' mejyjoty, e xycapxymidohuip yi'."

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymiid tög ytumbi huidi tumb ñaaxjidzitzii o yhuaj cuend'aty, co yja'ty ma mdjic, ¿nej jébi nimay: "Tigí, ixtäg ma mesa etz adzu'at?" ⁸ Hue' janchtiy mnimähuipy: "Yaj'oyiyigich n'adzuu'ibi, co'amedí' mhuit, e xymooygich ngaayin n'uucin. E huin'it miich mgayipy m'ügipy." ⁹ ¿Nej yaj-naxipy je' Dioscojuyip miid co je' anajty ti tuñ huidibi yaj'ane'my? ñich minamb co ca'. ¹⁰ Nañ jadu'n miich ajcxy co ti mguydungixy tög'óciy tiibi Dios xyaj'ane'mgixy, chi mmináangixipy: "Je' ñich ajcxy je tumbi huidibi ca'p ycapxpaadyity, jéyi ti ndungixich huidibi ñich ajcxy huaad ndungixy."

Jesús yajtzögy majc jäy jibic pützpa'mmiidpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy. ¹² Co anajty mihungoñ tög cajp, chi jipcoyöyiy majc jäy pützpa'mmiidpi. Chi ajcxy yhuäcxipy jiguëgyñi. ¹³ Chi ajcxy mic ycapxcoody yminaangixy:

—Huindzin Jesús, pa'ayoog ñich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguëxcigix ma yi teedy ajcxy.

Chi jadu'n yjajti, co ajcxy ñicxy, chi tüyöyjoty oy choocxixy. ¹⁵ Nidügti je' ajcxy co ñay'ixi co ti anajty chögy, chi nihuimbijty Jesús, ooy Dios jäymeche cömay janch cixyot huinijot. ¹⁶ Chi je' ycojxinay'ahuüy ma Jesús ytecymijc, chi pidacpy yhuiñyijp naaxcixy yaj-naxy Dioscojuyipy. Samaritanojäy je' anajty. ¹⁷ Chi Jesús yminañ:

—¿Nej ca' nimajc miich ajcxy huidi ti mdzoocxixy?

¿Ma ajcxy je' janidaxtucpi? ¹⁸ ¿Nej ca' pin jac yhuimbijty miin jäy medza'ñ cömaya'ñ Dios, jéyi tögpaic ti yhuimbity jada samaritanojäy?

¹⁹ Chi Jesús nimay je jäy:

—Pidig, nicxni. Yi mmibjcin ti xyajtzögy.

Nej je' yminipty Dios y'ané'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'ma'ñ. Chi Jesús y'adzooy:

—Je Dios y'ané'min ca' je' yminipty jadu'n nej ti yaj'ixy o yajmidoy. ²¹ Ni mgamináangixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yi' ydiscipulos ajcxy:

—Miim je xi je tiempo ma miich ajcxy anajty ooy xy-jamid'idáangixich tög xii, e ca' ñich miich ajcxy xy'ixipy, ñich je jäy huidi tsoon tzajpjoty. ²³ Chi jäy ajcxy yminá'nip: "Chaa'amy je', je Cristo", o "Chim'amy je'." Ca' miich ajcxy yi' mnináangixipy, e ni mgabanáangixipy.

²⁴ Co anajty nmiñich jadügtecy ya naaxhuiñ, ñich, je jäy huidi tsoon tzajpjoty, co ñich anajty nmimiñ n'ané'min, jadu'n je' yjadipy nej huizuc co y'aa'an ma tög tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopicyty co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty ñich, je jäy huidi tsoon tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy aguic jotcujc co je Noé ytigiiy ma ymijca-joon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytoocxixy, etz ytijccojcixy. ²⁹ Huin'it xii co Lot chooni jim Sodoma, chi ycäy tzajpjoty jiiñ etz huidi jindzaa miid conhuidity ytoy, chi cajp ytigoyday.

³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadipy ayo'n co anajty nmiñich jadüg'oc ya naaxhuiñ, ñich je jäy huidi tsoon tzajpjoty.

³¹ Je huin'it xii huin'it tiempo pin anajty iñaaayb ma ytijccop, e ymiid anajty ypidägy jilby tigoty, ca' nimitz-nagipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytijc. ³² Ajihuiyigix jadu'n nej Lot ytoxyijc ayo'n paty. ³³ Tüg'óciy jäy ajcxy pinjaty yjugy'ajt tzögam, tigooyipy yjugy'ajt. Tüg'óciy jäy ajcxy pinjaty yjugy'ajt tigooyb (miid ñich ycxipi), hue' je' yjugy'ajt ypaadipy chögipy.

³⁴ ñich miich ajcxy nimaayb co je huin'it coodz nimetz jäy anajty ajcxy ma cijx, tög yajnicxiyb etz jadüg yajhuimiiyb. ³⁵ Nimetz töxyjäy anajty yjitzcixy, tög yajnicxiyb, etz jadüg yajhuimiiyb. ³⁶ Nimetz yëydijc anajty ytungixy camjoty, tög yajnicxiyb etz jadüg yajhuimiiyb.

³⁷ Chi je jäy ajcxy huidi xpijcp Jesús y'ayuc yminañ ajcxy:

—¿Ma jadu'n yjadipy nej miich ti mina'ñ, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñimu-ga'ñ.

Je ijxpejt ma je ayoobitöxyjäy etz je juez

18 Chi Jesús yajnimay ajcxy tüg ayuc huidijaty ix-pijcp ma yí' co ooy ycopícyity Dios nmibijct-zoohuim jabom jabom, ni ca' nmidzjipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigÿ, etz ni jäy ajcxy anajty ca' huindzigÿ. ³ Nañ ma je cajp jim anajty tüg co'ögy ytöxyjäy. Je' anajty yminög janam jadojc ma je juez, nimäy anajty: “Nihuaangich ma je nmidzipich.” ⁴ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huin-ma'ñyoty: “Oy Dios ca' ndzigÿyich, ni jäy ca' nhuindzigÿyich, per com jada co'ögytöxyjäy nigí xychach'amayÿyich, miñ n'ocnihu'a'ñich, ca'ydi jadüg'oc ymiñ e xyajcixich anajty nmecxtújcín.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti ni-huañ je töxyjäy co anajty ti yajtzibyí. ⁷ ¿Nej ca' Dios ñi-huañp yí huídibi ti huin'ixy, huídibi mibijctzoob xim tzuum? ¿Huäcxibip, nicx ca' tzojc adzooyi? ⁸ ñich miich ajcxy nimaayb co Dios ñihuänamy mic'amy yí' yjäy. Co anajty nhuimbity ya naaxhuiñ, ñich, je jäy huídibi tzoon tzajpjoty, ¿nej nbáadibich mibíjcín ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huídibi c'i'm ooy ñaygö-mayyí co ooy y'oyjäyity, etz pejxy yí jacjadyiibi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigüiy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuüy ycapxtägy, chachmina'ñ jadu'n: “Dios Teedy, Dioscojuyip yajnajxpich com co ca' ñich nbocytuñich jadu'n nej jacjadyíi jäy ypcotyúnngixy, ca' nmeechich, ca' njibicjäyidyich, ca' nmigapxich huingjäy ytöxyijc, ca' nbocytuñich jadu'n nej jada yajcogüejtpi.

¹² Mejtz xii n'ityich jaygay tügpi seaman. Chi huen ytim ti nmüdich ngüejtpyich ma Dios majcjaty.” ¹³ Per je yajcogüejtpi jiguem ytinay'ahuüy, ni ycapät'ixy tzajpcijx, jëyi ycaachtzachcoxy ymina'ñ: “Dios Teedy, pa'ay-oogich, ñich pocyjäyich.” ¹⁴ ñich miich ajcxy nimaayb co jada yajcogüejtpi y'idacy ma ytijc ti anajty yajhuin-mecxy ypocy, e je fariseojäy ca' yajpocyhuinmecxy. Huenpñity huídibi c'i'm naygömayipy, Dios yajtzöy-duniib; e pinjaty ca' ñaygömayyí c'i'm, Dios ycomayñib.

Jesús conucxy je pi'ctijc ajcxy

¹⁵ Chi jäy ajcxy müdmiñ pi'c'anäg ma Jesús huen ni-doñyí. Co je' ydiscipulos ajcxy ijxy, chi ajcxy ogy ungdañ.

¹⁶ Chi Jesús yaaxi ymügügtijc nimay ajcxy:

—Ixmatz, huen yí pi'ctijc xyñimiñich, ca' ajcxy mijjpcogapxüygixy, com yí jäy ajcxy huídibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch ñich miich ajcxy nimäy co hueñypñity huídibi ca' cöbijc yí Dios y'ayuc ytiy'ajt jadu'n nej yí pi'ctijc ajcxy cöbijc Dios y'ayuc ytiy'ajt, ca' yí' ajcxy ytigühuipy ma Dios y'ané'min.

Tüg comeeñ'anäg ymüydägy müd Jesús

¹⁸ Chi tüg micjäy y'amidooy Jesús, nimay:

—Miich oyjäybi Huindzin, ¿ti huaad nduñich co ñich n'alma nidzoocín paadipy?

¹⁹ Chi Jesús y'adzooy:

—¿Nej co xytíjich oyjäy? Ni pin ya yca'oyjäyity, je'yí Dios tügpañc y'oyjäyity. ²⁰ Miich mnejhuüy yí Dios ycotújcín. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

²¹ Chi je' y'adzooy:

—Ti tüg'öciy nguydundäyich jada cotújcín maabi ny-eecpidzimyich.

²² Co Jesús jadu'n midooy, chi nimay:

—Tigoy'ijtni ja tüg huídibi ca' mduñi. Toocta' tüg'öciy tijaty miich müd, e mo' je meeñ ayoobtijc, huin'it mgomeeñ'adipy jii by tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoyoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchípity ytigühuipy tüg comeeñyjäy ma Dios y'ané'min. ²⁵ Jac ca' chípity co ñaxipy tüg camello ma yí xu'ñ yxúity, ca'ydi co tüg comeeñyjäy ytigühuipy ma Dios y'ané'min.

²⁶ Chi je jäy ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jëbi y'alma paadipy nidzoocín?

²⁷ Chi Jesús y'adzooy:

—Huídibi naaxhuiñyjäy ajcxy ca' jaty nej yaj'oyühuipy, Dios jëbi yaj'oyÿ.

²⁸ Chi Pedro yminañ:

—Ñich ajcxy ti nbidägy n'ixmajtztaaygixy, co nbanicxaangixy.

²⁹ Chi Jesús y'adzooy:

—Janch ñich miich ajcxy nnimaaygixy co yí jäy ajcxy huídibi ytijc ixmajtz etz ytaj yteedy, ymüguëx, etz y'ung y'anäg müd Dios y'ané'min ycixpi, ypáadipy ajcxy ya naaxhuiñ nigí oy'ájtín, etz ypaadipy ajcxy tzajpjoty tzi-naayín huídibi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tüg'öciy jadu'n nej yí Dios y'ayucnajtzcaxüybi ajcxy jaybejty jecy'ajty müd ñich ycixpi, ñich, je jäy huídibi tzoon tzajpjoty. ³² Chi nyajcÿyega'ñich ma je romano gobernador, xycamij'ixipy xycamijpidägibich ajcxy. Xy'öjibich xyhuindzújibich xyjijptzújibich ajcxy.

³³ Xychaachtunipyich ajcxy, xyaj'ögibich ajcxy, e codugüg xii njugypigipyich jadüg'oc.

³⁴ Chi yí majmetzpi ajcxy ni jadu'ñyí ca' huinjihuüy ajcxy nej yhuimbidzimy Jesús y'ayuc. Yüch anajty jada ayuc müd yí' ajcxy ycixpi, paady ca' huinjihuüy nej anajty yajnimaaaygixy.

Jesús yajhuindicxgy tüg huintzpi jim Jericó

³⁵ Chi jadu'n yjajti co Jesús mihuingoñ je cajp huidi yxii Jericó, chi tüg huintzpi anajty ifñay tūba'áy pijctzoy anajty limosna. ³⁶ Co midooy mayjäy ñaxy, chi je' yajtiy:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, ñich pa'ayoog.

³⁹ Je jäy ajcxy huidi anajty jayijp ñicxp ooy ogy je huintzpi, nimay co huen amoñ. E je' nigí mic yminañ'idich:

—David y'ap y'oc, ñich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxëcch.

⁴² Chi Jesús minañ:

—Huindicxig, yi mmibéjcin ti xyajtzögy.

⁴³ Chi je huintzpi mic'amy yhuin y'ijxgy, chi panicxy Jesús, chi ooy jäymejch cömay yi Dios. Cham tüg'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

Jesús miid Zaqueo

19 Co Jesús ytigiiy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxii Zaqueo. Hue' je' anajty yajcogüejtpi huindzin, e comeeñ anajty. ³ Ooy yi' anajty tzach'ixa'ñ Jesús, nejhuhua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pä't'ijxy je Zaqueo, e nimay:

—Zaqueo, tzojc minac, com copicy co ñicxy njättäga'ñich ma mdiic.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'ojiiygyxy Jesús, yminaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbijc-huäcxaamyich nmöhua'ñich ayoobitijc. Pen ti ñich nyajcujtñaxy, nyajhuimbidityich midaan jadu'ñiy.

⁹ Chi Jesús yminañ:

—Jadachambi jada jäy ma jadyaabi tijc ti y'alma ñidzögy, com co yi' nañ jadu'n Abraham y'ap'adyii y'oc'adyii. ¹⁰ ñich, je jäy huidi tzoön tzajpjoty, ti nmiiñich ya naaxhuiñ co n'ixtähuibich etz nyajnidzögibich tñibi anajty ytiogy.

Je ijxpejt ma je majci meeñ

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimihuingónip anajty Jerusalén, etz je jäy ajcxy tzachhuinmaaygyxy co Jesús

mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeeñyjäy anajty, ñicxy ma tüg naaxjot jigüembi, ñicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mihuooy nimajc ytumbi, chi moy ajcxy majc meeñ nidüg nidüg, chi ajcxy nimay: “Meeñ yaj'ung'ájticy ji ixti cooni ñich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huin-gapxpi yminañ: “Ca' ñich ajcxy ndzocy co jada comeeñyjäy rey'adipy ma ñich ajcxy.” ¹⁵ Chi jadu'n yjajty co je comeeñyjäy yhuimbijty ti anajty yreytigy. Chi oy yajhuoyii je ytumbi ajcxy, je huidi anajty je meeñ ti yajmihui'mgixy, nejhuhua'ñ anajty jadu'ñi ti yaj'ung'ajtcixy je meeñ nidüg nidüg. ¹⁶ Chi tüg jayijp ymiñ yminañ: “Huindzin, yi meeñ majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy miid huidi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ migoox jadu'ñiy ti nyaj'ung'atyich.” ¹⁹ Chi je rey nimay je mimetzpi: “Cham m'ane'mipy migoox ciudad.” ²⁰ Chi je midugigpi ymiñ, yminañ: “Huindzin, cha je mmeeñ huidi ti nmi'ityich, ti nyujpcicyich ma tüg paayí. Ndzigiiybich miich co miich mjäy'aty ahua'ñ, myajpidigtäy huidi ca' mjé'adyii, nañ mdzijcpy huidi ca' ti mnipy.” ²² Chi je rey yminañ: “Miich jibic ti mduñ, cham ndiyduna'ñ miid mgi'm'ayuc ycxipi. Miich mnejhuiyb co nyajpidigyich huidi ca' njé'adyi-ijich, e ndzicyich huidi ca' ti nniybich. ²³ ¿Nej co ca' ti mbidägy ñich nmeeñ ma je banco, jigix co ixipy nhuimbityich, may meeñ ixipy xycädigiyich miid meeñ'ung?” ²⁴ Chi je rey nimay huidi anajty ajcxy jímip:

“Pijci ajcxy yi' ymeeñ, etz mooygyxy yi' tñibi meeñ yaj'ung'aty majc jadu'ñiy.” ²⁵ Chi je jäy ajcxy y'adzooy: “Huindzin, ymiid yi' cham majc jadu'ñiy meeñ.” ²⁶ Chi je rey y'adzooy: “Ñich minaam co tüg'óciy pinjaty miid, jacyajmöhuiip; e huidi ca' ti miidity, oy jamidity yajpijctähuiip huidi ymiid. ²⁷ Nañ jadu'n ajcxy je nmidzipich huidi ca' anajty tzojccixy co ñich nrey'adipyich ma yi' ajcxy, yajmiingix ya, yo'cpujxtutaaygyx ma ñich nhuinduu.”

Jesús ytigiiy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy.

²⁹ Jadu'n yjajty co jim yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscipulos, nimay ajcxy:

—Ñicxcix ma yijiiibi cajp huidi ji huingon. Co ajcxy mgajptugñhuiip mbáatcixipy tüg burro mang ycoxochity, huidi ca' ni pin yaj'ñaaayñi. Mgoguejtúutcixipy, etz mmimíingixipy. ³¹ Pen jim pin xy'amidoogixy, ¿nej co yi' burro mgoguejtüdy? Chi ajcxy jadu'n m'adzohuiipy: “Je huindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyii. ³³ Jim

anajty ajcxy je burro mang coguejtuutcixy, co ñi-huindzin ñimaayi ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ miid yhuít, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuít yé'pcixy tüguj. ³⁷ Co ajcxy mihuingoñ je minac ma je cop huídi yxii Olivos, chi tüg'óciy je mayjäy yjotcugiyday, e ytiigiijy ajcxy ooy alabanza ñibi Dios ojadajtpi miid je mij huinma'ñ ycixpi co anajty ti ijxcixy huídi anajty Jesús ti tuñ. ³⁸ Chachmínaangixy:

—¡Capxpaady je rey huídi miimb miid Huindzin Dios yxii ycixpi! ¡Jotcuic'ajt jilby tzajpjoty etz cómayin ma Dios!

³⁹ Huin'it nijéjity fariseojäy huídi anajty ajcxy jilby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Ñich miich ajcxy nimaayb pen yi' ajcxy amomb, yi tzaa tigihuij mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy miid je cajpjäy ycixpi. ⁴² Chi Jesús ymiñañ:

—¡Pen mhuinjihuüby ixypy miich ajcxy nej mbáatcixipy mjetcuic'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'ijxcixy. ⁴³ Minip je xii je tiempo ma miich ajcxy je mmidzip ajcxy xyajjüdujipy mgajp miid tzaamacxy, e tziptunipy ajcxy miid miich, yajxon xyajco'adugipy ajcxy júhuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytiigiijy ma Dios ytijc yajpidzimday tüg'óciy jäy huídi anajty jilby ajuuyb adoocp. ⁴⁶ Chi Jesús nimay je jäy ajcxy:

—Jadu'n mína'ñ ma jaybétyity: "Ñich ndijci tzajpcapxy-capxtäg'ñ yí." E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijic jabom jabom ma Dios ytijc, chi je teedy tungmíidpi, etz huídi ajcxy yaj'ixpijic anajty Dios ñecy, etz mijjäydijc ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'ñy-baty nej yaj'öccixy, com tüg'óciy jäy anajty ooy tzach'amídooy'ijt Jesús y'ayuc.

Jesús ycötújcin

20 Chi jadu'n yjajty tüg xii anajty Jesús yaj'ixpicxy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmíidpi ajcxy etz huídi ajcxy yaj'ixpijic Dios ñecy etz mijjäydijc ajcxy. ² Chi ajcxy migapxy Jesús nimay:

—Yajnímaaygich, ¿ma cötújcin ti mbaady co jäy myaj'ixpicxy ya ma Dios ytijc? ¿Pín je' tñibi xycötujc möy?

³ Chi Jesús y'adzooy:

—Ñich nañ jadu'n nyaj'amídohuamy ñich miich ajcxy tüg ayuc, e m'adzóogixip. ⁴ Co Juan (je Bautista) jäy yaj'ñibejty, ¿pín je' cötújcin moy, je Dios tzajpjoty pi o jäy ajcxy?

⁵ Chi ajcxy ytiigiijy huinmay'ahuidijtpi ñayñimáayigixy miñ xyipy:

—Pen mínaanim co tzajpjoty choñ je Juan ycötújcin, Jesús xyñimaayimip ya: "¿Nej co ca' miich ajcxy mijpidacy yi' y'ayuc?" ⁶ Pen mínaanim ajt co jäy cötújcin moy je Juan, chi tüg'óciy cajpjäy tzojc xycögädzim, com ymibijcxy ajcxy co yi Juan, Dios yi' y'ayucnajtzcaxxiybi.

⁷ Chi ajcxy y'adzooy co ca' ajcxy nejhuüygixy pín Juan ti quexyíi. ⁸ Chi Jesús nimay je' ajcxy:

—Ñich nañ jadu'n ca' nigapxa'ñich pín ti xycötu-jcmöyich.

Je ijxpejt ma je tumbidijc ajcxy jibicjäybi

⁹ Chi Jesús ymínandacy yajnímay tüg'óciy je jäy ajcxy tüg ayuc, ymiñañ:

—Tüg jäy pídacxy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy.

¹⁰ Co cosecha paty, chi quejxy tüg ytumbi ma je ytumbidijc, huen cämöyíi huídibi je' anajty paatip. Chi je ytumbidijc huinhuojpy jiphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojy jip'ojy ajcxy, yajhuimbijty ajcxy, ca' ajcxy ni ti mooy. ¹² Chi midugíipí ytumbi quejxy, nañ jadu'n ajcxy je' yajtzaachiiy etz yajhuimbijty ajcxy.

¹³ Huin'it je camuuxycam huindzin ymiñañ: "¿Ti ndunipyich? Ocquejxyich nmang huídibi ooy ndzocyich. Ca' jécyity co ajcxy ixipy nmangich, yajmij'adipy ajcxy." ¹⁴ Chi je ytumbidijc co ajcxy ijxy je' yhuindzin ymang, chi ajcxy huinmaygoty nayñimáayigixy miñ xyipy: "Ti ymiñ je cogam ymang, yi' je' jada cam jédaanip. Tzoc yaj'o'cim jigix ñich ajt jada cam njé'ajtim." ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amídooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy miid huingbi tumbi.

Co je jäy ajcxy jadu'n midoy, chi ajcxy ymiñañ:

—Ni catzogipy Dios, ñicxy jadu'n njajtim.

¹⁷ Chi Jesús huindixpejty je mayjäy nimay ajcxy:

—¿Ti tijamy huídi yjaybétyip ma Dios ñecy?

Jadu'n:

Je yéydijc huídi je jäy ajcxy ca' anajty tzocy, ti Dios pídacxy mij'ane'mbi. Tim jadu'n nipaady nejhuüy je tzaa oyjatypí huídibi je pojtzpidijc ajcxy ca' yajtuna'ñ, je' oy ti yhuimni ma anajty yjaccopícyity.

¹⁸ Pínjaty ca' cöbígá'ñ jada mij'ane'mbi, ayo'n ypadamy, tim jadu'n nipaady nej jihuüy jim ycixxciday ma je tzaa ñicx e tijhuítz yajtähuijy; e pen je tzaa nigídagoty, je' ajcxy janch jaam püx ñicxy yajtcixy.

Yajnidiiygixy pen jëbi cogüéjtin yajyecy o pen ca'

¹⁹ Je teedy tungmüdpí etz huídi ajcxy yaj'ixpíjc Dios ñecy ooy anajty nihuinmayiiygixy madzaangixy je Jesús mic'amy, co ajcxy huinjihuíy co Jesús nimíy-dáacigixy müid je jihuimbit ayuc, e chigüyb anajty ajcxy je cajp jäy. ²⁰ Chi ajcxy chachhuinma'ñ'ixtaaygixy nej huaad xigixy Jesús, chi quejxy ajcxy iix'ijtpí ma Jesús yajpaady huídi naybidaacíp janch ypaat tudägyjäy; chi amidoo'íjtcixy Jesús y'ayuc huídi müid xíhuaangixy, chi cüyegaangixy ma je gobernador. ²¹ Chi je iix'ijtpí ajcxy y'amidooy Jesús nimay ajcxy:

—Huindzin, nejhüüyb ñich ajcxy co miich m'ayuc ooy y'óyity, etz myaj'ixpícy yajxon, ca' huin'ixpety jäy myaj'ixpícy, etz myaj'ixpícy Dios ytiy'ajt nej jäy jëbi huaad chinaaygixy. ²² ¿Nej copícy ñich ajcxy migüedípy je César je romanojäy mij'ane'mbi, o ca'íj?

²³ Chi Jesús huinjihuíy yí' ajcxy yjibic-huinma'ñ, paady ajcxy nimay:

—¿Tí co miich ajcxy xyjot'ixy xyhuinma'ñ'ixyich?

²⁴ Yaj'ijxcich tüg meeñ. ¿Pín y'ahuinax etz pín yxí mimb ma jada meeñ?

Chi ajcxy y'adzooy:

—Yí César.

²⁵ Chi Jesús nimay ajcxy:

—Cuet ma César huídi César paatíp, e ma Dios huídi Dios paatíp.

²⁶ Ca' mimadacy ajcxy nej tzu'íjxcixy ma mayjäy yhuinduu. Chi ajcxy ooy huinmaay jadu'n nej anajty Jesús tí y'adzóohuigixy, chi ajcxy amoñyí.

Yajnidiiygixy je jugy'ájtín ycixpi

²⁷ Chi ñija'tti Jesús tüg saduceojäy, e yí saduceojäy ajcxy ymíñañ co jäy ögy ca' y'ocjuuyjcní. Chi je' yajtiy:

²⁸ —Huindzin, Moisés jaybety ma yí' ñecy, je jécyíp, co tüg yëydíjc ytöxyíjc yajhuí'my ix'ögp, e ca' ymang tí paatcixy. Jëbi je yëydíjc y'uch müidztínäy je töxyjäy jaydëbi yaj'ung'ixípc müid y'ajch ycixpi. ²⁹ Jadu'n anajty tügpícy jäy, nihuixtujc ajcxy ytügquëx'ájtícy, ac yëydíjc ajcxy. Je mijpí müidztínay töxyjäy, chí ix'o'cy, e ca' ymang paty. ³⁰ Chi je mimetzpí ypijcy müid je töxyjäy, e ni ca' ajcxy ung paty. ³¹ Chi je midugügpí ypijcy müid je töxyjäy, e jadu'n je nihuixtujcpí müidztínay ajcxy je töxyjäy, ix'o'cy ajcxy, ni ca' ajcxy ung paty. ³² Chi nañ jadu'n je töxyjäy y'ögní. ³³ Co anajty je nihuixtujcpí jugypíjccixy, ¿huídi jada' octöxíjc'adiyb je töxyjäy? Com nihuixtujc ajcxy tí töxyíjc'ájtígyx.

³⁴ Chi Jesús y'adzooy:

—Jadachambi jäy píjccíxp, ñaymooyigixy y'ung huen píjccícy. ³⁵ Je jäy ajcxy huídibi paatíp anajty chinähüip ma je tiempo huídi mimb co ögpi yjugypíjccíxy, ni ca' ajcxy ypijcy, ni ca' ajcxy ñaymóoyigixípy y'ung huen píjccícy. ³⁶ Co jäy ajcxy yjugypícy, chí ca' huaad y'ögcixy jadüg'oc, quipxyjaty ajcxy müid je ángeles ajcxy, e Dios yí' ajcxy ung'adñib co yjugypígy müid jemybi jugy'ájtín. ³⁷ Janch co yí ögpi yjugypígy, jëbi mbaadíp je tiy'ajt ma Moisés ñecy ma jadu'n yjaybétyity, je taab

anajty aay'ujtz ytoy, co je Huindzin Dios migapxy Moisés, nimay: "Ñich Abraham yDios, Isaac yDios, Jacob yDios." ³⁸ Je ögpi ca' müidíty Dios. Je jäy ajcxy huídi juugyípc janchtiy ajcxy ymíid Dios, com co müid Dios ycixpi tüg'óciy jäy ajcxy ymíid yjugy'ajt.

³⁹ Chi jäy ajcxy huídi yaj'ixpíjcp Dios ñecy nimay Jesús:

—Oy tí m'adzoy, Huindzin.

⁴⁰ Ca' ajcxy ocjajtní nej jac nimáaygixípy.

Pín je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy míña'ñ co Cristo David y'ap y'oc? ⁴² David cí'm míña'ñ ma je Salmo necy:

Yí Huindzin Dios nimay ñich nHuindzin: "Íña' ya a'oy'amy ma ñich.

⁴³ Ixtí cooní anajty miich mmíidzip tí mmímadactäyich, jadu'n nej jihuíy tí nbidägyich yí mmíidzip ma miich mdecypocxpejt."

⁴⁴ Co David yxímoy Cristo ñich nHuindzin, ¿nejtz yí' co y'ap'adyí y'oc'adyí?

Jesús xíy je escribas ajcxy

⁴⁵ Chi tüg'óciy cajpjäy jim anajty y'amíidíjtcixy co Jesús nimay je' ydiscípulos ajcxy:

⁴⁶ —Naygüend'ájtígy müid yí' escribas ajcxy ydiscípulos, co ajcxy ooy tzojccícy yhuídidaangixy müid yhuít oyjatypí, ooy ajcxy tzojccícy co huen capxocxyí ma jäy y'amugyí, e ooy ajcxy tzojccícy yí cödumbi ññaybejt ma naymujctac, etz ooy ajcxy tzojccícy cödumbi ññaybejt ma jäy ajcxy yxíidungixy. ⁴⁷ Chi ajcxy yajcíjxtayí yí co'ögytöxyjäy ypidägy, e tungixy ooy jecy tzajpcapxy-capxí ma jäy yhuinduu. Yí jadu'mbi jäy ajcxy nígi ajcxy Dios chaachytuníyb müid ypocy ycixpi ca'ydi jacnípín.

Je ayoobitöxyjäy co'ögyí y'ofrenda

21 Jiiby anajty Jesús ma Dios ytiyc co ijxy comeñyjäy may'amy ofrenda pídaaccícy ma meeñygaax. ² E nañ ijxy co tüg co'ögytöxyjäy pídagy anajty metz pí'cmeñ. ³ Chi Jesús ymíñañ:

—Janch ñich miich ajcxy nimäy co jadyaabi co'ögytöxyjäy ayoob jac anaxy jada, tí pídagy ofrenda ca'ydi jacnípín. ⁴ Tüg'óciy comeñyíjyc ajcxy ypidacy ma ofrenda je meeñ huídi conajxp. Jadyaabi co'ögytöxyjäy tí pídagy huídi anajty ñigayamy.

Jesús ymíñañ co je Dios ytiyc yhuindígya'ñ

⁵ Nijéjity jäy co ytigíy ma Dios ytiyc nimíydacy ajcxy co Dios ytiyc ooy chach'oy'oydúñity müid tzaa oyjatpyí, e müid tiibi jiiby yojxcixy. Chi Jesús ymíñañ:

⁶ —Tüg'óciy jada huídi ajcxy m'íjxpy ma Dios ytiyc, miníp xí tiempo míña jada nícy yhuí'my taj xit jada tzaa, ca' ma pochycop.

Je tiy'ajt ma ca'ni naaxhuíñybi ycíxa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytuniiyb yjadiyb nej miich ti mminañ? ¿Ti tiy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy ymina'ñ ñay-bidägáanigixy co je' ajcxy je Cristo, ymina'ñ ajcxy: “Ích je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicixy. ⁹ Co miich ajcxy ayuc midohuipy co jäy chachchiptungixy, e ñayñibidicigixy, ca' mdzigíyigixy, com ooy ycopicyty co jada jadu'n jayijp ytuniiyb yjadiyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacmínañ:

—Nayñibidägíib naax cajp miid huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadíib mij'adzigi'ñ, etz ooy ijxpejt huidi quëxigíp tza-jpcíxy.

¹² Ma ca'ni anajty jadu'n jadyii, xypahuidijtcóotcixipy jäy, xymájtzcixipy, xycíyécixipy ma judíojäy ñaymujctac. Chi jäy ajcxy xypidägipy pujxtigoty, xyajniccixipy mach ma rey etz ma gobernador ajcxy yhuinduu.

Jadu'n jäy ajcxy jibic xytunipy miid miich ajcxy com co anajty ti xymijpidáaccixyich. ¹³ Miich ajcxy tiy'ajt myegipy miid ích nxii ycixpi. ¹⁴ Co jäy ajcxy yxíhuipy ma codungdijc, ca' ni nej ajcxy mjot'adíyib, ni ca' ajcxy mhuinmayipy nej m'adzógixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadipy nej xy'adzógixipy, e nej xy-jacxígixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm ajuugy amígüg xycíyécixipy ma cötujctac. Nijëjity miich ajcxy m'ögipy miid co anajty ti mmijpidaaccixy ích n'ayuc. ¹⁷ Mayjäy ajcxy ca' xy'ix-aanipy xychogaanipy miid co anajty ti mmijpidaaccixy ích nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy miid ymidzip, huin'it ajcxy mnejhuíhuipy co huingon je'anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yquéeccixipy ñíxcixipy ajcxy yu-ugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajp-tigíyñi ma je Jerusalén cajp. ²² Je tiempo mina yjadiyb ayo'n miid co anajty judío jäy ti ytundigoogixy, je' jada yajcuydundaayb jadu'n nej yjaaybétyty ma Dios ñecy. ²³ ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty miid y'ungma'xung! Ooy jadíib mij ayo'n ya naaxhuin etz tzip éjcin ma jada cajp. ²⁴ Nijëjity ajcxy y'ögipy tzijoty, e nijëjity yajnicxip tzumy mach ma huingbi cajp huingbi naax. E Jerusalén naxmihuägydähuib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'anémin.

Nej jada' yminipy je Dios y'ung

²⁵ Huin'it xii huin'it tiempo quëxigíp ijxpejt ma xii po' etz ma yi madza', ya naaxhuiñ ooy jäy ajcxy jotmay

miidipy. Je jäy ajcxy ooy chigíhuipy yjihuíhuipy yhuinmay'ahuididipy ajcxy ooy, miid je meyy ycixpi co anajty chachpidigy chachnögy chachmína'ñ. ²⁶ Yi jäy ajcxy anucxi'ñ yajcidahuib co anajty ajcxy icy nej yjadyii huindu'mybi naaxhuiñ; e huídijaty mic'ajt yajpatp jiiiby tzajpjoty yücxtähuipy yi'. ²⁷ Huin'it miich ajcxy xy'ixipyich, ích je jäy huidi tsoon tzajpjoty, nmiiñich jocjoty miid je nmic'ajtich, nmiiñich miid ích ngötújcin etz ích n'oy'ájtin mijpi. ²⁸ Co je ayo'n tiempo jadu'n yjatzondägipy, chi mba't'íxcixipy com huingoniñ anajty mina Dios xyñihuáangixipy yxohuáangixipy.

²⁹ Chi Jesús yajnimay ajcxy tüg ayuc, yminañ:

—Íjxcix yi higuery etz tüg'óciy quipy, ³⁰ co yhuamigy huin'it miich ajcxy nejhuíy co ti yhuingoni mina ypot-tigíyñi. ³¹ Tim jadu'n nej miich ajcxy ijxpejt mbicy ma higuery quipy co pottiempeo ytigíyñi, nañ jadu'n co miich ajcxy m'ixipy je ijxpejt tzajpcíxy jadu'n nej yam nya-jnimaaygixy, mnejhuíhuipy ajcxy co huingónip je tiempo mina Dios y'ane'ma'ñ ya naaxhuiñ.

³² Janch nimaaybich miich ajcxy co jadu'n yjadiyb ytuniiyb jayijp, ca' anajty o'ctäy je jäy ajcxy huídibi tzi-naayb jugy'ájtixyp jadachambi xii tiempo. ³³ Yi tzajp etz naaxhuiñybi naxip tigoyip yi'. Ích n'ayuc ca' ñaxipy ytigoyipy ni camina.

³⁴ Naygüend'ájtigix miich ajcxy ca' mnijot'ájtixy yi jocni yi mügí, etz yi tzi-naayin jugy'ájtin, jigix ca' ajcxy xyniminipy jotcömoñy je ayo'n xii je ayo'n tiempo.

³⁵ Timetiini minipy je ayo'n tiempo miid jäy ajcxy ycixpi huidi ya tzi-naayb ma tüg'óciy naaxhuiñybi. Tim jadu'n nej tüg iyujc ayo'nbaady co timetiini yajtúxuuch.

³⁶ Ni'ixi' ijtix, mibijctzoogix Dios, ca'ydi ayo'n ajcxy mbaatcixy huidi jadaanip, jigix jiiiby myajpáatcixipy tzajpjoty ma ích nhuinduu, ích, je jäy huidi tsoon tzajpjoty.

³⁷ Xim anajty Jesús yaj'ixpicy ma Dios ytijc, e coodz anajty choon ñicxy jim ma cögop huidi yxí Olivos.

³⁸ Jabom jabom jopy jopy ñiminyii tüg'óciy cajpjäy jiiiby ma Dios ytijc tibäy co y'amidoo'idaani ajcxy Jesús y'ayuc.

Xiicyögyxy capxyögyxy nej huaad Jesús májtzcixy

22 Huingon anajty je xii mina jäy tzajcaagy caaygixy huidi ca' ylevadura miidity, huidi jäy yti-jpy pascua xii. ² Chi je teedy mijtungmiidpi etz je es-cribas yhuinma'ñ'ixtaaygixy nej ajcxy ocyaj'ögipy Jesús. Chigíyib anajty ajcxy je cajpjäy.

³ Chi je mujcu' ytigíy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discipulos. ⁴ Chi Judas ñicxy oy migapxy je teedy mijtungmiidpi etz tzajptijc soldado huindzin, e ycapxytuñ miid je' ajcxy nej jëbi cýecy Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meeñ möhuangixy je Judas. ⁶ Chi Judas cöbijcy je meeñ, chi yhuinma'ñ'ixtay nej jëbi cýegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ájtin

⁷ Chi paty je xii mína jáy cay je tzajcaagy huidi ca' yle-
vadura miidíty com huin'it anajty ajcxy yaj'ögy cöbixy
ymang pascua xigixp. ⁸ Chi Jesús quejxy Pedro etz
Juan, nimay:

—Nícx miich ajcxy yaj'oyi' je pascua adzu'íbi, jaydëbi
ajt ngaayim.

⁹ Chi ajcxy y'amidooy:

—¿Ma mdzocy co nyaj'oyíhuibich ajcxy?

¹⁰ Chi Jesús yminañ:

—Co mdigíhuipy ajcxy cajpjoty, mbaadípy tüg yëydíj
huidi yajnicxp tüg majt nii. Mbanícxyp ajcxy je yëydíj
cooni yjadípy ma ytíj. ¹¹ Co miich ajcxy mjädípy ma je
jáy ytíj, chi ajcxy mnimáhuipy je codíj: "Nhuindzinich
jadu'n mínaam: ¿Ma yaj'ahuädz yajpaady ma
ngayípyich je pascua adzu'íbi miid ích ndiscípulotíjci?"

¹² Je codíj miich ajcxy xyajni'ixíhuip tüg cuarto ma
mímejtzpi piso. Ni'ixi' jim je adzu'íbi. ¹³ Chi Pedro etz
Juan nícx, chi paty jadu'n nej anajty ti ñimáyii, e jim
ajcxy ni'ixíy je pascua caayin uucin.

¹⁴ Co je hora paty, chi Jesús y'ixtacy ma je mesa miid
je' ydiscípulos ajcxy. ¹⁵ Chi Jesús yminañ:

—Ti ooy nijot'atyich co nmídgayaangixy jada pascua
adzu'íbi ma ca'ni n'ögyñich. ¹⁶ Ích miich ajcxy jadu'n ni-
maayb co ích ni mína ca' njaccayípyich jadüg'oc je pas-
cua adzu'íbi, íxti cooni yajcuydundáhuipy je pascua xii
ytíy'ajt ma Dios y'ané'min.

¹⁷ Chi Jesús conígy je ügy co Dioscojúyip yajnaxy,
huin'it yminañ:

—Uccix jada ügy, naymóoyigixy miich ajcxy. ¹⁸ Cham
ích miich ajcxy nimäy co jadu'n nej yjacnicxa'ñ xii tiem-
po ca' vino ni üga'ñich íxti cooni Dios y'ané'min
yminípy ya naaxhuiñ.

¹⁹ Nañ yconígy Jesús tüg tzajcaagy co mibíjctzooy
Dios, huin'it tujc-huäcxy moy discípulos ajcxy, e chi
ajcxy nimay:

—Jada tzajcaagy ích nninícx'ajtpyich huidi ngíye-
jcpyich ma yi o'cin miid miich ajcxy mbocy ycixpi. Jada
ijxpejt miich ajcxy mñ'idípy oy jáy mech miid ích ycixpi.

²⁰ Co anajty ti ycaaygixy, chi Jesús conígy je ügy
jadüg'oc, chi yminañ:

—Jada vino je' jada Dios y'ayuc ytíy'ajt jemybi jadu'n
yi' nej ích nni'py huidi temam yogam miid miich ajcxy
ycixpi.

²¹ Jadachambi yi jáy huidi xycíyegaambich ma
nmídzpich, ya je' cham miid'íñáych ma jada mesa.
²² Janch jadu'n njada'ñ n'ayoohua'ñich jadu'n nej ti nya-
jnigodugíyíjich. ¡Ayo'n padamy je jáy ayoob huidi xy-
cíyegaamyich ma nmídzpich!

²³ Chi je nimajmetzpi ajcxy ñayñimaayi miñ xyípy:

—¿Pin jada' yi' ma ích ajt huidi jadu'n tundigoyam?

Yajcapxcójcixy pin jada' jacnigi ymíjity

²⁴ Chi je nimajmetzpi huidi Jesús anajty ti huin'ixy ca'
ajcxy ñay'ayuc-huin'ihuíyi pin jada' jac mjípi oc'idípy.

²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej
tüg huindzin, yi' ajcxy huídibi ane'mb yajtíjcy co ooy
oytuungixy. ²⁶ Miid miich ajcxy ca'ydi yjadu'níty. Hue'
janchtíy je mjípi ma miich ajcxy huen ñaybidägyii nej
jihuíy ymútzity. E je huidi nigohuajc'ajtp huen ñaybidä-
gyii nej jihuíy je' je' je tumbi. ²⁷ ¿Pin je' jacmíjip? ¿Huidi
íñaybi ma mesa, o huidi ni'ixíy a'ixíy caayin uucin?
Yi' je' jacmíjip huidi íñaayb ma mesa. Per ích íjtpich
miid miich ajcxy jadu'n nej huidi ni'ixíy a'ixíy caayin
uucin.

²⁸ Miich ajcxy ti m'íjtcixy miid ích ma anajty ayo'n ti
nyajnaxyich. ²⁹ Paady ích miich ajcxy tüg ané'min
nmooyb, jadu'n nej ích ndeedy ti xymóyich. ³⁰ Jaydëbi
miich ajcxy mgáaygixípy m'uuccixípy ma ích nmesa jii-
by ma ích n'ané'min e m'íñáhuipy ajcxy ma je
ane'mdac, e mdiydúngixípy m'ané'mgixípy je nima-
jmetz picy Israel ñaax ycajp.

Jesús capxpídzimy co Pedro ymina'na'ñ co ca'p Jesús ixy'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ix-
aangixy xyhuinma'ñ'ixaangixy jadu'n nej jáy trigo
huimbojy co yajhuätzaangixy. ³² Per ích Dios nmibíjct-
zooyich miid miich ycixpi, jigix miich ca'ydi mmibíjcin
ytigoy'ity. Mína anajty miich ti mjothuimbity, jotmic
mígápxípy yi mmigügtíj ajcxy.

³³ Chi Pedro yminañ:

—Huindzin, jotcujc ích nnícx'a'ñich miid miich oy pu-
jxtigótyity, etz oy ndímy'ögíbich miid miich.

³⁴ Huin'it Jesús nimay Pedro:

—Ích miich nimaayb co ca'ni anajty tzey yaxígy
jabom jopy co miich miná'nip tugígy'oc co miich ca'
xy'ix'adyíjich.

Huingomb hori ma Jesús y'ocyaj'íjmadza'ñ

³⁵ Chi Jesús nimay ydiscípulos ajcxy:

—Co ích miich ajcxy jayhuin nguejxy, ni mmoral, ni
ca' mmeéñydíj, ni mgígy ti mmi'oygixy, ¿nej myajti-
goy'íjt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydíj etz ymorral miid, huen
mínícx; nañ pin ca' miidíty y'espada, huen toogy yjocx
huit, chi juyípy y'espada. ³⁷ Ích miich ajcxy nimaayb co
copícy jada yajcuydunípy huídibi mimb jaybéty miid
ích ycixpi ma Dios ñecy ma jadu'n yminañ: "Yaj'amí-
chomujc (je Cristo) miid yi' ajcxy huidi jibicjáyp." Tüg'ócy
mimb jaybéty ma Dios ñecy miid ích ycixpi,
yajcuydunípy yi'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemaní

³⁹ Chi Jesús jim choñ ñicxy ma je cop huidi yxñ Olivos, com jim anajty ñicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuipe ajcxy ca'ydí mdigihyigxy jibic tuum.

⁴¹ Chi Jesús huinhuäctuty je discípulos ajcxy tüg tza-agäch yjiguëgyity, chi ycoxtinay'ahuñy ytigihy Dios mibijctzoob. ⁴² Chi Jesús yminañ:

—Dios Teedy, pen miich m'a'ixiyyb pñcigich jada tza-achypí, ca' ñich huaad nyajnaxyich, per ca' ñich huaad ngi'mdzójcin nguyduñich, miich mdzójcin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitni ypidzimy janch jadu'n yi' anajty nej n'py janch mijjaty y'ocnajzta'cxihyñi.

⁴⁵ Co ypidigxy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymigügtijc ajcxy:

—¿Ti co mdzachmaagixy? Pidäccix mibijctzoogix Dios, ca'ydí jibic tuum mdigihyigxy.

Yajnicxcixy mach je Jesús

⁴⁷ Jim Jesús anajty ymigügtijc ajcxy miidcapxy miid-miydägy, co je mayjäy oy yjäty. Jayijp anajty ymiñ je huidi anajty xiijp Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzüxca'ñ. ⁴⁸ Chi Jesús yminañ:

—Judas, ¿nej miid tüg tzücxin mgäyecy ma ymidzip, je jäy huidi tzoon tzajpjoty?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyii yjadyii, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachiyi je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús yminañ:

—Ixmajtcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi' teedy tungmiidpi ajcxy, yi' Dios ytijc policia huindzin etz mijjäydijc:

—¿Nej co xyñimíngixyich miid pujx etz mguipyijjpxu'ñ jadu'n nej jihuiy ñich tüg meetzpi? ⁵³ Jii-by ñich anajty jabom jabom ma Dios ytijc, e ca' miich ajcxy ti ti mduñ miid ñich. Per cham jëdu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jigüëgyjihui' anajty ypanicxyii. ⁵⁵ Jim ajcxy jñn yajmijiy tibägujx chi ajcxy y'ixtactay nidüg'óciy. Pedro y'ixtacy nañ jadu'n ma je

jäy ajcxy. ⁵⁶ Huin'it tüg pödumbi ijxy Pedro iñäy ma jñmba', chi huindicxpejty nimay:

—Jada yëydijc nañ ymiid anajty Jesús.

⁵⁷ Chi Pedro ca' cöbijcy, yminañ:

—Töxyjäy, ca' ñich yi' n'ixy'adyii.

⁵⁸ Nañ jahueengi huin'it jadüg jäy Pedro yhuindicxpejti, ñimaayi:

—Miich, yi' Jesús ajcxy anajty miid m'ity.

Chi Pedro yminañ:

—Ca' n'ñichity.

⁵⁹ Ti anajty tüg hori ninaxni co oy huingbi yminandägy:

—Janch co jada yëydijc yi' anajty miid y'ity Jesús. Com nañ galileojäy yi'.

⁶⁰ Chi Pedro yminañ:

—Ca' ñich nhuinjihuiy nej miich mmina'ñ.

Capxnñ anajty je Pedro co tzey oy yaaxigy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñimäyii: "Ni ca'ni anajty tzey yaaxigy cham coodz co miich tugig'oc xycoyüdzybyich." ⁶² Chi Pedro ypidzimy tibäy, oy jii-by yäxy miid tájin máyin.

Nixiiccixy yajxiiccixy yi Jesús

⁶³ Je jäy ajcxy huidi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jijpcojxy.

⁶⁴ Chi ajcxy huingoxodzy, e cojxy ajcxy ma yhuifñijjy, nimaaygixy:

—Octiygapx, ¿pin ti xycoxy?

⁶⁵ E ooy anajty miid yjibic ayuc cixy cuety nimaaygixy.

Jesús mijjuntajoty yajpaady

⁶⁶ Co yxñmiy, chi yöymujcy yi' teedy mijtungmiidpi ajcxy, yi' mijjäydijc ajcxy, etz yi' escribas ajcxy, chi ajcxy y'amidooy:

⁶⁷ —Nimaaygich ajcxy ¿nej miich je' je Cristo?

Chi Jesús y'adzooy:

—Co ix'yipy nnigapxich, ca' miich ajcxy mibigipy. ⁶⁸ E pen ñich miich ajcxy n'amidooyb, ca' miich ajcxy xy'adzohuipyich, etz canan huin'it xyñajtmadzihuibich miich ajcxy. ⁶⁹ Jadachambi e ñicxa'ñi ñich, je jäy huidi tzoon tzajpjoty, n'ixtäg'a'ñich a'oy'amy ma Dios mic'ajtmiidpi.

⁷⁰ Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co ñich njëjity.

⁷¹ Chi ajcxy yminañ:

—¿Ti ajt njac-huáanim testigo? Ti ajt yam ci'm nmi-dohuim nej mina'ñ.

Jesús ma Pilato yhuinduu

23 Chi tüg'óciy je mayjäy ajcxy ypidigxy, chi yajnicxy ajcxy Jesús ma je gobernador Pilato. ² Chi ajcxy ytigihy xëbi yminaangixy:

—Jada jäy naax cajt yaj'ixpijcp huidi ca' ytiy'ajtity. Yí' adujctáhuam co ca' huaad nmigüéjtím César, e ymi-na'ñ c'i'm co yí' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmiidpi ajcxy etz je mayjäy:

—Ca' ñich ti pocy nbaadyich ma jadayaabi yëydijc.

⁵ Chi Jesús ymidzip nigi anajty ajcxy ymi-nan'adiitczixy:

—Jada Jesús naax cajt tzachyajqueec-huäcxtaayb je judíojäy miid yí' y'ayuc. Yajtzondacy Galilea, e jadachambi ya Judea jadu'n id'ich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuüy co yí' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugüy com tiyüy anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jayaj'amidoy, e Jesús ni tüg'aa ca' y'adzooy. ¹⁰ Jim anajty teedy mijtungmiidpi etz je escribas ajcxy, tzach-nigübéjtixy mictägy. ¹¹ Chi Herodes miid yjäy ooy nixi-icy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpjici, com nymijot-ma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yí' teedy mijtungmiidpi, yí' cajp-tungmiidpi, etz yí' naax cajt. ¹⁴ Chi ajcxy nimay:

—Ti miich ajcxy xyajnimingixyich jadayaabi yëydijc, jadu'n miich ajcxy minamb co ooy jäy yajqueec-huäcx-tay. Ti ñich yí' jatiyduñich ma miich ajcxy mhuindu, ca' ñich yí' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniquexyich, ni ti pocy jada Jesús ca' ti tuñ huidi huaad nyajco'ögüyich. ¹⁶ Miñ n'octzaachy-tuñich, jaydëbi nnajtmadzihuibich.

¹⁷ Jadu'n je gobernador anajty costumbre miidity co najtmadzüy tüg machyjäy mijxüjoty. ¹⁸ Chi je mayjäy tüg mucy ajcxy ymiinandacy:

—¡Yaj'ög jadayaab Jesús! ¡Najtmadzi' yí' Barrabás!

¹⁹ Je Barrabás anajty pujxtigoty ti ypidägyii co anajty ti nibidigüy je gobierno, nañ ti anajty yjäy'aj'ögy. ²⁰ Chi Pilato nimay ajcxy jadüg'oc co najtmadzihua'ñ Jesús. ²¹ Chi je mayjäy janch mic ymiñañ:

—¡Yajcruudzpet miich yí'! ¡Yajcruudzpet miich yí'!

²² Chi Pilato ymiñañ je midugü'ocpi:

—¿Ti Jesús ti tundigoy? Ca' yí' ma ypocy nbaatich. Miñ n'octzaachy tuñich, e najtmadzihuibich.

²³ Je jäy ajcxy nigi anajty ymiñañ'adiitczixy janch mic, co huen yajcruudzpejty. Chi ajcxy jadu'n mimadacy Jesús co chachne'mgixy je teedy tungmiidpi, etz je ca-jpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato najtmadziiy je Barrabás huidi anajty pujxtigotyip, co anajty chach jäy yajqueec-huäcxxy, etz yjäy'aj'ögy, je' huidi yí' jäy ajcxy ypijctzou. Chi Pilato cüeyjcy Jesús ma yí' ajcxy huen tungixy nej tzojccixy.

Jesús yajcruudzpejti

²⁶ Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti chooñ camjoty, huidi anajty yxii Simón, e ycocajpity anajty Cirene. Chi adzip ajcxy Simón yajquejcy cabiy Jesús ycruudz, e yajpanicxy ajcxy Jesús.

²⁷ Jac'axam anajty naax cajt panicxixy, etz nañ may töxyjäydijc ajcxy chachyaaxcixy miid jotmay miid yí' yciñpi. ²⁸ Chi Jesús ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaxigix miich ajcxy c'i'm etz m'ung ajcxy yciñpi.

²⁹ Chi ypaadipy tiempo co jäy ajcxy ymiñañ'ipy: "Jotcujc je töxyjäy ajcxy huidi ca' y'ung ixy, huidi ca' ti y'ungtzimigüy, etz huidi ca' ti y'ung yajtzitczixy." ³⁰ Chi je jäy ajcxy nimaydägüpy mijtun mijcop: "Nigidagótcich ajcxy"; etz je mutztun mutzcop: "Yajtigooygich ajcxy."

³¹ Pen jäy ajcxy tzaachypi ayo'n mooyb Dios y'ung, nigi ajcxy jaciiñi ytundigoya'ñ miid Dios yjäy, tim jadu'n ni-paady nej pin puxam tzuxy quipy nañ puxamy quipy tiztzi.

³² Nañ jim anajty yajnicxixy miid Jesús jametz pocyjäy. Tú'ciy miid Jesús anajty yaj'ögaangixy. ³³ Co ajcxy oyjäty jim ma tüg it huidi jäy ytiyüy ögpi cohuajc, chi ajcxy jim Jesús yajcruudzpejty miid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús ymiñañ:

—Dios Teedy, mecxi ajcxy ypocy, com ca' nejhüügixy ti ytungixyp.

Co je soldados anajty ajcxy yajhuäcxaani ac je'y Jesús yhuít, chi ajcxy ijxy suerte pin ocjediñb. ³⁵ Jim je cajpjäy anajty yhuindüxcixy, yam je tungmiidpi nixigüy yajxigüy Jesús, ymiñañ ajcxy:

—Jada Jesús huingjäy ti yajtzögy, huen cham c'i'm naysajtzögyii, pen yí' je' je Cristo, je huidi Dios ti huin'ixy.

³⁶ Nañ jadu'n je soldados ajcxy nixiicxixy yajxiicxixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy ymiñañ:

—Pen miich Rey'ajt ma yí' judíojäy ajcxy, nayñihuäñii c'i'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YÍ JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús ymiñañ:

—Pen miich je' je Cristo, naygohuäñii c'i'm, e co-huaangich ñich ajcxy nañ jadu'n.

⁴⁰ Chi je jadügpí pocyjäy oy y'adzooy, ogy ymigüg, ni-may:

—¿Nej ca' miich Dios mdzigÿy. Ca' m'ixy co tú'ciy ti nbócycahuim? ⁴¹ ñich ajt janch paatip jadu'n, co jadu'n jada ngóbñicim tzaachypi je tiibi ndundigooyim. Jadaayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiiby ma m'ane'mdac.

⁴³ Chi Jesús oy y'adzooy:

—Janch ñich miich yam nimäy co cham ñich miich mñid'ñtnipy ma je oybi it.

Jesús y'o'cni

⁴⁴ Co cujcxñibi paty, chi oy ycoodzÿy tüg'óciy naaxhuiñ ixti minacyñini. ⁴⁵ Chi xii ca' y'o'c'ani. Chi je huit oy ycñtzuäcxy huidi anajty adñydujcp je Dios y'it jiiby ma Dios ytijc. ⁴⁶ Huin'it Jesús mic ypätcapxy yminañ:

—Dios Teedy, cham nyajcñidigÿy ñich n'alma.

Co Jesús jadu'n yminañ chi y'ögy.

⁴⁷ Co je soldado huindzin ijxy jadu'n nej anajty ti tutunyii ti yjadyii, chi ooy jäymejch yí Dios yminañ:

—Janch co jadaayaabi yëydijc anajty tudägy yjäyity.

⁴⁸ Chi je mayjäy tiibi anajty jim yöymüjccixy yhuindñcxcixy, co ajcxy ijxy jadu'n nej ytuuní yjajti, chi ajcxy huimbijttaayñi cajpjoty yam ycaach tzachcójccixy mñid jotmay ycixpi. ⁴⁹ Cham tüg'óciy Jesús ymügügtijc ajcxy huidi anajty mñid ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguëgy je' anajty ajcxy yhuindñcxcixy.

Yajnaaxtigÿy ajcxy Jesús

⁵⁰ Jim anajty tüg yëydijc huidi anajty yxii José, hue' anajty ycocájpity Arimatea ma Judea naaxjot. Je' anajty judío mñitungmñidpi, e je' ooy anajty chach'oyjäyity etz ytudägyjäyity. ⁵¹ Je' nañ yjijp'ijxy anajty co yminipy je Dios y'ané'min, e ca' je' anajty jijptigiyÿy mñid jacnaagity mñitungmñidpi co ajcxy yaj'ögy Jesús. ⁵² Chi José ñicxy ma Pilato oy pijtzoohui Jesús ñinícx. ⁵³ Chi yajminajcy ma cruudz, e mo'ñ mñid tüg sávana, chi pidacy ma ögpí jut, ma tüg tzaahuinguetzmijc ma ca'ni anajty ni tüg ögpí jiiby yajpidägy. ⁵⁴ Je' anajty ajcxy ni'ixiyyb a'ixiyyb je pascua xii e je' anajty tim tzondägan je pócxin xii.

⁵⁵ Chi je töxyjäydijc huidi anajty ti ypadzoñiyii Jesús jim Galilea, panícx ajcxy je José axam. Chi ajcxy nañ jadu'n ijxy je ögpí jut, etz je ninícx jadu'n nej jiiby yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyiyy utz xuucpi, tzooy, etz unguento, chi amay'ajty je pocxinxi, jadu'n nej anajty cötújcin y'ane'my.

Co Jesús y'ögy chi yjugypijcy

24 Co je seaman y'ixtigÿy janch tim ticxëcp je töxyjäydijc ajcxy ymiiñ ma je o'cpi jut, chi mimiiñ ajcxy utz xuucpi, etz tzooy huidibi anajty ti yaj'oyiyyigixy. Nañ jadu'n mñidjadyii töxyjäydijc miiñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigÿy jutjoty, chi ca' ajcxy paty je Huindzin Jesús

ñinícx. ⁴ Chi jadu'n yjajty, jiiby anajty ajcxy jutjoty huinmaaygixy, co ñayguëxigí ma ajcxy ymijc metz yëydijc janch adícxp anajty yhuit. ⁵ Chi ajcxy ooy chigiy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yí jugypí ma yí tiibi y'ögy?

⁶ Ca' je' ya, ti je' yjugypicy. Jäyméjtzicix jadu'n nej mina'ñ jim Galilea, co yminañ:

—Ooy ycopícyty co ñich, je jäy huidi tzoon tzajpjoty, nyajcÿyegipy pocyjäy cñ'am. Yí' ajcxy xyajcruudzpedipiyich, chi njugypigipiyich codugiig xii.

⁸ Chi ajcxy oy jäymejtzcooty nej anajty Jesús ti ymina'ñ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmñidmñydactay jadu'n nej anajty ti ijxcixy ti midoogixy mñid Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtigÿy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymidöxyjäydijc. ¹¹ Chi Jesús ydiscípulos ca' ajcxy tim mijpidacy je töxyjäydijc ajcxy ayuc, hue' ajcxy tijy nigo y'occapxcixy y'ocmñydaaccix, paady ca' ajcxy mibijcy.

¹² Chi Pedro ypidigÿy ñicxy poyigÿy ma anajty Jesús ti ñaaxtigÿy. Chi Pedro yco'ixiyy ma je o'cpi jut, chi ijxy co ca' jiiby ni ti, jëyi Jesús yhuit abicy y'ooxnäy. Chi Pedro yhuimbijty ma ytijc jihuiyy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscípulos ajcxy ñicxy ma tüg cajp mutzpi hue' anajty yxii je cajp Emaús, hue' yjiguemiyty mñid Jerusalén tugi'px estadios (majmetz kilómetro). ¹⁴ Chi amñydaaccip anajty ajcxy ñicxy. Nigapxcixy nimñydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymñydaaccixy je nimetzpi, chi Jesús cñ'm nimijhua'cy je metzpi, chi mñid ñicxy ajcxy yquipxyi. ¹⁶ Oy anajty ja'ijxcixy, ca' ajcxy tuñcuend pin je' anajty. ¹⁷ Chi Jesús y'amidooy je' ajcxy:

—¿Ti miich ajcxy mñydacpy ma yam mdüyögygixy?

¿Nej co mdájccixy mmágygixy?

¹⁸ Chi tüg huidi anajty yxii Cleofas y'adzooy:

—Janch tüg'óciy mayjäy nejhuidäy je ayo'n ti ytuñyii ti yjadyii. ¿E miich naydüg jim jättac Jerusalén, e jadu'n tijy ca' mnejhuÿy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy yminañ:

—Jesús Nazaretpi, huidi Dios y'ayucnajtzcaxñiyyip, yí' anajty mij jánchip ma yí ayuc etz huinma'ñ ma Dios yhuinduu, etz cham ma tüg'óciy naax cajp. ²⁰ Chi yí' ajcxy je teedy mñitungmñidpi etz ñich ajt ndungmñidpi Jesús yajcñidigÿy je gobernador co huen yaj'ögyii. Chi ajcxy yajcruudzpejty. ²¹ Hue' ñich ajcxy anajty ndzach'ahuijxyp co yí' je' huidi Israeljäy ajcxy cohuänaam ma ymidzip. Jadachambi jada' ymidugñgxñi ma jadu'n ti ytuñyii ti yjadyii. ²² Cham ñich ajcxy ndöxyjäydijc ajcxy ooy xy'adzigñyigixyich. Ti y'oygixy janch ticxëcp ma o'cpi jut. ²³ E com ca' ajcxy paaty je ñaaxnícx, chi ajcxy yhuimbijtni yminaangixy co ti ijx-

cixy yí ángeles ajcxy, hue' je ángeles ajcxy ymínañ co Jesús yjuugyity. ²⁴ Huin'it nijëjity nmigügtijcich ooy ma o'cpi jut, paty ajcxy janch jadu'n nej töxyjäydijc anajty ymínaangixy. Ca' je' ajcxy ijxy Jesús.

²⁵ Chi Jesús ymínañ:

—Miich jäy ajcxy ooy ajcxy m'aajuuñity mjetjuuñity, ca' ajcxy ti mdzojcmibijccixy co ajcxy mjamibigá'nip huidibi y'ayuc najzcapxiybi ajcxy ycapxy! ²⁶ ¿Nej ca' anajty ycopícyity co je Cristo ayo'n paadip, e huin'it ytigihuij tzajpjoty ma yí' y'it oybi?

²⁷ Chi Jesús yajnímaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajzcapxiybi yjaay, yajxon ajcxy yajni'ixiyday jadu'n nej yjaybétyity miid je Cristo ycíxpi.

²⁸ Chi ajcxy mihuingoñ je mutz cajp ma anajty ñéxcixy, je Jesús jadu'n ñaybidaaci jadu'n nej jihuij jacjiguem ñicxy. ²⁹ Huin'it ajcxy nimay adzip:

—Huim miich miid ñich ajcxy, nigí jada chuu'iy'adich.

Chi Jesús ytigihy cajpjoty yhuim'y miid je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg' tzajcaagy conigy, e yajnajxy Dios cojujy, huin'it tujc-huäcxy moy ajcxy. ³¹ Huin'it ajcxy ijxcajpy Jesús.

Chi Jesús mic mícíy yaj'ijxtigoy. ³² Chi ajcxy ñayñímaayí:

—¿Nej ca' yjánchity co ñich ajt ooy njihuñiyim jotjoty huinmañjoty co anajty ajt jim xymídmíydacim tú'am, etz co ajt xyñajzcapxiyim je huidi jaybety ma Dios ñecy?

³³ E tim huin'it'y ajcxy tübjccixy, chi ajcxy néxcixni jim Jerusalén. Ni'amugi' ajcxy paty je majctügpi Jesús ydiscípulos ajcxy e jacjadyii jäy ajcxy. ³⁴ Chi ajcxy mi-naangixy:

—Janch yí' co ti yjugypicy je Huindzin Jesús, com ti oy ñayguëxgyii ma Simón.

³⁵ Chi Cleofas nimíydacy jadu'n nej tú'ay anajty ajcxy ti ñaybaatigixy miid Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxíci ma je' ydiscípulos ajcxy

³⁶ Jiiby anajty ajcxy tzachnimíydaaccixy co Jesús oy ñayguëxgyii ma je' ajcxy. Chi ytinay'ahuij cujc'amy ma je' ajcxy, chi ymínañ:

—Jotcugi' miich ajcxy.

³⁷ Chi je' ajcxy ooy ñay'adzigiyi ooy huinmaangixy, hue' ajcxy tijy ijxmañiyb. ³⁸ Chi Jesús nimay je' ajcxy:

—¿Na'amy co mjot mhuinmañ ti ytigoydaangixy? ¿Nej co m'aa'ájtigixy mjot'ájtigixy pin ñich? ³⁹ Ijxcix mi-ich ajcxy ñich ngi' ñich ndecy, ñich jeni ñich. Nídongich etz ijxcich ajcxy. Tüg espíritu ca' miidity chüch ni ypajc, jadu'n nej m'ijxcixy ñich nmíidity.

⁴⁰ Co Jesús jadu'n ymínañ, chi ajcxy yaj'ijxy yci' ytecy.

⁴¹ Per ca'ni ajcxy mibijcy miid co anajty ajcxy chachjotcújcity, chi Jesús ajcxy nimaayí:

—¿Miid ajcxy ti ii mgayipy?

⁴² Chi ajcxy moy Jesús acxtzäy, etz tüg jiidy serpäg.

⁴³ Chi cöbijcy, chi ycaay y'uucy jim ma je' ajcxy yhuindu. ⁴⁴ Huin'it Jesús ymínañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty miid'ijtcixy, co copicy nguy-undähuibich jadu'n nej yjaybétyity ma je Moisés ñecy je jëcyip, etz jacjadyii Dios y'ayucnajzcapxiybi ñecy, etz yí salmo necy.

⁴⁵ Huin'it je' ajcxy yjot yhuinmañ ymiñ ymejch, jaydëbi huinjihuñiygixipy huidi jaybétyip. ⁴⁶ Chi Jesús yjacmínañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugig xi, maabi anajty y'ögy. ⁴⁷ Huen ajcxy yajcapxhuäcxy Dios ytiy'ajt huindu'my naaxhuiñ, chondägip Jerusalén, co ooy ycopícyity huen jäy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuñiygixy.

⁴⁹ Jadachambi nguexipyich ma miich ajcxy je huidi nDeedyich ti xyaj'ahuaníygixy. Huim'gix ya Jerusalén ixti cooni ajcxy xyñidigihuij xycödígihuij je Dios yjihuiñ ymic'ajt huidi tzonam tzajpjoty.

Jesús ypa'ttigihyñ tzajpjoty

⁵⁰ Huin'it xi Jesús miid tzoñ je' ydiscípulos ajcxy, chi ajcxy yajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios miid je ymigügtijc ajcxy ycíxpi. ⁵¹ Chi jadu'n yjajty ma anajty Dios mibijctzoy miid yí' ajcxy ycíxpi, chi abicy yajhuimni je' ajcxy e je' ypättigihyñ jiiby tzajpjoty. ⁵² Chi yí' ajcxy jim yjac-huäcxijpy Dios ojadajtcixy. Chi ajcxy yhuimbijttaayñi jim Jerusalén janch jotcujc. ⁵³ Chi ajcxy jabom jabom anajty ñéxcixy ma Dios ytiyc chajpcapxy-capxcixy, ojadajtcixy jäymejtzcixy yí Dios, janch jadu'n jada. Amén.

SAN JUAN

Dios y'ung huidibi y'oy ya naaxhuiñ yejci Dios y'ayuc tiy'ajt

1 Co naaxhuiñybi oga'n chondacy jiiyim anajty Dios y'ung, e yí' yajnejhuiñy jäy ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. 2 Je' tim oga'n'aty anajty yajpatp ma Dios. 3 Tüg'óciy huidijaty yaj'ixp yajpatp ya naaxhuiñ, yí' yaj'oyiday yajcojtay. Tüg'óciy huidijaty Dios yajcojy, tú'ciy ytuñ mïd y'ung. 4 Dios y'ung yí' jugy'ajtyejctayb ma tüg'óciy naaxhuiñyjäy. Mïd co jugy'ajtyejctäy ma tüg'óciy naaxhuiñyjäy, je' je' tiy'ajt co Dios y'ung ymïd Dios ymic'ajt. Jadu'n nipaady nej tüg' jïin huidibi jäy codiicxp. 5 Ya naaxhuiñ yajpaady anii. Yí' anii jadu'n yí' nej coodzpi. Yí' Dios y'ung ti mimiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jäy yjot yhuinma'ñ nej tüg' jïin ytiicxy agoodztuuyb. Yí' anii ca' ñaygodigiyii mïd Dios ytiy'ajt.

6 Ma'xung'ajt tüg' yëdyjc huidibi Dios anajty ti yajnibi-cy. Hue' anajty yxii Juan. 7 Yí' oga'n tiy'ajt yejci co Dios ymic'ajt etz ytiy'ajt yajpaady ma Dios y'ung, jigix tüg'óciy je jäy ajcxy camibijctähuipy je Dios y'ung. Dios y'ung jadu'n nipaady nej tüg' jïin huidibi codiicxp ma jäy ytüyöy. 8 Je Juan ca' je' anajty yjējity je Cristo, je huidibi capxhuäcxp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. 9 Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymïd, je janchypí, ma jëb tüg'óciy jäy ya naaxhuiñ patcixy Dios ytiy'ajt.

10 Je Dios y'ung ya anajty yhuidity naaxhuiñygyxy. E jada naaxhuiñ yí' yaj'oyiday. E may je naaxhuiñyjäy ca' ajcxy ijxajpy. 11 Je ymīgügtijc, je judiojäy, je' ajcxy nimi-ini, e may ajcxy je ymīgügtijc ca' ajcxy ycöbjiçí.

12 Tüg'óciy je jäy ajcxy pinjaty mijpidac yí' yxii yí' ymic'ajt, yí' ajcxy yajmoy Dios ymic'ajt, e jadu'n nipaty nejjiñhuñy ajcxy Dios y'ung'adyii. 13 Canan hue' je' co naydijiiyb Dios y'ung co ti yma'xung'aty jadu'n nej jäy ajcxy y'ocma'xung'aty. Nañ ni ca' yjadu'nity nej jäy tijy, nej jäy jijp'ixy, ni canan jäy jadu'n ti huinmay. Hue' janchtiy Dios jadu'n ti huinmay.

14 Je Dios y'ung ya naaxhuiñ je' yma'xung'ajty mïd ñinicx etz chinay mïd naaxhuiñyjäy. E ñich ajcxy n'lijich yí' y'oy'ajt etz ymic'ajt, jadu'n nej Dios Teedy y'ung tüg'pajc oy'ajt etz mic'ajt mïdity. 15 Juan ñidiy'ajt'ajt je Dios y'ung, e chi capxpidzimy, e jadu'n ymïnañ:

—Jada je' je jäy huidibi ñich jadu'n nimiyaacich ma miich ajcxy. Je huidibi miimb jac'axam ma ñich, jac

mic'ajt mïd yí' ca'ydi ñich, com jacjaytjy yí' jugy'ajt paty ca'ydi ñich.

16 Je Dios y'ung oy xychojcm xyjihuiñyim mijcajee, paady je' tuuñ may'ajt oy'ajt mijcajee mïd ñich ajt ycix-pí. 17 Com Dios y'ané'min ycötujcin micpi hue' Dios yaj-niguejx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ mïd je jäy ajcxy ycixpi, e nañ je' ytiy'ajt yajniguejx je Jesucristo. 18 Je Dios ni caminaabi pin ca'ixyñi, je y'ung tüg'pajci yajpatp ma Dios Teedy ity. Je Dios y'ung ti xyajnejhuiñyim nej Dios yajpaady.

Juan el Bautista je' tiy'ajt yejci Jesús je' anajty Dios y'ung

19 Jadaabi je' je' tiy'ajt huidibi Juan yejci, co judío jäy ajcxy quejxy nijējity teedytjic etz tzajptjic tungmïdpi. Jim ajcxy chooñ Jerusalén nicxy ma anajty Juan yajpaady, chi ajcxy y'amidooy:

—¿Mbin miich? ¿Nej miich je' je Cristo huidibi Dios yquexamy?

20 Je' ñigapx je tiy'ajt, ca' ñaygoyützi, chi ymïnañ:

—Ca' ñich njējity je Cristo.

21 Chi ajcxy jac'amidooy:

—¿E pin miich mneydijyii? Pen ca' mjējity je Cristo. ¿Nej miich je' je Elías?

Chi Juan y'adzooy:

—Ca' je' n'ñichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

22 Chi y'amidooy ajcxy jadüg'oc:

—¿Mbin miich? Jigix ñich ajcxy tiy'ajt nyajñicxibich ma yí' tiibi ñich ajcxy xyquexyich. ¿Ti miich nayxñgoyäxyii?

23 Chi Juan ymïnañ:

—Ñich je' je jäy huidibi Dios y'ayuccapxhuäcxpi ma tüg' mijtig'ëduum, tim jadu'n nej jiiby jaybety ymïiñ ma Isaías ñecy, nañ tim jadu'n ñich nmïna'ñich co copicy nayñi'ixñiyigix ma yí' mjot yí' mhuinma'ñ, jëbi naybáatigixy mïd mHuindzin Dios. Jadu'n nej jäy ixypiy tü'aa yaj'oyy co tüg' huindzin ymiinañ.

24 Je teedytjic etz tzajptjic tungmïdpi huidibi oy migapxy Juan, hue' anajty ajcxy fariseojäy ti yquexyii.

25 Chi ajcxy jactim'amidooy Juan:

—¿Ti miich co mjäyayñibety? Peni ca' miich mjējity je Cristo, ni mgajējity je Elías, ni mgajējity huidibi Dios y'ayuc najtzcaxpiyip.

²⁶ Chi Juan y'adzooy:

—İich hue' jäy nyajni#betyich mïid ni. Ya naaxhuiñ ji tüg jäy huidibi miich ajcxy ca' m'ixy'adyii. Je' huidibi jac'axam mimb ma ïich, je' huidibi ca' mihuaadity nicxy yi' xytumbi'adyiijich, nicxyich ycighuin nguejich.

²⁸ Jadu'n ytuni yajti jim Betábara, jim'amy ahuin ma Jordán mij ni, jim anajty Juan jäy yajni#bety. Juan tiy'ajt yejc co Jesús je' anajty yjugy'ajt yegam mïid ïich ajt nbocy ycixpi.

Jesús nayyajhuindzigïhuaanip ma Dios mïid jäy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan nimay je jäy ajcxy:

—Cha je' ymiñ je Dios yjäy huidibi Dios nayyajhuindzigïhuaanip mïid naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzigïy mïid ypocy ycixpi. ³⁰ Jada je' huidibi ïich nnigapxypich co jac'axam ymiina'ñ ma ïich tüg yëydijc huidibi nigti Dios ymic'ajt y'oy'ajt mïidity ca'ydi ïich. Com jiiyim anajty yi' yjugy'aty co oga'n naaxhuiñybi chondacy. ³¹ Oy ïich anajty ca' yi' n'ixy'adyiijich huingxy jijpcxy, nyajni#bejtich jäy, jigix yi' judíojäy nejhuñhuip ajcxy co ji yajpaady je Cristo je' huidibi Dios ymic'ajt mïid.

³² Chi Juan nigodiy'ajt'ajty je Cristo co ymiina'ñ:

—İich ti n'ixyich yi' Espiritu Santo jiiby choñ tzajpjoty, jadu'n yquëxigy nej tüg muuxy, e chi y'ixtacy ma Jesucristo. ³³ Tiydudägy ca' ïich anajty n'ixy'adyiijich. Je' Dios huidibi xyquejich jäy yajni#bejtpi, je' ïich anajty jadu'n ti xyñimäyich co je jäy ma anajty n'ixyich je Espiritu Santo ñigidägyii anajty etz yhuim'y ma je'. Je' je' jadu'n anajty huidibi y'adigïhuipy yjottigïhuipy Dios yjihui'ñ ymic'ajt ma je jäy ajcxy. ³⁴ Cham nnigapxpetyich co ïich ti n'ixyich je jäy, e nyejcpyich tiy'ajt co je' je' je' Dios y'ung.

Jesús yhuin'ijx nijëjity jäy huidibi anajty ydiscípulo'andaanipy

³⁵ Chi je com jabom jopy jim anajty Juan yajpaady mïid metz jäy huidibi ixpijcp ma yi'. ³⁶ Chi anajty ajcxy tzachhuindicxy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhuñygyix, cha je jäy huidibi Dios nayyajhuindzigïhuaanip mïid naaxhuiñyjäy ypocy ycixpi.

³⁷ E je metzpi jäy huidibi anajty ajcxy ixpijcp ma Juan, co jadu'n ajcxy midoy nej Juan ymiina'ñ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicxy, e chi ajcxy ijxy ma anajty ti yja'ttägy. Je' huin'it xïmbi chi jim je' mïid yhuim'y, com mijminacyxi anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip huidibi nimetz ajcxy midou jadu'n nej Juan ymiina'ñ, etz je' anajty ajcxy ti padzooñ Jesús. ⁴¹ Chi jada' Andrés oy ixtäy y'uch Simón tim jayijp, chi nimay:

—Ti ïich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés mïidnicxy Simón ma Jesús, e chi Jesús huindicpejty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choñ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je' cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxi Natanael, chi jadu'n nimay:

—Ti ïich ajcxy je' nbaadyich je jäy huidibi yajni#gapxp yajnimiydaccp ma Moisés ñecy, etz yi' Dios y'ayucnajtzcaxiybi ñecy. Yi' je' je' Jesús, José y'ung huidibi cogajpity jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäyi? Com ac jadu'n jäy ymiina'ñ co ac jibicjäydijc jim tzinaayb.

Chi Felipe ymiina'ñ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n ymiina'ñ:

—Cha tüg judíojäy huidibi ca' pin huin'iniipy.

⁴⁸ Chi Natanael ymiina'ñ:

—¿Nej miich ti xy'ijxcapyich pin jäy ïich?

Chi Jesús nimay Natanael:

—Ca'ni anajty Felipe xyñimaayñi: “Jam ijxim je Jesús” co anajty miich jiiby'emy ma je higueri quipypa't, huin'it ïich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Mïid co ti nnimäy co jiiby'emy anajty miich ma je higueri quipypa't co ïich miich ti n'ijxcapy. ¿E ti mdim-janimibicy? Jactimmijhuinma'ñ etz jactimmij'oy'ajt m'ix-amyb mbadamyb.

⁵¹ Chi Jesús jadu'n ymiina'ñ:

—Janch tim tiy ïich miich ajcxy yam jadu'n nimäy co m'ixipy ajcxy yi' tzajp y'ahuäch etz Dios y'ángeles ajcxy choñ tzajpjoty xyñigidägyich, e ypa'ttigiygixy jadüg'oc tzajpjoty. Choongixy yja'tcixy ma ïich je jäy huidibi tzoon tzajpjoty.

Jesús y'oy ma anajty jäy nixïduñ tüg pijcin jim Caná

2 Midugigxibi anajty maabi ajcxy Jesús minaymigapxigixy, ma je cajp huidibi yxi Caná ma je Galilea naaxjot jim anajty huinxidungixy tüg jäy

huidibi anajty ti ypicý. E jim anajty nañ jadu'n Jesús ytaj. ² Chi Jesús mïd je' ydiscípulos ajcxy yajhuooy jim ma je xii anajty ytuñyii yjadyii. ³ Ti anajty vino ycjix-taayñi, huin'it Jesús ytaj ñimayñi:

—Ca'p ajcxy mïdiñ vino.

⁴ Chi Jesús y'adzooy ytaj ñimay:

—Ca' ti jotmay nmïdidyich mïd miich töxyäy. ñich nhorí ca'ni paady mina jäy ajcxy nyajnejhuñhuibich pin ñich.

⁵ Chi je ytaj ñimay je tumbidijc ajcxy:

—Mdúngxixipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty nii y'ity. Je nii anajty ajcxy yajtumyb co anajty ajcxy ycïbujcixy jadu'n nej ypocy ixpujicixy, jadu'n anajty ajcxy judíojäy costumbre mïdity. Tügpi tzaadu'tz ymïd anajty yjot metz majt tugig majt nii. ⁷ Chi Jesús ñimay je tumbidijc ajcxy:

—Yaj'ujtzicix yi tzaadu'tz mïd nii.

E chi ajcxy yaj'ujtzitay mabaat y'a'ujtznaxy je tzaadu'tz. ⁸ Chi Jesús yminañ:

—Yajpidzimigix cham yi nii, e yajnicxcix jilby ma huidibi ane'mb ma yi caydac uctac.

Chi ajcxy yajnicxy je nii. ⁹ Co jada' je ane'mbi jihuïy-majch je nii ti anajty yvinocojy, chi mijhuoy je yëdijc huidibi anajty ti ypicý. Je ane'mbi ca' anajty nejhuïy ma anajty je vino ti choñ. Jëyi anajty je ytumbidijc ñejhuïyb co nii anajty ajcxy yajpidzimigixy ma je tzaadu'tz. ¹⁰ Chi je ane'mbi ñimay je huidibi anajty ti ypicý:

—Tüg'óciy jäy ajcxy huidibi xïdumb, hue' ajcxy yajtumyb jayjip je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mijhuinma'ñ huidibi Jesús ytuun jim Caná ma Galilea ñaaxjot. Chi yajniguëxigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹² Co jadu'n tüg'óciy ytuni yjajti, chi Jesús y'idacy jim ma je cajp huidi yxii Capernaum mïd ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³ Tim huingon anajty je pascua xii huidibi judío ajcxy ytumy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huidibi anajty ajcxy ajuuybi adoocpi, jadu'n nej ma ymiiñ huaj, borregi, etz muuxy (huidibi jäy ajcxy Dios yajhuindzigiiyb). Nañ jim meeñy-huingogombidijc anajty ajcxy y'ñaaaygixy ma ymesa. ¹⁵ Chi Jesús yaj'oyii tüg cochac huojp. E chi ixhuojp-pidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meeñyhuingogombidijc ymeeñ cöxijtnajxtayi, e chi ymesa tijhuimbijttaayi. ¹⁶ Chi ñimay je muuxytoocpidijc ajcxy:

—Yajpidzimigix jada muuxy ya. Ca' ñich nDeedy ytijc yhuaaní ajcxy ajuydac adoocac.

¹⁷ Je' ajcxy huidibi anajty Jesús yaj'ixpijcpy chi ajihuïy-gooti ajcxy je ayuc, jadu'n nej jaybety ymiñ ma Dios

ñecy: “Ooy ndzocy njihuïyich Dios ytijc, paady ooy nni-jottigoyich Dios ytijc.”

¹⁸ Chi je judío ixpicityjic ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tüg ijxpejt, pen janch mïdity cötujcín co m'ixhuojp-pidzimday yi ajuuybi adoocpi ajcxy?

¹⁹ Chi Jesús y'adzooy:

—Yajhuindigoogyx jada Dios ytijc, e codugiiig xii ñich yi' jadüg'oc nyajpidigipy.

²⁰ Chi jada' je judío ixpicityjic ajcxy y'adzooy:

—Huixchiguipx tudujc jimijt yhuäcxijpy co jäy cojy jada Dios ytijc. ¿E miich tijy myajpidigamy codugigxiiji?

²¹ Per ca' je' anajty nigapxy je Dios ytijc. Hue' je' anajty c'i'm ñayñigapxyii co anajty y'öga'ñ, etz co yjuygypigipy jadüg'oc codugiiig xii. ²² Chi jada' co Jesús yjuygypijcy codugiiig xii maabi anajty y'ögy, je huidibi anajty ajcxy ti yaj'ixpicý, ajihuïygooti ajcxy huidibi Jesús anajty ti yajnimäyiiigixy. Chi jada' ajcxy mibijcy ooy jadu'n nej anajty ycojaayty ma Dios ylibro, etz com nañ jadu'n anajty Jesús ti ymina'ñ.

Jesús ñejhuïy nej jäy ajcxy yjot yhuinma'ñ mïdity

²³ Co anajty Jesús yjimity Jerusalén pascua xijoty, mayjäy ooy ymibijci co ajcxy ijxy je mijhuinma'ñ huidibi anajty ytumyb. ²⁴ Jesús ca' anajty yjaty ñaygyeygyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuïydaayb anajty nej jäy ajcxy nidüg nidüg yjot yhuinma'ñ mïdity ca' tzocy pin yajnimähuïyb ti anajty ajcxy ytunamy, com ñejhuïydaayb nej jäy ajcxy yjot yhuinma'ñ mïdity.

Nicodemo oy ytiy'ajtpicy ma Jesús

3 Jim anajty tüg yëdijc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtpy ma je judíojäy ajcxy ymiiñ. ² Chi jada' Nicodemo ymiñ coodz ma Jesús anajty y'ity, chi ñimay: —Huindzin, nejhuïyb ñich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt mïdity.

³ Chi Jesús y'adzooy:

—Janch janch ñich miich yam jadu'n ñimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tiibi ymij'anäcciiyñi y'ocni-ma'xung'ajttigajtpity jadüg'oc? ¿Nej jëbi jadüg'oc ytigiy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ñich miich yam jadu'n ñimäy pen ca' jäy yjothuimbity etz ñibety, pen ca' Dios yjihui'ñ ymic'ajt y'adigiyii yjottigiyii, ca' jëbi ytigiy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymïd ajcxy ñinicx yjugy'ajtin. Je jäy ajcxy huidibi Dios yjihui'ñ ymic'ajt adigiiyipy jottigiiyipy ymïd ajcxy Dios yjugy'ajtin. ⁷ Ca' nej mnayjihuihuïyb co ti ñimäy co copicy mma'xung'adipy huinjemy, co Dios yjihui'ñ ymic'ajt xy'adigiihuipy xyjottigiihuipy. ⁸ Com je poj miinhyb

hueñytimyma'amyty, e nmidoohuim co y'a'ich, e ca' nnejhuñyim ma choñ e ma ñicxy. Jadu'n nej je poj ypo- jy e nganejuñyim ma choñ, nañ tim jadu'n yjaty miid je Espiritu Santo, ca' nejuñyim nej yjaty co adigñy jot- tigñy jäy.

⁹ Chi Nicodemo yajtiñhuimbijty:

—¿Nej tijy co yjadu'nity? Ca' nhuinñihuñyich.

¹⁰ Chi Jesús y'adzooy:

—Miich huindzin'ajtp ma yi judíoñy, ¿ti co ca' mhuiñ- jihuñy jadayaabi tiy'ajt? ¹¹ Janch janch ñich miich yam jadu'n nnimäy co ñich etz nDeedich ngapxyp yi huidibi nejuñyigixypich, e nyejcpyich ajcxy tiy'ajt yi huidijaty ñich ti n'ixcixyich. Miich ajcxy judío ixpicytjic ca' ajcxy mgöbijccixy ñich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiy- dägbich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ñich je jäy tügpajc huidibi ti ndzoñich tzajpjoty, ti ngidägyich ya naaxhuiñ.

¹⁴ Jadu'n nej Moisés yaj'oyiy je pujx tza'ñ, e chi yajcru- udzpety jim mijtigduum jigix chögipy je jäy ajcxy ma je ahua'n iyujc chüxyii. Nañ tim jadu'n jäy ajcxy xya- jruudzpeda'ñich. ¹⁵ E tüg'öciy jäy ajcxy pinjaty xymijpi- daacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuñy yi naaxhuiñyjäy

¹⁶ Ooy mijcajee Dios tzocy jihuñy yi naaxhuiñyjäy co yecy y'ung tügpajcpi miid jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücciyi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy.

¹⁷ Dios ca' quejxy y'ung ya naaxhuiñ co tzaachytunipy yi naaxhuiñyjäy ajcxy miid ypocy ycixpi. Paady y'ung quejxy co yajpocyñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy miid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocy- cähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjäy miid ypocy ycixpi, com co Dios quejxy y'ung miid ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jñn huidi codiicxip jäy ajcxy ma chinaayin yjugy'ajtin. Per ca'p ajcxy je naaxhuiñyjäy mijpidacy je jñn, jadu'n nej jihuñy ajcxy anajty yjacjotcu- jcity co chinaayigixy agoodztuuyb, com je' co ñigi tzachnijot'ajtcixy jibic-huinma'ñ. ²⁰ Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuñy ca' chinähuaangixy ma jñn ytiicxin. Ca' ajcxy y'amidoo'idani Dios y'ayuc, ca'ydi ñiguëxgy je jibicpi huidibi ajcxy ytumy. ²¹ Je jäy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuñy jñn nimiingixy ma ytiicxy, huen jatyimy niguëxgy co oy ytungixy etz co Dios ytiy'ajt ajcxy miidity ma yjot yhuinma'ñ.

Juan (el Bautista) tiy'ajt yejc ma jäy ajcxy miid Jesús ycixpi

²² Co jadu'n ytuni yjajti, chi Jesús ñicxy jim Judea naaxjot miid ydiscipulos ajcxy. Chi ajcxy jim yhuäcxijpy. Jim ajcxy jäy yajnñbejty. ²³ Nañ jadu'n Juan anajty yjäyayñibety jim Enón, com jim anajty ooy comñi, e jim anajty jäy ymingixy etz ññbejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxti- goty.

²⁵ Ca' ajcxy ñay'ayuc-huinñihuñyi nijëjity huidibi anajty Juan yaj'ixpjcyp etz tüg jäy nej jëbi huaad ypocy ñayyajnihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty miich jim miid jim'amy Jordán mijñinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäy- yañibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt miidity, pen ca' Dios ni ti mic'ajt ymöy. ²⁸ Miich ajcxy mnejhuñyb co nmínaañich co ñich ca' njëjity je Cristo. Hue' janchtiy Dios xyque- jxich jayjyp co nnidiy'ajt'adipyich je Cristo. ²⁹ Co jäy ypi- cy je yëydijc je' je' miid'idam je ytöxyjic. E je töxycapxpi huidibi ti yaj'oyty je pijcin, ca' je' miid'ida'ñ je töxyjäy, jëyi co yjotcugñy co yöcmidoohuñ je töxyjäy ñay co yjädy ma je' ytjic co ypigaani. Cristo jadu'n je' nipaady nej tüg töxyjäy ñay, e je töxyjäy jadu'n je' nipaady nej Dios yjäy. Je Cristo ymiid'idaanipy Dios yjäy. Jadu'n ñich nipaady nej tüg töxycapxpi, ti Dios yjäy nyajni'ixyich jigix mijpidáaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimy- copicyty co Jesús ymij'ajt paatñipy, e ñich ndung ycijxnipy ymayñipy.

Dios y'ung tzoon jiiiby ma Dios

³¹ Chi Juan yjacmínañ:

—Je Cristo huidibi jiiiby tzoon ma Dios jacmij ixpjcjin miidity ca'ydi naaxhuiñyjäy ajcxy. Je jäy ajcxy huidibi ya naaxhuiñ ijtp, ymínaaxhuiñyjäy ti yaj'ixpjcigixy, e je' ajcxy ñidiy'ajt'ajtpy je naaxhuiñyjäy y'ixpjcjin. Je Cristo tzoon jiiiby tzajpjoty, jacmijcajee yi' ma y'ayuc ytiy'ajt ca'dyi pin. ³² Je Cristo ñigapxyp huidibi ti ixty e ti mi- dooy, e yi'y'ayuc ytiy'ajt ca' jäy ajcxy cöbigaangixy. ³³ Je jäy ajcxy huidibi cöbijcp Dios y'ung y'ayuc ytiy'ajt, je' ajcxy nigapxpejtyp co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt nigapxpejti, com Dios ti möy yi' y'ung yi' yjihuññ ymicc'ajt mijcajee. ³⁵ Dios Teedy chojcyp yjihuiñyb y'ung, e tüg'öciy ymicc'ajt ytiy'ajt yi'ti yajmigo'ixiidyäy. ³⁶ Je jäy ajcxy pinjaty mibijcp Dios y'ung, ymiid'ajtpy ajcxy y'alma je ju- gy'ajtin huidibi ca' ycixy ytigooy. Je jäy ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je yi' ypaadipy ajcxy Dios chip y'ejcin.

Jesús ñaybaati m̄id t̄ug t̄oxyj̄ay j̄im Samaria

4 Chi je Huindzin Jesús ayuc midoy jadu'n nej anajty je fariseoj̄ay ajcxy ycapxcixy ymiydaaccixy co je Jesús jacmayj̄ay anajty yaj'ixp̄icy etz yajniibety ca'ydi Juan. ² Oy Jesús ca' anajty j̄ay yajniibety c̄'m. Hue' janchtiy je' ydiscipulos anajty ajcxy j̄ay yajniibejtp. ³ E co Jesús jada nejhuiy, chi j̄im Judea chon̄i, yhuimbijtni j̄im Galilea.

⁴ Co yhuimbijty, hue' anajty yjatytymyñax̄ihua'ñ j̄im Samaria. ⁵ Chi jada' yja'ty huingon ma je mij cajp huidi x̄ij̄ip Samaria, j̄im ma anajty t̄ug pi'ccaajp huidi x̄ij̄ip Sicar, m̄ihuingon je naax huidibi Jacob anajty ti möy y'ung José. ⁶ J̄im anajty Jesús yajpaady ma je Jacob ñi-gondac. Com ti anajty Jesús y'anucx̄iyñi m̄id je t̄uyöȳi, chi y'ijxtacy j̄im ma je ñigondac anajty. Hue' anajty x̄i j̄im cuḡihuaanip. ⁷ Chi j̄im yja'ty ñigombi t̄ug t̄oxyj̄ay. Chi Jesús yminañ:

—İch yajni'uucc. ⁸ Com je' ydiscipulos ajcxy huidibi anajty Jesús yjaym̄id'ajt̄ip, ti anajty ñicxcixy cajpjoty ju-uyb pījcp.

⁹ Chi je t̄oxyj̄ay y'adzooy huidibi anajty cogajp̄ip Samaria:

—¿Na'amy co ñich ñi xyp̄ijctzoohuich? com miich hue' miich judíōj̄ay, e samariaj̄ay ñich.

(Co ȳi judíōj̄ay etz samariaj̄ay ca' ajcxy ñaygodiḡiyi-igixy.)

¹⁰ Huin'it Jesús y'adzooy:

—Co ixyp̄i m'ocnejhūy je oybi huidibi Dios yejcyp m̄id miich yc̄xp̄i, e m'ocnejhūy ixyp̄i nañ jadu'n p̄in xyp̄ijctzoohuip̄y ȳi ñi, janch co miich ixyp̄i xyñim̄ayich: "İch yajni'uucc". E ñich miich ixyp̄i nmooyb ñi huidibi jugy'ajt yeḡip̄y huinix̄i.

¹¹ Chi je t̄oxyj̄ay y'adzooy ñimay Jesús:

—Huindzin, miich ca' mm̄idity ti m̄id myajp̄idzimip̄y ȳi ñi, e ȳi ñijut c̄icy ȳi' ooy. ¿Ma tijy m'ocpada'ñ ȳi ñi huidibi yajjugy'ajtp? ¹² ¿Nej jacn̄iḡi tijy miich mij mnayyajnax̄yii, ca'ydi ñich ajt n'ap ndeedy Jacob? Je'je' huidibi jada ñigop yaj'oȳiy. Jacob etz y'ung y'an̄ag ñi'uucc ma jada ñigop, e nañ jadu'n yajni'uucc yhuaj y'iyujc ajcxy ya.

¹³ Chi Jesús y'adzooy ñimay je t̄oxyj̄ay:

—T̄ug'óc̄iy p̄injaty ñi'uuccp ma jada ñigop tidz̄i hūib ajcxy jad̄ug'oc. ¹⁴ Ȳi j̄ay ajcxy p̄injaty ñi'uuccp huidibi nmooybich, ca' ni m̄ina yt̄idz̄ihūiyb, com hue' ȳi ñi huidibi nyejcyp̄ich, ahuimbip̄y ma je j̄ay jadu'n nej t̄ug ñigop huidibi yegam jugy'ajtn̄i huidibi ni ca' yc̄ixy ytigoy.

¹⁵ Chi je t̄oxyj̄ay y'adzooy:

—Huindzin, ñich mooyg ȳi ñi, ca'ydi jabom jabom ndidz̄yij̄ich, e ca'ydi n'ocjacm̄inibich ma jada ñigop ñi yajp̄idzimb̄i.

¹⁶ Chi Jesús y'adzooy:

—N̄icx yajtzon m̄ñay, e m̄id miin.

¹⁷ Chi je t̄oxyj̄ay y'adzooy:

—Ca' nm̄ididyich n̄ñayich.

Chi Jesús y'adzooy:

—Janch tiy'ajt jadu'n nej miich m̄ina'ñ, co ca' mm̄idity m̄ñay. ¹⁸ Com ti m̄iddzin̄ay migoox ȳeydj̄ic, e huidibi cham mm̄id, ca' m̄ñay'adyii. Janch tiy'ajt jadu'n nej ti m'adzooy.

¹⁹ Chi je t̄oxyj̄ay yminañ:

—Huindzin, cham nhuin̄ihūyich co miich je' t̄ug huidibi Dios yhuij'ajt ycujc'ajt m̄id. ²⁰ İch ajcxy n'ap ndeedyich hue' je' yminañ co j̄ebi ya huaad ñich ajcxy nDios'ojad̄ajtcixyich ma jadyaabi huingombi copj̄ip. E miich ajcxy judíōj̄ay yminaangixy co j̄im Jerusalén je' ma huaad j̄ebi nDios'ojadajtm̄, ca' jac ma.

²¹ Chi Jesús y'adzooy ñimay je t̄oxyj̄ay:

—T̄oxyj̄ay mijpid̄ag ñich n'ayuc. Co ypadamy je x̄i je tiempo co ni ya ma miich ajcxy mDios'ojadajttac, e ni j̄im Jerusalén j̄ay ca' ojadad̄ip̄y ajcxy ȳi Dios Teedy.

²² Miich ajcxy ca' tiy'ajt mnejhūiygixy nej j̄ebi huaad mDios'ojad̄ajtcixip̄y. İch ajcxy judíōj̄ay nejhuiybich ajcxy je tiy'ajt nej j̄ebi huaad nDios'ojadajtm̄. Com t̄ug judíōj̄ay je huidibi yajni'dzooct̄ahuam je j̄ay ajcxy y'alma ma Dios. ²³ Ypadamy je x̄i je tiempo, e jada j̄edu'n je tiempo co je huidibi ajcxy tiydud̄agy Dios ojadajtp, y'ojadad̄ip̄y ajcxy Dios m̄id oyjot oyhuinma'ñ etz m̄id Dios ytiy'ajt. Com ȳi Dios Teedy y'ixtaayb ȳi jadu'mbi j̄ay huidibi ojadad̄ib̄ m̄id oyjot oyhuinma'ñ. ²⁴ Dios ca' ñin̄icx m̄idity, jadu'n je' nej poj ca' yaj'ixy. Je j̄ay ajcxy p̄injaty ojadajtp Dios, cop̄icy co huen ojadajtcixy m̄id tud̄agyjot tud̄agyhuinma'ñ, etz m̄id Dios ytiy'ajt.

²⁵ Chi je t̄oxyj̄ay yminañ:

—İch nejhuiyb co je Mesías ymina'ñ huidibi naydi-jaanip Cristo, co je' yminip̄y, huin'it xyajni'ix̄ihuaan̄im t̄ug'óc̄iy tiy'ajt.

²⁶ Chi Jesús y'adzooy:

—İch j̄edu'n je Cristo huidibi miich m̄idm̄iydacyp.

²⁷ Chi jada' yja'ty ajcxy Jesús ydiscipulos ajcxy. Chi ajcxy ooy jihuiy ti anajty co Jesús je t̄oxyj̄ay m̄idm̄iyd̄agy, e ni p̄in ca' yaj'amidooy ti anajty chojcyp ti anajty yñim̄iydacyp m̄id ȳi t̄oxyj̄ay. ²⁸ Chi je t̄oxyj̄ay j̄im ymajt ixmajch, chi ñicx cajpjoty oy mayj̄ay ñimay:

²⁹ —Mingix, jam t̄ug ȳeydj̄ic īxim. Ti ñich ȳi' xyajni-mayd̄ayich t̄ug'óc̄iy tijaty ti nduñich. ¿Nej ca' jada' ȳi j̄ejty je Cristo?

³⁰ Chi choñ ooy mayj̄ay cajpjoty, nin̄icx ajcxy Jesús.

³¹ Yam anajty ajcxy Jesús ydiscipulos chachn̄im̄ayii adzip:

—Huindzin, occaay.

³² Chi Jesús y'adzooy:

—İch nm̄idich t̄ug caayin uucin huidibi miich ajcxy ca' mnejhūiygixy.

³³ Paady je' ydiscipulos ajcxy tzachhuinmay, ac j̄eyi ajcxy, nayñim̄ayigixy miñ x̄ip̄y:

—¿Nej ti p̄injaty yajcayyii yaj'üḡyii?

³⁴ Chi Jesús yminañ:

—Jotcujc nayjihuiyij̄ich co ti nguydunich Dios chojcin. Com ȳi' ti xyquexyich ya naaxhuñ, e nguyd̄uunibich ȳi' y'ané'm̄in. ³⁵ Miich ajcxy m̄inaangixp co jactigoy'ijtni jam̄idaax po' m̄ina cosecha nyajp̄id̄icim. Oc-huinmay miich ajcxy, ñich nm̄ina'ñich, j̄ebi nya-jp̄id̄icim ȳi cosecha cham cham. Huind̄icxcix ȳi mayj̄ay

huidibi xyñigidaacim chooñ cajpjoty. Ni'ixi' yi' ajcxy y'ity co amido'idaangixy Dios y'ayuc. Jadu'n ajcxy nipaty nej tūg' cosecha huidibi ti ymijaani, jēbi nyajpidicim. ³⁶ E pinjaty cosecha yajpidicp ypaatyp ajcxy ymuju'ñ. Nañ tim jadu'n miich ajcxy huidibi myajmibijcy yi jāy ajcxy co iich je' je Cristo, mbaadipy ajcxy jotcujc'ajtin, etz huidibi ajcxy xymibijcpich xymijpidaacpich ypadamy ajcxy y'alma jugy'ajtin huidibi ca' ycixy ytigooy. Tim jadu'n nej je jāy ajcxy huidibi niip etz huidibi cosecha yajpidicp yjotcugiiygixy miid co je cosecha ti y'ity, nañ tim jadu'n je jāy ajcxy huidi cojaay jecy'ajty jada Dios y'ayuc etz miich ajcxy jotcugiiygixy aguipxy co yi jāy ajcxy xymijpidagyich. ³⁷ Paady tiy'ajt je ayuc huidibi mi-nam: "Tūg jāy niip etz jadūg jāy cosecha yajpidicp."

³⁸ Iich ti nguexyich miich ajcxy myajmibigipy jāy huidibi ti paady Cristo ytiy'ajt ma Dios ñecy. Yi Dios y'ayuc yco-jaaybi ti möy je jāy Dios ytiy'ajt, e miich ajcxy je' mbubedipy co myajmibigipy co iich je' je Cristo.

³⁹ Mayjāy huidibi cogajpip jim Samaria ymijpidac ajcxy je Jesús co je' je' je Cristo, miid co je töxyjāy anajty ti ymina'ñ: "Ti yi' xyajnimaydāyich tijaty iich ti nduñich." ⁴⁰ Co je samariajāy ajcxy yjādy ma Jesús yhuinduu, chi ajcxy cohuaniiy huen hui'my. Chi Jesús jim yhuimiiy mejtz xi. ⁴¹ Janch mayjāy ooy nig'i mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴² Chi ajcxy nimay je töxyjāy:

—Canan jēyi co miich ti xyajnimāy iich ajcxy, paady ycixpi iich ajcxy yam nmibicyich. Nañ ti iich ajcxy yam ci'm n'amido'ityich, paady iich ajcxy nejhuüy co janch jada yjējity je Cristo huidibi yajnidzögam yi naax-huiñjāy ajcxy y'alma ma Dios.

Jesús yajtzooc tūg gobierno mijtungmiidpi ymang

⁴³ Mimejtz xiibi anajty co Jesús chooñ jim, nicxy jim Galilea. ⁴⁴ Jesús ci'm anajty ti ymina'ñ:

—Co jāy ajcxy huidibi miid Dios yhui'ajt ycuic'ajt yajpaady ma yci'mgajp, ca' pin yajmij'adyii. ⁴⁵ Co Jesús yja'ty jim Galilea naaxjot, huidi anajty ajcxy jimip agujc jotcujc ajcxy cōbijcy Jesús, com ti anajty ajcxy ijxcixy tijaty mijhuinma'ñ anajty ti tuñ jim Jerusalén xiijoty, com nañ ti je' anajty ajcxy jim y'oygixy xi'ajtpi.

⁴⁶ Chi yhuimbijty Jesús jadūg'oc jim Caná ma Galilea ñaaxjot, ma je niñ yajvinocojy. Jim Capernaum anajty tūg rey mijtungmiidpi huidibi anajty y'ung pējcp. ⁴⁷ Co je' nejhuüy co Jesús anajty ti yhuimbity Galilea co anajty ti y'oy Judea, chi ninicxy, e chi cohuaniiy co Jesús huen nicxy y'ung tzooyii hidibi anajty ogaanip. ⁴⁸ Huin'it Jesús ymina'ñ:

—Pen ca' ixypy ti m'ixy mijhuinma'ñ etz tijaty ijxpejt, ca' ixypy mmibicy.

⁴⁹ Chi y'adzoy je rey ymijtungmiidpi:

—Huindzin, tun may'ajt ninicx iich n'ung ma ca'ni y'o'cyñi.

⁵⁰ Chi Jesús ymina'ñ:

—Huimbit ma mdiic, je m'ung jugy'ajtni je'.

Chi je yēdyjc mibijcy Jesús nej anajty ti ñimāyii, chi ñicxy jadūg'oc ma ytijc. ⁵¹ Nicxnip anajty co ytumbi

ajcxy oy yjijpcobadēyii, e chi ñimaay co je' y'ung ti anajty y'agidāgy.

⁵² Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixiy cujc yxi naxy je toyii y'ixmajtzn.

⁵³ Paady je ungedeedy jihu'iñybijcy co huin'it je' jada' je tiempo co anajty Jesús ti ñimāyii: "Je m'ung jugy'ajtni je'." Chi jada' mibijcy mijpidacy Jesús miid tūg'óciy jāy huidijaty anajty yajpat ma yjiin ytijc.

⁵⁴ Je' je' je mimetzpi mijhuinma'ñ mij'oy'ajt hidibi Jesús ytun co chooñ jim Judea ñicxy jim Galilea ñaaxjot.

Jesús yajtzooc tūg jāy hidibi anajty yci' ytecy xuuxy

5 Co jadu'n ytuni yjajti jim Jerusalén anajty ajcxy judío jāy tungixy tūg mijxi. Huin'it Jesús jim ñicxy jim Jerusalén. ² E jim Jerusalén jim anajty niñ abojtzīg y'ity, mihuingon je poch aguu huidi xiijp puerta de las ovejas. Je it hue' anajty yajtijy hebreo'amy Betesda, e ymiid anajty migoox it yhuinguembetpa't. ³ Ma je huinguembetpa't mayba'mjāy anajty jim chachcōg-naaygixy; je huintzpi, cēduc tecytucpi, cēxuxy tecyx-uxyp, hidibi anajty ajcxy jim tzach'ahuijxp mina je niñ y'ocpu'xhuimbity. ⁴ Com tūg ángel anajty yhuimbety y'adijy ma je niñ abojtzīg y'ity, chi je niñ yajyūcxy. E je jāy pinjaty anajty yajijp jilby niijoty tigiiyb co je niñ yūcxy, huin'it anajty ajcxy choocixy, oy ixypy ti pa'm ajcxy tim miidity. ⁵ Jim anajty tūg yēdyjc hue' anajty ti ypa'mgōgnāy iipx majmocx tugig jimijt. ⁶ Co Jesús ijxy jim ycōgnāy, ijxcajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjāy y'adzooy:

—Huindzin, ca' nmidiyich tūg yēdyjc pin iich xypidāgipy jilby niijoty co anajty niñ y'ahuidijtcoty. E paady ycixpi co oy iich jim njamechich ma yi niñ, ti huingbi ñitigiiyñi.

⁸ Chi Jesús ymina'ñ:

—Pidīg, yajpidīg yi mmaabejt, etz tūyöychon.

⁹ Chi mic'amy choocy, chi je' ymaabejt yajpidīg ytigiiy yöybi najxpi janch mic oy. Hue' anajty tūg sábad-xi co choocy. ¹⁰ Paady je judío jāy ixpicytjic ajcxy ni-may je hidibi anajty ti chōgy:

—Hue' yam sábad-xi, paady ca' jadu'n ñigo'aducyity jadu'n nej m'idich co mmaabejt mdzimhidity.

¹¹ Chi y'adzooy je':

—Je jāy tiibi iich xyajtzōgy, yi' iich jadu'n ti xyñimāy: "Yajpidīg yi mmaabejt etz tūyöychoon."

¹² Chi ajcxy y'amidooy:

—¿Pin miich jadu'n ti xyñimāy: "Yajpidi yi mmaabejt etz tūyöychoon"?

¹³ Per je tiibi anajty chōgy, ca' anajty je' nejhuüy pin je' anajty. Com ti anajty Jesús niyōdygooyñi ma je mayjāy hidibi anajty ajcxy jim tzachajtip ma je it. ¹⁴ Chi jada' jacomjey minaybaatti Jesús jim ma Dios ytijc, e chi Jesús ymina'ñ:

—Cuentipic nej ti mdzögy, ca' ni ti bocy mjactunipy. Co pocy mjactunipy ca' yjeczyty co tim nigü jibic nicyx mjaty.

¹⁵ Chi je yëydijc ñicyx oy je' yajnimäy je judío ixpicytjic co hue' je' anajty Jesús, je huidibi anajty ti yajtzögyii.

¹⁶ Paady ycixpi je judío ixpicytjic anajty tzach'ixhuidi-jtcixy tzachpahuidijtcixy je Jesús, e yaj'ögaangixy miid co anajty jäy ti yajtzögy sábado xii. ¹⁷ Chi Jesús yminañ:

—Ñich nDeedy tumb je' cham, ca' ypooxycy, paady ycixp ñich nañ jadu'n nduñich cham ma miich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpicytjic ajcxy nigü yjacjtotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: "Dios yi' nDeedy'ajtypich." Paady ycixpi ajcxy judío y'ixpicytjic yminañ co Jesús cü'm anajty ytügñhua'ñ miid Dios.

Dios ymooy je y'ung ymic'ajt

¹⁹ Chi Jesús yminañ:

—Janch janch ñich miich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich miid ngi'mjot ngi'mhuinma'ñich. Jëbi janchtiy nduñich huidibi n'ixpxyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich.

²⁰ Com yi' Dios Teedy ooy yi' tzocy jihuñ yci'm'ung, paady xyajni'ixiydaaybich tüg'óciy yi' huidibi ytumyb. E nañ xyajni'ixihuaambich jacmijjatypi mijhuinma'ñ, ca'ydi' jada dayaabi mijhuinma'ñ nej ajcxy ti m'ixycixy nej jada pa'mjäy ti chögy, paady ycixpi nigü mhuinmayipy ajcxy.

²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamyb. ²² Com je Dios Teedy ca' je' cü'm ocyajcüyöyaani ocyajtecüyöyaani jäy ajcxy ypocy. Hue' tüg'óciy je ymic'ajt xyajcädigiydaayich co ñich ndiy-dunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajcädigiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch ñich miich ajcxy yam jadu'n nimaaygixy: Co hueñpinjäyity, pinjaty xy'amido'jtibich n'ayuc, e ymibijcyp ymijpidacyp je tiibi xyquejxyich ya naaxhuiñ, ymiid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii miid ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich miich ajcxy jadu'n nimaaygixy co yi' xii tiempo paatnipy, e cham jëdu'n ti paady, co yi' jäy ajcxy tiibi y'o'ccixy ymidohuipy yi' n'ayucich, co anajty ngapxyich, com Dios yi' nDeedy'ajtypich. Pin jäy anajty midoob n'ayucich jugypigip jadüg'oc ajcxy. ²⁶ Com yi' Dios Teedy mic'ajt miid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios ñich nDeedy'ajtypich. ²⁷ Ti Dios xymöyich ymic'ajt jëbi ndiyduñich je jäy ajcxy miid ypocy ycixpi, com ñich je' je jäy huidibi tzoön tzajpjoty. ²⁸ Ca' ooy jada

ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtiyidac, ymidohuipy ajcxy n'ayucich co ñich anajty nmigapxyich ajcxy. ²⁹ Chi ypidzimipy ajcxy ma ñaaxtiyigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi miid ypocy ycixpi.

Dios tiy'ajt yejc co Jesús ymiid anajty mic'ajt

³⁰ Ca' ni ti huaad nduñich miid ngi'mmic'ajtic ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt miid nyajcüyöya'ñich nya-jtecüyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzójcinich. Yi' ñich ndumyb nej Dios Teedy tzocy, yi' huidibi xyquejxich ya naaxhuiñ. ³¹ Co ixypy ñich cü'm nayñigodiy'ajt'adyijich, ca' ixypy miich ajcxy mmijpidägy n'ayuc ndiy'ajtic. ³² Com huingbi yi' huidi xyñigodiy'ajt'ajtpich co ñich Dios ymic'ajt nmididyich, e nejhuiybich co janch yi' huidibi xyñigodiy'ajt'ajtpich. ³³ Miich ajcxy ti mguexy je migügtjic ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin ñich. ³⁴ Co jadu'n nmına'ñich co Juan xyajnidiy'ajt'atyich co ñich je' je Cristo, ca' jadu'n nmına'ñich co ooy ycopicyty co tüg jäy xyñidiy'ajt'adipyich. Com Dios cü'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najzcapxiyi, jadu'n je' anajty nej tüg jün huidibi tiicxp jajp, e miich ajcxy tüg jaxgyi ti mxon-daaccixy miid yi' y'ayuc ytiy'ajt. ³⁶ Nigi ñich Dios y'ayuc ytiy'ajt nmididyich ca'ydi' Juan. Yi' mijhuinma'ñ huidibi ndumybich miid Dios Teedy ymic'ajt. yi' xya-jniguëxigibich co ñich ya naaxhuiñ Dios Teedy xyquejxich. ³⁷ Yi' Dios Teedy tiibi xyquexyich, yi' cü'm yejc tiy'ajt co ñich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuiñyijp maga'ixi. ³⁸ Ni ca' miich ajcxy mmidity yi' y'ayuc ma mjot mhuinma'ñ, miid co miich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiby mdijy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ ñich yi' xyñigapxp. ⁴⁰ E ca' miich ajcxy mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuiybich, nej miich ajcxy mjot mhuinma'ñ mmidity, co ca' ajcxy Dios ytiy'ajt mguyduuni. Ca' ajcxy migüg mdzojccixy mjihuiyigixy jadu'n nej Dios tzocy jihuñ jäy ajcxy. ⁴³ Ñich ti nmiiñich miid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymiñ miid yci'mmic'ajt, ca' midity Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjájtixipy nej ñich miich ajcxy xymijpidägyich, miid co ajcxy cü'm mdzachnaygömayaanigixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy mmına'ñipy co ñich miich ajcxy nxñhuaamy ma

Dios Teedy yhuinduu. Je Moisés miich ajcxy yx̄huam ma Dios, je huidibi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypiy ajcxy je Moisés y'ayuc ytiy'ajt, nañ jadu'n ixypiy ñich miich ajcxy xymijpidägyich. Com Moisés ñich y' xychachñimiy-daacich ma y' ñecy. ⁴⁷ Pen ca' mmijpidaaccixy Moisés ñecy, ca' mjájtciixipy nej ajcxy mijpidaaccixipy ñich n'ayuc.

Jesús ymoy jäy jicxy picy migoox mil

6 Co jadu'n ytuni yjajti, chi Jesús ñicxy jim Galilea mejy ninaxy, huidibi nañ jadu'n xijip Tiberias mejy. ² Janch mayjäy anajty Jesús ypanicxyii axam co anajty ajcxy ixj je mijhuinma'ñ tijaty anajty Jesús ytumyb ma mayba'mjäy. ³ Chi Jesús ypejty ma tüg cö-gop, chi jim y'ixtacy mïid je' ydiscípulos ajcxy. ⁴ Tim huingonip anajty je pascuaxiñ huidibi anajty judíojäy ajcxy ytumyb. ⁵ Chi Jesús ixj co janch mayjäy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjäy huidibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuñyb yajxon ti anajty ytunamy. ⁷ Chi Felipe y'adzooy:

—Ni ycahuaadñhuip mejtz mil peso meeñ, co ixypiy ajt n'ocjuyaanim caayin uucin, e nmöhuaanim cijp tüg'aa cijp mejtz'aa jëyi.

⁸ Tüg Jesús ydiscípulo, hue' anajty yx̄ Andrés, Simón Pedro y'uch, je' jadu'n nimay Jesús:

⁹ —Cha tüg pi'c'anäg huidibi mïid migoox cebada tza-jcaagy, e mejtz acx ung. E ni ycatiijity y' y' migooxpi tzajcaagy, etz mejtz acx ung mïid jada mayjäy.

¹⁰ Chi Jesús nimay je' ydiscípulos ajcxy:

—Yaj'ixtacta' y' mayjäy.

Mijjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy y' töxyjäydijc etz y'ung y'anäg ajcxy. ¹¹ Chi Jesús je tzajcaagy conëgy, chi yajna-jxy Dioscojuyip, chi yajnidagiiyday je jäy ajcxy huidijaty anajty jim ñaayb, mooy jadu'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscípulos ajcxy:

—Yajmujcta' ajcxy y' cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach mïid je tibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ixj je mijhuinma'ñ huidibi anajty Jesús ti tuñ, chi je jäy ajcxy ymïnañ:

—Janch jëdim jada je yëydijc huidibi Dios y'oy'ajt ymic'ajt mïid, je huidibi anajty miinam ya naaxhuiñ.

¹⁵ Co Jesús nejhuñ co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy nñhuingéxy

¹⁶ Co oy chu'ñyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigñy, ñicxy ajcxy jim Ca-

pernaum jadügpi mejypa'. E ti anajty ycoodziñyñi, e ca'ni anajty Jesús ajcxy ñihuimbidiini. ¹⁸ Chi tüg mijpoj ymiñ, chi je mejy ytiñy oy yücxi. ¹⁹ Ti anajty ajcxy ytüyöy oy migoox tudujc kilómetro co ajcxy ixj Jesús yhuingoñ ma je barco, hue' anajty ytüyöy mejyhu-ingéxy. Chi ajcxy ooy ñay'adzigiñy. ²⁰ Chi Jesús ymïnañ:

—ñich y', ca' mdzigiñyigixy.

²¹ Chi ajcxy jotcujc Jesús yajbarcotigñy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²² Je mayjäy huidibi anajty ajcxy ti yhuimñy jim'amy y'ahuin, y'ixj ajcxy co ac jëyi Jesús ydiscípulos ajcxy ytiñy ma tüg barco, e Jesús ca' anajty ti ytiñy barcojoty mïid je' ajcxy. Ac jëyi anajty ajcxy ti choongixy barcojoty. ²³ Je com jabom nijejity barco huidibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaaygixy je mayjäy mïid je Huindzin Dios ymic'ajt, huin'it co Dios mibijctzoy. ²⁴ Chi je mayjäy ajcxy ixj co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigñyday, chi ajcxy oy ixtaaygixy Jesús jim Capernaum.

Jesús ymöhuary jäy ajcxy jugy'ajtin huidibi ca' ycixipy ytiogyipy

²⁵ Co ajcxy minaybaati Jesús mejy ninaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjäy ajcxy:

—Janch janch co ñich miich ajcxy yam jadu'n ni-maaygixy co miich ajcxy xy'ixtaaybich, canan y' ycixpi co ajcxy ti m'oc'ixy y' mijhuinma'ñ huidibi ti nduñich, paady ycixpi miich ajcxy xy'ixtäyich co ajcxy nyajcay cüxyi mïid tzajcaagy.

²⁷ Chi Jesús yjacmïnañ:

—Ca' myajjotmaygojcixy y' jicxy picy huidibi cijxp ti-gooyb. Y' janchtiy mijottigooygixy y' jicxy picy huidibi xymöhuyipy y' jugy'ajtin huidibi ca' ycixipy ytiogyipy tücc'i'y. ñich miich ajcxy je jugy'ajtin nmöhuyibich huidibi ca' ycixipy ytiogyipy tücc'i'y, com ñich je' je jäy huidibi tzoon tzajpjoty, e Dios Teedy xymic'ajtmooyich, jëbi ñich miich ajcxy nmöy jugy'ajtin huidibi ca' ycixipy ytiogyipy tücc'i'y.

²⁸ Chi ajcxy nimay Jesús:

—¿Ti ñich ajcxy jëbi huaad nduñ, nej jëbi ñich ajcxy Dios xymijotcujc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ixjpejt mdunamy mïid ñich ajcxy, jëbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinma'ñ mdunamy? ³¹ ñich ajt nmij'ap nmijteedy ajcxy jecy'ajty yjicxy pijc ajcxy je maná jim ma titznaax'it. Jadu'n ymiñ jaybety ma jadu'n ymïnañ: "Dios yejcpy jicxy picy huidibi tzoon tzajpjoty."

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jñicxy picy janchypí huidibi tzomb tzajpjoty. ³³ Je jñicxy picy huidibi Dios yejcy picy huidibi tzomb tzajpjoty, je' je' je' huidibi jugy'ajtin moy je naaxhuiñy-jäy huidibi ca' ycixipy ytigoyipy tüccí'yi.

³⁴ Chi ajcxy nimay Jesús:

—Huindzin, ñich ajcxy mooyg je jñicxy picy janchypí jabom jabom huinixí.

³⁵ Chi Jesús yminañ:

—Ñich jèdu'n je jñicxy picy huidibi miich ajcxy xymöhuip jugy'ajtin huidibi ca' ycixipy ytigoyipy tüccí'yi. Co jäy ajcxy xyñimiinich, e xymijpidägyich, huin'it ca' yí' ajcxy yuböccoda'ñyíi niminaxí, e co jäy ajcxy xymibicyich, ca' yí' ajcxy ytidzihua'ñyíi niminaxí.

³⁶ Com ti ñich miich ajcxy nimäy, oy ñich miich ajcxy ti xyja'ixycixy, per ca' mibijccixy. ³⁷ Tüg'óciy pinjaty ñich nDeedy yquexyp ma ñich, xyñimibich yí' ajcxy. E pinjaty xyñimibich etz xymijpidaacpich, ca' ñich yí' ajcxy n'ixtijy. ³⁸ Canan paady ycixpi ñich ti ndzooñ tzajpjoty ngidägich ya naaxhuiñ co nduna'ñich ngi'mhuinma'ñ. Hue' janchtiy yí' ndunaamyich nDeedyich y'ayuc ytiy'ajt, com yí' xyquejxich ya naaxhuiñ. ³⁹ Yí' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yí' huidijaty xymooybich. Hue' janchtiy yí' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yí' jadu'n tzojcp co pin jäy ñich anajty xy'ixpich, e xymijpidaacpich, ymiid'adipy je' ajcxy jugy'ajtin huidibi ca' tüccí'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtni mina anajty ytigadza'ñ.

⁴¹ Chi je judíojäy ajcxy ooy yajtzibíy yajcapxíy co anajty Jesús jadu'n ti ymina'ñ: "Ñich je' je' jñicxy picy huidibi tzoon tzajpjoty." ⁴² Jadu'n anajty ajcxy chachmina'ñ:

—¿Nej ca' je' yjadaajity je Jesús, je José y'ung, je huidibi ajt ytaj yteedy n'ixy'ajtim? ¿Nej co jadu'n ymina'ñ: "Ñich ti ndzooñich tzajpjoty"?

⁴³ Chi Jesús y'adzooy:

—Ca' myajtzibíygyixy myajcapxíygyixy ac miichiy ajcxy. ⁴⁴ Ni pin jäy xycaniminipyich, pen ca' jayjcp Dios Teedy huinma'ñ ymoyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁵ Com jadu'n ymiñ jaybety ma Dios ñecy huidibi je jäy ajcxy anajty Dios ytiy'ajt miid'adipy jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijcy Dios ytiy'ajt xymijpidägibich ajcxy.

⁴⁶ Ca' ni tüg jäy ti ix yí Dios Teedy. Jèyí je jäy tügpaic huidibi ti choñ ma Dios, yí' je' ti ix yí Dios. ⁴⁷ Janch janch ñich miich ajcxy yam jadu'n nimaaygixy co pinjaty xymibijcpich xymijpidaacpich, ymiid'adipy yí' ajcxy yjugy'ajtin huidibi ca' ycixipy ytigoyipy tüccí'yi. ⁴⁸ Ñich jèdu'n je jñicxy picy huidibi jugy'ajt mooyb je jäy huidibi ca' ycixipy ytigoyipy tüccí'yi. ⁴⁹ Miich ajcxy mmij'ap mmij-

teedy yñicxy'ajti ycaagy'ajti ajcxy je maná jim títznaax-tuum'it jecy'ajty. E chi ajcxy y'o'ctay. E ni ca' ajcxy jugy'ajtin paty huinixíbi. ⁵⁰ Je jñicxy picy huidibi nni-gapxypich huidibi tzoon tzajpjoty, co jäy ajcxy jñicxy, ymiid'adipy ajcxy je jugy'ajtin huidibi ca' ycixipy yti-goyipy tüccí'yi. ⁵¹ Ñich jèdu'n je jñicxy picy huidibi ti chooñ tzajpjoty, etz ti ycidägy ya naaxhuiñ huidibi jugy'ajtin yajcp. Co jäy ajcxy jñicxy je jñicxy picy, ymiid'adipy ajcxy je jugy'ajtin huidibi ca' ycixipy yti-goyipy tüccí'yi. Je jñicxy picy huidibi nyegaamyich miid'adipy naaxhuiñyjäy ajcxy ycixpi, je' je' je' nniñicxich.

⁵² Chi je judío y'ixpijcy ajcxy ooy yaj'ayucyooñ yajcapxyooñ, ac je'yí ajcxy ñayñimäygyixy:

—¿Nej jada yèydijc tijy yí' ñinícx nñicxy'ajtim?

⁵³ Chi Jesús yminañ:

—Janch janch co ñich miich ajcxy yam jadu'n nimaaygixy, pen ca' miich ajcxy mdzüdzcixy ñich nniñicx, e pen ca' m'uuccixy ñich nni'py, ñich je jäy tügpaic huidibi tzoon tzajpjoty, ca' miich ajcxy miid'adipy yí Dios yjugy'ajtin. ⁵⁴ Com pinjaty ñich nniñicx xychu'tzip etz ñich nni'py xy'uucibich, ca' je ajcxy yjugy'ajtin ycixipy ytigoyipy tüccí'yi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuiñybi ti yhuaad'ajtni mina ytigadzipy. ⁵⁵ Ñich nniñicx janchypí jñicxy picy yí', etz ñich nni'py janchypí ügy yí'. ⁵⁶ Co yí' jäy ajcxy xymibicyich xymijpidägyich jadu'n ni paady nej jihuñy ñich nniñicx xychüdzí, etz ñich nni'py xy'uuci. Chi y'idipy ajcxy huinixí ma ñich, etz ñich n'idipyich huinixí ma je' ajcxy. ⁵⁷ Dios Teedy huidibi xyquejxich ya naaxhuiñ ymiid'adipy jugy'ajtin huidibi ca' ycixy yti-gooy. Ñich ti nbaadyich ma Dios Teedy je jugy'ajt huidibi ca' ycixy yti-gooy. Nañ mbadamy miich ajcxy jugy'ajtin huidibi ca' ycixy yti-gooy ma ñich. Co miich ajcxy xymijpidägibich, jadu'n anajty nipaady nej jihuñy mñicxy'ajtigixy ñich nniñicx. ⁵⁸ Je jñicxy huidibi tzoon tzajpjoty, e ycidacy ya naaxhuiñ co jäy ajcxy jñicxy'adyii, yajtzinähuiñb je ajcxy, ca' ajcxy yjugy'ajtin ycixipy yti-goyipy tüccí'yi. Yí' mmij'ap mmijteedy huidibi jñicx'ajtigixy je maná jecy'ajty, o'ctay ajcxy, ca' ajcxy paty je jugy'ajtin huinixíbi.

⁵⁹ Jadu'n Jesús ymiydacy jim ma je judíojäy ajcxy ñaymujctac jim Capernaum co anajty jim yaj'ixpicy.

Mayjäy ca' mijotcuyc'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcxy je huidibi anajty ixpijcp ma Jesús. Chi ajcxy capxidzimy, e jadu'n ajcxy yminañ:

—Ooy chachchipity je Jesús y'ayuc. Ca' huaad ji pin huinjihuiday.

⁶¹ Com Jesús ñejhuñyib nej ajcxy anajty yajtzibíy yajcapxíy, chi yminañ:

—¿Nej ca' miich ajcxy mijotcuyc'aty je tzip ayuc jadu'n nej cham ajcxy ti nyajnimäy? ⁶² ¿Nej xymijpidägibich ajcxy, pen m'ixpy ixipy ajcxy co anajty nba'ttigíyich jadüg'oc jilby tzajpjoty ma ndzooñich? Com ñich je' je' jäy huidibi tzoon tzajpjoty. ⁶³ Je jäy ajcxy yjihui'ñ, yí' je' ñinícx yajjugy'ajtip, e je jäy ajcxy ninícx ca' yí' ni ma chobaady, pen ca' miidíty yjihui'ñ. Co miich ajcxy

mgöbigipy yi ayuc tiibi ngapxyich, huin'it ajcxy mbaadipy Dios yjihu'iñ (je Espíritu Santo), etz mbaadipy ajcxy jugy'ajtín huidibi ca' tücc'i'yi ycixy yti-gooy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ich n'ayuc.

Com Jesús ñejhuüyb anajty jayijpni pinjaty ca' ymibi-gyii y'ayuc, etz pinjaty anajty cýegaanip ma ymidzip. ⁶⁵ Chi Jesús yjacmíñañ:

—Paady ycixpi jayijp ti nmina'ñich, co ca' ni pin jébi ich xymijpidägy, pen ca' Dios Teedy jayijp yhuinma'ñ ymöyii co cöbiga'ñ ymöyii co cöbiga'ñ ich n'ayuc.

⁶⁶ Huin'it mayjäy ajcxy, je huidibi anajty xpijcp ma Jesús, chi ajcxy huinhuäctut ixmajtzní ajcxy Jesús. Ca' ajcxy y'ocjacpanícxni. ⁶⁷ Chi jada' Jesús nimay je nima-jmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin ich ajcxy jébi huaad nmijpidägyich, com miich tügpajc miid je ayuc huidibi xyajni'ixiich ajcxy nej jébi huaad ich ajcxy nbaadipy jugy'ajtín huidibi ca' ycixipy ytigoyipy tücc'i'yi. ⁶⁹ Ich ajcxy nmibijcypich e nnejhuüybich co miich je' je jäy huidibi tsoon ma Dios huidibi huädz yhuinma'ñ ymiid.

⁷⁰ Chi Jesús ymíñañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mmidity.

⁷¹ Je Judas Iscariote, Simón ymang, anajty ytiipy. Com je' je' anajty cýegam Jesús ma ymidzip, oy je' anajty yjajéjity nidüg ma je nimajmetzpi.

Jesús y'uch ajcxy nañ ca' anajty jaty mijpidaaci Jesús y'ayuc

7 Co jadu'n ytundaayi yjajtaayi, jim anajty Jesús yhuidity Galilea naaxjot, ca' anajty ñícxan'ñ jim Judea naaxjot, co anajty yi judíojäy ajcxy huidibi midzip'ajtíp yaj'öga'ñyii. ² Tim huingon anajty je judío-jäy yxií, hue' anajty ajcxy yxiigoyäxy Tabernáculo xii.

³ Chi Jesús ñímaayi y'amigüg y'uch yëdyjcpí:

—Tzon miich ya, nicx jim Judea naaxjot nayguëxigii mayjäyjoty. ⁴ Com huenpinity huidibi nayguëxigaanip mayjäyjoty, ca' ajcxy naygoyüchyii. Mdunipy miich mijhuinma'ñ xijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy:

—Ich nxii ndiempo ca'ni paty mina ndigihua'ñich jim Jerusalén jadu'n nej je Mesías. Janch miich ajcxy oytimymínaajity jébi mnayguëxícigixy ma je mayjäy ajcxy. ⁷ Ca' huaad jébi miich ajcxy, naaxhuiñyjäy ajcxy, xymidziptzoñ. Janch ich xymidzip'ajtpich ajcxy yi', je' co ngapxpídzimyich yi yjibic-huinma'ñ huidibi ajcxy ytumyb. ⁸ Nicx miich ajcxy jim ma xii yjadyii. Ich ca' nnicxa'ñich cham, com ca'ni ich ndiempo yhuaad'aty mina ndigihuibyich jim Jerusalén jadu'n nej je Mesías.

⁹ Jadu'ñydi jéda'ajty ymíñañ, chi yhu'i'miyy jim Galilea.

Jesús ñícxxy jim Jerusalén xijoty

¹⁰ Co Jesús y'amigügtijc ajcxy jayijp ñícxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyii. ¹¹ Xijoty je judíojäy ooy ajcxy ja'ix-tay Jesús, e chi ajcxy ymíñañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapx-cixy tzachnimiydaaccixy Jesús. Nijéjity anajty ymi-naangixy: "Tüg yëdyjic oyjäybi yi"; e nañ nijéjity ymi-naangixy: "Ca'p yi' y'oyjäyity, nigo jäy tzachhuin'ññ."

¹³ E ni pin anajty ca' capxpídzimy mayjäyjoty co y'oyjäyity anajty Jesús, miid co anajty ajcxy je judío xpi-cytijc ajcxy tzachtzigiiygixy.

¹⁴ E mijxijoty Jesús ñícxxy jim ma Dios ytijc, chi jim ytigiiy yaj'ixpijcpí. ¹⁵ Je judío y'ixpicityc tzachmaañy-huindíxcixy anajty je Jesús, chachmínaangixy anajty:

—¿Nej jada' tijy jada chach'ixpicity? e ca' ni ma ti y'escuel'aty.

¹⁶ Chi Jesús y'adzooy:

—Jada xpijcin ca' ich jada njé'adyii. Yi' jada yje' je huidibi xyquejxich ya naaxhuiñ. ¹⁷ E pen ji pinjaty cuy-dunaani yi' ytiy'ajt je huidibi xyquejxich, huinjihuühipy yi' jada xpijcin, pen janch Dios yi' ytiy'ajt, o pen ich yi' ngi'm ayuc huidibi ngapxypich. ¹⁸ Je jäy huidibi yci'm'ayuc yci'mdiy'ajt miid yaj'ixpicy, ci'm je' ñaygö-maya'ñyii. Janch pinjaty tzojcp co ycömayiiy je' yhuindzin huidibi ti yquexyii, tiydudägy je', ca' je' y'anijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycixpi co miich ajcxy xyaj'öga'nich?

²⁰ Chi je jäy ajcxy y'adzooy:

—Mujcu' miich miid ma mjot mhuinma'ñ. ¿Pin miich yam xyaj'ögam?

²¹ Chi je' ajcxy nimay:

—Miid tügpajc mijhuinma'ñ tiibi nduñich sábado xii, yi' miich ajcxy mij mdzachjihuiyb mdzachhuinmaayb. ²² Moisés miich ajcxy xyajnajt'ane'miyy je cötujcin co ajcxy m'ung mdiy'ajttiiygixy (oy je' ca' yajtzondac, mi-ich janchtiy ajcxy mmij'ap mmijteedy Abraham yajtzondac), e paady ycixpi miich ajcxy m'ung mdiy'ajttiiygixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiiygixy oy sábado xijoty. ¿Ti miich ajcxy co xymijotma'tcixich co tüg jäy ti nyajtzögyich sábado xijoty? ²⁴ Ca' m'ix'ijxcixy mba'ijxcixy mmigüg miid anii. Yajcüyöyi yajtecyöyi miich ajcxy jäy ypocy miid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijéjity Jerusalénjäy ymíñañ:

—¿Nej ca' jada jada' yjéjity je huidibi ajcxy yjayaj'ögamyi? ²⁶ Oc'ix ajcxy, ta ycapxy ymiydägy iixna' que'xna', e ca' ajcxy huam nimäy. ¿Nej ti jada ajcxy iix-cajpcixy yajxon tungmiidpi ajcxy co jada yjéjity je Mesías? ²⁷ Ich ajt nnejhuüyim ma jada yëdyjic chooñ.

Per je Cristo co anajty je' ymiñ, ni pin je' canejhuñhuipy ma je' anajty choñ ma ycogajpity.

²⁸ Co Jesús jadu'n midooy, co anajty yaj'ixpicy ma Dios ytijc, huin'it Jesús mic yminañ:

—Mnejhuñyb miich ajcxy pin ñich, e ma ndzooñich. Per ca'p ñich ti nmiñich ya naaxhuñ miid ñich ngi'mdzojcin. Yi huidibi ñich ti xyquexyich, tiydudägy yi' ytuñ, e ca' miich ajcxy yi' m'ixy'ájtigixy. ²⁹ ñich janchtiy n'ixy'ajtypich je'. Je' co jim ndzooñich ma je', e je' ñich xyquexich.

³⁰ Huin'it ajcxy jamadzaañ, per ca' ni pin cñixajty, com ca'ni anajty paady je xii je tiempo mina ñaygyegñyb ma ymidzip ajcxy. ³¹ Per mayjäy ooy mibijcy je Jesús y'ayuc, e yminañ ajcxy:

—Co anajty je Cristo ymiñ, ca' jada' nigí mijhuinma'ñ tuna'ñ ca'ydi' jada yaabi yëydijc.

Je teedy mijtungmiidpi yquejx ajcxy soldadotijc huen majtzicxy Jesús

³² Co je fariseojäy ajcxy ayuc midooy co jäy chachmi-naangixy jadu'n co je Jesús je' je' je Cristo, chi ajcxy quejxy tungmiidpi huen Jesús yajmach. ³³ Paady Jesús yminañ:

—Ñich jac-huäcxijpich hueeni ma miich ajcxy, chi nnicxa'ñich jadüg'oc jii by tzajpjoty ma huidibi xyquexich. ³⁴ Xy'ixtähuibich miich ajcxy, e ca' ñich miich ajcxy xypaadipy. Ma anajty ñich nnicxyich, miich ajcxy ca' jaydëbi jii by mnicxcixy.

³⁵ Huin'it je judíojäy ixpicytjic acjeyi ajcxy ñay'ami-doohui:

—¿Ma jada jada' y'ocnicxa'ñ, e nicxy ñich ajt nga-paatim? ¿Nej nicxib jada' ma je judíojäy ajcxy huidibi yajpaatcixy yxi yaa ma yi griegojäy ajcxy, e yaj'ixpi-gaangixy yi griegos ajcxy? ³⁶ ¿Nej jada' yajhuimbizim? co ymina'ñ: “Xy'ixtähuibich miich ajcxy, e ca' xypaadibich, e ma anajty ñich nyajpaady, ca' miich ajcxy jaydëbi jii by mnicxcixy.”

Je ñiñ huidibi jugy'ajt yejcp huidibi ca' ycixy ytigoy

³⁷ Co je mijxii ycodicxni, chi Jesús ytinay'ahuixy, chi mic yminañ:

—Pen ji pinjaty tiy'ajt nejhuhua'ñ jadu'n nej ixypiy jäy ytidzxyii tzocy yi nii, huen xyñimiiñich, etz nmöhuibich tiy'ajt. ³⁸ Je jäy ajcxy pinjaty xymibijcpich xymijpidaacpich, ytunipy ajcxy jadu'n nej Dios ñecy ymina'ñ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcujc'ajtin etz jugy'ajtin pada'ñ huinixi, ytimyñipaotyp jadu'n nej ñiñ ypidzimy janch com ma tüg ñigop.”

³⁹ Je' anajty jadu'n Jesús ytijyp pinjaty je' anajty mibijcip, je' anajty ajcxy adigihuaanip jottigihuaanip je Espiritu Santo. Ca' ni anajty je Espiritu ymini ma je discípulos ajcxy com ca'ni anajty Jesús yhuimbityñi tza-jpjoty.

Jäy ajcxy ca' ñay'ayuc-huinjihuñyi miid Jesús ycixpi

⁴⁰ Je mayjäy ajcxy huidibi anajty ti midooy nej Jesús anajty ti ymina'ñ, nidüg nimetz yminañ:

—Jadaabi je' je tiydudägypí jäy huidibi Dios y'ayuc najtzcapxiyip.

⁴¹ Jacjadyii yminañ ajcxy:

—Je' yi' je Mesías.

Per nijëjity ajcxy huidibi ca' ymibijccixy chachmi-naangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huidi xijip Belén ma David ycogajpity.

⁴³ Je mayjäy ca' anajty ajcxy ñay'ayuc-huinjihuñyigixy miid Jesús ycixpi. ⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidacy Jesús

⁴⁵ Chi ajcxy policías huidibi tumb ma tzajptjic nihuimbijty ajcxy je teedy mijtungmiidpi etz je fariseojäy ajcxy, chi ajcxy ñimaayi:

—¿Nej ajcxy co ca' ti mmajtzicxy je Jesús?

⁴⁶ Chi ajcxy je' y'adzooy:

—Nicaminaaxii tüg yëydijc jadu'n ti ymiydägy jadu'n nej yijibi yëydijc.

⁴⁷ Chi je fariseojäy ajcxy yminañ:

—¿Nej nañ ti miich ajcxy myajhuin'ñinigixy? ⁴⁸ Ca' nminaanim ti ajcxy teedy mijtungmiidpi o fariseojäy ajcxy mibijccixy Jesús. ⁴⁹ Je mayjäy huidibi mijpidaaci Jesús y'ayuc, ca' ajcxy y'ixpicyity ma Dios ycötujcin. Dios yi' ajcxy tzaachytunib.

⁵⁰ Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymüggtjic jadu'n nimay:

⁵¹ —Jadu'n ñich ajt ngötujcin xy'ane'mim co ca' huaad ndzaachytuunim pinjäy, pen ca'p jayjip n'ixyöyim nbayöyim ti anajty ti tuñ.

⁵² Chi ajcxy ymüggtjic y'adzohuimbijty oyñinej:

—¿Nej miich nañ jadu'n galileojäy? Ixta' yajxon ma Dios ñecy, com jii by mnejhuñhuipy co jim Galilea ca' jim chona'ñ pinjäy huidibi Dios y'ayucnajtzcapxiyip.

⁵³ Chi ajcxy ñicxtay nidüg nidüg ma yjin ydijc.

8 Chi Jesús ypa'ttigñy ma je cögop huidibi xijip

Olivos. ² Com jabom jopyñi Jesús yquidacy jadüg'oc ma Dios ytijc. Chi mayjäy ñimiini. Chi y'ixtacy, e chi ytigñy yaj'ixpijcpí. ³ Je jäy ajcxy huidibi Dios ycötujcin yaj'ixpijcp etz je fariseojäy ajcxy miidmiñ tüg töxyjäy ma Jesús huidibi anajty ti ytundigooy miid hu-ingbi yëydijc. Chi ajcxy pidacy cujc'amy ma je mayjäy.

⁴ Chi ajcxy nimay Jesús:

—Huindzin, jada yaabi töxyjäy huingbi yëydijc miid ti ytundigoy. ⁵ Moisés ytiy'ajt ñich ajcxy xyñajtz'ane'miy jecy'ajty co yajtzaagögädzipy jada jadu'mbi töxyjäy. ¿Nej miich m'ocminambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytigñy

jaaybi mïid ycïhuäx naaxcïxy. ⁷ Com je' anajty ajcxy chachyaj'amïdooyb, chi Jesús ytïnayïgy. Chi ajcxy nïmay:

—Pin jây ji ma miich ajcxy ca' ti pocy mïidity, huen yï jayijp tzaagäch jada töxyjây.

⁸ Chi Jesús yhuindacy jadüg'oc. Chi ytigïiy jaaybi jadüg'oc naaxcïxy. ⁹ Co ajcxy jadu'n ayuc yajhuinjihuiydaayi, chi ajcxy ooy chöyduñ, com yjihuiy ajcxy ypocy. Chi ajcxy yjihuaçtay. Chi je mijjädijc ajcxy ñaybattzondayi. Jesús yhui'mïiy nimetz mïid je töxyjây huidibi jim anajty tinaayb huington. ¹⁰ Chi Jesús yhuäccugiy jadüg'oc nïmay je töxyjây jada':

—¿Ma ajcxy je jây? ¿Ca' ni pin ti xychaachytuñ mïid mbocy ycïxpi?

¹¹ Chi je töxyjây y'adzooy:

—Huindzin, ca' ni pin.

Chi Jesús ymïnañ:

—Ni ïich miich ngatzaachytunïpy mïid mbocy ycïxpi. Nïcx, e ca' m'ocjacpocytuunïp.

Jesús jadu'n nipaady nej tüg jïin huidibi tïcxpi

¹² Chi jadüg'oc Jesús yjactigiy miydacp ymïnañ:

—Ïich je tïy'ajt nmïid ya ma naaxhuiñyây, jadu'n ïich nipaady nej tüg jïin huidibi tïcxp ma jây ajcxy. Pinjây xymijpidaacpïch ymïid tïy'ajt nej jëbi huaad tudägy chinähuïpy, jadu'n nipaady nej jïhuïy ytüyöy ma jïin ytïcxin.

¹³ Chi je fariseojây ajcxy nïmay Jesús:

—Miich cï'm nayñidïy'ajtïp co miich je' je Cristo, e ca' mdiy'ajt chobaady.

¹⁴ Chi Jesús y'adzooy:

—Janch co ïich cï'm nayñidïy'ajt'adyiijïch co ïich je' je Cristo. E ïich ndiy'ajt janch yï'. Com nnejhuïybïch ma ti ndzooñïch, e ma nnicxa'ñïch. E miich ajcxy ca' mnejhuïygyïxy ma ndzooñïch, e ma nnicxa'ñïch. ¹⁵ Miich ajcxy mmïgüg mbocy'ïjxyp mïid mgi'mhuinma'ñ. Ca' ni pin nbocy'ïxyïch mïid ngi'mhuinma'ñïch. ¹⁶ Pen ïich anajty nyajcïyöybïch nyajtecyöybïch jây ypocy, tïy-dudägy anajty jadu'n nduñïch. Com ïich ca' nyajpaadyïch naydüg. Je' xymïd'ïjtpïch je Dios Teedy huidibi ti xyquexyïch. ¹⁷ Com cojaay jadu'n y'ity ma miich ajcxy mgötujcïn ñecy: "Pen nimetz jây nigodïy'ajt'aty huentiiijty, tzoobatp ajcxy y'ayuc." ¹⁸ Ïich cï'm ñayñidïy'ajt'adyiijïch co ndzooñïch tzajpjoty, etz nDeedyïch nañ jadu'n xyñidïy'ajt'ajtpïch, co je' ya ti xyquexyïch.

¹⁹ Chi ajcxy y'amïdooy:

—¿Ma miich mdeedy yajpaady?

Chi Jesús y'adzooy:

—Com co ca' ïich miich ajcxy xy'ïjxcapy co ïich je' je Cristo, nañ ca' ajcxy m'ïxy'adyii ïich nDeedy. Co ïxyipy ajcxy xy'ïjxcapyïch, nañ jaydëbi ïxyipy ajcxy nejhuïy pin ïich nDeedy'ajtp.

²⁰ Jim jadu'n Jesús ycapxy ymiydacy ma je meeñ'ïjttac, co anajty yjây yaj'ïxpcy ma Dios ytïjc. E ca' ni pin ymajtzi. Com ca'ni anajty yxïi yhora anajty paadyñi mina ñaygïyegïiyb ma ymidzip.

Jesús ñïmay ymigügtïc co ca' huaad ñïcxy ma je' anajty ñïcxy

²¹ Chi Jesús yjacnimaayi ajcxy:

—Ïich nnicxaanïp ïich, miich ajcxy xy'ixtähuïbïch.

Mïid ajcxy mbocy ycïxpi m'ögaangïxy, com ma nnicxa'ñïch ca' huaad miich ajcxy jëbi mnicxcïxy mïid mbocy ycïxpi.

²² Huin'it je judíojäy ajcxy ac jëyi ñayñïmaayi:

—¿Nej nïcxy jada' cï'm ñayyaj'öga'ñyijï? Com jadu'n ymïna'ñ co ma yï' ñïcxy, ca' huaad ïich ajt jëbi nnicxim.

²³ E Jesús nigï nïmay'idïch anajty:

—Miich ajcxy ya naaxhuiñ mmïidity mdiy'ajtcop. Ïich tzajpjoty nmïidityïch ndiy'ajtcopïch. Miich ajcxy naaxhuiñyây ajcxy ytïy'ajt mmijpidaacïpy. Ïich ca' nmijpïdägyïch naaxhuiñyây ytïy'ajt. ²⁴ Ïich miich ajcxy jadu'n nñïmaayb co m'ögam miich ajcxy, e ca' ajcxy Dios mbocy xyhuinmeecxp. Copicy ajcxy m'ögïpy, e ca' Dios mbocy ajcxy xyhuinmeecxp, pen ca' xymïbigáangïxyïch co ïich je' je huidibi jëbi mbocy ajcxy xyhuinmeecxp.

²⁵ Chi ajcxy nïmay Jesús:

—¿E miich, pin miich?

Chi Jesús y'adzooy:

—Ti ajcxy nyajñïmaaygyïxy pin ïich, co oga'n ndigïyïch jây yaj'ïxpïcpi. Cham jadüg'oc nyajñïmaaygyïxy. ²⁶ May ooy tijaty ayuc nyajñïmaahuaangïxy nej ti mdundïgoogyïxy ma Dios ytïy'ajt. Cham ca' ajcxy nyajñïmaydähuïpy. Je huidibi ti xyquexyïch ya naaxhuiñ je' tüg'ócy tïy'ajt mïid. E ngapxpidzïmyïch je ayuc je tïy'ajt jëyi huidibi ti nmïdooyïch ma je'.

²⁷ Je jây ca' ajcxy huinjihuiy co Dios Teedy anajty Jesús ñïgapxyp. ²⁸ Paady Jesús nïmay ajcxy:

—Co anajty miich ajcxy ti xyajcrudzpetyïch, ïich je jây huidibi tzoön tzajpjoty, huin'it miich ajcxy mnejhuïhuïp co ïich je' je Cristo. E co ïich ca' ngi'mhuinma'ñ nduñïch. Yï' ïich ya nmiydacypïch huidibi Dios Teedy ti xyaj'ane'myïch. ²⁹ Je Dios Teedy huidibi ti xyquexyïch, yï' ïich mïid n'ityïch. Ca' ïich yï' xy'ïxmachïch. Com co ïich njatytymytummybïch jabom jabom huidibi yï' choj-cyp.

³⁰ Co Jesús jadu'n ymïnañ, chi mayjây ooy ymïbijcy.

Jây huidibi mïbijcp Jesús ycuychinaayïpy yï' ytïy'ajt

³¹ Chi Jesús nïmay je judíojäy ajcxy huidijaty anajty ti ymïbicy:

—Pen mmïbijc ajcxy cïxyjot huinijot tüg'ócy ïich n'ayuc, e ca' m'ïjxmadzïpy ajcxy ïich n'ayuc, huin'it ïich miich ajcxy jëbi njây'adyii. ³² Huin'it jëbi ajcxy mnejhuïhuïpy Dios ytïy'ajt. E. Dios ytïy'ajt xyñïhuaángïxip ma je mjïbic-huinma'ñ ooy xy'ané'mgïxy.

³³ Chi ajcxy y'adzooy:

—Abraham ïich ajcxy nmij'ap nmijteedy'ajtpy. Ca' ïich ajcxy huaad ni pinjây xyjac'ane'my. ¿Nej co miich jadu'n mïna'ñ: "Dios ajcxy xyñïhua'nïp ma yï mjïbic-huinma'ñ xy'ane'mgïxy"?

³⁴ Chi Jesús y'adzooy:

—Janch janch ñich miich ajcxy jadu'n nimaaygixy co tüg'óciy pinjaty pocy ytundñib, jibicp yi' ane'mip. Tim jadu'n nipaady nej tüg tumbi huidi codoogĩ y ijtp, yi' yhuindzin jatytim'y'ane'mip. ³⁵ Yi tumbi huidibi codoogĩy ijtp, ca' yhuima'ñ ma je jāy ytijc huinixii. Yi jāy y'ung janchtiy hui'mam huinixii ma yteedy ytijc. ³⁶ Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuñiybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ogaambich. Je' co ca' mijpidaaccixy ñich n'ayuc huidibi njayajnimaygixyp. ³⁸ Ñich miich ajcxy nyajmĩdmiydaacyp tĩbi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnimaygixy.

³⁹ Chi ajcxy y'adzooy:

—Hue' ñich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixypiy ajcxy mdungixyp jadu'n nej Abraham tuuñ. ⁴⁰ Janch ñich miich ajcxy xy-chachyaj'ogaangixyich, e ti ajcxy njayajnimay je huidibi ñich ti nmidooyich ma Dios. Ca' Abraham yaj'ogy je jāy ajcxy huidijaty anajty Dios ytiy'ajt mĩd, jadu'n nej miich ajcxy m'ĩdĩtzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'ñich ajcxy ndigoy'ungity. Je' tũgpajc ñich ajcxy ndeedy'ajtyp Dios Teedy.

⁴² Chi Jesús ymĩnañ:

—Pen Dios ixypiy ajcxy mdeedy'ajtyp, xychojcpich xymijpidaacpich ixypiy ajcxy. Com Dios ti xyquexyich ya naaxhuiñ, e jiiby ndzooñich ma Dios. Ca'ñich ngi'md-zojcin ycixpi nmĩñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuñy ñich n'ayuc? Je' co ca' ajcxy midohuaangixy ñich n'ayuc. ⁴⁴ Je' miich ajcxy mdeedy'ajtyp je mujcu'. Mĩd mgi'md-zojcin mguydungixy je mujcu' chójcin. Je mujcu'yaj'öc-tĩyb yi' jāy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je mujcu' indaacp je', chi ci'm ooy nijot y'idĩch. Je' ooy indacy, e je' oga'n anñ yajtzondac. ⁴⁵ Com miich ajcxy mujcu' yhuinma'ñ mĩd, paady miich ajcxy ca' xymibijci xymijpidaaci n'ayucich co ñich tiy'ajt njamĩydägy. ⁴⁶ Ni pin miich ajcxy xycayajpocycähuipy. Pen tiy'ajt ñich miich ajcxy nyajnimayyb, ¿ti co ca' mmijpidaaccixy ñich n'ayuc? ⁴⁷ Je jāy ajcxy huidibi yajpatp ma Dios, y'amĩdo'ijtyp ajcxy Dios y'ayuc. Paady miich ajcxy ca' m'amĩdo'ijtcixy Dios y'ayuc, com ca' ajcxy Dios mDeedy'ajtigixy.

Jesús jiyim anajty yjugy'aty ca'ydĩ Abraham

⁴⁸ Chi je judío ixpicytjic ajcxy y'adzooy:

—Ti ñich ajcxy yajxon nmĩna'ñ co miich mgogajpity jim Samaria, e mujcu' miich mĩd ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmĩdity ma njot nhuinma'ñ, com nyajmij'ajtypich nDeedy, e miich ajcxy xy'ixtijpich.

⁵⁰ Ñich ca' ci'm naygömayiijich. Dios Teedy ñich xycö-maayb, com yi' je' huidibi ixypiy payöyp jāy ajcxy ypocy. ⁵¹ Janch janch ñich miich ajcxy nimaaygixy co ji nijējity jāy huidibi ñich n'ayuc cuydumb, e ca' yi' ajcxy yjugy'ajtin ycixipy ytigoyipy tũcc'i'yi co y'ó'ccixipy.

⁵² Chi je judío ixpicytjic ajcxy y'adzooy:

—Cham ñich ajcxy janchtiy ti nnejhuñyich tiydudägy co miich mujcu' mĩdity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capxhuäcxip, e miich mmĩna'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmĩd miich mic'ajt, ca'ydĩ Abraham, ñich ajt nmij'ap nmijteedy huidibi o'ci? ¿Nej mjacmĩd miich mic'ajt, ca'ydĩ ajcxy huidibi Dios y'ayucnajtzcaxñy, huidibi ajcxy o'ci? ¿Pin miich mdĩmnydijiyii?

⁵⁴ Chi Jesús y'adzooy:

—Pen ñich nnaygömayibich ci'm, ca' n'ayucich chobaadipy. Ñich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. Ñich janchtiy n'ixy'ajtypich Dios. E co ixypiy nmĩna'ñich co ca' ñich Dios n'ixy'adyii, indaacpich ixypiy, jadu'n nej miich ajcxy m'indaaccixy. Janch ñich n'ixyich Dios, e nguydumybich yi' y'ayuc. ⁵⁶ Je Abraham, miich ajcxy mmij'ap mmijteedy, jotcuyc ooy ñayjihuiñy co anajty ixa'ñ ñich nxñ ndiempo ya naaxhuiñ. E co ijxy co ñich nmĩñich, chi ooy yjotcugñy.

⁵⁷ Chi je judío ixpicytjic ajcxy nimay Jesús:

—Ni mgamĩdity huixchigui'px majc jimij, e ¿mmĩna'ñ co m'ijxy Abraham? (Ca' m'ixy'ajti je Abraham, naxy tũg mil jimijt maabi je' y'o'cni.)

⁵⁸ Chi Jesús y'adzooy:

—Janch janch ñich miich ajcxy jadu'n nimay co ji anajty ñich co ca'ni anajty Abraham yma'xung'aty.

⁵⁹ Chi ajcxy tzaa conėgy tzaagädza'ñ anajty ajcxy. Chi Jesús yhuingoyüch, e ypidzĩmy ma Dios ytijc.

Jesús yajtzooc tũg huintzpi

9 Hue' anajty Jesús huidijtp co ijxy tũg huintz, jadu'n anajty huiintz ti yma'xung'aty. ² Chi ydiscipulos ajcxy y'amĩdoohui:

—Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yajty, jigix Dios ymic'ajt ñiguēxīgity ma yi'. ⁴ Copicy njactũunibich yi' ytung huidibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuiñy ixypiy je xĩmbi ti ñaxy etz je coodzpĩ ti ymĩñ. ⁵ Jadu'n nej n'ityich ya naaxhuiñ nmĩdich Dios ytiy'ajt, jadu'n ñich nipaady nej tũg jĩn huidibi codĩcxp yi' naaxhuiñy jāy.

⁶ Co Jesús jadu'n ymĩnanday, chi nidzujñy naax, chi mo'ntz yaj'oyñy mĩd chujñ, chi jada' yajjaaxi je jāy yhuiin mĩd je mo'ntz. ⁷ Chi nimay jada':

—Nicx quejtzpuj yi mo'ntz jim ma yi Siloé nii y'abo-
jtzigity —je ayuc Siloé jadu'n yhuimbizimy: quexyöy-
bi.

Chi je jäy huintzpi ñicxy jim, chi oy quejtz puju je
mo'ntz, chi oy huimbity ti anajty yhuindicxigy. ⁸ Je
ymijijn ymidijc ajcxy etz tüg'óciy huidijaty anajty ajcxy
ti icy je huintzpi co jabom jabom iñäy limosna yajmucy,
chi ajcxy ñay'amidoohui miñ xyipy:

—¿Nej ca' jada yjējity je huintzpi huidibi anajty jabom
jabom limosna yajmucpi?

⁹ Nijējity ajcxy yminañ:

—Je' yi'.

E jacjadyii ajcxy yminañ:

—Huingbi yi', nigoob jadu'n yquëxigy nej je'.

E je' yminañ ci'm:

—İich jēdu'n huidibi anajty huintz.

¹⁰ Jadu'n anajty ajcxy tzach'amidooy:

—¿Nej yi' mhuiin ti ñay'ahuäcxyii?

¹¹ E je' anajty y'adzooy:

—Yi yēydijc huidibi ajcxy ytiyyp Jesús, yi' mo'ntz
yaj'oyiıy xyajjaaxich nhuiin, e chi xyñimaayich: "Nicx
quejtzpuj ma yi Siloé nii." Chi nñicxyich, e oy ngue-
jtzpujyich, e chi nhuindicxi'cyich.

¹² Chi ajcxy je' nimay:

—¿Ma je' je yēydijc?

Chi je huintzpi y'adzooy:

—Ca' nnejhuıyich.

Fariseojäy tiy'ajt pijcy nej je huintzpi anajty ti chögy

¹³ Chi ajcxy yajnicxy ma fariseojäy ajcxy yhuinduu, je
huidibi anajty huintz yajpatp. ¹⁴ Hue' anajty tüg sábadu
xiı (judíojäy ajcxy amayxiı) co Jesús mo'ntz yaj'oyiıy, e
yajhuindicxigy je huintzpi. ¹⁵ Chi je fariseojäy ajcxy
jadüg'oc yajty nej anajty je jäy ti yhuindicxigy. Chi je
jäy y'adzooy:

—Mo'ntz ti pidägy ma İich nhuiin, chi İich ti ngue-
jtzpuj, e cham n'ijxnibich.

¹⁶ Nijējity fariseojäy ajcxy yminañ:

—Yi yēydijc huidibi jada jadu'n ti tuñ, ca' yi' Dios
ytiy'ajt miıdity, com ca' yi' amay'aty sábadu xiı.

Chi ajcxy jacjadyii y'adzooy:

—¿Nej tijy jada mijhuinma'ñ octuñ, pen hue' yi'
pocyjäy?

Ca' ajcxy nay'ayuc-huinjihuıyigy. ¹⁷ Chi ajcxy
jadüg'oc nimay je jäy huidibi anajty ti y'ijxigy:

—E miich, ¿nej m'ocminambi? ¿Pin jäy yi' tiıbi xya-
jhuindicxigy?

Chi je jäy y'adzooy:

—Tüg jäy huidibi Dios y'ayuc etz ymic'ajt miıd.

¹⁸ Chi je judío icpicytjic ajcxy ca' anajty tim miıbi-
gaangixy co je yēydijc anajty huintz yajpaady, e co ana-
jty ti yhuindicxigy, ixti cooni ajcxy ytaj yteedy
mijhuoohui. ¹⁹ Chi ajcxy amidoohui ytaj yteedy:

—¿Nej je' jada miich ajcxy m'ung huidibi huintz
ma'xung'ajti? ¿Nej jada ti yhuindicxigy?

²⁰ Chi je' ytaj yteedy ajcxy y'adzooy:

—İich ajcxy nnejhuıyb co İich ajcxy yi' n'ung, e co
yma'xung'ajty huintz. ²¹ Per jadu'n nej cham ti

yhuindicxigy, e pin yi' yhuin ti yajhuäcxyii, ca' İich
ajcxy yi' nnejhuıygixy. Amıdoo miich ajcxy yi' ci'm.
Mij'anäciñ yi', ñigapxıpy yi' ci'm.

²² Jadu'n ajcxy ytaj yteedy y'adzooy, miıd co ajcxy
tzachtzigıygixy je judío icpicytjic ajcxy. Com je judío ic-
picytjic ajcxy ti anajty ñaygäpxigixy co anajty yajpidzi-
maangixy ma ajcxy ñaymujctac je jäy ajcxy pinjaty ana-
jty miıbjcp co Jesús anajty yjējity je Cristo. ²³ Paady
ajcxy ytaj yteedy yminañ:

—Mij'anäciñ yi', amıdoogix miich ajcxy yi' ci'm.

²⁴ Chi ajcxy y'amıdooy mimejtz'oc je yēydijc huidibi
anajty ti y'ijxigy, e chi ajcxy nimay:

—Cömay capxpat yi' Dios co ti mdzögy. Ca' mgömay
mgapxpaady je Jesús. Com İich ajcxy nejhuiıyb co yi'
Jesús, tüg yi' pocytumbi. Ca' yi' Dios y'ayuc ytiy'ajt
miıdity.

²⁵ Chi je jäy y'adzooy:

—Pen tüg pocytumbi yi' Jesús, ca' nejhuiıyich. Huidibi
janctiy nnejhuıybich, co anajty İich nhuintzity etz co
cham huindicxnibich.

²⁶ Chi ajcxy y'amıdooy jadüg'oc:

—¿Nej ti ytuñ? ¿Ti ti tuñ co ti xyaj'ijxici yi' mhuiin?

²⁷ Chi je' y'adzooy:

—Ti ajcxy nyajniımaaygixy, e ca' ajcxy ti m'ami-
do'ıdaangixy. ¿Nej nañ icpıgaangixy miich ajcxy ma
yi'ji?

²⁸ Chi ajcxy je' ogy, nimay ajcxy jadu'n:

—Miich icpıjc ma yi', İich ajcxy n'icpıjcpich ma Moisés
ytiy'ajt. ²⁹ İich ajcxy nejhuiıyb co Dios Moisés migapxy.
Janch yi' Jesús ca' İich ajcxy nnejhuıygixy ma yi' chooñ
(ma mic'ajt ti paady).

³⁰ Chi je jäy y'adzooy:

—Ooy yi' y'oychigıyñity y'oyhuinma'ñity co miich
ajcxy ca' nnejhuıygixy ma yi' chooñ (ma mic'ajt ti
paady), e ti İich yi' xyajhuindicxigyich. ³¹ Yajxon yajne-
jhuıy co Dios ca' yi' midoohui pocyjäydijc y'ayuc. Pen
oy jäy İich ajt, e nguyduunim Dios ytiy'ajt, huin't ajt
Dios n'ayuc xymıdoohuim. ³² Ni camınaaxıı ycajajmi-
doy, co pinjäy tüg huintzpi ti yaj'ijxigy huidibi jadu'n ti
yma'xung'aty huintz. ³³ Co icyipy je Jesús ca' jiıby chooñ
ma Dios, ca' icyipy jaty nej ti tunıpy.

³⁴ Huin't ajcxy y'adzooy:

—Miich jadu'n ti mma'xung'aty pocymıd. Ca' miich
huaad ti xyaj'icpıjccıyich.

E chi ajcxy yajpidzımy tiıbäy'tücci'yi (ma ajcxy ñaymu-
jctac etz ma Dios ytiyc).

Je jäy ajcxy huidibi ca' cöbijccıxy Dios ytiy'ajt jadu'n ni- paady ajcxy nej jihuıy huintzity

³⁵ Chi Jesús nejhuiıy jadu'n co anajty ti yajpidzımy ti-
ba'y tücci'yi ma Dios ytiyc. Co mınaaybaati chi nimay:

—¿Nej mmıbjıcp mijpıdaacy miich je jäy huidibi
tzoon tzajpjoty?

³⁶ Chi je' y'adzooy:

—Huindzin, nımaaygıch pin je', jigıx nmıbıcyich.

³⁷ Chi Jesús je' y'adzooy:

—M'ıjxyp yi'du'n yam. Yi je' je huidibi xymıdmıydacp.

³⁸ Chi jada' huingoxtinay'ahuïy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús ymïnañ:

—Ïich ti nmiñ ya naaxhuiñ co n'ixyöyaanich nbayöyaanich jäy ypocy, jigix nyajpocycähuibich pin ca' ypocymiidity, etz nyajpocyñihuädzibich pin ypocy miid. Jadu'n nej jihuïy nyajhuindzïyich je jäy huidibi ijxp, etz jadun nej jihuïy nyajhuindixëgyich yi huintzpi.

⁴⁰ Chi nijëjity fariseojäy huidibi anajty jim ma Jesús ymijc jadun midoy nej Jesús ymïnañ, chi ajcxy nimay Jesús:

—¿Nej nañ jadun miich mdijy ïch ajcxy ca' Dios ytiy'ajt nejhuïyich, jadun nej jihuïy ïch ajcxy nhuintzity?

⁴¹ Chi Jesús y'adzooy:

—Co ixypiy miich ajcxy janch janch ca' mnejhuïyigixy Dios ytiy'ajt, ca' ixypiy ti pocy ajcxy mmiidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymiidity. Nipaaty jadun nej jihuïy miich ajcxy mhuintzity, e mmïnaangixy co m'ijxcixy.

Jesús yaj'ixpijic jihuimbit ayuc

10 Chi Jesús jacnimay je judío y'ixpicityic, je fariseojäy ajcxy:

—Janch janch ïch miich ajcxy yam jadun nïmaaygixy co je jäy ajcxy huidibi ca' ytiy'ajhuangixy ma borregi agaj aguu (ma je cuend'ajtpi ycuend'aty), huidibi huindinguum ameech tzach tigïhuaam ma yborregi agaj, je' je' je meetzpi huidibi meedzam je borregi ajcxy ameech. ² Je jäy huidibi tigïhuam ma yborregi agaj aguu, je' je' je borregi cuend'ajtpi. ³ Co je borregi cuend'ajtpi ymiñ ma agaj aguu, chi je agaj aguu cuend'ajtpi yaj'ahuäch je agaj aguu. Chi yborregi ajcxy yöcmidoyii, chi je' migapxy xïbety xïbety, chi yajpidzimy ajcxy. ⁴ Co ajcxy yajpidzimdäy, ac je' yje', chi jayijp ñicxy, e axam ajcxy ypanicxyii, com je' co yöcmidoyii. ⁵ Ca' je borregi ajcxy jëbi panicxy tüg huingjäy. Nigi ajcxy cöguëgy, com yöcmidooyb ajcxy co yhuingjäyity.

⁶ Jadun Jesús mayjäy yaj'ixpijicy jihuimbit'amy, jaygue' ajcxy ca' huaad huinjihuïy nej anajty Jesús yjaminäna'ñ.

Jesús je oybi cuend'ajtpi

⁷ Chi ajcxy Jesús jadüg'oc ñïmaayi:

—Janch janch ïch miich ajcxy yam jadun nïmaaygixy, co je Dios nDeedy'ajtpich. Jëbi jäy ajcxy paady Dios ytiy'ajt ma ïch, e huin'it ytiy'ajtiyigixy ma Dios y'it. Jadun nipaady nej jihuïy ïch je agaj aguu ma borregi ajcxy ytiy'ajtiyigixy. ⁸ Tüg'óciy je huindzindijc huidibi ajcxy miin jayijp ca'ni ïch anajty nmiñich, e ymïnaangixy anajty co ajcxy miid'ajti Dios ytiy'ajt, jadun je' anajty ajcxy nej meetzpi huidibi meedzaanip Dios yjäy. Per je Dios yjäy ca'p je' ajcxy tuuñ cuendi, jadun nej je borregi ca' yöcmidoogixy je meetzpi. ⁹ Jadun nej je bor-

regi ajcxy ytiy'ajtiyigixy ma agaj aguu, nañ tim jadun jäy ajcxy paady Dios ytiy'ajt ma ïch. Je jäy ajcxy huidibi ypaaty Dios ytiy'ajt ma ïch, nañ ypadaamy jugy'ajtin huidibi ca' ycixipy ytiy'ajtiyigixy tücc'iyi. E huidibi je' ajcxy yajmayajty ma yi chinaayin, nmöhuibiyich. Tim jadun nej borregi ajcxy jabom jabom ypidzimigixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Ïch ti nmiiñich, jigix miich ajcxy mbáatcixipy jugy'ajtin mijcajee huidibi ca' tücc'iyi ycixipy ytiy'ajtiyigixy.

¹¹ Chi Jesús yjacmïnañ:

—Ïich jadun nipaady nej tüg borregi cuend'ajtpi oybi. Je oybi borregi cuend'ajtpi ycyeycyp yi' yjugy'ajt ma yi o'cin miid yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajëjity je borregi yhuindzin, co ixycy caa ymiñ, chi cöguëgy je borregi, e yajqueec-huäcxtäy. ¹³ Com je' co mujuy ytuñ, paady cöguëgy je borregi ajcxy, ca' tzocy jihuïy borregi.

¹⁴ Tim jadun nej je oybi borregi cuend'ajtpi ijxcajptäy je yborregi, nañ tim jadun ïch n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich.

¹⁵ Tim jadun nej Dios Teedy xy'ixy'adyiijich, nañ tim jadun n'ixy'adyiijich Dios Teedy. Tim jadun je' nej je oybi borregi cuend'ajtpi ycyeygamy yjugy'ajtin miid yborregi ycixpi. Nañ tim jadun ïch ngëyegamyich njugy'ajtin miid ïch njäy ajcxy ycixpi. ¹⁶ Nmïdich jadügpi-cy jäy, ca' ajcxy yjudiojäyity, je' ajcxy nañ jadun nmïd'idaamyich tügumucy (miid je judío jäy ajcxy huidibi xymijpidaacpich). Tim jadun nej je cuend'ajtpi ymiid'ajtpi je' yborregi ajcxy tügumucy. E je' ajcxy y'amïdoo'idaamy ïch n'ayuc, tim jadun nej borregi ajcxy yöcmidoogixy yhuindzin. Ji y'idipy tügumucy jäy (huidibi xymijpidaagibich), etz tüg cuend'ajtpi (ïch jëdu'n).

¹⁷ Chi Jesús yjacmïnañ:

—Paady ycixp Dios Teedy ooy xychocycich xyjihuïyich, co ngëyegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, ïch yi' ci'm ngëyegamy. Nmïdich mic'ajt nej ngëyegipyich njugy'ajtin, etz nañ nmïdich mic'ajt nej njugypigipyich jadüg'oc. Jadun nDeedyich ti xy'ane'myich co jadun ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuïy je judío-jäy ajcxy miid Jesús y'ayuc ycixpi. ²⁰ Mayjäy ymïnañ:

—Ca'oybi yi' ymiid, locjïyb yi', ¿nej co ajt n'amïd'ojtim y'ayuc?

²¹ E jacjadyii ajcxy ymïnaangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymiid. Ca' jëbi tüg mujcu' jäy huintzpi yaj'ixëgy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixi-dumyib jimijt Dios ytiy'ajtiy. ²³ E hue' anajty tiich tiempo. Chi jim anajty Jesús yhuidity ma Dios ytiy'ajtiy, ma je Salomón

ytijc-huinduu. ²⁴ Chi ajcxy je judío y'ixpicytijc nimujcy ooy Jesús, nimay ajcxy:

—¿Ixti minaaní miich ñich ajcxy tiydudägy xyajhuin-jihuühuáangixyich pen miich je' je Cristo? Yajhuin-jihuüygich ajcxy tiydudägy.

²⁵ Chi Jesús y'adzooy:

—Ti ajcxy nyajniimaaygixy, e ca' miich ajcxy ti nmibijc-cixy. Je mijhuinma'ñ huidibi ndumybich nmüidich nDeedy ymic'ajt, yi' je' nidiy'ajt'ajtp co ñich je' je Cristo. ²⁶ Paady ycixp miich ajcxy ca' mmibijccixy, com ca' miich ajcxy njäy'adyijich. ²⁷ ñich njäy ajcxy ymijpidaacyp ñich n'ayuc, e n'ijxcapich ajcxy je', e je' ajcxy xypanicxpich. Tim jadu'n nej je borregi ajcxy yöcmidooy je yhuindzin, jadu'n nej je huindzin ijxcapy je' yborregi, e jadu'n nej yi yborregi ypanicxyii. ²⁸ ñich njäy ajcxy nmooybich yi jugy'ajtin huidibi ca' tücciyi ycixa'ñ yti-goya'ñ. Ca' je' ajcxy yjugy'ajtin ytiogyipy ni camina, e ni pin ca' huaad je' ajcxy xypijcich. Je' ajcxy ci'am nmüididyich. ²⁹ Yi Dios Teedy huidibi ñich njäy ti xymöy, tügpajc yi' ymijity, e ni pin huaad ni ti capijcicy huidibi Dios Teedy ymiid ci'am. ³⁰ Dios Teedy etz ñich tú'ciy ñich ajcxy.

³¹ Chi je judíoajy ajcxy jadüg'oc tzaa conig cäzdaangixy anajty ajcxy. ³² Chi Jesús je' ajcxy nimay: —Ti ñich ooy mij oybi nduñich ma miich mhuinduu müid je nDeedyich ymic'ajt ycixpi. ¿Huidi ycixpi miich ajcxy xychaagädzäängixyich?

³³ Chi je judío ixpicytijc ajcxy y'adzooy:

—Ca' nminaanim paady ñich ajcxy miich ndza-agädzaangixy müid je oybi tiibi mduñ, hue' janchtiy ycixpi ndzaagädzaangixy müid co ooy Dios myajjot-mädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíoajy ajcxy ytiy'ajtnecy, ma Dios jadu'n ymina'ñ: "Jadu'n nej dios miich ajcxy."

³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbijcip (e ca' huaad pinjäy ymina'ñ co Dios ñecy ca' yjanchity). ³⁶ Dios ti xyajniibicyich jada tung, e xyquejxyich ya naaxhuiñ. ¿Nej co mminaangixy co ñich ngapxtigooyich co nmina'ñich co Dios xy'ung'adyijich?

³⁷ Pen ca' nduñich nDeedyich ytung, ca' ñich ajcxy huaad n'ayuc xymibijcich. ³⁸ E pen ndumybich nDeedyich ytung, oy ixypy miich ajcxy ca' xymijpidaacich n'ayuc, jébi ixypy mijpidägy ajcxy je mijhuinma'ñ huidibi ndumybich. E chi mnejhuühuipy miich ajcxy, etz mmijpidägy miich ajcxy co je Dios Teedy yajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij nñ ninaxy ma Juan yjäy yajniibejty oga'n'aty, chi jim yhuü'müi.

⁴¹ Mayjäy Jesús ooy ñimujci, e ymina'ñ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'óciy yi' tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibijcy Jesús jim ma je jimbi it.

Co Lázaro y'o'cy

11 Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta y cogajpity. ² María je' anajty huidibi je Huindzin Jesús anajty ti yajjaxy je utzpijyñii huidibi ooy oy yxuu-gy, etz po'ti Jesús ytecy müid ycöhuay. Hue' je' anajty María etz Marta ymidügquëx Lázaro huidibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi ymina'ñ:

—Je' ypa'm ca' yaj'öga'ñyii tücciyi. Je' ypa'm hue' yaj-niguëxigamy Dios ymic'ajt, jaydeb Dios ycömay-bidzimipy, e nañ ñich nyajcömayipyich, ñich je jäy huidibi tzoon tzajpjoty.

⁵ Jesús ooy anajty tzocy jihuüy je Marta, María etz je Lázaro. ⁶ Oy jadu'n Jesús nejhuüy co anajty Lázaro ypi-gyii, jamejtz xii jim yjacxinajxy ma anajty yajpaady.

⁷ Huin'it Jesús nimay ydiscipulos ajcxy:

—Tzoc jamim jim Judea naaxjot.

⁸ Chi je' ydiscipulos ajcxy y'adzooy:

—Huindzin, namni jäy ajcxy jim Judea ti xy'ocjac-cögdzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg xiiambi müidity. Pinjäy müid Dios ytiy'ajt, ca' ayo'n pada'ñ, tim jadu'n nej jihuüy yhuidity xiiim, e ca' ycönepy, com co xii codicxy jada naaxhuiñy-bi. ¹⁰ Pinjäy ca' müidity Dios ytiy'ajt, ca' je' nejhuüy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy müid co ca' anajty icy ma ñicxy.

¹¹ Huin'it Jesús je' ajcxy nimay:

—Ñich ajt nmigüg Lázaro maab je', nicxy nyajpidi-ga'ñich.

¹² Chi je' ydiscipulos ajcxy y'adzooy:

—Huindzin, pen maab, huaadjihuüjhuip yi', ci'm yi' ymäyhuijipy.

¹³ Je' Jesús anajty ñimiyaacyp je o'cin, e je' ajcxy tijy Jesús ñimiyaacyp je mähuü. ¹⁴ Chi Jesús yajmiidmiyda-cy ajcxy tiydudägy, ymina'ñ:

—Lázaro ti je' y'o'cy. ¹⁵ E ooy njotcújcidyich müid miich ajcxy ycixpi co anajty ñich ca' njimity, jigix ajcxy mmibigipy co Dios ymic'ajt nmüididyich. Tzoc ajt jamim jim Betania.

¹⁶ Tomás huidibi anajty ajcxy xiiigoyaaxyp Dídimó, huidi ayuc-huimbidzim: cuate, nimay jacjadyii Jesús ydiscipulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy müid Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimi-daaxxiibi anajty maabi Lázaro ñaaxtigäy. ¹⁸ Betania ca' anajty ooy yjiguëgyity müid Jerusalén, jéyi jada' anajty müidity tugüig kilómetro. ¹⁹ May judíoajy ajcxy anajty ti

ymiiñgixy ma Marta etz María, yajjotcugihuañ ajcxy mñd je' ymiguëx ycixpi co anajty ti y'ögy. ²⁰ Co nejhuïy Marta co Jesús anajty jim ymiñ, chi nidzooñ oy jip-cobadïy. E María jim yhuimiiy ma ytijc, tigoty anajty iñäy. ²¹ Chi Marta Jesús nimay:

—Huindzin, co ixipy miich ya anajty myajpaady, ca' ixipy ti y'ögy nmiguëxich. ²² Per nnejhuïybich co miich cham jëbi Dios mmibijctzoy, e xymöhuip ti mdimd-zojcyp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuïybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadzañ.

²⁵ Per huin'it Jesús y'adzooy:

—ñich je' nyajjugypigipyich je jäy ajcxy, e nmöhuibyich ajcxy jugy'ajtn. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy tücciyi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy mñd Lázaro ycixpi

²⁸ Co Marta jadu'n yminañ, chi jada' oy huoy y'uch María, e yajnimay ameech:

—Je Huindzin chiiby je', e miich jiiby xymidmiy-dägamb.

²⁹ Co María jadu'n midooy, chi ypidëgy mic'amy, e chi ñicxy ma Jesús. ³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjipcobaadïy.

³¹ Co ajcxy ijxy co María ypidëgy, e ypidëmy janch mic'amy, je judíojäy huidibi anajty ajcxy jim ma je tijc mñd je', hue' ajcxy tijy María ñicxy yaaxpi ma anajty ti ñaaxtigëy je Lázaro. Chi ajcxy panicxy.

³² Co yjädy María ma je it ma anajty Jesús, co iixpaty, chi ycojxtinaay'ahuïy ma Jesús yhuinduu, chi nimay:

—Huindzin, co ixipy miich anajty m'ocyaajty, ñch n'ay ca' je' ixipy y'ögy.

³³ Co Jesús ijxy yäxy je María etz je judíojäy ajcxy huidibi anajty yjajmñd'ajtip, chi ooy jihuiy etz ytaj ymaay. ³⁴ Chi jada' Jesús yajtiy:

—¿Ma ajcxy Lázaro ti myajnaaxtigë?

Chi ajcxy nimay:

—Huindzin, jam iixim.

³⁵ Chi Jesús yaaxy. ³⁶ Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijëjty ajcxy yminañ:

—Jadayaabi jäy huidibi huintzjäy yajhuindicxëgy, ¿nej ca' jada' ixipy mic'ajty mñdity jëbi ixipy ti yajtzögy je Lázaro, e ca'ydi ixipy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang mñd tüg mij tzaa y'agiyducyity je jut aguu. ³⁹ Chi Jesús yminañ:

—Jiigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxñibiñ maabi ñaaxtigëy.

⁴⁰ Chi Jesús yminañ:

—¿Nej cay ti jadu'n nnimäy? Pen xymibijcibich yi' n'ayuc, m'ixipy Dios ymic'ajty y'oy'ajty.

⁴¹ Chi ajcxy je tzaa jigiy, chi Jesús cix ypa't'ijxy, yminañ:

—Dios Teedy, jäygidaacin nyajnajxypich ma miich, co miich xymidoohui n'ayucich ⁴² Yajxon nnejhuïyich co miich xy'amido'ijtpich jabom jabom, paady ycixp miich jadu'n ti nnimäy mñd jadayaabi jäy ajcxy ycixpi ma ñch nhuinduu, huen ajcxy mibicy co miich xyquejxich ya naaxhuiñ.

⁴³ Co Jesús jadu'n yminañ, chi jada' mic' ycapxy:

—Lázaro, pidzim tibäy.

⁴⁴ Hue' je o'cpi mic'amy ypidzimy ymo'nity yajxon tüg'óciy ñinix etz huingoyebëyity mñd huit, chi Jesús yminañ:

—Huimbidiittuutcixy, e najtzmazëyigix, huen yöy-chooñ.

Judío ixpicytjic ymadzamy anajty Jesús

⁴⁵ May je judíojäy ajcxy ymibijcy huidibi anajty María yjajmñd'ajtyp, co ajcxy ijxy je huidibi anajty Jesús ti tuñ. ⁴⁶ Per jadyi judíojäy ajcxy oy ixtäy je fariseojäy ajcxy, chi ajcxy yajmñdmiydacy huidibi anajty Jesús ti tuñ. ⁴⁷ Je teedy tungmñdpi ajcxy, etz je fariseojäy ajcxy, chi ajcxy ñayhuoomujctay je tungmñdpi ajcxy nidüg'óciy, chi ajcxy yminañ:

—¿Nej ajty Jesús n'octuunim? Yijibi yëdyjic ooy yi' mijhuinmañ tzachtuuni. ⁴⁸ Pen najtz'ixëyim jadu'ñyi, tüg'óciy jäy mibijctähuañ yi'. Chi ajcxy ymiinipy je Romano tungmñdpi huidibi ajty xy'anémim, e chi yajhuindigoyipy ñch ajty ndzinaayin njugy'ajtn.

⁴⁹ Nidügti ajcxy je jäy, hue' anajty yxñ Caifás, hue' anajty mijtungmñd, je' anajty teedy huindzin, je' jadu'n jäy nimayday:

—Miich ajcxy ca' ti mhujhuëyigixy. ⁵⁰ Ca' ajcxy mnejhuïy co jac'oy nyaj'o'cim je Jesús tüg'ajc, huen yi' codi-naydahuiñ naax cajp, jigix ca'ydi ñch ajty nnaax ngajp yhuindiooyim.

⁵¹ Canan yci'mhuinmañ jadu'n ycixpi yminañ je'. Hue' janchty com je' anajty ymijtungmñdity je huin'it jimijt ma teedy ajcxy ymiñ, paady Dios huinmañ jadu'n yejcy, co jadu'n najtzcaxiy co Jesús anajty y'ögañ mñd tüg'óciy ajcxy naax cajp ycixpi. ⁵² E ca' nminaanim mñd jëda'ajty mñd je judío ajcxy ñaax ycajp ycixpi, nañ jëgëx co huoomujctähuañ tüg'óciy Dios y'ung huidijaty anaj-

ty ajcxy yajpatp xii ya. ⁵³ Huin'it oga'n ajcxy je tung-miidpi yajniogodugiixy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyoty ma je judíojäy ajcxy. Chi jada' ñicxy jiguem mihuingon ma je tñtznax'it, ma anajty tüg cajp xiiijity Efraín. Chi jim yhuimiy miid ydiscipulos ajcxy.

⁵⁵ Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jigüegyaty tzomb. Jayijpni ajcxy ñicxy ca' anajty xii paady, co anajty ajcxy ñayajpocyñihuádza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuixy ma Dios ytijc, jadu'n ajcxy yminañ:

—¿Nej m'ocmínaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuiyb ma je Jesús, huen nigapxy jigix ajcxy madzipy.

María yajjaax aceite Jesús ytecy

12 Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yaj-paady, je huidi anajty ti yajjugypicy jadüg'oc. ² Chi ajcxy jim yaj'oyiixy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús iñäy ma je mesi. ³ Chi María congy tüg libra ujtzipijyñii huidibi anajty ooy oy yxuugy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttich. Chi ac ujtzipijyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin cäyegam ma ymidzip, je' jadu'n yminañ:

⁵ —Jac'oy co ixipy ti ndoocim jada ujtzipijyñii oy mi-go'pxpeexyti jadib ixipy ajt ayoobtijc nbubejtim.

⁶ Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'ñ. Com je' anajty meeñbijty cuend'ajtp, e chachpuugomyb huidijaty anajty jilby ajcxy yjapidacyp. ⁷ Chi Jesús nimay je Judas:

—Ixmatz miich yi', hue' yi' yi' María ti yujcpicy jada ujtzipijyñii co yajtuna'ñ co anajty naaxtigyich. ⁸ Com yi' ayoobitijc ajcxy huinixii yi' miich ajcxy miid'idipy. Janch iich ca' iich miich ajcxy miid n'idipy huinixii (ya naax-huiñ).

Judío ixpicytjic yaj'ögamy anajty Lázaro

⁹ Co ajcxy nejhuiiy may judíojäy ajcxy co anajty Jesús yjimity Betania, chi ajcxy nimiiñ. E canan miid Jesús ycixpi jéda'ajty, je' anajty ajcxy nañ jadu'n chach'ix-aamy je Lázaro huidibi anajty ti jugypicy jadüg'oc.

¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijcixni Jesús.

Jesús tigiyy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymi-ingixy xii'ajtpi ñejhuiiy ajcxy co Jesús anajty ymina'ñ jim Jerusalén. ¹³ Chi ajcxy cabigy may ytiixy y'aacx, chi ajcxy nidzooñ Jesús, chachmínaangixy:

—¡Dios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymiid yi' Dios ymic'ajt, je' je' je' je' judíojäy yrey.

¹⁴ Co Jesús paty tüg burro mang huidibi ca' ni pin yaj'iñayñi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n yminañ:

¹⁵ —Ca' mdzigy miich ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶ Je huidibi anajty ajcxy Jesús discipulo'ajtyp, ca' anajty ajcxy huinjhuixyixy ixti cooni Jesús paty jadüg'oc yi' y'oy'ajtin ymi'ajtin jilby tzajpjoty. Huin'it ajcxy ajihuygooti co jadu'n anajty ycojaayity miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷ Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yajnaaxtigyiyi, e yajjugypijci jadüg'oc, chachyejcy anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸ Nañ paady ycixpi je mayjäy oy nañ jadu'n yjijpobadixyii, co ajcxy nejhuiy je mijhuinma'ñ huidibi anajty Jesús ytumyb. ¹⁹ Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'öcy yi' mayjäy axam ajcxy je' panixcixy.

Nijëjity anajty griegojäy miidmiydägaangixy Jesús

²⁰ Nijëjity griegojäy nañ ti anajty ñicxcixy jim Jerusalén Dios ojadajtpi xiiijoty. ²¹ Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús iich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús yminañ:

—Ti je tiempo paady co iich je jäy huidibi tzoon tza-jpjoty nyajcömayipyich. ²⁴ Janch janch iich miich ajcxy jadu'n nimaaygixy co jäy niiby tüg mocpajc, e co je mocpajc ymuxy, huin'it yhuindigoy, e chi ytim'ajtni may'amy. Pen ca' ni pin niiby jada mocpajc, ca' ytiim'ada'ñ. Jadu'n iich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. ²⁵ Je jäy huidibi ooy nigti nixondägy yi' chinaayin ya naaxhuiñ, yajtigoy-amy je' yjugy'ajtin tücciyi. Per je pin ca'p ooy nijot'aty je chinaayin ya naaxhuiñ, e nixondaaci ooy nigti Dios y'ayuc, je' y'alma nidzoocin paadip ma Dios. ²⁶ Pen ji jäy huidibi naybidaacip ma iich, copicy ajcxy xypañicxibich. Ma iich nyajpaady, nañ jim yi' yajpaadipy nañ jadu'n. Yi' jäy pinjaty naybidaacip ma iich, Dios Teedy yi' cömayib.

Jesús capxidzimy co y'öga'n

²⁷ Chi Jesús yjacminañ:

—Tájnibich mayñibich cham jotjoty huinma'ñyoty. ¿Nej nnimähuibich nDeedyich? ¿Nihuaangich ma jada ayo'n tzaachypí huidibi ti yhuaad'ajtñi? Ca' yjadu'nity. Com paady ycixp ti nmiñich ma jada xii tiempo, jëbi ayo'n nyajnajxich miid jäy ajcxy ypocy ycixpi. ²⁸ Dios Teedy tun huidibi copicy, jëbi jäy ajcxy ijxcixy miich mmic'ajt etz miich m'oy'ajt.

Huin'it je jäy ajcxy huidi anajty jim ma Jesús yajpaady midooy tüg ayuc choñ tzajpjoty yminañ:

—Ti nduñich mijhuinma'ñ, e ti jäy icy ñich nmic'ajt n'oy'ajt. E nañ jadüg'oc ndunipyich mijhuinma'ñ, jigix jäy ajcxy ijxcixipy jadüg'oc ñich nmic'ajt ñich n'oy'ajt (jadu'n Dios y'adzooy y'ung Jesús).

²⁹ Je mayjäy huidibi anajty ajcxy jim, je tiibi anajty ajcxy midoogixy je ayuc huidibi tzoon tzajpjoty, ymi-nañ ajcxy:

—Enee yi' ti yjidity.

Jacjadyii ajcxy yminañ:

—Tüg ángel ti ymigapxyii.

³⁰ Chi Jesús nimay je mayjäy ajcxy:

—Ca' nminaanim miid ñich ycixpi jadu'n ti yajmidoy jadayaabi ayuc huidibi ti choon tzajpjoty. ³¹ Jadachambi jada' Dios yajpocycähua'ñ naaxhuiñyäj, e nañ ypi-gaanipy je mujcu' ymic'ajt huidibi ane'mb naax-huiñyäj ajcxy. ³² Co ñich anajty jäy ti xyajcruudzpetyich, e co ñich anajty ti njugypicyich jadügtecy, e co ñich anajty ti nhuimbityich tzajpjoty, huin'it tüg'óciy jäy ajcxy huidibi xymibijcpich, nyajpa'ttigëhuibich jilby tzajpjoty ma nyajpaadyich.

³³ Paady jadu'n Jesús yminañ, jëbi huaad tüg'óciy jäy ajcxy huinjihuñhuip ti o'cin anajty ypadamy. ³⁴ Chi je mayjäy ajcxy yminañ:

—Ma Dios ñecy jilby jadu'n ymiñ jaybety co je Cristo huinixii je' y'ida'ñ. E ¿nej miich co cham jadu'n mina'ñ co copicy co yi' jäy huidibi tzoon tzajpjoty, huimbidad jadügtecy tzajpjoty? ¿Pín jedu'n mdijyp huidibi tzomb tzajpjoty?

³⁵ Chi Jesús nimay je jäy ajcxy:

—Jahueeni xii tiempo njac'ida'ñich miid miich ajcxy. Jadu'n ñich ndiy'ajt nej tüg jün huidibi codicxp jäy co ytüyöy. Cuychinäy ñich ndiy'ajt, co tzojc nhuimbida'ñich tzajpjoty, e miich ajcxy mhui'ma'ñ jadu'n nej jäy huidibi ca' jün miidity. Je jäy ajcxy huidibi ca' cuychinaaygixy ñich ndiy'ajt, ca' ajcxy nejhuñyigixy ma ñicxcixy. Jadu'n ajcxy nej jihuñyöygixy coodz, e ca' ijxcixy ma ñicxcixy. ³⁶ Com occhaani ñich ma miich ajcxy, nyaj'ixpijcp ñich miich ajcxy Dios ytiy'ajt. Pen xymibijccipich, m'ijtcixip ixpicy ma Dios ytiy'ajtin.

Co Jesús jadu'n je jäy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ijxin.

Je judíojäy ca' mibiga'ñ Jesús

³⁷ Ooy anajty canaag mijhuinma'ñ Jesús ti jatuuñ ma jäy ajcxy yhuinduu, e ca' anajty ajcxy ni ti tim mibijc-

cixy. ³⁸ Huidibi Jesús ytun ycapx, jilby anajty jadu'n yco-jayity ma je Dios y'ayuc necy, je Isaías ñecy, co Isaías jadu'n yminañ:

Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt. ³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n yminañ:

⁴⁰ Jadu'n yi' ajcxy nej jihuñy Dios ti yajhuindziygixy, e ti yajjotjuniygixy, jigix ca' y'ijxcixipy miid yhuin, e miid yjot yhuinma'ñ ca' huinjihuñyigixyipy, ni ycajothuim-bijtcixipy nej jëbi Cristo yajtzóocigixy.

⁴¹ Paady jadu'n Isaías yminañ je' co anajty ti ijxi Cristo y'oy'ajt, e chi cojay nej anajty ti icy.

⁴² Ca' nidüg'óciy judío ixpicytjic mijotmädy anajty Jesús. Jim anajty nijëjity huindzindijc huidibi mibijcp Jesús. Per miid je fariseojäy ycixpi co chachjotma'tcixy, paady anajty ajcxy ca' capxidzimigixy co mijpidaaccixy Jesús. Je' co chigiiygixy co jim yajpidzimiyb ajcxy tüc-ci'yi ma Dios ytiy, etz ma yi' judío ñaymujctac. ⁴³ Jacniği anajty tzojccixy co huen jäy cömáayigixy, ca'ydi co ajcxy Dios ycömayiyb.

Dios yajpocycähuij je mayjäy miid Jesús y'ayuc

⁴⁴ Chi jada' Jesús yminañ mic:

—Je jäy ajcxy huidibi xymibijcpich xymijpidaacpich, caminaanim ñich naydüg xymibijcpich xymijpidaacpich, nañ ymibijcyp ymijpidacy ajcxy je tiibi ñich ya naax-huiñ xyquexyich. ⁴⁵ E je jäy huidibi xy'ijxpich, tim jadu'n nipaady nej jihuñy ti icy je huidibi ti xyquexyich. ⁴⁶ ñich ti nmimiiñich ya naaxhuiñ Dios ytiy'ajt, jadu'n ñich ni-paady nej jihuñy tüg jün huidibi codicx je jäy ajcxy. Je jäy ajcxy huidibi xymibijcpich ca' ajcxy yhuimipy jibic-tuuby, jadu'n nej jihuñy ca' ajcxy chinaaygixy agootztu-uby. ⁴⁷ Je jäy ajcxy huidibi midoob ñich n'ayuc, e ca' cuy-dungixy, ca'p je' ñich je' ypocy ajcxy n'ixyöyaani nbayöyaani cham. Ca'p ñich ti nmiñich ya naaxhuiñ miid co jäy ajcxy ndzaachytunipyich miid ypocy ycixpi. Paady ñich ti nmiñich ya naaxhuiñ co nya-jpocyniñhua'dza'ñich yi' jäy ajcxy. ⁴⁸ Je jäy ajcxy huidibi xycapxhuimbijtibich n'ayuc, e ca' xycöbiga'ñich, ymiid ajcxy huidibi yajpocycähuij. Yi' ayuc huidibi ti ngapxyich, yi' yajpocycähuij ajcxy co anajty naax-huiñybi ti yhuaad'ajtñi co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxyich. Je' je' Dios Teedy y'ayuc, je huidibi ti xyquexyich, yi' ngapx-huäcxiyich y'ayuc. Je huidibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc ngapx-huäcxyich nyajniimaaygixyp. ⁵⁰ E nejhuñyibich co Dios y'ayuc ytiy'ajt ymimimiyb yi' tzinaayin jugy'ajtin huidibi ca' tücci'yi ycixy ytigoy. Paady ycix je ayuc huidibi ajcxy nyajmiidmiydacy, jadu'n nyajmiidmiydaaccixy nej Dios Teedy ti xyajnajtz'ane'miyich.

Jesús ypuji ydiscipulos ajcxy ytecy

13 Ca'ni anajty xii paady, pascuaxii anajty ajcxy tijy. Chi Jesús ñejhuñyib co anajty yxii ytiempo yhuaad'ajtñi mina chonaani ya naaxhuiñ yhuimbidaani

ma Dios Teedy. E Jesús ooy anajty tzocy jihuüy ymügügtijc ajcxy huidibi ya naaxhuiñ anajty ajcxy hui'mañ. Jadu'n tzocy jihuüy huinixi.

² Chi jada' Jesús etz ymügügtijc ytiüy ajcxy adzuu'ajtp (je pascuaxi adzu'ajtin). Ti anajty je mujcu' huinma'ñmöy Judas Iscariote, Simón ymang, co anajty Jesús cäyega'ñ ma ymidzip ajcxy. ³ Nejhuüyb anajty Jesús co je Dios Teedy ti yajcädigüyii tüg'óciy ymic'ajt, e Jesús nañ ñejhuüyb anajty co je' ti chooñ ma Dios y'it, e nañ jii by anajty jadüg'oc yhuimbida'ñ. ⁴ Chi ypidügy ma mesi, chi je yoñbyi yhuít ñayajniñjenduutti. Chi huijtzügy tüg huit huidibi mïd ñaymextiiti nabyöttiiti, ñayajmijxojtzpejti yhuindiüy. ⁵ Co jadu'n ñayñi'ixüy, chi pidacy ni ma tüg cäbuj'iñyoc. Chi nihuägüy ydis-cí pulos ajcxy ytecy. Chi yajtzondacy tecypujii tüg tüg, e mextiich pöttiich mïd je huit huidibi anajty ti ñayajhuindiüyüü.

⁶ Co nihuägüy Simón Pedro ytecy, chi Pedro yminañ:
—Huindzin, ca' huaad miich ndecy xypujich.

⁷ Chi Jesús y'adzooy:
—Huidibi ñich ndumyby ca' y'i miich ajcxy mhuiñjihuügyxjadachambi, jacomjicy miich ajcxy mhuiñjihuüpy.

⁸ Chi Pedro y'adzooy:
—Miich ca' huaad ñich ndecy xypujich ni caminaabi. Chi Jesús y'adzohuimbijty:
—Pen ca' mdecy nbuj, ca' ñich miich jëbi njäy'adyii.

⁹ E huin'it Pedro nimay Jesús:
—Huindzin, ca' ñich jëda'ajty ndecy xypujibich, hue' janchty tüg'óciy ngüjich etz ngohuajcich.

¹⁰ Chi Jesús nimay Pedro:
—Com tiibi mjot mhuiñma'ñ yajhuäch, ca' y'i ocjact-zojcni yajhuädzipty mjot mhuiñma'ñ jadügtecy. Tim jadu'n nej jihuüy naamni chiü, e cham ca' tzojcn yajtzihuübyich jadügtecy. Jëda'ajty mdecy nbujich cham. Miich ajcxy huädz mjot mhuiñma'ñ ajcxy mmïdiñ, oy ca' miich ajcxy nidüg'óciy.

¹¹ Com Jesús ñejhuüyb anajty pinjäy cäyegaanip ma ymidzip, e paady jadu'n yminañ:
—Ca' ni tüg'óciy miich ajcxy mjot mhuiñma'ñ yhuädzipty.

¹² Chi jada' co yajtecpujtay, chi jada' yoñyhuit yajtiüy jadüg'oc. Y'ixtacy ma mesi, e chi jada' nimay ajcxy:

—¿Nej mhuiñjihuüyb ajcxy ti ñich ti nduñich mïd miich ajcxy? ¹³ Miich ajcxy jadu'n minamb co ñich miich ajcxy myaj'ixpijcy, etz ñich miich xyhuindzin'ajtpich. E tiydudägy miich ajcxy mïna'ñ com ñich jëdu'n miich ajcxy mHuindzin. ¹⁴ Pen ñich miich ajcxy nyaj'ixpijcy etz xyhuindzin'ajtpich, e ti ñich miich ajcxy nyajtecpujy, nañ jadu'n miich ajcxy myajtecpujüyb miñ xyüpy.

¹⁵ ñich miich ajcxy ti nmöy tüg iixpejt, jigix ajcxy jadu'n mdunüpy jadu'n nej ti nduñich, e huin'it ca' amij agix nayjihuüyb ajcxy. ¹⁶ Janch janch ñich miich ajcxy yam jadu'n nnimäy co je huindzin jac mij je' ca'ydü y'i ytumbi. E nañ je' huidibi yajquejxyöyb jac mij je' ca'ydü huidibi quejxyöyb. ¹⁷ Co ajcxy tiy'ajt mnejhuüpy, chi

jotcujc ajcxy m'idüpy, pen mbadumyby ajcxy jadu'n nej nduñich.

¹⁸ Ca' nmina'ñich co nidüg'óciy miich ajcxy mbo-cymüdiety. Ti ñich y'i nnejhuüy pin ti nhuiñixyich. Ti nhuiñixyich tüg huidibi pocymïd, jigix cuyduunip nej anajty yjaybetyity ma Dios ñecy ma je Cristo jadu'n ymina'ñ: "Y'i' huidibi caymujcp mïd ñich, ti ñich y'i xymibidügy." ¹⁹ Ti ñich yam miich ajcxy jayjip nyajni-maaygixy, jigix co anajty jadu'n ytunyü yjadyii, mmibigipy ajcxy co ñich jëdu'n je Cristo. ²⁰ Janch janch yam ajcxy jadu'n nnimaaygixy co je jäy ajcxy huidibi cöbijcp je huidibi anajty nguejxypich, tim jadu'n ni-paady jadu'n nej ñich anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ymügügtijc co je Judas anajty cäyegaanip ma ymidzip

²¹ Co jadu'n Jesús yminañ, chi tajnip mayñip anajty ooy jotjoty huinma'ñjoty, chi capxypidzipty:

—Janch janch ñich miich ajcxy yam jadu'n nimäy co nidügti miich ajcxy xycäyega'ñich ma nmidzipich.

²² Chi Jesús ydiscípulos ajcxy ñayhuindixpejttaay nidüg nidüg. Ca' anajty ajcxy nejhuüy pin anajty jëdu'n Jesús ytijyp. ²³ Nidügti je' ajcxy huidibi anajty Jesús ooy mïd ñaychogyii ññäy anajty ma mesi tim huingon ma Jesús yhuinduu. ²⁴ Chi Simón Pedro yci' yaj'ixy yajhuin-jihuüy co huen yaj'amidooy Jesús pin anajty jadu'n yti-jyp. ²⁵ Chi je discípulos ajcxy huidibi anajty ññaayb ma Jesús yhuinduu nimay yhuindzin:

—¿Pin jadu'n mdiijyp?

²⁶ Chi Jesús y'adzooy:

—Y'i' je' pin anajty ñich nmooybich y'i tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'itiy co Judas je tzajcaagy cöbijcy, chi je mujcu' ytiüy ma je' y'ay yjot. Chi Jesús nimay Judas:

—Y'i' huidibi mdunamyby, tungo jadu'n mic'amy.

²⁸ Huidijaty anajty ajcxy jim caayb, ni pin cahuiñjihuüy je ayuc huidibi Jesús yajnimay Judas, nej je ayuc yhuimbizimy. ²⁹ Com je Judas anajty mïd je meeñybijty, paady ajcxy nijëjty huinjihuüy co anajty tijy ñimäyü:

—Nixc juy y'i' huidibi ajt nyajmayjajtim y'i' xiigixpi.

Jacjadyii ajcxy anajty tijy ñimäyü:

—Mo' tigatii ayoobitijc. ³⁰ Tim huin'itiy co je tzajcaagy cayday, chi ypidzipty Judas tiba'y, e ti anajty ycoodziñi.

Jesús ñajtz'ane'miy jemybi cötujcin

³¹ Co Judas ypidzipty, chi Jesús yminañ:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tzoön tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti iixcixy Dios ymic'ajt ma ñich, nañ tim jadu'n Dios yajniügüxigipy y'i' nmic'ajtich n'oy'ajtich tim mic'amy.

³³ Migügtijc huidibi ooy ndzocy njihuüyich, ca'

n'ochuäcxibaanich jecy mïid miich ajcxy. Xy'ixtähuibich miich ajcxy. Jadu'n nej ti nnimáaygixyich yi jacjadyii judíojäy ajcxy, nañ jadu'n ñich miich ajcxy yam njacni-maaygixy co ma nnicxa'ñich, ca' huaad miich ajcxy jilby mnicxcixy. ³⁴ Cham ajcxy nmöhua'ñi tüg ané'min huinjemybi. Cham miich ajcxy nyajnajtz'ane'mïhuaangixy jadüg'oc jadayaabi tiy'ajt: Naychójcigix nayjihuiyigix ajcxy nidüg nidüg, tim jadu'n nej ñich miich ajcxy ti ndzocy ti njihuïy. Naychójcigix nayjihuiyigix aguipxyi. ³⁵ Mïid jada ycixpi ñejhuïhuipy tüg'óciy jäy co ñich miich ajcxy ti nyaj'ixpijccixy co ajcxy nidüg nidüg mnaychogiiyb mnayjihuihuïyb.

Jesús ñimay ymigügtijc co je Pedro anajty coyüdzanip

³⁶ Chi Pedro ñimay:

—Huindzin, ¿ma miich mnicxa'ñi?

Huin'it Jesús y'adzooy:

—Ma ñich nnicxa'ñich miich ca' huaad xypanicxyich. Jac'axam xypanicxyich.

³⁷ Chi Pedro yminañ:

—E ¿nej co ca' huaad jëbi ñich miich nbanicxy? com ñich ngëyegamyich njugy'ajtïn ma yi o'cin mïid miich ycixpi.

³⁸ Chi jada' Jesús y'adzooy:

—¿Nej janch co mgëyega'ñi yi mjugy'ajtïn ma yi o'cin mïid ñich ycixpi? Janch janch ñich miich ajcxy yam jadu'n ñimäy, co ni ca'ni anajty jabom tugig'oc tzey yaaxëgy, co ñich miich anajty tugig'oc ti xycoyüchich.

Pinjaty mibijcp Jesús nicxip ma Dios Teedy yajpaady

14 Chi Jesús yjacminañ:

—Ca' ajcxy jotmay mjihuïy ma m'aa mjot mïid jada ayuc. Mibic ajcxy Dios etz ñich nañ jadu'n mibijc-cich. ² Jiiby ma ñich nDeedy chinäy, jilby migtigiydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac mïid miich ajcxy ycixpi. ³ E co ñich anajty ti nba'ttigëyich, e ti ni'ixiyyich tzinaaydac jayijp mïid miich ajcxy ycixpi, huin'it ajcxy nihuimbidity, jëbi ñich ajt naydügmujcim, jigix ma anajty n'ityich, nañ jilby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nnicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuïygixy ma miich mnicxa'ñi, e ca' ñich ajcxy nnejhuïygixy nej jëbi njá'tcixibyich jilby.

⁶ Chi Jesús y'adzooy:

—Jadu'n nej ti ndzinäyich jada je' je iixpejt nej Dios tzocy co miich ajcxy mdzinähuipy. Nyejcpyich je tiy'ajt huïdibi jëbi huaad mguychinaaygixy. Co jadu'n mguydundáygyipy ñich ndiy'ajt, chi mjá'tcixipy ma Dios. Nyejcpyich je jugy'ajtïn huïdibi ca' tücci'yi ycixy ytigoy. Ca' ni pinjäy yjadipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnicxa'ñi miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e mïid tim yi'yi jotcuyc'adipyich ajcxy.

⁹ Paady Jesús ñimay je Felipe:

—Cham xii jimijt ñicxni maabi ñich nja'ityich mïid miich ajcxy, e ¿ca'ni miich xytimy'ijxhui'myich Felipe? Yi jäy ajcxy tüibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huïdibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'ñ huïdibi ajcxy m'ijxyp ndumyibich, yi Dios Teedy huïdibi ijtp ma ñich, yi jadu'n tumb. ¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibi-gaangixy, mibic ajcxy mïid je mijhuinma'ñ ycixpi huïdibi ti nduñich. ¹² Janch janch ñich miich ajcxy jadu'n nimaaygixy co je jäy ajcxy huïdibi xymibijcpich, nañ ytunipy ajcxy nañ jadu'n yi mijhuinma'ñ huïdibi ti nduñich. Jac tim nigü tunipy mijhuinma'ñ, com ñich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy mïid ñich nxii, ndunipyich yi'. Dios Teedy huïdibi nDeedy'ajtypich, je' cömay y'idip mïid huïdibi miich anajty ajcxy mdumyib mïid ñich nmic'ajt. ¹⁴ Co myajmibijctzohuipy tijaty, xycapxáatibich nxii, huin'it nguydunipyich huïdibi anajty ti mbijctzoogixy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydünigich ajcxy tüg'óciy n'ayuc ndiy'ajt, jadu'n nej anajty ti nna-jtz'ane'mëyich. ¹⁶ E co ndzoonibyich, chi nbijctzoo-huïbyich yi Dios Teedy jadüg yjaymïd huïdibi ajcxy xy-jaymïd'adib. Dios ajcxy xymöhuiipy jadüg jaymïd huïdibi ajcxy xycapxhuijip, je huïdibi ajcxy mjot'amij'adiyb, e je' xymïd'idipy ajcxy huinixii. ¹⁷ Je huïdibi xycapxhuijip, je' jada'ajty Dios yjihui'ñ ymic'ajt, je Espiritu Santo. Je' Dios ytiy'ajt ymïd. Dios yjihui'ñ ymic'ajt ca' adigëhua'ñ yi naaxhuiñjyay huïdibi ca' xymibicyich. Com ca' ajcxy ixxy, e nañ ca' ajcxy ixxy'adyii je Espiritu Santo. Miich ajcxy m'ixy'ajtyp je Espiritu Santo, com je' tzinaayb ma miich ajcxy, e nañ xy'adigëhuipy xyjottigëhuipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nni-huimbidityich miich ajcxy jadügtecy. ¹⁹ Tim huingónip yi xii tiempo mina yi jacjadyii naaxhuiñjyay ajcxy ca' xy'ocjac'ijxnibich. Com jadu'n nej ñich njactzinähua'ñ, ca' ñich njugy'ajtïn ycixipy ytigoyipy tücci'yi. Nañ jadu'n miich ajcxy mjactzinähua'ñ, ca' mjugy'ajtïn ajcxy ycixipy ytigoyipy tücci'yi. ²⁰ Co anajty Dios yjihui'ñ ymic'ajt ajcxy xy'adigëy xyjottigëy, huin'it ajcxy mnejhuïhuipy co nyajpaadyich ma nDeedyich, yi Dios Teedy, e miich ajcxy myajpaady ma ñich, e ñich nañ jadu'n yajpatpich ma miich ajcxy. ²¹ Je jäy ajcxy huïdibi ñich n'ayuc ndiy'ajtyich xycöbijcip, e cuydungixy, je' je' jadu'n xychojcpich, e tzogëb je' ñich nDeedy. E ñich nañ jadu'n ndzogyipy njihuïhuïbyich je' ajcxy, e nnayya-jniguëxëgybich ma je' ajcxy.

²² Je jadügpi Judas, ca' nminaanim Judas Iscariote, ni-may Jesús:

—Huindzin, ¿nej co mnayajniguëxiga'ñyii ma ñich ajcxy, e ca' mnayajniguëxiga'ñyii ma je jäy ajcxy huidibi ca' xymijpidägy?

²³ Chi Jesús je' y'adzooy:

—Yi jäy ajcxy huidibi xychojcpich xyajmij'ajtpich, xycuyduunibich yi' ajcxy ñich n'ayuc ndiy'ajt. E huin'it yi' ajcxy chogiiyb ñich nDeedy. Je nDeedyich etz ñich miinip ñich ajcxy ma je jäy ajcxy huidibi xycuyduunip ñich ndiy'ajt, e tzinaydacpigipiyich ma yi' ajcxy yjot yhuinma'ñ. ²⁴ Je jäy ajcxy pinjaty ca' xychocyich, nañ ca' ajcxy ñich n'ayuc xycuyduunich. Paady ca' nnayajniguëxiga'ñyiiich ma je' ajcxy. Com yi' ayuc huidibich miich ajcxy nyaj'amido'ijtyp, ca' yi' ñich ngi'm'ayuc'adyii. Yi' je' Dios Teedy y'ayuc ytiy'ajt, com yi' ñich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimaaayb, jadu'n nej njacyaanigyich ya naaxhuiñ miid miich ajcxy, ma ca'ni ndzooñich. ²⁶ Per je Espiritu Santo huidi minam, je' ajcxy xycapxhuijip. Dios Teedy yquexamy je Espiritu Santo miid ñich nxii. Je Espiritu Santo xyajnejhuiydähuipy miich ajcxy tüg'óciy tiy'ajt, e nañ xyaj'ajihuñhuñb tüg'óciy jadu'n nej ñich miich ajcxy nni-maaygixy.

²⁷ Ñich miich ajcxy nyajmihu'ny jotcujc'ajtin. Jadu'n nej ñich njotcujc'atyich, nañ nyajjotcujc'adipyich miich ajcxy. Yi' jotcujc'ajtin huidibi nyajmihuñmaamyich miich ajcxy, ca' yi' yjadu'nity nej je jotcujc'ajtin huidibi yajpaatp ya naaxhuiñ. Ca' mdaicixy maygixy, nañ ca' mdzigiygixy. ²⁸ Ti ñich miich ajcxy nni-maaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nnicxa'ñich ma Dios Teedy, com yi' Dios Teedy jac mij yi' ca'ydi ñich. ²⁹ Ti ñich jada tiy'ajt jayijp nimiydägyich ma ca'ni ndzooñich, jigix co anajty je tiempo paady mina jadayaabi ytunñiyb yjadiyb, huin'it ajcxy mmibigipy ñich n'ayuc.

³⁰ E ca' ñich miich ajcxy mijcajee ooy njacmñidmiydägaangixy yam. Com tim huingónip mina je mujcu' huidibi ane'mb ya naaxhuiñ xyñimina'ñich. Ca' ñich yi' huaad jëbi xymimadägyich. ³¹ Per copicy yi' nguydunipyich Dios Teedy y'ayuc nej xyajnajtz'ane'mñiyich, jigix je naaxhuiñjy nejhuñhuipy co nyajmij'atyich yi' Dios Teedy. Pidëccix, tzoc'ajt huingduum jamim.

Je camuuxy'aadz etz y'aacx

15 Chi Jesús jacnimay ydiscipulos ajcxy:

—Jadu'n ñich nipaady nej camuux'aadz ma tüg muuxy'aadz cam. Ñich nDeedy, yi' Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jäy jadu'n ajcxy nipaady nej muuxy'aadz y'aacx. Je jäy ajcxy huidibi ca' cuychinäy ñich ndiy'ajt, yi' Dios Teedy yajcödigoyñb, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jäy ajcxy huidibi cuydundaayb ñich ndiy'ajt, Dios yaj'oyñb je' ajcxy yjot yhuinma'ñ, jëbi oybi tuñ, jadu'n nej je muuxy'aadz cam cuend'ajtpi huijtz'oyñy je

muuxy'aadz y'aacx, jigix jëbi nigí ytiim'aty. ³ Yi' ayuc huidibi ti nyajnimaaaygixy, yi' ti yajhuäch yi' jibicpi ma miich ajcxy mjot mhuinma'ñ. ⁴ Mibijccich ajcxy, panëxcigich ajcxy ndiy'ajt huinixii. Co ajcxy jadu'n mdunipy, ñich miich ajcxy miid'idipy huinixii. Jadu'n nej ixipy camuuxy'aadz y'aacx co ca' ytiim'aty co ahuinggujc y'ity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma ñich, ca' mmimadäaccixipy mguychinäygyixy ñich ndiy'ajt.

⁵ Jadu'n ñich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma ñich, e ñich nyajpaady ma je' ajcxy, je' ajcxy oyhuinma'ñ tunam mij cajee, tim jadu'n nej camuuxy'aadz huidibi tiim'ajtp may'amy. Co ixipy ñich ca' nyajpaady ma miich ajcxy, ca' miich ajcxy huaad ti mdungixy. ⁶ Co jäy ajcxy ndiy'ajt xy'ixmájtzbich, Dios ajcxy yajcödigoyñb, tim jadu'n nej jäy yajcödigoy miid jin yi' muuxy'aadz y'aacx huidibi ymibuxñy co ca' ytiim'ajtni. Co je y'aacx ytëdzity, chi ajcxy yajmucy, e pidaaccixy jinjoty, e jadu'n jilby ñidooyñy jinjoty.

⁷ Co miich ajcxy m'ijtcixy ma ñich, e co ñich n'ayuc nañ jadu'n ijtp ma miich ajcxy mjot mhuinma'ñ, jëbi mbijctzoogixy ti ajcxy mdzojcyp ma Dios, e nguydunipyich miid miich ajcxy ycixpi. ⁸ Chi je jäy ajcxy cömayipy Dios co miich ajcxy mguydunipy ñich ndiy'ajt tydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixipy nej tudägy mguydungixy ñich ndiy'ajt, chi je jäy ajcxy tydudägy nejhuñhuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuñyich, nañ tim jadu'n ñich miich ajcxy ti ndzocy ti njihuñyich. Ndzogipy njihuñhuibyich miich ajcxy huinixii co ca' ajcxy xy'ixmájtzbich ndiy'ajtich. ¹⁰ Co mguydundähuipy ajcxy jadu'n nej nyajnajtz'ane'mñiygixy, ndzogyich njihuñhuibyich miich ajcxy huinixii. Tim jadu'n nej nguyduñich yi' huidibi Dios Teedy xyajnajtz'ane'mñiybich, e yi' xychojcpich xyjihuñyibich huinixii.

¹¹ Cham jadayaabi ayuc nyajnajtz'ane'mñiygixy, jigix jotcujc m'ijtcixy. Jadu'n nej jotcujc ti n'ityich, e nañ jadu'n miich ajcxy mjotcujc'adipy anaxy. ¹² Jadaabi ayuc ñich miich ajcxy nyajnajtz'ane'mñiybich co naychójcigix nayjihuñyigix nidüg nidüg, tim jadu'n nej ñich miich ajcxy ndzocy njihuñy. ¹³ Je tiy'ajt jac'oybi co migügtijc ajcxy naychogñyb nayjihuñhuñyb, co tüg jäy ceyegipy yjugy'ajtin mñid ymígügtijc ycixpi. ¹⁴ Ñich miich ajcxy migüg'ajtyp, pen mguydumyib nej ajcxy nyajnajtz'ane'mñiygixy. ¹⁵ Jadu'n nej xñ tiempo yjacnicxa'ñ, ca' miich ajcxy n'ocnaydijnip ñich ndumbi. Com je tumbi ca' huinjihuñy huidibi yhuindzin ytumyib. Hue' miich ajcxy nyajnaxyich nmigügtijcich, com tüg'óciy tiy'ajt tñibi nmidooyich ma ñich nDeedy, yi' Dios Teedy, ti ñich miich ajcxy nni-maaygixy. ¹⁶ Ca' nminaanim ñich miich ajcxy ti xyhuin'ixy. Ñich miich janchtiy ajcxy ti nhuin'ixy. E ti ñich miich ajcxy nyajñibicy co nicxy mgapxhuäccixy ñich n'ayuc. E nañ mayjäy mijpidägipy je ayuc huidibi miich ajcxy mgapxhuäccixy. E nañ ñich n'ayuc, huidibi miich ajcxy mgapxhuäccixy, y'idipy ma je jäy ajcxy yjot yhuinma'ñ huinixii. Paady ycix tüg'óciy tijaty

miich ajcxy mbijctzooyb ma Dios Teedy miid ñich nxii, yi' ajcxy xymöhuipy. ¹⁷Jada ayuc ajcxy yam nyajna-jtz'ane'miib co ajcxy mnaychogiiyb mnayjihuihuib miñ xyipy.

Je maybi naaxhuiñjyäy ca' ajcxy ixaangixy Jesús etz cham je' yjäy

¹⁸ Co je may naaxhuiñjyäy ca' xy'ixaangixy miich ajcxy, ca' ajcxy ooy mhuinmayipy, com mnejhuib ajcxy co ñich nañ jadu'n jac jayijp ca' yi' ajcxy ti xy'ixáangixyich. ¹⁹ Co ixyipy ytügäy miich ajcxy m'ayuc mdiy'ajt miid je jacjadyii naaxhuiñjyäy y'ayuc ytiy'ajt, huin'it ixyipy ajcxy xychojccixy xyjihuiygixy, com tú'ciy miich ajcxy mhuinma'ñ ixyipy miid yi' ajcxy yhuinma'ñ. Janch com co ca' ytügäy miich ajcxy m'ayuc mdiy'ajt miid je jacjadyii naaxhuiñjyäy y'ayuc ytiy'ajt, paady je jacjadyii naaxhuiñjyäy ca' ajcxy xy'ixa'nip. Com ñich miich ajcxy ti nyajijphuijztüdy, jadu'n nej yi' jacjadyii naaxhuiñjyäy ajcxy chinaaygixy yjugy'ajtcixy.

²⁰ M'ajihuñhuib ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydi miich ajcxy. Jadu'n nej naaxhuiñjyäy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidoohuaangixy. ²¹ Nijot ajcxy y'iditzaangixy miid miich ajcxy ycixpi, com ca' ajcxy ixy'adyii Dios Teedy huidibi xyquejyich ya naaxhuiñ.

²² Co ixyipy ca' ti nmiiñich ya naaxhuiñ nyajnimäyich je jäy ajcxy Dios ytiy'ajt, ca' ixyipy ajcxy pocy miidity. Per com ti nmiiñich ya naaxhuiñ, paady cham ypocy ajcxy miidity co ca' ajcxy xy'ixa'ñich. ²³ Je jäy ajcxy huidibi ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi' ajcxy yhuinduu mijhuinma'ñ, huidibi ca' ni pin jäy tuñi, ca' ixyipy ajcxy pocy miidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judíojäy ajcxy ley ñecy, ma jadu'n ymína'ñ: "Ni ti tiy'ajt ycaca'ty, co ñich yi' ajcxy ca' xy'ixa'ñich."

²⁶ E co anajty xyñigidaaccixy yi' Espiritu Santo, yi' huidibi xycapxhuijip ajcxy, je huidibi miich ajcxy nyajniguexam, chon ma Dios Teedy, je huidibi Dios ytiy'ajt miid. Yi' xyñidiy'ajt'adaambich co Dios ytiy'ajt nmiiidityich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmiiidityich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16 Ti ajcxy yam tiy'ajt njacyajnimaaaygixy, jigix ca' ajcxy m'ixtigihuaägy. ² Com judíojäy ajcxy xy'ixhuidizy ajcxy ma ajcxy yi' ñaymujctac. Ypadaamy yi' xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tiibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ixy'adyii yi' Dios Teedy, etz nañ jadu'n ca' xy'ixy'adyijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi

m'ajihuñhuib ajcxy co ti anajty jayijp nnimaaygixy co ayo'n tzaachypi mminaxa'ñ myajna'ñ ajcxy.

Dios yjihui'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy miid jégix nmii'dity ajcxy. ⁵ E cham janchtiy nnicxáanibich ma yi' huidibi ti xyquexyich ya naaxhuiñ. E ni tüg miich ajcxy xyca'ami-dooyich: "¿Ma mnicxa'ñ?" ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjhuigyixy. ⁷ Oy ixyipy miich ajcxy cham mjatajy mjamay, tiy'ajt nej nmína'ñich co jac'oy miid miich ajcxy ycixpi co nhuimbidityich ma Dios Teedy. Co ixyipy ca' jilby nnicxa'ñich tzajpjoty, ca' ixyipy xyñiminaangixy Dios yjihui'ñ ymic'ajt, je Espiritu Santo, je huidibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espiritu Santo miid ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuipy je jäy ajcxy co Dios tiydunib miid ypocy ycixpi. ⁹ Yi' Espiritu Santo yajjihui'ñybigipy jäy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espiritu Santo yajnejhuñhuipy jäy ajcxy nej huaad cuych-naaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca' xy'ocjac'ijxnibich. ¹¹ Je Espiritu Santo yajhuinjhuñhuipy je jäy ajcxy co Dios tiydunib ajcxy miid ypocy ycixpi huidibi ajcxy ca' tiydudägy chinaaygixy. Com yi' Dios ti yi' mujcu' tiyduñ miid ypocy ycixpi.

¹² Ooy may ayuc ñich nmii'dity huidibi njayajnimähuaamyich ajcxy per ca' miich ajcxy mhuinjhuñhuipy cham. ¹³ Jacjiini mhuinjhuñhuipy ajcxy je ayuc huidibi njayajnimähuaamy ajcxy, co Dios quexipy je Espiritu Santo ya naaxhuiñ huidibi tiy'ajt miid. Yi' je' miich ajcxy xyajhuinjhuñhuipy tüg'óciy Dios ytiy'ajt. Com yi' ca' ycimhuinma'ñ tunipy. Yi' janchtiy ñigapxtähuiipy tüg'óciy ayuc tiy'ajt huidijaty anajty ymidooyb ma Dios Teedy, e nañ yajniguexictähuiipy tüg'óciy tiy'ajt huidibi mimb cidaacp. ¹⁴ Je Espiritu Santo ñich yi' capxpaady xyaj'idipyich, com yi' ñich ndiy'ajt miich ajcxy xyajhuinjhuñhuaam. ¹⁵ Tüg'óciy huidibi Dios Teedy ymiid, nañ njé'ajtypich yi', paady jadu'n ti nmína'ñich co je Espiritu Santo xyajhuinjhuñhuipy ajcxy ñich yi' n'ayuc yi' ndiy'ajtich.

Jesús ñimay ymígügtjic co ajcxy yjotmay ahuimbidity jotcujc'ajtin

¹⁶ Tim huaad'ajtp xii tiempo, co ñich miich ajcxy ca' xy'ocjac'ijxip. Chi co xii tiempo yjacnajtzninicxihuip, huin'it ñich miich ajcxy xyjac'ixipy jadüg'oc.

¹⁷ E huin'it ajcxy nijéjity Jesús ydiscipulos ajcxy ñayñimaayi miñ xyipy ac jéy:

—¿Ti jadu'n ytiy'p? Co jadu'n ymína'ñ, co tim huaad'ajtnip xii tiempo mina ñich miich ajcxy ca' xy'ocjac'ijxnibyich, e co yjacnajtzninicxihuip xii tiempo, huin'it miich ajcxy xyjac'ixipyich jadüg'oc, com nnicx-aamich ma Dios Teedy. ¹⁸ Chi ajcxy jadu'n ñayñimaayi miñ xyipy:

—¿Ti jadu'n ytiyamy? Co jadu'n ymína'ñ co tim huaad'ajtnip xii tiempo. Ca' ñich ajt nhuinjihuuyim ti jadu'n ytiyamy.

¹⁹ Com Jesús ñejhuuyb anajty nej ajcxy yja'ami-doohua'ñyii, chi nimay ajcxy:

—Yi' miich ajcxy ooy mjayajtiñhua'ñ. ¿Nej co jadu'n ti nmína'ñich? Tim huaad'ajtnip xii tiempo co ñich miich ajcxy ca' xy'ocjac'ijxnipy. E chi yjacnajtzninixhup xii tiempo, e chi miich ajcxy xyjac'ixipyich jadüg'oc.

²⁰ Janch janch ñich miich yam nnimaaygixy co mjetmaybaadip ajcxy, e nañ myäxip ajcxy miid jotmay. Chi je naaxhuiñyäj ajcxy huidibi ca' xymijpidägyich, xondagam ajcxy, e miich ajcxy nañ mjetmaybaadip. Per yi mjetmay ajcxy ahuimbidity tüg xondaacin.

²¹ Jadu'n ajcxy mjada'ñ jadu'n nej tüg töxyjäy tzaachypí jihuy co y'ung yma'xung'ada'ñ. E co ti yma'xung'aty ypi'c'ung, chi jäydigoy yi tzaachypí miid xondaacin co tüg jäy ti ymiñ ya naaxhuiñ. ²² Tim jadu'n nej yjaty miid je töxyjäy, nañ jadu'n yjada'ñ miid miich ajcxy. Cham ajcxy jotmay mjihuuy ma m'aa mjet, e chi co xy'ixipyich jadüg'oc miich ajcxy, huin'it ajcxy m'aa mjet yxondaga'ñ. E ni pin huaad mxondaacin ajcxy xy-capijcipy.

²³ Je huin'it xiimbi (co anajty je Espíritu Santo ti ymiñ ya naaxhuiñ) ca' ñich miich ajcxy ni ti xyjacyajmbijctzohuipich, com janch ñich miich ajcxy yam jadu'n ni-maaygixy co tüg'óciy huidijaty myajmayajtcixyp, chi ajcxy mbijctzohuipy ma Dios Teedy miid ñich nxii, e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios miid ñich nxii. Pijctzoogix, e xymöhuipy ajcxy yi', jigix mjetcugihup ajcxy anaxy.

Jesucristo ymimadac je jibic-huinma'ñ ya naaxhuiñ

²⁵ Tüg'óciy jada ayuc tiy'ajt ac jñhuimbit miich ajcxy ti nyajnimäy. Huingomb xii tiempo mina tiydudägy ajcxy nyajmiidmiydactahuipy yi Dios Teedy y'ayuc ytiy'ajt yaxxon, e ca' y'ocjñhuimbitiñ. ²⁶ Je huin'it xii co anajty ñich ti nhuimbityich ma Dios Teedy, jébi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzóogixipy miid ñich nxii, xymóoygixipy yi' Dios Teedy. Ca' ycopicyity co ñich yi' nmibijctzohuipy miid miich ajcxy ycixpi. ²⁷ Com yi' Dios Teedy nañ xychojcp xyjihuyb yi' miich ajcxy. Com miich ajcxy jayijp ti xy-chocyich ti xyjihuyich, e ti mmibicy ajcxy co ti nd-zooñich ma Dios Teedy, paady Dios miich ajcxy xymöhuipy tijaty anajty myajmbijctzooyb. ²⁸ Jiiby ñich ndzooñ ma Dios Teedy yajpaady, co nmiiñich ya naaxhuiñ, per jadachambi n'ixmájtznibyich jada naaxhuiñy-bi, e nhuimbijtnich ma Dios Teedy.

²⁹ Huin'it je' ydiscipulos ajcxy ymínañ:

—Cham janchtiy tudägy miydägy, ca' m'ocyajtuuni jñhuimbit ayuc. ³⁰ Cham ñich ajcxy nnejhuuy co miich mnejhuuyday tüg'óciy tiy'ajt. E ti xyajnimaydäyich co anajty ca' ti tiy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixy? ³² Jihuuyñybijccix co huingonip je xii tiem-

po, e ti tim paady mina miich ajcxy mgueec-huäcx-táaygixipy nidüg nidüg ma pin timdzocy, e xya-jhu'mgixich naydüg. Per ca'p ñich nnyadügity, com yi Dios Teedy yi' ijtp miid ñich. ³³ Miich ajcxy yam jada ayuc nyajnimayb, jigix ajcxy jotcujc'ajtin mbaadip ma ñich. Ya naaxhuiñ mbadamy ajcxy ayo'n etz tzaachypí. Jotcugiygix, ca' mdajcixy maygixy, com ti nmimadägyich yi jibicpi ya naaxhuiñ.

Jesús ymibijctzou Dios miid ydiscipulos ajcxy ycixpi

17 Co Jesús jadu'n ymínañ jayijp, chi ypa't'ijxy tza-jpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayiy. Yaj-niguëxig ñich nmic'ajt ñich n'oy'ajt, com ñich miich nDeedy'ajtypich, jigix ñich nañ jadu'n nya-jniguëxigbyich miich mmic'ajt miich m'oy'ajt ma yi jäy ajcxy. ² Com miich ti xymöyich mic'ajt ma tüg'óciy jäy, jébi nmöyich ajcxy jugy'ajtin huidibi ca' ycixipy yti-goyipy. Nmöhuibych jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'yajtp je Dios janchypí, je Dios tügpajcpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymiid ajcxy jugy'ajtin huidibi ca'ycixipy yti-goyipy nimínaa.

⁴ Ti ñich nyajniguëxigych miich ajcxy yi' nmic'ajt ya naaxhuiñ, co ñich ti nduñ yi mdung huidibi miich xya-jnibijcich. ⁵ Jadachambi Dios Teedy yajmijtigiygich miich, miid je mic'ajtin huidibi anajty nmíidich ma miich mhuiduu co anajty ca'ni naaxhuiñybi chondacyñi.

⁶ Ti ñich miich ya naaxhuiñ nyajniguëxici yi' nmic'ajt ma yi jäy ajcxy huidibi miich xymooyich, huidibi miich mhuin'ijx ma naaxhuiñyäj ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuuyñip yi' ajcxy, co tüg'óciy tijaty tiy'ajt ñich miich yi' xymooyb, jiiby yi' chooñ tzaajpoty ma miich. ⁸ Com yi' ayuc huidibi miich ti xymöyich, ti ñich yi' ajcxy nyajnimaydäy, e ti yi' ajcxy cobijccixy. E nañ ti ajcxy huinjihuuygixy tiydudägy co ñich jiiby nd-zooñich ma miich, e nañ ti ajcxy mbijccixy co miich ya naaxhuiñ xyquejyich.

⁹ Miid yi' ycixpi ajcxy miich Dios Teedy nmibijctzooy, ca' nmínaanim miid jacjadyii naaxhuiñyäj ajcxy ycixpi nmibijctzoy. Miid yida'ajty ycixpi ajcxy huidibi miich ti xymöyich, com nañ mjé'ajtyp miich yi' ajcxy. ¹⁰ Tüg'óciy tijaty ñich njé'ajtyp, nañ mjé'ajtyp miich yi', e tijaty miich mjé'ajtyp nañ njé'ajtyp ñich yi'; e ñich nmic'ajt niguëxi'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. ñich njäy ajcxy jacyajpadam ya naaxhuiñ. Nñicxñibich jiiby tzaajpoty ma miich. Dios Teedy, cuend'at ñich ndiscipulos ajcxy miid miich mmic'ajt huidibi miich ti xymöyich, jigix yi' ajcxy tú'ciy yjot yhuinma'ñ yajpaadipy ma miich, tim jadu'n nej ñich ajt tú'ciy njot huinma'ñ nyaj-paatim. ¹² Co anajty ñich njac'yaajity naaxhuiñ miid ñich njäy ajcxy, ti ngüend'atyich anajty ajcxy miid je mic'ajt huidibi miich xymooyich. E ni tüg ajcxy ca' yhuinma'ñy-digooy. Abicy ñich n'octimpidägy je huidibi nayyajhuinma'ñyidigooyi (je Judas Iscariote), co yi' anajty jadu'n

yajcuydunam jadu'n nej jaybety ymiñ mïid yí' ycixpi etz mïid ñich ycixpi.

¹³ Cham ñich miich niba'ttigíhuaani jada'. Miich m'ayuc mdiy'ajt nyajni'maaybich jada naaxhuiñjáy ajcxy huidibi nyaj'ixpijcy'pich, jigix agujc jotcujc yhu'i'mip ajcxy. ¹⁴ Tí ñich ajcxy yí' nyajni'maydáyich miich m'ayuc mdiy'ajt. E ca' ajcxy y'ixa'ñyíi yí naaxhuiñjáy ajcxy huidibi ca' xymijpidágyich. Com je' co ajcxy yjot yhuinma'ñ ti yajtigach, ca' ytügíy mïid yí jacjadyii naaxhuiñjáy yjot yhuinma'ñ. Jadu'n nej ñich ca' ytügíy njot nhuinma'ñ mïid naaxhuiñjáy ajcxy yjot yhuinma'ñ.

¹⁵ Ca' ñich cham miich nmibijctzoy co myajpidzimipy ñich ndiscípulos ajcxy ma jada naaxhuiñyí. Hue' janchtiy tun may'ajt cuend'at ajcxy ma yí ca'oybi ymiñ.

¹⁶ Yí' ajcxy yjot yhuinma'ñ ca' ytügíy mïid yí jacjadyii naaxhuiñjáy ajcxy yjot yhuinma'ñ. Tím jadu'n nej ñich ca' ytügíy njot nhuinma'ñ mïid yí jacjadyii naaxhuiñjáy ajcxy yjot yhuinma'ñ. ¹⁷ Yajhuaatzí ajcxy yjot yhuinma'ñ mïid miich m'ayuc, com yí m'ayuc yí' je' tiy'ajt mïid. ¹⁸ Jadu'n nej miich xyquejxyich ya naaxhuiñ, nañ jadu'n ñich yí' ajcxy ngejxhuácxíyich ya naaxhuiñ. ¹⁹ Mïid yí' ajcxy ycixpi tí nnyagíyegyiijich amuumdúg'ot ma miich, jigix yí' ajcxy nañ jadu'n ñaygíyegíy amuumdúg'ot ma miich, co ajcxy cuydunipy miich m'ayuc mdiy'ajt.

²⁰ E ca' ñich jada'ajty ajcxy nibijctzohuñyich. Hue' ñich janchtiy nibijctzohuñyidaaybich tóg'óciy jáy ajcxy huidibi xymibíjcbich xymijpidágibich mïid yí ayuc huidibi ñich ndiscípulos ajcxy ycapxhuácxípy. ²¹ Huen ajcxy nidúg'óciy yjot yhuinma'ñ yajtúgíy, jadu'n nej miich Dios Teedy mjot mhuinma'ñ yajpaady ma ñich, e ñich njot nhuinma'ñ yajpaady ma miich. Co yí' ajcxy yjot yhuinma'ñ yajtúgíhuipy mïid ñich ajt njot nhuinma'ñ, huin'it jacjadyii naaxhuiñjáy ajcxy mibigípy co miich xyquejxyich ya naaxhuiñ. ²² Tí ñich ajcxy nmöyich je tiy'ajt etz je oy'ajt huidibi ñich miich tí xymöy, jigix ajcxy yjot yhuinma'ñ jatyimy yajtúgíhuipy ajcxy, jadu'n nej ñich ajt njot nhuinma'ñ yajpaatim tú'ciy. ²³ Ñich yajpatpich ma ñich njäy, e miich nañ myajpatp ma ñich, jigix tiydudágy ajcxy tūgmucy y'idípy, e nañ jigix naaxhuiñjáy ajcxy jatyimy nejhuñhuipy co miich xyquejxyich ya naaxhuiñ, e nañ co yí' ajcxy tí mdzocy tí mjihuñy jadu'n nej ñich miich xychocy xyjihuiñyich.

²⁴ Dios Teedy ndzojcpyich co yí jáy ajcxy huidibi miich tí xymöyich y'idípy ajcxy nañ jadu'n ma anajty n'ityich jiiiby tzajpjoty, jaydëbi ajcxy ixípy ñich nmic'ajt ñich n'oy'ajt huidibi miich tí xymöyich. Com miich tí xychocy tí xyjihuiñyich jacjayijp ca'ni anajty naaxhuiñyí myajcojyñi. ²⁵ Dios Teedy, miich ooy mmijity mjanchity, e yí jacjadyii naaxhuiñjáy ca' ajcxy yí' xy'ixy'ajtyp. Ñich miich n'ixy'ajtyp. Ñich njäy ajcxy tí mibicy tí mijpidágy co miich xyquejxyich ya naaxhuiñ. ²⁶ Tí nyajni'maayich yí' ajcxy pin miich, co miich je' Diosip. E njacya-jnimähuaamyich yí' ajcxy tiydudágy, jigix yí' ajcxy nañ jadu'n ñaychogíy ñayjihuiñyib nidúg nidúg, jadu'n nej miich xychocyich xyjihuiñyich, e nañ jadu'n jigix ñich ndiy'ajt yajpaadipy ma yí' ajcxy yjot yhuinma'ñ.

Ymajtz ajcxy Jesús

18 Co jadu'n Jesús ycapxymiydacy jayijp, chi jada' ñicxy mïid je jáy ajcxy huidibi anajty ajcxy yaj'ix-pijcyp. Ñicxy ajcxy jim'amy huoc nínaxy, je huoc hue' anajty xijity Cedrón. Ñicxy ajcxy jim ma anajty tūg aguemy. Chi Jesús ytigíy ma je aguemy mïid ydiscípulos ajcxy. ² Judas huidibi anajty cýyegam Jesús, ñejhuñyib anajty ma je it ma anajty mïid'oy canaag'oc je ydiscípulos ajcxy. ³ Chi jada' Judas mïiddzooñ soldados ajcxy etz jacjadyii tungmïidpi huidibi je teedy yhuindzin ajcxy etz fariseojáy ajcxy yquejx. Chi ajcxy yja'ty ma je it ma anajty Jesús yajpaady, ymïid ajcxy lintera, ymïid ajcxy chinjñ etz canaagnax tijaty huidibi anajty ajcxy mïid chiptuñ. ⁴ E Jesús com ñejhuidyaayb anajty tūg'óciy nej anajty yjada'ñ y'ayohua'ñ, chi jipcohuägy je ymaymizip ajcxy, e nimay:

—¿Pin ajcxy m'ijxtaayb?

⁵ Chi je' ymidzip ajcxy y'adzooy:

—Yí' ñich ajcxy n'ixtaayb je Jesús, je Nazaret jáy.

Chi Jesús yminañ:

—Ñich jëdu'n.

Je Judas huidibi anajty cýyepc Jesús, jim anajty ytinäy mïid Jesús ymidzip. ⁶ Co Jesús jadu'n yminañ: "Ñich jëdu'n." Chi ajcxy yëphuibijtay jadu'ñyí. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yí Jesús, je Nazaret jáy. ⁸ Chi Jesús yminañ:

—Tí ajcxy njanimäy co ñich jëdu'n. Pen janch ñich miich ajcxy xy'ijxtaayb, najtzmadziydäy jadayaab ñich nmigügtijc ajcxy, huen ñicxicy.

⁹ E jadu'n yajcuyduñ je ayuc co anajty Jesús c'i'm tí yminañ: "Tūg'óciy jáy huidibi nDeedy tí xymöyich, ca' ni tūg jëbi huaad ytigooy." ¹⁰ Chi jada' je Simón Pedro huidibi anajty mïid tūg espada, juudy je y'espada ma ñidijc, e chi yajtzaachíyí je Teedy mijtungmïidpi ytum-bi, tūg yta'tz'ac aa'oy'amybi yajminácy. Je tumbi hue' anajty xijity Malco. ¹¹ Chi Jesús nimay Pedro:

—Pidäg m'espada ma ñidijc. Ca' mnejhuñy co copicy nyajnaxipyich je tzaachypi je ayo'n huidibi Dios Teedy tí xyajnigo'adugíyich. Min n'ocminaxy n'ocyajnaxyich jada tzaachypi jadu'n nej ixipy tūg tasi ta'm'ujtznñ ngo'uucnaxyich.

Jesús ma je Teedy mijtungmïidpi yhuinduu

¹² Chi je soldados ajcxy, je soldado yhuindzin etz judíoáy ajcxy ytungmïidpi huingohuägy ajcxy Jesús. Chi ajcxy majch, e chi ajcxy cïojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymïd'ajtyp, je huidibi anajty mijtungmïid ma teedytjic ajcxy ymiñ je huin'it jimij. ¹⁴ Je Caifás je' anajty tí yecy je capxhuijñ ma yí judíoáy ajcxy co tūgtecy yminañ: jac'oy co tūg jáy y'ögípy mïid tūg'óciy naax cajp ycixpi.

Pedro ymīnañ co ca' ixy'adyii Jesús

¹⁵ Simón Pedro mīd jadügpi ydiscípulo ypanicx ajcxy Jesús (co je ymidzip yajnicxi mach). E je jadügpi ydiscípulo ixy'ajtīp anajty yajxon je teedy mījtungmīdipi, paady ytiġiġy axam huin'it co Jesús ymidzip yajtiġiġy ma je teedy mījtungmīdipi ytiġc. ¹⁶ E je Pedro jīlby je' yhui'miy ma tiġc aguu. E je jadügpi ydiscípulo co anajty ajcxy ñay'ixy'adyii mīd je teedy mījtungmīdipi, chi ypidzimy mīgapxy je tiġc aguu adīnaayb, chi Pedro ajcxy yajtiġiġy jīlby tiġoty. ¹⁷ Chi jada' je töxy'anäg huidibi anajty tiġc'aguu adīnaayb, nīmay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtijc ajcxy ti anajty ajcxy oy jīn yajmījīyġiġy co anajty chachtīchity, e Pedro nañ jīm anajty nañ jadu'n mīd xamy ajcxy.

Je teedy mījtungmīdipi yajcomīdou Jesús ypocy

¹⁹ Chi je teedy mījtungmīdipi y'amīdooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰ Chi Jesús y'adzooy:

—Ti ħich oy njacapxy njamiydägy mayjājyoty. E ti ħich njatyimy nyaj'ixpicyich ma miich ajcxy mnaymujctacin etz ma Dios ytiġc, ma yi judiojāy ajcxy nidüg'óciy ñaymugyīi. Ca' ni ti ameech ti nīgapxyīch. ²¹ ¿Na'amy co xyjactīm'amīdooyīch ti anajty ti nyaj'ixpicyīch? Yi' ajcxy amīdou pinjaty ti xy'amīdo'ijtiġch n'ayucīch, yi' ajcxy nejhuiyb ti ħich jadu'n ti nyaj'ixpicyīch. Yi' ajcxy tūg'óciy ñejhuiydaayb nejaty ħich ti nmīna'ñīch.

²² Co jadu'n y'adzooy Jesús, huin'it tūg judío tungmīdipi huidibi anajty jīm huingon tīnaayb ma Jesús, chi tūg cī' acojxīgy Jesús, chi mīnañ:

—¿Nej co jadu'n jībic m'adzooy yi teedy mījtungmīdipi?

²³ Chi Jesús y'adzooy:

—Pen jībic ħich ti n'adzooy yec tiy'ajt nej co yjībicity. Pen oy ħich ti n'adzooy, ¿nej co xycoxyīch?

²⁴ Chi Anás nīmay soldadtijc co huen Jesús yajnicxy cīxoch jīm ma yi Caifás ytiġc, je teedy mījtungmīdipi.

Chi Pedro jadüg'oc ymīnañ co ca' ixy'adyii Jesús

²⁵ Simón Pedro jīmni anajty ytināy ma jīmmba' yxamy anajty, chi ajcxy amīdoy jadüg'oc:

—¿Nej cay yi' miich xyaj'ixpījcp nañ jadu'n?

Chi Pedro jadüg'oc coyūch Jesús ymīnañ:

—Ca' je' n'ħichity.

²⁶ Nidūgti ajcxy je teedy mījtungmīdipi ytumbi, je' anajty y'amīgūg yi Malco, huidibi Pedro yta'tz'ac quejtzpujxi, chi jadu'n ymīnañ:

—¿Nej ca' mdijy n'ijxyi jīm ma je aguemy mīd Jesús?

²⁷ Chi Pedro mīdugīg'oc oy coyūch yhuindzīn, e tīm huin'itīy tzey oy yaaxīgy.

Jesús ma je gobernador yhuinduu

²⁸ Chi ajcxy jīm yajtzoof Jesús ma Caifás ytiġc yajnicxy ajcxy ma agujctijc, tīm jopyñi anajty. Chi je judiojāy ca' ajcxy ytiġiġy ma agujctijc, com ca' anajty ytundīgoy-aangīxy mīd judiojāy ycostumbre. Ca' ajcxy ytiġiġhua'ñ anajty ma je romanojāy gobernador ytiġc amayħijoty, e ca' anajty ajcxy ñayyajjībicġiġhua'ñyīi. Com co jadu'n ycanayyajjībicġiġy ajcxy, e huin'it ca' ajcxy ycacaay ma je pascua xī adzūu'ajtīn. ²⁹ Co ca' ajcxy ytiġiġhua'ñ anajty ma je agujctijc, chi je gobernador Pilato nibidzīmy ajcxy tība'y ma anajty ajcxy mīdīty Jesús cuend'aty. Chi Pilato ymīnañ:

—¿Ti xīhuin ajcxy mmīd, mīd jadayaabi yēydijc?

³⁰ Chi ajcxy y'adzooy:

—Co ixyipy ca' ti jībicpi tuñ, ca' ixyipy ħich ajcxy ya yi' nyajmīñ ma miich.

³¹ Chi Pilato ymīnañ:

—Yajnicxcix miich ajcxy. Nicx tiyduŋix jadu'n nej miich ajcxy mley y'ané'my.

Chi je judíoġy ajcxy y'adzooy:

—ħich ajcxy ca' ni ti mīc'ajt nmīdity nicxy ħich ajcxy njāyay'ōgy.

³² Co jadu'n ajcxy ymīnañ, chi jadu'n ajcxy cuyduñ je Jesús yci'm'ayuc jadu'n nej anajty ti ymīna'ñ ti o'cin anajty ypadamy. ³³ Chi Pilato jadüg'oc ytiġiġy jīlby agujctīgoty, chi coyaaxīy Jesús, chi nīmay:

—¿Nej miich je' rey'ajtp ma yi judíoġy ajcxy?

³⁴ Chi Jesús y'adzooy:

—¿Nej mgi'mhuinma'ñ mīd xy'amīdooyīch pen ħich nrey'ajtpīch, o huingjāy ti xyajnimāy co nrey'atyīch?

³⁵ Chi jada' Pilato y'adzooy:

—¿Nej nañ judiojāy jada' ħichī? Mgi'mnaax mgi'mgajp etz je teedy mījtungmīdipi ti xycīyecy ma ħich. ¿Ti ti mdundīgooy?

³⁶ Chi Jesús y'adzooy:

—ħich ca' n'ane'myīch ya naaxhuiñ. Huingduum ħich n'ané'mīn nmīdīdyīch. Co ixyipy ya naaxhuiñ n'oc'ane'myīch, tūg'óciy ħich nmīgūgtijc ajcxy ti ixyipy ajcxy tziptungīxy, ti ixyipy ajcxy xyñīhua'ñīch. E ca' ixyipy ti nayġīyegyiījīch ma yi judíoġy tungmīdipi ajcxy. Per janch ħich ca' ħich ya naaxhuiñ n'ane'myīch.

³⁷ Chi Pilato y'adzooy:

—¿Nej mrey miichi?

Chi Jesús ymīnañ:

—Miich jadu'n xytijypīch co nrey'atyīch. Paady ti nmīñīch ya naaxhuiñ, e ti nma'xung'atyīch, jīgīx nycyīch tiy'ajt tiydudāgy. Tūg'óciy yi jāy pinjaty tiy'ajt cuydumb xy'amīdo'ijtiġbīch yi' n'ayucīch.

Pilato y'ane'my huen Jesús yaj'ōgyīi

³⁸ Chi Pilato y'adzooy:

—¿Ti jadu'n mdijy tiy'ajt tiydudāgyipi?

Jadu'ñyi je' jada'ajty yjacmīnañ, chi pidzīmy jadüg'oc tība'y ma anajty je judíoġy ajcxy. Chi ajcxy nīmay:

—Ca' ħich ni ti bocy nbaadyīch ma jada jāy ma yi romanojāy yley. ³⁹ E com miich ajcxy mīd tūg costumbre

co tüg nnajtmadzïiyim machyjäy mïid jada pascua xïi ycxpï, ¿nej mdzojcy ajcxy co nnajtmadzïhuibyich jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtmadzïhuipy, yí' janchtiy mnajtmadzi' yí Barrabás.

Barrabás hue' je' anajty tüg meetzpi.

19 Chi jada' Pilato ané'mïn pidacy co huen ajcxy Jesús huinhuopy jïjphuopy. ² Chi jada' je soldados ajcxy yaj'oyïy tüg corona mij'apy pa'apy, chi ajcxy yajcojeniy Jesús. Chi ajcxy yajnïjenïy tüg rey yhuít ucypí ycolor. ³ Chi soldados ajcxy huingohuägïy jadüg'oc capxpoocxcïy yajxïgy'amy, nïmaaygïxy:

—¡Viva miich judíojäy rey!

Chi ajcxy ooy huingojxy jïjpcojxy.

⁴ Chi Pilato jadüg'oc ypidzïmy tïba'y. Chi nïmay je majjäy:

—Cham ajcxy nyajpidzïmy tïba'y jada Jesús, jigix ajcxy mnejhuïhuip co ca' ni ti pocy ti nbaadyich ma yí'.

⁵ Co Jesús ypidzïmy tïba'y mïid je apy corona ma yco-huajc etz je rey yhuít ucypí ycolor. Huin'it Pilato ymïnañ:

—¡Jxcïx, cha je yëdyïc.

⁶ Co je teedy tungmïdipi etz je judíojäy ajcxy ijxy, chi ajcxy ymïnanday nidüg'óciy aguipxyjatyi:

—Yajcruudzpet, yajcruudzpet.

Chi Pilato ymïnañ:

—Yajcruudzpejtïcix miich ajcxy, janch ñch ca' ni ti tïy'ajt nbaadyich nej ñch yí' nyajcruudzpedipy.

⁷ Chi je judíojäy ajcxy y'adzooy:

—Ñch ajcxy mïid tüg cötujcïn, jëbi y'ögy mïid ñch ajcxy ngötujcïn ycxpï, com ti ycapxtigooy co ymïna'ñ co yí Dios yteedy'ajtyp.

⁸ Co jada ayuc midooy Pilato, chi nigí chigïygoty. ⁹ Chi ytïgïy jadüg'oc ma je cötujctac mïid Jesús, chi nïmay:

—¿Ma miich tïyí mgogajpity?

E Jesús ca' y'adzooy.

¹⁰ Paady Pilato ymïnañ:

—¿Ñch miich ca' xy'adzohua'ñ? ¿Ca' mnejhuïy co nmïdïdyich mic'ajt jëbi nnajtmadzïy etz nañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixypiy mgamïdity ma ñch, pen ca' ixypiy mic'ajt ti xymöyich yí huídibi ane'mb jïiby tzajpjo-ty. E paady ycxpï yí tïbi ñch xycïyecyich nigí yí' pocy mïdity ca'ydí miich.

¹² E huin'it Pilato ooy yjahuinma'ñ ixtay nej huaad ca' jëbi ocnajtmadzïy Jesús. E je judíojäy, je Jesús ymidzip, nigí anajty ajcxy chachxï'dïch:

—Pen miich mnajtmadzïyb jada Jesús, huin'it ca' m'ocjacnaymigüg'ajtïnipy mïid yí mhuindzïn je César huídibi ané'mïn ti xymöy. Com tüg'óciy pinjaty naydijïp rey, ca' yí' mïid nay'ixa'ñyïi je César.

¹³ Co Pilato jadu'n ayuc midooy, chi yajpidzïmy Jesús tïba'y. Chi Pilato y'ixtacy jïm ma je' y'ane'mdac ycötujctac, jïm ma je it huídibi anajty xïjïp Empedrado, hebreo'amy xïjity Gabata. ¹⁴ Hue' tïm cujcxï anajty, e chi

com jabom anajty je pascuaxïi ycodïcxni, co Pilato jadu'n nïmay judíojäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato ymïnañ:

—Miich ajcxy mrey, ¿miñ n'ocyajcruudzpeytyichí?

Chi je teedy tungmïdipi ajcxy y'adzooy:

—Ñch ajcxy ca' ñch ajcxy huingbi rey nmïdity, jëyi César ñch ajt nrey'ajtim.

¹⁶ Chi Pilato cïyeycy Jesús ma je judíojäy ajcxy, huen ajcxy cï'm yajcruudzpety. Huin'it ajcxy Jesús nihuägïy. Chi ajcxy yajtzoof.

Yajcruudzpejty ajcxy Jesús

¹⁷ Chi ajcxy je cruudz Jesús cï'm yajquejcyabïy. Mïid nicx ajcxy ma je it xïjity o'cpi cohuajc, hebreo'amy xïjity Gólgota. ¹⁸ Jïm ajcxy yajcruudzpejty quipxyi mïid jametz jäy, tüg anajty'amy, jadüg a'oy'amy etz Jesús cuj'amy. ¹⁹ Chi Pilato ane'my huen cïjxjay ayuc ma je cruudz, e jadu'n je ayuc ajcxy jay: "Jesús, Nazaret jäy, je judíojäy ajcxy yrey." ²⁰ May ajcxy ooy je judíojäy capxy je ayuc huídibi anajty cïjxjay ma je cruudz. Com je it ma anajty ajcxy Jesús ti yajcruudzpejtïcïy mïhuingon anajty Jerusalén. Hue' anajty yjayity: hebreo'amy, latin'amy etz griego'amy. ²¹ Chi je teedy mïjtungmïdipi ajcxy nïmay je Pilato:

—Ca' ixypiy jadu'n ti mjay: "Judíojäy yrey". Hue' ixypiy ti mjay: "Yí' jadu'n naydijïp ñch judíojäy xyrey'ajtpïch."

²² Chi Pilato y'adzooy:

—Yí tïbi njaayich, ti ñch yí' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je' yhuít ajcxy huijtzï'ci. Chi ajcxy je huit yajhuäcxy mïdaaxpicy. Chi soldados ajcxy cïjptüg cïchypïcy. Yí' yjocxhuit jadu'n nej anajty ytügïjpxuyïyity. ²⁴ Chi ajcxy ñayñïmayí ac jëyi soldadtïc:

—Ca' huaad ajt n'agïdzïyïm jada jocxhuit. Tzoc ajt suerte n'oc'ïjxïm, jigix ajt nnejhuïyïm pïn anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n ymïnañ: "Yajhuäcx ajcxy ñch nhuit, e ma ñch njocxnïjen jïm ajcxy suerte ijxy." Je' je' huídibi soldadtïc ajcxy ycuuyduun.

²⁵ Jïm ma Jesús ycuuzmïjc, jïm anajty ajcxy ytïnäy: Jesús ytaj, je ytaj chí', je María (Cleofas ytöxyïc), etz María Magdalena. ²⁶ Co Jesús ijxpaty ytaj etz je ydiscípulo huídibí anajty ooy nigí tzocy ma ytaj ymïc, chi nïmay ytaj:

—Nan, ñch nmïgüg huídibi tinaayb ma miich mmïc, yí' xycuend'adip jadu'n nej jïhuïy miich yí' xytaj'adyii.

²⁷ Chi Jesús nïmay je' ydiscípulo:

—Ñch ndaj miich mgüend'adipy, jadu'n nej ixypiy mgï'mdaj'adyii.

Jadu'n nej xïi tiempo jac nicxni Jesús ytaj tzïnaydacpicy ma jada discípulo ytïc.

O'c Jesús

²⁸ Co jadu'n ytundaayi yajtaayi, chi Jesús nejhuiy co ti anajty tüg'óciy ytundäyii yajtäyii jadu'n nej Dios tzo-cy. Huin'it jadu'n yminañ:

—Tidziyibich.

Co jadu'n yminañ, je' anajty ycuycundaayb nej anajty ycojayity ma Dios ñecy mñid yi' ycixpi.

²⁹ Jim anajty tüg pi'c uugi'ñ ymñid anajty vinoxunni. Chi ajcxy je' yajxoogy tüg esponja (jadu'n yi' nej po't) mñid vinoxunni, e chi yajjijp'eedziy tüg paxyijp, je' mñid yajjädy je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n yminañ:

—Ti tüg'óciy nguydündäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹ Com jabom anajty je pascua mijxi (amayxi ooy), e nañ sábado xi anajty. Paady copicy anajty co ajcxy yajminájcipy ajcxy je jäy ninícx je tiibi anajty yajcruudzpejtcixy. Mñid je' ycixpi je judíojäy ajcxy ñicxy ma Pilato pijctzoy may'ajt co huen ane'my yi soldados ajcxy, co huen nicxy yajtijy je jäy ytecy ajcxy huidibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy mñid Jesús. ³³ Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp mñid quipy jijpxu'ñybi. E huin'it tim mic'amy ni'py etz ni ypidzimy. ³⁵ Tüg jäy jim anajty icy nej ytuni yajti, e nañ yejc tiy'ajt. E je' ytiy'ajt janch je', e je' nejhuiyb co yjanchity. Mñid je tiy'ajt ycixpi jébi miich ajcxy nañ jadu'n mmibijctähuip. ³⁶ Paady je' jadu'n ytuni yajti, co jadu'n anajty yajcuycunda'ñ jadu'n nej yjaybetyity ma Dios ñecy, co jadu'n yminañ: "Ca' huaad ni tüg ypajc yajtijy." ³⁷ E jadüg'it anajty ycojaayity ma Dios ñecy, ma jadu'n yminañ: "Y'ixipy ajcxy je jäy huidibi ajcxy ycu-um."

Yajnaaxtigiiy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpidzimy, mñid co anajty chigxy mñid je judíojäy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jébi nicxy yajtzooni Jesús ñaaxnicx ma anajty ti yajcruudzpedy. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ mñid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuogy. ⁴⁰ Chi ajcxy yajpidici Jesús ñaaxnicx, chi ajcxy mo'ñ mñid poob huit, chi tzooy ajcxy mñid mirra etz áloes tzooy, jadu'n nej je judíojäy ajcxy ycostumbre mñidty co o'cpi yajnaaxtigiiygyxy.

⁴¹ Huigon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg

o'cpi jut jemybi ma anajty ca'ni pin ñaaxtigiiy. ⁴² Jim ajcxy Jesús ñaaxnicx yajnaaxtigiiy, co anajty jim yjac-huigonity, e janch jottigooy ajcxy yajnaaxtigiiy, mñid co anajty ti chu'iiyñi, e je judíojäy ajcxy tzachni'ixiiyñi tzach'a'ixiiyñi co je amayxi anajty chondägaani com jabom.

Jesús jugypijc jadüg'oc co anajty ti y'o'c'cni

20 Tim seman ixtigi', moñyi anajty, ca' anajty oy ximiiyñi. Huin'it María Magdalena ñicxy ma Jesús anajty ti ñaaxtigiiy. E chi jim ijxy co je tzaa ti anajty jim yajjidigüecy ma je jut aguu. ² Co ajcxy ijxy je jut ahuädz, chi jada' mic'amy poyigy ninicxy Simón Pedro, etz je jadügpi ydiscípulo huidibi anajty Jesús mñid ooy naychogyii, chi nimay:

—Ti yajtzoongixy ich ajt nHuindzin ñaaxnicx ma ajcxy yajnaaxtigiiy, e ca' nejhuiyim ma ajcxy ti pidaac-cixy.

³ Huin'it ajcxy nimetz choñ poyigy Pedro etz je jadügpi discípulo, ñicxy ajcxy ma je o'cpi anajty ñaaxtigiiy. ⁴ Poyigy ajcxy ñicxy nimetz, per je jadügpi discípulo jayijp ñajxy, e jayijp jim oyja'ty ma je naaxtigiiy-dac. ⁵ Chi yco'ixiy jutjoty, huin'it jim oy icy je mo'nhuut jiihy jutjoty y'ooxnäy, per ca' yi' jiihy ytiygy jutjoty. ⁶ Simón Pedro co ymiñ jac'axam, tim janitigiiy jutjoty, chi ijxy je mo'nhuut y'ooxnäy jiihy jutjoty. ⁷ E chi ijxy je cöxotz, je huidibi anajty mñid ycohuajc yxochity, abicy je' anajty, ca' anajty tú'ciy y'ooxnäy mñid ymo'nhuut. Y'ijx ajcxy je cöxotz yajxon y'anegyity abicy. ⁸ Huin'it ytiygy jutjoty je jadügpi discípulo huidibi jacjayijp ja't. Chi ijxy, e huin'it mibijcy co Jesús ñaaxnicx ca' anajty jiihy. ⁹ Ca'ni anajty ajcxy yajxon huinjhuüy co anajty jadu'n ycojaayity ma Dios ñecy, co anajty je Cristo yjugypiga'ñ. ¹⁰ Chi je metzpi ajcxy ydiscípulos yhuimbijty ma ytiyc.

Jesús nayguëxci ma María Magdalena

¹¹ E je María jim yhui'miy ma je o'cpi jut ayaaxip. Chi ayaaxip yco'ixiy ma je jut. ¹² E chi ijxy metz ángel, poob huit ajcxy ymñid, y'ñaaygixy jiihy ma je Jesús ñaaxnicx anajty yhuijznäy, y'ñaaygixy tüg cöduy, jadüg tecz ix-aay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nejhuüyich ma ajcxy ti pidägy.

¹⁴ Jadu'n anajty ymina'ñ, co ñayji'ijxi, chi ijxy Jesús ytinäy ma yjiix, e ca' ijxcaypy pen Jesús je' anajty. ¹⁵ Chi Jesús yminañ:

—Töxyjäy, çti co myäxy? ¿Pin m'ixtaayb?

María hue' anajty tijy je aguemy cuend'ajtpi mi-gapxip, paady jadu'n yminañ:

—Huindzin, pen ti myajnicxy Jesús ñaaxnicx, nigapx ma ti mbidägy, e ich nicxy nyajtzoofich.

¹⁶ Chi Jesús yminañ:

—María.

Chi jada' María yhuäg-huimbijty, chi yajxon huindicx-pejty, chi nimay:

—Raboni! —jada hebreo ayuc yhuimbizimy Huindzin.

¹⁷ Chi Jesús nimay María Magdalena:

—Ca' xyñidoonich, com ca'ni ñich nba'ttigäy ma Dios Teedy yajpaady. Nicx miich ixta' nmigügtijcich, e nima' co nnicxaamich ma Dios Teedy, ñich nDeedy etz miich ajcxy mDeedy, ñich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discipulos ajcxy, chi jadu'n nimay:

—Ti n'ixyich je Huindzin Jesús, e jadu'n yí' ti xy-capxymöyich co nyajnimähuibich miich ajcxy.

Jesús nayguëxici ma ydiscipulos ajcxy

¹⁹ Co je huin'it xñmbi chuu'iy seman ixtigí', aducy anajty tijc'aguu y'ity ma anajty je discipulos ajcxy yajpatcixy, miid co anajty ajcxy tzigäy je judiojây ajcxy huidibi anajty midzip'ajtp Jesús. Chi Jesús ytigäy cuj'amy ma je' ajcxy, e chi jada' capxpoocy ajcxy, nimay:

—Jotcugi' miich ajcxy.

²⁰ Yam jadu'n anajty ymina'ñ, chi ajcxy yaj'ijxy je' yci' ma je clavo ytigäy, etz ycaachyjijp ma anajty jäy ti ycumy. Chi yjotcugäy ajcxy co ajcxy ijxy je yHuindzin.

²¹ Chi jada' Jesús jadüg'oc capxpoocy, nimay ajcxy:

—Jotcugi' miich ajcxy. Jadu'n nej ñich nDeedy xyquejxyich ya naaxhuiñ, nañ jadu'n ñich miich ajcxy yam nguejhuäcxy miid ñich n'ayuc.

²² Co Jesús jadu'n yminañ, chi jada' ajcxy nibuxujy cöbuxujy nimay:

—Huen Dios yjihui'ñ ymic'ajt xy'adigäy xyjottigäy ajcxy. ²³ Huenpinjäyity huidibi miich ajcxy mbocyuinmeecxyp, nañ ypocyhuinmeecxipy Dios Teedy. Huenpinjäyity huidibi miich ajcxy ca' ypocy mhuinmeecxaani, nañ jadu'n Dios Teedy ca' yí' ypocyhuinmeecxa'ñy.ii.

Tomás ymibijc co yHuindzin yjugypijcy

²⁴ Tomás je' huidibi anajty miid majmetz yca'pxy Jesús ydiscipulos ajcxy, je huidibi anajty yajtijp Dídimó, ca' je' anajty jim choonity co Jesús ymiñ oga'n. ²⁵ Chi je jacjadyii ajcxy ymígüg ñimaayi:

—Ti ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yí' yci' je clavo'au, e pen ca' ngähuäxich ngodijäyich ma clavo'au, e ngí' nbidägyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xñ ajcxy jadüg'oc anajty yajpaady tigoty nidüg'ócy je discipulos ajcxy. Tzooñ anajty Tomás nañ jadu'n. Chi Jesús ymiñ. Agäy anajty tijc co Jesús ytinay'ahuñy cuj'amy ma je' ajcxy. Huin'it ycapx-pocxy, chi nimay:

—Jotcugi' miich ajcxy.

²⁷ Chi jada' nimay je Tomás:

—Pidäg ya mgähuäx ma clavo'au ma ngäjich. Najtza-jí' mgi' etz pidäg ma ñich ngaach ma jäy xycumyich, e mibic yajxon tiydudägy.

²⁸ Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

²⁹ Chi Jesús Tomás nimay:

—Miid co miich ti xy'ixyich, paady miich ti mmibicy. Jotcujc yí' ajcxy huidibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yí' je Cristo, je Dios y'ung

³⁰ Ti anajty Jesús ooy tuñ mijhuinma'ñ ma ydiscipulos ajcxy yhuinduu huidibi ca' ycojaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yí' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tücc'iyi ycixipy ytigoyipy miid Jesucristo yxñ ycixpi.

Jesús ñayguëxigyii ma ydiscipulos ajcxy nihiixtujcpi

21 Co jadu'n jayijp ytuni yjajti, huin'it jadüg'oc Jesús ñayguëxici ma je' ydiscipulos ajcxy jim ma mejypa', je huidibi anajty xñjip Tiberias mejy. E jadu'n ñayguëxici: ² Jim anajty ajcxy Simón Pedro miid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discipulos ajcxy.

³ Chi Simón Pedro yminañ:

—Nicxy n'oc'acxmachich.

Chi ymígügtijc ajcxy yminañ:

—Tzoc ajt jámim.

Chi ajcxy ytigäy ma tüg barco. E je huin'it tzuu ca' ni ti ajcxy majch. ⁴ Co yjobäy jim Jesús anajty ytinäy ma mejypa'. Je' ydiscipulos ajcxy ca' anajty ajcxy nejuñy co Jesús je' anajty.

⁵ Chi Jesús yminañ:

—Mígügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huidibi miid m'acxmajtzcixy aa'oy'amy ma yí' barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytigäy. ⁷ Je ymígüg huidibi miid Jesús ooy anajty ñaychogyii, chi nimay Pedro:

—Je' yí', ñich ajt nHuindzin.

Co jadu'n midooy Simón Pedro co anajty yjējity je Huindzin Jesús, huin'it yhuin yajtigäy. Com ti anajty yhuin jeñ, com jadu'n anajty jac'oy ytuñ. Chi ytigäy mejyoty huitmiid. ⁸ Jacjadyii ajcxy ymígügtijc yjady ma mejypa' miid je barco, pahuich pajugucy ajcxy je y'acxmadzi'ñ janch ujtz miid acx. Hue' anajty ca' ooy yjiguemyity ma mejypa', jēyi anajty migo'px metro yjiguemyity. ⁹ E co ajcxy ymejch ma mejypa', chi ajcxy

ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰ Chi Jesús nimay je' ydiscípulos ajcxy:

—Yajmiingix yi acx tibi ajcxy mmajtzicxy.

¹¹ Chi Simón Pedro ypejty barcojoty, chi yajpidzimy huindituum y'acxmadzi'ñ ujtz miid may'acx. Chi ajcxy michoy migo'px jahuixchigi'px majctugig acx mijatypí, e jadu'n ca' je acxmadzi'ñ ycich miid tzachmay'acx. ¹² Chi Jesús nimay ajcxy:

—Min ajop'ajtcix.

E ni tüg ydiscípulos ajcxy ca' y'amidoohui:

—¿Pín miich?

Com ñejhuib anajty ajcxy co je' anajty Huindzin Jesús. ¹³ Chi Jesús ymijhuägy ma je acx cí' etz tzajcaagy anajty y'ity, e chi yajhuäcxy, chi moyday ymígügtijc ajcxy.

¹⁴ E je' je' anajty je midugig'ocpi co Jesús ñayguëxici ma je' ydiscípulos ajcxy, huin'it co yjugypijcy co y'o'cy.

Jesús yajni'ixiij Simón Pedro ti ytunipy

¹⁵ Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi?

Chi y'adzooy Pedro:

—Huindzin mnejhuib co ndzojcpich njihuibich miich.

Chi Jesús nimay:

—Cuend'at ñich njäy, jadu'n nej jihuiy borregi cuend'ajtpi yaj'ocy yi' yborregi.

¹⁶ Chi Jesús mimejtz'oc yminañ:

—Simón, Jonás y'ung, ¿nej xychojcpich xyjihuibich miich?

Chi Simón y'adzooy:

—Huindzin, mnejhuib co ndzojcpich njihuibich miich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷ Co midugig'ocpi oy y'amidooy:

—Simón, Jonás y'ung, ¿nej xychojcpich xyjihuibich? Chi Pedro yjotmaybjcni co midugig'ocpi y'amidoohui: "¿Nej xychojcpich xyjihuibich?"

Chi Simón yjac'adzooy:

—Huindzin, miich mnejhuib co ñich ndzojcpich njihuibich miich.

Chi Jesús jacnimay:

—Cuend'ajtigich njäy, jadu'n nej borregi cuend'ajtpi cuend'aty yborregi. ¹⁸ Janch janch ñich miich yam jadu'n nimäy: "Co anajty miich mjac'anägnity, cí'm anajty mhuit nayajnijenyii, e mnicxp anajty ma mdimdzozy. E co mjacmijjäyihuipy, huin'it mgi' mnajtzajihuipy, e huingbi mhuit xyajnijenyihuipy, e xyajnicxyipy ma anajty ca' mdzozy."

¹⁹ Co Jesús jadu'n yminañ, chi Pedro yajhuinjihuipy jadu'n nej anajty jäy ajcxy yaj'öga'ñyii miid Jesús y'ayuc ytiy'ajt ycixpi, e nañ ma yi y'o'cin tiy'ajt yegipy co ymiid Dios ytiy'ajt.

Je discípulo huidibi anajty Jesús ooy tzocy jihuiy

²⁰ Chi Pedro ñayji'ixi, chi ijxy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuiy je' huidibi anajty ñaayb huigon ma Jesús ma je mesa co anajty y'adzu'ajtcixy. Je' huidibi nimay je' yHuindzin:

—Huindzin, ¿pín miich yi' xycyegam ma yi mmidzip?

²¹ Co Pedro ijxy je jadügpí discípulo axam Jesús ypanicxyii, chi yminañ:

—Huindzin, e jadayaabi migüg, ¿ti yi' jadaanip?

²² Chi Jesús y'adzooy:

—Co ixipy ndzojcpich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxcich miich.

²³ Paady ycixp huinjihuipy je ymígügtijc ajcxy co je ymígüg huidibi Jesús ooy tzocy jihuiy ca' anajty y'öga'ñ. Per Jesús canan je' anajty jadu'n ytijyp co ca' y'öga'ñ. Hue' anajty ti yminañ janchtiy:

—Pen ndzojcpich ixipy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴ Je' je' je Jesús ydiscípulo huidibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E ñich ajt nejhuibim co janch yi' je tiy'ajt huidibi ti yecy.

²⁵ May ooy tijaty mij huinma'ñ Jesús jactuñ. Co ixipy yajcojady tüg'óciy, ca' yi' naaxhuiñybi ixipy yhuaadixy miid maylibro tzachpidägy. Jadu'n n'aa'ixiyich.

HECHOS

1 Ma je jayijp'atypí necy, migüg Teófilo, tí nyajni-jayïy tüg'óciy jadu'n nej Jesús ytuuñ etz jadu'n nej yaj'ixpijctzondacy oga'n'aty, ixti cooni ypättigïy tzajpjoty. Ca'ní Jesús anajty ypättigïy tzajpjoty co huin'ijxy je' yjây huidibi yí' y'ayuc ytiy'ajt capxhuäcxïb, e chi mïd je Espiritu Santo najztunïy najtz'ane'mïy nej huaad ajcxy ytunïpy. ³ Co anajty Jesús y'ögy, chi ñayguëxïci canaag'oc ma je' ydiscípulos ajcxy, e huixchiguïpx xï ñayquëxïgo'ci ma je' ajcxy, yajniquëxïgy huädz co anajty yjuugyity, etz nañ yajmïdmiydacy je' yjây je Dios y'ayuc etz Dios y'ané'min.

⁴ Co anajty jim ijtcixy tügumucy mïd Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijcxix tïbï Dios nDeedy ahuanïy ma miich ajcxy, je huidibi miich ajcxy nyajmïdmiydägy. ⁵ Janch Juan je Bautista jäy yajni#bejt mïd nï, tzojc miich ajcxy xy'adigïhuipy xyjottigïhuipy yí Espiritu Santo.

Jesús ypättigïyñi tzajpjoty

⁶ Ni'amugï anajty ajcxy jim mïd Jesús, chi ajcxy yajtiy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuïyigixy je xï je tiempo mina anajty tí yhuaad'ajtni, mina Dios Teedy tuna'ñ tijaty, je' tügpajc mïd cötújcïn tijaty ytunamy. ⁸ Co anajty je Espiritu Santo chinaydacpïcy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxp mïd ïch ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuïnybi.

⁹ Tí jada ajcxy jadu'n yajnimäy, jim anajty ajcxy yhuindïcxcixy, chi Jesús chajppejtni. Chi miñ joc yeeg huidi Jesús yajnidïgoyday, chi ajcxy ca' ocjac'ijxnï.

¹⁰ Jadu'n anajty ajcxy chachpät'ijxcixy tzajpcïxy, co Jesús ypättigïy. Huin'it mejtz yëdyjc ñayguëxïci ma je' ajcxy ymïjc, poob huit mïd, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcïxy? Yí Jesús huidibi tí chajppety, tí chooñ ma miich ajcxy, minaamb jadüg'oc jadu'n nej tí m'ijxcixy co tí ypättigïy.

Matías yajhuin'ijxy co Judas ytung jijptunïyipy

¹² Huin'it Jesús ydiscípulos ajcxy chooni ma je cögorp huidi xïjïp Olivos, yhuimbïjtcixni jim Jerusalén, ca' ooy yjïguëgyity, jëbi yajyöy sábado xï, jadu'n nej Moisés ycötújcïn y'ane'my. ¹³ Co ajcxy yja'ty ma je cajp, chi

ajcxy ypejty ma je cuarto mimetz nihuijtzpetypí ma ajcxy anajty mïdity yjëttac. Jim yí' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügumucy Dios mibïjctzoogixy chajpcapxycapxcixy. Ymïd ajcxy anajty Jesús y'uch etz María Jesús ytaj, etz jacjadyii töxyjädyjc.

¹⁵ Huin'it xï Pedro ytïnayïgy agujc'amy ma je ymigügtijc ajcxy huidibi yajmïj'ajtp Jesús, huidi anajty ajcxy naybaatip mïgo'px ja'ïipxti jäy, chi nimay ajcxy:

¹⁶ —Migügtijc, copicy co jada yajcuydünïpy nej Dios yminañ ma ñecy huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judíojäy ajcxy majch Jesús. ¹⁷ Je Judas yaj'amichomujc je' anajty mïd ïch ajt, paatip anajty Dios ytung tú'ciy mïd ïch ajt. ¹⁸ Chi Judas ñicxy juy tüg naax mïd je muju'ñ huidibi anajty tí paady mïd yjibic-huinma'ñ. Chi jim mic'amy ycäy tzuxcödeëñ, chi ytopxy ymooxac, e chi ytiinch ypidzimday. ¹⁹ Je jäy ajcxy huidibi anajty tzinaayb jim Jerusalén, co nejhuïy, chi ajcxy yximoy je naax Acéldama, hue' je' yhuimbizimy ma je' ajcxy ayuc, ni'py ñaaxjot. ²⁰ Jada je' je ayuc huidibi David yjaay ma je Salmo necy:

Hui'mip najtz'ixïy yí' chinaaydac. E ca' pin yajtunïpy. Nañ jadu'n ymina'ñ:

Huingbi huen yajnicxyii je' ytung.

²¹ Copicy co tüg yëdyjc huidibi mïd tí yhudity nHuindzin Jesús quipxyi mïd ïch ajt, huen tunïpy je tung huidibi Judas anajty ytumyb, maab Juan yajni#bety ixti taabi xypuyöyduutim co pättigïy tzajpjot, tüg jëbi testig'aty mïd ïch ajt co Jesús yjugypïjcy.

²³ Chi Jesús ydiscípulos ajcxy huin'ijxy mejtz jäy: tüg jäy huidi anajty yxï José, huidi yxï anajty yajtij Barsabás etz nañ jadu'n anajty yajtij Justo. E huin'ijxy ajcxy nañ jadu'n Matías. ²⁴ Chi Jesús ydiscípulos ajcxy Dios mibïjctzoy, yminañ ajcxy:

—Huindzin Dios, m'ijxyp mnejhuïyib tüg'óciy jäy yjot yhuinma'ñ, yajni'ixïyigich jada metzpi jäy huidibi miich nidügti tí huin'ixy, je huidibi jëbi jijptigïyïy miich mdung tú'ciy mïd ïch ajcxy, etz huidibi jëbi apóstol'adïp. Huen jada jäy jijptigïyïy je tung huidibi Judas tí yajti-gooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibizimni je Matías. E huin'ityi je Matías oy ymicho'ndigïy ma je nimajtügpi ajcxy huidi ycapxhuäcxxy Jesús y'ayuc.

Co je Espíritu Santo ycidacy choñ tzajpjoty

2 Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtciy. ² Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty ifaaygixy. ³ Chi nigidaaci nidüg nidügti toodz jadu'n nej jiiñye'n. ⁴ Chi je Espíritu Santo nidüg nidügti ajcxy y'adigiiyi yjottigiiyi. Chi ytigiiygixni capxy miydaacp ni-je' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xii may judíojäy ajcxy huidibi tzomb canaag agajp. Hue' ajcxy chachcuydumb judíojäy ycostumbre. ⁶ Co je cajpjäy ajcxy midooy je ne'min, chi ajcxy ooy yömuycy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjäy ajcxy ooy chigiiy jihuüy, chi ajcxy ñayñimaayi miñ xyípy:

—Ix ¿nej cay Galilea jäy jada ajcxy nidüg'óciy huidibi jadu'n tzachcapxcixy tzachmiydaaccixy ñich ajt ngi'm'ayuc? ⁸ ¿Nej ñich ajt co nmido'mbícim co tzachmiydaaccixy ñich ajt n'ayuc huidibi ti nmibi'c'ájtim? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi tzinaayb ajcxy jim Asia ñaaxjot, ¹⁰ etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi tzomb jim ma yi Africa ñaaxjot Cirene ninaxy. Nañ jadu'n jim romanojäy huidibi ya adzinaayb. May ajcxy jim huidibi judíojäy etz nijëjty huidibi ca' yjudíojäyity huidibi judíojäy ycostumbre ajcxy ti yijptigiiyi. ¹¹ Ya nañ jadu'n Creta jäy etz Arabia jäy; e ñich ajt tüg'óciy nmidoohuim jada jäy ajcxy nigapxcixy nimiyaaccixy huidi Dios ti tuñ mijcajee ma ñich ajt ngi'm'ayuc.

¹² Nidüg'óciy ajcxy ooy jihuüy, e chi ajcxy ooy yhuinmay'ahuidijty, miñ xyípy ñay'amidóohuigixy:

—¿Nej jada yhuimbizima'ñ?

¹³ E nijëjty jäy jëyi nixigy yajxigy, yminaangixy:

—Muucip jada yi' ajcxy.

Pedro yaj'ixpijcy je mayjäy

¹⁴ Huin'it Pedro ytinayigy miid je nimajctügpi apóstoles, e ytigiiy capxpi mic yminañ:

—Yëdijctijc ajcxy huidibi tzinaayb Judea etz tüg'óciy huidibi tzinaayb ya Jerusalén, nejhuühuipy miich ajcxy jada e midou ajcxy yajxon huidibi ajcxy nya-jnimahuamyb. ¹⁵ Jada jäy ajcxy ca' ajcxy ymügyii jadu'n nej miich ajcxy minaangixy. Tim petyxiini jada cham. ¹⁶ Jada je' huidibi ñigapxy je Joel, Dios y'ayuc najtzcaxxiybi, co jadu'n mina'ñ:

¹⁷ Je huin'it xii mina anajty je naaxhuiñybi cixa'ñ, jadu'n Dios minañ, nyajhuäcxtähuibich je nEspíritu ma tüg'óciy naaxhuiñyjäy. Miich mnix etz mmang ajcxy capxhuäcxip ñich n'ayuc ndiy'ajt, e je yujcyecpidijc ajcxy yhuin'ixipy ooy mijhuinma'ñ, e je mijjäydijc cumahuipy ajcxy.

¹⁸ Nyajhuäcxtähuip ñich je nEspíritu huin'it xii ma ñich ndumbi yëdijcpi töxyjäybi, e yi' ajcxy capxhuäcxip ñich n'ayuc ndiy'ajt.

¹⁹ Nyajquëxigibich tzajpcixy huidijaty oy chigiiyñi, e ya naaxhuiñ nyegipyich tiy'ajt: ni'py, jiiñ etz jiiñjoc.

²⁰ Yi xii ahuimbidiy coodz, etz je po' ahuimbidiy nej ni'py, ma anajty ca' miñ je xii je tiempo mina anajty mina'ñ je Huindzin Dios. Mij ayo'n ji tunaanip jadaanip ijxna' quëxna'.

²¹ E tüg'óciy jäy huidi miyaaxp ojadajtp je Huindzin Dios, Dios ajcxy yajnizdögib y'alma.

²² Chi Pedro yjacminañ:

—Amido'ijtcix, miich judíojäy ajcxy, jadu'n nej cham nmína'na'ñich. Je Jesús huidibi tzoon jim Nazaret ti xyaj'ijxcixy Dios ymic'ajt, mijhuinma'ñ, etz ijxpejt, jadu'n nej miich ajcxy ti m'ijxcixy ti mnejhuüygixy. ²³ Jada yajcyejc ma miich ajcxy, jadu'n nej anajty Dios ti yaj-nigödugy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty miid jibic jäy-dijc y'ané'min. ²⁴ Chi Dios yajjugypijcy yajnihuädzictuty ma yi' ó'cin, ca' huaad yhuümy ögy huinixii. ²⁵ Je David ñimiydac Jesús chi yminañ:

Nejhuüybich co je nHuindzin Dios y'ity ma ñich nhuindu. Yi' ijt ma ñich n'a'oy, jigix ca'ydi pin xy'adzigiyich xyajhuinma'ñyidgooyich.

²⁶ Paady ti njotcugiyich, e ti ngapxyidzimiyich co ooy njotcujcix. Paady co oy n'ögibich etz ninicx ñaax-tigiihuipy, ca' ndajy mayich.

²⁷ Co miich Dios ca' myajhuü'ma'ñ ñich n'alma ma ñaaxtigiydac. Ni mga'aa'ixihuipy, co miich mdumbi huidibi ooy mdzocy, co nicxy ñinicx ñaaxhuindigoydäy.

²⁸ Miich Dios, ti xyajni'ixiyich yi' tzinaayin huidibi ymiid jugy'ájtin huinixibi. Xyajjotcugiihuibich miid co xymiid'idipyich.

²⁹ Chi Pedro yjacminañ:

—Migügtijc ajcxy, huadz miich mnejhuüygixy co ñich ajt nmij'ap David y'o'cy etz yajnaaxtigiiyi. E ma ñaax-tigiiy nmidni jë'ajt chambaad. ³⁰ Je David hue' je' anajty Dios y'ayuc ñajtzcaxxiybi, e ñejhuüyb anajty co ti Dios yajnimäyii huidibi ca' y'anijity. David ñejhuüyb anajty co ma y'ap y'oc ma'xung'adipy Cristo, jaydëbi ané'mipy ma David y'ane'mdac. ³¹ Jadu'n co David jecy'ajty huin-jihuüy e nejhuüy etz nigapxy jadu'n nej yjugypiga'ñ je Cristo co anajty ti y'ögy. E yminañ co ca' yi' y'alma yhuü'mipy jutjoty etz ñinicx ca' ypüdzipy. ³² Dios yajjugypijcy je Jesús co y'o'cy. Jada tiy'ajt ñich ajcxy nidüg'óciy nidiy'ajt'ajtpy. ³³ Jadu'n Dios Jesús mooy mij'ajt jiiy tzajpjoty, chi yajcädigiiyi je Espíritu Santo huidibi Dios Teedy y'ahuaniiy e tüg'óciy huidibi miich ajcxy ti m'ijxcixy ti mmidoogixy jiiy yi' chooñ ma yi'.

³⁴ Com David ca' je' chajppejty, je David ci'm yminañ:

Je Huindzin Dios nimay ñich nHuindzin: "Iña' ma ñich a'oy'amy,

³⁵ ixti cooni nmimadactähuibich yi' mmidzip, jadu'n anajty nipaady nej jihuüy mdecypocxpejt'adyii."

³⁶ Chi Pedro yjacminañ:

—Ñejhuühuipy nidüg'óciy yi' Israel jäy ajcxy co janch janch co je Jesús huidibi miich ajcxy myajcruudzpejt,

Dios yajniñbji co yhuindzin'adipy ma miich ajcxy, etz Cristo huidibi xyñihua'nipy xyajtzoogipy ajcxy.

³⁷ Co je mayjäy ajcxy jadu'n midoy, chi ajcxy yjotyungñy, e amidoy ajcxy je Pedro etz jacjadyii jäy huidi Jesús y'ayuc capxhuäcxä anajty, chi ajcxy ymíñañ:

—Migügtijc, ¿ti ñich ajcxy jëbi huaad nduñ?

³⁸ Huin'it Pedro y'adzooy:

—Jothuimbijtcix e ñibejtix nidüg nidüg miid Jesucristo yxi, jigix Dios miich ajcxy mbocy xyhuinmeecxipy. E jadu'n Dios xymöhuipy je Espíritu Santo. ³⁹ Huidibi Dios y'ahuaniy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jiguémip, etz jacjadyii jäy ajcxy huidi Dios huin'ix-amy.

⁴⁰ Miid jadayaab ayuc etz jacjadyii ayuc Pedro yajni-may capxhuijy je mayjäy ymíñañ:

—Ca' mmijpidaaccix je jäy ajcxy y'ayuc huidibi ca' capxmidoy Dios.

⁴¹ Jadu'n yjajti, je jäy ajcxy huidijaty mibijc Pedro y'ayuc, chi ajcxy ñibejtay huin'it xi. Ñimayiy ajcxy huidibi mijpidac Jesús y'ayuc oy nidugñig mildi jäy.

⁴² Tüg'óciy ajcxy anajty panicxixy yi' ixpícin jadu'n nej yi' Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymújigixy co anajty ajcxy chajcaagy tujc-huäcx-aangixy.

Jadu'n nej je mibijpidijc chinaaygixy jugy'ajtcixy

⁴³ Nidüg'óciy ajcxy anajty ooy mijcajee jihuñy. E Jesús y'apóstoles ajcxy iixpejt etz mijhuinma'ñ ooy anajty tungixy. ⁴⁴ Nidüg'óciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxixy tijaty ajcxy anajty ymiid, mooygixy ymigügtijc. ⁴⁵ Ytoocpy anajty ajcxy yi' ypidägy huidibi anajty ymiid, e chi anajty yajhuäcxixy yi' meeñ nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxixy etz ycaaygixy y'uuccixy ni'amugi' jotcujc miid ajcxy y'oyjot y'oyhuinma'ñ. ⁴⁷ Ni'igixy niyaacxixy yi' Dios, e tüg'óciy jäy nayyajmij'ajtíp anajty ajcxy. Chi je Huindzin Dios yajmayy jabom jabom yi' mibijcpidijc, yi' huidibi anajty patp nidzoocin.

Tüg tecyma'tpi chögy

3 Tüg xi Pedro etz Juan ypättigiy ajcxy tú'ciy ma Dios ytijc, mijminacy xi anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajnicxixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxi la Hermosa, jigix jim pijctzohuipy meeñ ma je jäy ajcxy huidibi tigñyb ma Dios ytijc. ³ Co je jäy tecyma'tpi iixy Pedro etz Juan ytigñhuaangixy anajty ma Dios ytijc, chi pijctzoy meeñ. ⁴ Co Pedro etz Juan iixy je tecyma'tpi, chi Pedro ymíñañ:

—Huindicxpejtich.

⁵ Chi je jäy huindicxpejty, yijp'iixpy anajty ti möhuaanip. ⁶ Chi Pedro je tecyma'tpi nimay:

—Ca' nmídidyich plata, oori, huidibi janchtiy nmídidich je' nmöhuip. Miid Jesucristo je Nazaretpi ymic'ajt ñich miich nimaayb: Tinaayig etz yöy.

⁷ Huin'it Pedro majch je tecyma'tpi ma a'oygi', e yajti-naygugñy. Huin'itiy y'oyñy ymicpijcy je ytecy etz yte-cyyög. ⁸ Chi je tecyma'tpi ytinaygugñy etz chi ñajztibñy. Chi jada' yöychoñ e ytigñy ma Dios ytijc miid Pedro etz Juan yöyñip ñidijcni yujctjcní, yam Dios ooy jäytech. ⁹ Tüg'óciy je mayjäy iixy co anajty yöyñip etz jäytech yi' Dios. ¹⁰ Je jäy ajcxy y'ixy'ajtpy anajty ajcxy je tecyma'tpi e ñejhuñyigixyp co je' anajty je' huidibi pijt-zohuo'cp pi'c meeñ ma Dios ytijc'aguu huidi anajty yxi la Hermosa. Paady je jäy ajcxy ooy chigñy jihuñy, co ajcxy iixy nej anajty yam ti ytunyii ti yjadyii.

Pedro nimiydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi' jäy anajty ooy jihuñyigixy huinmaaygixy. Chi mic'amy mayjäy nimujcy Pedro etz Juan jim ma yi' Dios ytijc huinduu huidibi jäy ytijpy Salomón. ¹² Pedro co jadu'n iixy je mayjay, chi ymíñañ:

—Judío yëydijctijc, ¿nej co mdzachuinmaaygixy mijcajee? ¿Nej co ñich miich ajcxy yxchachuindicxixy jadu'n nej jihuñy ñich ajcxy jada jäy ti nyajtzoogyich ti nyajyöychooñich miid ngémmic'ajtic, o miid co ñich ajcxy ooy nDios'ojadaty? ¹³ Ñich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzoogy jada tecyma'tpi, jigix yajcö-mayipy yi' y'ung Jesús huidibi miich ajcxy mgñeyc ma je tungmídpí. E co je gobernador Pilato je' najtzmazñhua'ñ, miich ajcxy ca' m'aa'axiñy. ¹⁴ Ma yjapadyii ajcxy mgapijctzoy co huen yajnajtzmazñy, je huidi anajty yajpaatp huadz etz tudägy, chi miich ajcxy mbijctzoy co huen yajnajtzmazñy tüg jäy huidibi anajty ti yjääy'aj'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt ñich ajcxy nidiy'ajt'ajtpyich. ¹⁶ Miid co ti mibicy Jesús yxi, je mijhuinma'ñ huidibi Jesús ymic'ajt ti tuñ miid jada pa'mjäy huidibi miich ajcxy m'ixyp mnejhuñyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ixcixy.

¹⁷ Chi Pedro yjacmíñañ:

—Nmigügtijcich, nejhuñybich co miich ajcxy etz mhuidzindijc yaj'o'cy Jesús, miid co anajty mganejhuñyigixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxiñybi ymi-na'ñ co copicy co yi' Cristo yajnaxipy ayo'n. ¹⁹ Paady jätyim jothuimbijtcix miich ajcxy ma Dios, jigix ajcxy mbocy yajjötztähuipy. Huin'it je Huindzin Dios xyaniguexipy ajcxy jotcujc'ajtín huinixi, ²⁰ e yi' quexamb je Jesús, je Cristo, je huidibi Dios yajijp'aty yhuin'ijx co quexa'ñ ma miich ajcxy. ²¹ Oy jadachambi Jesucristo y'oc-hu'ñmipy jilby tzajpjoty ixti cooni Dios anajty yaj'oyiydäy tijaty, co jadu'n yjaay yi' y'ayucnajtzcaxiñy-

bi huidibi miid huadz yjot yhuinma'ñ huidibi ajcxy jecy'ajty tzinay. ²² Jadu'n Moisés nimay ñich ajt nmij'ap nmijteedy jecy'ajty: "Je Huindzin Dios xyajniuguexaan miich ajcxy tüg yí' y'ayucnajtzcaxñiybi, huidibi pidzímamyb ma miich ajcxy mjuugy mmígüg jadu'n nej ñich yí' xyguejxy. M'amido'idipy miich ajcxy yí' y'ayuc. ²³ Jadu'n yjadipy co tüg'óciy jäy huidibi anajty ca' capxymidooy je Dios y'ayucnajtzcaxñiybi, huadz ajcxy ytigoydáhuipy, e tüg jñibicy ajcxy idipy ma judíojäy ajcxy yajpaady."

²⁴ Chi Pedro yjacmíñañ:

—Jadu'n jada tüg'óciy Dios y'ayucnajtzcaxñiybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yí Dios y'ayucnajtzcaxñiybi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb miid miich ajcxy co jadu'n ymíñañ: "Ngonúcxibich tüg'óciy naaxhuiñyjäy miid tüg miich m'ap m'oc." ²⁶ Co Dios y'ung y'o'cy, chi Dios yajjugypijcy jadüg'oc, e quejxy jayjip ma miich ajcxy, jigix xyconúcxixipy, etz jigix nidüg'óciy miich ajcxy m'ixmadzipy yí mñibichuinma'ñ.

Pedro etz Juan ma tungmídpí yhuinduu

4 Pedro etz Juan jimni anajty tzachmídmíydaaccixy je mayjäy ajcxy, co oy miingixy je judío teedy ajcxy, miid je soldado huindzin, je tzajptijc cuend'ajtpi etz miid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yí öcpi jugypigipy yí' ajcxy, com co Jesús yjugypicy co y'o'cy. ³ Chi je tungmídpí ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ññ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox mílity.

⁵ Je com jabom ajcxy ñaymújccí jim Jerusalén judíojäy tungmídpí, je mijjäydijc etz yí escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mijtungmídpí yjugymígüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pín miich ajcxy ti xymöy cötujcín co jada jadu'n ti mdungixy?

⁸ Huin'it Pedro ymíid anajty Espíritu Santo ma yjot yhuinma'ñ, chi ymíñañ:

—Miich ajcxy tungmídpí etz judíojäy mijjäydijc, ⁹ yí ñich miich ajcxy cham xyaj'amidoob yí oybi tñibi yajtuñ ma tüg pa'mjäy e nejhuñhuaangixy nej ti chögy. ¹⁰ Cham nimíydactäyich ma miich ajcxy mhuinduu, jaydëbi ajcxy nejhuñyidáhuipy tüg'óciy judíojäy, co jadaayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, miid je mic'ajt huidibi Jesucristo je Nazaretpi yejcpi, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yí Jesús jadu'n nipaady nej tüg tzaa oybi, huidibi ajcxy potzpidijc, ca' yajtúngixy co ytiiccojicixy.

Jesús cham ti paady mijtung ma Dios, jadu'n yí' ni paady nej tüg mij tzaa huidibi ytungbaatp ma poch ytaatz. ¹² Ca' jac ni pin huidibi jëbi xyajnidzoocim ajt n'alma. Jesucristo yí' je' tügpaic huidibi Dios yejc ma jäy ya naaxhuiñ huidibi jëbi xyajnidzoocim ajt n'alma.

¹³ Co je mijtungmídpí ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuiy co ca' ajcxy y'ixpicjyáity, chi ajcxy ooy jihuiy huinmay. Nañ yí' ijxcapj ajcxy co je' anajty huidibi ajcxy ti miid huidity Jesús. ¹⁴ Cha co yjactimjímity anajty je jäy huidibi anajty ti chögy ytinäy miid Pedro etz Juan, paady ajcxy ca'jajty nej midziptzoonipy. ¹⁵ Chi je tungmídpí ni'ane'mdiy huen yajpidzimyii Pedro etz Juan ma je mayjäy anajty ñaymugyii, jigix ac jëyi tungmídpidijc ñyöyaangixy capxyöyaangixy Pedro etz Juan ypyoc. ¹⁶ Chi ajcxy ymíñañ:

—¿Ti cham nduunim miid yijii bi jäy ajcxy? Com tüg'óciy jäy huidibi tzinaayb ya Jerusalén ñejhuñyib ajcxy co ti túngixy mijhuinma'ñ, e ca' huaad ñich ajt nmínaaním co ca' yjanchity. ¹⁷ Tzoc cap'adujcím co ca' huaad ajcxy jacnimíydägipy Jesús jadachambi etz jancíxpi xñ tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimíydaacñip, ni ca' jacyaj'ixpigipy miid Jesús yxi. ¹⁹ Huin'it Pedro etz Juan y'adzooy:

—Huinmaaygix miich ajcxy cí'm pen tiy'ajt jada ma Dios co ñich miich ajcxy ngapxycöbigipy jayjip, ca'ydi yí Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmidoy.

²¹ Huin'it je tungmídpí ajcxy adzigi'ñ migapxy Pedro etz Juan, e najtzmazñiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yí Dios jadu'n nej anajty ti ytuñyii ti yjadyii. ²² Je jäy tecyma'tpi huidibi tzooc co Dios mijhuinma'ñ ytuñ, ymíid anajty yjimijt huixchiguipx naxy.

Je mibijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazñiy, chi ajcxy ñicxy ma ymígügtijc anajty, yajmídmíydactay tüg'óciy jadu'n nej teedy huindzin etz mijjäydijc anajty ti ñimáayigixy. ²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy ymíñañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty. ²⁵ Miich miid mEspíritu je David myajcapxy, e yí' jadu'n ymíñañ:

¿Nej co jada naaxhuiñybi jäy chachhuaangixy chachjihuiygixy, e yí jäy ajcxy huinmaaygixy huidibi ca' ytimytiijity?

²⁶ Yí reydiyca ya naaxhuiñybi midziptzooñ ajcxy yí Dios. Etz je tungmídpí cajp cajp ñaymujcí ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yí gobernador Poncio Pilato ñaymujcí ya ma jada cajp miid huidibi ca' yjudíojäyity ajcxy etz miid judíojäy ajcxy, midziptzoñ ajcxy yí m'ung Jesús huidi anajty ti mhuin'ixy. ²⁸ Yí'

ajcxy ti cuydungixy tüg'óciy jadu'n nej miich, Huindzin Dios, ti myajniögüdügü jadu'n nej ytunüyb yjadiiyb.
²⁹ Jadachambi Huindzin Dios, ix jadu'n nej yi tungmiitpi xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic,
³⁰ e miid miich mmic'ájtín chögipy pa'mjäydijc, tunipy ajcxy tijaty iixpejt etz mijhuinma'ñ miid yi m'ung Jesús yxii, huidibi miid huädz yjot yhuinma'ñ.

³¹ Co ajcxy mibijctzoday, chi je naax chuyuuy ma anajty ajcxy tügücy yajpaatcixy, etz nidüg'óciy yi' ajcxy ymic'ajt mooyi je Espíritu Santo, e yi Dios y'ayuc capxhuäcxixy anajty amic jotmic.

Je mibijcpidijc tú'ciy anajty ajcxy yjot yhuinma'ñ

³² Je mayjäy huidibi anajty ti mibicy, tú'ciy ajcxy yjot yhuinma'ñ. Ni pin anajty ycamina'ñ co naydüg jé'adyii. Hue' anajty yminaangixy co tú'ciy jé'ájtigixy. ³³ Je majmetzpi Jesús y'ayuccapxhuäcxipi amic jotmic capxhuäcxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayajtcixy, com tüg'óciy tijaty anajty ajcxy ymiid ñaax o ytiyc ytoocpy anajty ajcxy, e yejccixy anajty meeñ. ³⁵ Chi je meeñ yajcädigiygixy je apóstoles ajcxy e yi' ajcxy moy nidüg nidüg pinjaty yajmayajtp. ³⁶ Jim anajty miid je' ajcxy tüg levita jäy huidi anajty yxii José, huidibi ma'xung'ajt ma yi ñaaxjot mejy agujc huidibi yxii Chipre, je huidibi je majmetzpi Jesús y'ayuccapxhuäcxipi, yxii moy Bernabé, huidibi huimbizim je yajjotcuja'ajtpi. ³⁷ Je Bernabé tocy ytundac huidibi anajty ymiid, e chi mimiñ je meeñ, e yajcädigiy je apóstoles ajcxy.

Je Ananías etz Safira ajcxy Dios midundigoy

5 Chi jadüg yëydijc, huidi anajty yxii Ananías, miid ytöxyijc, Safira, toogy ajcxy tüg it ytundac.
² Ananías ñayajnihui'mi jac'anaxy je meeñ, e yajnicxy Jesús y'apóstoles ajcxy je jac-hueenip, jadu'n nej jihuiy yejctay tüg'óciy, etz yi' ytöxyijc ñejhuiyb anajty.
³ Chi Pedro nimay Ananías:
 —Ananías, ¿nej co myajtuñ je mujcu' yhuinma'ñ, e mhuin'ina'ñ je Espíritu Santo, e ti mbugoñ jac'anaxypí meeñ nej ti tzoo'adyii yi pidägy tiibi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeñ'adyii? ¿Nej co jadu'n ti mdundigooy? Dios ti mhuin'ññ, canan jäy.
⁵ Co jadu'n midoy, jimiyi Ananías yciday, e chi y'o'cy. E tüg'óciy jäy ajcxy huidijaty nejhuiy, ooy ajcxy chigüiy.
⁶ Huin'it ymiñ jadyii yujcyecpidijc, chi ajcxy mo'ñ Ananías ñinicx, e oy ajcxy yajnaaxtigüy.
⁷ Codugüg hori naxy, oy ytigüy je Ananías ytöxyijc, e ni ca' nejhuiy anajty ti ti ytuñyii ti yjadyii je ñäy. ⁸ Pedro y'amidoohui:

—Yajniimaaygich, ¿nej janch jadu'n ti mdoocixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro yminañ:

—¿Nej co ti mnyagápxigixy mhuin'ina'ñ yi Espíritu Santo? Cha ma tijc'aguü je jäy ajcxy ytinäy huidi oy ti yajnaaxtigüy mñäy, e jadachambi miich ajcxy xyajnicx-aam nañ jadu'n.

¹⁰ Tim huin'itiy Ananías ytöxijc yciday, e chi y'o'cy. E chi oy ycidägy ma Pedro ytecymijc. Co je yujcyecpidijc ytigüy, chi ajcxy je' paaty ögy. Chi ajcxy yajpidzimy etz oy yajnaaxtigüy ma ñäy ymijc. ¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyii ti ytunyii, chi ajcxy ooy chigüy.

Canaag mij'ixpejt etz tiy'ajt

¹² Je majmetzpi Jesús y'ayuccapxhuäcxipi ooy anajty ajcxy Dios ymic'ajt yajniügüxici etz iixpejt yejccixy ma yi jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyöymüjcgixy ma Dios ytiyc huinduu huidibi yxii Salomón. ¹³ Ca' jac ni pin anajty mijnicxpeda'ñ mijyöypeda'ñ je' ajcxy. E je jäy ajcxy yajcaymij'ajtpy huidi Jesús anajty ooy mibijccixyp.
¹⁴ Mayjäy oy mibijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mijtügüj cix'aam pidaaccixy, jigix co Pedro ñaxipy jim ycadimjeycüy co nicxy y'aa'ap yjäty ma je pa'mjäy.
¹⁶ Nañ jadu'n mayjäy chooñ anajty huidijaty huingon ycajp, ymiingixy Jerusalén, miidmiingixy pa'mjäy, etz huidibi ca'oybi miid ma yjot yhuinma'ñ, e tüg'óciy yajt-zooctaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mijtungmiidpi etz huidibi saduceo iixpájcín ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguü, yajpidzimy ajcxy, chi ajcxy nimay:

²⁰ —Nícxcix, tinay'ahuüygix tzajtigoty, yajmiidmiy-daaccix yi mayjäy ajcxy Jesucristo ytiy'ajt nej jëbi jäy ajcxy paadipy jugy'ájtín jemybi.

²¹ Co jadu'n midoy, chi com jabom ytigüy ajcxy jopyñi tzajtigoty. Jiiby je' ajcxy anajty ñiyaj'ixpijcconi.

Chi je teedy mijtungmiidpi etz jacpinjaty miid, chi ajcxy capxyñiguejxy yi judfojy ymijjäydijc etz ixpicytijc co huen junta jadyii. Chi ajcxy capxyñiguejxy huen nicxy yajpidzimyii jiiby pujxtigoty yi apóstoles ajcxy.

²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni miid tiy'ajt, ²³ chi ajcxy nimay:

—Hue' ich ajcxy ti nbaadcixy yi pujxtijc aducy, etz je soldadtijc jim tijc aguü yjaccuend'ajtcixy. Chi co ich ajcxy nyaj'ahuäch je pujxtijc, ca' ich ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mijtungmiidpi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihuip. ²⁵ Huin'it tüg jäy miñ huidibi nimaayi ajcxy:

—Je jäy huidibi miich ajcxy mbidac pujxtigoty, chim je' ajcxy tzajtigoty yaj'ixpijccixy yi mayjäy.

²⁶ Chi je soldado huindzin miid soldadtijc ñicxy ma yi apóstoles ajcxy jāy yaj'ixpijccixy, chi ajcxy yajnicxy oy'amy, com tzigiiyb anajty ajcxy co je mayjāy chaagādzyb. ²⁷ Co ajcxy yajmiiñ, chi ajcxy pidacy ma je maytungmiidpi yhuinduu. Chi je teedy miltungmiidpi je apóstoles ajcxy ñimay:

²⁸ —Ñich ajcxy ti ngapxaducy co ca' huaad m'ocjacyaj'ixpijccixni ma Jesús yxii. E ¿ti ti mdungixy? Ti myajhuäcxtaaygixy yi m'ixpijcin ma Jerusalengajp, e ñich ajcxy miich pocy xyjatyim yajmihui'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy ñich ajcxy ngapxycöbigipyich yi Dios jayijp ca'ydi jāy. ³⁰ Je Dios huidibi ñich ajt nmij'ap nmijteedy y'ojadajt, y' yajjugypijc je Jesús huidibi miich ajcxy myaj'oc cruudzcxy. ³¹ Je Dios Teedy jadachambi hue' Jesús miidty aa'oy'amy jii by tzajpjoty, e ti pidägy ane'mbi etz yajnidzoocpi jigix yi judío jāy ajcxy yjothuimbidipy e yajhuinmeecxipy ajcxy ypocy. ³² Ñich ajcxy tiy'ajt nyejcpy miid jada ycixpi, etz nañ jadu'n je Espiritu Santo huidibi Dios ymooyb pinjaty capxymidoohuip.

³³ Co je jāy ajcxy jadu'n midoy, chi ajcxy ooy yjotmätocoty, chi ajcxy jayaj'öga'ñ. ³⁴ Huin'it ytinayigy ma je naymujctac tüg fariseojāy, hue' anajty yxii Gamaliel, hue' je' anajty Moisés yley ñihuindzin'ajtjip. E jāy ajcxy ooy anajty yajmij'ajtcixy je Gamaliel. Chi je' ni'ane'mdii co huen yajpidzimyii tzojcyi jii by tiba'y je apóstoles ajcxy. ³⁵ Chi Gamaliel ñimay yi tungmiidpi ajcxy:

—Judío yeydijctijc ajcxy, ixcim ti mdungixy miid jada jāy ajcxy. ³⁶ Jäymetz miich ajcxy co jecy'ajty je Teudas ypidigy ymīnañ co je' ymijity yjanchity, e chi ypanicxi oy nimidaax migo'pxti yeydijc. Chi ajcxy yaj'o'ci, chi tüg'óciy huidibi anajty ti ypanicxyii yöhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mīna cajpjāy anajty ñecypejtcixy, ypidigy Judas huidibi tzon Galilea. Mayjāy ypanicxi; nañ jadu'n ajcxy yaj'o'cy, e tüg'óciy jāy huidibi panicxy jadu'ñyi ajcxy yöhuäcxtay. ³⁸ Paady ñich miich ajcxy jadu'n nimaaygixy, ixmajtcixy yi apóstoles ajcxy, e ca' mmijyöybejtcixy. Peni jāy yi y'ayuc ytiy'ajt huidibi ajcxy ymiid, cixip tigoyip y'.

³⁹ Pen Dios y'ayuc ytiy'ajt y' ajcxy ymiid, ca' ajcxy mjadipy nej myajcödigóoygixyipy. Jaty nayguend'ajtigixy, ca' jecyity co Dios anajty miid mdziptungixy.

⁴⁰ Nidüg'óciy ajcxy jäygidacy Gamaliel ycapxhuñin. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmaziiy.

⁴¹ Je apóstoles ajcxy ypidzimy ajcxy ma tungmiidpi ajcxy yhuinduu ooy yjotcujcity co Dios jadu'n ti aa'ixy co huen tzaachytuñyii miid Jesús yxii ycixpi. ⁴² E ooy ajcxy yaj'ixpijccixy etz nimiyaaccixy Jesucristo jabom jabom jadu'n tzajtigoty nañ jadu'n majaty tijc.

Chi ajcxy yajnibejty huixtujc mutztungmiidpi

6 Je huin'it xii ajcxy huidibi ixpijcp Jesús y'ayuc ñigi anajty ñimayiy'adiitcixy. E huidibi anajty capxp griego ayuc ytiigy nayñigäpxip miid huidibi judío

y'ayuc capxp. Ymīnaangixy co yi griegojāy co'ögy töxyjädiyc, ca' anajty ajcxy paady quipxyjaty miid je judío jāy co'ögy töxyjädyjic caayin uucin jabom jabom.

² Huin'it yi majmetzpi apóstoles ajcxy yajnaymujctayyi je jāy huidibi Jesús mibijcp, chi ajcxy ymīnañ:

—Ca' huaad ñich ajcxy Dios y'ayuccapxhuäcxin n'ijx-majch, e ñicxyich caayin uucin yajhuäcxcixy. ³ Paady miich ajcxy migügtijc nayhuin'ixigix huixtujc yeydijctijc huidibi oy yajmij'ajtni Dios, huidibi huädz oy yhuinma'ñ ymiid, huidibi je Dios yjihui'ñ ymic'ajt miid, e huen ajcxy tung'adiib jada tung. ⁴ Ñich ajcxy njacmibijctzohuamy Dios, etz ñich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjāy huin'ixy Esteban huidibi ymiid ooy ymibijcin, etz ymiid Espirito Santo. Nañ huin'ixy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudío jāyity. Hue' je' anajty chooñ jim Antioquía, jécyip anajty jijptigiyñi judío jāy ytiy'ajt. ⁶ Chi ajcxy yajnicxy je jāy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc ñigi anajty jāy tzachnejhuiñi. E je mibijcpidijc ñigi anajty ajcxy chachni-mayñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymiid anajty Dios ymic'ajt etz y'oy'ajt e oy mijhuinma'ñ tuuñ, etz yecy ixpejt ma jāy ajcxy.

⁹ Huin'it xii ñijējity ixpijctijc ooy ñay'ixquixigixy y'ixpijcin miid Esteban jim ma judío jāy ajcxy ñaymujctac huidi anajty yxii Libertados. E jim anajty Cirene jāy, Alejandría jāy, Cilicia jāy, etz huidibi tzomb jim Asia ñaaxjot. ¹⁰ Ca' ajcxy mīmadacy Esteban com hue' je' anajty ycapxy miid yhuijy'ajt ycuaj'ajt huidibi je Espiritu Santo anajty mooyip. ¹¹ Chi Esteban ymidzip ajcxy mujuy jāy huidibi jēbi ñihuambety Esteban, co ti anajty ooy ycapxtigooy etz ni'ojy Moisés etz Dios. ¹² Jadu'n ajcxy yajyuumēgy yaj'oxigy yi jāy mijjādyjic, etz huidibi ajcxy yaj'ixpijcp Moisés yley. Chi ajcxy mīmadacy majch ajcxy Esteban, yajnicxy ajcxy ma je judío jāy ymiltungmiidpi etz ixpijctijc ñaymūjcgixy. ¹³ Chi ajcxy ixtaayyi jāy huidibi ñihuambedib, chi ajcxy ymīnañ:

—Jada Esteban jibic nigapxy yi Dios ytiyc etz Moisés ytiy'ajt. ¹⁴ Ti ñich ajcxy midoy co ymīnañ co Jesús je Nazaretpi yjidamy je Dios ytiyc, e yajtigadza'ñ Dios ytiy'ajt jadu'n nej Moisés ajt xymooyim.

¹⁵ Huin'it je judío jāy tungmiidpi e tüg'óciy jāy nej anajty ajcxy jim ñaaygixy huindixpejty ajcxy Esteban. E chi ajcxy iixi yhuiñyijp jadu'n anajty quēxgy nej y'ängel yhuiñyijp.

Esteban ñaygohuaani ma tungmiidpi yhuinduu

7 Huin'it je teedy miltungmiidpi yaj'amidooy Esteban:

—¿Nej janch jadaj?

² Chi Esteban y'adzooy:

—Migügtijc ajcxy etz mijjäydijc ocmidoogix. Æich ajt nDios mijpi janchypi nayquëxici ma Æich ajt nmij'ap nmijteedy Abraham jecy'ajty co anajty jim ity Mesopotamia Æaaxjot, ca'ni anajty chinaydacpicy jim Harán. ³ Chi Abraham Dios Æimaayi: "Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajniñihuamyb." ⁴ Chi Abraham chooñ ma yi Caldea Æaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiiñ ma jada naaxjot ma miich ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägipy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jëdiiib. Oyiñ anajty Abraham ca' y'ung miidity co Dios ymígapxi. ⁶ Nimaayi Dios co y'ap y'oc y'adzinähuiipy ajcxy ma huingjäy Æaaxjot, etz chi ajcxy ytumbi'adiiyb etz chaachytuniiyb midaaax migo'px jimijit. ⁷ Nañ jadu'n Dios nimay Abraham: "Ndzaachytuniiyich je naax cajp ma yi m'ap m'oc anajty ytum-bi'adyii. Chi choonip ajcxy jim, e chi xymiduniiyich ma jadaayaabi it." ⁸ Dios ytuun tüg capxytuunin miid Abraham, co huen ajcxy yajtiy'ajttihui. Paady co Abraham y'ung Isaac yma'xung'ajty conductujc xii ajcxy oy tiy'ajttiiy. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy Æi'ap'ajty yi nimajmetzpi cypí Israel ycajp.

⁹ Chi Esteban yjacmínañ:

—Je' ajcxy Jacob ymang, Æich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios miid anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpíjcin jigix cömay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xii ymiiñ mijyuu mij'ayo'n jim Egipto etz jim Canaán Æaaxjot. Je huin'it xii Æich ajt nmij'ap nmijteedy ca' anajty ajcxy paady ti ycaiyipy. ¹² Co Jacob oy nejhuiy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi Æich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mímajt'ocpi co ajcxy oy trigo juy, huin'it José Æayñi-gapxi ma y'ajch ajcxy. E chi je rey nejhuiy pinjäy je' anajty je José. ¹⁴ Chi José capxyñigüejxy huen cidaaccixy jim Egipto yi' yteedy Jacob miid tüg'óciy yjuugy ymigüg. Hue' anajty ajcxy Æaybaattáayigixy nidugi'px majmocx jäy. ¹⁵ E jadu'n yjajty co Jacobo oy chinaydacpicy jim Egipto. Jim oy comjey y'o'cni. Nañ jadu'n jim ajcxy y'o'cy may Æich ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypacj ma Æaaxtigäy, e chi ajcxy yajnicxy jim Siquem, oy pi-daaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacmínañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judíojäy ooy ymayiiyiñ jim Egipto. ¹⁸ Chi oy jadüg rey ytigiiy ane'mbi'it hidibi ca' ixy'adyii José. ¹⁹ Je rey yhuin'iiñ Æich ajt nmij'ap nmijteedy, e oy ajcxy chaachytuun. E chi ane'my co huen y'ung ajcxy niaguecyaaygixy hidibi

anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jäygidacy. Chi Moisés ytaj yteedy tugiig po' yajyeeci ma ytijc. ²¹ Co ajcxy yajniagueeci, chi je rey Æiix je' agondiigiiy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpicyity, e ooy ymadacy miid y'ayuc etz miid ytung.

²³ Co Moisés anajty miidity huixchiguipx jimijit, chi pi-dacy yhuinma'ñ co nicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuniiy tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuniiy. ²⁵ Hue' Moisés tijy co je' y'amigügtijc ajcxy huen nejhuiy huinjihuüy co Dios nihua'naanip ma ymidzip miid Moisés yciixpi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemaañ je tzip, chi nimay: "Miich ajcxy nay'amigüg'ajtip, ¿nej co mdzip-tungixy miich ajcxy miñ xyipy?" ²⁷ Je huidibi anajty ymigüg tzaachytuum huin'it najtziitiiy Moisés, nimay: "¿Pin ti xypidägy huindzin etz tiydumbi ma Æich ajcxy?" ²⁸ ¿Nej xyaj'ögaamich jadu'n nej axiy myaj'o'cy yi egipciojäy?" ²⁹ Co Moisés jadu'n midoy, chi yqueegy, Æicxy jim ma Madián naaxjot. Moisés jecy y'adzinaay jim Madián naaxjot, e jim oy ypicxy. Chi ytöxyijc paty metz ymang.

³⁰ Huixchiguipx jimijit naxy, huin'it jim adügtuum ma je cop huidibi yxii Sinaí, Æayguëxici tüg ángel jinjoty ma tüg quipymang hidibi anajty tzachtooyb. ³¹ Chi Moisés ooy jihuüy huinmaay miid je' yciixpi hidibi anajty y'ijxyp. Co oy mihuingoñ, chi midoy co je Huindzin Dios Æimäyii: ³² "Æich Dios hidibi mmij'ap mmijteedy ajcxy Abraham, Isaac etz Jacobo Dios'ajtpy." Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayi: "Jen mgig, com je it ma miich mdinäy, Dios yi' y'it. ³⁴ Æich ti n'ixyich njäyich nej tzaachypí paatcixy jim Egipto. Ti nmidooyich co yi'ajcxy yäxy ytinäy miid je tzaachypí yciixpi. Ti ngidägyich co ajcxy ngohuaanip. Æich miich nguexamyb jim Egipto ma yi Israel jäy ajcxy."

³⁵ Chi Esteban yjacmínañ:

—Co Moisés oga'n Æicxy ma Æich ajt nmij'ap nmijteedy ca' ajcxy cöbijcy huen y'ane'miiyb, chi ajcxy ymi-nañ: "¿Pin ti xyñimäy co Æich miich ajcxy nhuindzin'adiiyb?" Co mímajt'ocpi Moisés Æicxy ma yi Israel jäy, je taabi anajty je ángel ti ymigapxyii jinye'ñ aguyc, chi ajcxy cöbijcy. ³⁶ Je Moisés je' yajpidzim Æich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz ijxpejt huixchiguipx jimijit jim Egipto, jim ma tzaptz mejy, etz jim ma mijtigüduum. ³⁷ Je Moisés hidibi jecy'ajty nimay je Israel jäy: "Dios y'ijxtihuipy tüg jäy ma miich ajcxy m'ap m'oc hidibi najtzcaxihuipy yi' y'ayuc, jadu'n nej ti xy'ijxtiiyich ma miich ajcxy. M'amido'ijtip ajcxy yi' y'ayuc." ³⁸ Je Moisés jim je' anajty mijtigüduum miid je mayjäy. Chi jim je Dios y'ángel miid miydacy ma je cop huidi yxii Sinaí, etz Moisés yajnax Dios y'ayuc ma Æich ajt nmij'ap nmijteedy.

Moisés y'cöbïjc Dios y'ayuc huïdibï jugy'ájtïn huïnïxï#bï mïïd, etz jayhui'my mïïd ïch ajt ycïxpi.

³⁹ Chi ïch ajt nmïj'ap nmïjteedy ajcxy jecy'ajtpy ca' anajty ajcxy capxcöbïgaangïxy Moisés, ca' anajty cöbïjccïxy je' y'ané'mïn, chachhuimbïdaangïxy jim Egipto. ⁴⁰ Chi ajcxy Aarón nïmay: "Ndzojcy pïch ajcxy co miïch oyduñ tüg Dios huïdibï ïch ajcxy xyhuïn-huoohuïp, com ca' nnejhuiïyim ti jada' ti yjadyïi je Moisés huïdibï ajt xyajtzoonïm Egipto ñaaxjot." ⁴¹ Chi oyduñ ajcxy tüg huajmang. Chi huïndzïgïy ajcxy je huajmang huïdibï anajty ti yajcojcy, e ooy ajcxy mïjotcuyc'ajty huïdibï cï'm anajty ti yajcojy. ⁴² Huïn'it xïï ajcxy Dios y'ixmajtzi, huen ajcxy ojadaty yï xïï, yï po' etz madza'. Com jadu'n Dios y'ayuc cojaaybï cojaay co Dios jadu'n ymïnañ:

Israel jäy ajcxy canan ïch je' huïdibï ti mhuïndzïgïygyxy jim mïjtgïdïuum huïxchïguïpx jimïjt.

⁴³ Ti mgïynïcxcïxy Moloc ytiïc etz yï Renfán ymadza', tzadzech, quipychech etz oori oyduñ huïdibï miïch ajcxy cï'm myajcoj huïdibï anajty ajcxy m'ojadadamy. Paady ïch miïch ajcxy nyajpïdzïmaangïxy ma yï mnaaxjot, e nguexaangïxy jïguem jim Babilonia nï-naxy.

⁴⁴ Chi Esteban yjacmïnañ:

—Jim mïjtgïdïuum ïch ajt nmïj'ap nmïjteedy ymïïd anajty cochactïjc ma anajty ajcxy Dios huïndzïgïy. Jïiby anajty ajcxy yujccïy je tzaa ma Dios ytiy'ajt ycojaayty. Je cochactïjc ajcxy ycoj jadu'n nej anajty ti yaj'ane'myïi Moisés, e nej anajty yajni'ixïyïi nej tunipy. ⁴⁵ ïch ajt nmïj'ap nmïjteedy mïhuï'm je cochactïjc, e ïch ajt nmïj'ap nmïjteedy huïdibï mïïñ ma jada naaxjot mïïd Josué, chi mïmïïñ ajcxy je cochactïjc je taab ajcxy mï-madacy je ymïdzip canaag'agajp. Dios yajpïdzïm je' ajcxy ymïdzip ma je naaxjot, jïgïx yajcïdïgïhuïp ïch ajt nmïj'ap nmïjteedy. Yajtuuñ ajcxy je cochactïjc, ixtï coonï David ytiïgïy ane'mbï. ⁴⁶ Dios yjäygïdaac je rey David, e David yjacoja'ñ anajty tüg tïjc oyduñ ma jëbï yaj'ojadaty yajhuïndzïgïy Dios, je Dios huïdï Jacob mïjpidac jecy'ajty. ⁴⁷ Per Salomón je' oy cojy Dios ytiïc. ⁴⁸ Oy yï Dios tzajpjtoty'pï ca' chïnäy ma yï tïjc tïbï jäy cojy. Jadu'n nej je Dios y'ayucnajtzcaxpïy'ïbï jecy'ajty jaybety co Dios jadu'n ymïnañ:

⁴⁹ Je tzajp hue' je' ïch n'ane'mdac, jada naaxhuiñy'ïbï ïch ndecypocxtac. ¿Ti tïjc ïch miïch ajcxy xycojaanïp? ¿Ma je it huïdibï it ma ïch jëbï nbocxy?

⁵⁰ ¿Nej cay ïch ti n'oyduñ tüg'óciy?

⁵¹ Miïch ajcxy ooy mïjotjuuñty, ca' mgapxymïdoy Dios. Jadu'n Esteban yjacmïnañ:

—Jadu'n miïch ajcxy mïjot mhuïnma'ñ mïdity jadu'n nej jäy ajcxy huïdibï ca' Dios ytiy'ajt nejhuïyï. Miïch ajcxy játyim mïdzip'ajtpy je Espïritu Santo. Mdügïy'ïbï ajcxy mïïd mmïj'ap mmïjteedy. ⁵² Miïch ajcxy mmïj'ap mmïjteedy chaachytuun tüg'óciy Dios y'ayucnajtzcaxpïy'ïbï. Yï' ajcxy yaj'o'c Dios y'ayucnajtzcaxpïy'ïbï huïdibï jayïjp'aty najtzcaxpïy'ï co ymïna'ñ tüg jäy huïdibï tudägyïp. E co je tudägy jäy ymïïñ, chi miïch ajcxy ago-jïïx myaj'o'cy. ⁵³ Je Dios y'ángel miïch ajcxy xymooy je Dios ytiy'ajt, e ca' ajcxy mgöbïjcy.

Yajtzaagögätcïxy Esteban

⁵⁴ Co je mayjäy mïdoy jadu'n nej Esteban ymïnañ, chi ajcxy mïjotmätcoty Esteban, chi ytiïgïy ajcxy tïtzmucx-pï tïtztqueetpï. ⁵⁵ E chi je Esteban jihuiy je Espïritu Santo ma yjot yhuïnma'ñ, chi chajp'ïjxy, e ïjxy yï Dios y'oy'ájtïn etz ïjxy Jesús ytiñäy a'oy'amy ma Dios Teedy. ⁵⁶ Chi Esteban nïmay je mayjäy:

—ïjxcïx! N'ïjxypïch yï tzajp ahuädz, e n'ïjxypïch je jäy huïdibï tzoon tzajpjtoty ytiñäy a'oy'amy ma Dios Teedy.

⁵⁷ E chi je mayjäy ajcxy ytätz'ac amo'cxy, chi ajcxy ytiïgïy huambï jihuiy'ïbï, e chi ajcxy nimujcy yajmujcy Esteban. ⁵⁸ Chi ajcxy yajpïdzïmy Esteban cajppa', je' oy cögätcïxy. Je tiy'ajt yejcpï huïdibï jadu'n idïtzt, chi yjocxhuit ajcxy yajmïhuï'my tüg yeeg'anäg huïdibï anajty yxï Saulo. ⁵⁹ Jim anajty ajcxy Esteban tzachcätzcïxy. Chi Esteban Dios mïbïjctzoy, ymïnañ:

—Huïndzin Jesús, cöbïjcgïch n'alma.

⁶⁰ Huïn'it ycoxtïnay'ahuïy, e chi yaaxqueegy mïc ymïnañ:

—Huïndzin, ca' mbocxy ïxïpy nej ajcxy xytuñïch.

Co jadu'n Esteban ymïnanday, chi oy y'ögy.

Saulo pahuïdïjtägy ooy mïbïjcpïdïjc

8 Saulo ytuun quipxycapxy mïïd huïdibï ajcxy yaj'o'c Esteban.

Huïn'it xïï yaj'ixhuïdïjt yajpahuïdïjt pïnjaty anajty Jesús mïbïjcp jim Jerusalén. Tüg'óciy je jäy ajcxy huïdibï Jesús mïbïjcp anajty yqueec-huäcxtay, ñïcxy ajcxy jim Judea ñaaxjot etz Samaria ñaaxjot. Jëyï je majmetzpi apóstoles ajcxy jac-huï'mïy. ² Nïjëjity yëydïjc huïdibï Dios huïndzïgïy'ïbï oy yajnaxtigïy Esteban. E ooy ajcxy jotmay jihuiy, yaaxy ajcxy mïïd je' ycïxpi. ³ Chi Saulo ooy ïxhuïdïjtcoty pahuïdïjtcoty huïdïjaty Jesús mïbïjcp etz tïjc tïjc anajty yajpïdzïmy pahuïch pajuguty yëydïjc-tïjc etz töxyjäydïjc, e pïdaaccïxy anajty pujxtïgoty.

Jim Samaria ajcxy capxhuäcxy Dios y'ayuc

⁴ Je huïdï ajcxy queec-huäcxtay ycapxhuäcxyp anajty ajcxy Jesús y'ayuc huen tïm ma'amy huïdïjtcïxy.

⁵ Nïdüg'tï huïdibï anajty yxï Felipe ñïcxy jim Samaria, ytiïgïy y'ayuccapxhuäcxpi, yajni'may ajcxy Cristo ytiy'ajt. ⁶ E je jäy ajcxy ñayyöymujci nïdüg'óciy ajcxy y'amïdo'ïjtcïxy janch amoñyï jadu'n nej Felipe anajty ymïydägy e ïjxyp anajty ajcxy je mïjhuïnma'ñ huïdibï Felipe anajty ytumy'ïbï. ⁷ Com may anajty jäy jim huïdibï mïïd ca'oybï ma yjot yhuïnma'ñ, e tzoocp anajty ajcxy. E co je ca'oybï anajty ypïdzïmy ma je jäy, chi je jäy ooy yjacyaaxqueecy. Etz nañ mayjäy anajty chögy huïdibï ca' yci' ytecy yücxy etz tecyma'tpï. ⁸ E jadu'n je mayjäy ajcxy anajty jim ooy yjotcuycïty.

⁹ Jim anajty tüg yëydïjc huïdibï anajty yxï Simón huïdibï anajty ti n'ïxpïgïy huïjy'ïbï huïnma'ñ, e ooy anajty may Samaria jäy huïn'ïñ, ymïna'ñ co je' anajty ymïjity yjanchïty. ¹⁰ Tüg'óciy jäy anajty oy amïdo'ïjtcïxy Simón y'ayuc, pïctïjc etz mïj'anäctïjc, e ymïnaangïxy:

—Jadayaabi yëydïjc ymïd jada Dios ymïc'ajt.

¹¹ Ooy anajty je jäy ajcxy Simón mijnicxpejtcixy, com mïd je mañ'ajt anajty jecy ti chachhuin'ñinigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'aném'in etz Jesucristo, chi ajcxy ñi#bejty yëydjctijc etz töxyjäydjic. ¹³ Etz je Simón, je huijyjäy, nañ jadu'n mibijcy e ñi#bejty. Chi Simón puyöyiy Felipe, ooy jihuiy huinmaay jadu'n nej je mijhuinma'ñ huidibi anajty Felipe ytumyeb etz jadu'n nej anajty Dios ymic'ajt ixi.

¹⁴ Co ajcxy je majmetzpi apóstoles ajcxy, huidi anajty jim Jerusalén, nejhuuiy co je Samaria jäy anajty ti cöbijcixy Dios y'ayuc, chi ajcxy quejxy jim je Pedro etz Juan.

¹⁵ Co Pedro etz Juan yja'ty jim Samaria, chi ajcxy Dios mibijctzoy mïd je mibijcpidijc ycixpi, jigix ajcxy ymöhuiyeb je Espiritu Santo. ¹⁶ Com ca'ni anajty je' ajcxy ñicidägyii, jëyi anajty ti ñi#bejtcixy ma Huindzin Jesús yxi. ¹⁷ Huin'it Pedro etz Juan cñixajy ajcxy, e chi je Espiritu Santo y'adigiy yjottigiy ajcxy.

¹⁸ Co Simón ijxy co je Espiritu Santo y'adigiyii yjottigiyii co yi apóstoles ajcxy yçñixajy, chi Simón yaj'ahuaniy je' ajcxy meeñ, ymínañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espiritu Santo y'adigiyii yjottigiyii.

²⁰ Chi Pedro nimay Simón:

—Mï'ögihuiy miih mmeñ, mïd co mhuinma'ñ ti mbidägy co meeñyig mbada'ñ je huidibi Dios ñiyejcp.

²¹ Com miih ca' xypaady jadaaabi tung, com miih mjot mhuinma'ñ ca' ytuädägy ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jécyity xyhuinmeecxipy jadu'n nej jibic mjot mhuinma'ñ mmiidity. ²³ Com janch ta'm miih mjot mhuinma'ñ, e yi jibicpi hue' xymidity mach.

²⁴ Chi Simón y'adzooy:

—Mibijctzou je Huindzin Dios mïd ñich ycixpi, jigix ca' ti xyjadipyich jadu'n nej miih ti xyñimäyich.

²⁵ Co Pedro etz Juan t'y'ajt yeycy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe mïd je Etiopía jäy

²⁶ Huin'it xi Huindzin Dios y'ángel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huidi tzomb jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti mïd tüg Etiopía jäy. Hue' je' anajty eunuco, mijtungmïd jim Etiopía. Yi' je' tesoro'ajt anajty ma je töxyjäy huidibi anajty yxi Candace huidibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸ E chi yhuimbijtni anajty ma ycajp, ñaayb anajty carretijoty yam chachnecycapxy. Hue' anajty chachcapxy je Dios y'ayuc huidibi Isaías ycojaay. ²⁹ Chi je Espiritu ñimay Felipe co huen nicxy najtpadüy je carretí ma je eunuco anajty y'ñäy.

³⁰ Co Felipe mihuingoñ je carretí, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhuinjihuuyb huidibi mgapxyp?

³¹ Chi je jäy y'adzooy:

—¿Nej ñich nhuinjihuiy pen ca' pin xyajnimäyich? Chi je eunuco nimay je Felipe co huen mïd ññäyii carretijoty.

³² Je huidibi anajty je eunuco chachcapxyp jadu'n je' anajty ymínañ:

Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy ñime'pxy. Ni tüg'aa huam ycamínañ.

³³ Ti jäy yajtzöyduñyii, ca' ajcxy a'ixiy co yjanayñigapxtüdaani. Ni y'ap y'oc ycaca'ty pin ognigapxtüdüb. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajniimaaygich pin jada ayucnajtzcaxiybi ñimiydacpy, ¿c'm ñayñimidygyii o ji jada huingbi pin nimiydacpy?

³⁵ Chi Felipe yajtzondacy je ayuc capxticxin ma jadaaabi Dios y'ayucjoaaybi ñecy. Chi yajmïdmiydaaci nej Jesús yjajty y'ayoy. ³⁶ Co ajcxy ñajx ma tüg ñi, chi je eunuco ymínañ:

—Cha nii, ¿nej ca' ñich jëbi huaad nnibetyi?

³⁷ Chi Felipe y'adzooy:

—Pen mmibijcypy Jesús mïd tüg'öciy yi mjot mhuinma'ñ jëbi mnibety.

Chi je jäy y'adzooy:

—Nmibijcypyich co Jesucristo Dios yi' y'ung.

³⁸ Chi je eunuco nimay je carretí huindzin co huen yajtinaxipy je' carretí. Chi nimetz ajcxy ñicxy ma ñi, e chi Felipe yajni#bejty je eunuco. ³⁹ Co ajcxy ñi#bidzimy, chi je eunuco ijxtigoy je Felipe. Jadu'ñyi je Huindzin Dios y'Espiritu yajnicxi. E chi je eunuco ytü yajyöyñi jotcuyc.

⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

Saulo yjothuimbijty

9 Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'ñ anajty ajcxy. Paady oy icy je teedy mijtungmïdipi, ² pijctzoy cötüjcin, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibijcip. Saulo yajmiina'ñ anajty ajcxy mach jim Jerusalén huen yëydjctijcity huen töxyjäydjcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huidi tzomb tzajpjoty, ñigidaaci juhuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

⁵ Chi Saulo yajtiy:

—¿Mbin miih, Huindzin?

Chi midoy co y'adzoyii:

—Ñich je' Jesús, je huidibi miih mdzachpahuidijttacpy, c'm nayyajtzaachytunyii jadu'n nej huajyuub co jipconebi'y huidi mïd ñuumygyyii.

⁶ Chi Saulo chiyuygoty chachchigiy, e ymínañ:

—Huindzin, ¿ti mdzojcpy ndunipyich?

Chi je Huindzin Jesús ñimaayí:

—Pidĭg etz nicx cajpjoty, e jim nyajnimāhuipy ti jēbi mduñ.

⁷ Je yēdyjctijc huidibi anajty Saulo ymiid ooy ajcxy ñay'adzigĭyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidĭgy, e co huindĭcxĭcni ca' pin ma oc'ijxnĭ. Chi ajcxy majch Saulo ma yci', e chi ajcxy huijtznicxy jim Damasco. ⁹ Tugĭg xĭ Pablo jim y'ijty huiintz, ca' ycaay y'uucy.

¹⁰ Jim Damasco anajty tūg yēdyjctijc chināy huidibi Jesús y'ayuc mibĭjctip, huidi anajty yxĭ Ananĭas, cumāyjoty Dios ñimaayi:

—¡Ananĭas!

E chi je' y'adzooy:

—Cha ĩch, Huindzin Dios.

¹¹ Chi je Huindzin Dios ñimaayi:

—Pidĭg, nicx ma je tū huidibi yxĭ Derecha, e jim ma Judas ytiyc yajtiū tūg Tarso jāy, huidi yxĭ Saulo. Dios mibĭjctzoob je' jim cham, cumāyjoty ti huin'ijxy tūg yēdyjctijc huidi yxĭ Ananĭas, co oy ñimiñyĭ, e yĭcĭñaxajĭy jigix y'ijxĭgip jadūg'oc.

¹³ Chi Ananĭas y'adzooy:

—Huindzin Jesús, mayjāy ti xyajmĭidmiydāgyĭch ajcxy jadu'n nej yĭ Saulo jĭbic y'ĭdĭch jim Jerusalén mĭid miich mjāy ajcxy. ¹⁴ Jadachambi ti mĭimiñ ya je necy, ma teedy mĭitungmĭidpi ti yĭcĭtujcmōyĭ, co huen majtztāy je jāy, e yajnicxtāhuipy jim Jerusalén, tūg'ócy pinjaty ojadajtp miich mxĭ.

¹⁵ Chi je Huindzin Jesús nimay Ananĭas:

—Nicx, com ti ĩch huin'ixy yĭjĭibi yēdyjctijc, jigix ĩch nxĭ etz n'ayucĭch capxhuācxipy ma tūg'ócy naax cajp huidi ca' yjudĭojāyity, etz ma yĭ reydĭjctijc, etz nañ jadu'n ma yĭ judĭojāy ajcxy. ¹⁶ ĩch yĭ nyajnimāhuipy tūg'ócy, nej ayon' yajnaxipy mĭid ĩch nxĭ ycxipi.

¹⁷ Chi Ananĭas ñicxy ma Saulo anajty ti yjāttāgy, co ytiĭgy tigoty, chi cĭñaxajy Saulo, e chi nimay:

—Mĭgūg Saulo, je Huindzin Jesús huidibi nayguēxĭci jim tū'am ma miich anajty mĭiñ, yĭ ti xyquexyĭch jigix m'ijxĭgipy jadūg'oc, etz je Espĭritu Santo xyñĭdigĭhuip xycōdigĭhuip.

¹⁸ Mĭc'amy ycāy ma Saulo yhuin jadu'n nej acx ñimeeñ, chi y'ijxĭgy. Huin'it Saulo ypidĭgy e chi yajñĭbejtĭ. ¹⁹ Chi Saulo ycaay y'uucy, e chi ymĭc'pĭjcy jadūg'oc. Chi jim mĭid'ijty jecy huidibi ajcxy ixpĭjctip Jesús y'ayuc jim Damasco.

Saulo capxhuācxyc Dios y'ayuc jim Damasco

²⁰ Chi janch mĭc'amy Saulo ytiĭgy Dios y'ayuccapxhuācxp ma je judĭojāy ajcxy ñaymujctac jim Damasco, ymĭnañ co je Jesús hue' je' Dios y'ung. ²¹ Tūg'ócy pinjaty anajty midoohuip Saulo y'ayuc, ooy ajcxy jihuiy huinmaay, etz ñayñimāayigixy:

—¿Nej ca' jada' yjĭjity je huidibi tzachyajcōdigoyam yĭ jāy ajcxy huidibi Jesús yxĭ miyaax ojadājtĭp jim Jerusalén? ¿Nej ca' jada' yjĭjity huidi anajty ti ymĭiñ ya jāy ymajtzpĭ, e nicxy cĭyega'ñ ma teedy mĭitungmĭidpi?

²² Je Saulo capxhuācxip anajty Jesús y'ayuc huinmĭc jotmic, e nigapxtāy co Jesús hue' je' je Cristo, chi yĭ

judĭojāy ajcxy huidi anajty jim tzinaayb Damasco cijc ajcxy yhuinma'ñ tigoydāy.

Saulo yqueecy ma judĭojāy ajcxy

²³ Ti anajty hueeni xĭ tiempo ñajtzñicxĭyĭñi, chi je judĭojāy ajcxy ñaygapxi co yaj'ōgaangixy je Saulo.

²⁴ Saulo ñejhuĭy co anajty yaj'ōga'ñyĭ. Chi jim anajty ajcxy y'ahuixyĭ xĭm tzuum ma je poch aguu cajppābi, jim anajty yaj'ōga'ñyĭ. ²⁵ E je jāy ajcxy huidibi anajty ymĭjpidacpy Jesús, chi je' ajcxy codĭyñajxy je Saulo mijcachjoty ma je pochycop huidi je cajp mĭid jūbojtz'ahuidĭtyity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyōyĭhuaañ je mĭbĭjcpĭdĭjctijc ajcxy. Nidūg'ócy anajty ajcxy ooy tzigĭygyxyc anajty com ca' anajty mĭbĭjctĭcy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmĭidmiydactay nej Saulo anajty ti ixyc je Huindzin Jesús tū'am, e nej anajty Saulo Jesús y'ayuc ti capxhuācxĭ huinmĭc jotmic jim Damasco. ²⁸ Huin'it Saulo yhuĭmy jim Jerusalén, e mĭid huidity anajty ajcxy. ²⁹ Aamic jotmic capxhuācxyc je Huindzin Jesús y'ayuc, etz mĭid miydaaccixy e ñaymĭcmĭgāpxĭgixy mĭid je judĭojāy huidibi griego ayuc caxp. E je' ajcxy nihuinmayĭy co yaj'ōgaangixy. ³⁰ Co je mĭbĭjcpĭdĭjctijc nejhuĭy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcujc anajty chinaaygixy, e nĭgi anajty ixpĭjctĭdĭch Dios y'ayuc ytiy'ajt, jadu'n nej yĭ huidibi ajcxy tzinaayb ma yĭ Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmĭj'ajtcĭcy je Huindzin Jesús, e mĭid je Espĭritu Santo ypubĭjtin, nĭgi anajty yjacmayĭgyxyc.

Pedro yajtzoocy Eneas

³² Co anajty Pedro yhuidijty cogapxĭy cajp cajp je mĭbĭjcpĭdĭjctijc ajcxy, y'oy nañ jadu'n ma je mĭbĭjcpĭdĭjctijc ajcxy huidibi tzinaayb jim Lida. ³³ Jim mĭnaybaatti tūg yēdyjctijc huidibi anajty yxĭ Eneas, huidibi anajty ti ypa'm'ijtni tuctujc jimĭjt, hue' je' anajty yĭcĭxuxy ytecyxyc. ³⁴ Chi Pedro nimay:

—Eneas, Jesucristo xyajtzoocp, pidĭg, etz yajpidĭg yĭ mmaabejt.

Chi Eneas mĭc'amy ypidĭgy. ³⁵ Chi ijxy tūg'ócy jāy huidibi tzinaayb jim Lida etz Sarón. Chi ajcxy yjothuimbijttay nidūg'ócy, ixmajtztay tūg'ócy yĭ ñĭ'ap huinma'ñ e jĭjptĭgyĭy yĭ Huindzin Jesús y'ixpĭjctĭc.

Co Dorcas y'o'cy, chi yjugpĭjcy jadūg'oc

³⁶ Je huin'it tiempo jim Jope, jim anajty tūg tōxyjāy chināy huidibi mĭbĭjcp Jesús, hue' anajty yxĭ Tabita, je' huidi griegojāy ytiyyp Dorcas. E je Dorcas oy xĭ tiempo anajty yajnaxyc mĭ'oyjāy'aty yĭ jāy ajcxy. ³⁷ Jadu'n yjajti huin'it tiempo Dorcas ypa'mbejtĭ, e chi ytimy'o'cy. Co ajcxy yajtziiday, chi ajcxy je ōcpi yajnicxy ma je tiyc

mimejtznihuijtzpetypí. ³⁸ Je Jope cajp naymihuigon'ájtíp anajty miið Lida cajp ma anajty Pedro yajpaady, co miðijcpidijc ajcxy anajty nejhuíy co je' anajty yjímity, chi ajcxy mejtz yéydijc quejxy co huen nimäyíi: —Min tzojc ya Jope.

³⁹ Huin'it Pedro ñicxy miið je' ajcxy. Co jim yja'ty, chi ajcxy yajnicxy ma je tijc mimejtznihuijtzpetypí, e jim anajty ajcxy je co'ögy töxyjäydijc ajcxy ytinayjühuidityí ma je öcpi, chachyaaxcixy. Chi ajcxy Pedro yaj'ijxy je huit nijen huidibi Dorcas anajty ti yaj'oyíy co anajty yjuy'atyñi. ⁴⁰ Mic'amy je Pedro quejxpídzimday je jäy ajcxy. Chi ycoxtinay'ahuíy, e Dios miðijctzoy. Chi huindixpejty je öcpi, nimay:

—Tabita, pidíğ.

Huin'it Tabita yhuindixcığı, e ijxy je Pedro, chi iñaygugíy. ⁴¹ Chi Pedro majtzi yci', e chi huijtzığı. Chi yaaxi ymígügtijc etz co'ögytöxyjäydijc ajcxy, chi ajcxy yajcídigiíy juugy. ⁴² Tüg'óciy jäy ajcxy jim Jope nejhuíy-day co Pedro yajjugypijcy je Dorcas. E mayjäy miðijcy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzpi ytijc huídi anajty yxii Simón.

Pedro etz Cornelio

10 Jim Cesarea anajty tüg tungmiiðpi huídi anajty yxii Cornelio, hue' je' anajty capitán'ajtp ma tüg batallón soldado ajcxy yxiiñip, la Italiana. ² Je Cornelio ooy anajty ytudägyity, etz je' miið tüg'óciy y'ung ytöxyijc ooy anajty yajmij'ajtcixy Dios. Je Cornelio nañ jadu'n ypubety miið meeñ je judíojäy ayoobtijc, e je' Dios ojadajt anajty jabom jabom. ³ Tüg xii, minacyxii anajty, Cornelio huin'ijxy janch huadz Dios tüg y'áñgel ñigidaaci, e ñimaayi:

—iCornelio!

⁴ Chi Cornelio huindixpejty je áñgel janch tzigíy anajty, e chi yajtiíy:

—¿Ti Huindzin?

Huin'it je áñgel y'adzooy:

—Jadu'n nej mDios'ojadaty etz jadu'n nej mbubety ayoobtijc ti Dios jäygidägy. ⁵ Quex mjäy jim Jope, huen nicxy yajtzoñ Simón, huídi nañ jadu'n yajtijp Pedro. ⁶ Jim je' yja'ttacy ma jadügpí Simón, je cootzpi huídi ytijc miñingon mejypa'. Je Pedro xyajnimähuípy ti mdunípy.

⁷ Co je áñgel ñicxni huídi anajty ti ymígapxyii, chi Cornelio yaaxi mejtz ytumbi, etz tüg soldado huídi Dios capxymidoob, etz huídi je Cornelio ooy ymijnixpe-dyíi. ⁸ Chi yajmiiðmíydactay nej je áñgel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy miñingon Jope, cujc yxii anajty, e chi Pedro ypejty ma tijcñicx Dios ojadajtp. ¹⁰ Ooy Pedro anajty yuubögyii, e ooy jacaya'ñ, jimni anajty yjiiçxy yaj'oyíyíi. Chi Pedro huin'ixy je tzajp ahuadz, e huin'it ijxy quidägy jadu'n nej poob huit mijpi yxóçity majaty ytaatz. ¹² Jiiby ma je poob huit, jiiby anajty canagnax iyujc huídiaty mi-daax yci' ytecy etz tza'ñ etz joon. ¹³ Huin'it Pedro midoy co anajty ñimäyíi:

—Pedro, pidíğ nicxy yaj'ög yi iyujc etz tzüdz.

¹⁴ Chi Pedro y'adzooy:

—Ca', Huindzin, caminaabi iich ti njicxy huídi bi jibíciç etz huídi bi ca' ñigödúcyity nicxy judíojäy jiiçcixy.

¹⁵ Huin'it jadüg'oc ayuc midoy ñimäyíi:

—Huídi bi Dios yajhuäch ca' huaad mdlij co yi' yjibici-ty.

¹⁶ Tügíğ'oc jadu'n yjajti, chi je poob huit ypättigiíyñi tzajpjoty. ¹⁷ Jim anajty Pedro tzachhuinmay nej anajty yhuimbídzimye je tiibi icy co yja'ty ma tijc aguu je Cornelio yquexyöybi huídi ajcxy anajty niðihuip yajtiíhuip je Simón ytijc. ¹⁸ Chi ajcxy mic ycogapxiíy yajtiíy pen jim anajty yjättägy Simón huídi bi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tiibi icy, chi je Espíritu Santo Pedro ñimaayi:

—Tügíğ yéydijc ji xy'ixtäy. ²⁰ Pidíğ e minac, nicx miið je' ajcxy, e ca' ti mhuinmay, com iich jadu'n ti nñimäy co huen xy'ixtäy.

²¹ Huin'it Pedro yminajcy ma je' ajcxy, je Cornelio quexyöybi, nimay ajcxy:

—iich je' huídi bi miich ajcxy m'ixtaayb, ¿ti yciçpi co ti mmiingixy?

²² Chi ajcxy y'adzooy:

—Yi' iich ajcxy ti xyquexyich yi Cornelio huídi bi capitán'ajtpi, je' tudägy jäy huídi bi Dios yajmij'ajtp, je huídi bi tüg'óciy judíojäy ooy tzóccixy, etz cömaaygixy. Huindzin Dios tüg y'áñgel ñimay Cornelio co miich mi-iñ nyajhuoy, jigix mñicxip ma yi' ytijc, e y'amído'ida'ñ ajcxy nej miich myaj'ixpiga'ñ.

²³ Chi Pedro yajtijctigiíy je' ajcxy. Chi ajcxy jim ymaahui'my. Com jabom Pedro ñicxy miið je' ajcxy, e chi nijéjity ypanicxi huídi bi mijpidacp Jesús huídi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tüg mucus miið yjugymígüç, etz nijéjity pin ooy miið ñaymígüç'adyii, huídi jaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytijcpidizimye oy yjijpcobadíy je Pedro, e chi ycoxtinay'ahuíy yajmij'ada'ñ anajty je Pedro. ²⁶ Chi Pedro huijtztinayığı je Cornelio, e nimay:

—Tinayíğ, ca' xyajmij'ida'ñiich, nañ jadu'n iich njäyity nej miich.

²⁷ Miið anajty ycapxy ymiydägy co ytijctigiíy, jiiby anajty mayjäy ni'amugí'ahuixcixy. ²⁸ Chi Pedro nimay ajcxy:

—Miich ajcxy mnejhuíy co yi' judíojäy ycostumbre capx'aducy ca' huaad judíojäy yömucus miið huídi bi ca' yjudíojäyity, ca' huaad ytigíygyixy ma ajcxy ytijc. Per Dios ti xyajni'ixíyich co ca' huaad mñina'ñiich ca' oyjäyity huádzjäyity pinjaty. ²⁹ Paady co oy ti xyajhuoyiiñich ti nmiiñiich, ni ca' huam ti mñina'ñiich.

Nnejhuíhuaamyich na'amy co oy ti xyajhuoyiiñich.

³⁰ Chi Cornelio y'adzooy:

—Cham ymimidaaxxiíjy, jadu'n nej jadachambi hora, ya iich anajty ma ndijcich, jaygay jay'ügy nDios'ojadatyich. Com hue' anajty mijminacy xii mña judíojäy ajcxy ycapxtaaccixy, co tüg ñayguéxici jadu'n nej jäy miið ypoob huit janch adíçxp. ³¹ E je áñgel xyñi-maayich: "Cornelio, Dios ti xymidoohui m'oración e ti

jadu'n jäygidägy jadu'n nej mbubety yi ayoobtijc ajcxy.
³² Quex mdumbi jim Jope, huen nicxy yajtzoñ Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huidibi yxi Simón, huidibi tzinaayb miñhuingon mejypa'. Co je' ymiinipy, chi xymiidmiydägy.
³³ Paady nguejxyich janch mic'amy huen nicxy xy'lijxtäy. E ti may'ajt mduñ co ti mmiiñ. Jadachambi cha ñich ajcxy nidüg'óciy ma Dios yhuinduu. E n'amido'idáangixyich tüg'óciy je y'ayuc huidibi je Huindzin Dios ti xyaj'ane'my jébi xyajnimaaaygixy.

Pedro Dios ytij'ajt nigapxy nimiydacy ma Cornelio ytijc

³⁴ Huin'it Pedro ytigiiy y'ayuccapxhuäcxpi, nimay ajcxy:

—Jadachambi huinjihuñybich, co yi Dios ca' ni tüg icy'ixy jäy, y'actzojctaaayb hueñypínity. ³⁵ Dios ycöbjiycp hueñypinjäyity huidibi tzinaayb huen huidibi naax huen huidibi cajpity, pen chigiiyb ajcxy Dios, pen tumyb oybi. ³⁶ Dios ti quexy yi' ytij'ajt ma yi Israel jäy ajcxy, yajnimay co ji cham jotcuyc'ájtín miid Jesucristo ñich ajt nHuindzin. ³⁷ Miich ajcxy mnejhuñyb yajxon nej ti ytunyii ti yjadyii ma judíojäy ajcxy ñaax ycajp chondacy jim Galilea, Juan el Bautista ti anajty capxhuäcxí Dios y'ayuc ytij'ajt etz yjääyajnibety. ³⁸ E mnejhuñyb miich ajcxy co Dios yejc je Jesús je Nazaretpi je Espiritu Santo, e nej Jesús yhuidijty e tuuñ oy'ájtín, etz mijhuinma'ñ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty miid y'ity je Jesús. ³⁹ ñich ajcxy je tiy'ajt nmíidich tüg'óciy jadu'n nej Jesús yajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy codugiiig xi, e chi yajnayguëxci ma ñich ajcxy. ⁴¹ Ca' ti yajnayguëxgyii ma tüg'óciy jäy, jëyi ma ñich ajcxy huidi jayijp Dios yhuin'ijx jigix tiy'ajt nyegipiyich. ñich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjäy ajcxy etz nidij'ajt'adipiyich ajcxy co Dios Jesús ti pidägy mij'ane'mbi ma yi juugypí etz ma yi ögypi. ⁴³ Nañ jadu'n jecy'ajty tüg'óciy Dios y'ayucnajtzcaxiiyb iñimiydac ajcxy Jesús, e ymínañ ajcxy co tüg'óciy je jäy ajcxy pinjaty mibijc je Cristo, Dios huinmecxñib ajcxy ypocy.

Je Espiritu Santo ycidacy ma je ca'pi ajcxy yjudíojäyity

⁴⁴ Yam anajty Pedro ycapxyñi co je Espiritu Santo ñidigiiyi ycödigiiyi ajcxy nidüg'óciy huidijaty y'amido'ijtp Pedro y'ayuc. ⁴⁵ E je judío mibijcpidijc ajcxy tiibi anajty miñ miid Pedro, ooy ajcxy jihuiy huinmay co Dios quejx Espiritu Santo ma je jäy ajcxy huidibi ca' yjudíojäyity, ⁴⁶ co midoy ycapxcixy miid huingbi ayuc, etz cömaygixy jäymejtzcixy Dios. ⁴⁷ Chi Pedro ymínañ:

—¿Nej ca' jada' y'óyity co ñiñbedipy ajcxy huidibi Dios ti ymóoyigixy je yEspiritu Santo jadu'n nej ñich ajt xy-mooyim?

⁴⁸ Chi Pedro ni'ane'mdiiy huen niñbejtccixy ma Huindzin Jesucristo yxi. Huin'it ajcxy Pedro cohuaniiy huen huim'y tüg xi mejtz xi miid je' ajcxy.

Pedro yajmiidmiydacy jim Jerusalén nej anajty ti ytuñyii ti yjadyii

11 Je apóstoles ajcxy etz je mibijcpidijc ajcxy huidi anajty ajcxy jim Judea, midoy ajcxy ayuc co nijëjity jäy huidi ca' yjudíojäyity ti anajty ajcxy cöbjiycy Dios y'ayuc. ² E co Pedro yhuimbijty Jerusalén, chi nijëjity judíojäy ajcxy ooy Pedro, je' ajcxy huidibi tzachmijpidaaccixp judíojäy ycostumbre jadu'n nej ajcxy tiy'ajttiiygixy ymang. ³ Je' ajcxy nimay Pedro:

—¿Na'amy co oy ti mgo'ixiiy jäy ajcxy huidi ca' yjudíojäyity, etz ti mgay m'ügy miid je' ajcxy?

⁴ Chi Pedro nimiydactay tüg'óciy jadu'n nej anajty ti yjaty, chi ymínañ:

⁵ —Jim ñich anajty Jope nDios'ojadatyich. Chi nhuin'ijxyich jadu'n nej tüg mij poob huit chooñ tza-jpjoy, cidägy ma ñich nhuinduu, xóchity anajty ma mi-daax ytaatz. ⁶ Co nmimijhuägyich n'ixa'ñich ti jilby, chi n'ijxyich may iyujc, jilby iyujc mídaaxpi yci' ytecy, jilby ahua'nbi iyujc, jilby tza'ñ, etz joon. ⁷ Chi nmidooyich tüg ayuc huidibi xyñimaaybich: “Pedro, pidig, yaj'ög yi iyujc etz tzüdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adúcyty judíojäy ajcxy tzüdzipy.” ⁹ Chi mimetz'ocpi tüg ayuc tza-jpcxy xyñimäyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰ Tugiiig'oc jadu'n yjajti, chi je poob huit ypättigiiyñi tza-jpjoy. ¹¹ Huin'it xyñimiiñich je quexyöybi nidugiiig, chooñ ajcxy jim Cesarea. ¹² Chi je Espiritu xyñimaayich, co min n'ocnicxich miid je' ajcxy, ca' ma ni ti nhuinmayipyich. Miid nicxyich nidugiiig nmigügtijcich. Chi ñich ajcxy ndigiiy ma je jäy ytijc. ¹³ Je codijc xyajmiidmiydaacich co je' anajty ti huin'ixy tüg ángel ma ytijc, ñimäyii: “Quex mdumbi ajcxy jim Jope huen nicxy yajtzoongixy Simón huidibi jäy ytijpy Pedro, ¹⁴ e je' xyajnimähuiy nej jébi Dios m'al-ma xyajnidzoocip, miich etz tüg'óciy mjiin mdijc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espiritu Santo ñidigiiyi ycödigiiyi je' ajcxy. Tim jadu'n nej xyñidigiiyim xycödigiiyim je jayijp'atypí.

¹⁶ Huin'it njäymejtzcöodyich nej je Huindzin Jesús ymínañ: “Janch Juan, je Bautista, jäy yajniñbejt miid niñ, e Dios jäy ajcxy y'adigiihuñyb yjottigiihuñyb je Espiritu Santo.” ¹⁷ Pen Dios ti ymóyii je jäy ajcxy huidibi ca' yjudíojäyity tú'ciy miid huidibi ñich ajt ti xymooyim co nmibijcím Jesucristo. ¿Ocjactim pin ñich co Dios nmidzip'adiiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy ymínaangixy: “Dios jadu'n ti ymínañ co je' ajcxy huidibi ca' yjudíojäyity jébi yjothuimbijtcixy, jigix Dios ymöhuiyb jugy'ájtín huinixiñi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim

Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰ E nijëjity mibijcpidijc huidibi jim anajty ajcxy yconaaxip ycogápip Chipre etz Cirene, chi ajcxy ñicxy jim Antioquía. Chi yajmídmíydacy ajcxy je Huindzin Jesús y'ayuc míid griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibichuinma'ñ etz mijpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín tí tuñ, chi oy yjotcugíy je Bernabé. Chi capxhuijy tüg'ócíy co huen ajcxy janch cixyjot huinjot cuyduni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy mídity je Espíritu Santo jotjoty huinma'ñyoty. Ymíid je' ycapxhuíjin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarsó, e co paty, chi mídmííñ Antioquía. ²⁶ Jadu'n yjajty jim ajcxy y'íjty tüg jimíjt, yaj'ixpijccixy je mayjäy huidibi ajcxy jijptigíyíy je Jesús y'ixpíjcin. Jim Antioquía oga'n yxímoy cristiano, je jäy ajcxy huidibi mijpidacp Jesús.

²⁷ Huin'it tiempo nijëjity tiy'ajtnajtzcapxíybi chooñ Jerusalén ñicxy ajcxy jim Antioquía. ²⁸ Tüg huidi anajty yxí Agabo ytinay'ahuíy mayjäyoty, e chi je Espíritu Santo yajcapxi, e ymínañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtín ma ymígügtijc ajcxy huidi tzinaayb jim Judea, jadu'n nej pubéjtín pin tím yega'ñ. ³⁰ E jadu'n ajcxy tuuñ. E je meeñ tíbi anajty ymucy yajmiguejxy ajcxy je Bernabé etz Saulo ma je mibijcpidijc tungmídpí jim Judea.

Co Jacobo y'o'cy etz co Pedro yajpujxtijctigíyí

12 Huin'it tiempo je rey Herodes yajmajtzi nijëjity Jesús yjäy, e chi yajtzaachytuuni. ² Chi ni'ane'mdíy huen yaj'ögyii míid espada je Jacobo, je Juan y'uch. ³ Co je rey nejhuíy co je judíojäy ajcxy jadu'n ooy jäygidaccixy, chi ymajtzi Pedro nañ jadu'n. Hue' jadu'n yjajti xíjoty, je xí mína tzajcaagy caaygixy huidi ca'pí ylevadura mídity. ⁴ Co Pedro yajmajch, chi yajpidacy pujxtigoty. E chi je rey ane'my co huen mídaaxpícy soldado ajcxy cuend'adyii, tügpijcyaty mídaax soldado ajcxy. Hue' anajty je rey tí huinmay xíinaxy anajty tiyduna'ñ Pedro mayjäy agujc. ⁵ Pedro jiiiby anajty pujxtigoty janch oy cuend'aty. E je mibijcpidijc janch Dios mibijctzodíib anajty ajcxy míid Pedro ycixpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yxímíy, ma je Herodes anajty tiyduna'ñ Pedro mayjäyoty com jabom, Pedro maab anajty, e soldado agujc ajcxy cíxoch tecyoch anajty míid cadena, e jadügpícy soldado ajcxy pujxtijc'aguy anajty ajcxy ycuend'aty. ⁷ Chi janch tímíiini yHuindzin Dios tüg y'ángel ñayguëxíci ytinäy ma Pe-

dro yhuinduu, e je pujxtijc yaj'aníyday. E chi je ángel tiyücxy Pedro ma ycaach, chi yajmáyhuijy, e nimay:

—Pidíg mic'amy.

Chi je cadena ycäday ma Pedro yci'. ⁸ Chi je ángel nimay Pedro:

—Ñayhuíni, yajtigi' mgíg.

Co Pedro yajtigiyday ycíg, chi je ángel ñímaayi:

—Yajtigi' mjocxhuit, e pajamgich.

⁹ Chi Pedro pujxtijc pidzimy axam ma je ángel, ni ca' nejhuíy pen janch anajty huidibi je ángel tumyb, hue' jihuíy jadu'n nej ycumäy. ¹⁰ Chi ñajxy ajcxy ma tügpijcy cuend'ajtpí, mic'amy ajcxy mimetzpi níinajxy. Co ajcxy yjäty ma mijpujxtijc aguu, ma míjtüba', chi je' cí'm'ahuaach. Chi ajcxy ypidzimy. Tí anajty mijyögyíxni co je ángel ixmajtzní Pedro. ¹¹ Huin'it Pedro yhuinma'ñyemjch, chi ymínañ:

—Jadachambí njihuíybi ch co janch jada' co je Huindzin Dios tí quexy y'ángel, e yí' tí xyñihua'ñich ma Herodes, etz jadu'n nej tüg'ócíy judíojäy ajcxy anajty xytuna'ñich.

¹² Co Pedro yjot yhuinma'ñ yemjch, chi ñicxy ma María ytiyc, je Juan ytaj, je Juan huidi jäy ytiipy Marcos, ma anajty ajcxy jim mayjäy tügmuycy y'íjtcixy Dios mibijctzoogixy. ¹³ Co Pedro tijc'aguu cojxnójcy, je tíba'y'amybí, chi tüg töxy'anäg ypidzimy huidi anajty yxí Rode, íxa'ñ píni je' tijc'aguu cojxnójcy. ¹⁴ Co oy yögmi-doy co Pedro je' anajty, chi ca' ytiyc'aguu yaj'ahuaach. Jëyi co poyígy ñicxy tigoty co anajty tzachjotcújcity, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocíyib jada' miich.

Chi je töxy'anäg y'adzooy co janch je' anajty. E je jäy ajcxy ymínaangixy co ca' yí' yjëjity, hue' jada' Pedro y'ángel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigíy yjihuíy.

¹⁷ Pedro cämíid ytiy'ajtyejcy co huen amoñ ajcxy. Chi yajmídmíydacy nej je Huindzin Dios anajty tí yajpidzimíyíy pujxtigoty. E nimay ajcxy co huen ñicxy yajmídmíydägy jada je Jacobo etz jacjadyii mibijcpidijc.

Chi Pedro ñicxy huingbi cajp.

¹⁸ Co yxímíy, huin'it soldadtijc ajcxy ooy ytigíy huambi jihuíybi huinmay'ahuidijty, com ca' ne-jhuíygyíy nej je' anajty tí ytunyíi tí yjadyíi míid Pedro ycixpi. ¹⁹ Chi Herodes ni'ane'mdíy huen ñicxy yaj'ixtáy Pedro. E co ca' yajpaty, chi píjctzoy tíy'ajt ma soldado ajcxy huidi anajty Pedro tí ycuend'adyii. Chi ni'ane'mdíy huen ajcxy ñicxy yaj'ögyíi. Chi Herodes chooñ jim Judea, chi oy chínaydacpícy jim Cesarea.

Herodes y'ögy

²⁰ Herodes janch ymíjotmätpy anajty je jäy huidibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägíhuaangixy je rey. E ymímadac ajcxy co migapxy je Blasto je míjtungmídpí maabi rey Herodes ytiyc. E chi ajcxy píjctzoy co huen tzip cíxy naxy, com co ajcxy xíj mooc jim anajty yajtzoongixy ma rey ñaaxjot. ²¹ Chi Herodes agapxtujcy

tüg xii, chi je reyhuít yajtigiiy, chi ñaydac paty ma ycö-tujctac, chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy yminaangixy:

—Jada jäy huídibi capxp, ca' jada yjäyity, jadu'n yi' nej tüg dios!

²³ E huin'itiy Huindzin Dios y'áangel yajpa'mbejty Herodes, com ca' anajty huindzigiy cömay je Dios. Chi y'o'cy, ting je' tzütztaayi.

²⁴ Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñytimma'ámyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymiðnicxy huídibi anajty yxii Marcos.

Bernabé etz Saulo yajtzondaaccixy ytung huídibi ajcxy pátip

13 Ma je' ajcxy huídi mijpidacp Jesús jim Antioquía, jim anajty jadyii huídi Dios y'ayuc yaj'ixpijcp anajty, etz nañ huídibi tiy'ajt najtzcapxiyb. Jim anajty Bernabé etz Simón, huídi anajty ajcxy ytiipy el Negro, etz Lucio huídi tzoon Cirene ñaaxjot, etz Manaén huídi tüg yeectac mið Herodes, huídibi ane'm jim Galilea, etz Saulo. ² Tüg xii ajcxy ñayyömyújcigixy jaygay jay'ügy Dios ojadajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tiiñ nyajnihuohuyich.

³ Chi ajcxy yjacDios'ojadajty etz yjac'ayuu'ajty, e chi je jäy ajcxy cñixajy Bernabé etz Saulo, e chi ycapxycixy mið je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huídi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtp. ⁶ Huídiittay ajcxy ma je naax mejy'agujcpi, e yja'ty ajcxy ma je cajp huídi yxii Pafos. Jim ajcxy paty tüg judíojäy huídi anajty yxii Barjesús, hue' je' anajty huijyjäy, e ñaydiyii anajty co Dios ytiy'ajt najtzcapxiyi, e ca' anajty yjanchity. ⁷ Je huijyjäy ooy mið ñaymigüg'adyii anajty je huídibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty miðoohuaani je Dios y'ayuc. ⁸ Je huijyjäy, huídi nañ jadu'n yajtijp Elimas, midziptzoñ Pablo etz Bernabé, e tücciy capxadugañ ca'ydi je gobernador ymibicy. ⁹ Chi Saulo, huídibi nañ jadu'n yajtijpy Pablo, mið je Espíritu Santo huindicxpejty je huijy jäy, e nimay:

—iOoy mjibicjäyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ mið! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús

xychachytunaamb, e mhuí'mip huiintz, etz ni ca' je xiiñbi tzojc m'ixipy.

Chi je huijyjäy mic'amy yhuí'my huiintz coodz, chi ix-tay pin oc-huijtznicxiib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuñy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátciy jim Antioquía etz Pisidia

¹³ Chi Pablo etz ymigügtijc ajcxy mið ybarcotigiiy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén.

¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigiiy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcaxiibi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmið ayuc tiy'ajt mið jäy ycixpi jëbi cham myajnimäy ajcxy.

¹⁶ Chi Pablo ytinaygy, yci' mið ytiy'ajt yecy co huen amoongixy, e nimay ajcxy:

—Miðoogix, miich Israel jäy ajcxy, etz huídibi Dios yajmij'ajtp. ¹⁷ Je Israel jäy Dios huin'ijxy ñich'ajt nmij'ap nmijteedy jecy'ajty etz yajyujcpejt ajcxy miçho'n co anajty ajcxy jim yjactzinäy Egipto ñaaxjot. Chi ajcxy yajpidzimiñ mið Dios ymic'ajt. ¹⁸ Dios je' ajcxy miðhuindinay huixchiguijpx jimijt jim mijtigüduum. ¹⁹ Je Dios huixtuc it naax cajp yajtigoy huídi anajty jim tzinaayb Canaán ñaaxjot, etz yajmoy je naax ñich'ajt nmij'ap nmijteedy jecy'ajty jigix ajcxy jim chinähuipy. ²⁰ Miðaa migo'px jahuixchigipx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxiib ytungbijcy. ²¹ Huin'it ajcxy tüg rey pijctzoy huídi ane'miib ajcxy. Chi Dios yajreytigiiy Saul huídi tuun huixchigipx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigiiy David, chi Dios yminañ: "Ti nbaadyich David, Isaí ymang, tüg yëdyijc huídibi cuydundähuipy nej ndimdzocych."

²³ Ma David y'ap y'oc Dios yajnibijcy Jesús, jigix ni-huñipy yajniðzögipy je Israel jäy ajcxy, jadu'n nej anajty jécyp Dios yaj'ahuaniiy ajcxy. ²⁴ Ca'ni anajty Jesús miiñ co Juan, je Bautista, capxhuäcxxy Dios y'ayuc ma je Israel jäy ajcxy, nimaaygixy co copicy huen jothuimbitcixy ma Dios, e huin'it jëbi ñiñbéjtcixipy. ²⁵ Co anajty Juan y'o'cin huigon, chi yminañ: "Ca' ñich njëjity je Cristo, jadu'n nej mmiñangixy. Jayijp ti nmiiñich, jac'axam miina'ñ je Cristo; jacmic'ajt mið je' ca'ydi ñich. Ca' xypaadyich nicxy yi' ycighuin nguejich."

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajniuguexy jada ayuc nej ajcxy jëbi m'alma niðzoocin paady. ²⁷ Je jäy ajcxy huídi anajty ajcxy tzinaayb jim Jerusalén etz tungmiðpi ajcxy, ca' ajcxy nejhuñy pin je' anajty je Jesús, ni ca' anajty huin-jihuñyigixy y'ayucnajtzcaxiibi ajcxy y'ayuc huídibi anajty yajcapxp ma ajcxy ñaymujctac huindüg sábado.

E je' ajcxy cǐ'm yajpocycäy Jesús, e cuyduñ nej anajty ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuñi ma Pilato co huen ñicxy yaj'ögyii. ²⁹ Co je jäy ajcxy cuydunday jadu'n nej anajty yjaybetyity ma Dios y'ayuc miid je' ycixpi, chi ajcxy yajminajcy cruudzcixy, etz oy yajnaaxtigiiygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymigügtijc huidi anajty ti ymiidhuididyii co chooñ Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc ñich miich ajcxy nyajmiidmiydacpy cham, huidi Dios yajnimay ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich ajt co yajjugypijcy Jesús co y'o'cy. Jadu'n yi Dios y'ayuccojaaybi jaay jecy'ajty ma je Salmo necy mimetzpi ma Dios jadu'n yminañ: "N'ungich cham ti nyajjuugypicy cyich." ³⁴ Miid jadaayaabi ycixpi co Dios ti yajjugypicy Jesús co y'o'cy, jigix ñiniñx ca yhuindigoopy jadu'n anajty jaybetyity ma Dios ñecy ma Dios jadu'n yminañ: "Nmöhuaamyich miich ajcxy je conúcxin huidibi nyajni-maayich je David." ³⁵ Paady nañ jadu'n Dios y'ayuccojaaybi jaay jadüg'it, ma yminañ: "Ca' Dios a'ixixy ñicxy y'ung ñiniñx yhuindigooy, je y'ung huidibi miid huadz jot huinma'ñ." ³⁶ Com janch co je David Dios huin'ijxy, jigix ane'mipy yi' yjuogy ymigüg ajcxy. E co ytung yajmay, chi y'o'cy, e je' y'alma ñaybaatti miid je y'ap yteedy y'alma, e je' ñiniñx huindigooy je'. ³⁷ Je Jesús huidibi Dios yajjugypijc ca' je' ñiniñx yhuindigooy.

³⁸ Migügtijc, jëbi mnejhuüyigixy, co je pocyhuinmeecxin yaj'ihuäcxy yajcapxhuäcxy miid Jesús ycixpi. ³⁹ Miid je' ycixpi pinjaty mibijcp ti pocyyajhuinmeecxixy huidibi Moisés yley anajty ca'p pocyhuinmeecxin yecy.

⁴⁰ Nayguend'ajtigix, ix xyajcidacejtcix je mij ayo'n jadu'n nej Dios y'ayuccojaaybi jaay jecy'ajty co Dios jadu'n yminañ:

⁴¹ Midoogix ñich n'ayuc, miich ajcxy ñixiicpi yajxiicpi, nay'adzigiiygixy, ix m'alma myajtigoogygixy. Com ñich Dios ndumywich tüg mijhuinma'ñ ma miich ajcxy mxii mdiempo. May miich ajcxy ca' mmibigipy, oy pin xy-jayajmiidmiydäaccixipy.

⁴² Co Pablo ajcxy ypidziy ma yi judíoäy ñaymujctac, chi je jäy huidibi ca' yjudíoäyity nimay je Pablo co huen nañ jadu'n yajmiidmiydägiiyb ma je jadügpi sábado. ⁴³ Co ajcxy yöyhuäcxni ma nayyöymujctac may judíoäy etz mayjäy huidi ca' yjudíoäyity huidibi jip-tigiyiiy je judíoäy y'ixpiñcin, panicxy ajcxy je Pablo etz Bernabé. Pablo etz Bernabé capxhuijy ajcxy co huen panicxcixy je tiy'ajt jadu'n nej Dios tiibi tuñ may'ajt miid jäy ycixpi, e ca' ajcxy ixmadziy.

⁴⁴ Co sábado yxii paty, chi jäy ñayyöymujci jahuenjaty cajp jäy ycanicxtay co anajty tzachmidoohuaangixy Dios y'ayuc. ⁴⁵ Ca' anajty ajcxy yjotcúcity co je judíoäy ajcxy ijxy je mayjäy. Chi ajcxy ooy yjot'ambijccoty ni'oñiygixy etz nimaaygixy oy ni nej Pablo. ⁴⁶ Chi Pablo etz Bernabé ytigiiy miccapxpi yminañ ajcxy:

—Copicy anajty co ñich miich nyajnimahuipy Dios y'ayuc jayijp. Com ca' mgöbigaangixy Dios y'ayuc, e co

ca' mnyabidäacigixy tudägy ma jugy'ajtin miid huinixiibi, ñicxyich n'ocyajnimäy ajcxy Dios y'ayuc huidibi ca' yjudíoäyity. ⁴⁷ Com jadu'n xy'ane'myich ajcxy yi Huindzin Jesús, e xyñi-maayich ajcxy:

Ti ñich miich nbidägy jadu'n nej tüg tiicxin jajin ma tüg'öciy naaxhuñiibi jäy jigix myajnejhuñhuipy ajcxy je nüdzoocin jiguembaad huindu'my naaxhuñi.

⁴⁸ Co ajcxy jadu'n midoy huidibi ca' yjudíoäyity, chi ajcxy ooy niñi yjotcugiiy, e chi ajcxy yminandacy co je Huindzin Jesús y'ayuc ooy anajty y'öyity. E may ajcxy mibijcy huidibi anajty Dios ti yajniögöndungixy co paatip jugy'ajtin huinixiibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíoäy ajcxy minaygapxi nijëjity töxyjäydijc ajcxy tudägypii huidibi Dios yajmij'ajtp, etz je mijjäydijc, e je' ajcxy miid mibidigyy Pablo etz Bernabé co pahuojpquëgaangixy ma jejimbi naaxjot. ⁵¹ Chi Pablo etz Bernabé ycig huinhuojpy, je' je' tiy'ajtip co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcúcity. E ymiid anajty ajcxy je Espiritu Santo ma yjot yhuinma'ñ.

Pablo miid Bernabé jim Iconio

14 Jim Iconio Pablo etz Bernabé ytigiiy ajcxy yquixpyi ma je judíoäy ñaymujctac, e oy yajxon ajcxy capxhuäcxy Jesús y'ayuc. E may judío etz griego-jäy ajcxy ymibijcy. ² Je judíoäy ajcxy huidibi anajty ca' ymibijccixy nigapxcoty ni'oñiygoty ajcxy huidibi ca' yjudíoäyity huen je cajp jäy ajcxy mijotmädiipy je mibijcpidijc. ³ Miid jada ycixpi Pablo etz Bernabé yhuñmy je' ajcxy jecy etz capxhuäcxcixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'ñ tungixy huidibi ijxpejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijëjity ymijpidacpy ajcxy yi judíoäy, etz nijëjity ymijpidacpy ajcxy je Dios y'ayuccapxhuäcxpi. ⁵ Chi nijëjity judíoäy etz huidibi ca' yjudíoäyity ñaygapxi miid tungmiidpi co mijotmätcodaangixy etz tim tza-agögädaangixy Pablo etz Bernabé. ⁶ Co Pablo etz Bernabé nejhuñy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huidi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nüdzoocin paatcixy majaty cajp huinonbi.

Tzaagätcixy Pablo jim Listra

⁸ Jim Listra anajty tüg yöydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo ijxpy anajty co ymiid mibijcin nej jëbi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugiiy, e chi ytigiiy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytigiiy huambi jihuiybi miid Licaonia ayuc chachminaangixy:

—¡Dios ajcxy jadu'n nej jäy ti ycidaaccixy ma ñich ajt!
¹² Ymínaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter cha-jptijc cajppäbi, mimiññ toro ajcxy etz pijy. E je teedy mñid je jäy ajcxy yhuindzigñhuaangixy etz ojadadaangixy anajty Pablo etz Bernabé, yaj'õgaangixy je toro ajcxy. ¹⁴ Co Pablo etz Bernabé ne-jhuiy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuít agñidziy, e ytiñiy ajcxy mayjäy'aguyc yam chachmínaangixy:
¹⁵ —¡Yëdyictijc ajcxy! ¿Nej co jada jadu'n m'idiñtzicxy? Nañ jadu'n ñich ajcxy jäyity, jadu'n nej miich ajcxy. Paady ñich ajcxy ti nmingixy ma miich ajcxy mgajp jñgix ajcxy m'ixmadzipy jada jadu'mbi huinma'ññ huidibi ca' choobaady ma Dios. E mijpidaaccixp je Dios juugypñi huidi oyduñ tzajp etz naaxhuiñybi, je mejy etz tñg'óciy tijaty ya n'íjxim. ¹⁶ Jecy'ajty Dios ixmajch je jäy ajcxy huen tñngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi mñid miich ajcxy ycixpi. Dios yi' yajtuub etz yecy oybi cosecha e xy-mooyim mijcajee huidi ngaayim n'uucim e xya-jjotcugñiyim.

¹⁸ Oy anajty Pablo jadu'n jadim tzachnimaaygixy, ca'p ajcxy mimadacy co yi jäy ajcxy ca'p yaj'ó'ccixipy je toro co anajty yhuindzigñhuaangixy.

¹⁹ Huin'it xññ nijëjity judíoñy yja'ty, chooñ jim Antioquía etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzooñ Pablo etz cögäch ajcxy. Hue' ajcxy tijy ti anajty yaj'óccixy. Chi ajcxy oy ixjugucy cajppa'.
²⁰ Chi je apóstoles ajcxy jübigniy je Pablo, chi je' ypidñgy, e ñicxy jadüg'oc cajpjoty. Com jabom Pablo etz Bernabé chooñ, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. ²² Jim ajcxy jotmicmigapxy je mñibijcpidijc ajcxy, e capxhuiy huen tñgñijp mñibijccixy Dios y'ayuc, nimaaygixy:

—Co ndigñhuaanim ma Dios y'ane'my copicy co nyanjñxim may ayo'n. ²³ Cajp cajp majaty mñibijcpidijc yajpaady jim Pablo etz Bernabé yajnimbijcy nijëjity yëdyictijc huen nigohuajc'ajtcixy je jäy ajcxy huídibi mijpidacp Jesús. Co anajty ti yajnimbijcy je' ajcxy huídibi nigohuajc'adipy, chi jaygay ajcxy y'ijty etz Dios mñibijctzoy mñid je' ajcxy ycixpi.

Pablo mñid Bernabé yhuimbijtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panfilia. ²⁵ Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. ²⁶ Chi ajcxy jim ybarcotigñiy ñicxcixy jadügtecy jim Antioquía ma anajty ajcxy ti yajnimbijcy Dios chójcin mñid je tung huídibi anajty ti yajcñjccixy. ²⁷ Co ajcxy yja'ty jim Antioquía, chi ajcxy huoomujcy je jäy ajcxy huídibi anajty mijpidaacp Jesús, e yajmñidmiydactay tñg'óciy nej anaj-

ty Dios ti ytuñ mñid je' ajcxy ycixpi, nej anajty Dios ti yaj'ahuäch je tü'aa nej huaad mñibicy ajcxy je huídibi ca' yjudíoñyity. ²⁸ Pablo etz Bernabé ijt ajcxy ooy jim jecy mñid je mñibijcpidijc ajcxy.

Mñibijcpidijc ñayyöymujci ajcxy jim Jerusalén

15 Je huin'it tiempo nijëjity jäy huídi tzoon Judea yja'ty ajcxy jim Antioquía, e ytiñiy yaj'ixpijcp ma ajcxy je huídibi mijpidaacp Jesús, ymínaangixy: "Pen myajnidzögamy ajcxy yi m'alma, copicy co ajcxy myajtiy'ajttñhuiy jadu'n nej Moisés y'ane'my." ² Chi Pablo etz Bernabé ñaymidziptzongooti ajcxy mñid huídi anajty ajcxy tzomb jim Judea, e ca' ajcxy ñay'ayuc-huin-jhuiy. Chi jada' yajnimbejti Pablo etz Bernabé etz jacjadyi mñibijcpidijc huen ñicxy ajcxy Jerusalén yajtiyidigñy ma je apóstoles ajcxy etz huídibi ajcxy nigohuajc'ajt je mñibijcpidijc jim Jerusalén.

³ Je mñibijcpidijc huídibi anajty ajcxy jim Antioquía oy ajcxy tñijjphuohuñ Pablo etz je' ajcxy huídi ñicx mñid Pablo. Chi Pablo etz mñid yjaymñdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmñidmiydaaccixy je mñibijcpidijc cajp cajp jadu'n nej jäy ajcxy huídibi ca' yjudíoñyity ti yjothuimbijtcixy etz yajmñ'adaangixy Dios. E tñg'óciy mñibijcpidijc ooy ajcxy jäygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mñibijcpidijc ajcxy cöbijci je apóstoles ajcxy, etz je' ajcxy huídi nigohuajc'ajtp anajty je mñibijcpidijc. Chi Pablo yajmñidmiydactay nej anajty Dios ti ytuñ mñid je' ajcxy. ⁵ Chi nijëjity fariseojäy, tñibi anajty mñibijccixy Jesús, ytinayñgy ajcxy juntijoty, e ymínañ ajcxy:

—Copicy co huen yajtiy'ajttñy je jäy huídibi mñibijcp Jesús huídi ca' yjudíoñyity, e copicy nyaj'ané'mim co huen ajcxy Moisés ycotújcin cuyduuni.

⁶ Chi ñayyöymujci je apóstoles ajcxy etz huídi ajcxy nigohuajc'ajtp je mñibijcpidijc, co capxyöyaangixy je fariseojäy y'ayuc nej yhuñ'mip. ⁷ Ca' ajcxy tzojc ñay'ayuc-huinjhuñiy, chi Pedro ytinayñgy ymínañ:

—Migügtijc, mnejhuiyb ajcxy co jayhuin Dios ti xy-huin'ixyich ma miich ajcxy, jñgix nyajnimähuiñbich jäy ajcxy huídibi ca' yjudíoñyity je Jesús ytiy'ajt oybi nej ajcxy y'alma ñidzoocin paadipy. ⁸ E Dios huídi nejhuñyib jäy yjot yhuinma'ññ xyaj'ixyich je tiy'ajt co yecy Espiritu Santo ma yi' ajcxy nañ tim jadu'n nej ytuñ ma ñich ajt. ⁹ Dios tú'ciy ytuñ mñid ñich ajt etz mñid yi' ajcxy, mñid co yi' ajcxy mñibicy Jesús paady Dios yajhuaatzñi ajcxy yjot yhuinma'ññ. ¹⁰ Jadachambi, ¿nej co ca' mhuin-jhuñhuaangixy mñibigaangixy nej Dios ytuñ mñid huídibi ca' yjudíoñyity? ¿Nej co adzip myajniñhidzaangixy je costumbre huídi ni ñich ajt ni n'ap ndeedy ca' ti mimadägy ñicxy cuydundaaygixy?

¹¹ Janch ñich ajt mñibijcim co mñid je may'ajt huídi Jesús ti tuñ mñid ñich ajt ycixpi ti nbaatim n'alma ñidzoocin. Nañ tim jadu'n je' ajcxy huídi mñibijc Jesús huídi ca' yjudíoñyity ypaat y'alma ñidzoocin mñid je may'ajt huídi Jesús ti tuñ.

¹² Huin'it je jäy ajcxy y'amonday, y'amido'ijtcixy nej Bernabé etz Pablo nimiydaaccixy nej anajty Dios ti tuñ

míid yi' ajcxy, jadu'n nej ajcxy ti yajtzögy pa'mjäy míid Dios ymic'ajt, etz jac tijaty mǐjhuinma'n huidi ti tuñ ma yi jäy ajcxy huidei ca' yjudíojäyity. ¹³ Co Pablo etz Bernabé ajcxy miydactay, chi Jacobo yminañ:

—Migügtijc mido'mbǐcigich ajcxy ñich n'ayuc.

¹⁴ Simón Pedro ti xyajmíidmiydaacim nej Dios may'ajt ti tuñ oga'n ma huidei ca' yjudíojäyity, co huin'ijxy huidei yi' yjäy'adaanip ma yi' ajcxy. ¹⁵ Quipxy jada ñaybadyii míid huidei je Dios y'ayucnajtzcaxiñybi jecy'ajty ycojay, ¹⁶ co jadu'n yminañ:

Co anajty jadu'n ti y'ocjadyii, chi nhuimbidipyich ya naaxhuñ. Nyaj'oyñhuibich jadüg'oc je naax cajp huidei David anajty y'ane'myb huidei anajty ti y'octigooybi jadu'n nej tüg tijc huidei ti yciday. Ma David y'ap y'oc nyaj'a'oyñhuibich jadüg naax cajp, jadu'n nej jäy ytiñ cojy huinjemybi.

¹⁷ Jigix jacjadyii jäy y'ojadapipy ajcxy yi' Dios. Nañ jadu'n je' ajcxy huidei ca' yjudíojäyity, huidei ñich njäy'adaanip.

¹⁸ Jadu'n je Huindzin Dios jécyip jada tiy'ajt jadu'n yejcy.

¹⁹ Chi Jacobo yjacminañ:

—Paady ñich jadu'n nmina'ñich co ca' huaad n'amayñiyim ajcxy huidei ca' yjudíojäyity huidei ajcxy ti mijpidägy Dios. ²⁰ Hue' janchtiy tzoc nijayñiyim co ajcxy ca' tzüdzipy huidei jäy yajhuindzigñiyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huideijaty jäy yöc-huidypí, etz ni ca' huaad jñcxcixy tijaty iyujc ni'py. ²¹ Jecy'ajty ixti chamni tüg tüg cajp, ji pin ñhua'cxp capxhua'cxp Moisés yley majaty nayyömujectac naag naag pocxinñi.

²² Chi je apóstoles ajcxy etz je huidei nigohuajc'ajt yi mibijcpidijc, míid tüg'óciy Jesús yjäy pidacy ajcxy yhuinma'n co huin'ixaangixy nijējity jäy ma je' ajcxy etz quexaangixy jim Antioquía quipxyi míid Pablo etz Bernabé. Chi ajcxy yajnibejty Judas, huidei nañ jadu'n yajtijty Barsabás, etz míid Silas, yēdyijctijc huidei ajcxy capxpaadip. ²³ E je' ajcxy yajmiguejxy necy nej anajty ti jaay: "ñich ajcxy apóstoldijc, etz huidei nigohuajc'ajt yi mibijcpidijc, etz nidüg'óciy mibijcpidijc, cham ñich ajcxy nguexy capxpocxin ma ajcxy mibijcpidijc huidei ca' yjudíojäyity huidei ajcxy tzinaayb jim Antioquía, etz huidei ajcxy tzinaayb Siria etz Cilicia ñaaxjot. ²⁴ Ti ñich ajcxy nejhuñyich co nijējity jäy ti xyñinixcixy, choñ ma ñich ajcxy, ca' ñich ajcxy ngötujcín mooy, e xy'amayñygyx jim míid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttñhuip ajcxy m'ung, etz mbayöyipy ajcxy je Moisés ycötujcín.

²⁵ Paady ñich ajcxy ti nnyagápxigixy nidüg'óciy co nyajñibedipyich nijējity jäy huidei yajpaatp ma ñich ajcxy co huen nicxy xy'ijxcixy niguipxyi míid nmigügtijcich huidei ooy ndzocyich, je Bernabé etz je Pablo. ²⁶ Je huidei ajcxy yjygy'ajt ti yoxy ti toogy míid ajt nHuindzin Jesucristo ycipi. ²⁷ E jadu'n yam nguexyich ajcxy Judas etz Silas, e yi' ajcxy c'm xyajmíidmiydägipy tüg'óciy ñich ajcxy n'ayuc. ²⁸ Ti je Espíritu Santo huinma'ñ pidägy ma ñich ajcxy nhuinma'ñ etz ñich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypí, jēy

janchtiy je huidei copicyip. ²⁹ Copicy co ca' ajcxy mdzüdzipy huidei jäy yajhuindzigñiyb ídolos, ca' ajcxy ni'py mǐjñcxcixy, ni ca' ajcxy mdzüdzipy iyujc huidei yöc-huility ti y'ögy, e ca' ajcxy mmigapxtigooygixy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xy-pudigñhuipy."

³⁰ Jadu'n je' ajcxy huidei ti yajquexy nicxy ajcxy jim Antioquía. Jim ajcxy huomujcy je mibijcpidijc, e yajcǐdigñiy ajcxy je necy. ³¹ Co je mibijcpidijc je necy capxy, chi ajcxy ooy yjotcugñiy míid je oybi ayuc tñibi anajty ajcxy yajniguexy. ³² Com Judas etz Silas hue' je' anajty Dios y'ayucnajtzcaxiñybi, paady ajcxy yajjotcugñiy jot'amij moy je mibijcpidijc míid je ayuc. ³³ Jecy ajcxy jim yhuäcxijpy, chi je mibijcpidijc míid ajcxy ycapxycixy, yajmihuanñiy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhuñ'ma'ñ. ³⁵ Nañ jadu'n Pablo etz Bernabé ijt ajcxy jim Antioquía, etz míid jac nijējity ymígügtijc yaj'ixpǐc'idiitczixy etz capxhuäcx'idiitczixy je Huindzin Jesús y'ayuc ytiy'ajt.

Pablo mimetz viaje

³⁶ Ti xñ tiempo anajty ñajtzñinixñiyñi co Pablo nñmay Bernabé:

—Jam'ajt nmigügtijc co'ixñiyim cajp cajp majaty ti ngapxhuäcxim Huindzin Jesús y'ayuc. Ooy njane-jhuñhua'ñich nej ajcxy yajpaady. ³⁷ Bernabé ymíid nicxaamy anajty je Juan huidei yajtijty Marcos. ³⁸ E je Pablo ca' a'ixy co míid nicxip Juan, com ti anajty y'ocpuyöydúutibi jim Panfilia, e ca' anajty ti yjacmíidyajtüyöyii je tung. ³⁹ E ca' ajcxy ñay'ayuc-huinjhuñyí miñ xyípy. Chi Bernabé míidnicxy Marcos e ybarcotigñiy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huidei anajty míid ñicxa'ñ. Chi je mibijcpidijc míid ycapxycixy, chi chooni ti anajty je mibijcpidijc yajmihuanñiy Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

Timoteo mijhuäcpejty je Pablo etz Silas

16 Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidei anajty yxñ Timoteo huidei anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcipy anajty Jesús. ² Je jäy ajcxy huidei yajmij'ajtp Jesús jim Listra etz jim Iconio ooy anajty oy nimiydaacixy Timoteo. ³ Pablo ooy jatzojcy co Timoteo ycajäymíid'ajti. Chi Pablo yajtiy'ajttñiyi Timoteo, jigix ca' ymijotmädñiyb je judíojäy huidei anajty ajcxy jim tzinaayb, com tüg'óciy ajcxy nejhuñy co griegojäy teedy'adyii. ⁴ Cajp cajp ma anajty ajcxy ñaxy yajmíidmiydaaccixy ajcxy je mibijcpidijc je cötujcín huidei je apóstoles ajcxy, etz huidei nigohuajc'ajt je mibijcpidijc jim Jerusalén. ⁵ Je' ajcxy huidei yajmij'ajtp Jesús cajp cajp nigí anajty yjotmicpíjccixy, etz mijpidaaccixy Dios y'ayuc, etz ñimayiy'idiitczixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy jajyöyñajxy ajcxy Frigia ñaaxjot etz Galacia ñaaxjot.

⁷ Chi ajcxy jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejuñy ajcxy co ca' yí' tzocy co jim ñicxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas.

⁹ Chi Pablo cumäyjoty huin'ijxy tüg yëydijc, huídibi yconaaxity anajty Macedonia, ytinay'ahuñy ma Pablo yhuinduu, e ycohuanñy, ñimäy: "Tun may'ajt nicx jim Macedonia, e jim xypubedipy ñich ajcxy." ¹⁰ Co Pablo jadu'n huin'ijxy cumäyjoty, chi ñich ajcxy n'ixtay barco huídibi nicxamb jim Macedonia. Nhuinjihuñy ñich ajcxy co jim Dios xyquéjcxixy jígix jim ngapxhuäcxibich Jesucristo ytiy'ajt je oybi nej jëbi ajcxy alma nidzoocin paadipy.

Pablo etz Silas jim Filipos

¹¹ Chi ñich ajcxy nbarcotigñy jim Troas nicxy ñich ajcxy tñiyi ma naax mejy'agujcpi huídibi anajty yxñ Samotracia. Chi com jabom ajcxy nja'tyich jim Neápolis. ¹² Co ñich ajcxy jim ndzooñ, chi ñich ajcxy nicxy jim Filipos. Filipos hue' je' romanojy ycajp. Je' je cajn jac mijpi ma je Macedonia ñaaxpa'. Jim ñich ajcxy nhuäcxijpy jecy.

¹³ Tüg sábado nicxy ñich ajcxy cajppa', mihungon tüg mijñi, ma anajty judíoñy ajcxy mñidy Dios ojadajttac. Chi ñich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydijc ajcxy huídibi jim anajty ajcxy ti yömujccixy. ¹⁴ Je Lidia anajty y'amido'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungñy yjot yhuinma'ñ, jígix amido'idipy nej Pablo Dios y'ayuc capxhuäcxí. ¹⁵ Je Lidia ñibejt mñid tüg'óciy yjuugy ymígüg, chi ñich ajcxy xycohuanñy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ñich ndijc.

Chi ooy xycohuanñy ñich ajcxy, ixti cooni jim xya-jhuñmyich ajcxy.

¹⁶ Jadu'n yajti tüg tecz co ñich ajcxy anajty ñicxy ma Dios ojadajttac, chi ñich ajcxy nbaty tüg tumbi töxy'anäg mañ'ajt mñidpi huídibi ooy ytiygapxy. Ymñid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy ymñañ:

—Jada yëydijc Dios tzajpjtopy ajcxy ymidumyb. Capxhuäcxí ajcxy Dios y'ayuc jadu'n nej jëbi ñich ajt n'alma nidzoocin paady.

¹⁸ Canaag xñ jadu'n ñich ajcxy xychach'amayñy. Co Pablo chijpin, chi yhuäc-huimbijty ñimay je mañ'ajt-mñidpi:

—Mñid Jesucristo yxñ n'ane'myich, pidzim ma jada töxy'anäg.

Tñim huin'ítty je ca'oybi jajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñy badaani, chi mñid je' ycxipi ajcxy majch Pablo etz Silas, e yajnicxy ajcxy ma je tungmñidpi ma je' ajcxy y'agujtjic. ²⁰ Co ajcxy jiiybi mñidja'ty ma je tungmñidpi, chi ymñañ:

—Jada yëydijc ajcxy judíoñy jada, nigoo ajcxy ñaax yajmäty ycajp yajmäty, ²¹ etz yaj'ixpicy ajcxy costumbre huídibi ca' huaad ñich ajt ngöbñicim, e nihuaad ngatunim, com hue' ñich ajt romanojy.

²² Chi je mayjäy ajcxy mñidziptzoon Pablo etz Silas, e je tungmñidpi ni'ane'mdiy co huen ajcxy yajñieñ yaj'ix-jeñ huen yajhuojpicy mñid matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jilby óc'am, e chi ajcxy ixmajch co'adzity ytecy ma je quipy huídibi yxñ cepo.

²⁵ Chi jadu'n yajty mijcuctz anajty, co Pablo etz Silas chach Dios ojadajtcixy chach huin'ñigixy yí Dios, e jac-jadyi machyñy chach amidoo'ijtcixy. ²⁶ Chi timitiñi uñ huinixity pujxtijc poch. Chi y'ahuaatztay je pujxtijc agí, e y'adzittuttay je cadena ma tüg'óciy machyñy. ²⁷ Chi oy ymähuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidzñmy y'espada ñayyaj'öga'ñy anajty. Com hue' anajty tijy ti je machyñy yqueectäy. ²⁸ Huin'it Pablo mic'amy migapxy je pujxtijc huindzin ñimay:

—Ix nej mñayduuni, cheeby ajcxy nidüg'óciy.

²⁹ Chi je pujxtijc huindzin pijctzoy jñin, e ytiñy poyñy pujxtigoty, janch tziyuyb mñid tzigí'ñ. Chi ycoxti-nay'ahuñy ma Pablo etz Silas ajcxy yhuinduu. ³⁰ Chi yajpidzñmy Pablo etz Silas, e yaj'amidooy:

—Huindzin, ¿ti ñich jëbi nduñ jígix nidzoocin nbáadibich?

³¹ Chi je' ajcxy mñañ:

—Mibic Huindzin Jesús etz mbaadipy nidzoocin, miich etz m'ungdöxyijc.

³² Chi ajcxy yajñimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytiñ.

³³ Mijcuctz je pujxtijc huindzin puji je Pablo ajcxy chaach'au, e chi je pujxtijc huindzin ñibejtay ajcxy mñid y'ung ytöxyijc. ³⁴ Chi je pujxtijc huindzin yajñicxy Pablo etz Silas ma ytiñ, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijcixy Dios.

³⁵ Com jabom je mijtungmñidpi quejxy mutztungmñidpi jim ma pujxtijc huindzin mñid cötujcin huen najtzmadzñygyx Pablo etz Silas. ³⁶ Chi je pujxtijc huindzin ñimay Pablo:

—Ti je tungmñidpi quexy cötujcin co jëbi nnajtzmadzñyich miich ajcxy. Nicxcix jotcujc.

³⁷ Chi Pablo migapxy je mutztungmñidpi, e chi ñimay:

—Romanojy ñich ajcxy. Yí cajptungmñidpi ti xyhuopyich mñid matz mayjäy agujc, ni ca' jayijp ti xtyiduñich, e ti xypidägyich pujxtigoty. ¿Nej co jadachambi xyñajtzmadzñhua'ñich ameechi? Ca' jadu'n y'öyity. Huen mijtungmñidpi ci'm mñiñ xyajpidzñmñixich ñich ajcxy.

³⁸ Chi je mutztungmüdpí cixj nimiydactäy ma mij-tungmüdpí tüg'óciy Pablo y'ayuc. Chi ajcxy ñay'adzigüiy co nejhüiy co Pablo etz Silas hue' je' anajty ajcxy romanojäy. ³⁹ Chi je mijtungmüdpí ñicxy c'ím oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum ñéxcixni. ⁴⁰ Co Pablo etz Silas ypujxtijcpidziimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñéxcixni.

Jim Tesalónica yjajti ooy capxy ayuc, ca' nay'ayuc-huin-jihuñhuñ

17 Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg ñaymujctac. ² Com jadu'n anajty costumbre müdity, Pablo ñicxp anajty ma judíojäy ajcxy ñaymujctac sábado xñ. E tugüig sábado xñ jim capxy miydacy müd je' jim Tesalónica. ³ Hue' anajty müd miydaaccixy jadu'n nej jaybecyity ma Dios ñecy co Cristo copicy ayo'n yajnaxtähuip, e chi y'ögipy, huin'it yjuygipipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵ Je judíojäy huidi anajty ca' ymibicy, yjotmätcoty ajcxy. Huomujc ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguuz tach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujc ajcxy jim ma cajp tungmüdpí. Yam chachmi-naangixy mic:

—Jada jäy ajcxy je' huidi tzachyajhuinma'ñydygooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy müddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumëgy yaj'oxëgy cajpjäy etz je tungmüdpí ajcxy. ⁹ Chi Jasón etz ymigügtijc yajmeeñeyecy, chi najtzmazäy ajcxy.

Pablo etz Silas jim Berea

¹⁰ Co oy ycodzëy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. ¹¹ Jim Berea judíojäy ajcxy yjacmüd oyjot oyhuinma'ñ, ca'ydi judíojäy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ymüid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹² May judíojäy ymibijc etz may griegojäy huidibi ooy ymijpidacni nañ jadu'n ymibijc, töxyjäydijc etz yëydijctijc. ¹³ Co yi judíojäy jim Tesalónica nejhüiy co Pablo nañ jadu'n Dios y'ayuc capxhuäcxí jim Berea, chi ajcxy

jim ñicxy, etz yajyumëgy yaj'oxëgy je cajp jäy ajcxy.

¹⁴ Mic'amy ajcxy, je mijpidaacpi Jesús, yquejx Pablo mic'amy, huen ñicxy jim ma mejypa'. Chi Timoteo etz Silas yjac-hu'ny ajcxy jim Berea. ¹⁵ Je huidibi ajcxy Pablo yajmüid'ajt ymüidnicxy, müd ñicxy ajcxy ixti cooní yja'ty jim Atenas. Huin'it ajcxy yhuimbijty müd tüg ayuc co huen Timoteo etz Silas ñicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhüiy co je cajp müd ooy may quipychech, tzaadzech, etz oorí oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judíojäy ñaymujctac müd je judíojäy etz jacjadyii jäy huidi Dios miyaaxp ojadajtp. E jabom jabom müd miydaaccixy pinjaty y'oymujcp cajp cujc. ¹⁸ Nijëjity ixpi-cytijc ñay'ixquixigixy y'ixpijcin müd Pablo. Jim huidibi ni'ixpigüyb epicúreo ixpijcin, etz cham huidi ni'ixpigüyb estoico ixpijcin. Chi ajcxy nijëjity yminaangixy:

—¿Ti jada jada' ajt xyajniimaayim jada yëydijc capxy-maaybi?

Chi jadyii yminaangixy:

—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huidijaty ti y'öccixyp. ¹⁹ Chi ajcxy müdnicxy Pablo ma je it ma je ixpicytijc ñaymugyii huidi anajty yxñ Areópago, chi ajcxy Pablo ñimay:

—¿Nej jëbi njäjtciyich jada jemybi ixpijcin huidi miich mmimimb? ²⁰ Com ti ñich miich xyajniimaaygich ayuc ca'pi yhuinjihuñyñity, e nejhüihuaamyich ajcxy nej yhuimbizimy tüg'óciy jada ayuc.

²¹ Tüg'óciy Atenas jäy etz nañ jadu'n huidi ajcxy jim adzinaayb, ca' anajty ni ti tungixy, jëyi nigooobi amido'ijtcixy etz miydaaccixy jemybi ayuc tiy'ajt.

²² Huin'it Pablo ytinaaygy mayjäy agujc jim Areópago, e yminañ:

—Atenas jäy, n'ixypich co miich ajcxy ooy myajmij'ajtcixy canaagnax huidibi miich ajcxy mdios'ajtpy.

²³ Com ti xñ ya n'ixyich canaagnax huidi ajcxy m'ojadajtpy, chi ti nbaatyich tüg altar ma jadu'n yjaayty: "Je Dios huidi ca' pin ix'yadyii." Je Dios huidi miich ajcxy m'ojadajtpy, e ca' ajcxy m'ix'yadyii, jada je' huidi nyajni-maayb ajcxy.

²⁴ Je Dios huidi oyduñ naaxhuiñybi etz tzajp etz jac tijaty, yi' je' nihuindzin'ajttayb tüg'óciy. Je Dios ca' chinäy ma tzajptijc huidi jäy ajcxy cojpy. ²⁵ Dios ca' ni ti yajti-goy'ity huidi naaxhuiñyjäy jamöhuaanip. Dios yi' yejcp jugy'ajtin etz huidibi nxejim, etz tüg'óciy tijaty.

²⁶ E tügpí ni'py tügpí jot ti yaj'oyëy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xñ tiempo yöyipy, e ma jäy jëbi huaad chinaaygixy, ²⁷ jigix ixtáaygixipy Dios, jadu'n nej jihüiy ix-taaygixy tondäy xajtäy, com ca' je' jiguemity ma ñich ajt nidüg nidüg. ²⁸ Dios ycixpi ñich ajt ndzinaayim nyücxim etz nji'ajtim, com jadu'n minañ miich ajcxy mboeta, huidibi ñy yajcojp: "Dios ñich ajt xy'ung'ajtim xy'anäg'ajtim." ²⁹ Pen Dios ñich ajt xy'ap'ajt xy'oc'ajtim

ca' huaad nhuinma'n nbidaacim co Dios yjadu'nñity nej oori oyduñ, plata oyduñ, etz tzaadzech quipychech huidi jäy ti yaj'oyñy miid yci'mhuinma'n. ³⁰ Dios ca' mñidity jotcöduuyb je jäy chuuhuinma'n tñibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy. ³¹ Com ti Dios yajnihuinmayñy tüg xii mina tiyduna'n yi naaxhuiñybi jäy miid je yëydijc huiddibi ti huin'ixy, jada tiy'ajt Dios ti yaj'ixy yajnejhuñy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytiñy niñiicpi yajxiicpi. Chi jacjadyii ymínaangixy:

—Huaad ñich ajcxy n'amido'idipyich miich m'ayuc mña anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huiddibi anajty yxii Dionisio, yi' je' anajty tungmiid jim Areópago. Nañ jadu'n tüg töxyjäy huidi anajty yxii Dámaris ypadzooni, etz jacjadyii jäy.

Chi Pablo ñicxy jim Corinto

18 Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycocajpity, namja'tni anajty miid ytöxyijc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxñy Aquila. ³ Aquila etz Priscila ytung'ajtpy anajty cochactijcxuyñi, com nañ cochactijcxuuyb anajty Pablo, paady Pablo jim yhuim'y miid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmñidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, choon ajcxy Macedonia, chi Pablo adügjiip ytiñy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytiñy jotma'tpi, tzipcapxpi ahua'ngapxpi. Chi Pablo yhuim'ixy, je' je' je tiy'ajt co puyöydüdaani ajcxy, e chi Pablo ymínañ:

—Miich ajcxy miid mgi'mbocy ajcxy myajtigoya'n yi m'alma. ñich ca' ti pocy nmñididyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytiñy. Justo ooy anajty Dios miyäxy ojadaty, e ymiid anajty ytiñy mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miid tüg'óciy y'ung y'anäg, yjuugy ymígüg. Nañ jadu'n nijëjity Corinto jäy co midoy Jesús y'ayuc, chi mibijcy e ñiibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigä, capxhuäcx'adñtz n'ayucich, e ca' mni'amoñ. ¹⁰ Com ñich miich nbubedipy, ca' pin jot

miid'adipy nicxy nejaty xytuñy. ñich may ñich ya nmñidity jäy ma jada cajp.

¹¹ Chi Pablo yhuim'y jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galiön ygobrador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yëydijc tzach jäy yaj'ixpijcp co ca' ycopicyity yajcuydunipy Moisés ycötujcin huidi jaybety ijtp.

¹⁴ Pablo capxamb anajty co oy yi Galiön nimäy ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibñy myajcapxyñy, ca' ñich huaad nya-tigiyñyich yjiibi huinma'n.

¹⁶ Chi je gobernador y'ané'min pidacy co huen judíojäy ajcxy yajpidzimdäyii ma je cötujctac. ¹⁷ Huin'it tüg'óciy griegojäy ma je cötujctac huijtzpidzñmyb je Sóstenes, yi judíojäy naymujctac huindzin, e chi ajcxy cuy jibijpy huingojxy jipcojxy ma gobernador yhuinduu, e Galiön ca' tuñycuenti.

Pablo yhuimbijtni Antioquía, e yajtzondacy midugñgpi viaje

¹⁸ Jac-huäcxijp Pablo jecy jim Corinto. Chi yhuinma'ñypidacy co chonaani. Chi ycapxycijxni miid je mibijcpidijc, e chi ybarcotigiyñi ñicxni jim Siria ñaaxjot. Ñicxni quipxyi miid Priscila etz Aquila. Jim Cencrea, ca'ni anajty ybarcotigiyñi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy miid Priscila etz Aquila, e ñicxy ma je judíojäy ajcxy ñaymujctac. Chi miidmiydacy je judíojäy ajcxy huidi jim anajty ti ñayyöymújcgixy.

²⁰ Chi je judíojäy ajcxy jim Efeso cohuanñy co huen jac-huim'y, e Pablo ca' a'ixñy co yhuim'ipy. ²¹ Chi Pablo ycapxycijxni miid je Efeso jäy, chi ymínañ:

—Copicy co jim xii nyajnaxa'ñyich Jerusalén, e nhuimbidipyich jadüg'oc ma miich ajcxy, pen Dios jadu'n tzojcp.

Chi Pablo ybarcotigiy chooni jim Efeso. ²² Co anajty ti ypättigñy jim Cesarea, Pablo nicxy Jerusalén co anajty capxocxaangixy je mibijcpidijc, chi mic'amy idaacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxñi jim Efeso

²⁴ Huin'it tiempo yja'ty jim Efeso tüg jäy huidi anajty yxii Apolos, hue' anajty ycocajpity Alejandría. Ooy anajty oy ayuc capxhuäcxñy. E yajxon nejhuñydy Dios y'ayuc huidi jaybety ijtp. ²⁵ Apolos ooy anajty xpicity ma Huindzin Jesús y'ayuc e ooy yjotmiccapxy, oy anajty yaj'ixpijcy nej je Huindzin Jesús yajty y'ayoy. Oy jëda'ajty anajty janehuñy nej Juan, je Bautista, jäy ajcxy yajñibejty. ²⁶ Chi Apolos ytiñy capxpi miydaacpi ma je

judíoŷäy ajcxy ñaymujctac janch ni ca' chigÿy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmïdmïydägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmïgapxy, e pubejty ajcxy. Chi ajcxy nijayÿiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxidzimy mayjäy agujc co ca' yjanchity nej anajty ajcxy judíoŷäy yhuinma'ñ mïdity, co Jesús ca' je' yjÿity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuixyp.

Pablo may mibijcpidijc minaybaati jim Efeso

19 Jim Corinto anajty Apolos, co Pablo tegyi'm yajyöñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigÿiy xyjottigÿiy je Espiritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñch ajcxy pen ji Espiritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo yminañ:

—Juan jäy yajñibejt je', je' je' je' tiy'ajt co huen jothuimbijtcixy. E ñimaaygixy anajty co huen ajcxy mibigipy je Cristo huidi jacmiinamni. Je' je' je' Jesús, je Cristo.

⁵ Co jada ajcxy jadu'n midoy, chi ajcxy oy ñibety mïd je Huindzin Jesús yxii. ⁶ E co Pablo cñixajy ajcxy, huin'it je Espiritu Santo y'adigÿiy yjottigÿiy ajcxy. Chi ajcxy ytigÿiy capxpi miydaacpi tigachyaty ayuc, e capxhuäcxy anajty ajcxy Dios y'ayuc. ⁷ Jÿeyi anajty nimajmetz yÿyidijctijc huidibi ajcxy ñibejt.

⁸ Tugÿig po' Pablo jim yhuäcxijpy, e yöydiib anajty ma judíoŷäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy mïd Dios ytiy'ajt. ⁹ Nijÿity jotjuuñyidijc ca' ajcxy ymibijcy, jÿeyi ajcxy jibic tzachnigapxy Jesús ytiy'ajt ma jäy ajcxy yhuinduu. Chi Pablo puyöydútcixni. Chi abicy yajnicxy je mibijcpidijc ma tüg escueltijc. Hue' je' je' escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíoŷäy etz huidi ca' yjudíoŷäyity. ¹¹ E Pablo mayba'mjäy yajtzoocy mïd Dios ymic'ajt etz ooy mijhuinma'ñ ytuñ. ¹² Ixti yajnicxy anajty ajcxy yhuait etz ypaayi huidi Pablo ñinïcx anajty ti ypadyii, e yajpaatcixy anajty pa'mjäy, e je' anajty mïd choocixy, e nañ je' anajty mïd ca'oybi ypidzimy ma jäy ajcxy y'ay yjot.

¹³ Chi nijÿity judíoŷäy huidi anajty huidijtp tzoymbi, huidibi anajty yajpidzimgixyp ajcxy ca'oybi, jayajtzö-gaañ tüg pa'mjäy mïd je Huindzin Jesús yxii co huen yajyöydüdyii je ca'oybi. Chi ajcxy ñimaaygixy je ca'oybi:

—ñch miich yam ñimaayb mïd Jesús yxii, je huidi Pablo ycapxhuäcpx, yajyöydüt jada jäy.

¹⁴ Jadu'n anajty y'iditczixy je Esceva ymang ajcxy, je nihuixtucpi ajcxy. Je Esceva hue' je' anajty judíoŷäy etz nihuindzin'aty teedy'adii. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuÿibich pin je' Pablo, e miich ajcxy, ¿mbin miich ajcxy?

¹⁶ Chi je yÿyidijc huidi ca'oybi anajty mïd, ytiycpÿiy tüg ma je' ajcxy, ymïmadactay je nihuixtucpi, e yqueectay ajcxy ma je tiyc nihuädz ixhuädz etz tzaachÿ. ¹⁷ Tüg'óciy jäy ajcxy huidi anajty tzinaayb jim Efeso, judíoŷäy etz huidi ca' yjudíoŷäyity nejhuixday ajcxy, chi ooy ajcxy chigÿiy e ñimiydaaccixy e cömaaygixy je Huindzin Jesús yxii.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguijpx majc mil plata meeñ (moneda mexicana naybaati jacnaxy jahueenjaty ycatüg mi-go'px jamajcmocx tüg mil). ²⁰ E je Huindzin Jesús y'ayuc ñigi anajty yhuäcx'idich, ñigi ymijtigÿiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxñhua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hu' my jecy jim Asia.

Canay'ayuc-huinjihuihuüi jim Efeso mïd Dios y'ayuc ycipi

²³ Huin'it tiempo tzip oy pidicni jäy y'ocyumÿgni y'oc'oxigni mïd Huindzin Jesús y'ayuc ycipi. ²⁴ Co je', je plateri huidi anajty yxii Demetrio, yaj'oyÿy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy mïd je ytung. ²⁵ Chi Demetrio huomujcy ymigügtijc je huidi jadu'mbi tung tumb, ñimay ajcxy:

—Migügtÿic, mnejhuÿiyb ajcxy co mïd jadyaabi tung huidi ñch ajt nduunim, jada mïd jotcujc ndzinaayim njugy'ajtim. ²⁶ E miich ajcxy m'ijxpy mnejhuÿiyb co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ñch ajt n'adogÿi e nañ jadu'n je mijpi dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigÿiy ajcxy huambi jihuiyb, chachmïnaangixy:

—¿Cömay jada Diana, yi efesiojäy ydios!

²⁹ Chi ajcxy yajhuinmänydigoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymïid huïdijtpy. Chi je cajpjäy ooy pahuijch pajugujc ajcxy je Gayo etz Aristarco, yajnicxy ajcxy ma agujctijc huïnduu ma jäy ñaymugyïi. ³⁰ Chi Pablo yjatigïhuaañ jäy agujc, mïd-capxa'ñ mïdmiydäga'ñ anajty je mayjäy. E je mïbijcpidijc ca' ajcxy a'ixïy nicxy jiiby ytigïy. ³¹ Nañ jadu'n nijëjity Asia mïjtungmïdipi huidi anajty Pablo mïd ñaymïgüg'adyïi, yajniguejxy ayuc, co ca' huaad ñicxy ma jäy ñaymïjcgïxy. ³² Je mayjäy tïgmucy anajty jtcïxy, ooy anajty yhuaangïxy yjihuiygïxy, ca' anajty ajcxy ñay'ayuc-huïnjihuiygïxy. E je jacmaaybi ni ca' anajty nejhuiygïxy ti co chachnaymïjcgïxy. ³³ Nijëjity jäy huïdibi anajty ajcxy mayjäy agujc, je ajcxy yajmïd-mïydactay je Alejandro ti anajty tuunip jajtïp. Chi je judïo jäy ajcxy tijpidzimy je Alejandro ma mayjäy agujc. Chi Alejandro cïmïd tiy'ajt yejcy co huen amongïxy. Je' anajty ñïgapxtüdamy judïojäy ajcxy. ³⁴ Co je mayjäy nejhuyi co je' je' yjudïojäy, chi ajcxy ytigïy huaambi jihuiybï jahuenjaty ycamejtzhority, ymïnaangïxy:

—¡Cömay ooy yï Diana, yï Efeso jäy ydiosal!

³⁵ Chi je cajp jaaybi co anajty je jäy ti yaj'amoongïxy hueenï, chi ajcxy nimay:
—Efeso jäy, tïg'ócïy yï naaxhuiñyjäy nejhuyi co jada Efeso cajp yï' cuend'ajtp yï Diana chajptijc, je' Diana huidi ooy ti yajcömay, etz yï Diana ñinïcx huidi cä'u tza-jpcïxy. ³⁶ Ca' huaad ni pin ymïna'ñ co ca' yjänchity. Amongix, ca' ti mdúngïxipy pen ca' jayïjp yajxon mhuiñmaaygïxy. ³⁷ Com jada yëydijc ajcxy tiibi myajmingïxy, ca' ma ytundïgoogygïxy, ca' yï' ma ajcxy jibic capxcïxy ma miich ajcxy mdiosa Diana. ³⁸ Pen Demetrio etz huïdijaty mïd ytuñ pen ymïd xïhuin mïd pinjaty, paady tungmïdipi etz tiydundac jiiijity. Jëbi nigapxy ma tungmïdipi, jëbi miñ xyipy ñayñïgapxtúutigïxy. ³⁹ E pen huingbi ayuc huidi miich ajcxy mbijctzooyb, copity jada y'oyïhuipy ma jäy naymugyïi. ⁴⁰ Ymïd jada ayo'n co nicxy nayyaxïhuim co jäy cham ñaymïhuïdïdyïi mïd jada ycïxpi nej yam ytunyï yjadyïi e ni ti tiy'ajt ñich ajt nganejhuiyïm nej nmïnaanïm pen ji anajty xyaj'amïdoohuim mïd co jäy cham chachhuaangïxy chachjihuiygïxy.

⁴¹ Co jadu'n miydactay, chi ycapxycijxy mïd je naymujcpidijc.

Pablo ñicxy jim Macedonia etz Grecia

20 Co je cajp jäy ycapxy'ayuc xeemy, chi Pablo huoomujcy je mïbijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mïbijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuaçxijpy jim tugïg po'. Jim Grecia Pablo anajty ybarcotigïhua'ñ ñicxa'ñ Siria. Co Pablo oy nejhuyi co judïojäy ajcxy ti yajnihuinmayïyïi yaj'öga'ñyïi barcojoty, chi yhuinma'ñybaty co huimbida'ñ tegyï'm, ñaxa'ñ jadüg'oc Macedonia. ⁴ Pablo mayjäy mïd ñicxy, mïdnicxy je Söpater huidi anajty cogajp Berea, etz Aristarco, etz Segundo huidi anajty cogajp Tesalónica,

etz Gayo huidi anajty cogajp Derbe, etz Timoteo, etz nañ jadu'n Tíquico, etz Trófimo huidi tzoon jim Asia ñaaxjot. ⁵ Co jada mïbijcpidijc ajcxy ñicxy jayïjp, chi ajcxy xy'ahuijxyich jim ma je cajp huidi xï Troas. ⁶ Co xï ñajxtay mïna yajcaay je tzajcaagy je huidi ca' mïdity levadura, chi ñich ajcxy ndzooni jim Filipos barcojoty. Co migoox xïni, oy ñich ajcxy naybáatigïxy jim Troas. Jim ñich ajcxy yhuaçxijpy huixtujc xï.

Pablo co'ixïy je mïbijcpidijc jim Troas

⁷ Domingo xï ajcxy ñayyöymujc je mïbijcpidijc chajcaagy ytujc-huäcxaangïxy, e Pablo anajty ymïgügtijc yjacyaj'ixpijcy. Je' co anajty com jabom chonaani, paady oy ayuc jacyajyoñ ixti ycuyc-hua'cxchumïy. ⁸ Jiiby anajty canaag lámpara ytïcxy ma ajcxy anajty ti yöymujccïxy ma tïg cuarto huidi anajty oy ycixity. ⁹ E tïg yeeg'anäg huidi anajty yxï Eutico, ma ventana aguu anajty y'ïñäy. Com Pablo jecy oy yaj'ixpijcy, chi je yeeg'anäg ymäymajtzï, e tugïg nihuijtzpety anajty ycixity je tijc ma ycäy. Chi ajcxy yajpidïgy ögy. ¹⁰ Co Pablo ymïnajcy, chi ñaygïxnajajï amïneenmujcy je yeeg'anäg huidi anajty ti ycäy. Chi Pablo nimay ymïgügtijc:

—Ca' mdzigïygïxy, juugy jada.

¹¹ Chi Pablo jadüg'oc ypejty ma je cuarto cïxpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xïmïyñ. Chi ycapxycijxni mïd je' ajcxy, chi ñicxni. ¹² E je yeeg'anäg huidi anajty ti ycäy, chi ajcxy yajnicxy juugy, e ooy ajcxy yjotcugiy nidüg'ócïy.

Choñ ajcxy Troas ñicxcïxy Mileto

¹³ Chi ñich ajcxy jayïjp nicxïgy barcojoty jim Asón co anajty jim nyajtzonángïxich Pablo, com ti anajty jadu'n mïdnayñimáayigïxich co je' tegyï'm anajty ñicxa'ñ. ¹⁴ Co ñich ajcxy naybaatti jim Asón, chi Pablo ybarcotigïy mïd ñich ajcxy. Chi ñich ajcxy ñicxy jim Mitilene. ¹⁵ Chi ñich ajcxy jim ndzoñ, chi com jabom ñich ajcxy najxy mihuingon Quío, comaax ñich ajcxy nja'ty jim ma barco jättac huidi anajty yxï Samos. Jim Trogilio ñich ajcxy nbocxy, com jabom ñich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuaçxiba'ñ jim Asia ñaaxjot, com tzojc anajty yjäda'ñ Jerusalén, com jim anajty yajnaxa'ñ Pentecostés xï.

Pablo yajmïdmiydacy je huïdibi ajcxy ane'mb je mïbijcpidijc

¹⁷ Jim Mileto anajty Pablo, chi capxyñiguejxy huidi ajcxy nigohuajc'ajtp je mïbijcpidijc huidi ajcxy jim Efeso. ¹⁸ E co ajcxy miiñ, chi Pablo ymïnañ:

—Miich ajcxy mnejhuiyb jadu'n nej ñich ti njäy'atyich ma miich ajcxy tïg'ócïy je xï je tiempo nej oga'n nja'tyich ya Asia. ¹⁹ Jecy ñich ooy ti n'ityich mïd miich ajcxy, nduñich ma nHuïndzin Jesús ytung mïd yung naxy njot nhuinma'ñich, etz mïd huïnnï jotmay, etz ti may ayo'n nyajnaxyich ma yï judïojäy ajcxy. ²⁰ Ca' ti n'ixmachich je ngapx'ayuc huidi oyïp mïd miich ajcxy

ycixpi. Ti nyaj'ixpicxyich mayjāy'agujc etz tijc tijc. ²¹ Ti ndiy'ajt yecyich ma judío jāy etz cham ma huidi ca' yjudío jāyity. Nnimaydaayich co huen jothuimbijtcixy ma Dios, etz huen mibijccixy iich ajt nHuindzin Jesucristo. ²² Jadachambi nicxpich jim Jerusalén; adzip je Espiritu Santo xyquexyich e ni nganejhuyich ti iich jim xyjadamy. ²³ Co iich cajp cajp ma nnicxyich, je Espiritu Santo xyajnejhuibich co jim Jerusalén jāy ajcxy xypidāga'ñich pujxtigoty etz jim ajcxy xychaachytuna'ñich. ²⁴ Yi jadu'mbi ayuc ca' iich nduñich cuendi, jada njugy'ajtich ca' ti tzoohuity. Jēyi janchtiy co nyajcixipyich jada tung jotcuyc, e nguydunipyich je Huindzin Jesús y'ayuc, je tiibi xyajnbicyich jada tung. Ngapxhuācxibich yi oybi Jesucristo y'ayuc ytiy'ajt jadu'n nej Dios may'ajt ti tuñ miid jāy ajcxy ycixpi.

²⁵ E jadachambi nnejhuibich co miich ajcxy ma ti ngapxhuācxych Dios y'ayuc, ca' miich ajcxy xy'oc-jac'ijxcixni jadūgtocy. ²⁶ Paady cham nniimāyich miich ajcxy, ca' ni ti ngo'adzohuipyich miid miich ajcxy ycixpi. ²⁷ Com ti ngapxhuācxych ma miich ajcxy tūg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyūchich ma miich ajcxy. ²⁸ Naycuend'ajtigixy c'm etz cuend'ajtcixy tūg'óciy jāy ajcxy huidi yajmij'ajtp je Huindzin Jesús, jadu'n ajcxy nipaady nej tūgpicy cōbixy, etz miich ajcxy huidi nigohuajc'ajt je mibijcpidijc jadu'n miich ajcxy nipaady nej cōbixy cuend'ajtpi. Je Espiritu Santo ti xyajnbijccixy co mgüend'adipy ajcxy yi Jesús yjāy, huidi ti cojuuy ajcxy ypocy miid yci'mni'py co y'ocy.

²⁹ Chi Pablo yjacminañ:

—Nejhuyibich co ya ndzoonibich miinip huingbi jāy huidi yajhuinma'ñy digoyam mibijcpidijc, jadu'n nej ahua'n iyujc huidi cōbixy tzūdzip. ³⁰ Ji ma miich ajcxy ji jāy yaj'ixpigam anñ ma yjapadyi yaj'ixpigipy tiy'ajt oybi jigix yi mibijcpidijc ypanicxyib. ³¹ Naygüend'ajtigixy, mjāy medziyb ajcxy jadu'n nej iich tugig jimijt ti nyaj'ixpicxyich xim tzuum jabom jabom, miid huinnñ jotmay ti nyaj'ixpicxyich miich ajcxy nidūg nidūg.

³² Jadachambi iich, nmigūgtijcich ajcxy, Dios miich ajcxy nyajpuhuanxyb, nyajmihui'maamyich miich ajcxy Dios y'ayuc jadu'n nej Dios ajt xychojcm xyjihuiyim. Ma Dios y'ayuc miich ajcxy mbaadipy mic'ajt ma yi mibijcin, e mbaadipy ajcxy it lugar ma Dios quipxyi mñd ajcxy nidūg'óciy tiibi yajhuāch yjot yhuinma'ñ.

³³ Ni ti iich ti nga'adzocy, ni pin yhuitt ymeenñ huidibi n'ocjēdxyibich. ³⁴ Miich ajcxy mnejhuibich co ti nduñich, mñd ngi'mgijich c'm ti nnyamöyijich huidi nyajmayjajtpyich etz nañ jadu'n ti nbubetyich nmigūgtijcich huidi iich anajty nmiid. ³⁵ Iich miich ajcxy ti nyajni'ixxygixy nej jēbi mdungixy, nej jēbi mbubéjtcixy migūgtijc huidi pa'm'ijtp, etz huidi tijaty yajmayjajtp. Jāy medzi ajcxy je Huindzin Dios y'ayuc co yminañ: "Jacjotcuyc je' huidi yejcp, ca'ydi huidibi yajmooyb."

³⁶ Co jadu'n ycapxtay, chi Pablo ycoxtinay'ahuiy miid je' ajcxy, e mibijctzoy ajcxy Dios. ³⁷ Ytigxy ajcxy yaaxpi nidūg'óciy, e mineenñ ajcxy Pablo etz tzūcxy. ³⁸ Ooy ajcxy jihuiy nej anajty ti ñimāyigixy ajcxy co ca'

yjac'ixxyb ajcxy jadūgtocy. Chi ajcxy oy najtzhuohuiy jim ma barco.

Pablo ñicxy jim Jerusalén

21 Co iich ajcxy ngapxycixy miid je mibijcpidijc, chi iich ajcxy nbarcotigxy, tiyxi nicxy iich ajcxy jim Cos. Com jabom ndzooñich Cos nicxy iich ajcxy jim Rodas. Chi iich ajcxy ndzooñ Rodas nicx iich ajcxy jim Pátara. ² Jim Pátara iich ajcxy nbaaty tūg barco huidi anajty najxp Fenicia ñaaxjot. Jim iich ajcxy nbarcotigxy jadūg'oc, chi iich ajcxy nnicxni. ³ Chi iich ajcxy mmij'ijxy Chipre je naax mejy'agujcpi, anajty'amy je' yhuim'y. Jacnicxy iich ajcxy Siria ñaaxjot, chi je barco ytigxy ma yjättac jim Tiro co jim anajty chimydajc yajhuima'ñ. ⁴ Jim iich ajcxy nbaty jāy huidi anajty yajmij'ajtp Jesús, chi nmiidhuācxijpich ajcxy huixtuyc xi. Je' ajcxy je Espiritu Santo yajnejhuixy co Pablo ayo'n padañ Jerusalén, paady ajcxy nimay Pablo co ca' huaad jim ñicxy. ⁵ Co huixtuyc xiibi yca'pxy, chi iich ajcxy ndzooni. E tūg'óciy mibijcpidijc miid y'ung ytōxyijc oy xytūjij-phuohuixyigixyich cajppa'. Jim ma mejypa' ngoxtinay'ahuiy iich ajcxy, chi iich ajcxy nmibijctzoy Dios. ⁶ Huin'it iich ajcxy ngapxycixni, chi nbarcotigxyñi iich ajcxy e je mibijcpidijc yhuimbijtni ajcxy ma ytijc.

⁷ Co iich ajcxy ndzooñ Tiro, chi nicxy iich ajcxy Tolemaida. Jim iich ajcxy ngapxocxich je huidi anajty ajcxy mijpidaacp Jesús, e nmiidhuim'y iich ajcxy jim tūg xi.

⁸ Com jabom iich ajcxy ndzooñ Tolemaida mñd Pablo etz pinjaty iich ajcxy anajty nmiid. Chi iich ajcxy nja'ty jim Cesarea. E chi iich ajcxy nicx ma Felipe ytijc, je huidibi anajty capxhuācxycy Jesucristo ytiy'ajt je oybi. Je' je' huidi tuun je nihuixtujcpi taabi ajcxy caayin uucin yajhuācxycy jim Jerusalén oga'n. Chi iich ajcxy nhui'my miid je'. ⁹ Felipe mīdaax anajty ñix mīdity, ca'ni anajty ajcxy ypijccixy. E je' ñix ajcxy anajty Dios y'ayucnajtzcaxxyipy. ¹⁰ Ti anajty iich ajcxy jim nhuācxipy canaag xi co oy yjāty tūg ayucnajtzcaxxyibi huidi anajty yxi Agabo, jim anajty ti chooñ Judea. ¹¹ Chi Agabo y'oy xycogapxyigixy ma iich ajcxy njättac. Chi Agabo Pablo yhuin huijtzccci, e je' mñd ñaygixojtz ñaydecyxoxtzi, chi yminañ:

—Je Espiritu Santo jadu'n minamb co jim Jerusalén jadu'n judío jāy ajcxy cixodza'ñ tecyodza'ñ jada huin yhuindzin, e nañ cxyega'ñ ajcxy ma huidi ca' yjudío jāyity.

¹² Co jadu'n yajmidoy, iich ajcxy etz je Cesarea jāy ngohuanxy iich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy miid iich ycixpi? ¿Nej iich miich ajcxy co njot nhuinma'ñ xyaj'amutzciy? Iich nayyējcbich miid naygixodziñ naydecyxoxtzi, nañ jēbi n'ögibich jim Jerusalén miid je Huindzin Jesús ycixpi.

¹⁴ Co ca' iich ajcxy mimadacy nicxy nyajhuim'gixyich Pablo, chi iich ajcxy n'amooni, chi iich ajcxy ñayñi-maay:

—Huen cuyduñ je Huindzin Jesús chojcin.

¹⁵ Co jadu'n yjajti, chi iich ajcxy ndzooni ni'ixxy e chi iich ajcxy nicxy jim Jerusalén. ¹⁶ Miid nicxy iich ajcxy ni-

jëjity mibijcpidijc huidi tsoon Cesarea, e nañ tsooñ anajty tüg Chipre jäy huidi anajty yxii Mnasón, jecyip anajty jiptigiyiiñi jada mibijcin e je' ñich ajcxy nicxy xyajjättägaangixy.

Pablo oy cogapxëy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcy janch jotcuyc. ¹⁸ Com jabom ñich ajcxy nicxy miid Pablo, y'oy ñich ajcxy ngogapxëy Jacobo, e jim anajty tüg'óciy huidi nigohuajc'ajtp je mibijcpidijc. ¹⁹ Chi Pablo ymígügtijc capxocxy, e yajmídmíydacy ti anajty Dios ti tuñ miid yí' ma yí jäy ajcxy huidi ca' yjudíojäyity. ²⁰ Co ajcxy jadu'n midooy, chi ajcxy huin'ñy jäymejch yí Dios, chi ajcxy Pablo ni-may:

—Mígüg Pablo, miich mnejhuñyb co ya canaag mil jäy ti mibicy Jesús, e yjactimína'ñ ajcxy co copicy nguyduunim Moisés ycötujcin je jecyip. ²¹ Ti ajcxy yajmídmíydägyii co miich mdzachjäyayaj'ixpicy ma tüg'óciy judíojäy huidi ajcxy jiguëgy adzinaayb co ca' huaad tuñyuenti Moisés ycötújcín je jecyip, etz ca' ycopicyity co tiy'ajttíyigixipy y'ung, etz ni ca' ycopicyity payöyipy ñich ajt ngostumbre. ²² ¿Ti huaad nduunim? Jotmädám ajcxy co nejhuhüipy co ya miich ti mjäty. ²³ Hue' janchtiy jadu'n miich mdunipy: cha mídaax yëydijc huidi cuydunamy tüg huandaacín. ²⁴ Miidnicxy je' ajcxy, nicx nayyajpocyñihuaatzí miid yí' ajcxy, e miich mgojuydayipy nej anajty ajcxy ypadyii je meeñydunñ. E chi ajcxy myajcöme'pxipy cödza'm, e jadu'n je jäy ajcxy huinjihuidyähuipy co ca' yjanchity jadu'n nej xyñimiydaaccixy, jëyi co miich nañ jadu'n mgyudun je Moisés ycötujcin je jecyip. ²⁵ Huidibi janchtiy jadu'n nej yí huidibi ajcxy ca' yjudíojäyity, e ti mijpidaaccixy Jesús, ti ñich yí' ajcxy nijayíyigixich co ca' túngixipy cuenti jada jadu'mbi judíojäy ycostumbre. Je' janchtiy co ca' huaad tzützcixipy je tñibi jäy yajhuindzigëy ídolos, ni ca' huaad jñcxcixipy ni'py, etz ni ca' ajcxy tzüdzipy huidi yo'c-huidy ti y'ögy, etz ca' ajcxy huingbi töxyjäy migapxtigóoygixipy.

Chi ajcxy majch je Pablo ma Dios ytijc

²⁶ Chi Pablo miid nicxy je nimídaaxpi yëydijc, com jabom ajcxy nayyajpocyñihuaatzí ajcxy, chi ajcxy ytigëy ma Dios ytijc, e chi ajcxy ytiy'ajt yejcy ma judío teedy ti xii ycixa'ñ je nayyajpocyñihuaadzi, etz ti xii huindzigí'ñ iyujc cýyegaangixy nidüg nidüg.

²⁷ Ma anajty yca'pxaaní je mihuixtjcxiiñi nijëjity judíojäy, chooñ jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjihuiygoty, ²⁸ chi ajcxy yam chachmínaangixy:

—¡Israel jäy ajcxy, pubejtcich ñich ajcxy! Jada je' je yëydijc huidi xi ya tzach nigapxp ni'ojñyb judíojäy ycostumbre, Moisés ycötújcín, etz nDios ytijc. E jadüg nax ti yajtigëyigixy griegojäy ma Dios ytijc, yajjibicíyigixy jada it lugar huätzpi. (Com ca' ñigödúcyity nicxy griegojäy ytigëy ma Dios ytijc.)

²⁹ Paady anajty jadu'n ymínaangixy je huidi ajcxy majtz je Pablo, com co ijxy ajcxy Pablo mihuidity cajpoty je Trófimo, huidi anajty cogajp Efeso. Hue' anajty ti-cixy co Pablo ti mihdigëy Trófimo tzajtigoty.

³⁰ Tüg'óciy je cajpjäy yjotmätcottay, miñiñ ajcxy poyëgy majch ajcxy je Pablo yajpidizimy tzajtigoty pahuijch pajugujcy. Chi ajcxy mic'amy agiiy Dios ytijc.

³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjihuiyigixy. ³² Je soldado huindzin huodzunday soldado ajcxy, e chi ajcxy ñicxy poyëgy ma je mayjäy yhuaangixy yjihuiyigixy. Co je mayjäy ajcxy ijxy miñ soldado ajcxy miid yhuindzin, chi ajcxy ixmajch Pablo ca' ocjaccóxcixni. ³³ Co je soldado huindzin jim ja'ty, chi yajmajtzí je Pablo, ni'anëmdiy co huen cixochyíi miid mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytigëy huaambi jihuiybi, e jadu'n je soldado huindzin ca' ni nej huinjihuñy miid je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim yja'ty ma cuartel pediydac, chi je soldado ajcxy cýygy Pablo, co anajty je mayjäy chachjottigoyñáxcixy tzachyaj'ogaangixy anajty Pablo. ³⁶ Tüg'óciy je mayjäy pamiingixy axam je soldado ajcxy, yam chachmínaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigëhua'ñyíi cuartel tigoty, chi Pablo migapxy je soldado huindzin miid griego ayuc, ymínañ:

—¿Nej jëbi ii nmídmíydägy tüg'aa metz'aaji?

Chi je soldado huindzin y'adzooy:

—¿Nej mjaity miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpidëcp, e huobidizimy mídaax mil jäy yaj'öcpí, miid nicxy ajcxy jim migtigëduum?

³⁹ Chi Pablo ni-may je soldado huindzin:

—Ñich judíojäy ñich, jim ngogájpidyich Tarso, tüg mijcajp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiiy, chi Pablo yti-nay'ahuñy ma je cuartel pediydac, e cñmíid ytiy'ajt yejcy co huen amoongixy. Co je mayjäy ajcxy y'amunday, chi migapxcoty miid hebreo ayuc ymínañ:

22 —Mígügtijc etz mij'anäctijc, midoogixy jadu'n nej ñich yam nnayñigapxtüdyii.

² Co je mayjäy ajcxy midoy co ymigápaxigixy miid hebreo y'ayuc, chi ajcxy y'amunday, chi Pablo ymínañ:

³ —Judíojäy ñich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpijcxich ya ma Gamaliel, etz yajxon Gamaliel ti xyaj'ixpijcyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öc-tähuaamyich anajty, e nyajnicxyich anajty mach yëydijctijc etz töxyjäyidijc, nbidägyich anajty ajcxy pujxtigoty. ⁵ Je teedy migtungmíidpi etz tüg'óciy mij'anäctijc

ymiid tiy'ajt, co ñich ajcxy xymooyich cötujcin, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacip, madza'ñich anajty ajcxy, e nyajmina'ñich anajty ajcxy ya Jerusalén huen yajtzaachytungixy.

Pablo nimiydacy nej yjothuimbijty

⁶ Co ñich anajty ndüyöyich mihuingon Damasco, cujc yxii anajty, chi janch timitiini ytixcixgy juhuidity jadu'n nej jijn ma ñich, hue' anajty choon tzajpjoty. ⁷ Chi jim ngidaayich, huin'it nmidooyich tüg ayuc xyñimäyich: "Saulo, Saulo, zti co xypahuidijttägyich?" ⁸ Huin'it n'amidooyich: "¿Mbin miich, Huindzin?" Chi xy'adzooyich: "ñich je' je Jesús je huidi cogajp jim Nazaret, je huidi miich mdzachpahuidijttacpy." ⁹ Pñjaty ñich anajty nmñid y'ijx je' ajcxy je tiicxin, chi ajcxy ooy chigiiy, e ca' ajcxy huinjhuüy je ayuc huidi anajty nmigapxyiijich. ¹⁰ Huin'it nnimaayich: "¿Ti jëbi nduñich, Huindzin?" Chi je Huindzin Jesús xy'adzooyich: "Pidig e yajyöy mdu', nicxy jim Damasco, jim myajnimähuüyb tüg'óciy ti jëbi mduñ." ¹¹ Je tiicxin hue' je' xy'ixmajchich huiintz. E chi je nmigügtijcich xyhuitzoonich ajcxy cëgíxy, xyajja'tyich ajcxy jim Damasco.

¹² Jim Damasco anajty chinäy tüg yëydijc huidi anajty yxii Ananías, je huidi anajty ooy cuyduñ Moisés ycötújcín je jécyip. E judíojäy ajcxy huidi jim tzinaayb ooy cömaaygixy co ooy y'oyjäyity. ¹³ Chi Ananías ymiñ ma njättaacich, e ytinay'ihuüy ma ñich nmijc, chi xyñimaayich: "Migüg Saulo, ijxigich jadüg'oc huinjemy." Tim huin'itiy n'ijxigiyich. ¹⁴ Chi Ananías xyñimaayich: "Je Dios huidi ajt nmij'ap nmijteedy ojadajt, je' ti xyhuin'ixy jigix mnejhuühuüpy Dios yhuinma'ñ, etz m'ixipy je tudäcypí jäy, e mmidohuüpy yci'm ayuc huidi ycapxy. ¹⁵ Dios ti xyhuin'ixy jigix nicxy mdiy'ajt yecy ma tüg'óciy naaxhuñijy, etz mnimiydägipy nej ti m'ixy ti mmidooy. ¹⁶ Jadachambi, znej co mhuäcxipy? Pidig etz ñibet. Mibijctzou Dios jigix mbocy ñihuädzipy."

Pablo nimiydacy nej oy yajquexy ma je huidibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi ñich jiiy tzajti-goty n'ixmañyiyich. ¹⁸ N'ijxyich je Huindzin Jesús e xyñimaayich: "Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich." ¹⁹ Huin'it n'adzooyich: "Huindzin Jesús, yi jäy ajcxy ñejhuüyb co ñich anajty nnicxich huen huidi judíojäy naymujctac n'ixtäyich yi jäy ajcxy huidi miich m'ayuc xymibijcip, ti nbidägyich anajty ajcxy pujxtigoty, ooy ñich ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huidi miich m'ayuc xycapxhuäcxip, jim ñich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c." ²¹ Chi ñich nHuindzin Jesús xyñimay: "Cham ñich miich nguexy jigüegy it ma yi jäy ajcxy huidi ca' yjudíojäyity."

Pablo, ma je comandante yc'äm

²² E yabaad je mayjäy y'amido'ijty Pablo y'ayuc, chi ytigiiy ajcxy huambi jihuiybi chachminaangixy: —¡Huen öc yijiibi yëydijc! ¡Ca' huaad yjactzinäy!

²³ Yam yhuaangixy yjihuiygyixy, yam yjocxhuit tzachjengixy, etz naaxhuaay tzachyujc-huijicxy. ²⁴ Chi je soldado huindzin ni'ane'mdiy co huen Pablo yajnicxyii cuartel tigoty, e ni'ane'mdiy co huen ci'adyii jigix nigapxip ti ti tuñ co je jäy ti ymibidigyii. ²⁵ Ti anajty ajcxy cixojtzicxy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti cötújcín miich ajcxy miid co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy ñich jada nbaaty co naydijijijich romanojäy.

E chi Pablo y'adzooy:

—ñich ti nmibi'c'ajtich yi'.

²⁹ Miid jëyi, je huidibi anajty ajcxy c'adam je Pablo, chi puyöydúutcxni. Nañ jadu'n je comandante ooy ñay'adzigiüy, miid co cixojch Pablo miid cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuühua'ñ ti ycipi co ti yxyii je Pablo yi judíojäy, huen yajminagyii cadena ma Pablo yci'. Chi ane'my co yajhuomujci je teedy tungmñdipi etz je judío mij'anäctijc. Huin'it je comandante yajnicxy Pablo ma je huindzindijc etz ixpitycjtijc anajty ti ñaymújcigixy.

23 Huin'it Pablo yaj'ijxpejty je mayjäy huidi anajty ti nayyöymújcigixy, e chi ajcxy nimay:

—Migügtijc, Dios y'ijxpy ñejhuüyb nej ñich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmñdipi, ni'ane'mdiy Pablo co huen yaj'accojxigy. ³ Chi Pablo yminañ:

—¡Dios xychaachytunipy miich huidibi mnaybidaacip nej jihuiy ooy mdudägyjäyity, e ca' yjanchity! Paady miich m'ñäy ma cötujctac jigix nyajtiydunipyich nej je ley y'ane'my. Chi mmidundigooy je ley co ti xyajcojxyiijich.

⁴ Je jäy ajcxy huidi anajty jim minañ:

—¿Jadu'n miich mmigapxtigoy yi Dios ymijtungmñdipi?

⁵ Chi Pablo yminañ:

—Migügtijc, ñich ca' anajty nejhuüyich, pen yi' je' Dios ymijtungmñdipi. Com jaybety jadu'n ma Dios ñecy: "Ca'

huaad jibic mnigapxipy huidi tungmiid ijtp ma miich mjäy."

⁶ Huin'it Pablo ijxy nejhuüy co jim juntijoty mejtzpicy ixpicytjic anajty jim, jim huidi saduceo y'ixpijcin ymijpidacp etz nañ jadu'n jim huidi fariseo y'ixpijcin ymijpidacp, chi Pablo yminañ mic:

—Migügtjicich, fariseojäy ñich, nañ jadu'n ndeedyich fariseojäy je'. Cham nyajtiyduñich miid jëgixpi co nmibicyich co Dios yajjugypigipy jäy tibi y'öccixy.

⁷ Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuiyi. Chi je naymujcpidijc ajcxy ñaybijc-huäcxä. ⁸ Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcipy je' ajcxy co yjijity ángel ajcxy, co öcpi jugypigaangixy, co je Espíritu Santo yjijity, co jäy ajcxy miidity y'alma, etz co mujcu' ajcxy yjijity. ⁹ Tüg'óciy jäy ajcxy ma je naymujctac ytiñiy huambi jihuiybi. Chi nijëjity fariseojäy huidi nihuindzin'ajtpy je Moisés ycötújcin nigapxtuty Pablo yminañ:

—Jadayaabi jäy ca' ti pocy ti tuñ. Ca' yjeyity ti jada' ymigapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajot'am-bjicigixy. Je soldado huindzin tzigiyb anajty co Pablo y'ahuoonñhuiy y'agidzñhuiy, paady ni'ane'mdiy huen yi soldado ajcxy yajpidzimgixy juntijoty e yajñcx-cixipy yi Pablo jadüg'oc ma cuartel.

¹¹ Huin'it coodz ñayguëxci je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinmañ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'ibojci ñaygapxojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³ Nihuixchiguipx naxy anajty yëydijctjic huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mijtungmiid etz judío mij'anäctjic, nimay ajcxy:

—Ñich ajcxy ti ngapxycödujccixy co ca' ngayáangixyich n'ügáangixyich ixti cooni ñich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixpicytjic mij'anäctjic nidungiygixy ma je soldado huindzin, co huen jabom yajminyii Pablo jadügtecy ma miich ajcxy. E aaniädaaccixy co jacyajxon yajtiydunañ, e ni'ixä ñich ajcxy anajty n'ijtcixy co Pablo nyaj'ögibich ca'ni anajty yjäty ma naymujctac.

¹⁶ Pablo chi' ymang nejhuüy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajñcx jada yeeg'anäg ma je comandante, ymiid yi' ayuc ti nigapxaamy.

¹⁸ Chi je soldado huindzin yajñicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmiidminipyich jada yeeg'anäg, ymiid yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajñicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajñicxipy jim ma ñayyöymugáangixy, y'aaniidägaangixy co jacyajxon tiydunaangixy. ²¹ Ca' miich yi' mmibigipy; com nihuixchiguipx naxy yëydijctjic jim yi' ajcxy ahuixy yüch. Ti capxycödujccixy co ca' ajcxy ycayañ y'ügañ ixti cooni ajcxy yaj'ögipy je Pablo. Jadachambi ni'ixä jim y'ijtcixy, jëyi miich m'ayuc ajcxy xyjamidohuaani, pen mni'ad-zooyb.

²² Chi je comandante ycapxycijxy miid je yeeg'anäg. Chi nimay co ca' huaad ymiydägy miid jacpinjaty jadu'n nej anajty ti ymiydaaccixy.

Yajñicxy ajcxy Pablo ma je gobernador Félix

²³ Chi je comandante yaaxi metz capitán moy cötújcin huen nayñi'ixäyigixy nimejtzmiço'px soldado huidi nicxip tegyi'm, etz tugi'pxmajc huidi nïcxi co huaaygëxy, etz mejtz miço'px quipyjipxu'ñmiidpi, huen nïcxcixy jim Cesarea mijcoodz. ²⁴ Nañ ni'ane'mdiy co huen cohuay ni'ixä pidägyii huidi Pablo yaj'ññhuiy, e moy cötújcin co huen oy yajxon ajcxy Pablo yajjädiy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ "Ñich comandante, Claudio Lisias, cham nguejxyich jada necy ma miich, mijpi gobernador Félix, e nguejxyich capxpooxci. ²⁷ Je judíojäy ajcxy ti anajty matzcxixy jadayaabi yëydijc, yaj'ögamy anajty ajcxy co ñich oy nejhuüy co je' yromanojäyity, chi nninicxich miid soldadtjic etz nnihuaañich. ²⁸ Co ñich ooy anajty nejhuñhuañich ti anajty co ti xëgixy, chi nyajñicxich ma anajty ajcxy tungmiidpi etz mij'anäctjic ti ñayyöymüjicigixy. ²⁹ Hue' anajty yi' ycixpi ti yajxäy co anajty ti ytundigooy ma yi' ajcxy ycötújcin. Ca' anajty ytiy'ajtity co yaj'öccixipy, e ni ca' huaad ymach'ññäy. ³⁰ Co ñich oy nejhuüy co yi' judíojäy anajty ti nihuinmayiygixy co yaj'ögaangixy, cham ñich miich yi' nyajñigüexy. E ti ñich nañ jadu'n nimay huidi ti yxäyii huen nïcxcixy ma miich, e jëbi ajcxy jim nigapxy ti ycixpi co midzip'ajtcixy. Ji naybaatim."

³¹ Je soldadtjic nej anajty ti ycötújcin möyii tim huin'ity miid tzoñ je Pablo mijcoodz ixti yajja'ty ajcxy Antipatris. ³² Je soldadtjic huidi ajcxy tegyi'm nïcpx, com jabom huimbjtcixni, chi yjá'tcixni ma cuartel. E je soldadtjic cohuaygixpi jacñicxy je' ajcxy miid Pablo.

³³ Co je' ajcxy yja'ty jim Cesarea, chi ajcxy je gobernador necy yajcädigiy, chi ajcxy nañ jadu'n yajquëxgy je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuüy co yCiliciajäyity, ³⁵ chi nimay:

—Jiini nejhuñhuibich je tiy'ajt co anajty miingixy huidi ti yxëgixy.

Huin'it ni'ane'mdiy co huen cuend'adyii ma je Herodes ymijtijc.

Pablo ñaygohua'ñyii ma je gobernador Félix yhuinduu

24 Co migoox xii Ananías je teedy ajcxy ymijtungmüdpí yja'ty jim Cesarea müd judío mij'anäctijc ajcxy etz müd tüg huingapxpi huidi anajty yxii Tértulo, chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytigüy xibi, nimay Félix:

—Müd miich ycixpi jotcujc je naaxcayp y'ijty, ca' ma tzip, je' co yajxon m'ane'mdäy müd oyhuinma'ñ. ³ Tüg'óciy ich ajcxy njäygidacpyich hueñyama'amyity, miich mijtungmüdpí Félix. ⁴ Ca'ydi mdiempo nyajti-gooyi mij, tun may'ajt amido'ijtigich n'ayuc tüg jaxëgyi. ⁵ Com ti nnejhuñyigixich co jada Pablo, ooy ayo'n yecy hueñytimma'amyity. Xi ya judíojäy tzach pijc-huäcxy müd y'ayuc huidi ymüd. Yi' je' nigohuajc'ajtp tüg picy jäy huidi jäy ytijpy Nazaret jäy. ⁶ Com tundigoy ma ich ajcxy nDios ytijc nej ca' ypadyii, chi ich ajcxy nmajch, e chi ich ajcxy njatydunaañich jadu'n nej ich ajcxy ngötújcín y'ane'my. ⁷ Per je comandante Lisias je' yajtigüy mictägy, chi ich ajcxy xypijci jada Pablo. ⁸ E Lisias yminañ co pinjaty anajty ti yxëyii huen miñ ma miich. Miich c'm jëbi myajtiy, e mnejhuñhuip tüg'óciy je tiy'ajt jadu'n nej ich ajcxy yi' ti nxëy.

⁹ E je judíojäy ajcxy huidi anajty jim gobernador yhuinduu, ac jadu'n ajcxy yminaangixy co yjanchity jadu'n nej Tértulo ymina'ñ. ¹⁰ Huin'it je gobernador tiy'ajt moy Pablo c'müd co huen capxy, chi Pablo yminañ:

—Janch jotcujc jëbi nayñigapxtüdyijich ma miich Félix, com nejhuñyibich co miich mijtungmüd ma jada naax cayp cham xii jimijti ñicxni. ¹¹ Miich c'm jëb mnejhuñy je tiy'ajt, jëyi anajty ñimajcmetzxijy maabi anajty nbättigëyich jim Jerusalén Dios ojadajtpi. ¹² Ca' ich yi' ajcxy xypaty ndzipcapxy n'ahua'ngapxyich müd pinjaty. E ni ich ngajäy'axiigëy ngajäy'agapxëy ma Dios ytijc, etz ni ma naymujctac etz ni ma Jerusalén cayp. ¹³ Jada jäy ajcxy ca' ajcxy müdity pinjaty tiy'ajt yegipy nej ich yi' ajcxy yxëy. ¹⁴ Huidi janch ngapxypidzihibich ma miich jadu'n nej je tziinaayin, je jemybi xpijcin huidi bi yi' ajcxy ytijpy ca' y'óyity, je' je' je xpijcin huidi ich müd n'ojadajtpich Dios, je Dios huidi ich ajcxy nmij'ap nmijteedy y'ojadajt. Nmibijcpiych tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxëybi ñecy. ¹⁵ Nañ nmibijcpiych co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycixpi naymijottigoyijich co njothuinma'ñich huadz ooy nmüd'idipyich ma Dios etz ma jäy.

¹⁷ Canaag jimijti ich anajty ti nhuidityich huingduum, chi nhuimbijtyich ma ich ngajp limosna cuejtp etz nhuindzigëhua'ñich anajty Dios. ¹⁸ Jadu'n ich anajty nduñ co nijëjity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybo-cyñihuächyijich, ti anajty nguyduñich costumbre, ca' anajty mayjäy pin yhua'ñ yjihuñy. ¹⁹ Je jäy ajcxy huidi xy'lijxyich ma Dios ytijc, je' ajcxy ixipy ti ymiingixy ya

tiy'ajt yecp. ²⁰ Co ca' ajcxy ti miñ, huen jada jäy ajcxy huidi ya nigapxcixy pen ypaat ajcxy nbocych je taabi ajcxy xytiyduñich ma judío jäy tungmüdpí etz huinmij'anäctijc ajcxy ñaymujci. ²¹ Jëyi co ich mic ngapxyich juntijoty, chi nminaañich: “Xytiydumbich miich ajcxy cham müd co nmibicyich co Dios yajjugypigipy pinjaty ti y'ocy.”

²² Co Félix jadu'n midodaay, com ñejhuiydaayb anajty nej tüyöy je mibijcpijic y'ayuc yhuinma'ñ, chi capx-hui'my je ayuc, nimay ajcxy:

—Co anajty miñ je comandante Lisias, huin'it njacnejhuiydähuibich nyajtiydgëhuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixëhuip co pidzim tibiñ tibäy e pen ji ymügügtijc miñ co'ixëhuñyii, huen möyii huidi yajmayajtpy.

²⁴ Ti anajty xii ñajtzñicxëyñi co Félix jadüg'oc miñ müd ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miñ müdmiydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tziñäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigëy, yminañ:

—Nixx miich jadachambi, co ich anajty xyñibadëyigixy huin'it nicxy nyajhuooyii.

²⁶ Nañ jadu'n Félix y'ahuijxy anajty mina Pablo y'ocmeeñymöyii, e huin'it anajty najtmadzëhua'ñ. Paady anajty janam jadojic nicxy yajhuoyii, e müd miydägy anajty. ²⁷ Mejtz jimijti jadu'n yjaty, huin'it Félix ygobernadorbidzimy. Chi Porcio Festo ygobernador tigüy ma Félix anajty ytuñ. Co Félix anajty nayyajhui'ma'ñyii ooy müd je judíojäy ajcxy, paady ixmajch Pablo mach.

Pablo ma Festo yhuinduu

25 Jadu'n yjaty co Festo anajty ti ygobernador tigüy, chi codugüg xii choñ Cesarea, ypättigüy Jerusalén. ² E jim Jerusalén je teedy mijtungmüdpí etz nijëjity huinmij'anäctijc jactimxëy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nicxa'ñ janch tim tzojc jim. ⁵ Chi ajcxy nimay:

—Jëbi nijëjity miich ajcxy mdungmüdpidijc etz huinmij'anäctijc quipxy nixëibich müd ich. Pen ti je Pablo ytundigooy jëbi miich ajcxy mxëy jim Cesarea.

⁶ Festo jëyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom ñicxy ma tiydundac, huin'it capxyñiguejxy Pablo co huen yajminyii.

⁷ Co Pablo ytigüy ma tiydundac, chi mic'amy je judíojäy ajcxy yjübigyidäy huidi anajty ti choongixy jim Jerusalén. Chi ajcxy oxyxëy Pablo co mij anajty ti ytundigoy. E ca' ni ti tiy'ajt ajcxy migüëxëy. ⁸ Chi Pablo ñaygogapxi yminañ:

—Ich ca' ni ti ndundigooyich, ni ngamidundigooyich yi judío jäy ycötújcín, etz ni ngamidundigooyich Dios

ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimyajcömaya'ñ ma judíojäy ajcxy, chi y'amidooy Pablo:

—¿Nej mnicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cötujctac huidi je romano co-dung y'ane'myb e ma jëbi yajtiyduñich. Yajxon miich mnejhuüy co ca' ti ti ndundigooyich ma yi judíojäy ajcxy. ¹¹ Pen ti ndundigooyich huidi jëbi co'ögüyich, ca' nminá'ñibich co ñich ca' n'öga'ñ. Pen ca' ji ni ti tiy'ajt jadu'n nej yi' ajcxy ti xyxüyich, ni pin cötújcín camíidity nicxy xycüyeyich ma yi' ajcxy. Ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday miid ymidungmídpi, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycötujctac, nguexüpyich miich jim. Miich ti mbijctzoy co je emperador xytidyduna'ñ. Pis jim mnicxüpy miich.

Pablo ma je rey Agripa yhuinduu

¹³ Chi yi xü tiempo ñajtzñinicxüñi co je rey Agripa etz Berenice ycidacy Cesarea, cogapxühua'ñ anajty Festo.

¹⁴ Co ajcxy jim yhuäcxüpy canaag xü, chi Festo yajmiidmíydacy je rey Agripa je Pablo ayo'n, e nimay:

—Ji tüg yëydijc huidi Félix y'ixmajtz mach. ¹⁵ Co n'oyich jim Jerusalén, chi je teedy mijtungmídpi etz judío mij'anäctijc xymixüyich, nibijctzohüy co Pablo nyaj'ögüibich. ¹⁶ Chi n'adzooyich co romanojäy ca' cötújcín jadu'n miidity nicxy yaj'ögy yi machyjäy ma ca'ni ñayhuindináayigixy miid je huidi miid ñayxüyü, jigix ñaygogapxüyb nej anajty ti xyxüyü. ¹⁷ Paady co je judíojäy ajcxy y'oy ya ca' nigoob tiempo nyajtigooyich com jabom nnicxüch ma ngötujctaacich, e nni'ane'mdüyich co huen yajmiñyü je Pablo. ¹⁸ Co ajcxy ñayguëxi'ci, je huidi anajty ti xüy, ca' jac ni ti ayuc anajty ajcxy miidity jadu'n nej ñich anajty ti ndijyich. ¹⁹ Jëyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxü co je Jesús huidi o'c, juugyñi je'.

²⁰ Com ñich ca' nnejhuüy nej ndunüpich miid jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatiyduñich miid jadaayaabi ycixpi. ²¹ Pablo cí'm minañ co nigü oy yajtiydunüpy jim ma je emperador huidi ane'm jim Roma. Chi nni'ane'mdüyich co huen jacmach'ñäy, ixti cooni nguexüpyich jim Roma ma César.

²² Chi je rey Agripa yminañ:

—Nañ ooy ñich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miñ Agripa etz Berenice miid mayjäy etz xuuxpidijc, chi ytigüy ajcxy ma tiydundac miid je soldado huindzin ajcxy, etz huinmij'anäctijc. Chi Festo capxyñigüejy co huen Pablo nicxy yajtzonyü. ²⁴ Chi Festo yminañ:

—Rey Agripa, etz tüg'öcy mij'anäctijc huindzindijc huidi ya ti mnayyöymüjcgixy miid ñich ajcxy, cha je' je yëydijc huidi oy yi judíojäy ti xyxüyü ma ñich. Xymixüyich jim Jerusalén, e nañ ya Cesarea, e jatymyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti cí'm ñayñibijctzohüyü co jim yajtiyduna'ñ ma je emperador jim Roma, paady ti n'a'ixüyich co nguexaañich. ²⁶ E com ca' ni ti tiy'ajt nej nijayñibich nhuindzinich, je emperador César, miid yi' ycixpi, paady nyajmiñich ma miich ajcxy, etz tim jayijp ma miich mhuinduu, rey Agripa, jigix jëbi m'amido-huipy e nmiid'idüpyich ti ii njäayibich. ²⁷ Ca' jadu'n y'öyüty nicxy nguexüyich tüg machyjäy jim ma je mij'ane'mbi e ca' ni ti tiy'ajt miidity nej ti xyxüyü.

Pablo nimiydägy nej anajty yjatyin ma je rey Agripa

26 Chi je rey Agripa nimay Pablo:

—Jëbi cí'm mnayñimíydägyü.

Chi Pablo yujcxajy yci' e ytigüy nayñigapxtuutip, yminañ:

² —Jotcujc nayñihuüyüjich, co jëbi nmiydägyich ma miich, rey Agripa, jigix nayñigapxtüdüybich tüg'öcy jadu'n nej judío jäy ti xyxüyich. ³ Com miich mnejhuüyü yajxon nej judíojäy ajcxy yhuinma'ñ miidity, etz tijaty tzip yi' ajcxy ymiid, etz jadu'n nej yi' ajcxy y'ixpüjcin oy ñay'ixquüipxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'öcy judíojäy ñejhuüyü nej ti ndzinäyich ma yi' ajcxy jim ma nnaaxjotich etz jim Jerusalén maabi nyecpidzimyich. ⁵ E yi' ajcxy ñejhuüyü nañ jadu'n, e jëbi nigapxcixy jadu'n nej ti nyujcyecpi'atyich. Hue' naydi-jyüjich anajty fariseojäy, je tügpüpyü jäy huidi mictägy je judío jäy ycostumbre etz ycötújcín payöyü. ⁶ E jadachambi xytidyduñich miid co njijp'ixyich co Dios yajjügypiga'ñ yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpcüpyü Israel ymang y'ap y'oc y'ahuijxpyü mina Dios cuyduna'ñ nej anajty ti yajnimäyü je' ajcxy ymij'ap ymijteedy. Paady ajcxy Dios ojadaty huindzigüy xim tzuum. Miich, rey Agripa, nmibicyich co Dios yajjügypigüpyü je jäy tiibi y'öccixy, paady ycixpi yi judíojäy yxüyich. ⁸ ¿Na'amy co ca' miich ajcxy miibiga'ñ co jëbi Dios yajjügypicyü je tiibi ajcxy y'ögy?

Nej anajty Pablo jayijp'aty miibijcpidijc ixhuidity pahuidity

⁹ Jecyü ñich hue' ndijyich oy nduñich co anajty ndzachmidzip'adyüjich je Jesús je Nazaretpü. ¹⁰ E jadu'n nduñich jim Jerusalén. Miid je teedy mijtungmídpi ycötújcín nbidaacich Jesús yjäy may pujxtigoty. E co ajcxy yaj'o'cy, nañ nigapxpejt ñich co huen yaj'öccixy. ¹¹ E nnicxyich anajty majaty judío ñaymujctac jim ndza-achytuñich huidi ajcxy mijpidacp anajty Jesús, jigix ajcxy y'ixmadzipyü je' ymiibüjcin co Jesús je' je' je Cristo.

Nīgi anajty nmijotmätcootyich ixti nbahuidijttacyich huingnaax huinggajp.

Pablo nimiydägy jadüg'oc nej yjothuimbijty

¹² Mïid yi jadu'mbi huinma'ñ nnicxyich anajty jim Damasco. Je teedy mijtungmiidpi anajty xyquejxpich, e xymöyich anajty cötújcín. ¹³ E tü'am, señor rey, ñich anajty nicxy, cujc xii anajty co n'ijxyich tügi tñcxin jacmic ca'ydi xii ytñcxin chooñ tzajpjoty, xyñigidacyich etz nañ jadu'n huidi anajty ajcxy xymiidnicxich. ¹⁴ Huin'it nidüg'óciy ñich ajcxy ngidaday, e nmidooyich tüg ayuc xymigapxich mïid hebreo y'ayuc, xyñimäyich: "Saulo, Saulo, ¿nej co chach xypahuidijttägyich? C'i'm nayyajtzaachyïi jadu'n nej huaj yuub co jïjpconebÿ huidi mïid ñumygyumii." ¹⁵ Huin'it n'adzooyich, nni-maayich: "¿Mbin miich Huindzin?" E je Huindzin xyñi-maayich: "Ñich je' Jesús je huidi miich mdzachpahuidijttacpy. ¹⁶ Pïdëg e tinaaygugi', com ti nnyguëxigiyijich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuïy, etz jadu'n nej jïini njacyaj'ixa'ñ njacyajnejhuïhua'ñ. ¹⁷ Ñich miich nnihuänip nyajtzögip ma yi judíojäy, etz nañ ma huidi ca' yjudíojäyity. Ñich miich jim nguejxpy ma huidi ca' yjudíojäyity. ¹⁸ Nicx jim myajhuinjihuïygyixy ñich ndiy'ajt, huen ixmach ajcxy yi jibic-huinma'ñ e jadu'n ypidzimipy ajcxy ma je mujcu' y'ané'migixy, etz mijnicxpedipy ajcxy Dios ytiy'ajt. Co ajcxy mibigipy mijpidägipy ñich ndiy'ajt huin'it nmöhuibich tigiydac tzajpjoty ma yi oyjäydijc ity tñbi Dios ya-pocyñihuächyïi."

Pablo cuyduñ nej anajty ti y'ijxmañiyin

¹⁹ Rey Agripa, jadu'n ti ngapxymidooyich huidi n'ijxich nmidoohuich tzoon tzajpjoty. ²⁰ Jayijp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huidi ca' yjudíojäyity. Nyajnimáaygixyich huen jothuimbijtcixy, huen mibijcixy Dios y'ayuc ytiy'ajt, etz huen yajtungixy oyjot oy-huinma'ñ jigix ñiguëxigipy co ti yjothuimbijtcixy. ²¹ Mïid jada ycixpi xymajchich ajcxy je judíojäy ajcxy ma Dios ytijc, e xyaj'ögáangixyich anajty. ²² Mïid co Dios ti xypubety ti xypudigiyich cha nyajpaadyich juugy. Ngapxhuäcxich Dios y'ayuc ytiy'ajt ma tüg'óciy ay-oobtijc etz ixpicytijc. Tüg'óciy huidi ngapxpyich je Dios y'ayucnajtzcapyiïbi jaay jecy'ajty, etz je Moisés nañ jadu'n jaay jecy'ajty co jadu'n ytuna'ñyïi yjada'ñyïi. ²³ Hue' yajmina'ñ co je Cristo copicy ayo'n tzaachypï ya-jnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcaxhuäcxip je ayuc ytiy'ajt ma ñich ajcxy judíojäy, etz ma huidi ca' yjudíojäyity.

Pablo jahueeni cayajjothuimbijty Agripa

²⁴ Co Pablo jadu'n yminañ ma anajty ñayñigapxtüdyïi, chi Festo mic minañ:

—¡Mlocjïyb miich Pablo! Mïid je ixpñicín nīgi m'ahuimbity loci.

²⁵ Chi Pablo y'adzooy:

—Ca' ñich nlocijïy, miich mijtungmiidpi Festo. Yi huidi ñich ngapxpyich je' je' tiy'ajtïp etz janchip. ²⁶ Yi rey Agripa ñejhuïydaayb yi' tüg'óciy jada, paady nmidydagich aamic jotmic ma yi' yhuinduu; com nnejhuïybich co yi' ñejhuïydaayb jada tüg'óciy, com canan hue' jada yajtu-uñ yajmiydacy ayüchytuum. ²⁷ ¿Nej mmibijcpy, miich rey Agripa, jadu'n nej ajcxy yminañ yi Dios y'ayucco-jaaybi? Nnejhuïybich co miich mmibicy.

²⁸ Chi je rey Agripa y'adzooy, yminañ:

—Janch tim jayinjaty jahuenjaty miich xycayajmibi-cyich Jesucristo.

²⁹ Chi Pablo yminañ:

—Oy yjayinjaty yjahuenjatyity ooy mijcayee mgamibicy, chojcpy Dios co miich mmibigipy Jesucristo etz nañ jadu'n tüg'óciy jäy huidi cham xy'amidoo'jtïp ñich n'ayuc. Dios chojcpy co mmibigipy Jesucristo jadu'n nej ñich nmibicyich, jëyi janchtiy co ca' mmach'idipy jadu'n nej ñich nmach'ityich.

³⁰ Co je Pablo ymiydactay, chi je rey etz gobernador ytinayigy quipxyi mïid Berenice etz jacjadyïi huidi anajty ajcxy jim. ³¹ Chi ajcxy ahuingujc oy capxyögyixy Pablo ypocy, ñayñimáayigixy miñ xyipy:

—Jada yëdyjc ca' jada ti tundigoy, ca' ypadyïi nicxy y'ögy, ni ca' ypadyïi nicxy ymach'ññäy pujxtigoty.

³² Chi Agripa nimay Festo:

—Jëbi ixypy nnajtmadzïyïm Pablo co ca' c'i'm ycanayñibjctzohuïyi co huen tiydunyyïi je emperador César jim Roma.

Pablo yajnicxi jim Roma

27 Co ajcxy yajnihuinmayïy co xyquexángixyich jim Italia, chi Pablo yajcïyeyc mïid jacjadyïi machyjäy ma tüg capitán huidi anajty yxii Julio, je' huidi nihuindzin'ajtp tügpicy soldadtijc huidi anajty yxii batallón Augusto. ² Chi ñich ajcxy ndigiy ma tüg barco huidi yhuindzin cogajpïp jim Adramitio. Je barco hue' anajty ñicxa'ñ ma nijëjity barco jättac jim Asia ñaaxjot. Chi ñich ajcxy ndzooni. Mïid ñich anajty ajcxy Aristarco huidi anajty cogajpïp Tesalónica jim Macedonia. ³ Com jabom ñich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzi ytu' co huen nicxy co'ixïy ymügügtijc, etz huen je' ajcxy yajcayïi yaj'ügyïi. ⁴ Co ñich ajcxy ndzooni jim Sidón, chi je naax mejy'agujcpi yhuimni anajty'amy huidi yxii Chipre, mïid co je poj anajty jïjpcobojïy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán ñich ajcxy xyajbarcotigïy. ⁷ Canaag xii ñich nyöy janch oñdägy, adzaach ñich ajcxy nja'ty mihuingon je Gnido co anajty je poj tzach jïjpcobojïy je barco. Najx ñich ajcxy mihuingon Salmón, etz njüyöy'ahuïdijtyich ajcxy Creta je mejy'agujcpi naax. ⁸ Adzaach ñich ajcxy nja'ty ma barco jättac huidi anajty yxii Buenos Puertos, mihuingon Lasea.

⁹ Ti ñich ajcxy ooy anajty nx#digoy, e ooy anajty ycodzigijity je barco yajyöy#i. Ti anajty je ayuux#i ñajxni, e ti mihuingon anajty je poj tuu tiempo huidi jäy ytiipjy invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' yjegyty co nicxy ndigooyim miid barco etz miid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ix-aangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ix#yib ma x#pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yajty co je j#nboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidëgy je mij pujx huidi barco yajtinayxijp, e yajyöy-chooñ je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je micpoj miñ ma t#chpoj pidzimy, huidi jäy ytiipjy Euroclidón, jadu'n yhuimb#dzim, Noreste. ¹⁵ Chi je mic poj yajtütigajch je barco, e com ca' anajty ndimdüyöygiñi miid je poj ycixpi, chi je mic poj ñich ajcxy xyajnicxy adzip ma anajty tzocy. ¹⁶ Najx ñich ajcxy mihuingon tüg naax mutzpi mejy agujcpi huidi yx#i Clauda, e adzaach ñich ajcxy nyujcjugujcy je mutz barco huidi anajty miimb ixhodzëy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtzmuicy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chig#yigixy co chim-nicx#yib je barco jim ma mejy huidi ca' y'agomity, ma p#jot huidi yx#i Sirte. Chi ajcxy ñayyejci huen poj yajñicxigixy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midug#ig x#i#i, chi ñich ajcxy nmejycöjibijptay je tungbejt huidi yajtumyib ma je barco. ²⁰ Ti anajty canaagx#i ñajxni e ñich ajcxy ca' ma x#i madza' n'oc'ijxcixni, miid je mij poj ycixpi huidi anajty ñich ajcxy xychachyajtüyöyp. Hue' ñich ajcxy ndijcixy co ti ndigöoyigixyich, ca' ndijy ñich ajcxy ndzögipy.

²¹ Ti anajty x#i tiempo ñich ajcxy nyajnajxcixy jaygay, chi Pablo ytinayëgy, nimay je jäy ajcxy:

—Yëydijctijc, co ñich miich ajcxy xycacapxymidoy ca' ngatzoönim jim Creta ñaaxjot, e ca' ixypy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³ Amygoodz je nHuindzin Dios tüg y'ängel ti ñayguëxëgyii ma ñich, je Dios huidi ñich ngapxymidooybich, y' ti quexy. ²⁴ Je ängel ti xyñimäyich: "Ca' mdzigëy, Pablo, copicy co mjatyjädiipy ma je mij'ane'mbi, je César yhuinduu. Miid miich ycixpi, Dios ñihuänamy yajtzögamy tüg'öciy huidi ji barcojoty, ca' ni tüg y'ögipy." ²⁵ Paady nayjot'amijmóoyigix, yëydijctijc, nmibijcpiych Dios co jadu'n yjada'ñ jadu'n nej y' y'ängel ti

xyñimäyich. ²⁶ Ooy ycopicyty nicxy nmijpojpejtim ma tüg naax mejy agujcpi.

²⁷ Majmactz x#i je mic poj anajty yajyöyii je barco oyñinej jim ma je mejy huidi yx#i Adria, chi mijcutz je barco yajyöybi jihui'ñybijcy co anajty ti mihuingoñ naax. ²⁸ Chi ajcxy quipxy je ñi jadu'ñi anajty ycicyty, e hue' ajcxy quipxy iipx xap ycicyty. Jahuengi huin'it jadüg'oc ajcxy quipxy je ñi, e hue' oy quipxcixy majmoxc xap ycicyty. ²⁹ E co anajty chig#yigixy co tijy je barco jijpcobon#huipy ma tzaagop, chi ajcxy pidacy ñijoty m#daax pujx ma barco y'ijx, je huidi yx#iijp anclas, janch tzig#yib anajty ajcxy y'ahuixcixy cooni x#im#huipy. ³⁰ Chi je' ajcxy huidi anajty barco yajyöyp yhuinma'ñybaty co yquëga'ñ ameech. Chi ajcxy pidacy ñihuing#xy je mutz barco. Chi ajcxy ñayb#daaci jadu'n nej jihuiy je ancla jac yajminagaangixy jim ma barco yhuinduu. ³¹ Huin'it Pablo nimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

³² Huin'it ajcxy tzujctujcy je tzaay huidi je mutz barco anajty miid ycoxochity, chi ajcxy yajcäy je mutz barco ñijoty, e chi je mejy yajnicxyi.

³³ Moñy Pablo migapxy je jäy ajcxy, chi ajcxy nimay co huen huingayñajxcixy, chi Pablo yminañ:

—Cham majmactz x#i ma miich ajcxy ca' mmaagixy, e ni ca' mgaaygixy m'uuccixy. ³⁴ Tun may'ajt caaygixy oy jadu'ñy, copicy jada co njatyñidzooc#huaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conëgy, chi jayijp Dioscojuyip yajnajxy mayjäy agujc, chi tujc-huäcxy etz ytig#y ajcxy caaybi. ³⁶ Mic'amy je jäy ajcxy yjotmigiyday nidüg'öciy, e chi ajcxy ytig#y caaybi.

³⁷ Hue' anajty ñayb#aatigixy barcojoty mejtz migo'px jatugi'px majmoxctüg jäy. ³⁸ Co ajcxy ycayday, chi jac-n#göjibijpy je trigo, jigix huen cöminacy je barco chimy.

Chi barco tüg yquñ

³⁹ Co yx#im#y, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegëy, e jim anajty p#jot. Chi ajcxy yhuinma'ñybaty co'ixaangixy pen jëbi jim yjäty je barco. ⁴⁰ Chi ajcxy tzujctujcy je tzaay huidi anajty miid yxochity je anclas, e chi anclas yhuim#ni ñijoty, huin'it ajcxy miguej#y je ñiigaap huidi tumb co t#möy je barco. Chi huit jadüg'oc ajcxy pidacy huidibi pojmajtzp. Chi je barco ytig#y yöyb, tiy ajcxy yajnicxy ma p#jot. ⁴¹ E chi oy minaybadyii ma anajty je mejy mejtz it oy mic ycujiñ, chi oy yjëpxy p#joty. Je barco ijy oy ytig#y tätzpicy ca' huaad y'ocyücxni, e je barco ijy oy ytig#yñ aguejthuäcxpi ymiid je mejy p#joty ymijaa. ⁴² Chi je soldado yajaj'ögaañ je machyjäy ca'ydi yqueeccixy ayaahuip. ⁴³ Je soldado huindzin ca' a'ix#y nicxy yaj'ögyii Pablo, chi nimay soldado ajcxy co huen ixmajtcixy y' machyjäy. Chi je soldado huindzin nimay je jäy ajcxy co huen ñidig#yigixy pinjaty jajtp yau. ⁴⁴ E huidi ca' jajtciy yau jaydëbi ñidig#yigixy miid pu'y etz

míid barco pedasi. Jadu'n ajcxy nidüg'óciy ymejy ypidzimday.

Pablo yjädý ma tüg naax mejy'agujcpi huidibi yxii Malta

28 Co ñich ajcxy niibidzimday, chi ñich ajcxy nejhuiy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ míid ñich ajcxy, chi ajcxy yajmijiiy jün mij, míid co anajty ooy ytichity, etz co anajty ooy ytuubojy. Chi xyñimay ñich ajcxy co miñ n'ocxáamgixyich. ³ Chi Pablo ytigiiy jäxycajpmujcpi, e chi pidacy jünjoty. Chi tüg ahua'n iyujc pidzimy, yquëgy anajty míid je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc ytiiyñäy ma Pablo yci', chi ajcxy ñayñimaayi miñ xyipy: —Jadayaabi yëdyjic, jäy yaj'öcpi jada. Oy ca' ti y'ögy mejyjoty, je tydumbi tzajpjoty ca' a'ixiy nicxy yjactzinäy. ⁵ Chi Pablo yci' huinxidicxy, e jünjoty oy ycäy je ahua'n iyujc, e ca' Pablo ni nej yjajty. ⁶ E tüg'óciy je jäy tzach'ahuixcixy mina anajty y'ocquixigy, o mina anajty y'oc'ögy. Ti anajty ooy y'ahuixcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' y' tüg dios. ⁷ E mihuingon anajty je Publio ytijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich ñich ajcxy yajxon tugig xii. ⁸ Jadu'n yjajti co je Publio anajty yteedy ypiyii míid tooy gohuajc etz míidity anajty ni'pypa'm. Chi Pablo oy ixy je pa'mjäy. Chi Pablo Dios mibijctzoy, e chi cñixajy, e yajtzoocy. ⁹ Míid jadaay miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ Míid jada ycxipi nyajcömay ñich ajcxy, e nyajmooyich ñich ajcxy tijaty huidi ñich ajcxy nidüyöyipy barcojoty.

Chi Pablo oy yjädý jim Roma

¹¹ Tugig po' ñich ajcxy anajty ti n'ijtni jim. Chi ñich ajcxy nbarcotigiiy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymíid anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ñich ajcxy oy njäty ma je barco jättac huidi anajty yxii Siracusa. E jim ñich ajcxy nhuimiiy tugig xii. ¹³ Ndzoñich ajcxy Siracusa barcojoty, nicxy ñich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jünboj, chi co maax oy nja'ty ñich ajcxy Puteoli. ¹⁴ E jim ñich ajcxy nbaaty nijëjity jäy huidi anajty mijpidaacp Jesús. Je' ajcxy xycohuaniiyich co ñich ajcxy jim huimiiy tüg semaan. Chi ñich ajcxy jadüg'oc ndzooñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co ñich anajty ajcxy jim nicxy, chi ajcxy chooñ nijëjity oy xyjijpcobadiiygixyich ma je cajp mercado míid huidi anajty yxii Foro de Apio. Jacjadyii mibijcpidijc oy xyjijpcobadiiyich ma tüg jättac huidi anajty yxii, Tres Tabernas. Co Pablo jijpc'ixiiy je mibijcpidijc ajcxy, chi

Dioscojuyip yajnaxy etz ñayjihuiiyi janch jotcuyc. ¹⁶ Co ñich ajcxy nja'ty jim Roma, chi je soldado huindzin cäyeyjy je machyjäy ma je comandante, per a'ixiiyb co Pablo tzinäy ahuingujc ma tüg pijctzoydjic, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugig xii maabi Pablo anajty yjätý jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ñich ca' ti ndundigooyich míid judío jäy ajcxy etz míid ajt nmij'ap nmijteedy ycötújcín, chi je judíojäy ajcxy xymajchich etz xycäyjcich ma romano tungmíidpi jim Jerusalén. ¹⁸ Co je romano tungmíidpi ajcxy xy'amidooyich, huin'it ajcxy xyjanajtmadzihuaañich, ca' ti ajcxy paaty ma ñich huidi ajcxy xyajco'ögihuibich. ¹⁹ Co je judíojäy yjotmätcoty ajcxy, ca' ajcxy a'ixiy co nyajnajtmadzihuibich, chi nayñibijctzohuiiyich co nyajtydunipyich ma je mij'ane'mbi ya Roma, oy ñich ca' ti xihuin nmíidity míid ñich nmigonaax nmigogajpich. ²⁰ Paady ti ngapxyñiguejxcixy co nyajmíidmiydäga'ñ ajcxy tigíx co nmach'ityich. Míid co ñich ajt n'ahuixim co Dios nihuäna'ñ yajnidzöga'ñ y' Israel jäy etz yajjugypiga'ñ je jäy tiihi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ñich ajcxy ni ti necy xyñijäty huidi tzoomb jim Judea míid miich ycxipi. E ni tüg ajt nmigügtijc ca' jibic xyñimiydägy. ²² Nja'amido'idaamyich jadu'n nej miich mmiydägy, com nnejhuiybich co huen yma'ámyity jäy ymidzip'ajty je jemybi y'ijxpjicín.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac míidity. Jopy ajcxy yajtzondacy capxii miydägi ixti ycootztzuu'iiy, jadu'n Pablo tzachyajnimaagyixy je Dios y'ayuc nej Dios yhuinma'ñ míidity. E yajjothuimbidaangixy anajty ma je Jesús míid co capxticxy je Moisés ycötujcín nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbijc ajcxy nej Pablo anajty yminañ, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügiiy yhuinma'ñ, chi ajcxy ixy ca'ixy yöychóongixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Miich ajcxy oy mjamidohuiy n'ayucich, per ca' ajcxy mhuinjihuñhuip; oy mjahuindñicxixipy, e ca' ajcxy mhuinjihuñhuipy.

²⁷ Com jada jäy ajcxy hue' yjot'ahuimbijctcixy janch juuñ, e ymidoogixy oyñinej, jadu'n nej jihuiy yhuimbídz'ijtcixy, e ni ca' y'oc'ijxcixy míid yhuin e ni ca' ocmídoogixy míid yta'tz'ac, ni ca' huinjihuñgyixy míid yjot yhuinma'ñ, ni ca' minipy ajcxy ma ñich jigix myajtzögibich.

²⁸ Nejhuñgyixy miich ajcxy co jadachambi etz jacnicxpi xii tiempo Dios y'ahuñiyb y'ayuc ytii'ajt nej jëbi jäy y'alma ajcxy yajnidzögipy ma je jäy ajcxy huidi ca' yjudíojäyity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ñibéjtigixy ñayhuingapxpéjtigixy miñ xyipy.

³⁰ Pablo mejtz jimíjt jim chinay ma je pijctzoydijc jim Roma, e yajxon xiic'adzoy capx'adzoy pin miñ yco-

gapxëyii. ³¹ Janch agujc jotcuyc anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyii.

ROMANOS

1 Ich Pablo tumbich ma Jesucristo ytung. Jesucristo ti xyajni bicyich co nduna'ñich ma yi' ytung quipxy miid yi' y'apóstol ajcxy. Ti xypidägyich ma jada tung tüggijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucna-jtzcapxiybi ñecy co quexa'ñ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinix paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjhuñ'ñ ymic'ajt. Co Dios yajjugypjcy y'ung ma anajty ti y'ögy miid yjhuñ'ñ ymic'ajt, chi ti yajnejhuÿ anajty je naaxhuiñjy co Jesucristo hue' je' Dios y'ung, huidibi miid huädz yot huädz yhuinma'ñ, etz nañ ymiid Dios yjhuñ'ñ ymic'ajt. ⁵ Co Dios yajjugypjcy Jesucristo ma anajty ti y'ögy, chi mijmay'ajt tuñ miid ich ajt ycixpi. E nañ miid Jesucristo ycixpi Dios ti xyajni bicyich co ngapxhuäcxibich yi' y'ayuc ytiy'ajt ma yi' mayjäy ajcxy ma tüg'óciy naax cajp, jigix jébi mayjäy mibijccixy e nañ capxymidoogixy Jesucristo. ⁶ E miich ajcxy huidibi tzinaayb jim ma yi' cajp huidibi xijip Roma, nañ jadu'n Dios miich ajcxy ti xyhuin'ijxcixy jébi ajcxy Jesucristo xyjäy'adyii.

⁷ Jada necy nguejxypich ma miich ajcxy nidüg'óciy huidibi jim yajpatcixp ma yi' cajp huidibi xijip Roma. Dios miich xychojccixp xyjhuÿygixp, e nañ Dios ti xyhuin'ijxcixy jaydëbi yi' xyjäy'adyii, etz nañ jaydëbi mdzinaaygixy miid huädz mjot huädz mhuinma'ñ. Huen ich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz nañ xyajjotcugihup ajcxy.

Pablo nicxy mibijcpidijc cogapxhúa'ñ jim Roma

⁸ Tim jayjip nyajnajxpich jäygidacín ma Dios, miid Jesucristo yxñ, co miich ajcxy ti mmibijccixy Jesucristo. Mayjäy ma nidüg'óciy naax cajp ti nejhuÿygixy jadu'n nej miich ajcxy ti mmijpidaaccixy Jesucristo. ⁹ Ich tumbich cixyot huinijot ma Dios ytung, co ngapxhuäcxich Dios y'ayuc ytiy'ajt miid Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich miid miich ajcxy ycixpi. ¹⁰ Dios nmibijctzooyibich pen yi' jadu'n tzojcp co jébi nnicxyich cham tiempo jim ma miich ajcxy myajpaady. Canaag'oc ich miich ajcxy nicxy nja'ixaangixy, e ca' y'oyÿy nej nícxibich. ¹¹ Ooy njani-jot'atyich co ich miich ajcxy nicxy n'ixaangixy, jaydëbi ngapxhuäcxibich Dios y'ayuc ma miich ajcxy miid Dios yjhuñ'ñ ymic'ajt, e nañ ngapxhuäcxibich Dios y'ayuc

ma miich ajcxy jaydëbi tiydudägy mmibigipy ajcxy Jesucristo. ¹² Pen oyÿyb nej nícxibich ma miich ajcxy myajpaady, chi jébi njotcugihuyich co anajty n'ixyich nej miich ajcxy mibijccixy Jesucristo, e nañ jaydëbi njotcugihuyipy miich ajcxy co anajty m'ijxcixy nej ich nmibicyich Jesucristo, e jadu'n nayyajjotcugihuyim miñ xyipy.

¹³ Ndzojcpich co miich ajcxy mnejhuÿipy co canaag'oc ti njapidägyich nhuinma'ñich co anajty nnicxa'ñich ma miich ajcxy myajpaady, e ca' y'oyÿy nej nícxibych. Njijp'ijxypich co oyÿhuip jadachambi tiempo jadu'n nej jébi nnícxibych jim ma miich ajcxy. Com njacyaj'ixpigaamybich miich ajcxy, e nañ njacyajmibi-gaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jäy huidibi ajcxy ca' yjudíojäyity. ¹⁴ Dios jadu'n xyajni bicyich jada tung, paady copicy co ngapxhuäcxibich yi' y'ayuc ma tüg'óciy jäy, etz majaty naax cajp. Ngapxhuäcxamybich Dios y'ayuc ma yi' jäy ajcxy huidibi griego ayuc cápcixp, etz ñan ma yi' jäy ajcxy huidibi ca' griego y'ayuc capcixy. Ngapxhuäcxamybich Dios y'ayuc ma yi' ixpicy jäy ajcxy, etz nañ ma yi' jäy ajcxy huidibi ca' y'ixpicyity. ¹⁵ Paady ycixpi ooy ndzachcapxhuäcx'a'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo'yduyijich Cristo y'ayuc ytiy'ajt. Com je' jada je oybi ayuc huidibi tzoon ma Dios, ymiid yi' Dios ymic'ajt jigix jébi tüg'óciy jäy ajcxy paadipy pocy huinmeecxin, pinjaty cöbigaamb Cristo y'ayuc. Tim jayjip ti ngapxhuäcxxy Jesucristo y'ayuc ytiy'ajt ma yi' judíojäy ajcxy, e jac'axam ma yi' huidibi ajcxy ca' yjudíojäyity. ¹⁷ Jesucristo ytiy'ajt xyajnejhuÿiyim co nmibijcím co Cristo ti jöch ajt nbocy etz nxñhuin, chi Dios xycöbiganim jadu'n nejjuÿy tudägyjäy. Ca' ji jadüg huinma'ñ nej Dios jébi xycöbñjim jadu'n nej jihuÿy tudägyjäy. Com jadu'n jaybety y'ity ma Dios ñecy ma jadu'n yminañ: "Pinjaty tudägy'ajtin ti paady miid co ti mijpidägy Dios y'ayuc, hue' je' tzinähuy, ca' yjugy'ajtin ycixipy ytigoyipy."

Je naaxhuiñjy ajcxy ypocy

¹⁸ Copicy nbaatim tudägy'ajtin ma Dios, com je Dios huidibi tzinaayb tzajpjoty ti xyajnejhuÿiyim co yi' tzaachytuna'ñ mictägy tüg'óciy jäy ajcxy huidibi midundi-gooyb yi' ytiy'ajt, tüg'óciy huidijaty jibic huinma'ñ ymiid, tüg'óciy yi' ajcxy huidibi yajtigooyb Dios ytiy'ajt miid je jibicpi huidibi ajcxy ytumyb. ¹⁹ Com yi' jäy ajcxy

huidibi jibicjot jibic-huinma'ñ miid, y'ijxpy ñejhuiyb ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'ñ. ²⁰ Ñejhuiyb jäy ajcxy Dios ytiy'ajt, com mabaad oga'n Dios yajcojy naaxhuiñbi ixti chambaad, quëxcp ya naaxhuiñ Dios ymic'ajt y'ijxpejt, oy ca' pin Dios icy, huidibi Dios ti cojy ti macxy yejcpy ijxpejt co Dios yjiijity, etz Dios ymic'ajt huinixi huiniempopo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjäy ajcxy, ca' ajcxy ni ti ayuc miid huaad adzohuimbidip Dios miid ajcxy ypocy ycixpi.

²¹ Com ñejhuiyb ajcxy co ji Dios yajpaady, e ca' ajcxy ojadajtcixy ca' ajcxy huindzigiiygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidáacigixy amij agix, yhuinma'ñ ixtaaygixy huidibi ca' ytiy'ajtiy. Yajti gooyi ajcxy Dios ytiy'ajt ma ajcxy yjot yhuinma'ñ, e nañ miid'ajtcixy tzuuhuinma'ñ. ²² Yi jadu'mbi jäy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicity, e ca' yjanchity, tzuu huinma'ñ ajcxy ymiid. ²³ Ma yjapadyii ojadajtcixipy huindzigiiygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigiiygixy jäy y'ahuinax e jäy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jäy ajcxy jadu'n ytundigoy, paady Dios ñajtz'ixiiyin ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigoooyigixy ñiniix miñ xyipy huidibi janch oy midzo'yduuni. ²⁵ Ma yjapadyii icyipy mijpidaaccixy je tiy'ajt tiydudägypj nej Dios ti yecy, huin'it ajcxy mijpidaaccixy anñ huidijaty jäy ti cojy ti macxy. Ma yjapadyii icyipy huindzigiiygixy Dios, huidibi ci'm ti yajcojtäy tüg'óciy tijaty ji yajpaatp, huin'it ajcxy huindzigiiygixy jäy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngömaayim Dios huinixi huiniempopo. Amén.

²⁶ Miid co jäy ajcxy tzachhuindzigiiygixy jäy y'ahuinax etz jactijaty ahuinax, paady ycixpi Dios ajcxy ñajtz'ixiiyi, chi ajcxy tungixy yi jibic-huinma'ñ huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chináaygixipy tudägy miid ñäy, chi ajcxy ñaymiidtzináayigixy e ñaymiidtungigoooyigixy actöxyjäydijc. ²⁷ Yëydijctijc ajcxy nañ jadu'n ñaymiidtungigoooyigixy miñ xyipy. Ñaymiiddzináayigixy ma yjapadyii icyipy chinaaygixy miid töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibichuinma'ñ huidibi oymidzo'yduuni, ypátcixipy ma ajcxy ñiniix je tzaachypj huidibi Dios ypidacpy miid yi' ajcxy ypocy ycixpi.

²⁸ Co yi jäy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixiiyi ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jäygidägy. ²⁹ Jäy ajcxy ooy mij jibichuinma'ñ canaagnax nijot'ajtcixy; yëydijctijc ooy ajcxy jibichuinma'ñ tungixy; ooy ajcxy migapxtigoy töxyjäy ajcxy; ooy ajcxy adzojccixy comeeñ'ajtin; ooy mi'ijxtinaaygixy ymügügtijc; ca' ajcxy ymügüg ixaangixy; ooy

ajcxy yjäyay'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymügüg huin'ingixy; ooy ajcxy ypiitzcapxcixy; ca' p' ajcxy ymügüg ixaangixy.

³⁰ Jäy ajcxy ooy nigapxy ni'ojty ymügügtijc; ca' ajcxy ixaangixy Dios; ca' ti jäygidáaccixy; ooy ajcxy amij agix ñayjihuiygixy; ooy ajcxy ci'm ñaygömaayigixy; ooy ajcxy cojy macxy jibichuinma'ñ, ca' ajcxy capxymidoogixy ytaj yteedy. ³¹ Jäy ajcxy ca' y'ayuc-huinjihuiygixy; ca' ajcxy cuydungixy yci'm'ayuc; ca' ajcxy ni pin tzojccixy jihuiygixy; ca' ajcxy ni pin pa'ayoogixy. ³² Jadayaabi jäy ajcxy ñejhuiyb co Dios ti cojy ti macxy ycotujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy icyipy yi jäy ajcxy janehuiygixy co padaangixy y'o'cin, huin'it ajcxy jac-timtungixy jibichuinma'ñ, e nañ jadu'n jotcuyc ajcxy co jac pinjaty jibichuinma'ñ tungixy.

Dios tiydumb jadu'n nej yi' tzocy

2 Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöy, oy iyxipy ypinjäy ñejpyjäyity. Miich ooy ti pocy m'ixy ma huin'ingixy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb.

³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachytuna'ñ. ⁴ ¿Nej mdijy mdzögip co anajty Dios xytiyduna'ñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy?

¿Nej ca' mnejhuñ co Dios mij ooy xypa'ayoy xymimecxtucy, jigix mjothuimbidipy nej mdundigoy ma Dios ytiy'ajt? ⁵ Miid co ooy mjothuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb nigü miich yi' ooy mij xychaachytuna'ñ co anajty xi tiempo ycixy ytigoy, e Dios chaachytunamyb jäy ajcxy miid ypocy ycixpi. ⁶ Co anajty Dios tiyduñ yi naaxhuiñ jäy, chi yajnidagñhua'ñ nidüg nidüg nej anajty ti chinäy. ⁷ Nijjity jäy ajcxy oyjot oyhuinma'ñ tungixy jabom jabom, yjiip'ijxpy ajcxy co Dios oybi ymöhuaanigixy, nañ yjiip'ijxpy ajcxy co Dios ycomayiyb, yjiip'ijxyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibichuinma'ñ. ⁹ Ayo'n tzaachypj ypadamyb tüg'óciy jäy ajcxy huidibi jibichuinma'ñ ti tuñ. Nañ jadu'n miich judiojäy ajcxy tim jayijp mbadaangixy tzaachypj, pen mdundigooygixp, e chiini yi jacjadyii jäy padaangixy tzaachypj, pen tundi-gooygixp. ¹⁰ Tüg'óciy pinjaty oyjot oyhuinma'ñ tungixp, Dios ymöhuaamyb yi' ajcxy oy'ajtin, nañ comayaanip yi' ajcxy Dios, etz nañ yajjotcugñhuñb ajcxy. Tim jayijp yi judiojäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ijxpety, quipxyjaty tiyduna'ñ nidüg'óciy jäy ajcxy. ¹² Nidüg'óciy jäy ajcxy

huidibi tundigooyigixp, Dios yajtigoyaanip ajcxy yjuy'ajtin. Yi jay ajcxy huidibi ca' miidity Dios ycötujcin huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'ñ. Yi jay ajcxy huidibi miid Dios ycötujcin cojay, Dios yajpocycähuaanip ajcxy miid yi' ycötujcin huidibi cojaayip. ¹³ Yi jay ajcxy huidibi nigoob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'ñyii Dios jadu'n nej jihuüy ytuäggyäyity. Yi jay ajcxy huidibi capxymidoob Dios ycötujcin, Dios cöbigaanip co ajcxy ytuäggyäyity. ¹⁴ Yi jay ajcxy huidibi ca' miidity Dios ycötujcin huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy miidity Dios ycötujcin. ¹⁵ Co je jay ajcxy oyjot oyhuinma'ñ tungixy, huin'it yajnigüëxëccixy co ajcxy ymiid Dios ycötujcin ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihüüyigixy. E co patcixy oyjot oyhuinma'ñ, huin'it ooy oy ñayjihüüyigixy. ¹⁶ Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, miid Dios ycötujcin, tiydunip tüg'öciy jay ajcxy nej anajty yjot yhuinma'ñ ajcxy miidity, tüg'öciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷ Miich ajcxy huidibi minamb co mjudíojäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnaygömäayigixy co miich ajcxy Dios xyjäy'adyii. ¹⁸ Miich ajcxy mnejhuüyb nej Dios tzo-cy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuüyigixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jay ajcxy huidibi ca' Dios ytiy'ajt miidity, jadu'n nipaady nej jihuüy tüg huintzpi mhuijtzöy, e nañ jadu'n nipaady nej jihuüy mgodixy je jay ajcxy huidibi agootztuum tzinaayb. ²⁰ Miich ajcxy judíojäy myaj'ixpijcpy yi jay ajcxy huidibi ayoob, huidibi ca' ti tiy'ajt nejhuüyigixy, e mgapxhuijy yi jay ajcxy huidibi ca' yhuinma'ñymejtcixy. Miich ajcxy minamb co m'ayuc etz mdiy'ajt mbaatcixy ma Dios ycötujcin huidibi jaybetyip. ²¹ Miich ajcxy myaj'ixpijcpy jacjadyii jay ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jay co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jay co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigy tzaaboch quipychech, e miich ajcxy ci'm mdzachmeech je meeñ ma je tzajptijc ma je quipychech y'ity. ²³ Miich ajcxy mdzachnaygömäayigixy co mguydungixy Dios ycötujcin. Miich ajcxy m'ixtijy Dios miid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymina'ñ: "Com co miich ajcxy mdundigooyigixy, paady ycixpi yi jacjadyii jay ajcxy nigapxy ni'ojy Dios yxii."

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy miidity je tiy'ajt ma mninix co Dios xyjäy'adyii. Co ca' ajcxy mguyduunip Dios

ycötujcin, huin'it Dios ca' xytunipcuendi co miich miidity je tiy'ajt ma mninix co Dios xyjäy'adyii. Jadu'n nipaady nej jihuüy ca' mdiy'ajttäyity. ²⁶ Co yi jacjadyii jay ajcxy huidibi ca' miidity tiy'ajt ma ñinix, e cuyduni ajcxy Dios ytiy'ajt, jadu'n nej ajcxy ytiy'ajttäyity. ²⁷ Yi jacjadyii jay co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíojäy mbocycähuiip miich ajcxy, oy miich ajcxy mjamiidity ixypy Dios ycötujcin huidi cojaayip, pen ca' mguydungixy. ²⁸ Je iixpejt janchypí co pinjaty Dios yjäy'ajtyp, canan je' je iixpejt huidibi ymiid ma ninix. E nañ jadu'n canan je' je tiy'ajttähuüi cötujcin huidibi jay cuydun jecy'ajty. ²⁹ Je iixpejt janchypí co pinjaty Dios yjäy'ajtyp, je' je' je iixpejt huidibi ymiid ma yjot yhuinma'ñ, je oyjot oyhuinma'ñ huidibi ymiid, je iixpejt co je Espiritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyip cötujcin huidibi cojay ijtp. Yi jadu'mbi jay ajcxy cömay'idipy ma Dios, e ca' ycömay'ida'ñ ma jay ajcxy.

3 Pen tiy'ajt jadu'n nej nmina'ñich, ¿ti jäygidaaicin yi judíojäy ajcxy ymiid ma Dios huidibi yi jacjadyii jay ajcxy ca' miidity? ¿Ti jäygidaaicin ajcxy ypatpy co ajcxy miidity tiy'ajt ma ñinix co Dios yjäy'adyii? ² Yi judíojäy ooy canaagnax oy'ajtin jamiidity. Tim jayijp Dios yajniibijci ajcxy yi' ycötujcin yi' y'ayuc huidibi cojaayip. ³ Nej mdiy co Dios ca' cuyduna'ñ yi' y'ayuc miid yi judíojäy ajcxy miid co nijéjity judíojäy ca' cuyduñ yi' ycötujcin? ⁴ Dios ca' jadu'n huinma'ñ miidity nej jay ajcxy huinma'ñ miidity. Oy ixypy nidüg'öciy jay y'anidaaccixy, Dios ca' y'anidäga'ñ nmina. Paady jadu'n jaybety miiñ ma Dios y'ayuc co David jadu'n ymina'ñ: "Nejhuüipy jay ajcxy co miich, Huindzin Dios, tudägy mguyduñ yi' m'ayuc. Ca' huaad pinjaty ymina'nip co ca' miich mguyduñ yi' m'ayuc.

⁵ Pen Dios cömaybidzimipy miid ajt nbocy ycixpi, ¿nej tiy'ajt jadu'n nej jay yminaangixy co Dios ca' oy ytuñ, co xychaachytunim miid ajt nbocy ycixpi? ⁶ Ca' yjadu'nity. Co ixypy yjadu'nity, Dios ca' yi' tiydunipy naaxhuiñjy miid ajcxy ypocy ycixpi.

⁷ Co ixypy ytiy'ajty jadu'n nej jay yminaangixy co Dios ooy yjotcujcity co ca' xychaachytunipyich miid nbocyich ycixpi, jac'oy co ixypy ndundigooyich, jigix Dios janch ycömaybidzimipy. ⁸ Jac'oy ixypy nmi-naanim: "Tzoc tundigooyim jigix jébi Dios cömay ypidzimipy." Ixti nijéjity jay ti xyñihuambetyich co ñch jadu'n ti nmina'ñich. Ca' jadu'n nmina'ñich co Dios jay tzaachytunipy ninigoob. Dios chaachytunipy pocyjäy ajcxy, com paatip ajcxy jadu'n yi' tzaachypí.

Nidüg'öciy ñch ajt nbocymiidity

⁹ ¿Nej janch jadu'n co ñch ajcxy huidibi judíojäy, jac'oyjäy ñch ajcxy ca'ydí yi' jacjadyii jay ajcxy? Ca' yjadu'nity, ca' ñch ajcxy njac'oyjäyity. Com ti jayijp nyaj'ixpicyich co tüg'öciy jay ajcxy yajpaady pocymiid, yi judíojäy, etz nañ jadu'n jacjadyii jay ajcxy. ¹⁰ Com jadu'n jaybety miiñ ma Dios ñecy ma jadu'n ymina'ñ: Ca' ji ni tüg jay tudäcpi, ni tüg.

¹¹ Ca' ji ni pin huidibi huinjihuuyb Dios ytiy'ajt. Ni pin huidibi ixtaayb Dios ytiy'ajt.

¹² Nidüg'óciy jäy ti ixmajtzciy Dios ytiy'ajt. Quipxy ycapxy ajcxy ytumy co ytundigooygixy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

¹³ Yi jäy ajcxy ooy ycapxtigooygixy, oy ajcxy yhuin'ññ mïd y'ayuc. Jadu'n ajcxy yöcpajc nipaady nej tüg öcpi jut huidibi ahuädz. Ooy ajcxy yajtzachïy mïd y'ayuc jadu'n nej jihuïy tza'ñ chüch.

¹⁴ Ooy ajcxy ycapxtigooygixy. Ooy ajcxy jibic ayuc capxcixy.

¹⁵ Mïd yinjaty huenjatypï ayuc, mic'amy ymïgüg yaj'o'ccixy.

¹⁶ Ma ajcxy yhudity ooy midundigooygixy ymïgüg, e nañ yecy ajcxy tajin mayin.

¹⁷ Ca' ajcxy nejhuïygixy nej huaad chinaaygixy jotcuyc, ca' ma ti tzip ti capxy.

¹⁸ Ni cahuinmaaygixy nej Dios tzigïygixipy.

¹⁹ Tüg'óciy ayuc ycojaayity ma Dios ycötujcin necy, mic'ajt mïdipi mïd yi jäy ajcxy huidibi yajmij'ajtp je cötujcin. Dios ti pidägy yi' ycötujcin, jaydëbi pinjaty tundigooyb, huaad ca' ti anï tuñ ma Dios. Dios ytiydunipy tüg'óciy jäy ajcxy mïd yi' ycötujcin. ²⁰ Dios ca' capxpa-da'ñ co ytudägyity, mïd co ti cuydunyii ycötujcin. Dios ti pidägy ycötujcin jaydëbi nejhuïyim co ajt nbo-cymïdity.

Yi alma nïdzoocin, hue' yajpaady mïd mïbijcin

²¹ Jadachambi Dios xyajnejhuïyim jemybi tiy'ajt jadu'n nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi' tiy'ajt huidibi yajpatp ma Dios ycötujcin jecy'ajtpyi. Per yi Dios y'ayucnajtzcapxïybi ñecy etz Dios ycötujcin necy yejc tiy'ajt jecy'ajty co Dios xymöhuaanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jäy huidibi mïbijcp Jesucristo, ca' ñejity pinjäy ajcxy, pen judíojäy o pen ca' judíojäy ajcxy. ²³ Com nidüg'óciy naaxhuïñjäy ti ytundigooygixy. Ni tüg jäy yhuädz'ajtin ycanaybadyii mïd Dios yhuädz'ajtin y'oy'ajtin. ²⁴ (Mïd co nidüg'óciy jäy ytundigooygixy), paady ycixpi Dios mijmay'ajt mij'oy'ajt tuñ ninigoob mïd tüg'óciy jäy ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jäy ajcxy huidijaty mïbijccixp Jesucristo. ²⁵ Dios yquejx y'ung ya naaxhuïñ, jaydëbi huinmeecxip jäy ajcxy ypocy, mïd co Jesucristo ti y'ögy mïd ajcxy ypocy ycixpi. Dios yhuinmeecxip jäy ajcxy ypocy co ajcxy mïbigipy Jesucristo. Jayijp ca'ni anajty Jesucristo miiñ ya naaxhuïñ, Dios ooy mïmecxtujcy jäy ajcxy, ca' anajty mïdity jotcöduuyb jäy ajcxy ypocy. ²⁶ Jadachambi xï tiempo Dios ti yaj'oyïy jadu'n nej jëb huinmeecxipy jäy ajcxy ypocy, e jadu'n yaj'ahuimbidity ajcxy tudägy ma yi' yhuinduu. Jadu'n Dios tuñ jigix ñiguëxigipy co Dios tudägy yi', e tudägy'adaamni yi', co cöbicy jäy, yi' pinjaty mïbijcp Jesucristo.

²⁷ ¿Ti huaad jäy ajcxy tungixy huidibi jëbi mïd ñaygömayïyb ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayïyb mïd co yajmij'ajtcixy Dios ycö-

tujcin? Ca' yjadu'nity. Ca' huaad ñaygömayigixy ci'm, com Dios ti yaj'ahuimbity jäy ajcxy tudägy huidibi mijpidacp Jesús. ²⁸ Paady nmïna'ñich co jäy ajcxy y'ahuimbity tudägy co ajcxy mïbicy Jesucristo, e canan co janch ypaad jacuydungixy canaag cötujcin.

²⁹ ¿Nej miich ajcxy mdijcixy Dios ytuñ mïd ac yi'yi judíojäy ajcxy, e ca' jacmïd pinjaty? Ca' yjadu'nity. Dios tuumb mïd janch nidüg'óciy jäy ajcxy. ³⁰ Ji tügpajc Dios, e yi' tú'ciy ytuñ mïd judíojäy, etz nañ jadu'n jacjadyii jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mïbijccixy Jesucristo. ³¹ Co jadu'n nbaatim ndudägy'ajtin mïd co nmïbijcim Jesucristo, ca' nmïnaanïm Dios anajty yi' ycötujcin je jecyïp nyajcödigooyim. Hue' janchtiy nigï anajty nmïc'ajtmooym Dios ycötujcin.

Je ijxpejt huidi Abraham yejc

4 ¿Nej n'ocmïnaanïm? ¿Ti oybi ti paady ma Dios je Abraham ñich ajt nmïj'ap nmïjteedy? ² Co ixipy Dios Abraham tudägy ti icy, mïd co oybi ti tuñ, jëbi Abraham ixipy ñaygömayii. Per ca' huaad ci'm ñaygömayii ma Dios. ³ Jadu'n jaybety ymiiñ ma Dios ñecy ma jadu'n ymïna'ñ: "Abraham ymïjpidacï Dios, e paady Dios jadu'n cöbijcy Abraham jadu'n nej tüg tudägyjäy." ⁴ Je jäy huidibi ymuju'ñ patp mïd ytung ycixpi, jada meeñ huidibi ymuju'ñ'ajtpy ca' nïgoo ñimöyïi, hue' tim paatip jadu'n mïd ytung ycixpi. ⁵ Yi jäy huidibi ca' jïjp'ixy co tudägy'ajtin pada'ñ ma Dios mïd oy'ajtin ycixpi huidibi ytumy, jëyi ymïbijcipy ymïjpidacpy co Dios yaj'ahuimbida'ñyïi tudägy. Yi jadu'mbi jäy tudägy'ajtin ypadamy mïd ymïbijcin ycixpi. ⁶ Jaybety ymïñ ma Dios ñecy co je David jecy'ajty nimïydacy tüg jäy huidibi ooy anajty jotcuyc ñayjihuïyïi mïd co Dios ti y'ixyïi jadu'n nej jihuïy ytudägyjaty mïd ymïbijcin ycixpi, e ca' nmïnaanïm mïd oyjäy'ajtin ycixpi huidibi ytumy. ⁷ David jadu'n ymïna'ñ:

Jotcuyc je jäy ajcxy huidibi ypocy ti yhuinmecxyïi, huidibi ypocy ti yajtgoyïi.

⁸ Jotcuyc je jäy huidibi Dios cöbijcip jadu'n nej jihuïy ca' ypocy ymïdity.

⁹ ¿Nej janch tiy'ajt jadu'n co jada jotcuyc'ajtin huidibi David ñimïydac jecy'ajty, co ac yi' judíojäy yi' ajcxy padaamb huidijaty mïd tiy'ajt ma ñinïcx co Dios yjyä'adyïi? Ca' yjadu'nity, yi' jacjadyïi jäy nañ jadu'n yi' ajcxy pada'ñ jotcuyc'ajtin. Ti nmïnaangixyich co Abraham ymïbijci Dios, e Dios ycöbijci jadu'n nej jihuïy ytudägyity. ¹⁰ ¿Nej mdijy Dios ycöbijci Abraham jayijp ca' anajty yajtiy'ajttïyñ? o ¿ti anajty yajtiy'ajttïy? Dios ycöbijc Abraham jadu'n nej jihuïy ytudägyjaty ca'ni anajty pidacy tiy'ajt ma ñinïcx co Dios yjyä'adyïi.

¹¹ Jayijp anajty Abraham ti mïbicy Dios, e ti anajty Dios ycöbigyïi. Jac'axam Dios Abraham je cötujcin mooy co huen tiy'ajttïhuïpy y'ung etz y'ap y'oc. Je' je' ijxpejt'ajtp co Dios anajty jayijp ti ycöbigyïi jadu'n nej jihuïy ytudägyjaty, ca'ni anajty ymöyïi cötujcin. Co Dios jadu'n ytuñ mïd Abraham jadu'n nipaady nej jihuïy Abraham nmïjteedy'ajtim ñich ajt nidüg'óciy huidibi cham mïbijcp Jesús. ¹² Abraham nañ jadu'n ñimïjteedy'ajtpy yi' judío-

jäy huiðibi mibijcp mijpidacp Dios tim jadu'n nej yi' mibicy anajty Dios, jayjip ca'ni anajty miðdity tiy'ajt ma ñinix co Dios yjäy'adyii. Jadu'n nipaady nej jihuÿ Abraham ca' nimijteedy'aty yi judíojäy huiðibi ca' mibi-cy Dios.

Je huiðibi Dios ti xyaj'ahuaniÿim ti ycixy yca'px miid je mibijcin

¹³ Miid co Abraham etz y'ap y'oc ymibijcpc ymijpi-dacpc anajty ajcxy Dios, e paady anajty Dios yaj'ahuim-bidáanigixy tudägy, e paady Dios nimay Abraham co yi naaxhuiñybi yi' ajcxy je' adaanip. Canan jadu'n ajcxy Dios ñimayi co ymöhuaanigixy je naaxhuiñybi miid co anajty nidüg'óciy ajcxy ti cuydungixy Dios ycötujcin. ¹⁴ Co Abraham etz y'ap y'oc padaangixy je naaxhuiñybi huiðibi yaj'ahuaniÿi, miid co ajcxy ti cuydundaayi Dios ycötujcin, paady naadigë'ajtp ixypy co nmibijcim co Dios xyaj'ahuimbidaanim tudägy. E nañ naadigë'ajtp ixypy co Dios je Abraham nimay: "Je naaxhuiñybi mich je' mje'adaanip, com ti xymibicyich." ¹⁵ Je pinjaty mijpidaacp Dios ycötujcin je jecyp, Dios yi' tzaachytunaanip, com ca' cuydundaagyixy. Pinjaty ca' miðdity Dios ycötujcin huiðibi jaybetyip, ca' yi' midundi-gooygixy jadaaabi cötujcin.

¹⁶ Miid co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ miid Abraham, jayðebi tüg'óciy pinjaty mibijcp Dios, tim jadu'n nej Abraham mibijcy Dios, jëbi ajcxy paatcixy yi' oy'ajtin huiðibi Dios yajnimay Abraham co möhua'ñ je oy'ajtin huiðibi yegamyb ninigoobi. Dios ycuydunamyb yi' y'ayuc miid tüg'óciy jäy huiðibi mibijcp Dios, tim jadu'n nej Abraham anajty mibicy Dios, canan yé'yi judíojäy ajcxy padam oy'ajtin, com Abraham iixpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuÿ Abraham ñich ajt nmij'ap'ajtim nmijteedy'ajtim nidüg'óciy huiðibi mibijcp Dios, com Abraham nañ jadu'n ymibijcpc anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: "Ñich miich nyajnijcpc co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp." E Dios ycuydunipy yi' y'ayuc com mic'ajt miid, ixti jayðebi yajjugypigipy jadüg'oc jäy tiibi y'óccixy. E nañ mic'ajt miid jayðebi ane'min pidägy co huen yji'adipy huiðijaty ca' ca'tni.

¹⁸ Miid co Dios anajty ti ñimäyii co ymiid'adamyb may y'ap y'oc, paady ycixpi Abraham ti jip'ixy anajty co Sara anajty y'ung'ixa'ñ. Canaag jimijt anajty jajip'ixy co huen y'ung paadip. Ti anajty tiempo ñajxnä minä y'ung'ixipy. Hue' Abraham ymibijc huiðibi anajty Dios ti yajnimäyii co yi' miid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyñi. Ymiid anajty migo'px jimijt, e nañ yi' ytöxyijc Sara ni tüg anajty ti yca'ung'ixy, per Abraham yjacmibijcpc anajty co Dios cuyduna'ñ y'ayuc miid yi'. ²⁰ Abraham ca' anajty ixmach yi' ymibijcin jadu'n nej anajty Dios ymiidity ymic'ajt jayðebi cuydunip yi'y'ayuc. Chi Abra-

ham ñibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymiid ymic'ajt jayðebi ycuyduniyb yi' y'ayuc huiðibi yaj'ahuaniÿ. ²² Com Abraham ymijpidaacp anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuÿ ytudägyjäyity.

²³ Dios ymoy Abraham jada y'ayuc huiðibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc miid ñich ajt ycixpi. Dios nañ xycöbiganim jadu'n nej jihuÿ ajt ndudägyjäyity miid co nmibijcim Dios huiðibi ti yajjugypicy anajty jadüg'oc ajt nHuindzin Jesucristo. ²⁵ Dios ycäyjc Jesús huen yaj'ögyii miid ajt nbocy ycixpi. E nañ Dios yajjugypicy Jesús jadüg'oc jayðebi xyaj'ahuimbijtim tudägy ma Dios.

Je nej yhuimbizimni co Dios xycöbijcim tudägyjäy

5 Miid co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtim tudägy. E miid co Dios ti xyaj'ahuimbijtim tudägy, paady jotcujc n'ijtim miid Dios. ² Co nmibijcim nmijpidaacim Cristo, chi nbaatim je may'ajt je oy'ajt huiðibi Dios ytumyb miid ñich ajt, e jadu'n oy n'ijtim miid Dios, ca' ma ti tzip. Nañ ooy njotcugiyim, miid co njjip'ijxim co nbadaanim Dios y'oy'ajtin. ³ Canan jëda'ajty nmijotcujc'ajtim co nbadaanim Dios y'oy'ajtin, nañ jadu'n tzoc mijotcujc'ajtim ayo'n tzaachyp. Com nejhuÿim co mninajxim nyajnajxim tzaachyp, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njjip'ijxim co nbadaanim oy'ajtin ma Dios. ⁵ Com njjip'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspiritu Santo xy'adigiyim xyjottigiyim huiðibi xyajnejhuÿim jadu'n nej Dios xychojcim xyjihuiÿim.

⁶ Jecy'ajty co anajty ca'ni Jesucristo ymiñ, je naaxhuiñyjäy ca' anajty mic'ajt miidity nej c'm y'ahuimbijtcixipy tudägy. Co yhuaad'ajtni je xii je tiempo huiðibi Dios ti yaj'ixtägy, huin'it Cristo y'o'cy miid ñich ajt nbocy ycixpi miid co ndigooyim miid Dios ytiy'ajt. ⁷ Co ixypy n'ijxtaayim pinjaty codinähuiip tüg jäy tudägyip ma yi' o'cin, ca' ni pin nbaatim. Co ixypy n'ijxtaayim pinjaty codinähuaamyb tüg jäy huiðibi ooy ycömayity ma yi' o'cin, ca' yjecyity co nbaatim tüg metz. ⁸ Per Dios yajniquëxcyp jadu'n nej xychojcim xyjihuiÿim mijcajee co quejxy Cristo huen o'cy miid ajt nbocy ycixpi, oy anajty ñich ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy miid ajt nbocy ycixpi, e nañ Cristo nigä may'ajt tuna'ñ miid ñich ajt ycixpi co anajty xyajnidzögaanim ajt n'alma, jadu'n nej Dios tzaachytuna'ñ naaxhuiñyjäy miid ajcxy ypocy ycixpi. ¹⁰ Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyÿ co quejxy y'ung ya naaxhuiñ, e y'o'cy miid ajt nbocy ycixpi. Miid co Cristo xycodi-naayim ma yi' o'cin, paady nigä xypubejtim xypudigiyim cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n

tzoc xondaacim miid co n'ijtim miid Dios, miid je may'ajt huidibi ajt nHuindzin Jesucristo ti tuñ miid ñich ajt ycixpi co yaj'oyiij je tzip nej anajty Dios nmidzip'ajtim, jēbi jotcuic n'ijtim miid Dios.

Adán etz Cristo

¹² Miid jada ycixpi co yi pocytunñ chondacy jecy'ajty ya naaxhuiñ miid tūgpi jāy. E co jāy ytundigoy oga'n miid Dios, paady ycixpi je o'cin ytigijy ya naaxhuiñ. Miid co tūg'óciy jāy midundigooygixy Dios, paady tūg'óciy jāy patcixy yi o'cin. ¹³ Janch tiy'ajt jadu'n co jāy ajcxy ytundigooy jecy'ajty jayijp ca'ni anajty Dios yecy yi' ycōtujcin cojaaybi, e co ca' jāy anajty ajcxy cōtujcin miidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' miidity Dios ycōtujcin, nañ jadu'n y'o'ctay ajcxy, chondacy miid Adán, ixti yja'ty ma Moisés yxñ ytiempo. Nañ o'ctay jāy ajcxy huidibi tigachjaty tundigooy, ca' yjadu'nity nej Adán oga'n ytundigooy. ñich ajt nninixc ymiid je jibicpi huidibi nbaatim ma Adán. Per ajt njemyjot njemyhuinma'ñ nbaatim ma Cristo.

¹⁵ Je pocytunñ huidibi Adán yajtzondac, ca' naybadyii miid je tudägy'ajtin huidibi Dios ti xyñimooyim. Miid je pocytunñ ycixpi huidibi tūg jāy ti yajtzondägy, tūg'óciy jāy ócin ti paady. Dios miid tūg yēydijc, je Jesucristo, mijmay'ajt tuñ miid jāy ajcxy ycixpi co yaj'ahuimbijtcixy tudägy, chi mayjāy tudägy'ajtin ti paady. ¹⁶ Per je tudägy'ajtin huidibi Dios xyñimooyim, ca' jadu'n naybadyii miid huidibi Adán ytuun. Miid co Adán ytundigoy tūgtecycy miid Dios, paady ycixpi mayjāy o'cin ti paady miid tūg pocy ycixpi. Miid co Dios ti xyñimooyim tudägy'ajtin miid Jesucristo, paady mayjāy tudägy'ajtin y'oy'ajtin ti patcixy huidibi miibijcp Cristo. ¹⁷ Miid co tūg jāy capxycōmidodacy Dios, paady tūg'óciy jāy ti patcixy yi o'cin. Miid co tūg jāy, je Jesucristo, may'ajt oy'ajt tuñ co xyaj'ahuimbijtim tudägy, paady tūg'óciy jāy ajcxy huidibi miibijcp Jesucristo ypadaangixyp jotcuic'ajtin etz nañ chināhuaangixy jiiby tzajpjoty ma Jesús y'ane'my.

¹⁸ Miid co tūg jāy ytundigoy oga'n, paady nidūg'óciy je mayjāy ypocycāy ajcxy, e patcixy yi o'cin. Nañ tim jadu'n miid tūg jāy huidibi ti chināy tudägy, Dios mayjāy yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xii. ¹⁹ Miid co tūg jāy capxycōmidodacy Dios, paady tūg'óciy jāy ti patcixy je pocy. Nañ miid co tūgpi jāy capxymidoy Dios, paady je mayjāy tudägy'ajtin ti patcixy huidibi miibijcpi Jesucristo.

²⁰ Co Dios moy jāy ajcxy yi' ycōtujcin huidibi cojaayip, chi niigi jāy ajcxy nejhuuiygixy co ypocytungixy. Je may'ajt oy'ajt huidibi Dios ytumyby, niigi yi' y'oyity, ca'ydi je mijpocy huidibi jāy ajcxy ytungixyp. ²¹ Tim jadu'n nej co jāy ypocytungixy, huin'it ajcxy pocymid chīnaaygixy, ixti mabaad anajty y'ōccixy miid ypocy ycixpi. Nañ tim jadu'n co Dios may'ajt tuñ co yaj'ahuimbity jāy ajcxy tudägy, huin'it Dios ane'my yi' ajcxy chinaayin miid tudägy huinma'ñ, etz nañ xymōhuaanim juggy'ajtin huidibi ca' ycixipy ytigoyipy nimina, co nmijpi-

daacim ajt nHuindzin Jesucristo huidibi yjugy'ajtin yejc miid ajt nbocy ycixpi.

O'cy miid yi pocy ycixpi, jugy'aty miid Cristo ycixpi

6 ¿Nej n'ocminaanim? ¿Tzoc ooy niigi tundigooyim jigix Dios niigi may'ajt tunipy miid ñich ajt? ² Ca' jadu'n ytiy'ajtiny, ca' huaad njacpocytuunim. Co nmibijcim Jesucristo, chi jadu'n nipaady nejhuuñy ti n'o'cim, e cham ca' n'ijtim pocymid. ³ ¿Nej ca' mnejhuuiygixy jada tiy'ajt? Co nñibejtim miid Jesucristo yxi, chi n'ijtim miid Jesucristo. Jadu'n nipaady nej jihuñy ti n'o'cim quipxy miid Cristo co yi' y'o'cy miid ajt nbocy ycixpi. ⁴ Co ñich ajt nñibejtim jadu'n nipaady nej jihuñy ti n'o'cim, e ti nnaaxtigijyim quipxy miid Jesucristo. Dios Teedy miid ymic'ajtin oybi yajjugypijcy Cristo co anajty ti y'ogy, chi Cristo paty jemybi jugy'ajtin, nañ jadu'n ñich ajt ti nbaatim jemybi jugy'ajtin quipxy miid yi', paady copicy ndzinaayim miid jemybi jot jemybi huinma'ñ.

⁵ Co nmibijcim Jesucristo, chi n'ijtim miid yi', co yi' ti y'ogy, jadu'n nipaady nej jihuñy ti n'o'cim quipxy miid yi'. Co Jesucristo yjugypijcy miid jemybi yjugy'ajtin, nañ jadu'n ñich ajt nbaatim jemybi jugy'ajtin quipxy miid yi'. ⁶ Nejhuuiyim ñich ajt nej anajty jibic-jot jibic-huinma'ñ nmid'ajtim jayijp'aty ca'ni anajty nmibijcim. Jadu'n nipaady nej jihuñy ajt njibicjot njibic-huinma'ñ ti y'ogy quipxy miid Cristo co yi' y'o'cy cruudzicxy. Cristo ti y'ogy miid ajt nbocy ycixpi, jigix jēbi n'ijxmajtzim pocytunñ huinma'ñ, etz jigix jēbi je pocytunñ ca' xyjac'ane'mim ajt njot nhuinma'ñ. ⁷ Com pinjaty ti y'ogy, yi' ypocytunñ ca' ti mic'ajt jacmiidity ma yjot yhuinma'ñ. ⁸ Pen jadu'n nipaady nej jihuñy ti n'o'cim quipxy miid Cristo, paady ndzināhuaanim njugy'adaanim quipxy miid yi'. ⁹ Nejhuuiyim co Cristo ti yjugypijcy co y'o'cy, e ca' yi' y'ōga'ñ jadūg'oc. Yi' o'cin ca' ti mic'ajt jacmiidity ma Jesucristo. ¹⁰ Co Cristo ti y'o'cy miid jāy ypocy ycixpi, chi y'ogy tūg tecypajc miid nidūg'óciy jāy ajcxy ycixpi. Co Jesucristo yjugypijcy, chi tūg'óciy huidibi yi' ytumyby ma yi' chinaydac yjugy'ajttac, yi' ytumyby miid Dios ycixpi. ¹¹ Nañ jadu'n miich ajcxy mhuinma'ñypidaaccix jadu'n nej jihuñy ti m'ōccixy, e yi' ypocytunñ ca' ti mic'ajt jacmiidity ma miich ajcxy mdzinaayin. E jadachambi xii tiempo tzinaaygix miid Dios ycixpi quipxy miid Jesucristo ñich ajt nHuindzin.

¹² Paady ycixpi ca' huaad xy'ane'mgixy je jibic-huinma'ñ huidibi ajcxy mninixc yjanijot'ajtpy. ¹³ Ca' huaad mgjējccixy yi' mninixc ma pocytunñ. Naygijējccigix ma Dios, ixmajtzicx yi' pocytunñ. Jadu'n nipaady nej jihuñy ti m'ōccixy, e ti mjugypijccixy jadūg'oc. Hue' janchtiy cīyējccix yi' mninixc ma Dios, jaydēbi mdzināaygixipy miid ajcxy tudägy mjot mhuinma'ñ, e cuydungix Dios chojcin. ¹⁴ Jadachambi xii tiempo ca' miich ajcxy mdzinaaygixy pocymid, jadu'n nej jecy'ajty ajcxy mdzinaaygixy co anajty ajcxy mguydungixy Dios ycōtujcin je jecyip. Hue' janchtiy tzinaaygix miid Dios ycixpi, com Dios mij may'ajt ti tuñ miid miich ajcxy.

Tüg iixpejt huidibi yajpatp ma n'ijtim yajtuñ

¹⁵ ¿Ti huaad nduunim? ¿Nej jëbi huaad njacpocytunim? Com Dios mijmay'ajt ti tuñ co ti jöch ajt nbocy etz nxihuín, e Dios ycötujcín, je jecyí, ca' xyjacyajpocycáhuim. Ca' huaad njacpocytunim. ¹⁶ ¿Mnejhuüiyb miich ajcxy jada tiy'ajt? Co ixyípy pinjaty ñaygÿyegyii co ytuna'ñ miid tüg huindzin huidibi mic yajtumb, copicy co je tumbi capxymidohuípy je yhuindzin. Nañ tim jadu'n nipaady miid pocytuní. Pen mnaygÿeyejcp miid pocytuní, huin'it anajty pocy xy'ane'my ma mdzinaayín, ixti mabaad anajty m'ögy miid mbocy ycixpi. Co mnaygÿyéjcgixipy ma Dios, huin'it ajcxy mgapxymidohuípy Dios, e mdzináhuip ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacín ma Dios co jadachambi tiempo ti mgöbajccixy cixyot huinjot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiíyí ajcxy mjot mhuinma'ñ, ca'ydi mjactzinaaygixy pocymiid. Ti mhuinma'ñ mbi-daaccixy co mgapxymidohuaangixy Dios e mdzináhuaangixy tudägy. ¹⁹ (Ngapxhuijpyich miich ajcxy cham miid naaxhuíñyäjy y'ayuc ytiy'ajt, com ca' yajxon mhuinjihuüygixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygÿyéjcgixy xii ya ma jibic-huinma'ñ, e mdundigoogixy xii ya miid mninix. Ooy miich anajty ajcxy mñdity jibicpi ma mjot mhuinma'ñ, ooy anajty mdundigoogixy. Jadachambi xii tiempo naygÿyéjcgixy ma Jesucristo, jigix jëbi huaad mdungixy miid tudägy jot tudägy huinma'ñ, etz jigix jëbi huaad mdzinaaygixy miid huadz jot huadz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyjot oyhuinma'ñ anajty xy'oc'ané'mgixni. ²¹ ¿Ti jotcuyc'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyaj-jnicxp ajcxy ma yi o'cín. ²² Jadachambi xii tiempo Dios ti yaj'oyíy nej jëbi m'ixmájtzcixipy yi pocytuní, ca' huaad mjactzinaaygixy pocymiid. Ti m'ahuimbijtcixy Dios ytumbi, jadyaabi tzinaayín xymöhuip ajcxy mjotcuyc'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytuní ycoju'ñ yi' je' yi o'cín. Per je huidibi Dios xyñimooyim, hue' je' je jugy'ajtin huidibi ni caminaxii ycixipy ytigoyipy co n'ijtim miid ajt nHuindzin Jesucristo.

Tüg iixpejt huidibi yajpatp ma picychinaayín

7 Miich ajcxy migügtjic huidibi ti m'ixpicy Dios ycötujcín huidibi Moisés yjaay, mnejhuüiyb miich ajcxy co yi naaxhuíñyäjy ycötujcín ymiid mic'ajt ma ajt ndzinaayín, ixti mabaad anajty n'o'cím. ² Paady co tüg töxyjäy ycivilbicy miid tüg yëydjic, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydjic ti y'öcni, huin'it anajty ca' ocmñidiñ ñäy y'ane'mín. ³ Ooy anajty mij ytundigoy je töxyjäy co

ypigipy miid huingbi yëydjic pen jugy'ajtni je ñäy. Cooni janchtiy anajty ñiyëydjic ti y'ögy, huin'itni janchtiy jëbi ypicy miid huingbi yëydjic, e ca'p je' anajty ytundigoy.

⁴ Miich ajcxy nmigügtjicich, judíojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcín huidibi Moisés yjaay xy'ane'mgixp anajty ma mdzinaayín. Jadachambi xii tiempo yi jadu'mbi cötujcín ca' yi' xyjac'ané'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydjic ti y'ögy, e ti ypijctigach. Cristo miich ajcxy xyñigohuajc'ajtp, jigix jëbi mdzinaaygixy miid Dios ycixpi. ⁵ Jayijp ca'ni anajty nmibijcím Jesucristo ooy anajty nguyduunim huidibi ajt nninix ñijot'ajt. Je huin'it tiempo anajty je jibic-huinma'ñ xy'ane'mím ma ajt ndzinaayín. Je' je' je jibic-huinma'ñ huidibi Dios xycap'adujcím miid ajt cötujcín. Miid co jibic-huinma'ñ xy'ane'mím anajty ajt ma ndzinaayín etz xyajnicxaaním anajty ma yi o'cín. ⁶ Jadachambi xii tiempo Dios ycötujcín huidibi Moisés xymooyim, ca' ti mic'ajt mñdity ma ñch ajt, ti n'ixmajtzim. Jadu'n nipaady nejhuüiy ti n'o'cím, e njugypijcím jadüg'oc. Paady nguyduunim je jemybi tiy'ajt huidibi je Espíritu Santo xyajnejhuüiyim. Canan je' anajty nguyduunim je jecy'ajtpy cötujcín.

Je pocy huidibi ijtp ma ñch

⁷ ¿Nej n'ocmínaaním? ¿Nej janch co je cötujcín huidibi Moisés xymooyim xyajpocytunim anajty? Ca' yjadu'nity. Co ixyipy ca' anajty nmñditych Moisés ycötujcín, ca' ixyipy ñch ti nnejhuüiyich co ti ndundigooyich ma Dios ytiy'ajt. Co ixyipy anajty ca' n'ocnejhuüiyich Moisés ycötujcín ma jadu'n ymíñañ: "Ca' mmigüg ni ti m'adzocjipy." Ti ixyipy ndundigooyich, e ca' ixyipy nejhuüiyich ma ti ndundigooyich. ⁸ Miid co ñch jecy'ajty ooy anajty nnijot'atyich pocytuní, paady ycixpi ñch anajty ooy ndundigooyich. E jadu'n anajty nigí ooy n'adzocych, e jamínam anajty Dios ycötujcín co ca' migüg ni ti m'adzocjipy. Co ixyipy Dios ca' jadu'n cötujcín ti pidägy, ni ca' ixyipy njihuí'ñybicyich co ndundigooyich. ⁹ Jayijp co ca'ni anajty nhuinjihuüiyich Dios ycötujcín, huin'it tiempo ca' anajty njihuí'ñybicyich nbocy. E co nbatyich Dios ycötujcín, chi njihuí'nybicyich nbocy, e nañ ti nejhuüiyich co tigoyaamích njugy'ajtin. ¹⁰ Dios ypidac ycötujcín jaydëbi nbáadibich jugy'ajtin huidibi ca' ycixipy ytigoyipy. Per ca' jadu'n ti oyíy miid ñch. Yi cötujcín ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmñditych co nguydundähuaamybich Dios ycötujcín huidibi Moisés yjayhuí'm. Pero com ca' njatyich nej nguydundähuiyich, chi nbocycäyich ma Dios. Je pocytuní ti xyhuin'ññich, e miid je' ycixpi nbadaamybich anajty yi o'cín.

¹² Tüg'óciy Dios yley etz Dios ycötujcín huidibi cojay ijtp, huadz yi', tudägy yi', ooy yi'. ¹³ ¿Nej tigoyaambich anajty njugy'ajtin miid co anajty nmí'ityich Dios oybi cötujcín? Ca' yjadu'nity. ¿Nej je Dios ycötujcín je oybi ti

huimbidzimy jibic mïd ïch co xyajtigoyaanich anajty njugy'ajtin? Ca' yjadu'nity. Nicxpïch anajty ma yi' o'cin mïd nbocyïch ycixpi. Je Dios ycötujcin xyajnejhuïyich co o'cin nbadaamybich mïd nbocyïch ycixpi. Jadu'n Dios pidacy ycötujcin ya naaxhuiñ, jigix jëbi jây ajcxy nejhuïhuïpy co mij ajcxy ooy ytundïgooy mïd Dios.

¹⁴ Nejhuïyïm co yi' Dios ycötujcin huidibi Moisés xy-mooyim, jilby yi' chooñ ma Dios, paady yi' ooy y'oyity. ïch nninïcx yi' je' huidibi nijot'ajtp yi' pocytunï, paady ndzinäyich pocymïd. ¹⁵ Ca' nhuinjihuïyich huidibi ndumyich. Yi' oysi' huidibi njatunaamybich, ca' njatyich nej ndunipyich. Yi' jibicpi huidibi ca' y'oychojcnity, yi' ndumyich. ¹⁶ Co nduñich huidibi ca' ndzocyich, jadu'n niquëxyg co Dios ycötujcin ooy oy yi', tudägy yi'. ¹⁷ Canan jotcuic ïch jadu'n co nbocytuñich. Yi' pocy'adzojcin huidibi nmïdich ma njot nhuinma'ñ, yi' yi' xyajtundïgooybich. ¹⁸ Nejhuïyibich co ca' ti oysi' yajpaady ma ïch nninïcx. Ooy njatzocyich co oysi' njatuna'ñich, per ca' njatyich nej oysi' ndunipyich. ¹⁹ Je oysi' huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyich. ²⁰ Co yi' nduñich huidibi ca' ndzocyich, yi' je' je' pocytunï huidijaty njot'ajtïbich nhuinma'ñ'ajtïbich, yi' xyajtundïgooybich.

²¹ Nbaatpïch tüg tiy'ajt, co njatunaamybich oyhuinma'ñ, jiipy jibicpi nbaadyich ma njot nhuinma'ñich. ²² Jotjoty huinma'ñyoty ooy nmïxondägyich Dios ycötujcin. ²³ E nañ mïdich jotjoty huinma'ñyoty yi' jibicpi huidibi mï'ijxtinaayb je oysi'. Yi' tundïgooyi' yajpatp ma ïch nninïcx. Yi' nninïcxich yajpatp pocymïd.

²⁴ Paady ca' njotcújcïgyich. ¿Pin jëbi xyñihua'ñich xyanidzögïbich ma jadaayaab nninïcxich huidibi xyajnicxpïch ma yi' o'cin? ²⁵ Dioscojuyip nyajnajxypïch ma Dios co Dios, mïd ajt nHuindzin Jesucristo, xyñihuaanim ma jada jibicpi huidibi ajt nninïcx xyñi'jot'ajtim. Paady mïd n'oyjot n'oyhuinma'ñ nguyduñich Dios ycötujcin. Mïd nninïcxich nijot'atyich pocytunï.

Je jugy'ajt mïd je Dios yjihuï'ñ ymic'ajt ycixpi

8 Jadachambi tiempo janchtiy Dios ca' tzaachytuna'ñ yi' jây ajcxy huidijaty tú'ciy ijtp mïd Cristo Jesús, huidibi ajcxy cuydumb Espïritu Santo chojcin, e ca' ajcxy tungixy nej je ninïcx nijot'ajtcixy. ² Je Espïritu Santo ti' xyajpidzimim ma yi' pocytunï etz ma yi' o'cin huidibi yi' jecy'ajty cötujcin ti' xymooyim. Je Espïritu Santo xyajtzinaayim huinixï, ïch ajt huidibi ijtp tú'ciy mïd Jesucristo. ³ Mïd co ïch ajt ooy ninïcx ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñyây yajtigoy ajcxy je cötujcin ymajaa, e ca' ymadacy nicxy xyajtzinaayim mïd tudägy jot huinma'ñ. Paady Dios yquejxy yci'm'ung huidi ti' chinäy ya naaxhuiñ mïd ñinïcx jadu'n nej ïch ajt nmïdity nninïcx, jigix jëbi ndzinaayim mïd huadz jot huinma'ñ. Jadu'n Dios y'ung chinay mïd ñinïcx, per ca' ni ti' bocy anajty mïdity. E yi' ti' y'ögy mïd ajt nbocy ycixpi, e jadu'n yajtigoy je pocy'ajty huidibi ajt nigix'ajtim. ⁴ Jadu'n Dios ytuuñ jigix jëbi xyajtzinaayim mïd tudägyjot tudägyhuinma'ñ jadu'n nej yi' ycötujcin y'ane'my. Mïd co

nmïd'ajtim Dios yjihuï'ñ ymic'ajt ma ajt njot nhuinma'ñ, paady jëbi huaad ndzinaayim mïd tudägy-jot tudägy-huinma'ñ.

⁵ Yi' jây ajcxy huidibi ca' mïdity Dios yjihuï'ñ ymic'ajt ma yjot yhuinma'ñ, hue' ajcxy ycapxymïdooyb je jibicpi huidibi ajcxy ñinïcx ñijot'ajtpy. Yi' jây ajcxy huidibi tzi-naayb mïd Dios yjihuï'n ymic'ajt ma yjot yhuinma'ñ, hue' ajcxy ycapxymïdooyb je Espïritu Santo. ⁶ Yi' jây ajcxy huidibi capxymïdoob je jibicpi huidibi ajcxy ñinïcx ñijot'ajtpy, hue' ajcxy ypadaangixyp o'cin. Yi' jây ajcxy huidibi capxymïdoob je Espïritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuic'ajtin. ⁷ Yi' jây ajcxy huidibi capxymïdoob je jibicpi huidibi ajcxy ñinïcx ñijot'ajtpy, hue' ajcxy Dios ymidzip'ajtpy, ca' capxymïdohuaangixy Dios ycötujcin. Ni ca' jajtciy nej ajcxy capxymïdöogixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymïdoob je jibicpi huidibi ajcxy ñinïcx ñijot'ajtpy.

⁹ Per mïch ajcxy ca' mgapxymïdoogixy je jibicpi huidibi mninïcx nijot'ajtpy. Com miich ajcxy mmïd Dios yjihuï'ñ ymic'ajt ma mjot mhuinma'ñ, e mguydungixy je Espïritu Santo chojcin. Huenpïnty huidibi ca' mïdity Cristo yjihuï'ñ ymic'ajt ma yjot yhuinma'ñ, ca' yi' y'ity mïd Cristo. ¹⁰ Pen miich ajcxy ijtp mïd Cristo, yi' mjogy'ajtin ajcxy ca' ycixipy ytigoyipy nimina, mïd co Cristo ti' xyaj'ahuimbijtcixy tudägy ma Dios yhuinduu. Yi' mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihuï'ñ ymic'ajt je huidibi yajjugypïc jadüg'oc je Cristo co y'ocy. Nañ jadu'n miich ajcxy Dios xyajjugypigaangixy jadüg'oc, co anajty ti' m'öccixy, mïd yi' yjihuï'ñ ymic'ajt huidi yajpaatp ma miich ajcxy mjot mhuinma'ñ.

¹² Mïd co nmïd'ajtim Dios yjihuï'ñ ymic'ajt paady ycixpi, miich ajcxy migügtïc, copicy ngapxymïdoohuim je Espïritu Santo, e ca' huaad ngapxymïdoohuim je jibicpi huidibi ajt nninïcx ñijot'ajtpy. ¹³ Pen ooy ajcxy xytimy'ane'mgixy je jibicpi huidibi ajcxy mninïcx ñijot'ajtpy, co m'öccixipy, yi' mjogy'ajtin cixip tigoyip yi'. Per pen mïd Dios yjihuï'ñ ymic'ajt miich ajcxy myajtigoy je jibicpi huidibi mninïcx ñijot'ajtpy, co m'öccixipy, yi' mjogy'ajtin ajcxy ca' yi' ycixipy ytigoyipy.

¹⁴ Tüg'öcy pinjaty ajcxy capxymïdoob je Espïritu Santo, Dios yi' ung'ajtip ajcxy. ¹⁵ Je Espïritu Santo huidibi miich ajcxy xy'adigïyigixp xyjottigïyigixp, ca' xy'chaachytungixy e nañ ni ca' mdzinähuaangixy mïd tzigï'ñ jihuï'ñ. Ca' miich ajcxy jadu'n paady nej tumbidijc huidibi ooy tzigïyigixy yhuindzin. Co je Espïritu Santo yajpaady ma ajcxy mjot mhuinma'ñ, jadu'n nipaady nejhuïy miich ajcxy Dios xy'ung'adyii. E com nmïd'ajtim Dios yjihuï'ñ ymic'ajt, je' jadu'n xyajmïnaanïm: "¡Dios Teedy!" ¹⁶ Je Espïritu Santo tiy'ajt yejcp ma ajt njot nhuinma'ñ, je' jadu'n xyajmïnaanïm co Dios xy'ung'ajtim. ¹⁷ Pen ïch ajt Dios xy'ung'ajtim, chi nbadaanïm it lugar quipxyi mïd Cristo jiiby tzajpjoty ma Dios yajpaady. Pen nminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanïm Dios y'oy'ajtin quipxyi mïd Cristo.

¹⁸ N'a'ixiibich co yi tzaachypi yi ayo'n huidibi nminajxim nyajnajxim ya naaxhuiñ, ca' yi' ytim ytiijity, ca' ninej yquipxyjatyty je oy'ajtin etz mijjotcujc'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹ Tüg'óciy tijaty ya naaxhuiñ huidibi Dios ti yajcojy yaj'oyi, y'aa'ijxpy yjijp'ijxpy ajcxy mina Dios ymöhuaanigixy y'oy'ajtin ymij'ajtin yi jäy ajcxy huidibi ajcxy Dios ung'ajtip. ²⁰ Tüg'óciy tijaty Dios ti yajcojy yaj'oyi ya naaxhuiñ, hue' je' yjugy'ajtin cixamb ti-goyamb, ögam tïdzam. E canan ci'm jadu'n tzocy, hue' je' Dios jadu'n ti yajnicödügy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co anajty Dios yaj'oyi nej jëbi ajcxy chinaaygixy, e ca' y'öccixipy, ca' y'titczixipy, etz ca' ypügixipy, chi ajcxy padaangixy oy'ajtin etz jotcujc'ajtin quipxyi miid je jäy ajcxy huidibi Dios ung'ajtip. ²² Com nejhuuyim co ixti chambaad tüg'óciy huidijaty Dios yajcojy yaj'oyi ya naaxhuiñ yjihuiyb tzaachyp, e ca' yjotcujc'ajtcixy. Tim jadu'n nipaady nej tüg töxyjä paady tzaachypi co yhuad'ajtni mina y'ung yajma'xung'adañ. ²³ Canan yi naaxhuiñbi huidi Dios yaj'oyi yi'yi tzaachypi jihuiyb, nañ jadu'n iich ajt huidijaty miid'ajtp Dios yjihui'ñ ymic'ajt, huidibi Dios xymooyim jayjip'aty ca'ni anajty nyajtigajtzim nninix. Nañ iich ajt tajim mayim njiiyim nyaaxim ixti cooni anajty Dios xyajtigadzaanim ajt nninix etz xycöbigaanim ma yi' y'it jilby tzajpjoty, e xymiid'idaanim ajt jadu'n nej yci'm'ung. ²⁴ Miid co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njijp'ijxim, ca' ixipy njacjijp'ijxim co nbadäänimni. Com ca' pin jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmiid'ajtim, huin'it n'ahuijxim miid mecxtujcin cooni nbaatim.

²⁶ Tim jadu'n nej jotcujc'ajtin nbadaanim co njijp'ijxim huidibi Dios xymöhuaanim, nañ tim jadu'n je Espiritu Santo xypubejtim xypudigiiyim co njotmetzciiyim, com ca' njajtim nej jëbi huaad Dios nmibijctzoohuim nej ypadyi. Paady je Espiritu Santo xycodinaayim ma Dios, ymibijctzooyb je Dios mictägy miid iich ajt ycixpi miid jiiyin yaaxin, huidi ca' huaad yajcapxpizimy miid miydacin. ²⁷ Dios ñejhuuyb ti jot ti huinma'ñ jäy ajcxy ymiid. E Dios nañ huinjhuuyb tüg'óciy ayuc huidibi je Espiritu Santo yajnajxyp ma yi'. Je Espiritu Santo ypijctzooyb may'ajt jabom jabom ma Dios miid tüg'óciy je mibijcpidijc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuuyim co huentimtiijity huidibi yi' ajcxy yminajxpy yajnajxpy, pen jibicpi o pen oybi, Dios jadu'n ti a'ixy co huen minajxcixy yajnajxcixy miid yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixy, je' yi' ajcxy huidibi Dios ñejhuuy jayjipni co ymibiga'ñy y'ayuc. Dios jadu'n tumb ma yi'

ajcxy yjot yhuinma'ñ jaydëbi yquipxyjatyty ajcxy yjot yhuinma'ñ miid Dios y'ung, jadu'n nej yi' yjot yhuinma'ñ miidity. ³⁰ Yi mayjäy huidibi Dios yajnicödügy ca'ni anajty naaxhuiñbi chondacy co ytuna'ñ miid yi', yi' ajcxy Dios huin'ixy. Yi mayjäy huidibi Dios ti yhuin'ixy, nañ Dios yi' ajcxy yaj'ahuimbijtip tudägy. E yi mayjäy huidibi Dios ti yaj'ahuimbity tudägy, nañ Dios yi' yajquipxyjatythuaanip ajcxy y'oy'ajtin miid yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcm? Ca' ni ti. Pen Dios iich ajt xypubejtim xypudigiiyim, ¿pin iich ajt jëbi xymimadaacim? Janch ni ca pin. ³² Dios ixti yci'm'ung ti yecy miid iich ajt ycixpi, co oy y'o'cy miid iich ajt ycixpi, co oy y'o'cy ma yi' cruudz miid nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty miid yi' y'ung, Jesucristo. ³³ ¿Pin jada' jëbi ocxiy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jëbi ocyaajpocycäy? Ca' ni pin. Com Cristo o'c je' miid ajt nbocy ycixpi, etz yjugypijcy jadüg'oc, e jadachambi xii tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo iich ajt xyñbijctzoohuuyim, ypijctzooyb may'ajt ma Dios miid iich ajt ycixpi. ³⁵ Com Cristo ooy xychojcm xyjihuiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixipy tzaachypi ayo'n nminajxim nyajnajxim, oy ixipy tajin mayin nbaatim; oy ixipy jäy xy'ixhuidijtim xypahuidijtim; oy ixipy yuu ayo'n nbaatim; oy ixipy huit tucxy nyajmayajtim; oy ixipy tzig'iñ nyajnajxim; oy ixipy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n yminañ:

Miid miich, Huindzin Dios ycixpi, je nmizipich xyjatytimyyaj'ögaambich xim tzuum. Jadu'n iich ajcxy nej cöbixy huidibi yajnicxip ma yaj'öctac co yaj'öga'ñy. ³⁷ Ca' ti ayo'n nbadaanim. Nmimadactähuaanim tüg'óciy ayo'n, miid co Cristo xychojcm xyjihuiyim. ³⁸ Janch nejhuuybich tiydudägy co Dios xychojcm xyjihuiyim. Ca' ji ni pin jëbi huaad xypijc-huäcxim ma Dios chójcin, oy ixipy nja'o'cim; oy ixipy njajugy'ajtim; oy ixipy xymizip'ajtim ángel ajcxy etz jacjadyi hidibi mic'ajt miid jilby tzajpjoty. Ca' ajcxy jëbi huaad xypijc-huäcxim ma Dios, ni ti hidibi ji ijtp cham, ni je hidibi mimb cidacp, ni yi' jëbi xycapij-c-huäcxim ma Dios chojcin. Ajt nHuindzin Jesucristo ti xyajnejhuuyim jadu'n nej Dios xchojcm xyjihuiyim co y'o'cy ma yi' cruudz miid ajt nbocy ycixpi.

Dios ti huin'ixy yi Israel jäy ajcxy

9 Nmich je Cristo ytiy'ajt, nyajnijayibich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtijc ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espiritu Santo, tiy'ajt yejcp ma iich njot yhuinma'ñ co jadu'n tajin mayin njihuiyich miid yi' ajcxy ycixpi. ³ Com tajy may nayjihuiyijich miid iich n'amigügtijc, iich nmigogajp, ixti njacodinähuaamybich ajcxy ma Dios miid

ypocy ycixpi, ixti jëbi icyipy Cristo nja'ixmachich mïid y'i ajcxy ycixpi, ixti jëbi icyipy Dios xychaachytuñich mïid y'i ajcxy ypocy ycixpi, co icyipy jëbi Dios pocyhuinmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbïgyii jadu'n nej jihuÿy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiÿi nidüg'óciy tiy'ajt nej ajcxy jëbi huaad Dios huindzigÿy, e Dios yajhuinhuanÿy Israel jäy ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ñich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, y'i tüg'óciy ane'mdaayb jii by tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ y'i y'ayuc huidibi yajhuinhuanÿy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuanÿy Abraham, com jadu'n yjaybetyity ma Dios ñecy. Dios jadu'n nimay Abraham: "Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuanÿy." ⁸ Co Dios jadu'n nimay Abraham, paady ycixpi nejhuiÿim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuanÿy co may'ajt tuna'ñ mïid y'i ajcxy. ⁹ Com jadu'n yjaybetyity ma Dios ñecy co Dios nimay Abraham: "Nihuibidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip."

¹⁰ Ji jadüg tiy'ajt. ñich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxÿy ti huinma'ñ ymïd, oyhuinma'ñ o jibic-huinma'ñ. Dios nini-goob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n mi-nañ: "Jac niigi ti ndzocyich Jacob, ca'ydi Esaú."

¹⁴ ¿Nej n'ocmïnaanim? ¿Dios ca' tiÿybi tuñy? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: "Nba'ayohuipyich ninigoobi pinjaty ndzocjpyich." ¹⁶ Co Dios jadu'n nimay Moisés paady nejhuiÿim co canan paady ycixpi Dios pa'ayohua'ñ jay mïd co ajcxy chachñaymija'ljixigixy co tunaangixy oyhuinma'ñ. Hue' je' Dios pa'ayo'n tuñ mïd jäy ajcxy nini-goob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

ñich miich ti nmöy m'ane'min, jigix jëbi jäy ajcxy icyipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzocjpy.

¹⁹ Huin'it miich ajcxy xyñimähuibich: "Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbip nej y'i tzocy?" ²⁰ Miich jäy, ¿mbin miich co ti myajcapxycoja'ñ myaj'ayuccoja'ñ

mïid Dios? ¿Nej jëbi pochytüdz nimäy je pin anajty ti yajcojyii? "¿Nej co jadu'n ti xyajcojyich?" ²¹ Tüdzyajcojpi y'i yaj'oyiÿy je mo'ntz nej tim tzocy. Peni yajcojamyb tüzdy oyi tzooyatypi, yajcojpy je'. Peni yajcojamyb tüzdy huidibi ca' oyjatyity, yajcojpy je'.

²² Tim jadu'n nej je tüzzyajcojpi yaj'oyiÿy mo'ntz nej tzocy, nañ jadu'n Dios tuñ mïd jäy nej tzocy. Dios ti yajcojy jäy, e mïid ymic'ajt jëb tzaachytuñ mïid ypocy ycixpi. E co jadu'n tzaachytunipy, chi ñiguëxÿgipy y'i ymic'ajt. Dios ooy jecy ti jamimecxtucy ajcxy huidibi paatip co Dios chaachytuniiÿy ajcxy. Com Dios ti yajcojy jäy paady jëb nañ jadu'n pa'ayoohuipy etz may'ajt tunipy mïid y'i ajcxy, jëbi ajcxy paadip y'i y'oy'ajtin. Dios ñich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzocin paady. ²⁵ Com jadu'n jaybety ymiñ ma Oseas ñecy ma Dios jadu'n ymina'ñ:

Yi jäy ajcxy huidibi ñich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogaänibich cham.

²⁶ E nañ jadu'n jadüg'it Oseas cojay: "E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydijyii Dios yjäy, je Dios huidibi huinixii tzinaayb."

²⁷ Nañ jotmay mïid co Isaías jada tiy'ajt ycojay ma ñecy ma jadu'n ymina'ñ: "Oy icyipy ajcxy ti yamayÿy jadu'n nej tzaa'ung yajpaady ma mejy ypa', nihueñ ajcxy y'alma ñidzocin pada'ñ. ²⁸ Com Dios mic' ooy cötujcin mïidity, e ca' mimecxtugipy jäy ajcxy ypocytunii huinixii. E mic'amy tzaachypï möhua'ñ naaxhuinyjäy mïid ypocy ycixpi co anajty xii tiempo paatni mabaad agapxtucy." ²⁹ Isaías ñajtzapxiÿy jadu'n jecy'ajty:

Pen ca' icyipy je Huindzin Dios huidibi ane'mdaayb jii by tzajpjoty etz ya naaxhuiñ, capubejty yi Israel jäy, co ca' ycajacyajtzocï nijëjity ajcxy, ycacödigoyday y'i ajcxy, tim jadu'n nej je jäy ajcxy yajty jim ma Sodomo cajp etz Gomorra cajp, cödigoyday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhuinjihuÿyigixy huidibi ti nyajni-jayiiÿyigixy jadu'n nej Dios ytun mïid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jijp'ijxp co tudägy'ajtin padaangixy mïid co tzachcuydungixy Dios ycötujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. ³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ mïid y'i ajcxy ycixpi. Hue' ajcxy tijy co tudägy'ajtin padaangixy ma Dios mïid co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycöney ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n ymina'ñ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ñich. Tim jadu'n nej icyipy ti nbidägyich tüg tzaa ma jäy ajcxy

huaad ycönejpcixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n pada'n ma ñch, nbo-cyhuinmecxaamybich yi' ajcxy.

10 Miich ajcxy nmügügtjicich, ooy ndzocyich cixyjot huinjot co yi Israel jäy nidüg'óciy pada'n y'alma ñidzoocin. Ooy ñch nigü Dios nmibijctzoy miid yi' ajcxy ycixpi. ² Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuïy Dios ytiy'ajt. ³ Com nejhuïyb ajcxy co Dios yajpocyñihuädzamyb jäy ajcxy, hue' ajcxy ca' huinjihuïy nej Dios yhuinma'n miidity. C'i'm anajty chachhuinma'n ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴ Yi judíojäy ajcxy ca' huinjihuïygyixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhuin ma jadu'n ymina'n: "Je pinjaty cuydumb je Dios ytiy'ajt, jim mic'ajt paadipy miid chinaayin ycixpi." ⁶ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymina'n: "Ca' huaad judíojäy ajcxy yminaangixy jotjoty huinma'ñyoty: ¿Pin ocpättigñhuip tzajpjoty nicx je Cristo yajtzoof? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?" ⁸ ¿Nej Dios y'ayuc ymina'n? Jadu'n Dios y'ayuc ymina'n: "Ti mmidoy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti mmido'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ñch ajcxy ngapxhuäcpx. ⁹ Pen miich mgapxypidzimyb mayjä agujc co miich ajcxy Jesús mHuindzin'adyii, etz mmibijcapy ajcxy ma mjot mhuinma'n co Dios ti yajjugypicy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägy Jesús cixyjot huinjot huin'it Dios xyajpocyñihuädziy. Co mgapxypidzimipy mayjä agujc co miich mijpidägy Cristo Jesús, huin'it yi' m'alma ñidzoocin pada'n.

¹¹ Com jaybety jadu'n miin ma Dios ñecy, ma jadu'n ymina'n: "Nidüg'óciy jäy huidijaty mijpidacp je Cristo, ca' ajcxy ayo'n pada'n ma Dios." ¹² Jëbi nidüg'óciy jäy mijpidägy je Cristo Jesús com Dios tú'ciy yajhuinhuaniy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi ni-Huindzin'ajttaayb. Jesucristo may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxi. ¹³ Com jadu'n jaybety ymiin ma Dios ñecy, ma jadu'n ymina'n: "Nidüg'óciy jäy pinjaty Dios mibijctzoob miid Huindzin Jesucristo yxi, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuaney Jesucristo co huen y'alma nidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcpxi? Com

jaybety jadu'n ymiin ma Dios ñecy, ma jadu'n ymina'n: "Ooy oy jäy ñayjihuyii co pinjaty mimimb mija'tp oybi tiy'ajt, pinjaty capxhuäcpx oybi tiy'ajt ma yi' ajcxy."

¹⁶ Per ca' nidüg'óciy jäy mibicy je oybi tiy'ajt, com Isaías jadu'n cojay ma ñecy ma jadu'n ymina'n:

"Huindzin Dios, ¿pin ti mijpidägy ñch ajcxy n'ayuc?"

¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiin ma Dios ñecy ma jadu'n ymina'n:

Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuïy Dios ytiy'ajt? Nejhuïyb ajcxy. Com jecy'ajty Moisés ycojay ma ñecy ma Dios jadu'n ymina'n:

Nyajpocyñihuaatzahuibich yi jäy ajcxy huidibi ca' ñch njäy'adyii, e huin'it miich ajcxy cohuindoyñ mijhuïhuipy miid yi' ajcxy ycixpi. Ndunipyich may'ajt miid yi' ajcxy, e huin'it miich yi' ajcxy mmijotmädiy.

²⁰ Jadu'n jadüg'it Isaías cojay ma yi' ñecy, ma Dios jadu'n ymina'n:

Yi jäy ajcxy huidibi ca' xy'ixtäyich, ti xypaadyich ajcxy. Ti nyajnigüexgyich ndiy'ajt ma yi jäy huidibi ca' xyñidiy xyajtiyich.

²¹ Com jadu'n jaybety ymiin ma Dios ñecy, ma Dios jadu'n nigapxy yi Israel jäy co jadu'n ymina'n:

Jabom jabom ti njamimecxtucyich yi Israel jäy ajcxy. Ti njayajnimäyich ñch ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

Yi Israel jäy ajcxy huidibi ti yocynihuaatzcixy

11 Paady n'amidoogixy: ¿Nej ti jada' Dios ix'ijxni ix-tijni yi Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy ñch. Abraham nmij'ap'ajtibich nmijteedy'ajtibich e nañ jim ngogápidyich ma anajty Benjamín ycocajpity. ² Dios ca' ixmach yi' yjäy huidibi yhuin'ijx jecy'ajty co jäy'ada'nyii jigix jëbi may'ajt oy'ajt tunipy miid yi' ajcxy. ¿Nej ca' ajcxy mnejhuïy nej jaybety ymiin ma Dios ñecy jadu'n nej Elías nigapxy yi Israel jäy ma Dios? Jadu'n ymina'n:

Huindzin Dios, ti yi Israel jäy ajcxy yaj'öctäy huidibi anajty miich m'ayuc xycapxhuäcxiy. Ti ajcxy yajhuindigoydäy je tzaa macxy ma anajty jäy xyhuindzigiy. Naydügpajc ñch ti njachui'myich njaccapxhuäcxyich miich m'ayuc, e nañ xyaj'ögaamich jäy ajcxy.

⁴ E chi Dios y'adzooy nimay Elías:

Ca' mim naydügity, ji ñch ahuing nmídidyich yujpcicy jahuixtuc mil yeydiyc huidi xy'ojadajtpich xyhuindzigiybich chambaad, huidibi ca'ni huingoxtinäy yi Baal, yi dios falso, ca'pi ti mic'ajt miidity ni ti tzöc'ajt ca miidity.

⁵ Tím jadu'n nej Dios miidit̄y anajty huixtujc mil yēydijc-tijc jecy'ajty co anajty Elías yjugy'aty, nañ tím jadu'n cham ma ñch ajt nxī ndiempo Dios ymiid nijējity judío-jäy huidibī ti pa'ayoy, e paady ycixpī ti yhuin'ixyii jēbī yí jāy'adyii. ⁶ Com co ixypy ajcxy yajxon cuydun̄i Dios ycōtujc̄in, ca'p ni ti pa'ayo'n Dios jactunaan̄i miid yí ajcxy, com co ti anajty jim Dios y'ayuc ycuycundāyii.

⁷ ¿Ti ti ytunyii ti yjadyii miid yí Israel jäy ajcxy? May ajcxy ca' may'ajt̄in oy'ajt̄in paady ma Dios jadu'n nej ajcxy jijp'ijxcixy. Jēyi ajcxy huidi Dios huin'ijxī ti ajcxy paatcixy oy'ajt̄in ma Dios. Yí jacjadyii Israel jäy ajcxy Dios nīg ooy yajjotmij'ōccixy. ⁸ Com jadu'n jaybety ymiin̄ ma Dios ñecy jadu'n nej Dios yajjotmij'ōgy yí Israel jäy, ma jadu'n ymiñañ:

Tím jadu'n ajcxy nipaady nej jäy ajcxy huidibī ti ymi'ōctigooyñī, jadu'n nipaady nej jäy huidibī huiintz̄ip, jadu'n nipaady nej huidibī cōnat̄ip.

⁹ David nañ jadu'n ycojay jecy'ajty ma ñecy, ma jadu'n ymiñañ:

Huindzin Dios, cham je jäy tzachnixondägy yí tzi-naayin yí jugy'ajt̄in, ca' ajcxy xyjäymech. Timitiinī ajcxy ayo'n möhuipy; tím jadu'n nej iyujc ayo'n paady co yajt̄uxuuch o co yjut cōgäy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jäy huintz̄pī. Mö ajcxy tzaachyp̄i huinix̄i huin̄itiempo, tím jadu'n nej jäy ajcxy tzaachyp̄i jihuix̄y huidibī jemxyp̄i tzimēccixp̄.

Yí ypocyhuinmeecxin̄ huidibī ajcxy ca'p yjudiojäyity

¹¹ Co jadu'n yí maybī Israel jäy ca' cōbijccixy Dios ytiy'ajt, ¿nej mdiy, ti Dios y'ixmachyii ajcxy tücc̄i'yí, e yajtigoya'ñ ajcxy? Pues ca' yjadu'nity, ca' Dios ixmach yí Israel jäy ajcxy tücc̄i'yí. Co yí Israel jäy ca' cōbijccixy Dios ytiy'ajt nej Cristo y'o'cy miid yí ajcxy ypocy ycixpī, paady cōbicy yí huidibī ca' yjudiojäyity, jēbī ajcxy y'al-ma niidzooc̄in paady. Jadu'n Dios ytuñ jigix̄ jēbī yí judío-jäy ajcxy cohuindoȳī jihuix̄huipy, e chi nañ jadu'n mijpidägyipy ajcxy Jesucristo. ¹² Pen yí mayjäy ajcxy huidijaty ca' y'israeljäyity mij'oy'ajt̄in mijjotcuyc'ajt̄in ti paady, miid co yí jacmaybī Israel jäy ca' cōbijccixy Jesucristo, chi nīgī oy'ajt̄in jotcuyc'ajt̄in pada'ñ yí naax-huiñyjäy ajcxy co anajty nidüg'óciy Israel jäy yjothuimbijttaaygixy etz cōbijc̄taaygixy je Cristo.

¹³ Cham nijaȳiygixy miich ajcxy huidi ca' yjudiojäyity, com Dios ti xyquexyich ngapxhuäcxich yí y'ayuc ma yí jäy ajcxy huidibī ca' yjudiojäyity. Ooy nyajcopicyich jadanungich, jigix̄ jēbī judío-jäy oy'ajt̄in paady nañ jadu'n.

¹⁴ Ca' jecyity co ñch n'amigügtijc, yí judío-jäy ajcxy, cohuindoȳī ajcxy jihuix̄huipy, co anajty mayjäy huidi ca' yjudiojäyity mijpidägy ñch n'ayuc. Co jadu'n ajcxy cohuindoȳī jihuix̄huipy, chi ajcxy nañ jadu'n mijpidägyipy Jesucristo. ¹⁵ Com pen je naaxhuiñyjäy huidibī ca' yjudiojäyity, huidibī Dios jecy'ajty ca' jäygidaci ajcxy chinaayin, pen ti ajcxy cōbijcī Dios ytiy'ajt, pen ti ajcxy oy'ajt̄in paady ma Dios, miid co Dios ti ixmach yí Israel jäy huidibī ca' cōbicy yí ytiy'ajt, chi yí Israel jäy co ajcxy jadüg'oc yjothuimbidiipy etz cōbigipy Dios ytiy'ajt, nañ jadu'n ooy yjotcuḡihuipy ajcxy, jadu'n nejihuix̄y ti ajcxy

y'ögy etz nej jihuix̄y ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajt̄ip, paady nañ jadu'n tüg'óciy Israel jäy Dios jäy'adyii, miid co Israel y'ap'ajt̄ip y'oc'ajt̄ip ajcxy. Tím jadu'n nejihuix̄y judío-jäy ajcxy tzajcaagy puuducy möy Dios, nañ jadu'n je ytujtuc huidibī jac-huim̄ nañ Dios je' yje', e nañ tím jadu'n nej co jäy ajcxy möy Dios quipy ytictz, tüg'óciy je' Dios je'ajt̄ayii quipy y'aacxy.

¹⁷ Hue' je' nijējity Israel jäy ca' mijpidägy Dios ytiy'ajt, paady ñajtz'ix̄iyi, e may'ajt̄in oy'ajt̄in tuñ miid huingbī jäy huidi ca' israeljäyity. Tím jadu'n nej jihuix̄y tüg'oyquipy huidi tím'ajt̄p yajpubuxy y'aacx, e je ma ti yajjijppujxtüty, je' yjijp yajpidägy ma huingbī quipy y'aacx. Miich ajcxy huidi ca' yjudiojäyity huidibī ti mibicy je Cristo, ti mbaady Dios y'oy'ajt̄in tím jadu'n nej judío-jäy ajcxy jecy'ajty miidit̄y Dios y'oy'ajt. ¹⁸ Ca' huaad amij agix mnayjihuiygyixy, e ni ca' huaad m'ixtjicixy yí judío-jäy huidibī ca' mijpidaaccixy je Cristo. Miich ajcxy yí m'oy'ajt̄in ti mbaady ma Dios, tím jadu'n nej je quipy y'aacx mic'ajt̄in paady ma yí quipy ytictz.

¹⁹ Ca' yjecyity co miich ajcxy min̄a'naangixy co Dios najtz'ix̄iyi yí judío-jäy huidibī ca' mibicy Cristo, jaydēbī miich ajcxy mnaydiȳii co Dios xyjäy'adyii. ²⁰ Tiy'ajt̄in jadu'n nej miich min̄a'ñ. Dios ñajtz'ix̄iyi yí maybī judío-jäy miid co ajcxy ca' mibicy Jesucristo. E Dios miich ti xycōbicy miid co ti mmibicy Jesucristo. Per ca' huaad miich amij agix mnayjihuiȳii miid co Dios ti xycōbicy. Naygüend'adī yajxon ma Dios ytiy'ajt, tzigi' Dios.

²¹ Com Dios ñajtz'ix̄iyi yí judío-jäy ajcxy miid co ca' ymijpidägyii yí ytiy'ajt. Nañ jadu'n miich ajcxy yí xyñajtz'ix̄ihua'ñ, pen ca' mmijpidaaccixy yajxon yí ytiy'ajt.

²² Cuentipic jadu'n nej Dios may'ajt̄in oy'ajt̄in tuñ miid nijējity jäy, etz mic tzaachytuñ nijējity jäy. Dios mic tzaachytuñ je judío-jäy huidibī ca' ycapxymidooy, etz may'ajt̄in oy'ajt̄in tuñ miid miich ajcxy huidi capxymidoob. Jaccyudun yajxon Dios ytiy'ajt, e nīgī Dios may'ajt̄in oy'ajt̄in xytuunipy, pen ca' mguydun̄i yí ytiy'ajt, huin'it Dios xyñajtz'ix̄ihuiipy. ²³ E nañ jadu'n yí judío-jäy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidägyipy Jesús, huin'it Dios ycōbiḡiyb jadüg'oc, etz Dios miid ymic'ajt̄in jēbī may'ajt̄in oy'ajt̄in tunipy miid yí ajcxy. ²⁴ Com pen miich ajcxy huidi ca' yjudiojäyity huidibī jecy'ajty anajty ca' Dios jäy'adyii, pen miich ajcxy Dios mic'amy ti xycōbicy, nañ jadu'n jactzojc cōbi-ga'ñ huidibī ajcxy judío-jäyip, pen ycōbijcy ajcxy.

Jadu'n nej Dios yajn̄idzoocogix̄hua'ñ Israel jäy ajcxy

²⁵ Miich ajcxy nmigügtijc̄ich, nyajnijaȳiyb ajcxy jadu'n nej Dios tuna'ñ miid yí Israel jäy, jaydēbī ca' miich ajcxy amij agix mnayjihuiȳiyb, etz jaydēbī mnejhuix̄huipy jada tiy'ajt̄in huidibī ca' pin nejhuix̄y, co yí Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'ñ mabaad anajty yca'pxy je mayjäy, ca'pī y'israeljäyity je huidibī mijpidägam Jesucristo ytiy'ajt. ²⁶ Nejhuix̄yim co Dios may'ajt̄in oy'ajt̄in tunamb jadüg'oc miid tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymiñañ:

Jacjiini tüg Israel jäy ymina'n huidibi yajnīdzögamb ajcxy ma y' ypocy. Y' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'n: Jadu'n nyajhuinhuaniiyich y' Israel jäy co y' ajcxy ypocy nyajtigooybich.

²⁸ Co y' Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiiy. E co ñajtz'ixiiy ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay y' Israel jäy mīd co Dios huin'ixy y' Abraham, Isaac etz Jacob jecy'ajty jēbi y' yjā'adyii. ²⁹ Dios ti huin'ixy y' Israel jäy ajcxy jēbi y' yjā'adyii, etz tūg'óciy huidi yajhuinhuaniiy co möhua'n, co may'ajt tuna'n mīd y' ajcxy ycixpi. Ymöhuiipy y', ytunipy y'. Dios ca' y'ayuc yajxigy. ³⁰ Miich ajcxy huidi ca' yjudíoäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, mīd co y' Israel jäy ca' mijpidägy Cristo ytiy'ajt. ³¹ Y' judíoäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'n jadüg'oc mīd y' judíoäy ajcxy tim jadu'n nej ytuñ mīd miich ajcxy jadachambi xii tiempo. ³² Com Dios anajty ti yajpocycädäy tūg'óciy jäy co ajcxy ycapxycömidodacy, y' judíoäy etz nañ huidi ca' yjudíoäyity, paady ycixpi Dios pa'ayo'n tuñ mīd nidüg'óciy jäy, judíoäy etz nañ huidi ca' yjudíoäyity, tūg'óciy pin mijpidacp y' ytiy'ajt.

³³ ¡Ooy ycodzīgijity Dios! Dios ooy mijcajee may'ajt oy'ajt tuñ mīd jäy ajcxy ycixpi. Dios ooy mijcajee mijhuinma'n ti tuñ mīd jäy ajcxy ycixpi. Dios ooy mijcajee ycohuinma'nity. Ca' ni pin jēbi huinjihuīydäy je ayuc huinma'n huidi Dios ymīd. Etz nañ ca' ni pin jēbi huinjihuīydäy huidibi Dios ytumy. ³⁴ Com jaybety jadu'n miñ ma Dios ñecy ma jadu'n ymina'n: Ca' ni pin jēbi huinjihuīydäy nej Dios yhuinma'n mīdity. Ca' ji ni pinjäy huidi ti capxhuijy Dios.

³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy mīdity mīd ni pinjäy. ³⁶ Tūg'óciy huidijaty ñch ajt ya nbaatim, ac jilby choondäy ma Dios. Y' tūg'óciy ti yaj'oyiydäy, e y' je'ajtaayip tūg'óciy. ¡Tzoc Dios capxpaatim ojadajtim huinixi huinitempo! Jadu'n jadu'n. Amén.

Je jugy'ajtin cixyjot ma Dios

12 E jadu'n nmīgügtijcich, cham ñch miich ajcxy ni-maaygixy mictägy, com co Dios ti xypa'ayoogixy, paady ycixpi nay'ayéjicix nayg'yéjicix amuumdügjet ma Dios. Cuychinay y' ytiy'ajt yajxon jabom jabom. Tzinaaygix mīd huädz mjot mhuinma'n, jadu'n nej Dios jēbi jäygidägy y' mdzinaayin. Jada je tiy'ajt nej jēbi Dios m'ojadajtcixy tiydudägy. ² Ca' ajcxy mguydungixy mguychinaaygixy y' naaxhuiñyäjy ajcxy yjibicjot yjibic-huinma'n huidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'n, paady mguydunipy ajcxy y' ytiy'ajt. Ixpjicix Dios ytiy'ajt, jigix ajcxy mnejhuñhuipy huidibi tiy'ajt Dios chojcyp mguydunipy, etz jigix mhuinjihuñhuipy je oyhuinma'n, je tudägybi huinma'n

huidibi Dios yjäygidacpy, je huinma'n huidi huädzip ca'pxyip.

³ Com Dios may'ajt oy'ajt ti tuñ mīd ñch etz ti xymöyich jada tung co ngapxhuäcxich y' y'ayuc, paady ñch miich ajcxy nimäy nidüg'óciy co ca' huaad amij agix mnayjihuiyigixy, ca' huaad nigī anaxy mnaygömaayigixy ci'm. Nidüg nidüg ci'm huin-maaygixy yajxon huidi tung jēbi myajnicxixy, jadu'n nej Dios huijy'ajt cujc'ajt ti xymooygixy. ⁴ Jadu'n nej ñch ajt nninixc ymīd yhuin y'ahuac etz yci' ytecy, je ninixc abicy ytung mīdity, je huin abicy ytung mīdity, je y'ahuac abicy ytung mīdity, etz je ci' tecy abicy ytung mīdity. ⁵ Nañ tim jadu'n ñch ajt huidi mijpidacp Cristo, e ni may ñch ajt, e tūgpic yäy ñch ajt com túciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jēbi nije' nije' Dios ytung nya-jnxcim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jēbi ngapxhuäcxim y' y'ayuc, copicy ngapxhuäcxim mibaad ixpijcin nmīd'ajtim. ⁷ Pen Dios huijy'ajt cujc'ajt ti xymooyim co jēbi nbubejtim nmīgügtijc, copicy nmīgügtijc nbubejtim. Pen Dios huijy'ajt cujc'ajt ti xymooyim jēbi nyaj'ixpijcin nmīgügtijc, copicy ndung'ajtim yaj'ixpijci. ⁸ Pen Dios huijy'ajt cujc'ajt ti xymooyim co jēbi ngapxhuijim nmīgügtijc, co jēbi njot'amijmooyim nmīgügtijc, copicy ngapxhuijim nmīgügtijc, etz njot'amijmooyim nmīgügtijc agujc jotcujc. Pen nyejcin tijaty ma nmīgügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'ngixipy. Pen Dios huijy'ajt cujc'ajt ti xymooyim co jēbi nbubejtim jäy ajcxy huidibi ayo'n mīd jotmay mīd, copicy agujc jotcujc nbubejtim pinjaty ayo'n mīd jotmay mīd.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjet, ca' y'amet zjotmetzity. Ca' mni-jot'ajtcixy jibic jot jibic-huinma'n. Nijot'ajtcix nigī oyjot oyhuinma'n. ¹⁰ Naychójcigix nayjihuiyigix amuumdügjet, jadu'n nej ypadyii mnaymīgüg'ajtigixipy ma Jesucristo. Nayajmij'ajtigix nigī nidüg nidüg miich ajcxy.

¹¹ Naymic'ixigix cixyjot huinjot, ca' mnuux'ajtcix. Tungix amuumdügjet mīd mHuindzin Jesucristo ycixpi.

¹² Tzinaaygix agujc jotcujc, com mnejhuñy ajcxy co mbada'n oy'ajtin ma Dios. Mecxtujccix y' tzaachypī ayo'n huidibi mminajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmīdzip huen Dios may'ajt oy'ajt tuñ mīd y' ycixpi. E ca' mnibijctzohuiy co huen ayo'n paadipy.

¹⁵ Tzoc jotcuyc nayjihuiyim co ajt nmigügtijc jotcuyc ñayjihuiyii. Tzoc mïdtajam mïdmayim nmigügtijc pen tajp mayb.

¹⁶ Ooy yajxon nayyaj'ijtigix naygodig'iyigix. Ca' amij agix mnayjihuiyigixy. Migüg'adiyb yi mmigüg huidi ayooob. Yung naxy mïd'at mjot mhuinma'ñ, ca' mnaygömaayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'ijtigix mïd nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidiy, mímecxtugipy ajcxy, com Dios yí' tzaachytunip yi jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n ymiñañ: "Ñich nay'ahuimbidiyich nej anajty jäy xymidundigóoygixy." ²⁰ Co jäy xymidundigóoygixipy myaj'ahuimbidiy ajcxy oybi, com jaybety jadu'n ymiñ ma Dios ñecy, ma jadu'n ymiñañ:

Pen yi mmidzip yubo'cip, myajcayipy myaj'ügipy, pen yi mmidzip tidziyipy, myajni'ügipy. Co jadu'n mdunipy mïd mmidzip huin'it tzoýdu'n jihuihuipy.

²¹ Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yaj-tun mecxtujcín etz oyhuinma'ñ, e jadu'n jibicpi mímädägy mïd oybi.

13 Copicy co nidüg'óciy jäy capxymidóogixipy yi ca-
jp tungmïdipi etz yi gobierno tungmïdipi. Ca' ji ni tüg tungmïdipi huidibi jëbi y'ane'my pen Dios ca' a'ixy. Com Dios jadu'n cötujcín ti yajhu' my co huen jil'aty tungmïdipi, paady ycixpi tungmïdipi, nidüg'óciy jim mic'ajt paady ma Dios. ² Paady jäy ajcxy pinjaty ca' ycapxymidoy ma tungmïdipi, hue' tundi-gooyb ma Dios e tzaachypí ajcxy ypadaamyb. ³ Yí mij-tungmïdipi ca' yí' ajcxy adzigy yi jäy huidijaty oyhuinma'ñ mïd. Hue' janchtiy yí' ajcxy chaachytunipy yi jäy huidi jibic-huinma'ñ mïd. Pen mdzojcp co ca' tzaachypí mbaadipy ma yí tungmïdipi, hue' janchtiy oybi mdunipy, e huin'it m'idipy jotcuyc. ⁴ Com Dios ti pidägy jada tungmïdipi mïd miich ajcxy ycixpi, jigix jëbi jotcuyc ajcxy mdzinaaygixy. Pen mdundigooyb huin'it je tungmïdipi mdzigihuipy, com yí' ymïd mic'ajt jëbi tzaachytuñ jäy ajcxy huidibi tundigooyb. Com Dios ytung ytuunipy etz ycuuduunipy Dios ycötujcín jadu'n nej Dios xyñajtz'ane'miyyim, copicy co tzaachytuñ je jäy ajcxy huidibi tundigooyb. ⁵ Paady ycixp copicy mgapxymidohuipy tungmïdipi, jigix ca' miich ajcxy Dios xychaachytunipy e nañ jotcuyc mnayjihuihuipy co ca' anajty ti ti mdundigoy. ⁶ Yí tungmïdipi Dios ycixpi ajcxy ytuñ, e ymïd ajcxy ycötujcín, paady ycixpi copicy mmigüedipy ajcxy.

⁷ Mgüedipy ma yí tungmïdipi, hudibi xypaatp. Co ajcxy cajp meeñ yajmucy, migüedipy. Co je gobierno tungmïdipi pidägy impuestos, migüedipy. Jäy ajcxy huidijaty tungmïdipi myajmij'adipy, etz huidi mijtungmïdipi mgömayipy. ⁸ Ca' pin minuucxy'adiyb. Tzoc jihui' mmigügtijc, e mgüedipy oy'amy huidibi mnuucxyp. Co yí mmigügtijc mdzogipy mijhuihuipy ti anajty mguy-

dundäy Dios ycötujcín. ⁹ Jadu'n Dios ycötujcín jaybety ymiñ, ma jadu'n ymiñañ: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'aj'ögipy. Ca' mmigüg m'adzojipy ti ymïd." Pen mdzojcpy mijhuipy migüg nej miich cí'm mnaychogyii ti anajty mguydundaayí Dios y'ane'min ycötujcín. ¹⁰ Je naychojcin je nayjihuiyín ca'p je' ti jibicpi ti tzaachypí tuñ ma je migüg, co jadu'n jada mguydundaahuipy ti anajty Dios ycötujcín mguydundaayí.

¹¹ Com miich ajcxy mnejhuipy co huigon je xii je tiempo miña Jesucristo miñañ jadüg'oc ya naaxhuiñ, paady ycixpi jip'ijxcix ajt nHuindzin Jesucristo co tzojcy ymiñipy. E jadachambi ti yjac-huigoní miña miñañ ñich ajt nHuindzin Jesucristo, ca'ydi co oga'n nmibijcim.

¹² Canaag jimijt jäy ajcxy ahuijxy jip'ijxpy co Dios yaj-nidzöga'ñyii ajcxy y'alma, jadachambi ti yhuigoní je xii je tiempo miña n'alma ajt nidzoocin padaanim.

Paady ycixp tzoc ixmajtzim yí jibic-huinma'ñ yí huidibi jäy ycuuduemyb huidibi ca' Dios ytiy'ajt nejhuipy. Tzoc cuychinaayim cuyjuy'ajtm Dios ytiy'ajt. ¹³ Tzoc tzi-naayim jugy'ajtm tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtm xiicyaax xiictinaayim. Ca' huaad ndundigooym mïd huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmí'ijxtinaayim. ¹⁴ Tzoc cuychinaayim cuyjuy'ajtm Jesucristo ytiy'ajt. Tzoc tzi-naayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

Ca' migüg mbocy'ixy

14 Miich ajcxy nmigügtijc, copicy mgöbigipy agujc jotcuyc ma miich mnayyömjüjgixy ajcxy yí migügtijc huidibi mibijcp je Cristo, per ca' tiydudägy huiñihuipy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy mïd yí' ajcxy. ² Ti migügtijc huidibi minamb co Dios ca' ti jicxy capx'aducy, etz jëbi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyii je'jada'ajty aay ujtz. ³ Yí migüg huidibi tzüch tzütp ca' huaad ixtijy je ymigüg huidibi yjicxpy je'jada'ajty aay ujtz. E nañ ni yí migüg huidibi jicxp aay ujtz ca' huaad ixtijy yí migüg huidibi tzüch tzu'tzp, com Dios ycöb'ijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mnimähuipy yí mmigüg co ca' oytuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios cí'm nimähuip huidi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymiñañ co ooy ycopicyity n'amay'ajtm nijëjity xii, jacjadyii jäy ymiñañ co ca' ycopicyity n'amay'ajtm jada xii. Huen nidüg nidüg yci'mhuinma'ñ yajtuñ pen y'amay'adamyb, o pen ca' amay'ada'ñ nije' nije' xii. ⁶ Ñich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojcp. E nañ ñich ajt nmigügtijc huidi tzüch tzu'tzp, hue' ajcxy tijy co Dios jadu'n tzojcp, etz nañ yajnajxyp

Dioscojuyip ma Dios mïd yjïcxy ypicxy ycixpi. Nañ tim jadu'n ajt nmigügtijc huïdi ca' tzüch tzüdza'ñ, hue' tijy co Dios jadu'n tzojcp, etz nañ yajnaxyp Dioscojuyip mïd yjïcxy ypicxy ycixpi.

⁷ Ca' ñich ajt nayajtzinaayim amidzooci'm, nañ jadu'n ca' ñich ajt cï'm ndzojcin co n'o'cim. ⁸ Pen njactzinaayim hue' anajty nguuduunim ajt nHuindzin Jesucristo chojcin. Pen n'o'cim yi' anajty jadu'n ti yajcöducy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzaayin etz ma yi o'cin. ⁹ Paady ycixp Cristo y'o'cy etz yjugypijcy jadüg'oc jigix jëb nihuindzin'ajttäy yi' yjây huïdibi jactzinaayb jacjuyg'yajtp, etz jigix jëb nihuindzin'aty yi' tïbi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'ïdich. Com nidüg'öciy ajt njädaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymina'ñ:

Janch janch co ñich, je tügpajcpi Dios, jadu'n nmi-na'ñich co tüg'öciy naaxhuiñyây xyhuingoxtinähuïbich xyhuindzigïhuïbich, etz nañ tüg'öciy naaxhuiñyay xycapxpaadibich co ñich je' tügpajcpi je Dios.

¹² Com Dios nhuindzin'ajtim, paady ycixp nidüg'öciy ñich ajt nayguëxctähuaanim ma Dios yhuinduu, chi Dios xy'amïdohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'ñyidigoogyixy

¹³ Paady ycixpi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdungixipy huïdi mmigügtijc ca' jäygidägy, huïdi mmigüg yajpocycähuïb. ¹⁴ Nnejhuïybich tiydudägy co ajt nHuindzin Jesucristo ytiy'ajt xyajnejhuïyim co jëbi njïcxim huen tim huïdi jicxy tim huïdi picxy. Je jicxy je picxy ca' ma ycobocy. Per pen tüg migüg yhuinma'ñ pïdacp co Dios ca' jäygidägy co yi' yjïcxy nijëjity jicxy picxy, pues ca' yhuaadity co yi' jadu'mbi jäy jicxy huïdi yi' ytiyco co ca' huaad njïcxim. ¹⁵ Pen ca' m'oy'ity mïd tüg migüg co ti mjicxy je jicx picxy huïdibi yi' ytiyco co Dios ca' jadu'n yajcöducy, chi ca' anajty mdzocy mjihuïy yi' mmigüg nej ypadyii. Com nañ Cristo ti y'ögy mïd yi' mmigüg ypocy ycixpi, paady ca' huaad myajtigoy yi' mmigüg, mïd co mjicxy huïdi yi' ca' jäygidägy. ¹⁶ Ca' ajcxy m'a'ixiygixipy co jibic yajnegapx yajnimydgäpy huïdibi miich ajcxy myajnaxp co y'oyity. Oy miich mjahuinjihuïy Dios ytiy'ajt, per ca' huaad mdunipy huïdi yi' mmigüg ca' jäygidägy, e huin'it xyñigapxipy jibic.

¹⁷ Canan Dios jadu'n ytiy'ajt xyñajtz'ane'mïyim huïdijaty huaad njïcxim n'uucim, o huïdi ca' huaad njïcxim n'uucim. Hue' janchtiy ti xyñajtz'ane'mïyim nej jëbi tiydudägyi ndzinaayim njugy'ajtim. Nej jëbi jotcuyc n'ijtim mïd ajt nmigügtijc. Nej jëbi jotcuyc nayjihuiyim mïd Dios ymic'ajt ma njot mhuinma'ñ. ¹⁸ Co jadu'n nguuduunim nej Cristo ytiy'ajt ti xyñajtz'ane'mïyim, huin'it jäygidägyipy Dios etz nañ jadu'n jäygidägyipy jäy ajcxy nej anajty nduunim.

¹⁹ Tzoc panïcxim je huinma'ñ jadu'n nej jëbi ndzinaayim agujc jotcuyc mïd ajt nmigügtijc, ca' ma ti tzip

ti capxy nmïd'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtigooyim Dios ytung mïd tzip capxy jadu'n nej huïdi jëbi huaad ndzüdzim, etz huïdibi ca' huaad ndzüdzim. Janch tiy'ajt co Dios ca' ti jicxy ti picxy capx'aducy, per pen njïcxim huïdijaty nijëjity ajt nmigügtijc yajcoboicpy, e jadu'n nyajhuinma'ñyidigooyim ajt nmigüg, chi nmïdunidooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzim etz ca' huaad vino n'uucim, o jactijaty huïdibi ajt nmigüg yajcoboicpy. Com co jadu'n ajt n'ïdïdzim, hue' anajty ajt nmigüg nyajhuinma'ñyidigooyim ma ymïbijcin. ²² Miich ajcxy huïdibi huinjihuïyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy mïd jäy ajcxy. Dios ñejhuïyb co miich mhuinjihuïy yi' ytiy'ajt. Jëbi jotcuyc mdzinähuïy pen mguychinaayb je huinma'ñ huïdibi miich mnejhuïygixy co ytudägyity, e huin'it ca' jibic mnayjihuihuïyb ajcxy. ²³ Tundigooyb yi' migügtijc huïdibi jotmetz jïcxy nijëjity jicxy picxy, mïd co tzigïyb yi' co Dios ymïjotmädiyb co ti jicxy huïdi ytiyco ycobocy. Tundigooyb jadu'n com ca' ti cuydunï Dios ytiy'ajt nej cï'm ti yajnigüeey. Pen ca' nguuduunim jadu'n nej mhuinjihuïyim Dios ytiy'ajt, tundigooyim anajty.

Tzojcx migügtijc, ca' ñaydüg mnaychogyii

15 ñich ajt huïdibi tiydudägy nmïbijcim etz mhuinjihuïyim Dios ytiy'ajt, copicy nmïmecxtujcim ajt nmigügtijc huïdibi ca'ni huinjihuïy yajxon Dios ytiy'ajt. Ca' huaad ti nduunim mïd ngï'm jäygidäcin ycixpi. ² Copicy nyajtuunim oyhuinma'ñ mïd ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg mïd ymïbijcin. ³ Com nañ Cristo ca' ti ytuñ mïd yci'm jäygidäcin ycixpi, com jaybety jadu'n miñ ma Dios ñecy, ma je Cristo nimay Dios Teedy: "Miich mmïdzip ajcxy huïdibi xyñigapx xyñi'ojïyb, xyñigapxich xyñi'ojïybich ajcxy nañ jadu'n." ⁴ Com tüg'öciy Dios y'ayuc huïdibi ycojay jecy'ajty, hue' cojay mïd ñich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuïyim co Dios jadu'n tzocy co nmïmecxtujcim ajt nmigügtijc. Nañ Dios y'ayuc xyjot'amijmooyim, e nañ xyajnejhuïyim jadu'n jëbi njjip'ijxim pubejtin ma Dios. ⁵ Com Dios, yi' je' huïdi xypubejtim mïd mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmïd'idipy tú'ciy mjot mhuinma'ñ nej Jesucristo yjot yhuinma'ñ mïdity, e jadu'n jëbi mnayaj'oy'ijtigixy jotcuyc ca' ma tzip capxy. ⁶ Dios miich ajcxy xypubedipy xypudigïhuïy, jigix jëbi myajtügïygixy mjot mhuinma'ñ, etz tú'ciy m'ojadäjtçixipy mhuindzigïygixipy Dios Teedy etz ñich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudío-jäyity

⁷ Naygöbñjicigix nidüg nidüg agujc jotcujc, tim jadu'n nej Cristo xycöbñjicixy agujc jotcujc. Co mnaygöbñjicigixipy nidüg nidüg agujc jotcujc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíojäy ajcxy, e jadu'n cuyduñ Dios ytiy'ajt huidi yajhuinhuaniy Abraham, Isaac etz Jacob jecy'ajty co jadu'n tuna'ñ miid yi' ajcxy ycixpi. ⁹ Nañ jadu'n Cristo ooy pubejty yi' huidibi ca' yjudíojäyity, jaydëbi ajcxy capxpaadipy Dios, miid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymiñ:

Com miich Huindzin Dios ti xycohua'ñich paady miich ngapxpaady ma yi jäy ajcxy huidibi ca' yjudíojäyity. ñich miich nhuin'ñhuipy miid himnos.

¹⁰ E nañ jaybety jadu'n ymiñ ma Dios yñecy:

Jotcujc'ajtcixy quipxy miid Dios yjäy miich ajcxy huidi ca' yjudíojäyity.

¹¹ E nañ jaybety jadu'n ymiñ ma Dios ñecy, ma jadu'n ymiñ:

Capxpaatcix yi Huindzin Dios miich ajcxy huidi ca' yjudíojäyity. Capxpaatcix yi Huindzin Dios miich ajcxy nidüg'óciy naaxhuiñyjäy.

¹² E Isaías ycojay nañ jadu'n ma yi' ñecy, ma jadu'n ymiñ:

Ma'xung'adamb tüg Isaí y'ap y'oc, e yi' ane'mamb yi jäy huidibi ca' yjudíojäyity. Co yi jäy ajcxy huidibi ca' yjudíojäyity mijpidägipy je mij'ane'mbi, hue' ajcxy yjijp'ijxpy co möhuaanip oy'ajt.

¹³ Nmibijctzooybich Dios miid miich ajcxy ycixpi hidijaty mibijcp Jesucristo, com njijp'ijxim co Dios xymöhuaanip oy'ajtin. Nmibijctzooybich Dios miid miich ajcxy ycixpi co huen xyajjotcugñhuip ajcxy, e nañ co huen xyajpoocixpy mjot mhuinma'ñ. Nmibijctzooybich Dios co huen xypubejtcixy xypudigiiygixy miid yi' yjihui'ñ ymic'ajt, jaydëbi mijp'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcujc nayjihuiyijich miid miich ajcxy ycixpi, com nejhuñybich co miich ajcxy mñdity oyjot oyhuinma'ñ, e nañ mhujihuiyb ajcxy tüg'óciy Dios ytiy'ajt, paady jëbi mnayyaj'ixpñjicigixy nidüg nidüg. ¹⁵ Jotmic'amy ti nyajjäymejtcoodyich miich ajcxy nijëjity Dios ytiy'ajt ma jada necy huidi nyajni-jayñyb ajcxy cham, com Dios may'ajt oy'ajt ti tuñ miid ñich, e ti xyhuin'ixyich jaydëbi nduñich Jesucristo ytung ma yi jäy ajcxy huidi ca' yjudíojäyity. Jadu'n nduñich miid Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy miid jäy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yi mayjäy ca'pi yjudíojäyity huidi ti mibicy Jesucristo etz hidibi yi Espiritu Santo ti yajhuäch je jibcp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma ñich njot nhuinma'ñ, paady ycixp ooy jotcujc nayjihuiyijich co nduñich miid Dios ycixpi. ¹⁸ Jada janchtiy ñich nyajmñd-miydacy miich ajcxy je may'ajt huidi Cristo ti tuñ co

ngapxhuäcxyich yi' y'ayuc. Ca' nyajmñdmiydaaccixy huidi Cristo ytumyb miid jacpinjaty. Miid co ngapxhuäcxyich Cristo y'ayuc, e nañ mijhuinma'ñ ndumybich miid Cristo ymic'ajt, paady mayjäy ycapxymidooyb Dios huidi ca'p ajcxy yjudíojäyity. ¹⁹ Ti ngapxhuäcxyich tüg'óciy Cristo ytiy'ajt nej jëbi ajcxy y'alma ñidzoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigiiyich co ñich mijhuinma'ñ nduñich, etz Dios ytiy'ajt nyéjicibich. ²⁰ Ooy nijot'atyich co ngapxhuäcxyich Jesucristo ytiy'ajt ma anajty ca' pin jayijp capxhuäcxyñi. ñich oga'n Jesucristo y'ayuc jim nminicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi njijptigiyiyich ma huingbi anajty jayijp ti capxhuäcxi Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n ymiñ:

Yi jäy ajcxy ymidohuaanip Cristo y'ayuc hidibi ca'ni anajty midoogixy. Yi jäy ajcxy yhuinjihuihuaamyb je Cristo ytiy'ajt hidibi ca'ni anajty nejhuñygixy co yjijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxyich Cristo ytiy'ajt canaag agajp, paady ca' nyajniabadäyich nñcxybich ma miich ajcxy. ²³ Canaag jimijt ndzachnijot'atyich anajty nñcxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njijp'ijxypich co jëbi nnaxñhuñbich ma miich ajcxy co anajty nñcxyich jim España ñaaxjot. Huäcxñbaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nñcxa'ñich jim Jerusalén, chiini nñcxa'ñich ma miich ajcxy. Nminicxaamybich jim Jerusalén hueeni meeñ hidibi nyegaamybich ma yi mibijcpidijc jim Jerusalén miid ayoobtijc ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtijc jim Jerusalén hidibi mijpidacp Jesucristo. ²⁷ Ooy ajcxy jotcujc ñayjihuiyii co ymigügtijc pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajcñdigiyaaygixy je meeñ hidibi yi migügtijc ya Macedonia etz Acaya ti yajmujcixy miid je mibijcpidijc ycixpi hidibi yajpatp jim Jerusalén, huin'it nñcxa'ñich jim España ñaaxjot. Nnaxñhuaambich ma miich ajcxy co anajty jim nñcxyich. ²⁹ Nejhuñybich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigiipyich miich ajcxy je Cristo ytiy'ajt.

³⁰ Miich ajcxy nmigügtijcich, com miich ajcxy mijpidaaccixyp ñich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtügiiygixy m'ayuc mhuinma'ñ miid ñich, jëbi

tú'ciy Dios nmibijctzoohuim mictägy miid ñich ycixpi. ³¹ Mibijctzoogix Dios co huen xyñihua'ñich xycosua'ñich ma yi judíojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ñich jim ngäyegaamy. ³² Mibijctzoogix Dios co huen xypubedipy xypudigihuibich, jëbi nícxibich ma miich ajcxy agujc jotcuyc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuyc, e jim ñich nhuinma'ñ nyajpocxip. ³³ Mibijctzooybich Dios miid miich ajcxy ycixpi, je Dios huidibi jotcuyc'ajtin yejcp, co huen miich ajcxy xypubedipy xypudigihuiipy. Jadu'n jadu'n. Amén.

Capxpooxín nidüg nidüg ma pinjaty y'ixy'ajtyp

16 Cham ñich miich ajcxy nyajnijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yí' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopicyity co jäy huidibi mibijcp Jesucristo huen naymigüg'ájtigixy. Mbubedip mbudigihuiip jadu'n nej yí' jotmay miidity. Yí Febe ti ooy mayjäy pubety, e nañ ti xypubetyich.

³ Nguejxpyich capxpooxín ma jada necy miid yi Priscila etz Aquila huidibi ñich anajty miid ooy oy nduñ co ngapxhuäcxyich Cristo ytiy'ajt. ⁴ Yí Priscila etz Aquila yojx ytooc ajcxy yjugy'ajtin miid ñich ycixpi, ca' ydi n'ögyich. Nyajnajxypich jäygidaacin ma Dios miid yí' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacin ma Dios miid yí' ajcxy ycixpi. ⁵ Nguejxpyich capxpooxín nañ jadu'n ma jada necy miid yi mibijcpidijc ajcxy huidijaty naymujccip ma Priscila etz Aquila ajcxy ytiyc. Etz nañ nguejxpyich capxpooxín ma yi Epeneto huidibi ooy ndzocyich. Yí' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxpyich capxpooxín ma María, yí' ooy ti ytuñ miid miich ajcxy miid Cristo ycixpi. ⁷ Etz nañ nguejxpyich capxpooxín ma yi Andrónico etz Junias. ñich n'amigüg ajcxy huidibi ti ypujxtijc ññäy quipxy miid ñich. Capxpaady ajcxy y'ity miid yi apóstoltijc. Jacjayijp ajcxy mijpidacy Jesucristo ca'ydi ñich.

⁸ Etz nañ nguejxpyich capxpooxín ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxpyich capxpooxín ma yi Urbano huidibi xymiidtuñich co ñich anajty ngapxhuäcxyich Jesucristo ytiy'ajt. Nañ jadu'n nguejxpyich capxpooxín ma yi Estaquis huidibi oy ndzocy njihuüyich. ¹⁰ Nañ nguejxpyich capxpooxín ma yi Apeles, huidibi ooy tiy'ajt ti yecy co yí' ymibijcpcy Cristo tiydudägy. Nañ nguejxpyich capxpooxín ma yi Aristóbulo etz jac pinjaty huidibi yajpatp ma yí' ytiyc. ¹¹ Nañ nguejxpyich capxpooxín ma ñich n'amigüg yi Herodiön. Etz nañ nguejxpyich capxpooxín ma yi Narciso yjuugy ymigüg huidibi mijpidacp ñich ajt nHuindzin Jesucristo. ¹² Nañ nguejxpyich capxpooxín ma yi Trifena etz Trifosa huidijaty tumb

ma ajt nHuindzin Jesús ytung. Nañ nguejxpyich capxpooxín ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxpyich capxpooxín ma yi Rufo, je huidibi yi mibijcpidijc ycömaayb. Nañ nguejxpyich capxpooxín ma yí' ytaj, com jadu'n njihuüyich jadu'n nej jihuiy yí' ndaj'adyiijich. ¹⁴ Nañ nguejxpyich capxpooxín ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yí' ajcxy. ¹⁵ Nañ nguejxpyich capxpooxín ma yi Filólogo, yi Julia, yi Nereo etz yí' y'uch töxyjäybi, yi Olimpas, etz nañ tüg'óciy yi mibijcpidijc huidibi yajpaatp jim ma yí' ajcxy.

¹⁶ Naygapxpóocxigix xíc xon nidüg nidüg. Naygímájtzigix miñ yxipy agujc jotcuyc. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooxín ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtiy, huidibi nigoob yjäyajtziptuna'ñ yjäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yí' ajcxy. ¹⁸ Com yi jäy ajcxy huidibi ymigügtijc yajhuinma'ñyidigooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcin. Je' ajcxy huin'ñinigixp je jäy ajcxy huidibi ca' mijcajee y'ixpicity. Yí ayuc huidibi ymihuidijtyp, jadu'n yajmidoy nej jihuiy oy ytiyity yjanchity, per ca' yí' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidooy Jesucristo, paady jotcuyc nayjihuiyijich miid miich ajcxy ycixpi. Ndzojcpich co miich ajcxy mnejhuñhuipy huidibi oyhuinma'ñ jaydëbi mdúngxipy ajcxy etz ca' jibic-huinma'ñ mdúngxipy. ²⁰ Dios oyhuinma'ñ etz mic'ajt ti xymooyim jëbi ndzinaayim miid ajt nmigügtijc agujc jotcuyc, ca' ma tzip capxy. Tim huin-gon je xñ je tiempo mña Dios yajcödigoya'ñ yi mujcu' ymic'ajt, e yí' xypubedip xypudigihuiip jëbi mmi-madägiy yí' ca'oybi. Nmibijctzooybich Dios miid miich ajcxy ycixpi co ñich ajt nHuindzin Jesucristo huen may'ajt oy'ajt tuñ miid miich ajcxy jabom jabom.

²¹ Je Timoteo huidibi tumb miid ñich co ngapxhuäcxyich Jesucristo ytiy'ajt xyajniguejxp ajcxy capxpooxín. Nañ jadu'n Lucio, Jasón etz Sosípater ñich n'amigüg ajcxy, xyajniguejxp capxpooxín.

²² ñich Tercio huidibi cojaayb Pablo y'ayuc ma jada necy, nañ nguejxpyich capxpooxín ma miich ajcxy, com ñich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooxín, yí' xya-jjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcpcy ma Gayo ytiyc yquejxyp ajcxy capxpooxín ma miich ajcxy. Erasto je cajp ytesorero etz ajt nmigüg huidibi yxñ Cuarto, nañ xyajniguejxp ajcxy capxpooxín.

²⁴ Nmibijctzooybich Dios miid miich ajcxy ycixpi jabom jabom co ñich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpoox'in ma yaj'ihbaady yajcapxpaady Dios

²⁵ Tzoc cōmayim Dios, tzoc ojadajtim, tzoc huin'ihuim miid himnos. Dios miid ymic'ajt jēbi xypubedipy xypudig'ihuipy ajcxy, jaydēbi ajcxy tiydudägy mmibigipy Jesucristo, ca'ydī mjetmetzciiygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuīy huidibi Dios ti xyajnejhuīyim. ²⁶ Dios ti xya-

jhuinjihuīyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixi huinitiempo, ane'mb co huen yajcapxhuäcxy jada tiy'ajt oybi ma tūg'óciy naaxhuiñyäjy, jigix jēbi mayjäy mijpidägip etz capxymidoohuipy Dios.

²⁷ Miid co Jesucristo ooy mijhuinma'n tuñ miid ich ajt ycixpi, paady tzoc cōmayim, tzoc ojadajtim etz tzoc huin'ihuim miid himnos huinixi huinitiempo yi tūgpa-jcpi Dios huidibi ñejhuiydaayb tūg'óciy. Jadu'n ngapxcixyich. Amén.

1 CORINTIOS

1 Ìich Pablo, Dios jadu'n tzojcp co Jesucristo xya-jnìbicyich co ngapxhuäcxìbyich yì' y'ayuc. Ìich etz ajt nmìgüg Sóstenes nijayìybìch miich ajcxy tüg'óciy huìdibi jìm Corinto huìdibi mijpidacp Dios etz ñayyömyújcìgìxy jìm mìd Dios ycìxpi. Nijayìybìch miich ajcxy huìdibi Dios ti yaj'ahuimbìjtäy tudägy mìd Jesucristo co y'o'cy mìd ajcxy mbocy ycìxpi. Nijayìybìch miich ajcxy huìdibi Dios ti huin'ixy, jaydëbì mmìd'idìpy huädz jot huädz huinma'ñ. Nañ jadu'n nijayìybìch tüg'óciy je jäy huenyma'amyity huìdibi Dios mibìjct-zoob ojadjtp mìd ìch ajt nHuindzin Jesucristo yxì. ³ Ndzojcypich co ìch ajt nDios Teedy etz ajt nHuindzin Jesucristo oy'ajt may'ajt tunìpy mìd miich ajcxy, etz xyajjotcugìhuìpy ajcxy.

Oy'ajt mìd Cristo ycìxpi

⁴ Nyajnajxypich Dioscojuyip ma Dios jabom jabom mìd miich ajcxy ycìxpi, mìd co Dios may'ajt oy'ajt ti tuñ mìd miich ajcxy ycìxpi ma Jesucristo. ⁵ Co ti mmìjpidacp Jesucristo, oybi ti mbaatcìxy ma tüg'óciy mdzinaayin mjugy'ajtin. May'amy capxy ayuc oybi ti mbaatcìxy, etz may'amy huinma'ñ oybi ti mbaatcìxy. ⁶ Ma miich ajcxy mdzinaayin mjugy'ajtin etz mgapxy m'ayuc ñiguëxìgìpy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtgoy'ijtcìxy ma mdzinaayin mjugy'ajtin huìdibi Dios ñiyejcpy, ma je' m'ahuijxcìxy co Dios yajñiguëxìga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycìxìpy tìgoyìpy je naaxhuiñybi, e co anajty yì' tìyduñ naaxhuiñjäy ajcxy mìd ypocy ycìxpi, ca' miich ajcxy mbocycähuìpy. ⁹ Dios yjatytìmycuydunìpy yì' y'ayuc mìd miich ajcxy, ca' xy'ixmadzaangìxy ni mìnaxì, com yì' ti xyhuin'ìjxcìxy co mìd mnaymìgüg'ajtgìxy yì' y'ung, ìch ajt nHuindzin Jesucristo.

Naybìjc-huäcxì ma je mibìjcpidìj

¹⁰ Mìgügtìj, ìch miich ajcxy nmìnucxtacp mìd Jesucristo yxì co tungìxy may'ajt nay'ayuc-huinjìhuìyìgìxy, e ca' mnaybìjc-huäcxìgìxy. Tzinaaygìx xìc xon mìd tú'ciy mjot mhuinma'ñ. ¹¹ Miich ajcxy mìgügtìj, ti je Cloé y'amìgügtìj xyajnimäyich co ooy miich ajcxy mnaychìp'ìjxìgìxy, e ca' mnay'ayuc-huinjìhuìyìgìxy. ¹² Mìd jada ycìxpi nmìnaxì co nijëjìty miich ajcxy jadu'n mìnangìxy: "Ìich Pablo nmìjncxpejtpyich." E nijëjìty ymìnangìxy: "Ìich Apolos nmìjncxpejtpyich." E nijëjìty ymìnangìxy: "Ìich Pedro nmìjncxpejtpyich." E nijëjìty ymìnangìxy: "Ìich Cristo nmìjncxpejtpyich." ¹³ ¿Nej

Cristo ti ñaybìjc-huäcxìyìj? Ca'. ¿Nej Pablo yajcru-udzpejtì mìd miich ajcxy ycìxpi? Ca'. ¿Nej ti miich ajcxy mìnabèjtcìxy mìd Pablo yxì? Ca' yjadu'nity. ¹⁴ Nyajnajxypich Dioscojuyip ma Dios co ca' jac ni pin ìch ti ngayajnbety. Jëda'ajty ti nyajnbetyich Crispo etz Gayo. ¹⁵ Jadu'n ti nduñich je'gìxpi co ca' huaad jäy ajcxy ymìnangìxy co ti ajcxy ñìbety mìd Pablo yxì. ¹⁶ Nañ jadu'n ti nyajnbetyich yì Estéfano mìd yì' yjuugy ymìgüg ajcxy. Jac ni je' ca' njäytechìch pen ti nyajnbetyich. ¹⁷ Com Cristo ca' xyquejyich jäy yajnbèjtpì. Hue' janchtìy ti xyquejyich co ngapxhuäcxìbìch yì' y'ayuc ytiy'ajt oybi. Ca' nyajtuñich xpcìtyjyc y'ayuc yhuinma'ñ. Co ixìpy nyajtuñich xpcìtyjyc y'ayuc yhuinma'ñ, naadìg'ajty ixìpy co Cristo y'o'cy ma yì' cruudz mìd ajt nbocy ycìxpi.

Cristo ymìd Dios ymic'ajt etz yì' y'ixpìjcin etz ytiy'ajt

¹⁸ Yì jäy ajcxy huìdibi y'alma tìgoyam, locì huinma'ñ yì' tìjxcìxy co Cristo y'o'cy ma yì' cruudz mìd ajcxy ypocy ycìxpi. Per ìch ajt pinjaty y'alma nìdzögam, hue' mìnanim co jada ayuc tìy'ajt mìd Cristo ycìxpi, ymìd yì' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymìnaxì:

Nyajtìgoyaamybìch yì' xpcìtyjyc y'ayuc yhuinma'ñ. Njìbìjcbìch yì' cohuinma'ñyäjdyjyc ajcxy yhuinma'ñ. ²⁰ ¿Ti mìc'ajt ymìd yì' cohuinma'ñyäjdyjyc ajcxy? ¿Ti mìc'ajt ymìd yì' xpcìtyjyc? ¿Ti mìc'ajt ymìd yì' huìdibi ajcxy nay'ixquìpxip mìd xpcìjcin? Ca' ti mìc'ajt mìdity yì' ajcxy, com Dios ti yaj'ahuimbity yì' naaxhuiñ y'ixpìjcin tzuu huinma'ñ locì huinma'ñ. ²¹ Com Dios jadu'n ti tzoocy co jäy ajcxy ca' padaangìxy Dios ytiy'ajt ma yì' naaxhuiñjäy ajcxy y'ixpìjcin. Dios yjäygidacp co jëbì jäy ajcxy y'alma ñìdzögìpy co ajcxy mibìgìpy je Dios y'ayuc huìdibi ngapxhuäcxypich. Je Dios y'ayuc ytiy'ajt huìdibi ìch ajcxy ngapxhuäcxpy, yì' yì' naaxhuiñjäy ajcxy huinjìhuìyìgìxyp nej tzuu huinma'ñ locì huinma'ñ.

²² Yì judìojäy ajcxy ooy tzachtzocìcìxy co Dios tunìpy ijpèjt mìjhuinma'ñybi. Yì griego jäy y'ixtaaygìxyp ayuc huinma'ñ etz huenhuìdibity xpcìjcin. ²³ Ìich ajcxy ngapxhuäcxìch co Cristo y'o'cy ma yì' cruudz mìd jäy ajcxy ypocy ycìxpi. Yì maybì judìojäy ajcxy ca' mijpidägaangìxy ca' cöbìgaangìxy ìch ajcxy n'ayuc. Etz yì maybì jäy ajcxy huìdibi ca'p yjudìojäyity, hue' tìjxcìxy co tzuu huinma'ñ locì huinma'ñ ìch ajcxy n'ayuc. ²⁴ Per yì jäy ajcxy huìdibi Dios ti yhuin'ìjxìgìxy, huen yjudìojäyity, o huen ycajudìojäyity, hue' ajcxy tìjxcìxy co je Cristo ymìd anajty Dios ymic'ajt etz ymìd anajty Dios y'ayuc ytiy'ajt. ²⁵ Co xpcìtyjyc tìjxcìxy co Dios ytung, tzuu huin-

ma'ñ loci huinma'ñ je', nīgi jac'oyhuinma'ñ yí' huidibi Dios tumyb, ca'ydi' huidibi jāy ajcxy ytumyb. Co xpi-cytijc ymīnaangixy co Dios ca' ymic'ajt mīdity, nīgi jacmic'ajt mīd yí', ca'ydi' huidi jāy ajcxy ymīd.

²⁶ Mīgūgtijc ajcxy, huinmay miich ajcxy jadu'n nej Dios ti xyhuin'ijxcixy. Ni may miich ajcxy huidibi ca' y'ixpicity, tim nihueeni' huidibi xpicity ma miich ajcxy. Ni may miich ajcxy huidibi ca' ti mic'ajt, ca' ti ane'min mīdity. Ni hueeñ miich ajcxy huidibi mic'ajt mīd etz ane'min mīd. Ni may miich ajcxy huidibi oyñipinjāyity. Ni hueeni' miich ajcxy huidibi y'ap yteedy rey'ajtp.

²⁷ Per Dios ti huin'ixy yí jāy ajcxy huidibi ca' y'ixpicity co jadu'n yajtzo'yduna'ñ yí xpicity jāy yí cohuinma'ñ jāy. Dios ti huin'ixy yí jāy ajcxy huidibi ca' ti mic'ajt mīdity, mīd co jadu'n yajtzo'yduna'ñ yí jāy ajcxy huidibi mic'ajt mīd, ane'min mīd. ²⁸ Dios ti huin'ixy huidibi jāy ajcxy ca' mij'ijx mijpidaaccixy, huidibi jāy ajcxy ytijpy co ca' y'oyity. Dios jadu'n tuuñ co yajcōdigoya'ñ yí huidibi jāy ajcxy mij'ijxp mijpidacp, je huidibi jāy ajcxy ytijpy co y'oyity. ²⁹ Jadu'n Dios ytuñ co ca' tzocy co ni pinjāy ca' ñaygōmayiib cī'm ma yí' yhuinduu. ³⁰ Per Dios cī'm yaj'oyiij nej jēbi miich ajcxy myajpatcixy mīd Cristo Jesús. Dios cī'm yaj'oyiij nej jēbi ajt nbaatim xpijcin ma Cristo. Nañ jadu'n yaj'oyiij nej jēbi Cristo xyaj'ahuimbitim tudāgy, jaydēbi Dios xycōbijcīm nej tudāgy jāy. Nañ jadu'n Dios yaj'oyiij nej jēbi huaad nbaatim ajt nhuādztot nhuādzhuinma'ñ ma Cristo. Nañ jadu'n Dios yaj'oyiij nej jēbi Cristo xyñihuaanim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymīna'ñ: "Pinjaty naygōmayaanip cī'm, huen naygōmayii mīd co mibicy ajt nHuindzin Dios."

Je y'ayuc ytiy'ajt, je Cristo huidibi cruudzpejt

2 Per co n'oyich ma miich ajcxy jayhuin, ngapx-huācxyich anajty Dios y'ayuc ytiy'ajt, oy'amy nyaj'ixpijcyich, ca' nyajtuñich xpicity jāy ajcxy y'ayuc, etz nañ jadu'n ca' nyajtuñich tzipjatypī ayuc. ² Co jim n'ijtyich ma miich ajcxy jayhuin, chi huinma'ñ ybidacyich co ca' jac ti ayuc ti huinma'ñ nyajmīdmiydāgaangixy, jē'yí janchtiy nyajmīdmiydāgaangixy Jesucristo etz jadu'n nej je' yajcruudzpejtī mīd jāy ajcxy ypocy ycixpi. ³ Co jim ñich anajty nyajpaadyich ma miich ajcxy, chi ooy yung naxy naybīdaacich, ooy ndzigiiy njihuūyich. ⁴ E co nmīdmiydaacyich miich ajcxy, co ngapx-huācxyich Dios ytiy'ajt ma miich ajcxy, ca'pī ñich miich ajcxy nyajmībicy mīd xpicityc y'ayuc mīd tzipjatypī ayuc. Je Espīritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmībijcixy Dios y'ayuc. ⁵ Jadu'n je Espīritu Santo xypubetyich anajty, jigix miich ajcxy mijpidāgipy Dios, ca' nmi-naanim mīd co ti mmīdoogixy oyjatypī ayuc huidibi jāy ajcxy ti cojy ti macxy. Ti mmīpīdaaccixy Dios com ti m'ijxcixy ti mjihuūyigixy Dios ymic'ajt.

Dios xyajnejhuūyim yí' ytiy'ajt mīd y'Espīritu Santo

⁶ Oy co ti nyajmībicyich miich ajcxy mīd ayuc huidibi ca' chipjatyity, per nañ jadu'n nyaj'ixpicityc oyjatypī

ayuc tzipjatypī ayuc yí mībijcpīdijc ajcxy tiibi yhuinma'ñ ymiinni ymejchni. Tīgachjaty ñich n'ayuc ndiy'ajt e ca' ñaybadyii mīd naaxhuiñjāy ajcxy y'ayuc ytiy'ajt huidibi ca' mībijccixy huidibi tzīnaayb jugy'ajtp jadachambi xī jadachambi tiempo. ñich n'ayuc ndiy'ajt ca' ñaybadyii mīd je jāy ajcxy y'ayuc ytiy'ajt huidibi ane'mb ya naaxhuiñ, yí jadu'mbi jāy yí' ajcxy yjugy'ajtin cixamb tīgoyamb tūccí'yí. ⁷ ñich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuūy huin-jihuūy, je ayuc tiy'ajt huidibi Dios ymīd coyūch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydēbi ajt n'alma ñīdzocīm huinixī huinītiempo. ⁸ Ni tūg mij'ane'mbi huidibi tzīnaayb jadachambi xī jadachambi tiempo, ca' huinjihuūy jada ayuc. Co ixypy ajcxy huinjihuūy, ca' ajcxy cayajcruudzpejty je Huindzin Dios y'ung, je huidibi mīd Dios y'oy'ajtin ymī'ajtin. ⁹ Com ca' ajcxy huinjihuūy Dios y'ayuc, paady ycixpi jaybety ymiñ ma Dios ñecy, ma jadu'n ymīna'ñ:

Ni tūg jāy ca' ixpy, ni tūg jāy ca' midoy, ni tūg jāy ca' yhuinma'ñ ybaady jadu'n nej Dios ni'ixy mīdity mīd je jāy ajcxy ycixpi' huidibi yí' mijpīdaacip yajmij'ajtp.

¹⁰ Mīd co nmīpīdaacīm Dios, paady ycixpi Dios yaj'oyiij nej jēbi je Espīritu Santo xyajnejhuūyim yí' ytiy'ajt. E je Espīritu Santo yhuinjihuūydaayb ñejjihuūydaayb tūg'ócy, ixti yhuinjihuūydaayb nej Dios yhuinma'ñ ti pidāgy co tuna'ñ, je huidibi ca' pin nejhuūy.

¹¹ Ca' pinjāy jēbi huinjihuūy nej jadūgpi jāy yjot yhuinma'ñ mīdity. Je jāy yci'mhuinma'ñ jēbi huinjihuūy nej je' yci'mjot yci'mhuinma'ñ mīdity, ca' jac pin. Nañ jadu'n ca' jac pin jēbi huinjihuūy nej Dios yjot yhuinma'ñ mīdity. Dios yci'mjihuūñ huinjihuūyb nej Dios yjot yhuinma'ñ mīdity. ¹² Dios ca' xyaj'adigiiyim xyajjottigiiyim huinjāy yjihuūñ ymic'ajt. Hue' Dios xyaj'adigiiyim xyajjottigiiyim yí' yci'mjihuūñ yci'mmic'ajt, paady ycixpi jēbi huinjihuūyim tūg'ócy' huidibi ti xymooyim. ¹³ ñich ajcxy nyajmīdmiydacpy miich ajcxy je ayuc tiy'ajt' huidibi je Espīritu Santo xyaj'ixpijccixyich. E ca' nyajmīdmiydaaccixy je tiy'ajt' huidibi ti n'ixpicityc ya naaxhuiñ' huidibi jāy ajcxy ti cojy ti macxy. Nyaj'ixpijccixy Dios y'ayuc ytiy'ajt' huidibi je Espīritu Santo xyajnejhuūyich. ñich ti nyaj'ixpicityc yí' ajcxy' huidibi mīd Dios yjihuūñ ymic'ajt ma y'aa yjot.

¹⁴ Pinjaty ca' mīdity Dios yjihuūñ ymic'ajt, ca' yí' cōbi-ga'ñ je tiy'ajt' huidibi je Espīritu Santo xyajnejhuūyim. Com yí' ajcxy ytiyp co jada tiy'ajt' tzuu huinma'ñ loci huinma'ñ yí'. Nañ ni ca' ajcxy Dios ytiy'ajt' huinjihuūy, com ca' ajcxy mīdity Dios yjihuūñ ymic'ajt' huīdibi yajnejhuūyb Dios ytiy'ajt. ¹⁵ Je jāy' huīdibi ymīd'ajtpy Dios yjihuūñ ymic'ajt, yí' jēbi yajcīyōy yajtecyōy tūg'ócy pinjaty yjot yhuinma'ñ. Per ca' yí' huaad pinjaty yajcīyōy yajtecyōy yjot yhuinma'ñ. ¹⁶ Com jadu'n Dios ymīna'ñ ma ñecy: "¿Pin jāy huinjihuūyb nej Dios yhuinma'ñ ymīdity? Ca' ni pin. ¿Pin jāy huaad Dios yaj'ixpicity? Ca' ni pin." Oy ca' pin huinjihuūy jecy'ajty nej Dios yhuinma'ñ ymīdity, jadachambi ñich ajt huinjihuūyim nej Cristo yhuinma'ñ ymīdity.

Je huidibi ajcxy mibijcp ytungixy ma Dios

3 Migügtjic ajcxy, co ti n'oyich ma miich ajcxy, chi nmiidmiydaaccixy jadu'n nej jihuïy miich ajcxy mhuinma'ñymiidity nej naaxhuiñyäjy ajcxy yhuinma'ñymiidity huidibi ca' ymibijccixy. E ca' anajty miich ajcxy mïdity je mhuinma'ñ huidibi je Espiritu Santo yejcpy. Miich ajcxy mmibijcin ma Cristo jadu'n yi' nipaady nej ma'xungdijc ymibijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuïygixy. Jadu'n nipaady nej jäy ajcxy yaj'ügy leche yi ma'xungdijc, mïd co cacöbiga'ñ caayin uucin huidibi jemxy cidacp ma yjot. Ca' miich ajcxy anajty ti mnayñi'ixäyigixy ma mjot mhuinma'ñ nej jëbi mhuinjihuïygixy Dios y'ayuc yi tzipjatypi. Chambaadni ca' mnayñi'ixäyini ajcxy ma mjot mhuinma'ñ nej jëbi mhuinjihuïygixy yi tzipjatypi ayuc. ³ Chambaadni miich ajcxy myajtuñ mjot mhuinma'ñ jadu'n nej naaxhuiñyäjy ajcxy mïdity huinma'ñ ca'pi ymibijccixy, chambaad mmi'ijxtinaaygix yi migügtjic, chambaad mnaychip'ijxigix naybijc-huäcxigix. Jadu'n m'iditczixy nej jacjadyi jäy ajcxy y'iditczixy huidibi ca' ymibijccixy. ⁴ Com nijëjity miich ajcxy minaangixy: "Ïich naygomajtzip ma Pablo." Etz nijëjity minaangixy: "Ïich naygomajtzip ma Apolos." Jada je tiy'ajt co ca' mnay'ayuc-huinjihuïygixy tim jadu'n nej jäy ajcxy ca' nay'ayuc-huinjihuïygixy huidibi ca' mïdity Dios yjihu'ñ ymic'ajt.

⁵ ¿Pin je' je Apolos? ¿Pin je' je Pablo? Ïich Pablo etz Apolos nimetz ajcxy nduñ ma Dios ytung, e ïich miich ajcxy nyajmibijccixy Cristo. Ïich ajcxy nduñ nidüg nidüg je tung huidibi Dios xymooyich. ⁶ Ïich jayijp'aty miich ajcxy ti nyaj'ixpicyich, e Apolos jac'axam. Jadu'n miich ajcxy nipaady nej tüg moc cam huidibi ïich ti nnipy, e Apolos jac'axam ti pidägy nï. Per Dios ti yajyeegy je moc. ⁷ Ca' ytimyñejity pin ti yñipy, e pin ti pidägy je nï. Dios yi' tügpaic copicyip. Com yi' yajyeecp je moc. ⁸ Yï' huidibi niip etz yi' huidibi nï pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com ïich etz Apolos naymigüg'ajtïbich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi ïich ti nduñ.

Nañ jadu'n miich ajcxy nipaady nej tüg tijc huidibi Dios ycojpy. ¹⁰ Dios ti xyajñibicyich yi' ytung ndunipyich. Ti nyaj'ixpicyich miich ajcxy Dios y'ayuc ytiy'ajt. Jadu'n ïich nipaady nej tüg pojtzpi oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yi' nipaady nej huingbi pojtzpi huidibi je tzaadijc poch jacijppodziyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixy. ¹¹ Dios ti pidägy Jesucristo tügpaic huidibi huaad nmibijcim, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹² Co pinjaty yaj'ixpicy Dios y'ayuc ytiy'ajt tiydudägy, chi jadu'n nipaady nej jihuïy pinjaty tijcpojtzip mïd ori, mïd plata etz mïd tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuïy pinjaty tijcpojtzip mïd quipy, mïd miy, etz mïd moc'aay. ¹³ Jiini co anajty xï tiempo paady mina Cristo tiyduna'ñ yi' yjäy huin'it

ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jïin pidägy ma je tijc, e je quipy, je miy, etz je moc'aay tigoydähuipy ma je jïin. Etz je ori, plata etz tzaa oyjatypi ca' ytigoydähuipy mïd je jïin. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio möhua'ñ jada jäy co ooy yajxon ti yaj'ixpicy. E jadu'n yi' ytung nipaadip nej je ori, plata, etz tzaa'oyjatypi huidibi ca' ytigooy ma je jïin. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'ñ. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jïin. Jadu'n nipaadip mïd jada jäy nej jihuïy ti ñaxy jïinjoty, e ti ytigoydäy ma je jïin tijaty ymïd, je'yi yjugy'ajtin ti yajtzögy.

¹⁶ ¿Nej ca' mnejhuïygixy? Pen Dios yjihu'ñ ymic'ajt yajpat ma miich ajcxy, jadu'n nipaady nej jihuïy Dios ci'm ti chinaydacpicy ma miich ajcxy, nej jihuïy miich ajcxy Dios xytijc'adyi. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'ñ jada jäy. Yi Dios chinaydac huädz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ñigix ci'm. Pen nidügti miich ajcxy mnaydiyii co oy ixpicyity ma naaxhuiñyäjy y'ixpijcin, copicy jäydgoyipy yi' y'ixpijcin, jigix ixpicyity Dios ytiy'ajt. ¹⁹ Yi naaxhuiñyäjy y'ixpijcin jadu'n nipaady mïd Dios nej tzuu huinma'ñ loci huinma'ñ. Paady jadu'n yjaybetyity ma Dios ñecy ma jadu'n ymina'ñ: "Dios yajpocähuiip yi' ixpicytjic mïd yci'm'ayuc mïd co chachnaygömayii." ²⁰ E jadu'n yjaybetyity jadüg'it ma Dios ñecy ma jadu'n ymina'ñ: "Je Huindzin Dios ñejhuïyb co yi' ixpicytjic y'ayuc yhuinma'ñ ca' choobaady."

²¹ Ni pin ca' huaad amij agix ñayjihuïyii, mïd co mijnicxpety oyñipin y'ayuc. Miich ajcxy mïd'ajttaayb tüg'öciy tijaty. ²² Miich ajcxy mïd'ajtpy Pablo, Apolos etz Pedro. Nañ jadu'n miich ajcxy mïd'ajtpy je naaxhuiñybi, je tzaajp, je jugy'ajtin, je o'cin, je xï je tiempo huidibi ji yajpatp, etz huidibi mim cidaacp. ²³ Je Cristo mïd'ajtpy miich je' ajcxy cë'am etz Dios ymïd'ajtpy Cristo cë'am.

Je apóstoles ajcxy ytung

4 Jëbi jadu'n co ïich etz Apolos, ïich miich ajcxy xytijcixy Cristo ytumbi huidibi Dios ti xyajñibijccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuïy huinjihuïy. ² Pinjaty cuend'ajtp huingjäy yje', copicy tiydudägy ytunipy, jaydëbi yi' yhuindzin yjäygidägiyb yi' ytung. ³ Per ca' ooy nduñich cuendi co miich ajcxy xyajcïyöy xyajtecyöyï ïich nbocy. Nañ jadu'n ca' ooy nduñich cuendi co ixypy tüg juez yajcïyöy yajtecyöyï ïich nbocy. Nañ jadu'n ca' nyajcïyöyich nyajtecyöyich ngi'mbocyich. ⁴ Ca' nayjihuïyijich co nmïdundigooyich miich ajcxy. Ca' jadu'n nmina'ñich co ca' ma ndundigooyich. Hue' ajt nHuindzin Jesucristo yi' je' xyajcïyöyïp xyajtecyöyïp ïich nbocy, ca' jac pinjaty. ⁵ Paady ycixpi'ixmajtzcix jadu'n nej miich ajcxy xypocy'ijxcixy jayijpni ma ca'ni Je-

sucristo ymiñ jadüg'oc ya naaxhuiñ. Ahuijxcix co Jesucristo yajniguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuüy yüch y'ity agootztuuby. Jesucristo co anajty ymiñ jadüg'oc, chi yajniguëxigipy nej jäy ajcxy yjot yhuinma'ñ mñdity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Mìgügtijc ajcxy, cì'm ti naybidägyiijich mñd Apolos jadu'n nej tüg iixpejt ma jada tiy'ajt huidibi cham ti nyajnijayiygixp. Jadu'n ti nduñich mñd miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n ñich ti nduñich mñd Apolos nej tüg iixpejt, jigix miich ajcxy ca' mnyagömawayib cì'm, e ca' mmi-naangixy co mnyagomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuüy ajcxy ooy mgömawayity? Ca' ni pin. ¿Ti miich ajcxy mñdity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mñdity, ¿na'amy co mnyagömawayigixy cì'm, jadu'n nej jihuüy cì'm ti mgarar'ajtcixy tijaty ajcxy mñdity?

⁸ Jadu'n miich ajcxy mnyabidáacigixy nej jihuüy ti mgüxigixy, nej jihuüy ti mgomeeñygojgixy, nej jihuüy mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuüy ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögüy, co ángeles ajcxy etz jäy ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jäy tzuu locip co ndungixyich mñd Cristo ycixpi. E miich mnyabidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy mñdityich, e miich ajcxy mnyabidaacip nej jihuüy ooy ti mmicpijccixy, nej jihuüy ooy mgömawayity, e ñich ajcxy ca' nyaj'ixaangixyich. ¹¹ Chambaad ñich ajcxy nyuubögyiijich etz ndidzëyijich. Minaajity n'ijtcixyich ca' ñich ajcxy nhuit. Jäy ajcxy xyñi'ojiygixich etz xyhuingojxy xyjijpcójxcixich, ni ndijc ñich ajcxy ycaca'tcixy.

¹² Ndungixyich xuuyi mñd ngi'm ngijich. Co pinjaty xyñi'ojiygixyich, chi n'adzógixyich mñd oy ayuc. Co ñich ajcxy xy'ixhuidityich xypahuidityich, ooy nmechtújccixyich yí tzaachypi. ¹³ Co pinjaty jibic xyñigápcixyich, chi huinma'ñ itáaygixyich oy'amy mñd mecxtujcín n'ñhuíjccixyich ngapxhuíjccixyich nej jëbi y'ayuc-huinjihuüygixy. Ca' naaxhuiñjäy ajcxy xychójccixyich. Ixti chambaad jadu'n ajcxy xy'ijxcixyich nej püx, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayiy jada ayuc co nyajtzöydunaangixy. Hue' janchtiy jada ayuc nyajnijayiyb ajcxy co ngapxhuijáangixy. Jadu'n ndzojccixy njihuüygixy nej ndzocyich njihuüyich ngi'm'ung. ¹⁵ Oy ixypy yjanchity co miich ajcxy mñd majc mil huindzindijc huidibi xyaj'ixpijccixy Cristo ytiy'ajt. Per tügpaajcpi je mhuindzin huidibi oga'n xyajmibijcy ajcxy Cristo, ca' nan canaag. ñich jadu'n oga'n ti nyaj'ixpi-cyich miich ajcxy Jesucristo ytiy'ajt nej jëbi ajcxy m'alma ñidzögipy. Paady ycixpi jadu'n ñich nipaady nej mi-

ich ajcxy mdeedy ma mmibijcín. ¹⁶ ñich miich ajcxy ni-maayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej ñich nguyduñich.

¹⁷ Paady ycixp nguexyich Timoteo ma miich ajcxy. Yí Timoteo ooy ndzocyich ooy njihuüyich. Ti ñich Timoteo nyajmibicyich Cristo, e ooy xycapxymidooyich yajxon, jadu'n yí nipaady nej ngi'm'ungich. Yí Timoteo xya-jjäy medzip miich ajcxy je ayuc je tiy'ajt jadu'n nej nyaj'ixpicyich ma tüg'óciy cajp ma yí jäy ñaymújccigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnyajihuüyí co jadu'n minaangixy co ca' ñicy n'ixa'ñich miich ajcxy jadüg'oc. ¹⁹ Per ca' jadu'n mminaangixy co ca' nñicxa'ñich ma miich ajcxy. Tzojc nñicxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amído'ida'ñich yí ajcxy y'ayuc huidibi amij agix nayjihuiyip. Hue' janchtiy nejhuñhua'ñich pen ymiid yí ajcxy Dios ymic'ajt chög'ajt. ²⁰ Pinjaty mñd Dios ymic'ajt Dios chög'ajt, je' yajniguëxícip Dios y'ane'mín. Pinjaty mñd oyñiti ayuc, ca' je' yajniguëxigip Dios y'ane'mín. ²¹ Co nñicxibich jim ma miich ajcxy, ¿ti ajcxy mdzojccixyp ndunipyich? ¿Nej oy nñicxibich ma miich ajcxy tüg matz jigix ajcxy nhuójpcixipy? o ¿Mdzojccixyp co nñicxibich ma miich ajcxy mñd yungnaxy njot nhuinma'ñich, etz oy'amy ajcxy nmigapxipy, jadu'n nej jihuüy ooy ndzojccixy njihuüygixy?

Moy ajcxy castigo tüg jäy huidibi anajty ti ytundigooy

5 Mayjäy nejhuüy co ma miich ajcxy jim tüg yëydijc huidibi tundigooyb mñd tüg töxyjäy. Nigi yí ytundigooy ca'ydí huidi ajcxy ca' Dios y'ayuc mijpidaci. Ti nejhuüyich co jim tüg yëydijc huidibi mñddzinaayb ycoo'uu. ² Jim miich ajcxy mñdity je mijpocytumbi, e miich ajcxy amij agixy mnyajihuüygixy co ajcxy mdzach'ixpicyity ma Dios ytiy'ajt. Jac'oy co ixypy mda-jcixy mmaygixy. Yajpidzimigix ma miich ajcxy yí jäy huidibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuüy ñich njimity, mñd co ooy njihuüyich nej miich ajcxy mja-jtcixy m'ayoogixy. Paady ycixpi ti nyajpocycäyich mñd Jesucristo y'ane'mín yí jäy huidibi jim ooy mij ytundigooy, tim jadu'n nej ixypy jim nyajpaadyich ma miich ajcxy. ⁴ Huomujctaaygix yí mibijcpidijc, e jadu'n nipaadipy nej jihuüy ñich njimity quipxyi mñd miich ajcxy. Huin'it miich ajcxy mñd'ajtcixipy ajcxy ajt nHuindzin Jesucristo y'ane'mín ymic'ajt. ⁵ Mñd je ane'mín mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuüy myajcídigiigixy je mujcu', jaydëbi yí ñinixc yti-goyipy, per je' y'alma ñidzögip mina anajty ñich ajt nHuindzin Jesús yhuimbity ya naaxhuiñ jaydëbi tündunipy jäy ajcxy mñd ypocy ycixpi.

⁶ Ca' mnyagömawayigixy cì'm mñd huidibi mdungixyp. ¿Nej ca' mnejhuüygixy nej jäy mina'ñ co levadura huidibi ca' y'oyity yajhuindigooyb tüg'óciy yí harina jich? ⁷ Jadu'n je pocytuní nipaady nej levadura huidibi ca' y'óyity, paady ycixpi yajtigooygix je pocytuní nej

anajty mdundigóoygixy taabi anajty ajcxy ca'ní mmibijccixy. Jadu'n mdúngixipy, jigix jébi m'ijtcixyp huádz ca' ma pocy. Co jadu'n mdúngixipy, jadu'n ni-paadip miich ajcxy nej tzajcaagy oyjatypi. Nejhuüybich co miich ajcxy ti mbocyñihuaatzcixy, com Cristo nayye-jci huen yaj'ögyii mïd ajt nbocy ycixpi. Jesucristo jadu'n nipaady nej ajt ngöbixy mang huidibi mïd nhuindzigüym Dios mïd ajt nbocy ycixpi. ⁸ Tzoc tzi-naayim mïd huádz njot huádz nhuinma'ñ, jadu'n nipaady nej judíojäy co ajcxy amay'ajtcixy yi pascua xiï. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayüygixy jayhuin co ca' huaad migüg'ájtigixy pinjaty huidibi tundigooyb mïd töxyjäy ajcxy. ¹⁰ Ca' nan jadu'n nmïna'ñich co tücci'yi mbuhuäctütcixipy yi naaxhuiñjäy ajcxy huidibi ca' ymibijccixy, huidibi tundigooygixp mïd töxyjäydijc, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadajtcixp. Co ixipy tücci'yi mbuhuäctütcixipy yi naaxhuiñjäy ajcxy, copicy co ixipy miich ajcxy mbidzimgix ya naaxhuiñ. ¹¹ Jayhuin ti nijayüygixy co ca' huaad mnaymigüg'ájtigixy mïd yi jäy ajcxy huidibi naydijcigixy co ymibijccixy, je huidibi tundigooygixp mïd töxyjäydijc, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uuc-mujccixy mïd yi' ajcxy. ¹² Com ca' yhuaadity co iich nyajcüyöyipy nyajtecyöyipy yi jäy ajcxy ypocy huidibi ca' mijpidaaccixy Jesucristo. Dios cï'm yajcüyöyam yajtecyöyam yi' ajcxy ypocy. Hue' janchtiy copicy co miich ajcxy myajcüyöyip myajtecyöyipy yi mibijcpidijc ajcxy ypocy. Yajpidzimgixp yi pocytumbi ma miich ajcxy.

Tzip capxy ma je juez ajcxy huidibi ca' ymibijccixy

6 Pen xymidundigooyb tüg mibijcpi, ¿nej oy mnayjihüyüii co nicxy mxëy yi mmigüg ma yi tung-mïdipi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyühuipy je ayuc nej anajty ti xymidundigoy? ² ¿Nej ca' mnejhuüygixy co yi jäy ajcxy huidibi Dios ti ypocyhuin-méecxigixy, yi' ajcxy yajcüyöyamyb yajtecyöyamyb yi naaxhuiñjäy ajcxy ypocy huidibi ca' mijpidaaccixy Dios? Pen miich ajcxy myajcüyöyip myajtecyöyipy yi naaxhuiñjäy ajcxy ymijpocy, ¿nej co ca' mjajtixy nej ajcxy myajcüyöyipy myajtecyöyipy yi mibijcpidijc ajcxy ypocy huidibi ca' ytimymij ytimycajeejity? ³ ¿Nej ca' mnejhuüygixy co miich ajcxy myajcüyöyamyb myajtecyöyamyb ixti yi ángeles ajcxy ypocy? Pen miich ajcxy myajcüyöyamyb myajtecyöyamyb yi ángeles ajcxy ypocy, ñigi ca' chipity co ajcxy myajcüyöyipy myajtecyöyipy yi mibijcpidijc ajcxy ypocy huidibi tzinaayb jugy'ajtp ma jadachambi xiï tiempo. ⁴ Pen miich ajcxy mnaymidundigóoygixp, ¿nej co nicxy mbidaaccixy yi mxëhuin ma yi jäy ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydebí mdzöydu'njihüygixy mïd jada ycixpi. ¿Nej ca' yajpaady ma miich ajcxy ni tüg yëydijc hijy

ycujpi huidibi jébi yaj'oyüy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyty co yi mibijcpidijc ajcxy ñayxëhuigixipy ma je tungmïdipi huidibi ca' mijpidaaccixy Dios?

⁷ Co miich ajcxy mnayxëhuigixy ma cajp tungmïdipi, je' je tiy'ajt co ca' ajcxy mguydüngixy Cristo y'ayuc ytiy'ajt. ¿Nej cay jac'oy co mnaymimexctüjcgixipy, ca'ydi co mnayxëhuigixy? ¿Nej cay jac'oy co xytigóoyigixipy tijaty, ca'ydi co mnayxëhuigixy? ⁸ Ma yjapadyii ixipy mnaymimexctüjcgixy, chi miich ajcxy ac mibijcpidijc naymidundigóoygixp, e nañ jadu'n mjanayméetzgixy ti ajcxy ymïd.

⁹ ¿Nej ca' mnejhuüygixy co yi jäy ajcxy huidibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'ñngixy, ca' ajcxy it lugar pada'ñ ma Dios y'ane'my yi jäy ajcxy huidibi migapxtigooyb töxyjäydijc, huidibi ajcxy ojadajtp tzaadzech quipychech, huidibi ajcxy migapxtigooyb ymigüg ytöxyijc, huidibi ajcxy adöxyñ'aa. ¹⁰ Ca' ajcxy it lugar pada'ñ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmihuidijtp capxmihuidijtp. Nidüg'öciy yi jäy ajcxy huidibi jadu'n tundigooyb, ca' ajcxy it lugar pada'ñ ma Dios y'ane'my. ¹¹ Jadu'n anajty nijéjity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinma'ñ, etz mnayyéjcgixy amumdüggjot ma Dios. Co miich ajcxy mmijpidaaccixy je nHuindzin Jesús yxi e xy'adigüygixy xyjottigüygixy Dios yjihui'ñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtin huidibi ijtp ma ajt ndzinaayin

¹² Janch tiy'ajt nej jäy ymïnaangixy co jébi huaad tungixy hueñytiijity huidibi ñijot'ajtcixyp. Per ca' tüg'öciy huidibi jäy ajcxy tuñ y'oyjäygidaacnity. Janch jadu'n jébi pinjaty tunipy hueñytiijity, per ca' huaad ymïmadägyii je huidibi ajcxy ytumy. ¹³ Janch tiy'ajt nej jäy ymïnaangixy co je jüxcy picy ytungbaady ma je jäy y'aa ymöx, e je aa möx ytungbaady mïd je jüxcy picy ycixpi. Per Dios yajcödigoyamyb je jicxy picy, e nañ jadu'n yajcödigoya'ñ je jäy y'aa ymöx. Per nañ tiy'ajt co Dios ca' ti yaj'oyiy je yëydijc ñinïcx, co midundigooyipy töxyjäydijc. ¹⁴ Dios ti yajjugypicy jadüg'oc iich ajt nHuindzin Jesucristo co y'o'cy. Nañ jadu'n Dios mïd ymic'ajt co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuüy miich ajcxy co yi mninïcx ajcxy Cristo yi' yje'? ¿Nej cay Cristo anajty midundigooybich co nnicy mïdmäyich yi töxyjäy huidibi jibic-huinma'ñ mïd? ¿Ca' jadu'n y'öyity nimïna! ¹⁶ ¿Nej ca' mnejhuüygixy co tüg yëydijc puhuägüy tüg töxyjäy huidibi jibic-huinma'ñ tumb, tügity ajcxy y'ijtcixy? Com jadu'n yjaybetyty ma Dios ñecy, ma Dios jadu'n ymïna'ñ: "Nimetz y'idaangixy jadu'n nej tügpi ninïcx." ¹⁷ Co tüg jäy mïd y'ity yi Huindzin Jesucristo, huin'it je jäy yjihui'ñ ymic'ajt etz Dios yjihui'ñ ymic'ajt y'ijtcixy tú'ciy.

¹⁸ Ixmajtzcix je jibic-huinma'ñydunñi, ca' mdundi-gooygixy miid töxyjäy ajcxy jibic-huinma'ñydundibi. Yi jacjadyii pocy huidi jäy ajcxy ytumyby, ca' yi' ajcxy mdundigoy ninicx. Per co ytundigooygixy miid töxyjäy ajcxy, huin'it janchtiy yci'mninicx anajty ymidundi-gooygixyp. ¹⁹ ¿Nej ca' mnejhuñiygixy co je Espiritu Santo huidibi Dios xymooyim, ti chinaydacpicy ma miich ajcxy mjet mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzoohui Cristo ti cojuy miich ajcxy mbocy, paady ycixpi ooy ycopicyity co oybi mdungixip miid mninicx, jigix Dios cömay y'idipy miid co oy anajty ti mdungixy.

Capxhuijn ma je pijcin

7 Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajniguéjxcixyich. Oy jadu'n co tüg yéydijc ca' ypigipy. ² Per com may yéydijc huidibi ooy ytundigoya'ñ miid töxyjäydiy, paady ycixp jac'oy co nidüg nidüg yéydijc pigipy e miid'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e miid idipy yci'm ñäy. ³ Copicy je yéydijc chinahuiipy miid ytöxyijc nej ypadyii, nan tim jadu'n je töxyjäy chinahuiipy miid ñäy nej ypadyii.

⁴ Com je töxyjäy ca' ane'my yci'mninicx, hue' ñay'ané'migixy miñ xyipy. Nañ jadu'n je yéydijc ca' ane'my yci'mninicx, hue' ñay'ané'migixy ymiñ xyipy. ⁵ Ca' huaad je yéydijc nimay je töxyjäy co ca' miid mähua'ñ miid pooxca'ñ. Nañ jadu'n je töxyjäy ca' huaad nimay je ñäy co ca' miid mähua'ñ miid pooxca'ñ. Jébi janchtiy minaaity ñay'ayuc-huinjihuñiygixy co amay'adaangixy co Dios mibijctzohuaangixy ycapxtägaangixy. Co Dios mibijctzohuinmyajmáygixipy, huin'it jébi máagixni pócxixni agujc jotcujc, ca'ydí je mujcu' mimadägyii ajcxy.

⁶ Jada je' tiy'ajt nej jébi yéydijc miiddzinäy ytöxyijc, hue' jada capxhuijn, ca' jada y'ané'minity. ⁷ Jadu'n njadzocyich co miich ajcxy ixypy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg miid yci'mhuinma'ñ nej ytu-naangixy, pen pigaangixp o ca' ypigangixy.

⁸ Jada ayuc nyajniimaaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ñich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co ypigangixy, jac'oy co ypijcxipy. Com jac'oy co ypijcxipy ca'ydí co cuydúngixipy ninicx chojcin.

¹⁰ Jada ayuc nyajniimaaybich huidibi ajcxy ti ypijccixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad ypicy miid huingbi yéydijc. Jébi janchtiy jadüg'oc pudigixy ñäy. Nañ jadu'n ni ca' y'oyity co tüg yéydijc ixmach yitöxyijc.

¹² ñich jada ngi'm'ayuc jada huidibi nyajniimaaybich je jacjadyii mibijcpidijc. Yi Huindzin Jesús ca' ti ane'min yecy miid jadayaabi ycixpi. Pen tüg yéydijc mibijcp tzinay miid tüg töxyjäy huidibi ca' mijpidägy Cristo, jac'oy

co ca' ñay'ixmájtzigixipy, pen je töxyjäy jadu'n jotcujc jacmiiddzinähua'ñ je yéydijc. ¹³ Nañ tim jadu'n co tüg töxyjäy huidibi mibijcp tzinay miid tüg yéydijc huidibi ca' mijpidägy Cristo, jac'oy co ca' ñay'ixmájtzigixipy pen je yéydijc jotcujc jacmiiddzinähua'ñ je töxyjäy. ¹⁴ Je töxyjäy ñäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch miid co ytöxyijc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch miid co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huidibi ca' mibicy. Per com ti je yéydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yéydijc huidibi ca' mibicy Cristo ca' miiddzinähua'ñ ni jadu'ñyi yi' ytöxyijc huidibi ti mibicy Cristo, huin'it jébi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' miiddzinähua'ñ ni jadu'ñyi yi' ñäy huidibi ti mibicy Cristo, huin'it jébi ñay'ixmájtzigixy. Com Dios jadu'n tzocy co jotcujc ñaymiiddzinähayigixipy. ¹⁶ Jébi ñay'ixmájtzigixy com je töxyjäy ca' tiydudägy ñejhuñy pen mimadacy yñäy yajmibigipy Cristo. Nañ jadu'n je yéydijc ca' tiydudägy ñejhuñy pen jébi ytöxyijc yajmibigipy Cristo.

¹⁷ Oy ixypy ñejity jada tiy'ajt cuydungixy. Copicy co nidüg nidüg miich ajcxy mdzinahuiipy mjogy'adipy jadu'n nej Dios ti xyajni'ixiigixy mdzinaayin mjogy'ajtin, e jadu'n nej anajty myajpatcixy co Dios xyhuin'ixy jébi mibigipy Cristo. Yi jadu'mbi ane'min nyaj'ixpijpcyich yi mibijcpidijc ma tüg tüg cajp. ¹⁸ Yi jäy huidibi ti yajtiy'ajttäy jayijp, e Dios yhuin'ixyii jac'axam, huen jadu'nity, ca' huaad yajtigoy je ijxpejt nej ti yajtiy'ajttäy. E yi jäy huidibi ca'ni yajtiy'ajttäy e ti yhuin'ixyii Dios, huen jadu'n y'ity, ca' ycopicyity yajtiy'ajttähuipy.

¹⁹ Ca' ytimyñejity pen miich ajcxy ti myajtiy'ajttäy, o pen ca'ni myajtiy'ajttäyigixy. Huidibi copicyip, mguyduunip ajcxy Dios y'ane'min ycotujcin. ²⁰ Nidüg nidüg mibijcpí huen ijtcixy nej anajty yajpatcixy co Dios ajcxy yhuin'ixy. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may miid yi' ycixpi, huim' miid mhuindzin. E pen mhuindzin a'ixiyb co mbidzima'ñ ahuäztuum, jébi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädzictüdyii ma yi pocy y'ane'my. Pinjaty tungixp yci'mdung, co mibicy ñich ajt nHuindzin Jesucristo, chi jadu'n nipaady nej jihuñy codoogiy y'ity ma Cristo.

²³ Tzoohui ooy Jesucristo xycojuuyi miich ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuiñyjäy ajcxy y'ayuc ytiy'ajt huidibi ajcxy xypidägy ma pocy xy'ane'mgixy.

²⁴ Migügtijc ajcxy, nidüg nidüg mibijcpí, huen ijtcixy nej anajty yajpatcixy co Dios yhuin'ixy ajcxy.

²⁵ Jada ayuc nyajniimaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich miid miich ajcxy ycixpi. Hue' ajcxy nyajniimaayb ahuing je huinma'ñ huidibi miidich. Com Dios ti xypa'ayooyich, paady ycixpi jébi mgöbigipy

ajcxy ïich n'ayuc ïich ngapxhuijin. ²⁶Jadu'n huinma'ñ nmïdïdyich co jac'oy co nidüg nidüg mij'anäg huen jac'ijtcixy nej yajpatcixy. Miid co tzaachypï ayo'n nmïna-jxim nyajnajxim jadachambi xii tiempo, paady ycixpï ngapxhuijyich jadu'n. ²⁷Pen mbijcyp tüg töxyjäy, miid-dzina'. Pen ca' ti picy tüg töxyjäy, jac'oy co ca' mbigipy. ²⁸Pen ti mhuinma'ñ mbidägy co mbiga'ñ, jëbi mbicy, ca' anajty mdundigoy co mbigipy. Nañ jadu'n tüg töxy-jay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹Migügtijc ajcxy, jada njacyajniimaaygixy. Hueeni xii tiempo njactzinähuaanim ya naaxhuiñ. Jadu'n nej je xii je tiempo yjacnicxnii miich ajcxy pinjaty ti ypicxy, tzi-naaygix jadu'n nej ixypy ca' mdöxijc ajcxy miidity.

³⁰Miich ajcxy huidibi yaaxp etz ayo'n jihuiyb, tzi-naaygix jadu'n nej ixypy ca' ti ayo'n miidity. Miich ajcxy huidibi xondacp, tzinaaygix jadu'n nej ixypy ca' mxon-daaccixy. Miich ajcxy huidibi ajuuyb adocp tzinaaygix jadu'n nej ixypy ca' ti ajcxy miidity. ³¹Miich ajcxy huidibi mic'ajt comeeñ'ajtp, tzinaaygix jadu'n nej ixypy ajcxy ca' ti mgomeeñity.

³²Hue' ndzocyich co ca' ti jotmay miich ajcxy mmiid'adipy ma yi mdzinaayin mjogy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'ñ ajcxy je Huindzin Dios. ³³Je tñibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcujc'ajtcixy ytöxyijc. ³⁴Nañ tim jadu'n tigachjaty yhuinma'ñ miidity je töxy'anäg huidibi ti ypicxy. Je töxy'anäg adügpi ymijottigooyb Dios ytung, etz yecy ñinicx etz yjihui'ñ ymic'ajt cixyjot huinjot ma ajt nHuindzin Jesucristo. Per je töxy'anäg huidibi ti ypicxy, hue' je' ymijottigooyb ti ga ti ya naax-huiñ, jadu'n nej huaad jäygidägyii ñäy.

³⁵Jada jadu'n ti nyajniimaaygixy miid miich ajcxy m'oy'ajtin ycixpi. Ca' nan tzijpajaty ane'min ti nmooygixy. Jadu'n ti ngapxhuijicixy jaydëbi jotcujc mdzinaaygixy mjogy'ajtcixy, etz jaydëbi ajcxy amumdüggjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶Pen ji pin jotmay miidity miid ñix ycixpi, miid co yxii yjimijit ti yujc-huäcni, jada je' ooy ytimycapxpaadyty, jëbi tuñ huidibi y'a'ixiyb jac'oyip, jëbi ypicxy, ca' yi' ypocyity. ³⁷Pen ji pinjaty ñix yhui'ma'ñ jaybicy, e ca' pin ycohuanëyii, nañ ni pin yca'adugyii co tuñ nej tzo-cyin, e ñijot'ajtyp tudägy'ajt janch cixyjot huinjot co yñix yhui'ma'ñ jaybicy, oybi anajty ytumyby. ³⁸Je jäy huidibi yñix yajpijcp, oybi anajty ytumyby, e pinjäy yñix cayajpijcp, nigï anajty oybi tuñ ca'ydi co ypigipy.

³⁹Copicy co je töxyjäy miiddzinähuiy y' ñäy mabaad yñäy yjogy'aty. Co janch anajty yñäy y'ögy, huin'it jëbi ypigipy miid huingbi, pen jadu'n anajty najtztzogëy. Hue' janchtiy copicy co pigipy je pin mibijcp je Huindzin Jesucristo. ⁴⁰Ooy nigï je töxyjäy co'ögy y' agu-jc jotcujc chinähuiy yjogy'adipy pen ca' ypijctigach, jadu'n nmïdïdyich nhuinma'ñ, e nmïnaambich co nay-

baatip ïich nhuinma'ñ miid je tiy'ajt huidibi je Espiritu Santo yejcp.

Je tzüch huidibi ajcxy yajhuindzigiyb quipychech

8 Jadüg nax, jada ayuc ajcxy nyajnijayiyb ma yi tzüch ymiñ huidibi jäy ajcxy yajhuindzigiyb tzaadzech quipychech. Janch tiy'ajt co nidüg'öciy ïich ajt nmïd'ajtim xpijcin. Per pen ooy mij nayjihuiyim ajt n'ixpicyity, chi amij agix nayjihuiyim. Per pen naycho-jcim nayjihuiyim nidüg nidüg, huin'it nyajyeecim nmibijcin. ²Pen ji nidüg ma miich ajcxy ñaydiyii co y'ixpicyity, ca'ni yi' jajtäy xpijcin huidibi jaccopicy yjadipy. ³Co tüg jäy yajmij'aty Dios, Dios ñejhuiyb nej jada jäy yjot yhuinma'ñ miidity.

⁴Jadu'n jada je tiy'ajt maabi je tzüch huidibi jäy ajcxy ti yajhuindzigiygixy tzaadzech quipychech ajcxy. Ne-jhuiyim co yi' tzaadzech yi' quipychech ca' ti jugy'ajtin miidity. Ji tügpaic Dios huidibi tzinaayb jugy'ajtp.

⁵Janch tiy'ajt co yi' naaxhuiñjäy ajcxy Dios'ajtgixy canaagnax huidibi yajpatp tzajpcix etz ya naaxhuiñ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶Per ïich ajt n'ojadajtim tügpaicp Dios, je Dios Teedy. Je Dios Teedy coj macx tüg'öciy huidibi ji'ajtp. Miid yi' ycixpi ïich ajt ndzinaayim njogy'ajtim. Nañ tim jadu'n nmïd'ajtim tügpaicp ajt nHuindzin Jesucristo, e yi' huijtz'ijtaayb tüg'öciy tijaty huidibi ji'ajtp, e nañ yi' ajt xyhuijtz'ijtim.

⁷Janch tiy'ajt co yi' tzaadzech quipychech ca' ti mic'ajt miidity, per nije'jity mibijcpidijc ca' huinjihuiy jada tiy'ajt. Nijëjity ajcxy jecy'ajty ooy huindzigiygixy tzaadzech, ixti chambaadni tijcixy co yi' tzüch huidibi jäy miid huindzigiy tzaadzech, tzaadzech yi' yje'. Co ajcxy tzüdzicxy yi' jadu'mbi tzüch, jibic nayjihuiyigixy, nayjihuiyigixy nejihuiy ti ytundigooygixy. Ca' tiydudä-gy y'ijtcixy ma ymibijcin. ⁸Ca' Dios xycöbiganim miid je' ycixpi co ti njixxim ti ndzüdzm tijaty tzüch, o miid co ca' ti njixxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim miid je' ycixpi co ti njixxim ti ndzüdzm ti tzüch, o miid co ca' ti njixxim ca' ti ndzüdzm tijaty tzüch. ⁹Oy Dios a'ixy co jëbi ndzüdzm huenhuidibi tzüchity. Per miid je migügtijc ycixpi huidibi ca' tiydudägy miidity ymibijcin, tzoc naygüend'ajtim ca'ydi je' jibic yñayjihuiyii miid huidibi ïich ajt ndunim. ¹⁰Tzoc ocpidaacim co miich ajcxy mne-jhuiy je tiy'ajt, e xy'ixipy tüg migüg co mgay m'uucy ma tüg mesa jilby tigoty me je tzaadzech y'ity. Ca' jecyity co jada jäy huidibi ca' tiydudägy miidity ymibijcin, etz co xy'ixpaadipy jilby, huin'it je' cöbiga'ñ je tzüch huidibi huindzigi'ñ'ajtp. E jadu'n yhuimbizimy co mi-ich jibic ijxpejt ti myecy miid yi' m'ixpijcin ycixpi, com yi' mmigüg ti ytundigoy miid huidibi miich ti mduñ. E Cristo ti y'ögy miid yi' ypocy ycixpi nañ jadu'n. ¹²Co tüg mibijcpï jibic nayjihuiyii miid co ti xy'ixy ma je caydac mdzüch je tzüch huidibi jäy ajcxy yajhuindzigiyb tzaadzech, miich anajty tundigooyb miid Cristo ytiy'ajt, miid co yi' mibijcpï jibic ñayjihuiyii. ¹³Paady ycixp ca' ndzüdza'ñich ni mina tzüch huidibi tzaadzech yhuindzigi'ñ'ajtp. Pen jadu'n nduñich, jibic ijxpejt anaj-

ty nyejcpých ma nijějity migügtijc, e chi yi' ajcxy yhuinma'ñytigoya'ñ.

Je tung huidibi Pablo paatip

9 Janch janch co jěbi nduñich huentijity huidibi ndozjpcich. Nañ jadu'n janch co Jesucristo ti xyajni bicých jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma ñich ndung, com ti ajcxy mmijpidaaccixy je nHuindzin'ajtm Jesús y'ayuc huidibi ti ngapxhuäcxyich ma miich ajcxy. 2 Ca' jécyity co jacjadyii jay ajcxy ca' xycöbiga'ñich jadu'n nej Jesús xy'apóstol'adyijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyyajni bicých jada tung, paady ycixpi copicy co ñich miich ajcxy xycöbigipych jadu'n nej Jesús y'apóstol.

3 Jadu'n n'adzohuimbityich yi' ajcxy huidibi jibic xyñigapxip ñich ndung. 4 Com Jesucristo xyajni bicých jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. 5 Nañ jadu'n xypaatpich co nmñid'adipyich tüg ndöxyijcich huidibi mibijcp, etz huidibi nmñiduididipyich tim jadu'n nej yi' jacjadyii apóstol ajcxy miidity, etz je Huindzin Jesús y'uch ajcxy mñidity, etz Pedro. 6 ¿Nej miich ajcxy mminaangixy co ñich etz Bernabé nimejtzpajc ca' ñich ajcxy huaad ixmajtzcixy yi' ndungich co ngapxhuäcxyich Cristo y'ayuc ytiy'ajt? 7 ¿Huidibi soldado yi' ma je ejercito ci'm ygasto cojuy? ¿Pin ji cam nidungñyb, e ca' jñicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? 8 Ca' miich ajcxy mñina'ñipy co jay y'ayuc jada. Nañ jadu'n jaybety y'ity ma Dios ñecy tim jadu'n nej nmñina'ñich. 9 Com jaybety jadu'n ymiñ ma Moisés ñecy, ma Moisés jadu'n ymiñ: "Ca' huaad huajuub y'ajen mbidaaci ma yam ten moody yi' trigo co yajpajc'aty." ¿Nej jěyi mñid huajuub ycixpi Dios jadu'n ymiñ? 10 Canan jěyi mñid huaj yuub ycixpi Dios jadu'n ymiñ. Nañ jadu'n Moisés jaybejty jada tiy'ajt mñid ñich ajt ycixpi. Com yi' jay ajcxy huidibi naaxjidziztjz, etz yi' ajcxy huidibi trigo yajpajc'ajtp, hue' ajcxy yjijp'ijxyp co padaangixy je moc tim hidibi ajcxy ti nidungñy. 11 Nañ jadu'n ñich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meeñ etz jicxy picy mñid ndungich ycixpi? 12 Pen jacjadyii Dios y'ayuccapxhuäcxpi ti paatcixy meeñ etz jicxy picy ma miich ajcxy mñid ytung ycixpi, ¿nej ca' jěbi ñigi ñich nbaadyich meeñ etz jicxy picy mñidich ndung ycixpi? Oy njamñididyich je mic'ajt nej nja'ane'mgixy co xymöhuibityich ajcxy meeñ etz jicxy picy mñid ñich ndung ycixpi, per ca' jadu'n ti n'ane'mgixy. Jadu'n ñich tzaachypí nyajnajxich jim ma miich ajcxy, jaydėbi jay ajcxy cöbijccixy Cristo aguic jotcujc ca' ti adzijpin. 13 Mnejhuñyb miich ajcxy co yi' hidibi ajcxy tumb ma Dios ytijc, paatcixy ninigoobi caayin uucin. Nañ jadu'n yi' pin ajcxy hidibi iyujc yajhuindzigñyb Dios, paatip ajcxy je huindzigñi tžuch. 14 Nañ jadu'n je

Huindzin Jesucristo ane'my co huen yajcaaygixy yaj'uuccixy etz mooygixy yhuit ytucx yi' ajcxy huidibi capxhuäcxcixp yi' y'ayuc ytiy'ajt. 15 ñich ca' ti nyajtuñich jada mic'ajt jada ane'min huidi nmñidich. Nañ jadu'n ca' jada ayuc nyajni jayñygixy, mñid co ndzocy co pada'ñich tijaty ma miich ajcxy. Jacjotcujc co n'ögibich mñid yuu, ca'ydi co n'anémibich caayin uucin ma miich ajcxy, e jadu'n tžöydu'n nbáadibych jadu'n nej cham naygömayiijich, mñid co ci'm nnyajcayijich mñid ndungich.

16 Com ca' huaad naygömayiijich co ngapxhuäcxyich Cristo y'ayuc. Mñid co Cristo xyyajni bicých jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxcich Cristo y'ayuc. 17 Pen ngi'mdzöjcinich ycixpi ngapxhuäcxcich Cristo y'ayuc, njijp'ijxypich ixypy co jay ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajni bicých jada tung, e paady nduñich yi' ytung. 18 ¿Ti muju'ñ nbáadibich mñid ndungich ycixpi? Nbáadibich jotcujc'ajtín co ngapxhuäcxcich Cristo y'ayuc jadu'ñyi, ca' ymeeñygixyity. Ca' nyajtuñich je ane'min hidibi Cristo xymóyich mñid caayin uucin ycixpi.

19 Ca' ji ni pin jay mic'ajt mñidity jaydėbi xy'ane'myijich. Oy ixypy ytimyñejity ti nnyabidägyijich mñid ñich njot nhuinma'ñ jadu'n nej jñhuñ tüg'óciy jay ajcxy xy'ane'myich. Jadu'n nduñich jaydėbi jac mayjy ajcxy nyajmibigipych Cristo. 20 Co ngapxhuäcxyich Cristo y'ayuc ma yi' judío jay, hue' naybidägyijich judío jay, jaydėbi nyajmibityich ajcxy Cristo. Co ngapxhuäcxyich Cristo ma yi' judío jay ajcxy hidibi cuydumybi yi' ajcxy ycötujcin etz ycostumbre, nañ jadu'n ñich nguyduñich yi' ajcxy ycötujcin, jaydėbi nyajmibityich ajcxy Cristo. Ooy yjanchity co ca' yi' judío ycötujcin etz ycostumbre xy'ane'myich. 21 Co ngapxhuäcxyich Cristo y'ayuc ma yi' ajcxy hidibi ca' yjudío jayity, chi naybidägyijich jadu'n nej yi' ajcxy. Ca' nan nminaambich co ca' nguyduñich Dios ytiy'ajt. Hue' njatytimyuydumybi Cristo ycötujcin, jaydėbi nyajmibityich ajcxy Cristo. 22 Co ngapxhuäcxyich Cristo y'ayuc ma yi' ajcxy hidibi ca' tiydudägy mibijccixy, chi naybidägyijich jadu'n nej yi' ajcxy, jaydėbi nyajmibityich ajcxy Cristo. Ma nidüg'óciy jay ajcxy ma ngapxhuäcxyich Cristo y'ayuc, chi nbidägyich njot nhuinma'ñ nej yi' ajcxy yjot yhuinma'ñ mñidity, jaydėbi nijějity ajcxy nyajmibityich Cristo y'ayuc ytiy'ajt. 23 Jadu'n nduñich tüg'óciy mñid Cristo y'ayuc ycixpi, je ayuc nej jěbi jay ajcxy y'alma ñidzoocixy. Jadu'n nduñich, jaydėbi nbaadyich je jotcujc'ajtín etz oy'ajtín hidibi nbaatim nidüg'óciy co nmijpidaacim Cristo.

24 Mnejhuñygixy co jay ajcxy ñayboyicquixigixy co premio padaangixy, huin'it nidüg'óciy ajcxy ñaymic'ijxigixy, per tügpajc huidi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydėbi Dios xymóoygixipy ajcxy tüg premio. 25 Tüg'óciy pinjaty nayñi'ixiñy co ñayixiquipxáanigixy ma iyñhuñjin, ooy ñayguend'ajtigixy mic, jigix jěbi ymadaaccixy co ganar'adaangixy premio hidibi ca' huinixi ajcxy mi'ijtcixy. Pero ñich ajcxy Dios

y'ayuc capxhuäcxy, yí' ñich ajcxy mijottigooygixy nganar'adáangixyich huídibí ca' nimina ycixipy ytigoyipy. ²⁶ E jadu'n ñich ndung mijottigooyich, ca' yhuimbídzyt agoodzity, jadu'n nejhuüy ngoxich e nipin ca ypegyii. ²⁷ Nnaychaachytumybich ngi'mninícxich, jaydëbi ngi'mninícx xycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca'ydi nyaigtigoyipyich nbremio huídibí Dios xymöhuambich.

Capxhuijin ma yí pin ajcxy jac-huindzigiyb quipychech

10 Com ndzojcytich co miich ajcxy migügtjic mnehuüygixipy co ajt nmij'ap nmijteedy mñid yhuídity Moisés co Dios nidüg'óciy ajcxy cuend'ajttay, huinhuoy jecy'ajty mñid tüg joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnaxxy je tzaptz mejy cujc'amy. ² Co nidüg'óciy ajcxy panícxxy je joc, e co ñidzoocytay ajcxy nidüg'óciy ma je mejy, hue' nidüg'óciy ajcxy cöbicy Moisés y'ane'min, e jadu'n nipaady nej jihuüy ni'amugé ajcxy yñiibejty mñid Moisés yxi. ³ Nañ jadu'n nidüg'óciy ajcxy caay jicxy je maná huídibí Dios anajty yejcpy, choñ je' anajty tzajpoty. ⁴ Etz nañ jadu'n y'uuc ajcxy nidüg'óciy je ñi huídibí Dios anajty yejcpy, com y'uuc ajcxy je ñi huídibí yajpidzim ma je tzaa. E je tzaa hue' je' anajty Cristo, e paady Cristo ymñid'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim mijtigëduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti mñid ajt nmij'ap nmijteedy jecy'ajty, je' iixpejtíp ma ñich ajt, ca'ydi n'adzojcm tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijëjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymína'ñ: "Ixtactay je jäy ajcxy caaybi uucpi, e huin'it ajcxy ypidígy etz ytigüygixy iyiybi ejtzpi." ⁸ Nañ jadu'n ca' y'oyity co ndundigooyim mñid töxyjäy ajcxy jadu'n nej nijëjity nmij'ap nmijteedy tuñ jecy'ajty, e lipx tugüg mil ajcxy y'o'cy tüg xiibi. ⁹ Nañ ni ca' y'oyity co njot'ijxim nhuinma'ñ'ijxim ñich ajt nHuindzin Jesucristo, jadu'n nej ajt nmij'ap nmijteedy ajcxy idñich jecy'ajty, e may ajcxy tza'ñchüdzí, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojiyim Dios, jadu'n nej nijëjity ajcxy idñich jecy'ajty, e mñid je' ycixpi Dios y'ángel yaj'o'cy mayjäy ma yí' ajcxy.

¹¹ Tüg'óciy yí jadu'mbi ayo'n yjajti mñid ajt nmij'ap nmijteedy, e jaybety yhuí'my ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydi ndundigooyim mñid Dios, ñich ajt pinjaty tzinaayb ma jadachambi xii jadachambi tiempo huídibí janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmñid'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt mñidity ma ymibijcin, huen naygüend'adyii, ca'ydi ytundigoy etz ypocycáhuipy ma Dios. ¹³ Tüg'óciy tzaachypí ayo'n, jot'ijxin huinma'ñ'ijxin huídibí miich ajcxy mñinajxyp myajnaxyp, nañ jadu'n

jacjadyii mibijcpidijc ajcxy mñinajcixy yajnajcixy. Per yajmij'ajtcix jot'amij'ajtcix Dios, com Dios ca' a'ixñhuip co mñinajcixipy mñinajcixipy tzaachypí ayo'n anaxy huídibí ca' ajcxy mñinajcixy. Co anajty tzaachypí ayo'n mñinajcixy myajnajcixy mictägy, huin'it Dios xymöhuipy ajcxy huinma'ñ jadu'n nej jëbi mñinaxtaygixy myajnaxtaygixy yí tzaachypí ayo'n.

¹⁴ Paady miich ajcxy migügtjic, huídibí ooy ndzocy njihuüyich, ixmajtcixy ca' m'ojadajtcixy tzaadzech quipychech. ¹⁵ Nyajmñidcapxy nyajmñidmíydacpy ajcxy jadayaabi ayuc, com nejhuüyibich co miich ajcxy ooy oy huinma'ñ mñidity. E jëbi c'i'm mhuinmaaygixy pen tiy'ajt jada ñich n'ayuc, o pen ca'. ¹⁶ Ma je "Santa Cena" co nyajnaxim Dioscojuyip ma Dios mñid je ügy, e n'uucim. Je' je' ñidiy'ajt'ajtpy co Cristo ti xyajtügímjicm ajt njot nhuinma'ñ co yajcruudzpejti etz ñi'py yteemy yojcy mñid ajt nbocy ycixpi. Nañ jadu'n ma je "Santa Cena" co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügímjicm ajt njot nhuinma'ñ mñid ñinícx co ñaygíyeci ma ymidzip huen yajcruudzpedyii. ¹⁷ Oy ajt ooy njanimaayity, per nidüg'óciy ñich ajt ngaayim je tügpi "Santa Cena" tzajcaagy. Jada tzajcaagy tüg yí', paady ycixpi tügpi jäy ñich ajt, e jadu'n ñich ajt nipaady nej tügpi ninícx.

¹⁸ Oc-huinmaaygixy miich ajcxy yí Israel jäy ajcxy, co ajcxy tzützcixy je huídibí ajcxy yajhuindzigiyb Dios, chi ajcxy naydücmújcixy mñid Dios ycixpi ma je Dios ojadajttac. ¹⁹ ñich nmina'ñich co yí tzaadzech ca' ti mic'ajt mñidity, e nañ jadu'n yí tzüch huídibí yajhuindzigiyb tzaadzech ca' jac nigí oy'ajtin mñidity, ca'ydi jac huídibí tzüch. ²⁰ Jadu'n nmina'ñich, co yí jäy ajcxy huídibí ca' mijpidaaccixy Dios, co ajcxy yejccixy yhuindzigí'ñ, hue' ajcxy yajhuindzigiyb ca'oybi, e ca' Dios ajcxy yajhuindzigíy. E ca' ndzocyich co miich ajcxy migügpijipy je ca'oybi. ²¹ Co miich ajcxy m'uuccixy je ügy ma je "Santa Cena", ca' huaad m'uuccixy je ügy huídibí ca'oybi ajcxy yhuindzigí'ñ'ajtipy. Etz co mgaaygixy je tzajcaagy ma je "Santa Cena", ca' huaad mgaaygixy je tzajcaagy huídibí ca'oybi yhuindzigí'ñ'ajtip. ²² ¿Nej tzoc yajjotma'tim yí Jesucristo? ¿Nej jacmic'ajt mñid jada' ñich ajt, ca'ydi yí?

Je tzojcin huídibí tüg mibijcpi huaad tuñ mñid ymígüg

²³ Janch tiy'ajt nej jay ymínaangixy co jëbi huaad nduñich huentijity huídibí njot'ajtpyich, per ca' tüg'óciy nmigügtjicich jäygidaccixy huídí ndumybich. Janch jadu'n jëbi huaad nduñich huentijity huídibí njot'ajtpyich, per huídibí ndumybich ca' tüg'óciy xypubetyich ma ñich nmibijcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigíyim nmigügtjic.

²⁵ Jëbi ajcxy mdzüch huen ti tzüch huídibí yajtoocp ma je mercado. Ca' ajcxy myajtñhuipy ma je tzüch choñ, ca'ydi jibic mñayjihuíyigixy. ²⁶ Com Dios y'ayuc jadu'n ymína'ñ: "Je Huindzin Dios yí' nihuindzin'ajtp je naaxhuiñybi, etz ñihuindzin'ajttaayb tüg'óciy huídibí jí yajpatp."

²⁷ Pen jim pinjaty huidibi ca' ymibicy, xyajnihuohuüy tüg caayin uucin ma yi' ytijc, e pen ti mhuinma'ñ mbidägy co nicxy mgaya'ñ ma yi' ytijc, oy co mgaayipy mdzüdzip huentijity huidibi ajcxy xymooyb. E ca' mnidihuipy myajihuipy ma je tzüch choon, ca'ydi jac pinjaty jibic ñajihuüyii miid huidibi ti mduñ. ²⁸ Per pen je jäy xyñimaayb: "Jada tzüch ti jäy yajhuindzigy tzaadzech." Pues ca' mdzüdzip je tzüch, jigix ca' jibic ñajihuüyii je migüg huidibi ti xyñimäy co je tzüch ti yajhuindzigy tzaadzech. ²⁹ Hue' nimiydacypich je mmigüg huidibi jibic nayjihuüyii pen miich mdzu'chpyi tzüch huidibi tzaadzech yhuindzigi'ñajtp. Ca' nniimägyich nej miich ci'm mnayjihuüyii. Ca' yjecyity co nijjity jäy xyñimähuibich: "¿Na'amy co xy-capx'adujcich tijaty nigoob miid co huingbi jäy jibic ñajihuüyii miid jëgixpi?" ³⁰ Pen nyajnajxypich Dioscojuyip miid tijaty xcixpi'ñajtp. Ca' yjecyity co xyñimähuibich: "¿Na'amy co xyñimähuibich co ty n'gay ti n'ügyich tijaty?" ³¹ Paady xcixp huentijity huidibi mdungixyp, pen mgaayigixyp m'uuccixyp, o jac ti ga ti mdungixy, tungix tüg'ocy miid Dios y'oy'ajtin ymij'ajtin xcixpi. ³² Ca' mdungixyp tijaty huidibi yi judiojäy ajcxy miid huing ñajihuüyii. Ca' mdungixyp tijaty huidibi yi griegojäy ajcxy miid huing nayjihuüyii. Etz ca' mdungixyp tijaty huidibi yi mbijcpidijc ajcxy miid huing ñajihuüyii. ³³ Tüg'ocy hidibi ndumyibich, hue' nduñich jigix tüg'ocy jäy jäygidägy hidibi ndumyibich. Ca' ni ti nduñich nej jëbi ñich ci'm nayjäygidägyijich. Hue' nduñich miid jacjadyii jäy ajcxy y'oy'ajtin xcixpi, jaydëbi ajcxy y'alma ñidzögipy.

11 Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuñ.

Nej huaad töxyjäydijc ajcxy yjäy'ajtcixy co migügtijc naymújcigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjämejtzipich, etz nañ mguydungixyp je ayuc je tiy'ajt hidibi ñich miich ajcxy ti nyaj'ixpijccixy. ³ Per ndzocypich co mhuinjihuüyigixyp je tiy'ajt co Cristo nigohuajc'ajtpy nidüg nidüg yi mbijcpi yëydijcpi. E nañ nidüg nidüg yëydijc nigohuajc'ajty ajcxy ytöxyijc. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'ñ ñhuäcxy capxhuäcxy je tiy'ajt hidibi Dios ti ymöyii, tüg je' tzo'ydu'ñ anajty naymöyii. ⁵ E co tüg töxyjäy cöjuxtüdy cöbe'ndüdy ñhuäcxy capxhuäcxy je tiy'ajt hidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuüy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuhuaamyb co ycöhuay yme'pxity, o co ycöme'pxity cödza'm, jac nigiyoy co ñaygöbe'ñyib. ⁷ Je yëydijctijc ca' y'oyity co ajcxy ycohuaajc cöjuuxy cöbe'ñ m'idipy ma ajcxy Dios mbijctzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc miid yi' y'oy'ajtin xcixpi. Per Dios yajcoj je töxyjäy miid je yëydijc y'oy'ajtin xcixpi. ⁸ Co Dios yajcoj je jayijpi yëy-

dijc, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy miid je yëydijc ycixpi. E ca' nan yajcoj je yëydijc miid je töxyjäy xcixpi. ¹⁰ Paady xcixp copicy co je töxyjäy ajcxy y'ijtcixy cöbe'ñ co Dios mbijctzoogixy o najtzcapxiygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi ángeles ajcxy yajpaatcixy ane'my. ¹¹ Per ca' ñejity, ñich ajt hidibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüddzinäyigixyp. ¹² Com tiy'ajt jadu'n co Dios yajcoj je jayijpi töxyjäy miid je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'ocy jiiib chondäy ma Dios.

¹³ Miich ajcxy ci'm ocminaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mbijctzoy jaygöbe'ñ. ¹⁴ Jëbi tiy'ajt nbaatim huenma'amyity ya naaxhuiñ co je yëydijc hidibi ymiid ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycömaypidzimigixy co ajcxy miidity ycöhuay yoñ. Com yi' je' huidi ycöbe'ñajtp. ¹⁶ Pen jim pinjaty ca' mijotcujc'aty ñich n'ayuc, copicy nejhuüyii co ñich ajcxy etz nañ jadu'n tüg'ocy jäy hidibi ajcxy mijpidaaccixyp Dios ma tüg'ocy cajp, cuydungixy nej ti nyaj'ixpijccixy miich ajcxy, ca' pin jac huingbi costum-bre miidity.

Pin tundigooyb "Santa Cenajoty"

¹⁷ Jada ayuc nyajnimähuaangixyp jadu'n nej mdungixy ma mnayyöymújcigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijjity migügtijc ti xyñimäyich co miich ajcxy mnaybajc-huäcxigixy co mnayyöymújcigixy ma je nayyöymujctac. E ñich nmibijcypich ma ga ma co yjanchity nej je migügtijc ajcxy ymina'ñ. ¹⁹ Ca' yjecyity paady miich ajcxy mnaybajc-huäcxi miid ajcxy mbijc-huinma'ñ xcixpi, jaydëbi ñiguëxgy pin je' janch tiydudägy cuydumb Dios ytiy'ajt. ²⁰ Co miich ajcxy mnayyöymújcigixy ma je nayyöymujctac, jadu'n yhuimbizimy co ca' mguydungixy nej ypadyii ñich ajt nHuindzin Jesucristo ytiy'ajt co mjatungixy je "Huindzin je' ySanta Cena". ²¹ Com co je hora paady ma yam mdungixy je "Huindzin je' ySanta Cena" nidüg nidüg miich ajcxy mgaaygixy abicyjaty, e ca' mdungixy cuendi yi jacjadyii migügtijc, paady nijjity migügtijc ayuu y'ijtcixy, e nijjity anaxy ycaaygixy y'uuccixy, ixti ymuucigixy nijjity. ²² ¿Nej ca' miich ajcxy miidity mjiin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'ocy hidibi mijpidacp Dios. E nañ jadu'n myajtzo'ydungixy yi ayoobi jäy hidibi ajcxy ca' ti miidity. ¿Huam ñich miich ajcxy nimähuiipy? ¿Nej jëbi ngömaaygixy miich ajcxy jadu'n nej mdungixy? Ca' huaad ngömaaygixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi "Santa Cena"

²³ Com ñich ajt nHuindzin Jesucristo ci'm xyaj'ixpij-cyich je tiy'ajt huidibi ti nyaj'ixpicyich miich ajcxy, co je huin'it coodz co agojix ajcxy cäyeyjy je nHuindzin Jesús, huin'it je' conëgy je tzajcaagy, e co jayijp yajnaxjy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscípulos ajcxy. E co ajcxy moyday, chi nimay ajcxy: "Caaygix jada tzajcaagy. Jadu'n ñich jada nninicx huidibi ngëyegaamybich ma yi o'cin miid miich ajcxy ycixpi. Jadu'n ñich ti nduñich, jadu'n jada miich ajcxy mdunipy jäyimejtziig miid ñich ycixpi." ²⁵ Co ajcxy ycayday, chi Jesús nañ jadu'n conëgy je ügy copï'am, e ymïnañ: "Jada ügy je' jada je Dios y'ayuc jembyi huidibi Dios yajhui'my miid jäy ajcxy ycixpi, je huidibi ñich nni'py ñidiy'ajtajtpy. Naag'oc naag'oc m'uuccixy jada ügy tungixy jäyimejtziig miid ñich ycixpi." ²⁶ Paady naag'oc naag'oc miich ajcxy mgaaygixy jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy miid ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

²⁷ Paady ycixp pinjaty miid ca'oyjot ca'oyhuinma'ñ caaygixy je tzajcaagy etz uuccixy je vino'ügy, huidibi ajt nHuindzin Jesús ñinicx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnicx etz yi' yñi'py. ²⁸ Paady ycixpi copicy nidüg nidüg mibijcpidijc jayijp yaj'oyihuiipy yci'mjot yci'mhuinma'ñ, e huin'it jëbi cayipy je tzajcaagy etz ügipy je vino ma je "Santa Cena". ²⁹ Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' ñich ajt nHuindzin Jesús ñinicx etz ñi'py, hue' je' ci'm ñaym-undigoyii, e Dios tzaachytunib miid ypocy ycixpi. ³⁰ Paady ycixp may miich ajcxy myuumñidity mba'mmñidity, pumäy mnayjihuiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tiydudägy njot nhuinma'ñ nyaj'oyiiyim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim miid yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi miid je naaxhuiñjyäy ajcxy huidibi ca' ajcxy Dios tzigiiygixy. ³³ Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuijxigixy miñ xyipy, e jadu'n mgäaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoymujctac. Jadu'n mdungixipy, ca'ydi Dios xychaachytuungixy miid co ca' oy mduungixy je "Santa Cena". Yi jacjadyii ayuc huinma'ñ jim nyaj'oyihuibich co anajty nicy ci'm n'ijxcyich miich ajcxy.

Je mic'ajt huidibi Espíritu Santo yejcy ma nidüg nidüg mibijcpidijc

12 Migügtijc ajcxy, ndzojcpich co miich ajcxy mnejhuipy jadu'n nej je Espíritu Santo xymooyim mic'ajt. ² Miich ajcxy mnejhuib co jayijp'ajty co ca'ni anajty mmibijccixy Cristo, ooy anajty je ca'oybi xyajniidigooygixy xyajtüdigooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuipy co pinjaty ymina'nipy: "iCa' oy jäy yi Jesús!" je jäy huidibi jadu'n minamb, ca' je' anajty yajcapxyii je Dios y'Espíritu. E pinjaty minamb: "iJesús ñich ajt nHuindzin!" je' anajty yajcapxip je Espíritu Santo. ⁴ Dios yjihui'ñ ymic'ajt yejcpy ymic'ajt canaag nax, per tügpajc jëyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huidibi xyajniibijcim nije' nije' tung. ⁶ Ji yajpaady canaagnax huinma'ñ nej jëbi ndunim Dios ytung. Per tügpajc Dios huidibi xymooyim nidüg nidüg je nhuinma'ñ nej huaad ndunim Dios ytung. ⁷ Dios yajniuguëxigyp ma nidüg nidüg mibijcpidijc je tiy'ajt co ajcxy mñidity yi' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ miid tüg'óciy ymibijcpidijc y'oy'ajtin ycixpi. ⁸ Dios miid yjihui'ñ ymic'ajt ymooyb nijëjity mibijcpidijc ayuc huinma'ñ nej jëbi ajcxy yaj'ixpicy Dios y'ayuc. E nañ jadu'n Dios miid yjihui'ñ ymic'ajt möy nijëjity mibijcpidijc ixpicin ma yi' ytiy'ajt, per tügpajc je Espíritu Santo huidibi mic'ajt yejcp. ⁹ E nañ jadu'n Dios miid yjihui'ñ ymic'ajt möy nijëjity jäy mibijcin, per tügpajc je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios miid yjihui'ñ ymic'ajt ymooyb nijëjity mibijcpidijc mic'ajt, jaydëbi mijhuinma'ñytungixy milagro tungixy. E jac nijëjity ymooyb mic'ajt, jaydëbi najtzcapxiygixy Dios ytiy'ajt. E jac nijëjity Dios ymooyb ixpicin etz huijy'ajtin, jaydëbi ijxajpcixy je espíritu huidibi ca' tiy'ajt mñidity, etz nañ jadu'n ijxajpcixy je espíritu huidibi tiy'ajt mñidip. E jac nijëjity Dios ymooyb je mic'ajt, jaydëbi capxcixy huingbi ayuc, etz nañ jadu'n jac nijëjity ymooyb je ixpicin jaydëbi yajniugejcxixy je huingbi ayuc. ¹¹ Per tügpajc je Espíritu Santo huidibi ymooyb nije' nije' mibijcpidijc mic'ajt etz huinma'ñ. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tüg ninicx, je ninicx ymiid canaag nax huidibi yu'cxp. Oy canaag jamñidity huidibi yu'cxp, per tügpajc ñinicx'aty. ¹³ Co nidüg nidüg ñich ajt nñibejtim, chi ñich ajt nyajpaatim nej tügpicy jäy. Com Dios yjihui'ñ ymic'ajt tügpajc yajpaady ma nidüg'óciy ñich ajt njot nhuinma'ñ, ca' ñejity pen judíojäy ajt, o pen ca' ajt njudíojäyity; pen jäy xytumb'ajtim o pen ndunim ngi'mdung; hue' n'ijtim nej tügpicy jäy. Dios xy'adigiyim xyjottigiyim yi' yjihui'ñ ymic'ajt nidüg'óciy ñich ajt, paady ycixpi tú'ciy nyajpaatim, com tú'ciy nm'iijtim Dios yjihui'ñ ymic'ajt.

¹⁴ Tügpí jáy ñinícx mïid canaagnax huidibi yu'cxp, huidibi mïdoob, huidibi ijxp. ¹⁵ Co ixypy je tecz jadu'n ymïna'ñ: "Ca'p ñich ngëjity, paady ca' nyajpaadyich ma je ninícx." ¿Nej paady ycixpi ca' yajpaady ma ninícxin? ¹⁶ O co ixypy je tãdzac ymïna'ñ: "Ca'p nhuiniity, paady ca' nyajpaadyich ma je ninícx." ¿Nej paady ycixpi ca' yajpaady ma ninícxin? ¹⁷ Co ixypy tüg'óciy je jáy ñinícx y'oc-huin'aty, ¿ma ixypy mïdity huidi mïdooyb? O co ixypy tüg'óciy je jáy ñinícx ytãdzac'aty, ¿ma ixypy mïdity huidibi jëbi mïd tijaty xuugyii? ¹⁸ Dios ti pidaci jáy ytecy yhuin y'ahuac etz jac tijaty ma tügpí ninícx jadu'n nej yí' tzojcy. ¹⁹ Pen huiindi'ajty ixypy ninícx'ajtp, ¿ti ninícx ixypy jada? ²⁰ Dios ti möy nidüg nidüg jáy yci' ytecy, yhuin y'ahuac, yjijpput etz ytãdzac, per tügpajc ñinícx'aty.

²¹ Ca' huaad je huin ixypy nimäy je ci': "Ca' ñich miich nyajmayjaty." Nañ jadu'n ca' huaad ixypy je cohuajc ni-may je tecz: "Ca' ñich miich nyajmayjaty." ²² Tügpí ninícx copicy ca'pxy tijaty mïid. Huidijaty je ninícx ymïd oy yjaquëxígy nej jihuüy ca' y'oy'ojadajtnity, per copicy yí'. ²³ Jadu'n ñich ajt njäy'ajtm. Muum ma ajt nninícx ca' oy n'ijxim, paady nayxoixim, jigix jac'oy quëxígy. Nañ jadu'n muum ma ajt nninícx huidi y'oymidzo'yduñi, paady nyüdzim mïd huit, jaydëbi oy quëxígy. ²⁴ Muum ma ajt nninícx oy n'ijxim paady ca' nyüdzim mïd huit. Jadu'n Dios yaj'oyiity ajt nninícx, jigix ma ca' oy y'ijxity, nxoixim mïd huit, jigix jëbi oy quëxígy. ²⁵ Jadu'n Dios yajcojy yaj'oyiity ajt nninícx tú'ciy, jigix ca'ydi ñaychiptúnigixy nije' nije' huidibi yücx ma ajt nninícx. Tüg'óciy huidibi nmïd'ajtm ma ajt nninícx naybubéjtigixp miñ xyipy. ²⁶ Pen pijcp muum ma je ninícx, tüg'óciy je ninícx jihuüy je pijcin. Pen muum ma ajt nninícx ooy capxpaady y'ity, chi tüg'óciy je ninícx jotcuyc ñayjihuüyii.

²⁷ Miich ajcxy nidüg'óciy Cristo xyñinícx'ajtcixyp, e nidüg nidüg miich ajcxy myajpatcixy ma Cristo ñinícx. Jadu'n nidüg nidüg ñich ajt nipaady nej huidi yücxp ma tüg ninícx. ²⁸ Dios yajnibíjcy nije' nije' mibijcpidijc, jigix ajcxy yajnícixp nidüg nidüg yí' ytung. Tim jayijp yaj-nibijcy je apóstol ajcxy huidibi je mijtung yajnícixp. E mïmetz Dios yajnibijcy nijëjity mibijcpidijc huidibi najtzcaxiib yí' y'ayuc, je midugígpí Dios yajnibijcy nije' nije' je mibijcpidijc huidibi yaj'ixpijcp yí' ytiy'ajt. Dios yaj-nibijcy mibijcpidijc nijëjity huidibi mij huinma'ñ tumb. E Dios yajnibijcy mibijcpidijc nijëjity huidibi yajtzoocp pa'mjäy. E Dios yhuin'ijx huidibi pubejtp ymïgügtijc. E Dios yhuin'ijx je mibijcpidijc huidibi ane'mip je ymïgügtijc. E Dios yhuin'ijx je mibijcpidijc huidibi jadip nej capxip huingbi ayuc. ²⁹ Ca' nan nidüg'óciy mibijcpidijc huidibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcaxiigixy Dios y'ayuc. E nañ ni ca' nidüg'óciy yí' ajcxy mijhuinma'ñ y-tungixy. ³⁰ Ca' nan nidüg'óciy mibijcpidijc huidibi Dios huin'ijxip ymïd ajcxy mic'ajt cõtujc yajtzögípy pa'mjäy. Nañ jadu'n ni ca' ajcxy nidüg'óciy jajtciy nej yaj-nigüéjicixipy huingbi ayuc. ³¹ Pijctzoogix cixyot huinijot ma Dios je mic'ajt etz je huinma'ñ oybi. ñich miich ajcxy nyajnixíhuipy tüg ni'aa tü'aa jac'oybi.

Je tzojcin je oyjäy'ajtin

13 Co ixypy ngapxyich tüg'óciy jáy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocyich ca' njihuüyich nmïgügtijcich, jadu'n yhuimbizimy ñich n'ayuc jadu'n nej tüg tambor o tüg platillo huidibi nigoob ooy ñe'my. ² E co ixypy najtzcaxiigix Dios y'ayuc, etz co ixypy njatyich tüg'óciy ixpijcin huidibi pinjaty nejhuüy etz huidibi pinjaty ca' nejhuüy, etz co ixypy nmijpidägyich Dios ymic'ajt, ixti jëbi nyajpidägyich tüg cop, pen ca' ndzocyich njihuüyich nmïgügtijcich, ca' ñich ti ndzoohuity. ³ E co ixypy nmoydayich ayoobitijc tüg'óciy tijaty nmïdich, e nañ co ixypy ngäyeyeyich nninícx ma jáy ajcxy co huen nöctigoydäy, e ca' ndzocyich njihuüyich nmïgügtijcich, ni ti oybi ca' nbada'ñich.

⁴ Yí jáy ajcxy huidibi ooy tzojcy ooy jihuüy ymïgügtijc, hue' ajcxy ooy mecxtujcin mïdity, nañ ooy ajcxy yung naxy yjot yhuinma'ñ. Nañ ca' ajcxy ymïgüg ti yajcohuindoyii, e nañ ca' ajcxy ñaygömayii ci'm. ⁵ Yí mibijcpidijc huidibi ajcxy tzojcp jihuüyb ymïgügtijc, ca' ajcxy oyñinej ycapxixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymïgüg mijotma'tcixy. ⁶ Yí mibijcpidijc huidibi ajcxy tzojcp jihuüyb ymïgügtijc ca' ajcxy yjotcuycity co pinjaty ytundigooy. Jotcuyc ajcxy co pinjaty tudägy yjäy'ajtcixip. ⁷ Co naychojcin nayjihuüyim, huin'it yaj-tunim mecxtujcin, huin'it nmibijctayim huidijaty tiy'ajtip, huin'it nmibijctaayim co tüg'óciy tijaty oy yhuimbizimipy, huin'it nmechtujctayim tüg'óciy tzaachypí ayo'n.

⁸ Yí naychojcin nayjihuüyin ca' yí' ycixipy ytigoyipy ni mina. Minip je xií tiempo ma ca' y'ocay'ijxnipy y'ocayjmïdoonipy Dios ycapxy y'ayuc huidi jáy ajcxy ñajtzcaxiigixyp, nañ ni yca'yajmïdoohuipy pin huingbi ayuc capxp, ni yca'yajtzocy anajty ti diy'ajt. ⁹ Com ca' yca'pxity je ixpijcin huidibi ñich ajt nmïd'ajtm. Nañ jadu'n ca' yca'pxity je Dios y'ayuc huidibi ñich ajt nnajtzcaxiim.

¹⁰ Per co anajty nmïd'ajtm ca'pxy Dios y'ayuc ytiy'ajt, chi ycixipy ytigoyipy je ayuc huidibi nmïd'ajtm cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmïydagyich n'iyiyich nejtyin pi'c'anäcin. Per co oy nmij'anäciyñich, chi n'ixmajtnich je pi'c'anäg'atypí huinma'ñ. ¹² Nañ tim jadu'n nyajnajxim jadachambi xií tiempo ca' n'ijxpjctaayim, ca' nhuinjihuiydaayim Dios y'ayuc ytiy'ajt. Jadu'n nipaady nej jihuüy nay'a'ijxnajxim ma tüg ijx, huidibi ti chixni ti yjibiciyñi. Co anajty Jesús yhuimbity jadüg'oc, huin'it huadz nhuinjihuiydaayim Dios y'ayuc ytiy'ajt, com naybadaanim mïd Jesús ahuin ajijp. Jadachambi magama nhuinjihuiyich. Per co naybadiiybich mïd Jesús, huin'it nhuinjihuiydaayim nej Dios y'ixpijcin mïdity, tim jadu'n nej Dios nejhuüydäy nej ñich n'ixpijcin nmïdity. ¹³ Nmibigaanim Cristo huinixi huinitempo, ca' n'ixmadzaanim nmibijcin ni mina. Nañ nijp'ijxim co oybi nbadaanim ma Dios huinixi huinitempo. Nañ jadu'n ndzocim njihuüyim mïgügtijc huinixi huinitempo.

Hue' jac nigí copicyip co naychojcm nayjihuiyim ca' ydi jac ti.

Co huingbi ayuc yajcapxy

14 Naychójcigixy nayjihuiyigixy miñ xyipy. Mijotti-gooygixy nej mbaatcixy Dios yjihui'ñ ymic'ajt canaagnax. Yi Dios yjihui'ñ ymic'ajt huidibi jac'oybi, yi' je' yejcpy mic'ajt jaydēbi mnajtzcapxyigixy Dios y'ayuc ytiy'ajt. ² Yi jāy ajcxy huidibi Dios ymic'ajt miid jaydēbi capxy huing ayuc, hue' ajcxy ymīgapxyp Dios, e ca' nan jāy, com yi jāy ajcxy ca' huinjihuīgixy je' ajcxy y'ayuc huidibi capxp. Je Espiritu Santo yejcp je ayuc ma je huidibi capxp. Jadu'n nipaady nej jihuiy ameech je' ycapxy. ³ Pinjaty najtzcapxyib Dios ytiy'ajt, yi' ycapx-huäcxyp Dios y'ayuc ma yi jāy ajcxy, jaydēbi yujcpedipy ajcxy y'ixpijcin ma Dios y'ayuc, nañ jadu'n jaydēbi ajcxy yjotmicpigipy etz yjotcugiyigixy. ⁴ Pinjaty capxp huing ayuc, hue' ci'm naybubedyi. Pinjaty najtzcapxyib Dios y'ayuc ma yci'm ayuc, hue' ypubejtyp tūg'óciy yi mibijcpidijc.

⁵ Huaad co ixypy nidūg'óciy miich ajcxy mgapxcixy huingbi ayuc. Per jac nigí oy co miich ajcxy mnajtzcapxyigixy Dios ytiy'ajt, ca' ydi co mgapxcixy huingbi ayuc. Pinjaty huidibi najtzcapxyib Dios y'ayuc, jac nigí oy tuñ, ca' ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcujc'ajtin pátcixip. ⁶ Migūgtijc ajcxy, co ixypy nnicxyich ma miich ajcxy, e ngapxyich ixypy huingbi ayuc, ¿ti oybi miich ajcxy mbadamyb ma ñich? Pen ca' anajty ti pubejtin nduñich ma miich ajcxy, pen ca' nyajnejhuīgixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' nnajtzcapxyich Dios y'ayuc, o pen ca' nyecyich ixpijcin.

⁷ Tzoc ocpidaacim tūg'ijxpejt ma je xūxy, jadu'n nej je flauti o je arpa. Pen ca' nmido'mbijcim je nota je tono nidūg' nidūg', ca' nmido'mbijcim ti pieza ti xūxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huädz yxūxy, ca' ni tūg' soldado ñayñi'ixēhua'ñyii ma je tzip ytuna'ñyii yjada'ñyii. ⁹ Nañ tim jadu'n miid miich ajcxy, pen mgapxcixyp huingbi ayuc huidibi ca' pin huinjihuīy, ¿nej yajnejhuīhūipy ti miich anajty mgapxyp? Jadu'n je' anajty yhuimbizimni nej nigoob mdim'ixmiydaaccixy.

¹⁰ Janch co ji yajpaady canaagnax ayuc ya naaxhuiñ ac tīgachjaty. Etz janch co nidūg' nidūg' jāy ayuc miidty e ci'm je' ajcxy huinjihuīgixy. ¹¹ Per pen ca' nhuinjihuiyich je ayuc huidibi jāy xyajmīgapxpich jadu'n ñich yi' nyajnaxyich nej agatz. O pen ca', yi' xyajnajxpich nej agatz. ¹² Paady miich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohūipy co mic'ajt ymōhuīb, jaydēbi yajñiguejy je ayuc huidibi ycapxamyb. ¹⁴ Pen nmibijctzoobyich Dios miid huingbi ayuc, nmibijctzoobyich miid ñich n'espíritu, per ñich nhuinma'ñ ca' ti jāygi-daacin paady. ¹⁵ ¿Ti huaad ndunipyich? Pues copicy

nmibijctzooyich n'ojadatyich Dios miid ñich njihuī'ñich, e nañ jadu'n nmibijctzooyich miid ñich nhuinma'ñich. N'ñibadaamyich ngapxpadaamyich Dios miid ñich njihuī'ñich etz miid ñich nhuinma'ñich. ¹⁶ Com pen miich huin'ñigixyp mhuingapxtaaccixyp Dios miid yi mjihuī'ñ, je migūg' huidibi amidoo'ijtp ca' je' huinjihuīy je huing ayuc huidibi mgapxyp, e ca' jēbi ymīna'nip "jadu'n jada, Amén." Com ca' yi' huinjihuīy ti yi' mgapxyp. ¹⁷ Ca' yjegyity co oyjaty ayuc ti myajtuñ co ti myajnaxy Dioscojuyip ma Dios, per yi mmigūg' huidibi ca' huinjihuīy miich m'ayuc ca' yi' ti jāygi-daacin paady. ¹⁸ Nyajnajxypich Dioscojuyip ma Dios co nigí njatyich nej ngāpxibyich huingbi ayuc, ca' ydi miich ajcxy nidūg'óciy. ¹⁹ Per co nyajpaadyich ma je mibijcpidijc ti ñayyōmújicigixy, jac'oy co ngapxyich migoox ayuc huidibi mibijcpidijc yhuinjihuīgixyp, ca' ydi co ngāpxibich majc mil huingbi ayuc huidibi ca' pin huinjihuīy.

²⁰ Migūgtijc ajcxy, ca' ajcxy mmid'adipy mhuinma'ñ, jadu'n nej pi'ctijc yhuinma'ñ miidty. Ma yi jibicpi huinma'ñ ymiñ naybidāgñ jadu'n nej ma'xungdijc huidibi ca' ti jibic huinma'ñ huinjihuīgixy. Miid'adip miich ajcxy oyjot oyhuinma'ñ jadu'n nej mij'anāctijc huidibi yhuinma'ñ ti ymejtznī ti yca'pxni. ²¹ Jaybety y'ity ma Dios ycōtujcin necy ma Dios jadu'n ymīna'ñ: "Nmīgapx-aamybich je may Israel jāy miid huingbi ayuc, e huingbi jāy najtzcapxēhuamb ñich n'ayuc ma yi' ajcxy, per ni jadu'n ajcxy xycatuna'ñich cuendi." Jadu'n je Huindzin Dios ymīna'ñ. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt ijxpejt ma yi jāy ajcxy huidibi ca' mibijccixy Dios. Per je Dios ymic'ajt huidibi jāy ymiid co najtzcapxy Dios ytiy'ajt, yejcp ijxpejt ma yi mibijcpidijc, ca' yecy ijxpejt ma yi' ajcxy huidibi ca' ymibijccixy. ²³ Ca' yjegyity jadu'n yjadip, co anajty ti ñayyōmújicigixy je mibijcpidijc, e nidūg'óciy anajty ajcxy ytiyigixy capxpi miid huingbi ayuc huidibi ca' pin huinjihuīy, chi ytiy'ijhūip ma ajcxy ñayyōmugyii nijējity huidibi ca' ymibijccixy. ¿Ca' yi' ajcxy ymīnāangixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidūg'óciy je mibijcpidijc ma je nayyōmujctac najtzcapxyigixy Dios ytiy'ajt miid yci'm ayuc, e co ytiy'ijhūipy pinjaty huidibi ca' ymibicy, e co yi' midohūipy Dios y'ayuc yjihūihuamyb ypocy. E ci'm huinmayip nej anajty ti ytundigooy miid Dios co midohūipy co nidūg'óciy mibijcpidijc anajty najtzcapxyigixy Dios y'ayuc. ²⁵ E Dios y'ayuc yajnejhuīhuīb nej anajty ameech ti ytundigooy jotjoty huinma'ñjoty. E chi jada' ycojxtinay'ihuīhūipy, e ojadadipy Dios, e nañ jadu'n ymīna'nip co janch Dios miich ajcxy xymid'ijtp.

Tungixy tūg'óciy miid tudāgy'ajt etz yajxon

²⁶ Migūgtijc ajcxy, ¿ti huaad mdūngixipy? Co mnayyōmújicigixy, nijējity miich ajcxy huin'ixipy tūg' salmo, tūg' ayuc huidibi yaj'ixpigamyb, tūg' tiy'ajt huidibi Dios ti xyajnejhuīgixy, etz capxip huingbi ayuc, etz capxticxipy nej yhuimbizimyb je huingbi ayuc. Tūg'óciy jadu'n tungix, jaydēbi ajcxy jāygidāgipy etz yujcpedipy ajcxy ymibijcin huidibi ti

ñayyöymújcigixy. ²⁷ Pinjaty capxamb ma je naymujctac mïd huingbi ayuc, huen capxy metz o tugiiġ jã y'yi, e huindüg padüg huen capxcixy, ca' y'animayity. E pinjaty capxtëcxamb je' je' yajniġuejip nej yhuimbizimyb je ayuc tiibi capxcixy. ²⁸ Pen ca' yajpaady ma je nayyöymujctac tüg jã huidibi capxtëcxip je huingbi ayuc, jac'oy co ca' ni ti yajcapxipy mïd huingbi ayuc, jac'oy co migapxip Dios jotjoty huinma'ñyoty, e ca' capxip mayjãjoty. ²⁹ Nañ jadu'n mayjãjoty jëbi metz o tugiiġ jã najtzcapxihuip Dios ytiy'ajt, e yi jacjadyii mibijcpidijc huidibi amido'ijtp, jëbi ajcxy huinmay pen janch Dios je' ytiy'ajt huidibi ajcxy ti najtzcapxïy, o pen ca' je' Dios tiy'ajt'adyii. ³⁰ Pen jim mayjãjoty jadüg jã Dios yajnejhuïyii nej ycapxip, nej tiy'ajt najtzcapxihuipy, huen je jã y'amonipy huidibi anajty jayijp ti ytiġy najtzcapxïy Dios y'ayuc ytiy'ajt. ³¹ Jëbi miich ajcxy nidüg'óciy mnajtzcapxïyġixy Dios ytiy'ajt huindüg padüg, jaydëbi tüg'óciy je mibijcpidijc ixpij-cixy Dios ytiy'ajt, e nañ jadu'n jëbi nidüg'óciy yjot-micpïjccixipy. ³² Copicy co yi' ajcxy huidibi najtzcapxïyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzcïy. ³³ Dios ca' xyajmidzojcm nicx nhuinma'ñyidigooyim, Dios chojcpy co servicio ndunim agujc jotcujc.

³⁴ Jadu'n nidüg'óciy mibijcpidijc ma canaag cajp ymi-naangixy co ca' huaad töxyjãydijc ycapxcixy serviciojoty, com Dios ti capxaducy co ajcxy ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjãydijc ajcxy huaad ane'mgixy je servicio, com jadu'n Dios ycötujcin ymina'ñ. ³⁵ Pen ñejhuïhuamyb ajcxy töxyjãydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytiġc, com tzo'ydu'n yejcp töxyjãydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuïy miich ajcxy jayijp tim nejhuïyġixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuïy jimy jadu'n yajcapxhuäcxy Dios y'ayuc, ca' yjacmaajity.

³⁷ Pen jim pinjaty ma miich ajcxy huidibi naybidaacip nejihuïy Dios ti ymoyii mic'ajt nej jëbi najtzcapxihuipy Dios ytiy'ajt, o ti yhuinma'ñymoyii je Espiritu Santo tijaty tiy'ajt, hue' copicy nañ jadu'n yñejhuïhuipy co je ayuc huidibi iich miich ajcxy nyajnijayiyb, Dios jada y'ane'min ycötujcin. ³⁸ Pinjaty jim ma miich ajcxy huidibi ca' mijpidäga'ñ etz ni ca' cöbiga'ñ je ayuc tiy'ajt huidibi Dios ti xyaj'ane'myich, Dios ca' cöbiga'ñ yi-jadu'mbi jã.

³⁹ Com iich jada ayuc nyaj'ixpijcpich, paady cham ni-maaybich nmigügtijcich, co huen najtzogiiyġixy nej mnajtzcapxïyġixy Dios ytiy'ajt, e nañ jadu'n ca' mgapxadújccixipy yi' ajcxy huidibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz mïd tudägy'ajt, ca' oyñej mdungixipy.

Co Cristo yjugypijcy jadüg'oc co y'o'cy

15 Jadügnax, migügtijc ajcxy, ndzojcpich co miich ajcxy mjäyméjtcixipy je Jesucristo y'ayuc ytiy'ajt huidibi ti ngapxhuäcxyich ma miich ajcxy. Je' je' je ayuc

tiy'ajt huidibi miich ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñidzögipy, pen mguydumyb ajcxy iich n'ayuc huidibi ngapxhuäcxyich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huidibi Dios jayijp ti xymöyich, etz ti nyajnimaayġixy huidibi jac-copicyip co Cristo y'o'cy mïd ajt nbocy ycixpi, jadu'n nej Dios y'ayuc ymina'ñ huidibi jaybety ijtp ma yi' ñecy. ⁴ Chi ajcxy yajnaxtiġiy Jesús, e codugiġ xii yi' yjugypijcy jadüg'oc jadu'n nej Dios y'ayuc ymina'ñ huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigiyii nañ jadu'n ma migox nimigo'pxnaxy mibijcpidijc tügpi tiempo. E may yjadu'mbi mibijcpidijc jacjugy'ajtni chambaad, etz naagity ajcxy ti y'ó'ccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma iich. Jacjayijp Jesús huin'ijxy yi' jacjadyii apóstol ajcxy, etz jac'axam iich xyhuin'ijxyich. Jadu'n iich nipaady nej tüg jã huidibi ooy ti ninajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi iich. Nañ jadu'n ni ca' iich xypaady co jã ajcxy xytijbich Jesús y'apóstol, mïd co ooy ti n'ix-huidityich ti nbahuidityich Dios yjã ajcxy. ¹⁰ Iich nje'ajtpich nej nje'atyich mïd co Dios may'ajt mïd iich tuñ. Je mijmay'ajt je mij'oy'ajt huidibi Dios ti tuñ mïd iich, ca' ñaadig'aty, ti y'oybidzimyb. Nigi micägy ti nduñich ma Dios ytung, ca'ydi jacpinjaty. Ca' nan co iich ndzachmadägyich ma Dios ytung. Hue' Dios oy xymiid'ityich, etz ooy may'ajt tuñ mïd iich. ¹¹ Paady pen ti miich ajcxy mbaady Dios ytiy'ajt ma iich, o ma yi' jacjadyii apóstol ajcxy, ca' ñejity. Je' je' je Cristo y'ayuc huidibi iich ajcxy ngapxhuäcxyich, e nañ Cristo yi' y'ayuc tiibi mmibijccixy.

Co öcypi ajcxy yjugypigipy ajcxy jadüg'oc

¹² Per pen iich ajcxy ayuc ngapxhuäcxyich co je Cristo yjugypijcy jadüg'oc co y'o'cy, zna'amy co nijëjity miich ajcxy minaangixy co yi' jã ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajyugypijcy jadüg'oc. ¹⁴ Co ixipy yjanchity co Cristo ca' yjugypijcy, nañ tim jadu'n je ayuc huidibi ngapxhuäcxyich ca' ti mic'ajt ixipy mïdity. E nañ jadu'n miich ajcxy mmibijcin ca' ixipy chobaady. ¹⁵ Pen tiy'ajt ixipy co je öcpi ca' yjugypigaangixy, huin'it je Dios y'ayuc huidibi ngapxhuäcxyich ixipy yhuimbizimyb anii. Com ngapxhuäcxyich co Dios yajjugypijcy Cristo co y'o'cy, paady pen tiy'ajt ixipy co pinjaty tiibi y'o'ccixy ca' yjugypijcy. Nañ jadu'n ixipy ca' ytiy'ajity co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajyugypijcy jadüg'oc co y'o'cy. ¹⁷ Co je Cristo ca' ycajyugypijcy jadüg'oc co y'o'cy, chi miich ajcxy mmibijcin ixipy ca' choobaady. E ca' miich

ixyipy ajcxy Dios mbocy xyhuinmecxi. ¹⁸ E pen janch tiy'ajt ixyipy co je Cristo ca' ycajugypijcy, huin'it je mibijcpidijc tiibi y'o'ccixy tigoyaangixy y'alma. ¹⁹ Pen janch tiy'ajt ixyipy co nmibijcim Cristo jeyi ma jadachambi tzinaayin ya naaxhuiñ, ca' jac ni ti ixyipy nijjp'ijxim co n'o'cim. Jadu'n ñich ajt nipaady nej locijäy, e jäy ajcxy ñigi xyñixiicim xyajxiicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n miid yi' ycixpi mayjäy yjugypiga'ñ ajcxy co anajty ti y'öccixy, e yñicxaangixy ma Dios yajpaady.

²¹ Com miid tüg jäy, je Adán, chondacy yi' o'cin ya naaxhuiñ. Nañ tim jadu'n miid tüg jäy, je Cristo, chondacy je jugypijcin co jäy y'o'ccixy. ²² Miid jada ycixpi co Adán ytundigooy oga'n, paady nidüg'öciy jäy patcixy yi' o'cin. Miid jada ycixpi co Cristo yjugypijcy jadüg'oc co y'o'cy, paady nidüg'öciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypiga'ñ jadüg'oc jadu'n nej anajty ñigueegiyii. Cristo ti yjayijp'aty co yjugypijcy. Tüg'öciy yi' jacjadyii jäy ajcxy huidibi mijnicxpejtci xp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy yti-goyipy je naaxhuiñybi. Cristo yajtigoyamyb tüg'öciy naaxhuiñyjäy y'ane'min, tüg'öciy naaxhuiñyjäy ycotujcin, etz tüg'öciy naaxhuiñyjäy ymic'ajt. Jesucristo ypijctähuaanip tüg'öciy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajtähuiib. ²⁵ E tim copicy co je Cristo y'ane'mdähuamyb tüg'öciy, ixti cooni Dios anajty ti mimadactäy tüg'öciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymimadactähuiip tüg'öciy je Cristo ymidzip, e pidactähuiip ma je Cristo y'ane'min. Per co Dios y'ayuc huidibi jaybety ijtp ymina'ñ co je Cristo ti mimadactäy tüg'öciy, ca' nan hue' je' yajhuinjihuüy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'öciy pinjaty etz tijaty huidibi mic'ajt miid, e co anajty pidactay ma je Cristo y'ane'min, chi je Dios y'ung ypidactähuiipy yi' y'ane'min ma Dios Teedy, etz ane'my yhui'ma'ñ ma Dios Teedy, je huidibi anajty ti mimadactay. Jadu'n Jesucristo tuna'ñ, jigix jäbi Dios miid'ajttäy tüg'öciy mic'ajt etz ane'm'ajt.

²⁹ Pen ca' yjadu'nity, ¿na'amy co mdzachniibejtci xy co öcpi tzachcodinaaygixy? Co ixyipy ca' pin yjugypiga'ñ jadüg'oc co anajty ti y'o'cy, ¿na'amy co jäy ñibejtci xy miid öcpi ycixpi?

³⁰ ¿E ti ycixpi co ñich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ñich miich ajcxy nimaaygixy co ooy njäygidägyich miich ajcxy. Miid co mmibijccixy je nHuindzin Jesucristo, paady ycixpi ñich miich ajcxy nimaaygixy co jabom jabom nyajpaadyich öcjip'am. ³² Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy nijjp-

tinäyich. Pen ca' yjanchity co yi' öcpi ajcxy yjugypigipy jadüg'oc, naadig'ajtp ixyipy co ñich ayo'n jabom jabom nhuindinäy njijptinäyich. Nig oy co ixyipy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcujc'ajtim, com jabom huixtic njugy'ajtin ycixaanim miid yi' o'cin."

³³ Ca' mnayyéjci gixy co pinjaty xyhuin'ingixipy. Jadu'n yjadipy nej y'ayuc y'ityin: "Yi' migügtijc ajcxy huidibi jibicjot jibic-huinma'ñ miid, yajtigooyb ajcxy je oyjot oyhuinma'ñ." ³⁴ Ixmajtcix jibicjot jibic-huinma'ñ etz tzinaaygix tudägy ca' mbocytungixy. Nijjëjity miich ajcxy ca' mnejhuñygyixy Dios ytiy'ajt. Jadu'n nmina'ñich, jigix ajcxy mdzo'ydu'n mjihuñygyixipy.

Nej ajcxy yi' ögyipi yjugypigipy ajcxy jadüg'oc

³⁵ Ycadimjegyity co nijjëjity miich ajcxy xy'amido-huiipyich: "¿Ma mic'ajt patcixipy je o'cpi ajcxy co jäbi yjugypijccixy jadüg'oc? ¿Huidibi ninicx ajcxy ymi'idamyb?" ³⁶ Ca' miich ajcxy ti mhuiñihuñygyixy. Ca' mnejhuñygyixy co je moc tim hidibi mniipci xyp ca' ymuxe'ñ ixti cooni anajty jayijp ti ypüch. ³⁷ Ca' miich ajcxy mniipci xyp je mocquipy. Hue' miich ajcxy mniipci xyp je timmoc o jacjadyii huingbi tim. ³⁸ E co je tim ymuxy, chi Dios möy je ñinicx, tim jadu'n nej Dios jayijp ti huinmay ti tzocy. E Dios nije' nije' je tim möy je ñinicx tigachjaty. ³⁹ Canaagnax ninicx yajpaady ya naaxhuiñ, ca' ajcxy ytügnaxity. Tigach yi' jäy ajcxy miidity ñinicx, tigachjaty iyujc ajcxy miidity ñinicx, nañ tigachjaty joon ajcxy miidity ñinicx, e nañ jadu'n tigachjaty acx ajcxy miidity ñinicx. ⁴⁰ Yi' tzajpjoty tzinaayb ajcxy tigachjaty miidity ñinicx, nañ jadu'n hidibi ajcxy tzinaayb naaxhuiñ tigachjaty miidity ñinicx. Yi' tzajpjoty tzinaayb ajcxy ñinicx miid tigachjaty y'oy'ajtin, ca'ydi jadu'n nej yi' naaxhuiñ tzinaayb ajcxy y'oy'ajtin. ⁴¹ Yi' xii ytiicxin yjajin ca' ñaybadyii miid po' ytiicxin yjajin, nañ tim jadu'n je po' ytiicxin yjajin ca' ñaybadyii miid madza' ytiicxin yjajin. Etz nije' nije' madza' miidity ytiicxin ca' ñaybadyii miid jacjadyii madza' ytiicxin yjajin. ⁴² Nañ tim jadu'n yjada'ñ miid yi' jäy ajcxy tiibi y'o'ccixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxnicx hidibi yhuindigooyipy, e yjugypigipy jadüg'oc miid tüg ñinicx jemybi hidibi ca' yhuindigoya'ñ nmina. ⁴³ Je öcpi ñaaxnicx co ñaaxtigiy, ca' ti oy'ajtin miidity, e co yjugypijcni jadüg'oc ymiid y'oy'ajtin. Je öcpi ñaaxnicx co ñaxtigiy, ca' ti mic'ajt miidity e chi yjugypijcni mic'ajt miid. ⁴⁴ Co je öcpi ñaaxtigiy, hue' yjugypijcni, miid jemybi ninicx ca'p yaj'ixy. Pen ji yajpaady ninicx hidibi Dios ti yajcojy miid naax, nañ tim jadu'n ji yajpaady ninicx hidibi Dios yajcojpy miid yjihui'ñ ymic'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymi-na'ñ: "Je jayijp Adán ymiid anajty jugy'ajtin." Je axambi Adán (je' je' je Cristo) je' tüg espíritu hidibi jugy'ajt yejcp. ⁴⁶ Je hidibi Dios yjihui'ñ ymic'ajt miid ca' je' yjayijp'ajty, je' jayijp'ajt huidi Dios yajcoj miid naax; jac'axam je' hidibi Dios yjihui'ñ ymic'ajt miid, je' je' je Cristo. ⁴⁷ Je jayijp'ajty jäy hidibi Dios yaj'oyiy, hue' je' yaj'oyiy miid naax (e yajpaady ya naaxhuiñ). Je mimet-

zpi jāy huidibi Dios yaj'oyiy, iich ajt nHuindzin Jesu-cristo, hue' je' chooñ tzajpjoty. ⁴⁸ Je jāy ajcxy huidibi tzi-naayb ya naaxhuiñ, yí' ajcxy ñinícx tú'cíy ñaybadyii mñid Adán ñinícx huidibi Dios yaj'oyiy mñid naax. Yí jāy ajcxy huidibi tzināhuamb tzajpjoty, hue' ajcxy ñinícx tú'cíy ñaybada'ñiyii mñid je Cristo ñinícx huidibi tzi-naayb tzajpjoty. ⁴⁹ Jadu'n nej iich ajt, tūgnax nguëxícim mñid Adán huidibi Dios yaj'oyiy mñid naax. Nañ tim jadu'n tūgnax nguëxígaanim mñid je Cristo huidibi tzi-naayb tzajpjoty.

⁵⁰ Migügtijc ajcxy, hue' nnimāhuaangixy co je ninícx huidibi mñid yxixy etz yñi'py ca' yí' y'ida'ñ ma Dios y'ane'my. Je ninícx huidibi cixamb tīgoyamb ca' pada'ñ it lugar ma yí ñinícx ajcxy ity huidibi ca' ycixa'ñ yti-goya'ñ. ⁵¹ Tungix cuendi jada ayuc, nyaj'ixpigaamybich miich ajcxy tūg tīy'ajt huidibi ca' pin huiñjihuñy. Ca' nan nidüg'óciy iich ajt n'ogaanim, per nidüg'óciy iich ajt Dios nninícx xyajtīgadzaanim. ⁵² Co anajty Dios yajxūxy yí' ytrompeta, je huidibi anajty cogixi'ñip, chi cixipy je naaxhuiñybi. Chi Dios xyajtīgadzaanim ajt nninícx tim tzojcyi, tim tūg jaxīgy tūg huiñmīpxy. Dios yajxūxamyb yí' ytrompeta, e je jāy tñibi ajcxy y'óccixy jugypigip ajcxy jadüg'oc, e ni ca mīna ajcxy y'óccixnipy. E iich ajt huidibi jacjugy'ajtni Dios iich ajt xyajtīgadzāanim nninícx. ⁵³ Com iich ajt nninícx huidibi ógam, huidibi huen tīgoyamb, copicy ytigadzip, e nmñid'adaanim ninícx huidibi ca' óga'ñ ca' yhuindīgoya'ñ. ⁵⁴ Co anajty ytigajtzim ajt nninícx huidibi cixamb huindīgoyamb, nmñid'ajtim anajty jemybi ninícx huidibi ca' ycixa'ñ yhuindīgoya'ñ nīmīna. Co anajty ytigajtzim ajt nninícx huidibi ógam, e nmñid'ajtim jemybi ninícx huidibi ca' y'óga'ñ, huiñ'it cuydunipy Dios y'ayuc huidibi jaybety ijtp huidibi jadu'n ymīnamb: "Co anajty ajt nHuindzin Dios mīmadāgy yí' o'cin, huiñ'it cōdigooyñip je o'cin (ca' jacpin y'oc'o'cnip). ⁵⁵ ¿Ma yí' o'cin ocjacpada'ñ mic'ajt co tīy xy'ocjactzaachytunaanim? ¿Ma yí' o'cin ocjacpada'ñ mic'ajt co tīy xy'ocmīmadāgaanim?" ⁵⁶ Mñid co tī ndundigooyim, paady ycixp o'cin nbaatim. Mñid co ca' tī nguýdundaayim Dios ycōtujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mij-may'ajt tī tuuñ mñid iich ajt ycixpi, e tī nmīmadaacim yí' o'cin co ajt nHuindzin Jesucristo y'o'cy mñid ajt nbocy ycixpi.

⁵⁸ Paady ycixp, miich ajcxy migügtijc huidibi ooy nd-zocy njñihuñyich tīydudāgy mmibijccix, ca' m'ixtigīhuāccixy ma mmibijcin, ca' m'ixmajtzcixy yí' mmibijcin, ca' ajcxy mjotmetzcīyigixy. Tungix jabom jabom ma Dios ytung aguyc jotcuyc, com mnejhuñyigixyp co ca' ñaadīgī'aty ajcxy mdung ma ajt nHuindzin Jesucristo ytung.

Je cuejtñ mñid je hermano ajcxy ycixpi

16 Jadu'n nej ymiñ yí' meeñ huidibi miich ajcxy myajmujccixyp mñid je mibijcpidijc ycixpi huidibi jim Jerusalén. Cuydungix je tīy'ajt huidibi tī nyaj'ané'mgixyich yí' mibijcpidijc huidibi canaagpicy yajpatp jim Galacia. ² Naag naag domingo, je jayijpi xii ma je semana y'ixtigīy nidüg nidüg miich ajcxy

mbidāgip abicy hueeni pi'cmeñ, jadu'n nej anajty ii tī mbaatcixy. Je pi'cmeñ huidibi anajty tī myajmujccixy mgüend'ajtccixipy ooy, jigix co iich jim njādip ma miich ajcxy, ca' ycopicyity meeñ myajmújcixipy. ³ E co anajty jim nmechich ma miich ajcxy, miich ajcxy myajñibigipy nijējity migügtijc huidibi nicxip jim Jerusalén. E iich nguexipyich jada migügtijc jim Jerusalén mñid tūg necy etz mñid je meeñ huidibi anajty miich ajcxy tī myajmujccixy, jaydēbi yajcīdigīhuip je mibijcpidijc jim Jerusalén. ⁴ E pen ooy ytimycopicyity co iich nañ jadu'n nnícxibich jim Jerusalén, jēbi ajcxy ñicxy mñid iich.

Pablo huinmay co nicxa'ñ Macedonia

⁵ Co anajty ndübicyich nnicxaambich ma miich ajcxy, jayijp naxīhua'ñich Macedonia naaxjot, com copicy jim Macedonia naxīhua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyaj-naxipyich tūg'óciy je tichypoj tiempo mñid miich ajcxy. Co anajty ndzooñich jadüg'oc ma miich ajcxy, nnícxyich anajty muumjaty, miich ajcxy xytūjijphuohuñhuñbich ma iich anajty nnicxa'ñich. ⁷ Ca' nan tzojccixy n'ida'ñich mñid miich ajcxy, hue' jatytimy huācxibaambich ma miich ajcxy jecy jecy, pen iich ajt nHuindzin Jesús jadu'n tzojcp. ⁸ Per njac-huācxibaambich ya Efeso ixti cooni Pentecostés xii anajty tī ñajxtāy. ⁹ Com nmñidich it lugar ya ma jēbi ngapxhuācxych Cristo y'ayuc, e mayjāy huidibi mijpidacp iich n'ayuc, nañ jadu'n mayjāy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjādy ma miich ajcxy, tungixy may'ajt mgōbījccixipy aguyc jotcuyc ca' tī mhuinmaaygixy, com Timoteo tumb ma ajt nHuindzin Jesucristo ytung tim jadu'n nej iich nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdūjijphuohuñhuipy, jaydēbi ca' tī jotmay mñid'adipy etz yjactūyōyip aguyc jotcuyc, e ymedzipy ya Efeso ma nyajpaadyich. Com njijp'ixypich co Timoteo xyñijādibich quipxyi mñid jacjadyii mibijcpidijc.

¹² Jadu'n nej yjati mñid ajt nmīgūg Apolos. May'ajt nbijctzoohuich ma Apolos co yí' mñidnicxip nijējity jacjadyii migügtijc huidibi nicxamb ma miich ajcxy. Per ca' yí' yjotcuycity co ñicxip jadachambi tiempo. Hue' janchtiy jacjiini yñicxipy, pen yaj'ahuātzcīyb anajty.

Capxocxin huidibi cijxnip je necy

¹³ Ni'ixī m'idipy ajcxy ma mmibijcin. Naygüend'ajtīgix ma mmibijcin. Tīydudāgy ajcxy mmibigipy, ca' m'ix-tīgīhuāccixy ma mmibijcin. Naybidāacīgix huiñmic jotmic ma mhuinma'ñ. Mic m'idipy ajcxy ma mmibijcin. ¹⁴ Tūg'óciy tijaty ajcxy mdungixy, tungixp mñid tzojcin jihuiñy in etz oyjāy'ajtin.

¹⁵ Migügtijc ajcxy, mnejhuñy jadu'n nej Estéfnas mñid yjugymīgūg tī mibijccixy Jesucristo y'ayuc. Yí' je' jayijp ajcxy mibijcp jim Acaya, e tī yhuinma'ñypidaac-cixy co ypubedamyb ajcxy yí' mibijcpidijc. ¹⁶ May'ajt nbijctzooybich ma miich ajcxy co myajmij'ajtccixipy Estéfnas, etz jac pinjaty huidibi pubejtp je mibijcpidijc

etz huidibi ajcxy tumb Dios ytung. ¹⁷ Ooy njotcújcidyich co Estéfanos, Fortunato, etz Acaico ti ymiñ ma ñich ajcxy ya Efeso. Yi' ajcxy xymiñd'ijtpich, com ca' anajty y'oyñ nej nmiñd'idipyich miich ajcxy. ¹⁸ E yi' ajcxy ti ooy xyajjotcugñyich, e nañ jadu'n miich ajcxy ti mjotcugñyixy co yi' ajcxy ymiñ ma ñich. Paady ycixp copicy co miich ajcxy myajmij'adip yi' ajcxy etz jacjadyii tim jadu'n nej yi' ajcxy.

¹⁹ Yi mibijcpidijc huidibi canaagpicy ya Asia naaxjot yquejxyp ajcxy capxpoocxin ma miich ajcxy. Aquila etz Priscila etz yi mibijcpidijc huidibi ajcxy yöymujcip ma Aquila ytijc yquejxp ajcxy capxpoocxin ma miich ajcxy ma ajt nHuindzin Jesucristo yxñ. ²⁰ Tüg'óciy je

mibijcpidijc huidibi ya Efeso yquejxp ajcxy capxpoocxin ma miich ajcxy. Naygapxpóocxigixy miich ajcxy xic xon.

²¹ ñich, Pablo, njaaybich miñd ngi'mgi' ngi'mletra jada capxpoocxin huidibi nguejxypich ma miich ajcxy. ²² Pen jim pinjaty ca' mijpidägy ñich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminiipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miñd miich ajcxy etz xyconuucxip ajcxy. ²⁴ Ndzojcypich njihuñyibich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

1 Ich Pablo, Dios jadu'n ti tzocy, paady ycixpi Jesu-cristo ti xyajni bicyich co ngapxhuäcxibich yi' y'ayuc. Ich miid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy miid miich ajcxy etz xyajjotcugiygixip.

Nej Pablo yajaty y'ayoy

³ Tzoc yajnajxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ay-oohuim, je Dios huidibi yejcp jotcujc'ajtin. ⁴ Dios xyajjotcugiyim co nminajxim nyajnajxim tzaachypi ayo'n jigix jëbi nyajjotcugiyim jacpinjaty huidibi minajxp yajnajxp tzaachypi ayo'n. Tim jadu'n nej ich ajcxy ti nbaady jotcujc'ajtin ma Dios, nañ tim jadu'n yi' ajcxy pada'ñ jotcujc'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej ich ajt nminajxim nyajnajxim tzaachypi ayo'n miid Cristo ycixpi, nañ tim jadu'n miid Cristo ycixpi nbaatim jotcujc'ajtin. ⁶ Paady ycixpi ich ajcxy nminajxcixy nyajnajxcixy tzaachypi ayo'n, jaydëbi miich ajcxy mbaadip jotcujc'ajtin etz nañ jadu'n ypaadip ajcxy m'alma ñidzoocin. Dios yejcpy jotcujc'ajtin ma miich ajcxy, jaydëbi miich ajcxy mbaadip jotcujc'ajtin etz nañ jadu'n ñidzögip ajcxy yi m'alma. E co ajcxy mbaadip jotcujc'ajtin etz ajcxy m'alma ñidzoocin, chi jëbi miich ajcxy mmimadägip etz mmecxtugip tzaachypi ayo'n, tim jadu'n nej ich ajcxy nmimadägy etz nmechtújcixich tzaachypi ayo'n. ⁷ Jotcujc nayjihuiyijich miid miich ajcxy ycixpi, com njijp'ijxpich co mmadägipy ajcxy ma mmibijcin. Com nejhuibich co miich ajcxy mminajxyp myajnajxyp tzaachypi, tim jadu'n nej ich ajcxy nminajxcixy nyajnajxcixy tzaachypi. E nañ jadu'n Dios yejcpy jotcujc'ajtin ma miich ajcxy, tim jadu'n nej yecy jotcujc'ajtin ma ich ajcxy.

⁸ Migügtijc ajcxy, ich ajcxy ndzojcpich co miich ajcxy mnejhuihuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njijp'ixyich co nbidzimipyich juugy ma je jimbi it lugar. ⁹ Jadu'n ich ajcxy nnayjihuiyij nej jäy ajcxy huidibi yajpatcixp o'cjijp'am. Jadu'n ti njatyich, jigix jëbi n'ixpicyich nej ich huaad nigü Dios nyajmij'atyich, je Dios huidibi yajjuygipiy yi jäy ajcxy tibi y'öccixy. E ca' nan ngi'm mic'ajt nmijpidaacpyich. ¹⁰ Ti ich ajcxy Dios xyñihua'ñ xycohua'ñ, e xyjacnihua'naamb xyjacohua'naambich ajcxy

ma yi jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios miid ich ycixpi. Njijp'ijxpich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy miid ich ycixpi, nañ jadu'n yajnajxcixyipy ajcxy jäygidaacin ma Dios miid je may'ajt oy'ajt ycixpi huidibi Dios ytumyb miid ich ajcxy.

Ti Pablo co yhuäcxijpy, ca' chojc nicxy jim Corinto

¹² Jotcujc nayjihuiyijich miid jada ycixpi com nejhuibich co ti ndzinäyich miid tudägy'ajtin etz miid oyjot oyhuinma'ñ miid yi mayjäy ajcxy canaag agajp etz jacnigi ma miich ajcxy. Dios miid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyich. ¹³ Ich miich ajcxy nyajnijayiyb je ayuc tiy'ajt huidibi miich ajcxy jëbi mgapxcixy etz mhujnihuiygixy. E nañ jadu'n njijp'ijxpich co miich ajcxy mhujnihuihuipy ich n'ayuc tüg'óciy. ¹⁴ Jadu'n nej miich ajcxy cham cujc-huäcxy mhujnihuiygixy ich n'ayuc ndiy'ajt. Jacjiini co anajty je xi je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcujc mnayjihuihuibich miid ich ycixpi. E nañ tim jadu'n nej ich ajcxy jotcujc nayjihuihuibich miid miich ajcxy ycixpi.

¹⁵ Com nejhuibich co miich ajcxy xychojcpich xyjihuiybich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶ Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzoofich Macedonia, jadüg'oc nnicxa'ñich ma miich ajcxy. E jadu'n jëbi miich ajcxy xytüjijphuohuibich co anajty nnicxyich jim Judea. ¹⁷ ¿Nej mdijy, co ich aametz jotmetz nduñich co ca' ti nnicxyich ma miich ajcxy nej anajty ti nmina'ñich? ¿Nej mdijy, nhuinma'ñ miididyich jadu'n nej naaxhuiñyäjy huidibi minamb co ñicxa'ñ, e chi ca' ñicxni? ¹⁸ Per Dios jëbi tiy'ajt yegipy co je ayuc tibi nyajnimaaigyixy, nguydunipyich yi'. Ich n'ayuc janch yi'. ¹⁹ Ich miid Silvano etz Timoteo ngapxhuäcxicyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je y'ayuc, tudägy je y'ayuc. ²⁰ Tüg'óciy je ayuc huidibi Dios yej jecy'ajty miid ich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nminaanim. "Amén, jadu'n jada," com Cristo Jesús ti cuydundäy Dios y'ayuc. ²¹ Com je' je' Dios huidibi xyajmijcim Cristo, e Dios huidibi xyajmiid'ijtim Cristo. Jadu'n Dios ytuñ miid ich ajcxy etz nañ jadu'n miid mi-

ich ajcxy. Je' je' Dios huidibi xyajnibijcim etz xypidaacim tũgjiip ma y' ytung. ²² Dios ti pidägy ma ajt njot nhuinma'n je tiy'ajt co nyajpaatim ma Cristo Jesús. Co Dios xy'adigiyim xyjottigiyim y' yjihu'n ymic'ajt, chi tiy'ajt yecy co nyajpaatim ma Cristo Jesús.

²³ Dios jēbi tiy'ajt yegipy co mīd tudägy njot nhuinma'n nmiydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'n ti nbidägyich, mīd co ca' ndzocyich nicxy n'ojcixy huin jijp. ²⁴ Ca' nnicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tiydudägy ti mmibijccixy. Jēy' co nbubedaangixy jaydēbi ajcxy nīgi jotcuja'ajt mmiid'adipy ma ajcxy mdzinaayin mjugy'ajtın.

2 Paady ycixpi jadu'n nhuinma'n ti nbidägyich co ca' nnicxa'ñich mic'amy jadüg'oc ma miich ajcxy, mīd co miich ajcxy nyajtajipy nyajmayipy co ngapxhuijyich mīd ajcxy mbocy ycixpi. ² Com pen iich miich anajty ajcxy nyajtajpy nyajmaayb, çpin jada' iich xyajjotcugñhuibich? Pues miich ajcxy huidibi tajp mayb, miich ajcxy xyajjotcugñhuibich. ³ Paady ycixpi ti nni-jayiygixy jadu'n co ca' nnicxa'ñich mic'amy ma miich ajcxy, com ca' jadu'n ndzocyich co iich miich ajcxy nyajtajipy nyajmayipy. Jac'oy co iich miich ajcxy nyajjotcugñhuipy. Com nejhuibich co iich jotcuja'ajt nayjihuñijich mīd miich ajcxy ycixpi. Nañ jadu'n miich ajcxy jotcuja'ajt mnyajihuñiyb co mnejhuñipy co ti njotcugñhuibich mīd miich ajcxy ycixpi. ⁴ Co ti njayich je necy huidibi ti nguexyich ma miich ajcxy, ooy mij jotmay ti njihuñyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtyi ti njaayich je necy jaydēbi mnejhuñyigixy co mijcajee ndzocixy njihuñyigixy.

Meexin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan iich tũgpajc tajin mayim jihuñyibich. Nañ jadu'n miich ajcxy nidüg'óciy mjihuñyigixyp tajin mayin. Jadu'n nmīna'ñich co huenjaty tajin mayin miich ajcxy mjihuñyigixy, jigix ca' anaxy ajcxy nyajtajip nyajmayip. ⁶ Yajhuäcxip je tzaachypī huidibi miich ajcxy mooyb je migüg huidibi ti ytundigooy. Ti mīd jadu'nñi. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugñhuipy. Ca' yjeyity co je migüg anaxy oy jihuñhuip tajin mayin. ⁸ Paady ycixp may'ajt nbijctzooyich ma miich ajcxy co myajnigüexigipy ajcxy co mdzocy mjihuñy ajcxy je migüg huidibi ti ytundigooy. ⁹ Iich miich ajcxy ti nijayiy jayhuin mīd je migüg ycixpi huidibi ti ytundigooy, jigix jēbi nnejhuñyich, pen mguydumyib miich ajcxy iich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmecxi y' ypocy, nañ jadu'n nhuinmeecxip iich y' nej ytundigooy. Com iich co nhuinmeecxyich tũg nmigügich nej ti ytundigooy, jadu'n nduñich mīd miich ajcxy ycixpi, com Cristo y'ijxyp ñejhuñyb tũg'óciy tijaty nduunim. ¹¹ Jadu'n nhuinmeecxim nmigüg ypocy, jigix Satanás, je mujcu',

ca' xymimadaacim. Nejhuñyim yajxon nej Satanás mañ'ajt mīdity.

Pablo ca'p anajty yjotcuja'aty jim Troas

¹² Co nja'tyich ma je cajp huidibi xiijp Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jēbi nduñich ma ajt nHuindzin Jesucristo ytung. ¹³ Per ca' anajty jotcuja'ajt nayjihuñijich. Com ca' nmīnaybatich je iich ajt nmigüg Tito jim Troas. Paady ycixp ngapxycixyich mīd je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jäygidaacin ma Dios co mīd Jesucristo ymic'ajt jatytimy nmīmadacypich jabom jabom tũg'óciy huidibi xymidzip'ajtpich ma tũg'óciy naax cajp. Nañ jadu'n Jesucristo ti xymöyich y' y'ayuc huidibi ngapxhuäcxypich ma tũg'óciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tũg xuucin huidibi ooy oy xuogy, e y'abojy xi ya. ¹⁵ Co ngapxhuäcxych Cristo y'ayuc ma y' mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma y' jäy ajcxy huidibi ajcxy y'alma tigoayaamb. Jadu'n iich ajcxy ndung nipaady nej jihuñy nboomjócixich jabom jabom ma Dios yhuinduu mīd Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma nīdzögamb. E pinjaty ca' mijpidägy Cristo y'ayuc, hue' je' y'alma tigoayaamb. Ooy chachchipity chachmijhuinma'ñity iich ajcxy ndung. ¹⁷ Ca' iich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyot huinijot iich jäy nyaj'ixpijccixy Dios y'ayuc ytiy'ajt. Com Dios ti xyajnibijcyich co y' y'ayuc ngapxhuäcxich. Mīd co nyajpaatim ma Cristo, paady ycixp nduunim jadu'n nej jihuñy nyajpaatim jabom jabom ma Dios yhuinduu.

Je jemybi ayuc tiy'ajt huidibi Dios xymooyim

3 Co jadu'n nmīna'ñich çnej m'ijxcixy nej jihuñy huinjemy nyajtzondäga'ñich ayuc co ndzachnaymayaanigixyich ci'm? Çnej mdzocix co ajcxy nyaj'ixipy tũg tiy'ajt necy co nduñich ma Dios ytung? o Çnbijctzo-huipich tũg tiy'ajt necy ma miich ajcxy, jadu'n nej nijējity jäy ytungixy? ² Ca' iich ajcxy ndiy'ajt necy ycopicyity. Com jēbi y' mayjäy ajcxy tiy'ajt pigipy ma miich ajcxy mdzinaayin mjugy'ajtın co tudägy ti nyaj'ixpiyich miich ajcxy Dios ytiy'ajt. Jadu'n miich ajcxy nipaady nej iich ajcxy ndiy'ajt necy yjaayity ma iich ajcxy njot nhuinma'ñ. E jadu'n jäy ajcxy ijxcabipy etz huin-jihuñhuipy. ³ Cristo ci'm ti pidägy y' ytiy'ajt ma miich ajcxy mjot mhuinma'ñ mīd je ayuc huidibi ti ngapxhuäcxych ma miich ajcxy. Jadu'n miich ajcxy nipaady nej tũg tiy'ajt necy huidibi Cristo ti jaay. E huidibi iich miich ajcxy ti nyaj'ijxcixy ti nyajniimaaygixy. Miich ajcxy ca' jadu'n ocpaatni nej tũg tiy'ajt necy huidibi jäy ti jay

müid tinta. Nañ jadu'n ni ca' yjējity je tiy'ajt huidibi co-jayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypi yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhuüybich tiydudägy co janch tiy'ajt nej nmi-na'ñich co Cristo ti xyajñibicyich jada tung müid Dios ycixpi. ⁵ Ca'p ñich ajcxy jēbi ci'm madägy ma Dios ytung. Tüg'óciy mic'ajt etz tiy'ajt jii by nbáatcixyich ma Dios, huidibi müid jēbi ndúungixich yi' ytung. ⁶ Dios ti xymóogyxich mic'ajt co ndunipyich ajcxy ma yi' ytung. Dios ti pidägy ma ñich ajt jemybi ayuc tiy'ajt, huidibi müid xy'ane'mim. Jada jemybi ayuc tiy'ajt je Espiritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés yjayhui'm jecy'ajty. Müid je Moisés y'ayuc huidibi jaybety ijtp, Dios xymooyim je o'cin. Müid je jemybi ayuc tiy'ajt huidibi je Espiritu Santo yejcpy, Dios xymooyim jugy'ajtin huidibi ca' ycixipy ytigoyipy ni mina.

⁷ Je Dios cötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuünyjijp mic y'adixy müid Dios y'oy'ajtin. E je Israel jäy ajcxy ni ca'p je' anajty huaad y'ixcixy Moisés yhuünyjijp, co anajty ooy mic chach'adixy. E jada Dios y'oy'ajtin huidibi Moisés ymiid, ca' jecy y'ijty. Hue' je' ti-gooyñip anajty oñydgägy amy. Per pen Dios yaj'ixip anajty yi' y'oy'ajtin co Moisés moy je jäy ajcxy je Dios ycötujcin huidibi ane'm yi' o'cin, nigü mi'idipy Dios y'oy'ajtin je jemybi ayuc tiy'ajt huidibi je Espiritu Santo xymooyim. ⁹ Pen mij anajty oy'ajtin müidity je cötujcin huidibi tuuñ co y'ane'my ma ñich ajt nbocy n'o'cin. Nigü mij'oy'ajtin müidity Dios y'ayuc ytiy'ajt je jemybi huidibi minaamb co Dios jēbi xyaj'ahuimbijtm tudägy. ¹⁰ Jēbi nmīnaanīm co je jécyp cötujcin y'oy'ajtin ca' yi' ytimytilijty co nyajquixyñhuaanīm müid je jac'oybi oy'ajtin huidibi Dios y'ayuc ytiy'ajt jemybi ymiid. ¹¹ Com pen ymiid oy'ajtin je cötujcin huidibi ymic'ajt ca' y'ida'ñ huinixi huinītiempo, nigü oy'ajtin müidity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Müid co njijp'ixim je oy'ajtin huidibi Dios xymöhuaanīm müid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idñich jecy'ajty co anajty müidity yhuünyjijp huingobe'nñy, jigix ca'ydi Israel jäy ajcxy icy nej je' anajty ytigoy je Dios y'oy'ajtin huidibi anajty quēxēcp ma je' yhuünyjijpin. ¹⁴ Per yi' Israel jäy jecy'ajty ca' ajcxy yajxon huinjihuüy ti anajty Dios ytumyb müid Moisés, ixti chambaadni yi' Israel jäy ajcxy ca' yajxon huinjihuüygixy co ajcxy capxcixy je ayuc huidibi Moisés yjayhui'm. Jadu'n nipaady nejihuüy Moisés chambaadni y'ityñi huingobe'nñy. Co ajcxy mibigipy je Cristo, huin'it ajcxy huinjihuüipy, e jadu'n je' paadipy nej jihüy Moisés ti ñayhuingobe'ndüdyii. Co yi' Israel jäy ajcxy mibijcixipy Cristo, e ijxip ajcxy Dios y'oy'ajtin, huin'itni ajcxy huinjihuüipy Dios y'ayuc ytiy'ajt je jécyp. ¹⁵ Ixti chambaadni co yi' Israel jäy ajcxy capxcixy je migooxpi libro huidibi Moisés yjayhui'm, ca' ajcxy huinjihuüy yajxon Dios y'ayuc, jadu'n nipaady nej ajcxy yhuinma'ñ ymädy. ¹⁶ Pinjaty jothuimbijtp, e mibicy

ñich ajt nHuindzin Jesucristo, oyñyñip yi' yhuinma'ñ, e yhuinjihuüipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymiid. E ma Dios yjihui'ñ ymic'ajt yajpaady, Dios yi' yi' jadu'mbi jäy ajcxy yajni-huätzēctutp ma yi' Dios ycötujcin je jécyp. ¹⁸ Paady ycixp tüg'óciy ñich ajt jadu'n nipaady nej tüg iix ma nni'ixim ajt nHuindzin Jesucristo y'oy'ajtin. Com ca' jadu'n patni nej jihüy n'ijtm huingobe'nñy. E nañ jadu'n ñich ajt njacyujcpejtm n'oy'ajtin, jaydēbi nguipxyjatyñiyim müid Cristo. Com jabom jabom ñich ajt nigü nbaatim n'oy'ajtin ma Cristo. Jada je' huidibi je Dios yjihui'ñ ymic'ajt ytumyb ma ajt njot nhuinma'ñ. E ñich ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4 Com Dios ti xypa'ayooyich, e ti xyajñibicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcixyich. ² Per ooy ti njijpcodijñiygixyich ti njijpcogapxñiygixyich yi' jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöduuni. Ca' ñich ajcxy ti nduñich müid jibich-huinma'ñ. Nañ jadu'n ni ca' nyajtigäjtzcixich Dios y'ayuc. Hue' janchty ngapxich ajcxy huidibi janchip. Jadu'n nyaj'ixpñicixyich yi' jäy ajcxy, jaydēbi ajcxy jotcu-jc ñayjihüñiygixy ma Dios yhuinduu. ³ Yi' jäy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jēbi ajcxy y'alma nidzögipy. Jada je' je ayuc huidibi ngapxhuäcxipich. Pinjaty ajcxy y'alma nidzögip yhuinjihuüyb ajcxy jada ayuc. ⁴ Yi' ajcxy huidibi y'alma tigoyaanip ca' mibijcixy Dios y'ayuc, com Satanás huidibi ane'mb ya naaxhuñ ti yajmädyii ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt müidity, nej Dios yaj'ixy nej Dios mic'ajt müidity. E Cristo y'ayuc jadu'n nipaady nej tüg mijtixin huidibi Satanás ti ahuijztucy ca'ydi yticxy ma je' ajcxy. ⁵ Co ñich ajcxy ayuc ngapxhuäcxich, ca' ñich ajcxy ngapxhuäcxyp ngi'm'ayuc ngi'mdiy'ajt. Hue' ñich ajcxy ngapxhuäcxyp Jesucristo y'ayuc ytiy'ajt. Ngapxhuäcxych ajcxy co Jesucristo ñihuindzin'ajtaayb tüg'óciy. E nañ jadu'n ngapxhuäcxych ajcxy je tiy'ajt co ñich ajcxy jadu'n naydijñiygixyich nej jihüy miich ajcxy xytumbi'adyii müid Cristo ycixpi. ⁶ Je Dios huidibi jecy'ajty ane'm co huen tñicxin ji'aty huidibi codñicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tñicxin nmüid'ajtm ma ajt njot nhuinma'ñ, jigix jēbi n'ixim je Dios y'oy'ajtin huidibi quēxēcp ma Jesucristo yhuünyjijp.

Je jugy'ajtin co nmibijcim

⁷ Je Dios y'oy'ajtin oybi nmüid'ajtm ma ajt njot nhuinma'ñ, ñich ajt ca' ni ti mic'ajt nmüid'ajtm ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma ñich ajt, tim jadu'n nej jäy ajcxy pidaaccixy pi'cmeeñ ma pi'c'idzimboch. ⁸ Oy ñich ajcxy nmīnaxyich nyajñaxyich may ayo'n, per ca' ndajy nmayich ajcxy anaxy. Ooy nhuinmay'ahuñdijtcixyich müid je tzaachyp ayo'n ycixpi, per ca' nhuinma'ñydgóogyxich. ⁹ Oy ñich ooy nmidzip xy'ixhuidityich xypahuidityich, per Dios ca' xy'ix-

machich. Canaag'oc ñich nmídzip tí xycujy tí xyjibipyich. Per ca' ñich njugy'ajtín tí ytigooy. ¹⁰ Hueñyama'amyity nhuidityich ajcxy nmídzich je tzaach'au ma nninícxich, ma jáy ajcxy tí xychaachytúungixich. Je' je' je' iixpejt co nhuidityich o'cín jijp'am, tím jadu'n nej Jesús anajty huidity o'cín jijp'am. Ngöbicycých jada tzaachypí, jigix tüg'óciy jáy ajcxy nejhuñhuip co Jesús xypubejtpích xypudigíyich. ¹¹ Nami jacjugy'ajtních ajcxy, o'c'ijp'am ñich ajcxy nhuiditycxy jabom jabom míid Jesús ycixpi, jigix jébi tüg'óciy jáy ajcxy nejhuñhuipy co Jesús xypubejtcixyp xypudigíyigixyp. ¹² Jadu'n ndzinäyich o'c'ijp'am, jigix miich ajcxy míid'adíp jugy'ajtín huidibi ca' ycixipy ytigooyípy.

¹³ Jaybety ymiñ ma Dios ñecy ma jadu'n ymína'ñ: "Tí nmibicyich, e paady ycixpi tí ngaxpidzímbych nej tí nmibicyich." Tím jadu'n nej Dios ñecy ymína'ñ, nañ tím jadu'n ñich ajcxy ymínaangixy co nmibíjccixyich Dios, e paady ngaxpidzímgyxíych nej nmibíjccixyich. ¹⁴ Com nejhuñyím jadu'n nej Dios yajjugypíjcy Jesús co y'o'cy. Nañ tím jadu'n Jesús xyajjugypígaaním jadüg'oc míid Dios ymic'ajt co anajty n'o'cím. E quipxyí míid miich ajcxy xyajñícxímip ma Dios yhuinduu. ¹⁵ Tüg'óciy tzaachypí huidibi nmínajxypích nyajnajxypích, hue' nmínaxyich nyajnajxíych míid miich ajcxy m'oy'ajtín ycixpi. E co anajty Dios jactuñ may'ajtín míid jacjadyíi mayjáy ajcxy, nañ jadu'n mayjáy yajñajxcixipy jáygidaaicín ma Dios, jigix jébi mayjáy ñbaatcixipy capxpaatcixipy Dios.

¹⁶ Paady ycixpi ní mína xii, ñich ajcxy ngajotmet-zcñhuaangixy. Oy ñich ajcxy nninícx yjaccómajc'ídzich jabom jabom, per ñich ajcxy njot nhuinma'ñ nígi mic'ajt paady jabom jabom. ¹⁷ Je tzaachypí je ayo'n huidibi nmínajxím nyajnajxím ya naaxhuiñ, ca' yí' ytimyíijity. Cixip naxip yí'. E míid co nmínajxím nyajnajxím tzaachypí ayo'n, huin'it nbaatím oy'ajtín nígi ymíjity y'oyity huidibi ca' ycixipy ñaxipy ní mína. ¹⁸ Ca' huaad ñich ajt nhuinma'ñ nbidaacím ma huidijaty cixamb tigooyamb. Tüg'óciy tijaty yaj'íjxp yajhuindícxp ya naaxhuiñ, cixíp tigooyí yí'. Per huidijaty ca' yaj'ixy yajhuindícxp, idíp yí', ca' ycixípy ytigooyípy nímina.

5 Com nnejhuñyím co n'o'cím, naaxnícx ajt huidibi nmíid'ajtm ya naaxhuiñ cixamb tigooyamb yí'. Dios ymíid ní'ixí' jíiby tzajpjoty huingbí ninícx huidibi yí' tí cojy huidibi xymöhuaaním. Je ninícx huidibi xymöhuaaním jadu'n nipaady ma ajt n'alma nej tüg tíjy huidibi tinaayb huiníxi huinítiempo. Tüg tíjy huidibi Dios tí cojy, ca' nan huidibi jáy ajcxy tí cojxíy. ² Janch tíy'ajt co ca' ooy jotcujc ndzinaayím ya naaxhuiñ míid ajt nninícx. Ooy njijp'íjxim mína nbadaaním ajt je nninícx huidibi nmíid'adaaním jíiby tzajpjoty. ³ Je' nninícx xyüdzím tím jadu'n nej co tüg jemyhuit nya-jtigíyím, ca'ydi n'íjtm níhuadz. ⁴ Nami njactzinaayím ya naaxhuiñ míid ajt nninícx, ca' ooy jotcujc nayjihuñyím. Ooy xyajtajím xyajmayím je tzaachypí ayo'n huidibi nmínajxím nyajnajxím. Ca' nan co ca' ndzójcím ajt nninícx, o co nyajtigoyaaním ajt nninícx. Hue' ndzójcím co nmíid'ajtm jemybí jugy'ajtín jemybí ninícx jigix co ajt njugy'ajtín huidibi cixamb tigooyamb, ahuimbídíp yí' jemybí jugy'ajtín huidibi ca' ycixípy yti-

goyípy. ⁵ Dios yí' tí yaj'oyíy je jugy'ajtín huidibi nmíid'ajtm cham, jigix jébi nmíid'ajtm huingbí jugy'ajtín huidibi ca' ycixípy ytigooyípy ní mína. Dios tí xymoyím je Espíritu Santo je' je' tíy'ajt ma ñich ajtín co nbadaaním jemybí jugy'ajt jemybí ninícx.

⁶ Jabom jabom ñich ajt jotcujc naybídaacím. Nejhuñyím co nami n'jactzinaayím míid ajt nninícx, ca' nmíid'ajtm jemybí ninícx, ca' nyajpaatím ma ajt nHuindzín Jesús chinäy. ⁷ Je' nninícx xyüdzím tím jadu'n nej co tüg jemyhuit nya-jtigíyím, ca'ydi n'íjtm níhuadz. ⁸ Jotcujc etz jotmic nayjihuñyím. Nígi jotcujc ixipy nayjihuñyím, e ooy njatzojím co mic'amy ixipy n'íjxmajtm jada ninícx, jigix nícx ndzinaaydaccíjím ma ajt nHuindzín Jesús chinäy. ⁹ Paady ycixp jadu'n njacjugy'ajtm njactzinaayím jigix jébi ajt nHuindzín Jesús jáygidägípy ajt ndzinaayín. Ca' ñejty pen njactzinaayím ixipy míid ajt nninícx, o pen tzojic n'íjxmajtm ajt nninícx ixipy, e nícxím ma Jesús yajpaady. ¹⁰ Nidüg'óciy ñich ajt nayguëxígaaním ma Cristo ytiy-dundac, e jíiby nidüg nidüg paadíp huidi anajty nípidzímip jadu'n nej anajty tí chinäy, pen oy, o ca' y'oyity.

Je ayuc tíy'ajt huidibi nicy'ajt cidägy'ajt míid

¹¹ Com nejhuñyím co copícy nhuindzigíyím ajt nHuindzín Jesucristo, paady ycixpi mictägy nyajmíbicyich yí' mayjáy ajcxy Cristo ytiy'ajt. Dios ñejhuñyb co tudägy ñich njot nhuinma'ñich. E nañ jadu'n ndzocyich co miich ajcxy mnejhuñyigixipy co tudägy ñich njot nhuinma'ñich. ¹² Ca'p ñich ajcxy yam naygapxpaatigixy jadüg'oc co ñich ajcxy ooy n'oyjáyity, o co ñich ajcxy ooy oy ndúngxíyich. Hue' janchtyí lugar nyejcpyich, jaydëbi miich ajcxy xycapxadípyich etz jotcujc mnayjihuñyigixipy míid ñich ajcxy ycixpi. Jigix jébi miich ajcxy m'adzohuip yí' jáy ajcxy huidibi capxpatp pínjaty yhuñyíjip ooy oy yquëxígy, e ca' ajcxy tuñ cuendi pen je' míid oyjot oyhuinma'ñ, o pen ca'. ¹³ Pen mínamb jáy ajcxy co ñich nlocity, huen xyajñajxcixyich loci míid Dios ycixpi. Pen jáy mínaangixp co oy huinma'ñ nmíidíyich, jébi jadu'n ajcxy xyajñajxcixyich jadu'n nej oy huinma'ñ nmíidíyich míid miich ajcxy m'oy'ajtín ycixpi. ¹⁴ Com Cristo ooy xychojím xyjihuñyím, paady ycixp njatytimycapxymídoohuim Cristo. Com nnejhuñyím ajt nidüg'óciy tíydudägy co Cristo y'o'cy míid ajt nbocy ycixpi, e paady ycixpi jadu'n nipaady nej jíhuñyí nidüg'óciy ñich ajt tí n'o'cím quipxyí míid Cristo. ¹⁵ Cristo o'c míid tüg'óciy jáy ajcxy ycixpi, jigix co tüg'óciy jáy ajcxy huidibi jactzinaayb jacjugy'ajtp, ca' ajcxy yajtúngxípy yci'mjot yci'mhuinma'ñ ma ajcxy chí-naayín. Huen ajcxy tzinaaygixy míid Cristo ycixpi huidibi o'c míid yí' ajcxy ypocy ycixpi, etz yjugypíjcy jadüg'oc míid yí' ajcxy ycixpi. ¹⁶ Míid co ndzinaayím míid Cristo ycixpi, paady ycixp ca' nduním cuendi naaxhuiñyáy ajcxy nej ñayñigápíxigixy nayñimiy-dáacigixy. Jayíjy ca'ni anajty nmíbíjím, ooy anajty nduním cuendi nej jáy ajcxy ñayñigápíxigixy nayñimiy-dáacigixy. Jadachambi etz yjacnicxni xii tiempo, ca' nduním cuendi nej naaxhuiñyáy ajcxy capxcixy míy-

daaccixy. ¹⁷ Com tigachjaty cham nhuinjihuŷyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymiid'ajtnip, jadu'n nipaady nej jihuŷy ti ma'xung'aty huinjemy. Je jot je huinma'ñ huidibi anajty ymiid co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huidibi ya yajpatp, jilby chooñ ma Dios, Dios yaj'oyiday. Miid huidijaty Cristo ytuun miid ñich ajt ycixpi, jotcuyc n'ijtim miid Dios. E Dios xya-jnibijcich co ngapxhuäcxyich Dios y'ayuc jadu'n nej jäy ajcxy jëbi ajcxy jotcuyc y'ijtcixy miid Dios. ¹⁹ Jadu'n nmi-naanim co Dios ymiid'ijtpy Cristo. E Dios tuun quipxyi miid Cristo co yi' yaj'oyiy je tzip nej naaxhuiñyjäy ajcxy midzip'aty Dios. Dios ca' yajcomidohua'ñ jäy ajcxy ypocy huidibi mibijccixp Cristo, miid co Cristo ti yajpocyñihuächyii. E Dios ti xyajnbicyich co ngapxhuäcxyich yi' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcuyc'ajtn ma Dios. ²⁰ Paady nhuidityich miid Cristo ycixpi ngapxhuäcxyich Cristo y'ayuc. Jadu'n huimbizimyb nej jihuŷy miich ajcxy Dios xyminucxtaaccixy miid ñich n'ayuc jigix mmibijccixipy Cristo y'ayuc. Paady ngodinäyich Cristo co nminucxtacyich miich ajcxy. Jothuimbijtcix nej mdundigoogyich miid Dios ycötujcin e Dios xyhuinmeecxip ajcxy mbocy, jigix jotcuyc m'idipy ajcxy ma Dios. ²¹ Cristo ca' ma ytundigooy, per miid ajt nbocy ycixpi Dios yajnax je Cristo jadu'n nej tüg pocyjäy. Jadu'n Dios ytuñ miid je Cristo, jigix co ñich ajt n'ijtim ma Cristo, nbaatim je tudägy'ajtn huidibi Dios chojcpy nmiid'ajtnim.

6 ñich ajcxy etz miich ajcxy quipxyi nduunim ma Dios ytung. Nminucxtacyich miich ajcxy co mgöbigipy ajcxy je may'ajt je oy'ajt huidibi Dios ti tuñ miid miich ajcxy ycixpi, ca'ydí ñaadig'aty Dios ytung. ² Com jadu'n jaybety y'ity ma Dios ñecy ma Dios jadu'n ymina'ñ:

Co je xii tiempo ti patni, ti ñich miich m'ayuc midoohui. Ti nbubety nbudig'iyich je huin'it xii je huin'it tiempo co ti yhuaad'aty mina jäy ajcxy y'alma ñidzögipy. Jadachambi xii tiempo ti yhuaad'ajtni mina jëbi Dios xyñidzoocim ajt n'alma.

³ Ca' pin n'adzipyich co nduñich ma Dios ytung, jigix ca'ydí pinjaty ymina'ñ co ca' oy nduñich. ⁴ Nañ jadu'n ca' n'adziba'ñich miich ajcxy. Nigi ndzocyich co ñiguëxigip tüg'ociy ñich ndung co nduñich miid Dios ycixpi. Ooy nyajtuñich mecxtujcin. Ooy nmeextucyich ayo'n etz tzaachypi. Ooy nyajmayjatyich nhuit nducy ngaayin n'uucin. Ooy ñich ndzinaayin chipity. ⁵ Ti ajcxy xyc'atyich, ti ajcxy xypidäcxyich pujxtigoty. Ti jäy ajcxy xymibidigyich, e ooy ajcxy yhuaangixy yjihuŷyigixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich. ⁶ Nyajniguëxicy ñich ajcxy co ñich ndungixyich miid Dios ycixpi, miid co huädz jot huinma'ñ nmiididyich ajcxy. Ca' ma jibicpi nmiididyich ajcxy, miid co n'ixp'jccixyich ma Dios ytiy'ajt. Ooy mecxtujcin nmiididyich ajcxy. Ooy ñich ajcxy nba'ay-

ooyich nmigügtijcich. Dios yjihu'ñ ymic'ajt yajpatp ma ñich ajcxy njot nhuinma'ñ. Ooy ñich miich ajcxy ndzojccixy njihuŷyigixy cixy jot huinjot. ⁷ Nyajniguëxigpy ñich ajcxy co ndungixyich miid Dios ycixpi, miid co ngapxhuäcxyich Cristo y'ayuc ytiy'ajt tudägypí, e nañ miid co nmiididyich ajcxy Dios yjihu'ñ ymic'ajt, etz miid co nmiididyich ajcxy ca'pxy Dios ytiy'ajt tudägypí. Miid yi' ytiy'ajt tudägyp nyajmibicyich jäy ajcxy, etz miid yi' ytiy'ajt naygohua'ñyijich ma nmidzipich. ⁸ Minaajity jay xycapxpäadygixyich; minaajity jäy ajcxy xyñigapxy xyñi'ojŷyigixyich; minaajity jäy yminaangixy co oy nduñich; minaajity jäy yminaangixy co jibic nduñich; mina ngamina jäy xytijcixyich co n'indäaccixyich; e minaajity jäy yminaangixy co tiy'ajt ngapxpich. ⁹ Minaajity jäy yminaangixy co ajcxy ca' xy'ixy'ajtigixyich; e minaajity jäy yminaangixy co ooy oy xy'ixy'ajtigixyich; e minaajity ayo'n jip'am o'cin jip'am nhuidijtcixyich. Per jactzinaaybich ajcxy jadu'n. Ti je tungmidpi xychaachytungixyich, per ca' ñich ajcxy xyaj'o'cyi. ¹⁰ Ooy ñich ajcxy njatajcxixy njamaagyixy, per jabom jabom jotcuyc nayjihuŷyigixyich. Ayoobi ñich ajcxy ca' ti meeñ etz ca' ti pidägy nmiid'ajtcixyich. Per nañ jadu'n mayjäy oy'ajtn pada'ñ ma Dios miid ñich ajcxy ndung ycixpi, jadu'n jada oy'ajtn nipaady nej meeñ etz nej pidägy. Oy ca' meeñ etz ca' pidägy nmiididyich ajcxy, per nmiidich ajcxy tüg'óciy huidibi nimina ca' ycixy ytigooy.

¹¹ Migügtijc ajcxy, huidibi yajpatp jim Corinto, ti nmiidcapxcixy ti nmiidmiydaaccixy ma jada necy miid tüg'óciy tudägy'ajt. Ti ngapxyich nmiydägyich nej njot nhuinma'ñ nmiididyich. ¹² Ca' ñich n'ixmach nej ñich miich ajcxy ndzojccixy njihuŷyigixy cixy jot huinjot.

¹³ May'ajt nbijctzooybich ma miich ajcxy co xyajnimähuibich nej miich ajcxy mjot mhuinma'ñ miidity tim jadu'n nej ti nduñich miid miich ajcxy. Jadu'n may'ajt nbijctzooyich ma miich ajcxy nej ungdeedytjic ajcxy oy'amy y'ung ajcxy ñhuijcxixy capxhuijcxixy.

Ñich ajt je' ma Dios jugypí chinaayin

¹⁴ Miich ajcxy, ca' mdungmujccixy m'ayoomujccixy miid jäy ajcxy huidibi ca' mibijccixy Cristo. Com ca' huaad tudägyjäy ajcxy miiddzinaaygixy jäy ajcxy huidibi ca' tudägy huinma'ñ miidity. ¿Nej jëbi je huidibi tiy'ajtip ytüg'iy miid huidibi ca' ytiy'ajity? ¿Nej jëbi pinjaty tiy'ajt miid miid'idipy pinjaty huidibi ca' tiy'ajt miidity? Je huidibi tiy'ajt miid jadu'n nipaady nej chinäy ma jin ytixcin. E je huidibi ca' tiy'ajt miidity ñipap nej jihuŷy chinäy agootztuuby. ¹⁵ ¿Nej jëbi Cristo etz Satanás ñay'ayuc-huinjihuŷyigixy? ¿Nej jëbi tüg mibijcpi yajtüg'iy yhuinma'ñ miid tüg huidibi ca' ymibicy? ¹⁶ Ca' ni nej jëbi tzaadzech quipychech y'idipy ma Dios ytjic. Com yi' ajcxy huidibi tzaadzech ojadajtp ca' ajcxy yhuinma'ñ ytüg'iy miid Dios ytiy'ajt. Je Dios juugypí ymiid chinaydac ma ñich ajt njot nhuinma'ñ, paady ycixp jadu'n ñich ajt nipaady nej Dios ytjic. Com jaybety y'ity ma Dios jadu'n ymina'ñ:

Ndzinaaydac nbidägaamybich ma yi' ajcxy. Huididaamybich ma yi' ajcxy yajpaady. Yi' ajcxy ñich xy-Dios'adaanip. E ñich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymínañ:

Copicy co miich ajcxy m'ixmadzipy yi jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'it ñich miich ajcxy ngöbigipyich.

¹⁸ ñich miich ajcxy xymiid'adipyich jadu'n nej jihuüy ñich miich ajcxy xyTeedy'adyii. E jadu'n miich ajcxy m'idipy nej ñich nmang n'anäg.

Jadu'n je mijpi Dios ymína'ñ.

7 Miich ajcxy huidibi ooy ndzocy njihuüyich, com Dios jadu'n ymína'ñ co tzinaydac pidäga'ñ ma ajt njot nhuinma'ñ, paady ycixp tzoc yajhuaatzim ajt njot nhuinma'ñ, etz ma ajt n'espíritu, e jadu'n Dios nhuindzigiyim etz nyajmij'ajtim cixyjot huinjot.

Co ajcxy jothuimbijit ma Dios huidibi ajcxy jim Corinto

² Tungix may'ajt xycöbigipich miich ajcxy cixyjot huinjot. Ca' ñich ajcxy ni pin ti nmidundigóoygixyich, nañ jadu'n ca' ni pin ñich ajcxy ti nyaj'ixp'jccixyich jibic-huinma'ñ. Nañ jadu'n ni ca' ñich ajcxy pin ti nhuin'ñich. ³ Ca' jadu'n nmína'ñich mïid co nyajpocycähua'ñich miich ajcxy. Com jadu'n jacjayip ti mína'ñich co ooy ndzocy njihuüyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴ Ooy ñich miich ajcxy njot'amij'adyiijich. Ooy ñich miich ajcxy ngömaaygixy. Ooy jotcuyc nayjihuüyijich mïid miich ajcxy ycixpi. Oy njayapaadyich tzip agujc ayo'n agujc, per co njäyechich miich ajcxy, jotcuyc nayjihuüyijich.

⁵ Nej ñich ajcxy nja'ty ya Macedonia, ca' njotcu-jc'ajtcixyich. Hue' nyajpaadyich ajcxy tzip agujc capxy agujc huen ma'amyity. Jäy ajcxy xymidzip'ajtpich, etz nañ jadu'n tzigiybich jotjoty huinma'ñjoty. ⁶ Per Dios je huidibi yajjotcugiyb yajjotmicipjcp pinjaty tajp mayb, yi' ti xyajjotcugiyich co Tito yja'ty ya ma ñich nyajpaady co jim choñ ma miich ajcxy. ⁷ Ca' nan ti njotcugiyich mïid tim jeyi co Tito ti xyñijädyich. Hue' ti njotcugiyich co yi' ti xyñimäyich jadu'n nej yi' jotcu-jc'ajtin ti paady ma miich ajcxy. Yi' ti xyajmïidmiydägyich jadu'n nej miich ajcxy tajin mayin mijhuüygixy mïid mbocy ycixpi. E nañ jadu'n nej mhuinmaaygixy nej nyajpaadyich. E mïid jada ayuc nigü ti njotcugiyich.

⁸ ñich ca' ndajy nmayich mïid co ñich miich ajcxy ti nyajtajcixy ti nyajmaygixy mïid je necy huidibi ajcxy nyajnigüeijx. Oy anajty ti njajihuüyich jotmay co nnejhuüyich co miich ajcxy ooy mdajy may tüg xii mejtz xii mïid ñich nnecy ycixpi. ⁹ Jadachambi ooy jotcuyc nayjihuüyijich. Ca' nmïinaanim mïid je tajin je mayin ycixpi huidibi miich ajcxy anajty mïid jotcuyc'ajtpich, com co je tajin je mayin ajcxy ti xyajjothuimbijitcixy, Dios ti jäygidägy jadu'n nej miich ajcxy ti mmimadaac-cixy je tajin mayin. E ca' ñich ti ndundigooyich ma miich ajcxy co ajcxy njotmaymoy. ¹⁰ Com Dios yjäygidacpyi co jäy njothuimbijitcixy, mïid co taj may ñayjihüyigixy mïid ypocy ycixpi. E co ajcxy yjothuimbijitcixy, huin'it ajcxy je y'alma nidzoocin paadipy. E ca' je' huaad nida-jim nimaayim co ajcxy y'alma ñidzögy. Co jäy ajcxy nidajcixy nimaaygixy huidi yajpat ya naaxhuñ, e ca' yjothuimbijitcixy, jadu'ñi nicxy je o'cin nipatcixy. ¹¹ Mïid je tügpi jäy ypocy ycixpi ti mbaatcixy je tajin mayin. Mi-

ich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiyungixy mïid je pocy ycixpi. Ti xyajjotma'tcixy, e ti xy'adzigiügixy, e ni'ixy miich anajty m'ijtcixy co mdza-achytunaangixy je huidi ti ytundigooy. E mïid jada ycixpi ti miich ajcxy myajniguëxëccixy, co ca' miich ajcxy ti pocy mmïidity ma jadayaabi huinma'ñ. ¹² Co ñich miich ajcxy jayhuin nijayiy, ca' nmïinaanim mïid je' ycixpi huidibi anajty ti ytundigooy. Nañ ca' nmïinaanim mïid je huidibi anajty ti yajmidundigooy. Nijayiyich miich ajcxy, jigix jëbi mnejhuüygixy je tiy'ajt nej Dios tzocy co nduufñich mïid miich ajcxy m'oy'ajtin ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcuyc'ajt, e nañ jadu'n ñich ajcxy ti nbáatcixyich jotcuyc'ajt mïid miich ajcxy ycixpi. Nañ jadu'n ooy ti njotcugiyich ajcxy mïid co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugiy mïid miich ajcxy ycixpi.

¹⁴ Co ti nnimäyich Tito co njot'amij'adyiijich miich ajcxy, ca' ti tzo'ydu'n ti nbaadyich, co yi' oy ti xy-co'ixiügixy. Nigi oy ti yhuimbizimy mïid co tüg'öciy ayuc huidibi ñich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nnimiydacyich miich ajcxy mïid Tito co njot'amij'adyiijich miich ajcxy. ¹⁵ Jadu'n nej co Tito oy miich ajcxy xycogapxy, yi' ooy nigü xchojccixy xyjihüygixy co yi' nejhuüy jadu'n nej miich ajcxy mmijottigooygixy ñich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcxy mïid tzigü'ñ jihu'ñ. ¹⁶ Ooy jotcuyc nayjihüyijich, ooy njot'amij'adyiijich miich ajcxy.

Ycüejticy mïid oyjot oyhuinma'ñ

8 Jadügnax, miich ajcxy migügtijc, nyajnejhuühuaamybich nyajmïidmiydägaamybich miich ajcxy, jadu'n nej Dios may'ajt oy'ajt tuñ mïid je mibijcpidijc ajcxy huidibi xii ya yajpatp Macedonia. ² Je mibijcpidijc huidibi ya yajpatp ti ooy ajcxy minaxy yaj-naxy tzaachypi etz ayo'n. Per ca' ñejity, ooy ajcxy jotcu-jc yajpatcixy. Nañ ayoobi ajcxy, per ti ajcxy may meeñ yajmujccixy, jadu'n nej jihuüy ajcxy ycomeeñity. ³ ñich testigo co je migügtijc mïid yci'm tzojcin meeñ yejccixy, nej jëbi ajcxy ymadaaccixy mïid meeñ, ixti anaxy ajcxy yejccixy. ⁴ Ooy xyminucxtägyich ajcxy co n'a'ixihuibich ajcxy co jëbi ajcxy meeñ yajmujccixy huidibi mïid pube-daangixy jacjadyii je mibijcpidijc. ⁵ Nigi anaxy ajcxy ooy meeñ yajmujcxy ca'ydj jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma ñich ajcxy jadu'n nej Dios tzocy. ⁶ E chi jada' ñich ajcxy ooy nmïinucxtacy Tito co huen nicxy jadüg'oc ma miich ajcxy. Huen nicxy yajcixy yajmay huidibi ti yajtzondägy ma miich ajcxy. Co huen je meeñ yajmujctäy huidibi cixyjot huinjot mïid mbubedaangixy je mibijcpidijc ajcxy huidibi yajpatp jim Jerusalén. ⁷ Miich ajcxy nigü ooy mmadaaccixy, ca'ydj jacpinjaty ma tüg'öciy Dios ytung. Ooy mij mibijcin miich ajcxy mïidity. Ooy myaj'ixpijccixy Dios

ytiy'ajt. Ooy mmijottigooygixy mguydunaangixy iich n'ayuc. E nañ jadu'n ooy miich ajcxy xychojccixy xyjihuiygixyich. Nañ ooy ndzocyich co miich ajcxy nigí pubejtín myegípy ma je mibijcpidijc huidibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huidi jim Jerusalén. Hue' ndzocyich co miich ajcxy mnejhuñhuyipy jadu'n nej yi jacjadyii mibijcpidijc yhuinma'ñ bidaaccixyp c'i'm co pubedaangixy je ymigügtijc jim Jerusalén. Jadu'n mdunipy ajcxy jigix jébi nnejhuñhuibich pen janch tiy'ajt jadu'n co mdzojccixy mjihuñyigixy yi jacjadyii mibijcpidijc. ⁹ Com miich ajcxy mnejhuñyigixyp jadu'n nej ajt nHuindzin Jesucristo mijmay'ajt mij'oy'ajt tuñ mñid iich ajt ycixpi, jadu'n Jesús nipaady nej tüg mijcomeeñybi jiiiby tzajpjoty, mñid co yi' xychojccim xyjihuiyim mijcajee, chi yi' ixmajtztay yi' y'oy'ajtin jiiiby tzajpjoty co ycidacy ya naaxhuiñ etz y'ay-ooy ya. Miich ajcxy ca' anajty ti mñidty jiiiby tzajpjoty, per jadachambi mbadaangixyp mij'oy'ajtin jiiiby tzajpjoty.

¹⁰ Mñid miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jébi huaad mdungixy oyjäy'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydi jac ni pinjaty ti myajtzondaaccixy meen' yajmugii huidi mñid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtín, meen' yajmujccixy cixyot huinijot jadu'n nej ti myajtzondaaccixy ixti mabaad myajmaygixy je meen' yajmugii. Nidüg nidüg yejccix nej ajcxy ii mñidty. ¹² Pinjaty y'ofrenda yejcp janch cixyot huinijot Dios ycöbicip yi' je' y'ofrenda, jadu'n nej ii mñidty. Dios ca' yi' pijctzoy huidibi ajt ca' nmñidty.

¹³ Ca' nmina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuñ'migixy ayo'ndumb. ¹⁴ Hue' yajmina'ñ co quipxyjaty mdzinaangixy, ni pin cayajconaxipy e ni pin cayajmayjadépy. Jadachambi tiempo miich ajcxy nmñidty ca'pxy je huidibi mnidzinaangixip, ixti miich ajcxy conajxpi, paady ycixp jébi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadépy, e jacjadyii migügtijc jébi xypubéjtcixipy, e jadu'n yhuimbidzimipy co mnaybubéjtigixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymina'ñ: "Pinjaty anajty may'amy mñid, ca' yajconajxy. E pinjaty anajty hueeni mñid, ca' yajmayjajty."

Tito mñid ymigügtijc ajcxy

¹⁶ Per nyajnajxypich jäygidaacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej iich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxy, agujc jotcuyc cöbicy, com ti anajty jayijp yhuinma'ñ pidägy c'i'm co ñicxa'ñ jadüg'oc ma miich ajcxy. Jadachambi Tito nicxip ma miich ajcxy mñid c'i'mdzojcin.

¹⁸ Quipxyi mñid Tito nguexy iich ajcxy yam tüg nmigüg huidibi ooy chachcapxpaadyity majaty mibijcpidijc, co ooy oy ytuñ capxhuäcxi Jesús y'ayuc ytiy'ajt nej huaad jäy ajcxy y'alma nñdzoocin paady. ¹⁹ Ca' nan jéyi co je mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxy co jébi yhuidity mñid iich ajcxy, e tunipy pubejtín mñid je may'ajtin oy'ajtin huidibi iich ajcxy ndumybich mñid je migügtijc ycixpi jim Jerusalén. Jadu'n nduññich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxgy co iich ajcxy nbubeda'ñich ajt nmigügtijc cixyot huinijot. ²⁰ Ooy ngüend'atyich je meen' huidibi je mibijcpidijc ti yajmujccixy, jigix ca'ydi pin huaad xyñigapxy xyñi'ojyich, jadu'n nej iich ajcxy meen' nyajmujccixyich. ²¹ Jadu'n iich ajcxy yhuinma'ñ nbidägy co tudägy ndunaangixyich ca' nan jéyi ma ajt nHuindzin Jesús yhuinduu, nañ jadu'n ma je mayjäy ajcxy yhuinduu.

²² Nañ jadu'n nguejxypich mñid yi' ajcxy jadüg ajt nmigüg, je huidibi oy ti ytuñ ma Dios ytung quipxyi mñid iich ajcxy e nejhuiybich co tudägy ytuñ cixyot huinijot. E yi' miich ajcxy ooy xyjot'amij'adyii, e oy ytu-na'ñ mñid miich ajcxy ma Dios ytung. ²³ Pen jim pinjaty nidiy yajtyi je Tito, nimaaygix co iich yi' nmigüg, e yi' mñid nduññich ma Dios ytung ma miich ajcxy. E nañ jadu'n pen jim pinjaty nejhuihua'ñ pinjäy ajcxy yi', yi' jacjadyiibi huidibi ajcxy nicxp mñid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mñid Cristo ymij'ajtin ycixpi. ²⁴ Paady ycixp miich ajcxy yi' mdzójccixipy mjihuñyigixyipy je migügtijc ajcxy huidibi mimb mñid Tito, jigix jébi je mibijcpidijc ma nidüg nidüg cajp ya Macedonia nejhuihuyipy co miich ajcxy yi' mdzojccixy mjihuñyigixy je mibijcpidijc tiydudägy. E paady ycixp jébi iich jotcuyc nayjihuiyijich mñid miich ajcxy ycixpi.

Je cüejtin mñid je mibijcpidijc ajcxy ycixpi

⁹ Nañ ca' yjaty ycopicyity co iich miich ajcxy njacni-jayiyigixipy co je mibijcpidijc huidibi xii ya pubejtín tunaangixyp ma Dios yjäy huidibi ajcxy jim Judea. ² Com nejhuiybich co miich ajcxy nañ jadu'n mbubedaangixy cixyot huinijot Dios yjäy huidibi ajcxy jim Judea. Paady ycixp jotcuyc iich jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E mñid co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito mñid jacjadyii migügtijc ma miich ajcxy, jaydëbi xypubéjtcixipy ma je meen' yajmugii, jadu'n nej ti mbidaaccixy huinma'ñ. E iich ca' ti tzo'ydu'n nbáadibich mñid miich ajcxy ycixpi ma jada pubejtín huidibi ajcxy mguexamyb jim Judea. Com iich ti nnimäyich mayjäy co miich ajcxy ni'ixi' m'ijtcixy mñid mbubejtín. ⁴ Ca' yjeyity co nijéjity mibijcpidijc huidibi tzinaayb ya Macedonia ñicxa'ñip ajcxy mñid iich co anajty nñicxyich jim

ma miich ajcxy. E co anajty ñich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuñhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuñhuip. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtzcixy ma yi meeñ yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy miidity yi m'ofrenda, e jëbi jäy ajcxy nejhuñhuip co yi m'ofrenda ti myejccixy cixyjot huinijot, ca'ydi jäy yminaangixy co ñich miich adzip ajcxy ti n'ane'mgixy co m'ofrenda nya-jmújccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidëgy. E pinjaty mij niip, nañ jadu'n mij ycosecha yajpidëgy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyb pinjaty cixyjot huinijot y'ofrenda yejcp. ⁸ Dios jëbi may'ajt oy'ajt tunipy miid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmiid'adipy tüg'óciy huidibi myajmayajtcixy, e nañ jadu'n conaxpi naadigëbi nej huaad jacjadyii mibijcpidijc mbubejtzcixy, e mdungixipy canaagnax oyjäy'ajtin. ⁹ Jadu'n jaybety ymiñ ma Dios ñecy, ma jadu'n ymina'ñ:

Yi oyjäydijc ajcxy, yi' ajcxy nimooyb ayoobitijc huidibi ajcxy yajmayajtpty. Yi oyjäydijc ajcxy co oyjäy'ajtin tungixy, yejccixyp ijppejt oybi huidibi y'idipy huinixii. ¹⁰ Dios yejcpy je ñim huidibi jäy ajcxy ñiipy, nañ jadu'n Dios yejcpy je jicxy picy huidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuñy mgosecha myajpidëccixy may'amy. ¹¹ E jadu'n miich ajcxy miid'adipy tüg'óciy jugy'ajtin comeeñ'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios miid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayajtp. ¹² Co ñich ajt pubejtin nyejcin ma jacjadyii migügtijc, canan jëyi co nbubejtim miid tijaty yajmayajtcixyp. Nañ jadu'n yi' ajcxy jëbi yajnaxcixy Dioscojuyip canaag'oc. ¹³ Yi' ajcxy capxpadamb Dios miid co je m'ofrenda huidibi ajcxy ti myejccixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadájtzcixipy e nañ jadu'n Dios ñbáatcixipy capx-páatcixipy miid je pubejtin huidibi miich ajcxy anajty myejcpy miid yi' ajcxy ycixpi, etz nañ jadu'n miid jacjadyii mibijcpidijc ycixpi. ¹⁴ E ci'm yi' ajcxy Dios ojadadipy mibijctzohuipy miid miich ajcxy ycixpi, etz xychójjcixip xyjihuiygixip ooy miid co Dios je mijpi conuucxin ti yecy ma miich ajcxy. ¹⁵ Dioscojuyip yi' Huindzin'ajtim Dios miid yi' ymijconuucxin huidibi ti yecy ma ñich ajtin, ni pin canejuñy nej jëbi yajnajtzcaxpy.

Pablo miidity cötujcin co y'apóstol'adyii

10 ñich Pablo nmigapxypich miich ajcxy miid yung-naxy njot nhuinma'ñ, jadu'n nej jihuñy Cristo miich ajcxy xymiidmiydaaccixy. Com Cristo yungnaxy jot huinma'ñ miidity. Nijëjity miich ajcxy yminaangix co ooy yungnaxy naybidägyiijich co n'ityich miid miich ajcxy, e jadachambi co jigüëgy nyajpaadyich, hue' n'ahuimbityich ahua'ñ, ndunaamybich ti ndunaamybich. ² May'ajt nbijctzooybich co anajty ñich miich ajcxy nicxy n'ijxcixy, ca' jadu'n ndzocyich co copicy n'ahua'ndägibich miid nijëjity miich ajcxy huidibi xyñihuambejtpich, co nduñich etz ngapxyich ngi'mtzojcin tim jadu'n nej huenpin naaxhuiñjäy ytungixy etz ycapxcixy miid yci'mtzojcin. Janch ni'ixi' n'ityich, co anajty jim nmechich, chi miid nnyahuindinähuiybich yi' ajcxy huidibi jadu'n xyñihuambejtpich. ³ Janch tiy'ajt co ndzinaayich jadu'n nej naaxhuiñjäy chinaaygixy. Per ca' ndziptuñich nej jäy ajcxy chiptungixy. ⁴ Ca' ñich ajt nyajtunim naaxhuiñjäy ymic'ajt co nnyagohuaanim ma je jibicpi huidibi xymidzip'ajtim. Hue' nyajtunim Dios ymic'ajt, huidibi jëbi miid nmimadaacim tüg'óciy huidibi ca'oybi miid. ⁵ Jadu'n ñich ajcxy ca' nyajtzobadäängixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tüg'óciy naaxhuiñjäy y'ayuc ytiy'ajt nbidääccixyich ma Cristo, jigix tüg'óciy jäy ajcxy capxymidohuip Cristo. ⁶ Co anajty miich ajcxy mhuinma'ñybidääccixy co huadz mgapxymidohuaangixy tüg'óciy Cristo y'ayuc ytiy'ajt, pinjaty cacapxymidooy, hue' ni'ixi' n'ijtcixich co yajmöhua'ñ castigo pinjaty cacapxymidoo.

⁷ Miich ajcxy yi' mdzachuenditungixy jäy ajcxy nej yjäy'ajtcixy. Pen jim pinjaty ñayjihuiyii janch agujc jotcuyc co Cristo yhuin'ixyii miid ytung ycixpi, huen huinjihuiygixy jotjoty co Cristo ti xyhuin'ijxcixyich nañ jadu'n miid yi' ytung ycixpi. ⁸ ñich ca' ti tzo'ydu'n jihuiyich miid co ci'm nnyagömayiijich hueeni miid co Jesucristo xymoogygixyich ane'min cötujcin. Com ñich ajt nHuindzin Jesucristo ti xymóogygixyich jada cötujcin, jigix ñich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuiy n'adzigihuaangixy miid je necy huidibi nyajniguejxypich miich ajcxy. ¹⁰ Yminaangixy co ñich nnecy ooy tzaachyaty chach chaach. E yminaangixy co ma jäy ajcxy yhuinduu yung naxy njäy'aty, e ngapxin nmiydäacínich ca' pin jäygidägy. ¹¹ Per yi' jäy ajcxy huidibi jadu'n minaangixp, copicy ajcxy nejhuñhuipy co jadu'n nej ñich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquipxim o nyajtügiiyim miid yi' ajcxy ytung huidibi tzach naygömayaanip ci'm. Tzoo huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip miid yci'm'ayuc yci'mhuinma'ñ huidi ii yajtpty ñejhuñy. ¹³ Ca' ñich ci'm naygömayiyb ma ycapadyii, huidibi ñich ajcxy ca' xypátcixyich. Dios ñich ajcxy xyajnejhuñyibich nije' nije'

it lugar ma yí' tzocy ndúngixibich. E Dios jadu'n tzojc co nícxy ndungixy jim Corinto ma miich ajcxy myaj-patcixy. ¹⁴ Paady ycixpi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ñich jayijp ti n'ityich ma miich ajcxy. Pues ñich tim jayijp ngapxhuäcx Dios y'ayuc ma miich ajcxy, e ca' jac ni pin. ¹⁵ Pen huingbi jäy je Dios ytung yajtzon-daacip ma tüg cajp, pues ca' ñich huaad jim nduuñich, jadu'n nej jihuüy ñich ti nyajtzondägyich je tung. Ca' jadu'n nduuñich, hue' nijjp'ijxypich co miich ajcxy myajyeeqip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xü ya n'ñihuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypí ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pinjaty ci'm naygömayip. Hue' Dios yjäygidacypí pinjaty ajt nHuindzin Jesucristo capxpatp.

Pablo etz je' ajcxy huidibi y'ayuccapxhuäcxp miid anii

11 Huaad co miich ajcxy ixypy xy'ocmimexctujcich hueeni ñich nloci huinma'ñ huidibi ngapxaamy-bich. Oy ixypy ñejity mimexctuccich. ² Ooy ndzocy ooy njihuüyich miich ajcxy. Dios ti xymöyich je tzojcin jihuüyich huidibi nmüidich miid miich ajcxy ycixpi. Ndzoj-cypich co cixyjot huinjot miich ajcxy mmijpidaaccixy Cristo. Co miich ajcxy yajmij'adip Cristo cixyjot huinjot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp miid tüg yëydijc. ³ Ndzigüybich co huingbi jäy xyajhuinma'ñyidigoyaangixy miid ixpicytjic y'ayuc huidibi ca' ytiy'ajtity. E miich ajcxy m'ix-madzaangixy jadu'n nej cixyjot huinjot ti mmijpidaac-cixy Cristo. Tim jadu'n nipada'ñ miich ajcxy mjadaangixy nej yajty jecy'ajty je Eva co tza'ñ yhuin'ñi. ⁴ Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ñich ajcxy nyaj'ixpicyich. Etz nañ jadu'n miich ajcxy jotcuyc mgöbijccixy huingbi espíritu, ca' yjējity je Es-piritu Santo huidibi ti mgöbijccixy jayijp'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjējiñ huidibi ajcxy m'alma xyajnidzoocip. Ca' y'ocjējiñ huidibi ti mmidoogixy ma ñich ajcxy. Mic'amy mdzachmijp-daaccixy huingjäy y'ayuc. ⁵ Ca' jadu'n ytiy'ajtity co yi huindzindijc ajcxy huidibi naydijigixp Jesús y'apóstol huidi jim ma miich ajcxy, co jac mic'ajt miid ajcxy etz yjacmiid ajcxy ixpijcin ma Dios ytiy'ajt, ca'ydi ñich. ⁶ Oy ñich jada' ca' njatyich nej yajxon ngápñibich, ca' ooy ngo'ayúcgich. Per ca' ñejity com yajxon njatyich nnejhuüyich Dios ytiy'ajt. E ti nyaj'ijxcixy nyajne-jhuüygixy co n'ixpicycigich ma Dios ytiy'ajt miid je ayuc huidibi ngapxhuäcñich ma miich ajcxy etz je mijhuin-ma'ñ huidi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcñyich Jesucristo y'ayuc ma miich ajcxy e ca' nbijctzooyich meeñ miid ndungich ycixpi? Jadu'n nnyajnajxñich anajty nej tüg

midumbi jigix miich ajcxy jac'oy jacjotcuyc mdzinähuip.

⁸ Ti ngöbicyich meeñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeeñ nyajtuunich co nyaj'ixpijcyich miich ajcxy. ⁹ Co n'ijtyich miid miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayajjatyich anajty. Ca' n'adzijpyich ni pin. Yi' migügtijc huidibi ajcxy tzoon Macedonia, yi' ajcxy xymooyich huidibi anajty nyajmayajjatyich, paady ycixp ca' anajty meeñ nbijct-zooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduuñich miid miich ajcxy co n'ijtyich jim jadöjimijt. ¹⁰ Nejhuüybich co yjanchity co nmüididyich Cristo ytiy'ajt, nañ tim jadu'n nnejhuüyich co ci'm nbaadyich huidibi müdnay'ixyijich. E ca' pin ma tüg'óciy je Acaya naaxjot xycapñicbich ja-da jotcuyc'ajtin. ¹¹ ¿Na'amy co jadu'n nmüina'ñich? ¿Je' co ñich miich ajcxy ca' ndzojccixy? Ca' yjadu'nity. Dios ñe-jhuüyb co ndzocy njihuüyich miich ajcxy.

¹² Per njacyajtüyöaamybich je ndungich huidibi ndumybich, e ca' meeñ nbijctzohua'ñich müid ñich ndung ycixpi jigix co yi jacjadyii huindzindijc huidibi yaj'ixpijccixp ma miich ajcxy, ca' jëbi y'ñindaaccixy co yi' ajcxy tú'ciy ytungixy jadu'n nej ñich nduuñich. ¹³ Yi' ajcxy ymüinaangixy co Cristo ti yajñibijcigixy co ajcxy yi' y'apóstol'adyii, e ca' yjanchity, nigooob ajcxy huin'ingixy yi' mibijcpidijc. Ñayyajñaxigixy ci'm nej jihuüy Cristo y'apóstol'ajtigixy, e ca' yjanchity. ¹⁴ Nañ ni ca' oy nhuin-maayich co jadu'n idütczixy, com nañ jadu'n je Satanás ñayyajtigachyii ñayyajnaxyii nej Dios y'ángel huidibi tiy'ajt müid, e ca' yjanchity. ¹⁵ Paady ycixp nmibijcpich co yi jäy ajcxy huidibi tumb müid je mujcu' nañ jadu'n nayyajnaxyii jadu'n nej jäy tudägyip, e ca' yjanchity. Per Dios chaachytunamyb ajcxy jadu'n nej ypadyii müid je jibicpi ycixpi huidibi ajcxy ytumyb.

Je tzaachypí je ayo'n huidibi Pablo yajty co y'ayuc-capxhuäcxy

¹⁶ Jadüg'oc ñich miich ajcxy nnümaangixy: Ni pin ycamina'nipy co ñich locijity. Per pen nijējity jadu'n ymi-naangixy, ca' ñejity. Miich ajcxy amüdoo'ljtcix ñich n'ayuc, jigix jëbi naygömayijich ci'm. ¹⁷ Ca' ñich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm. ¹⁸ Mayjäy ajcxy ooy ci'm chachnaygö-mayáanigixyp müid huidibi ti tungixy müid yci'm mic'ajt ya naaxhuiñ. Nañ jadu'n ñich nnyagömaya'ñyijich ci'm. ¹⁹ Miich ajcxy mdzachcöbijccixyp loci jäy ajcxy y'ayuc, je' co mdzachnayyajñaxáanigixy jadu'n nej jihuüy ajcxy ooy mdzachcohuinma'ñity. ²⁰ Mgöbijcyp miich ajcxy co jäy ajcxy xytumbi'adiiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycójxcixy ma ajcxy mhuiñyijp. ²¹ Oy njatzo'ydu'njihuüyich co nmüina'ñich co ca' jadu'n nmüididyich je jotmic'ajtin, jigix jëbi ñich miich ajcxy nduuñich jibic, jadu'n nej yi' jadu'mbi huindzindijc ti xy-tungixy.

Per jadu'n nej yi' ajcxy ñaygapxpadyii c'i'm, nañ jadu'n naygapxpada'ñiyijich c'i'm. Ca' ñejity pen capxpich jadu'n nej tüg loci jäy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymij-teedy'ajtpy? ñich nañ jadu'n. ²³ ¿Nej tumb ajcxy miid Cristo? Nigi nduñyich miid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduñyich miid Cristo ca'ydi yi' ajcxy. Canaag'oc codungdijc ychaachytuñich. Ti nyajc'i'atyich miid matz etz miid coohac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmiidpi xyc'i'ajtyich miid coohac iipx majmocx midaax ci'. ²⁵ Tugig'oc ychaachytuñich miid matz. Tügtecy ajcxy ychaagächich. Tugig'oc je barco yquif mejj'agujc je huidibi ñich anajty nyajncixiyb. Co je barco yquif tügtecy, chi tüg tzuu etz tüg xi' n'ijtyich ma je mejy anajty ooy ypidigy. ²⁶ Ooy viaje nduñyich canaag'oc, e o'cijp'am n'ijtyich ma mijñigom yjadyii, e nañ jadu'n ooy anajty ma meetzpi yajpaady ma anajty nhuidityich. Nmigogajpich, yi judíojäy, xyjayaj'ogaanich ajcxy. Ti ayo'n nbaadyich ciudadjoty etz ma yuugjot etz mejjoty. E nañ ti ayo'n nbaadyich miid jäy ajcxy huidibi naybidaacip ajcxy nej ñich ajt nmigüg, e ca' anajty yjanchity. ²⁷ Minaajity ooy mic njihuñyich ndung n'ayo'nich. Canaag'oc ti ndzumaxyich ca' nmäyich. Canaag'oc nxinaxyich miid yuu tidzibi. Janam jatzojc n'ayu'atyich. Mñaajity ooy njihuñyich je tichyp, etz nyajmayjatyich nhuit nducxyich.

²⁸ Miid jada ycixpi etz miid jac-huidijaty, nañ jadu'n jabom jabom ooy mic njihuñyich jadu'n nej yajpaady je mibijcpidijc nidüg'ócyi canaag picy xi ya. ²⁹ Pen nijejity mibijcpidijc yajpaady amutz ma ajcxy ymibijcin, nañ jadu'n ñich nayjihuiñyijich amutz. Pen nijejity mibijcpidijc ypocytungixy, ñich ndzo'ydu'n njihuñyibich etz jibic nayjihuiñyijich miid yi' ajcxy ypocy ycixpi. ³⁰ Pen naygömayaanibich c'i'm, naygömayaanibich co amutz njihuñyijich. ³¹ Je Dios ñich ajt nHuindzin Jesucristo yTeedy, je huidibi huaad n'ojadajtim n'ibaatim ngapxpaatim huinixi huinitempo, yi' ñejhuiñyib co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb miid je rey huidibi yxi Aretas, ypidac soldados ajcxy ma jadyii mijtu' ycajptigäy, jigix jebi xyajncixyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp miid yjübojtz'ahuidityity. E jadu'n ndzoocyich ma je gobernador yc'i'am.

Huidibi Pablo yhuin'ijx etz nejhuiñy

12 Ni ti ycajajpaady ycajajganar'aty co c'i'm ndzachnaygömaayim ndzachnayñigapxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiybich. ² N'ixy'ajtypich tüg yeydijc huidibi mibijcp Cristo. Cham

majmactz jimijt ma Dios yajpättigiyii tzajpjoty ma je midugigpi tzajp. E ca' nejhuiñyich pen hue' yajpättigiyii miid ñinixc o pen ca'. Dios tügpajc nejhuiñyib. ³ Jadüg'oc nmina'ñich co Dios ti yajpättigiy je yeydijc ma je oybi it. E ca' nnejhuiñyich pen janch ti ypättigiy miid ñinixc o pen ca'. Dios tügpajc nejhuiñyib. E jiiy ma je oybi it midoy capxy ayuc huidibi ca' huaad ni pin jäy capxy miydägy nimina. ⁵ Ooy ñich amij agix nayjihuiñyijich miid je jadu'mbi yeydijc jadu'n nej jëjin huidibi Dios yajpättigiy tzajpjoty. Per ca' ñich c'i'm nayñimiydäga'ñiyijich naygömaya'ñiyijich. Hue' janchtiy nayñimiydägaanibich c'i'm nej nduñ n'ayooyich ma ñich ndzinaayin. ⁶ Oy ixypy ñich c'i'm njanayñimiydäga'ñiyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchyp. Per ca' jadu'n naygömaya'ñiyijich, com ca' ndzocyich co jäy ajcxy nicxy xycömaayich nigi anaxy. Huaad jadu'n co ajcxy miid miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuiñyich jiiy tzajpjoty, ooy anajty chach y'oyity. Paady ycixpi Dios pidacy jadu'n nej jihuiñy tüg apy ma ñich nninixc, jigix ca'ydi amij agix nayjihuiñyijich. E je apy jadu'n nipaady nej mujcu' xyajtzaachiyich. ⁸ Tugig'oc Dios ti nmibijctzooyich co huen xyajpidzimich je huidibi xyajtzaachiyibich. ⁹ Per je Huindzin Jesús xyñimaayich: "Jebi jadu'n co may'ajt ndunipich miid miich ycixpi. Co pinjaty pumäy ñayjihuiñyii, huin'it nigi ñiguëxigy ñich nmic'ajt." Paady ycixpi njotcugiyich co pumäy nayjihuiñyijich, jigix ñiguëxigipy Cristo ymic'ajt ma ñich ndzinaayin.

¹⁰ Paady ycixpi ooy njotcújcidyich co pumäy nayjihuiñyijich, co jäy xyñigapxy xyñi'ojtyich, co ti nyajmayjatyich, co jäy xy'ixhuidityich xypahuidityich, co tzaachyp nyajnaxyich miid Cristo ycixpi. Co nayjihuiñyijich pumäy, chi nigi mic nayjihuiñyijich miid Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co ñich jadu'n c'i'm naygapxpadyijich, tim jadu'n nipaady nej jihuiñy ñich tüg loci jäy. Adzip miich ajcxy jadu'n xytuuñich co copicy naygapxpadyijich c'i'm. Hue' yjapaadyii miich ixypy ajcxy xycömaaybich xycapxpatpich. ñich ca'p ñich ti ndzoohuity. Oy ixypy ñich ca' ti mic'ajt nmididyich, per jatytimy nigi mic'ajt nmididyich, ca'ydi yi huindzindijc huidibi ma miich ajcxy, huidibi ajcxy naydijp apóstol, e ca' yjanchity.

¹² Ma je tung huidibi nduñyich miid mecxtujcin ma miich ajcxy, ti ooy ñiguëxigy miid canaag ijxpejt, mijhuinma'ñ etz milagros, co ñich janch Cristo xy'apóstol'adyijich. ¹³ Ca' jadu'n ytiy'ajty co mminaangixy co nigi oy ti nduñyich ma yi jacjadyii mibijcpidijc ma jacjadyii cajp, ca'ydi jadu'n nej ti nduñyich ma miich ajcxy. Pen ti ndundigooyich co ca' ti nbijctzooyich meeñ miid ñich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxcich ajcxy.

¹⁴ Jadachambi ni'ixi' n'ityich co nnicxa'ñich midugig'ocpi jim ma miich ajcxy. Ca' ti pubejtin nbijctzo-

hua'ñich ma miich ajcxy mïid ndungich ycixpi. Ca' ndzocyich miich ajcxy mmeef. Hue' ndzocyich co miich ajcxy xymijnicxpedipyich. Jac'oy co ñich miich ajcxy nbubedipy, ca'ydi co miich ajcxy xypubedipyich. Jadu'n ñich nipaady mïid miich ajcxy nej tög ungdeedy. Je ungdeedy ypubejtpy y'ung, e ca' nan je ung pubejtpy yteedy. ¹⁵ ñich jotcuyc nyajtundähuibich ma miich ajcxy tög'óciy tijaty nmïidich, ixti ngi'mmic'ajtich tög'óciy nyajtunaamybich mïid miich ajcxy ycixpi, jigix jëbi nbubedipyich miich ajcxy. Oy janiguëxigyp co ñich miich ajcxy njadzojccixy njajihuüygixy, e miich ajcxy ca' xychojccixyich xyjihuiüygixyich.

¹⁶ Nijjëjity miich ajcxy mminangixy co janch tiy'ajt co ca' ti pubejtin ti nbijctzooyich ma miich ajcxy, nijjëjity yminaangixy co janch nihuinma'ñ ti nyajcägixyich ma tög trampï mïid anï. ¹⁷ ¿Nej ti ñich miich ajcxy nhuin'ñingix mïid je migügtijc huidibi ajcxy nyajniuejx? ¹⁸ Nbijctzoohuich may'ajt ma Tito co huen nicxy xycogapxiygixy jadüg'oc. E nyajpuguexiyich jadüg'ajt nmigüg huidibi mïid ñicxy quipxyi. ¿Nej ti miich ajcxy Tito xyhuin'ñingixy? ¿Nej ca' yjanchity co ñich etz Tito quipxyjaty ñich ajcxy nhuinma'ñ nmïidity, e tú'ciy ndungixyich?

¹⁹ Ca' yjecyity co miich ajcxy mhuinma'ñybidáaccixy co ñich ajcxy ndzachnayñigapxtútigixy ma miich ajcxy. Ca' yjadu'nity. Ngápccixpich nmiydáaccixpich ma Dios yhuinduu je ayuc tiy'ajt huidibi Cristo xymóoygixich. E tög'óciy huidibi ndungixpich, hue' ndungixich jigix yeegip miich ajcxy mmibijcin. ²⁰ Com tzigüybich co anajty nicxy n'ijxcixyich miich ajcxy, ca' jecyity co nbadaamybich je tiy'ajt co miich ajcxy ca' mhuinma'ñmïidity jadu'n nej jëbi njäygidägyich yi mhuinma'ñ ajcxy. E miich ajcxy nañ jadu'n ca' mjäygidáaccixipy nej ñich nhuinma'ñ mïididyich. Tzigüybich co miich jada' ajcxy mnaychiptúnigixy, ca' mnay'ixáanigixy nidüg nidüg, mnaymijotmá'tigixy; mnayñ'ojñiyigixy, e mbiitzcapxcixy; co ooy amij agix mnayjihuiüygixy, e ca' mnay'ayuc-huinjihuiüygixy, ca' oy m'ijtcixy. ²¹ Tzigüybich co jadüg'oc nicxy n'ixyich miich ajcxy, chi ajt nDios xyajjihuiüibich tzo'ydu'n mïid miich ajcxy ycixpi, etz njihuiüibich tajin mayin mïid miich ajcxy mbocy ycixpi, e com ca'ni mjothuimbijtcixy mjäydgooygixy je mjibic-huinma'ñ jadu'n nej mmigapxtigooygixy e mmi- dundigooygixy huingbi töxyjäydijc, etz jadu'n nej mmi- dundigooygixy migüg ytöxyjic, etz jadu'n nej jibic-huinma'ñ miich ajcxy mmïidity.

Ane'min capxhuijn etz capxpoocxin huidibi cijxnip je ney

13 Jada je' ymidugiig'oc co ñich miich ajcxy nicxy ngo'ixihuaangixyp. Pen miich ajcxy mxihuaangixyp tög migüg ma ñich co ti ytundigooy mïid Dios ytiy'ajt, hue' tzocy mïid metz o tugüig testigos. ² Co je mimejtz'ocpi ñich miich ajcxy oy ngo'ixiy, chi nnimaayich yi' ajcxy huidibi ti ytundigooygixy anajty, e nañ jadu'n nnimaayich je huidibi jacpocytungixp co ñich anajty jadüg'oc nicxy miich ajcxy n'ijxcixy, ca'

nyajtuna'ñich mecxtujcin ma yi huidibi ajcxy pocytungixp. E cham co nyajpaadyich jigüegy ma miich ajcxy, nnigapxpejtpyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³ E jadu'n miich ajcxy mmïid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tög jäy huidibi ca' mic'ajt mïidity. Hue' je' yajniuguëxigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuiüy ca' anajty mic'ajt mïidity. Per jadachambi Jesucristo jugy'ajtp mïid Dios ymic'ajt. Nañ tim jadu'n co n'ijtim mïid Jesús, jadu'n yquëxigyp nej jihuiüy ca' mic'ajt nmïid'ajtim. Per co n'ida'ñich mïid miich ajcxy, nmïid'adaanibich Dios ymic'ajt mïid co nyajpaadyich ma Cristo.

⁵ Ci'm naydiy'ajtpjicigix nidüg nidüg, pen janch tiy- dudäy mmibijccixy Cristo. Ci'm huinmaaygix ma ajcxy mgimdzinaayin, pen janch mmibijccixy. ¿Nej ca' mdimjihui'mybijccixy, pen mïid ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nigixy cohuajc. ⁶ Per nijjp'ijxypich co miich ajcxy mnejhuühuipy co yjanchity co Cristo ti xyajni- bicyich yi' ytung, e ca' n'ñindägyich. ⁷ Dios nmibijctzooy- bich mïid miich ajcxy ycixpi, jigix ca' ti jibic-huinma'ñ mdungixipy. Canan co ñich ajcxy ndzachcömaybidzim- máangixyich, o co ñich ajcxy nigü nmïidity Dios ytiy'ajt ca'ydi jac ni pinjaty. Jadu'n ndungixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuiüy ñich ajcxy ca' oy mij n'ixpccycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tög'óciy huidibi ndunim, nay- badib mïid Dios ytiy'ajt. ⁹ Paady jotcuyc ñich ajcxy co nyajpáatcixyich nej jihuiüy ca' ñich ajcxy mic'ajt nmïidity, jigix miich ajcxy mic'ajt mmïid'adipy ma mmibijcin. Nmibijctzoohuaamybich ajcxy Dios mïid miich ajcxy ycixpi, jigix ajcxy mmibijcin m'ijtcixipy ca'pxy. ¹⁰ Jada necy ñich jayijp nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñich n'ane'min ma miich ajcxy. ñich ajt nHuindzin Jesucristo ti xymöyich mic'ajt, jigix jëbi ñich miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcixpich mïid miich ajcxy, huen Dios xypubéjtcixipy xypudigüygixyipy. Mijottigooygix cuydunaangix tög'óciy Dios ytiy'ajt ma mdzinaayin. Jotcuyc'ajtcix. Chinaaygix mïid tú'ciy mjot mhuinma'ñ. Naymïid'ijtigixy agujc jotcuyc. Huen ajcxy Dios xymïid'ijtcixy. Je Dios huidibi jotcuyc'ajtin yejcp, e nañ jadu'n Dios xychojctáaygixipy xyjihuiüydáaygixipy.

¹² Naygapxpóocxigix xic xon. ¹³ Tög'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy mïid miich ajcxy ycixpi. Huen Dios xychojccixy xyjihuiüygixy. Huen Dios yjihuiüñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxy- cixyich. Amén.

GÁLATAS

1 Ich Pablo, Jesucristo xyquejxich co ngapx-huäcxibiyich yí' y'ayuc. Ca' nmínaaním jáy ajcxy xyajníbjcich jada tung. Jesucristo etz Dios Teedy ajcxy tí xyajníbicyich jada tung. Je' je' je Dios huidibi yajjugypijc Jesucristo co y'o'cy. **2** Ich etz tüg'óciy migügtijc ajcxy huidibi ya yajpatp ma ich nyajniguejxpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. **3** Nmíbijctzooybich Dios Teedy etz ich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuij ajcxy. **4** Ich ajt nHuindzin Jesucristo tí nayyoxyii tí naydogyii cí'm anajty ma yí o'cín miid ich ajt nbocy ycixpi. E jadu'n tí xyñihuaanim ma je jáy ajcxy huidibi jibic huinma'ñ ymiid huidibi tzinaayb ajcxy ma jadachambi xii tiempo. Jadu'n Jesucristo tuñ miid ich ajt ycixpi, com ich ajt nDios Teedy jadu'n tzojcp. **5** ¡Ooy y'oyity co Dios Teedy huen mij etz cōmay y'idipy huinixii huinítiempo! Jadu'n jada. Amén.

Ca'p ji huingbi tíy'ajt huidibi jáy y'alma yajnidzocp

6 Ooy ndzachhuinmaayich jadu'n nej tim tzojcy tí mijjpyöyducixy je Huindzin Dios ytiy'ajt. Dios xyhuin'ixcixy jigix jébi mmíbijccixy je oy'ajt je may'ajt huidibi Jesucristo ytuun miid miich ajcxy ycixpi. E miich ajcxy tí mhuinma'ñ myajtigajtcixy, e tí mmíbijccixy huingbi jáy ajcxy y'ayuc, jadu'n nej ca' jébi m'alma nidzocin padaangixy. **7** Ca' nmínaaním co ji jadügnax Dios ytiy'ajt. Hue' je'nijējity jáy ajcxy tí xyajhuinma'ñy-digooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnidzogaani ajcxy m'alma. **8** Co ixypy ich, o co ixypy nidüg ich ndiscípulo, o co ixypy tüg ángel huidibi tzajpjoty tzomb capxhuäcx ixypy ma miich ajcxy ayuc tíy'ajt tigachjaty huidibi ca' ñaybadyii miid je tíy'ajt huidibi nyaj'ixpijc ajcxy oga'n'aty, ca' mgöbñjccixipy yjadu'mbi ayuc huidibi ajcxy xyajnídigoyaangixy xyajtüdigoyaangixy, Dios tzaachytunib yí' ajcxy y'alma. **9** Tí jayijp nyajnímay, e cham jadüg'oc nigapxpetyich, pen ji pinjaty capxhuäcxy ma miich ajcxy tíy'ajt tigachyjatypi, huidibi ca' ñaybadyii miid je tíy'ajt je tibi miich ajcxy m'ixpijccixy, copicy Dios chaachytunipy jada jáy miid ypocy ycixpi huidibi xychachyajnídigooygixp xychachyajtüdigooygixp.

10 Co jadu'n nmína'ñich, ¿nej mdiy co ndzocyich co jáy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jáy ajcxy? Ca' huaad nduuñich huidibi jáy ajcxy chojcpy, yí' janchtíy ndumybich huidibi

Dios chojcpy. Co ixypy nduuñich huidibi jáy ajcxy yjäygidacpy, ca' ixypy nguyduuñich Cristo ytiy'ajt.

Nej Pablo oy paady je apóstol'at

11 Paady ndzocyich migügtijc co mnejhuñhup ajcxy jada co je Dios y'ayuc ytiy'ajt huidibi ngapxyhuäcxpich anajty ma miich ajcxy jadu'n nej jébi ajcxy m'alma ñídzögipy, ca' yí' ayuc'adyii tíy'ajt'adyii huidibi jáy cí'm tí cojcixy tí maacxcixy. **12** Com je Dios y'ayuc ytiy'ajt huidibi nmíidich, ca' tí nbaadyich ma jáy ajcxy, nañ ca' nmínaaním jáy ajcxy tí xyaj'ixpicyich. Jesucristo cí'm tí xyajhuinjihuñyich jada tíy'ajt.

13 Com miich ajcxy mnejhuñyigixp jadu'n nej jecy'ajty ich tí ndzinäyich, co ich anajty nmijpidägyich yí' judfójäy ajcxy ycostumbre. E mnejhuñyigixp jadu'n nej jecy'ajty n'ixhuidijtyich nbahuidijtyich mictägy je jáy ajcxy nidüg'óciy huidijaty anajty mijpidaaccixp Dios ytiy'ajt. **14** Nígi ich anajty n'ixpícyidyich ma yí' judfójäy ajcxy y'ixpijcin ca'ydi jac pinjaty judfójäy, ca'ydi jac pinjaty nmigügtijcich huidibi tügñax yjimijt miid ich. Com ooy anajty nígi ndzachmijpidägyich n'ap ndeedyich y'ayuc. **15** E Dios xyhuin'ixxich jayijpni ca'ni anajty ma'xung'atyñich co ndúnibich yí' ytung. Miid co Dios ooy tí xychocyich tí xyjihuyich, paady xyhuooyich miid ytung ycixpi. **16** Dios xyajnejhuñyich yí' y'ung y'ayuc ytiy'ajt, jigix ngapxhuäcxibich yí' y'ayuc ma yí' jáy ajcxy ca'pi yjudfójäyity ajcxy. Ca' pinjaty n'ixtaayich huidibi jébi xyaj'ixpicyich Dios ytiy'ajt, hue' Dios cí'm xyaj'ixpijcyich yí' ytiy'ajt. **17** Nañ jadu'n ni ca' nbättigñyich jim Jerusalén ma yajpaady y'apóstoles ajcxy huidibi anajty ajcxy Dios tí yhuin'ixyii. Chi tñyi nñicxyich jim Arabia ñaaxjot. Co ich jim hueeni n'ijtyich, chi nhuimbijtyich jim Damasco.

18 Cooni tugñg jimijt nhuäcxijpyich huin'itni nbättigñyich jim Jerusalén. Chi n'oyich ma Pedro anajty yajpaady, e chi jim nmíid'ijtyich jéyi majmocx xii. **19** E ca' nmínaybaattich yí' jacjadyii apóstoles. Jéyi ich miid naybaati je Jacobo, je Huindzin Jesús y'uch. **20** Je huidibi cham ich miich ajcxy niyajjayñyigixyp, tíy'ajt yí'. Y'ixyp ñejhuñyb Dios co ca' n'índägyich.

21 Co ndzooñich Jerusalén, chi nñicxyich Siria naaxjot etz jim Cilicia naaxjot. **22** Je huin'it tiempo yí' Cristo yjäy ajcxy huidibi nayyöymujcip cajp cajp jim Judea naaxjot, ca' ajcxy anajty xy'ix'adyiijich huingáxy jipccíxy. **23** Jéyi ajcxy nejhuñy anajty co jáy chachmínaangixy: "Yí jáy huidibi anajty xychach'ixhuidijtim xychachpahuidijtim, cham yí' tzachcapxhuäcxy je Cristo ytiy'ajt, je tíy'ajt huidibi anajty ytimyajcödígoyamyb." **24** Co je

mibijcpidijc oy jadu'n tiy'ajt nejhuiygixy, chi ajcxy yaj-najxy Dioscojuyip ma Dios miid ñich ycixpi.

Jacjadyii Jesús y'apóstones ajcxy cöbijcixy yi Pablo

2 Co majmactz jimijt, chi jadüg'oc nñicxyich jim Jerusalén quipxyi miid Bernabé. Nañ jadu'n Tito xypanicxyich. ² Dios jadu'n ti xyajnejhuüyich co copicy nñcixibich jadüg'oc jim Jerusalén. Chi jim nyajmídmíydacyich nijējity jāy huídibi Jesús ti yhuin'ixyii ajcxy, je huídibi ajcxy nigohuajc'ajtp anajty je mibijcpidijc. (Ahuingujc ñich ajcxy nxiicmujcy ngapxmujcy, ca'ydi ymayjāy'agujcity.) Nyajmídmíydactaayich je Dios y'ayuc ytiy'ajt huídibi ngapxhuäcypich ma yi jāy ajcxy ca'p yjudío jāyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapxaducyich, e ti anajty jadu'ñyi ñaadig'aty ñich ndung huídibi jayijp ti ndu-ñich etz huídibi njactunaamybich anajty. ³ Je jāy ajcxy huídibi nigohuajc'ajtp anajty je mibijcpidijc jim Jerusalén yjāygidac ajcxy ñich n'ayuc jadu'n nej ngapxticxyich, e nañ ni ca' ajcxy ymīnañ adzip co copicy yajtiy'ajttihuipy je Tito huídibi xypa'oyich jim, com griego-jāy je' anajty, paady ca' yajtiy'ajttēy anajty. ⁴ Ca' ixypy pin huaam ycamīnañ jim Jerusalén co Tito ca' yajtiy'ajttēy, co ca' nijējity mibijcpidijc ycatigēy ayūch ameech huídibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxiygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguydunim judío-jāy ycostumbre. Yi' ajcxy adzip xyajnihuídaambich yi judío-jāy ycostumbre, jadu'n nej jāy codoogēy ajcxy adzip ytuungixy ma yhuindzin ytung. ⁵ Ni catūgjaxēgy ajcxy xycamīmadacyich, e ni xycayaj'amoñ ñich ajcxy, com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma añi.

⁶ Yi apóstones ajcxy huídibi Jesús ti yhuin'ixyigixy huídibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmōyich jemybi huídibi ca' jayijp nnejhuüyich. (Peni capxpaady ajcxy o peni ca' ycapxpaadyity, ca' nduñich cuendí. Com Dios ca' huin'ixpety jāy ajcxy tyduñ.) ⁷ Co oy ajcxy nejhuiy co Dios ti xyquexyich ngapxhuäcxyich yi' y'ayuc ytiy'ajt ma yi jāy ajcxy huídijaty ca' yjudío jāyity, tim jadu'n nej ti quexy Pedro co capxhuäcxí yi' y'ayuc ma yi judío-jāy ajcxy, ca' ñich yi' ajcxy anajty n'ayucich xyjijpcogapxiyich, ooy ajcxy jāygidacy yi n'ayucich ndiy'ajtich. ⁸ Yi Dios huídibi Pedro quejx huen yi' y'ayuc capxhuäcxy ma yi judío-jāy ajcxy, nañ jadu'n ñich xyquejxich co yi' y'ayuc ngapxhuäcxiyich ma yi jāy ajcxy ca'p yjudío-jāyity.

⁹ Je Jacobo, je Pedro etz Juan ajcxy, je huídibi nigohuajc'ajtcixp yi mibijcpidijc, co ajcxy nejhuiy jadu'n nej anajty Dios may'ajt oy'ajt ti tuuñ miid ñich, chi ajcxy xy-cöbijcyich agujc jotcujc Bernabé etz ñich. E chi ñich ajcxy miid nay'ayuc-huinjihuiy co jēbi ñich etz Bernabé nñcixibich ma yi ca'p yjudío-jāyity ajcxy, etz jēbi yi Jacobo, Pedro etz Juan ajcxy ñicxcixy ma yi judío-jāy ajcxy. ¹⁰ Jēyi ajcxy may'ajt pijctzoy ma ñich etz Bernabé co jadu'n pa'ayo'n ndunipyich ma yi judío-jāy ayoobitijc. E

chi ñich ngo'adzoy co ndunamybich jadu'n agujc jotcujc.

Pablo ogy yi Pedro jim Antioquía

¹¹ E jadu'n anajty miid ti n'ocnay'ayuc-huinjihuiyibich ixti coon Pedro ycidacy jim Antioquía. Chi jim nñi-maayich huinjijp co ti anajty jim Dios ytiy'ajt midundi-gooyi co puhuäctuutni je huídibi ca' yjudío-jāyity, ca' y'ocmídcaymujcni. ¹² Com co ca'ni anajty ymiñ jim Antioquía je judío-jāy ajcxy huídibi anajty tzomb ma Jacobo jim Jerusalén, chi Pedro miidcaymujcni je jāy ajcxy ca'p judío-jāyity. Co ajcxy ymiñ chooñ Jerusalén, chi Pedro oy puhuäctuutni je huídibi ca'p yjudío-jāyity, ca' y'ocmídcaymugaani anajty. Com Pedro tzigēyb anajty co ñi'ojñhuiy je judío-jāy huídibi minamb co ooy ycopicyity yajtiy'ajttihuipy tūg'ócy jāy ajcxy huídibi mibijccixp Jesucristo. ¹³ Co Pedro jadu'n oy y'idēch, chi je jacjadyii judío-jāy ajcxy huídibi anajty jāmip nañ tim jadu'n oy y'idētzicxy. Oy ajcxy janejhuiy tiy'ajt, e huädz cuydungixy. Ixti Bernabé nañ jadu'n y'idēch nej Pedro, com ca' anajty yjotmīcity. ¹⁴ E co ñich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ñich nñimaayich Pedro mayjāy'agujc: "Peni miich judío-jāy, e ti m'ixmajtzní judío-jāy ycostumbre co ti mibicy Jesucristo, e ti m'occuydumyib je huinma'ñ huídibi judío-jāy ca' cuydungixy, ¿nej tijy cham co adzip mdzachmi-naandāgy co yi' ajcxy huídibi ca'p yjudío-jāyity, copicy cuydūngixipy judío-jāy ycostumbre, huídijaty miich ti m'ixmajtzní?"

Yi judío-jāy ajcxy quipxyjaty miid jacpinjaty

¹⁵ Jadu'n njacnimaayich Pedro: "Ñich etz miich judío-jāy ñich ajt, huídibi ndaj'ajtim ndeedy'ajtim nañ judío-jāy. E ca' ñich ajt njadu'nity nej jāy ajcxy ca'pi yjudío-jāyity, huídibi ca' cuydungixy Dios ycōtujcín je jecyip huídibi Moisés yjayhuim. ¹⁶ Miich Pedro ñich ajt nnejhuüyim co jāy ajcxy ca' jēbi Dios yajpocyñihuächyii miid tim jēyi co ajcxy cuydungixy Dios ycōtujcín je jecyip huídibi Moisés yjayhuim. Co yi jāy ajcxy mibijccixy Jesucristo, huin'it janchtiy Dios yajpocyñihuätznyib ajcxy. Nañ tim jadu'n ñich ajt, ti nmibijcim je Cristo jigix jēbi Dios xyajpocyñihuaatzim. E ca' jēbi huaad Dios xyajpocyñihuaatzim ajt miid tim jēyi co ti nguyduunim Dios ycōtujcín je jecyip. Ca' ni tūg jāy huídijaty jēbi Dios yajpocyñihuächyii, miid tim jēyi co cuyduuni Dios ycōtujcín je jecyip."

¹⁷ Co ajt nhuinma'ñ nbidaacim co nmibijcim Cristo jigix Dios jēbi xyajpocyñihuaatzim, huin'it je judío-jāy yminaangixy co jibic-huinma'ñ nyajtuunim co ca' njac-cuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judío-jāy yminaangixy? Ca' yjadu'nity. Ca' jēbi huaad je Cristo xyajtundigooyim.

¹⁸ Co ixypy nmijpidaacim jadüg'oc Dios ycōtujcín je jecyip, je huídibi ti n'ixmajtzní, jada ixypy iixpejt'ajtp co ndundigooyim ma Cristo ytiy'ajt. ¹⁹ Jecy'ajty co nguydu-unich anajty Dios ycōtujcín je jecyip, huin'it ca' anajty nbaadyich tiy'ajt nej jēbi huaad Dios xyaj-

jpocyñihuaachich, e jadu'n nipaady nej jihuïy ti n'ögyich. Paady ycixpi ti n'ixmachich je jécyp cötujcin, e ti nmijpidägyich Jesucristo ytiy'ajt jigix jëbi njactzinäyich miid Dios ycixpi. ²⁰ Jadu'n nayjihuiyijich jadu'n nej jihuïy ti n'oc'o'cpich, jadu'n nej jihuïy ti ngru-udzpetyich quipxyi miid Cristo. Jadachambi ca' n'octzi-naayñich miid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñich njugy'ajtin. E jadu'n nej cham njactzinäyich miid ñich nninïcx, jactzi-naaybich miid Dios y'ung ycixpi, nmijpidacpich Dios y'ung. Dios y'ung ti yxchocyich ti xyjihuiyich, e ti nayy-oxyii naydogyii ma yi o'cin miid ñich nbocy ycixpi. ²¹ Ca' nniyajtigoya'ñich je may'ajtin je oy'ajtin huidibi Dios ti tuuñ miid ñich ycixpi. Co ixypy jëbi Dios xya-jpocyñihuaatzim miid co ajt nguydunim Dios ycötujcin jëyi, huin'it ixypy ti ñaadig'aty je Cristo co y'o'cy miid ajt nbocy ycixpi.

Je ycötujcin huidibi Moisés yejc o je mibijcin

3 Janch loci miich ajcxy migügtijc huidibi tzinaayb jim Gálatas naaxjot. Ti jäy ajcxy xyajhuinma'ñyidi-gooygixy miid jibic-huinma'ñ. Paady ycixp mdzach'ix-madzaangixy je Dios ytiy'ajt. ñich oy njacapxhuäcxyich ma miich ajcxy mhuinduu je tiy'ajt jadu'n nej Cristo ya-jcruudzpejt miid ñich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nminaanim co ti mguydungixy Dios ycötujcin je jecyip. ³ Co Dios oga'n yjihui'ñ xy'adigiiygixy xyjottigiiygixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñymooygixy. ¿Nej co cham miich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgimhuinma'ñ. ⁴ ¿Nej naadig'ixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücc'yi ti m'ixmájtzcixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiiygixy xyjottigiiygixy etz tuñ mijhuinma'ñ ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiiygixy xyjottigiiygixy etz tuñ mijhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuïy Dios yhuinmecxi ypocy, jigix jëbi y'ity tudägy ma Dios yhuinduu. ⁷ Jadu'n yjajty miid Abraham. Je' ymibijcy Dios, e yajpocyñihuaatzi Dios, jëbi ñaydijyii tudägy jäy ma Dios yhuinduu. ⁸ Dios jecy'ajty yajnihuinmayiiy co yajpocyñihuaadza'ñ je jäy ajcxy huidibi ca' yjudíoäyity, jëbi ajcxy ñaydijyii tudägy jäy ma Dios yhuinduu, miid co ajcxy mijpidägyip je may'ajt huidibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yi' huidibi ca' yjudíoäyity ypaadipy ajcxy y'alma nid-

zocin, com jadu'n Dios yminañ: "Miid miich tüg m'ap m'oc may'ajt oy'ajt nduna'ñich miid naaxhuiñyjäy ajcxy ycixpi." ⁹ Paady ycixpi jadu'n nej jäy ajcxy tüg'ocy pin-jaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadu'n nej may'ajt tuun miid Abraham.

¹⁰ Dios chaachytunamy jäy ajcxy miid ypocy ycixpi, pinjaty huinma'ñ tzachpidacp co y'alma ñidzocin padaangixy miid co cuydungixy Dios ycötujcin je jecyip. Com jadu'n jaybety ymiñ ma Dios ñecy: "Dios chaachytunamyb jäy ajcxy miid ypocy ycixpi, pinjaty ca' mijpidägy tüg'ocy Dios ycötujcin, etz nañ jadu'n pin-jaty ca' cuydundäy jada cötujcin." ¹¹ Jadachambi miid je ayuc huidibi ti nyajnijayiiygixy ma jada necy, jëbi miich ajcxy mnejhuñhuip co ca' ni pin jäy jëbi Dios ya-jpocyñihuaachyii miid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n ymina'ñ: "Yi jäy ajcxy pinjaty mibigip ñich n'ayuc, yi' ajcxy nyajpocyñihuaadzaamybich jëbi ajcxy y'alma paadip ñidzocin." ¹² Dios ca' jadu'n ymina'ñ ma yi' ycötujcin huidibi Moisés yjajhuim co jëbi nmijpidaacim, e huin'it Dios xyajpocyñihuaatzim. Hue' je' ymina'ñ ma ycötujcin co jëbi yxchaachytuunim miid ajt nbocy ycixpi. Com jadu'n ymiñ jaybety ma Dios ñecy: "Yi jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy."

¹³ Cristo xyñihuaanim xyajtzocim ma anajty Dios yxchaachytunaanim miid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxtzpejtp ma tüg cruudz, hue' anajty je' yco'ayooyb ypocy tiibi tuñ." ¹⁴ Cristo o'c je' miid ñich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuaniiy Abraham jecy'ajty, co may'ajt tuna'ñ miid yi' jäy ajcxy ycixpi huidibi ca'p yjudíoäyity, etz nañ jadu'n may'ajt tuna'ñ miid ñich ajt ycixpi, jigix jëbi ñich ajt nbaatim je Dios yjihui'ñ co nmibijcin je Cristo.

Je cötujcin huidibi Moisés yejc etz huidibi Dios y'ahuaniiy

¹⁵ Migügtijc ajcxy, ngapxticxaamybich jadu'n nej Dios ti tuñ miid tüg lixpejt nej jäy ajcxy ytuñ. Co ixypy tüg jäy necy yajcojy ma nigapxy jadu'n nej ypidägy yajhuima'ñ, e co yajcojtäy je necy, e chi firmijy, e nañ jadu'n je testigo ajcxy yfirmijy, huin'it ca' huaad pin-jaty nixigy yajxigy jada tiy'ajt, e nañ jadu'n ni ca' huaad yaj'ungy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tuna'ñ miid yi' ajcxy jëyi. Ca' nminaanim Dios y'ayuc ymina'ñ co Dios yaj'ahuaniiy Abraham co may'ajt tuna'ñ miid tüg'ocy yi' y'ap y'oc. Hue' je'Dios y'ayuc ymina'ñ co may'ajt tuna'ñ miid tügpajc yi' y'ap y'oc, je' je' je Cristo. ¹⁷ Dios ca' yi' nixigy yajxigy ytiy'ajt huidibi jayijp ymoy Abraham co yajniguejxy ycötujcin yi' Moisés. Co Abraham y'o'cy, ti anajty ñajtninïcxiiñi midaax migop'x ja'lipxmajc jimijt, chiini oy Dios möy

Moisés yí' ycötujcín. Tím jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'mañ, nañ tím jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ miid naaxhuiñyäjy ajcxy ycixpi. ¹⁸ Dios y'ahuaniiy yí' ytiy'ajt ma Abraham jecy'ajty co may'ajt tuna'ñ miid yí' y'ap y'oc ycixpi etz miid tüg'ociy naaxhuiñyäjy ajcxy ycixpi. Co ixypy jëbi jäy padaangixy y'alma ñidzoocín miid huidibi ajcxy ytumyb co ajcxy cuyduuni Dios ycötujcín je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajnihuádzip.

¹⁹ ¿Ti ycixpi Dios co moy Moisés je cötujcín huidibi ycojay? Hue' je' Dios moy jada cötujcín jigix jëbi nigüëxgy co jäy ajcxy ca' ycapxymidoogixy. Tunamb anajty Dios ycötujcín huidibi Moisés ycojay mabaad ti quexy ya naaxhuiñ yí' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcín hue' je' yajnigüejx Moisés miid ángeles ajcxy. E chi Moisés capxnajxy ma ymígügtijc ajcxy. ²⁰ Co Dios ti quexy yí' oybi y'ayuc ya naaxhuiñ miid y'ung, paady ycixpi Dios ca' tzocy co huingbi capxnaxipy yí' y'ayuc. Dios etz Dios y'ung tú'ciy yí'.

Tigixpi Dios je Moisés cötujcín yejc

²¹ ¿Nej mdijy ca' ñaybadyii yí' Dios ycötujcín huidibi Moisés ycojay, miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcín ma jëbi jäy ajcxy y'alma ñidzoocín padaangixy, huin'it ixypy jëbi nbocyñihuaatzim co ixypy nguyduunim yajxon jada cötujcín. ²² Ca' yjanchity co jëbi Dios xyajpocyñihuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundi-gooy, ac pocy ymiid ajcxy. Jadu'n Dios y'ayuc ymina'ñ, jigix jëbi Dios yajpocyñihuäch tüg'óciy pinjaty mijp-dacp Jesucristo, jadu'n nej yajnimay Abraham jecy'ajty co jadu'n tuna'ñ.

²³ Ca'ni anajty Cristo ymiñ ya naaxhuiñ, huin'it anajty Dios ycötujcín ytuñ, yajpocycäy jäy ajcxy, e ca' Dios yaj-comidooy jäy ajcxy ypocy. Jadu'n nej jihuüy jäy ixypy ypujxtijc'ñaaagixy e ahuijxcixy mina je juez ytiy-dunáanigixy. Jadu'n anajty n'ijtim jadu'n nej jihuüy nbu-jxtijc'ñaaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yí' judíojäy anajty miid ycötujcín huidibi Moisés ycojay. Tím jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuäch jäy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojcingix) yí' ytiy'ajt, paady ycixpi cham ca' n'oc'ijtim cuend'aty miid Dios ycötujcín huidibi Moisés ycojay.

²⁶ Com miich ajcxy ti mmijpidaaccixy Jesucristo ytiy'ajt, paady ycixp jëbi nidüg'óciy miich ajcxy naydijigixy Dios y'ung. ²⁷ Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy miid Cristo, jadachambi niducy m'ijtcixy miid Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy

etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi c'i'm nay'ane'mip, miich ajcxy yëydijctijc etz miich ajcxy töxyjäydic; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiyb Abraham y'ap y'oc, e huin'it jëbi mbáatcixipy tzinaydac jiiby tzajpjoy, je huidibi Dios yaj'ahuaniiy Abraham, Abraham y'ung y'anäg etz Abraham y'ap y'oc.

4 Cha jadüg iixpejt nyajnimäyich miich ajcxy huidibi capxticxp Dios ytiy'ajt. Tüg comeeñyäjy ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajniñicy huidibi jëbi cuend'aty je pidägy etz je pi'c'anäg mabaad paady je tiempo mina yc'idigihuiigy je pidägy. Je comeeñyäjy y'ung com co anajty ca'ni yeegy, ane'my anajty y'ity, tím jadu'n nej ane'my y'ity je jäy huidibi midumb. ³ Tím jadu'n nej je comeeñyäjy y'ung anajty y'ity ane'my, nañ tím jadu'n ñich yí' judíojäy ajcxy ane'my anajty n'ijtcixyich co anajty ca' tiydudägy naydijiygixyich Dios y'ung. ⁴ Co oy Dios yajhuaad'ajtni, chi oy quejxni y'ung ya naaxhuiñ. Yí' y'ung ma'xung'ajt judíojäy, jigix jëbi codinäy jäy ajcxy ma Dios ycötujctac. Nañ jadu'n yí' ma'xung'ajt judíojäy jigix jëbi yajpocyñihuäch yí' jäy ajcxy huidibi ti yajpocycähüigixy Dios ycötujcín huidibi Moisés ycojay. Dios ti quexy y'ung jigix jëbi xycodi-naayim miid ajt nbocy ycixpi, e jadu'n Dios jëbi xycöbijci jadu'n nej jihuüy xyc'i'm'ung'ajtim.

⁶ Jadachambi miid co naydijim Dios y'ung, paady ycixp Dios ti xy'adigiyim ti xyjottigiyim yí' yjihui'ñ ymic'ajt, paady ycixp ajt minaanim co Dios ajt nDeedy'ajtim etz nminaanim: "¡Padre Nuestro!" ⁷ Miid co miich ajcxy ti mmibijccixy Jesucristo, jadachambi ca' ane'my m'oc'ijtcixyñi ma Dios ycötujcín je jecyip, jadu'n nej je jäy ytumbidijc miidity ane'my. Paady ycixp jëbi Dios xymóogixipy jugy'ajtin huidibi ca' ycixipy yti-goyipy, jadu'n nej Dios miidity jugy'ajtin. Jadachambi miich ajcxy Dios xy'ung'ajt, etz jëbi mbáatcixipy pidägy ma Dios.

Pablo yjotmaybaady miid je mibijcpidijc ycixpi

⁸ Jecy'ajty ca' anajty mnejhuüygixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt miidity. E ca' anajty m'ojadajtcixy je Dios tza-jpjoytuidibi mic'ajt miidity. ⁹ Jadachambi ti mnejhuüygixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuibidaangixy yí' judíojäy ycötujcín, ca'p ti mic'ajt miidity, huidibi ti m'ijxmajtcixy? E jadüg'oc xy'ane'myigixy je judíojäy ycötujcín.

¹⁰ Jadachambi mdzachcuydunaangixy judíojäy ycostumbre, jadu'n nej ajcxy myajmij'ajtcixy xiibo' xiijimijt.

¹¹ Huinmaaybich ooy miid miich ajcxy ycixpi co naadigë ti nyaj'ixpicyich miich ajcxy. Ninigoob ayoohua'ñ ñich ndung ma miich ajcxy.

¹² Migügtijc ajcxy, cham may'ajt nbjctzooyich ma miich ajcxy. Yajtüggygix yí' mhuinma'ñ jadu'n nej ñich nhuinma'ñ. ñich ti nyajtüggyich nhuinma'ñ miid miich ajcxy mhuinma'ñ co ti n'ixmachich yí' judíojäy ycostum-

bre. Je taab anajty n'ityich miid miich ajcxy, ca' miich anajty ajcxy ñch n'ayuc xyjijpcogapxñyi. ¹³ Miich ajcxy mnejhuñyb co anajty n'ityich ma miich ajcxy, pumäy ñch anajty nyajpaady miid yuu pa'm ycixpi, paady ycixp ñch jim jecy nhuäcxijpyich, ngapxhuäcxyich Jesucristo ytiy'ajt je jayijp'aty. ¹⁴ Miid ñch nba'm ycixpi ooy n'adzi-jpy miich ajcxy ma mjñn mdiic, e miich ajcxy ca' ti xy'ix-tijy e ni ca' miich ajcxy xymidzjipich. Jadu'n ñch miich ajcxy xycöbijcy aguic jotcuic, tim jadu'n nej ixyipy ti mgöbijccixy Jesucristo ci'm. ¹⁵ Jadachambi zti ti ytunyii ti yjadyii co ca' mmijotcuic'ajtcixy ñch n'ayuc? Com nye-jcñch tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgñ'm huiin anajty ajcxy mjajajpidzimaangixyp etz xymöhuaangixyich anajty co ñch ngaa'a'ixiy. ¹⁶ zNej ñch ti n'ahuimbityich miich ajcxy mmidzip miid co ti nyajni-maaygixy huidibi janchip?

¹⁷ Yi huindzindijc jim ma miich ajcxy huidibi xy-chachyaj'ixpijccixp huidibi ca' ytiy'ajtity, ca' ajcxy oy-huinma'ñ miidity. Hue' ajcxy tzachtzocy co miich ajcxy m'ixmájtzcixp ñch n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ ñch njajotcuicich jadu'n co huingbi huindzin ajcxy jébi xyaj'ixpijccixy. Ni-goobi co ixyipy jébi ajcxy m'oy'ajtin mbaatcixy. Ca' oy copicyity co ñch ci'm miich ajcxy nmñd'ijttñhuipy. ¹⁹ Migügtijc huidibi ooy ndzocy njihuñyich jadu'n nej jihuñy ngñ'm'ung'ájtigixy, ooy tzaachypi ndzachjihuñyich miid miich ajcxy ycixpi jadüg'oc. Jadu'n tzaachypi njihuñyich jadu'n nej ungdaj tzaachypi jihuñy co y'ung yajma'xung'ada'ñ. Njihuhuaamybich tzaachypi ixti cooni miich ajcxy anajty Cristo mhuinma'ñ xyaj'oyñyi. ²⁰ Ooy ñch njanay'ixpada'ñyii ma miich ajcxy cham cham. Njamñdcapxaangixy njamñdmñydägaangixy, chi ixyipy tiy'ajt njacyajni-maaygixy jac huädz. Ooy ñch ndajy nmayich miid miich ajcxy ycixpi, nej n'ocjacni-maaygixyipy.

Je Agar etz Sara y'ijxpejt

²¹ Miich ajcxy huidibi mdzachcuydunamyb Dios ycötujcin je jecyip. Nmñmaaygixy ajcxy, znej ca'ni ajcxy mi-doogixy huidibi Dios ycötujcin nigapxypi? ²² Com Dios y'ayuc huidibi jaybetyip jadu'n ymina'ñ co Abraham ymiid anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' miid ymic'ajt ypi'c'ajty, Dios ycuyluun y'ayuc huidibi yajhuinhuanñy Abraham. ²⁴ Jada jihuiim-bit ayuc jadu'n yhuimbizimyb: jada Abraham ytöxyjäy ajcxy metz ijxpejt'ajtp jadu'n nej Dios ti ytuñ miid yi'yjäy. Je ypödumbi huidi anajty yxiñ Agar, yi' miid yquipxñy yi Dios ycötujcin huidibi Dios ymoy Moisés ma je cop huidi yxiñ Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadu'n nej tüg comeeñyjäy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cö-

tujcin. Agar je töxyjäy huidibi anajty pödumb, je' miid yquipxñy yi judiojäy huidibi tzachcuyduungixp Moisés ycötujcin, etz nañ yquipxñy miid Dios y'it ya naaxhuiñ jim Jerusalén. Yi judiojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'ity ma jada cötujcin, tim jadu'n nej jäy ajcxy huidibi tumb ma comeeñyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, yi' miid yquipxñy ñch ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'ñ oybi ma Dios, com Dios jadu'n ymina'ñ:

Jotcugñ' jadüg'oc miich Sara huidibi ca' y'ungbaady. Xic yäx miich miid jotcuic'ajtin, miich huidibi ca' ungmoy. Nigi ymayñhua'ñ miich m'ap m'oc ca'ydñ Hagar y'ap y'oc.

²⁸ ñch ajt huidibi nmñjidaacim Jesucristo tügñyim miid Abraham ymang Isaac. Com jadu'n nej Dios cuyduun y'ayuc huidibi yajhuinhuanñy Abraham co Isaac yma'xung'ajty, nañ tim jadu'n Dios cuyduun yi' y'ayuc miid ñch ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuanñyi Abraham; nañ tim jadu'n yi jäy ajcxy huidibi tzachcuyduungixp Dios ycötujcin je jecyip, ooy ajcxy tzach midzip'adyii yi jäy ajcxy huidibi mñbijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdiic je mbödumbi miid ymang. Com ca' jadu'n ytiy'ajtity co je pödumbi ymang paadipy miich mbidägy. Yi' je' padamb je mbidägy huidibi miich mdöxyijc ymang'ajtpy.

³¹ Migügtijc ajcxy, ca' ñch ajt n'ocjadu'niñ nej je pödumbi y'ung y'anäg ajcxy huidi ane'my ijtp. Jadu'n ñch ajt nipaady nej Abraham ytöxyijc y'ung y'anäg huidibi ca' y'ane'my y'ity.

Cristo ti xyajnihuatxim ma je cötujcin huidibi Moisés yejc

5 Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jébi tzojcingñx nguyduunim yi' ytiy'ajt. Mñbijccixy tiydudägy Cristo ytiy'ajt, ca' m'ixmajtzcixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeeñyjäy ytumbi ajcxy y'ijtcixy ane'my.

² Amñdoo'ijtcix ñch n'ayuc. Jadachambi ñch Pablo mi-naambich pen miich ajcxy mgöbigamyb jada ayuc co copicy myajtiy'ajtñhuipy, huin'it ñaadigñ'ada'ñ co mñbijccixy Jesucristo ytiy'ajt. Ca' Jesucristo may'ajt tuna'ñ miid miich ajcxy pen jadu'n m'ididza'ñ. Jadüg'oc nmñna'ñich co pinjaty jadu'n ycuyluunamyb tüg Dios ycötujcin, copicy ycuylundähuipy tüg'óciy. ⁴ Pen mjijp'ijxyp ajcxy co Dios xyajpocyññhuätzaangixy miid co mguyduungixy tüg Dios ycötujcin, jadu'n nipaady nej jihuiñy ti m'ixmajtzcixni Cristo y'ayuc ytiy'ajt. Pen ca' mñjipidaaccixy je may'ajt oy'ajt huidibi Cristo ti tuñ ninigoob miid miich ajcxy ycixpi, huin'it ca' Dios xyajpocyññhuätzcixipy. ⁵ Njijp'ijxim co Dios xyaj-

jpcyñihuädzaanim jigix jëbi naydijim tudägy ma Dios yhuinduu miid co nmibijcim Cristo etz miid co je Espiritu Santo xypubejtım. ⁶ Co nmibijcim ajt Jesucristo, Jesucristo ca' cuendituñ pen ti nyajtiy'ajttiıym o pen ca'. Jëyi yi' tzocy co naychojcm nayjihuiıym nidüg nidüg, e jada je' je iixpejt co nmibijcim yi' ytiy'ajt.

⁷ Jayijp'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiıygixy co ca' mgapxymidohuaangixy tiy'ajt? ⁸ Yi jäy ajcxy huidibi ti xy'agapxiıygixy ca' ajcxy tiy'ajt patcixy ma je Dios huidibi ti xyhuin'ijxim jigix jëbi nmibijcim Cristo. ⁹ Miich ajcxy mnejhuııyb co jäy pıdaaccixy levadura ma harina jıch je levadura yajtiıyiydaayb je jıch. Nañ tim jadu'n jada anıñ huidibi jäy ajcxy ti pıdaaccixy ma miich ajcxy yajtiıyidähuamayb miich ajcxy mjot mhuinma'ñ. ¹⁰ Com iich nmibijcpıch co ajt je nHuindzin Jesucristo oyhuinma'ñ xymöhuıpy ajcxy, paady ycıxp njijp'ijxypıch co miich ajcxy mmibıgaamyb iich ngapxy iich n'ayuc. Dios chaachytunıpy je jäy ajcxy huidibi ti xyajhuinma'ñydygooyıxy. Oy ooy yjamıy yjanchity ajcxy, ca' ytimyñéjity, Dios yi' ajcxy tzaachytunııb.

¹¹ Migügtıj ajcxy, co ixyıpy yjanchity co iich ngapxhuäcxıych co copıcy nidüg'öcıy jäy yajtiy'ajttiıhuıpy, ¿nej co je'ni chambaad judıojäy xychach'ixhuidityıch xychachpahuidityıch? Pen ca' ixyıpy xy'ixhuidityıch xypahuidityıch jadu'n nıpaady nej jıhuıy nyaj'ixpıcyıch co je Cristo ca' y'o'cy miid iich ajt nbocy ycıxpı. ¹² Yi' huıdı ajcxy xyajhuinma'ñydygooyıxyp, ooy ixyıpy y'oyıty co ixyıpy ajcxy xypuhüäctuatni tüccıyı.

¹³ Dios miich ajcxy ti xymıjhuoogıxy ma yi' ytiy'ajt jemıybı jigix jëbi m'ixmájtcıxnı je Dios ycötujcin je jécyıp, etz tzojıngıx mıjpidägıpy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungıxy je jıbcıpi hidibi mjot mhuinma'ñ chachıjot'ajtcıxpy. Hue' a'oy naymı'oyjäy'ajtıgıx nidüg nidüg, naybubéjtıgıx mıñ xyıpy. ¹⁴ Dios y'ayuc ymına'ñ: "Mı'oyjäy'adıpy mmıjın mmıdıjı, tim jadu'n nej miich ajcxy mdzocy co mmıjın mmıdıjı xymı'oyjäy'adıpy." Co jadu'n ajcxy mnaymı'oyjäy'adıyb mıñ yxıpy, ytimyñıpatyp jadu'n nej jıhuıy ti mguydundäy tüg'öcıy je Dios ycötujcin. ¹⁵ Pen miich ajcxy mnaymidundıgooyıp etz mnaymıjotma'tıp mıñ xyıpy, ca' yjetyıty co cı'm anajty jadu'n mdzachnayıajhuinma'ñydygóoyıgıxy mıñ xyıpy.

Je jugy'ajt hidibi yi Espıritu Santo yejcpy

¹⁶ Jada capxhuijin iich miich ajcxy nyajnijayıyb. Cuychınaaygıx je Dios ytiy'ajt jadu'n nej je Espıritu Santo xyhuinma'ñymooyıgıxy ajcxy. Ca' mguyduungıxy je jıbic-huinma'ñ hidibi mdzachnijot'ajtcıxyp cı'm. ¹⁷ Je jıbic-huinma'ñ hidibi mdzachnijot'ajtcıxyp, hue'ymıdızip'ajtpy je oybi huinma'ñ hidibi je Espıritu Santo xymooyıgıxp. Dios y'ayuc obyı ca' ñaygodıgıyıı miid miich ajcxy mjıbic-huinma'ñ. Paady ycıxp miich ajcxy ooy mjacuydunaangıxy Dios y'ayuc, e ca' ajcxy mmımadäga'ñ ñıcxı mguydundaaygıxy. ¹⁸ Pen tzojıngıx mguyduungıxy je Cristo ytiy'ajt hidibi Dios yjıhuı'ñ xymooyb ajcxy, huin'ıt ca' copıcy mguydüngıxıpy Dios ycötujcin je jecyıp.

¹⁹ Com nnejhuıydaayım jadu'n nej jäy ajcxy yjot yhuinma'ñ tzachnijot'ajtcıxy jıbcıpi. Jadu'n nej yëdyjıctıjıtzachmıgapxtıgıyaaangıxy töxyjäydyjı; e nañ jadu'n nej töxyjäydyjı ajcxy ooy yëdyjıctıjıtzachmııdügangıxy etz miid'edzaangıxy etz ma yjıııbi jı ajcxy yhuinma'ñydygooyıgıxy. ²⁰ E nañ nnejhuııym jadu'n nej jäy ajcxy tzach'ojadajtcıxy tzachhuıngoxtınaaygıxy je hidibi jäy ajcxy cı'm ti yajcojy, etz nej jäy ajcxy tzach'ojadajtcıxy tzachyajtunaangıxy caxpojcpıdıjı, nej jäy ajcxy ymıgüg tzachmıjotma'tcıxy; nej jäy ajcxy ca' tzıp yjot'ambıjccıxy miid yınjaty huenjaty ayuc; nej jäy ajcxy tzachmıdızip'ajtcıxy ymıgügıjı; nej jäy ajcxy tzachyajca'oy'ıjıcxı ymıgüg co tijaty miıdıty; nej jäy ajcxy chachnaybjıch-huäcxáanıgıxy, hidibi abıcy tzachmııd'adamb yjäy. ²¹ E nañ nnejhuııym jadu'n nej jäy ajcxy abıjctıgıhuaangıxy tijaty ymıgüg ymııd; nej jäy ajcxy ymıgüg yaj'o'ccıxy; nej jäy ajcxy nijot'ajtcıxy ügıı etz adzuuhıdııı agoodzhıdııı, etz yi' jäy ajcxy hidibi tzachnijot'ajtcıxp yi' jadu'mbi huinma'ñ. İch miich ajcxy cham njacyajnımaaygıxy jadu'n nej iich jayıp'aty ti n'ocnıgapxıch, co yi' jäy ajcxy hidibi yi' jadu'mbi jıbcı-huinma'ñ chachnijot'ajtcıxp jadu'n nej cham ti nijayııygıxy, ca' ajcxy tznıyadac paadaangıxy ma Dios y'ane'my.

²² Hue' ajt jadachambı nejhuıydaayım je oybi huinma'ñ hidibi Espıritu Santo yejcpy. Co yi' jäy ajcxy hidibi ymııd Dios yjıhuı'ñ ymıc'ajt ma yjot yhuinma'ñ, hue' ytungıxyp ajcxy yi' oyjäy'ajtıı miid ymıgügıjı; miid ajcxy xondaacın etz miid ajcxy jotcuıc'ajtıı; etz ymımecxtujcıxyp ymıgügıjı; etz chojccıxyp yjıhuııygıxyp ymıgügıjı; etz ytungıxp oybi; etz tudägy yjäy'ajtcıxyp, ²³ nıcy xeemy yjäy'ajtcıxy ma ymıgügıjı; etz cı'm yajxon ñay'ané'mıgıxy ma yi' oybi. Ca' jı huıngbı cötujcin hidibi jada oybi huinma'ñ jıpcogapxıhuıpy. ²⁴ Tüg'öcıy jäy ajcxy pınjaty Jesucristo Huındzin'ajtp, mımadacpy ajcxy yi' jıbcı-huinma'ñ hidibi cı'm nijot'ajtcıxyp miid Cristo ymıc'ajt. ²⁵ Miid co nmııd'ajtıı je Espıritu Santo ymıc'ajt ma ajt ndzınaayın njugy'ajtıı, paady ycıxp tzoc tznıaayım jadu'n nej xy'ane'mıım xyhuinma'ñymooyım je Espıritu Santo.

²⁶ Ca' huaad amıy agıx ndzachnayjıhuııym, etz nañ jadu'n ca' huaad nmıgügıjı nyajjotma'tım; etz ca' huaad ni ti nyajca'oy'ıjıım.

Naybubéjtıgıxy mıñ xyıpy

6 Migügtıjı ajcxy, pen mbatpy tüg mıgüg hidibi jıbcı-huinma'ñ ti ymımadägyıı, miich ajcxy hidibi mımadacyp yi' jıbcı-huinma'ñ miid Dios ymıc'ajt mbubéjtıcxıpy jada mıgüg, e co mbubéjtıcxıpy jada mıgüg, nıgı jotmıc mmıgapx miid oy gapxy oy ayuc. Naygüend'adıı ajcxy cı'm, ca'ydı jıbcı-huinma'ñ xymımadaaccıxy. ² Naybubéjtıgıxı nidüg nidüg pınjaty ayo'n jotmay miid. Co jadu'n mdüngıxıpy, hue' anajty ajcxy mguyduungıxyp Cristo ycötujcin hidibi ti xymooyım ajt.

³ Pen jı pın ñayjıhuıyıı amıy agıx etz chach naygömayanııı cı'm co chach y'oyjäyıty, ca' je' choobaady ma Dios yhuınduu. ⁴ Jëbi nidüg nidüg jäy ñayjıhuı'ñyıbıgyıı nej chınäy yjugy'aty, pen oy o penı ca'y'oyıty. Penı ycuı-

chinaayb yajxon Dios ytiy'ajt oybi, jotcuje ñayjihuñhuñyb je' cí'm e ca' huaad yajquixy chinaayin mñid huingbi. ⁵ Nidüg nidüg jäy cí'm chinaayin jébi yajnicxy nej Dios jäygidägy. Ca' huaad ni'ijxtüdy nej ymígüg jibic-huinma'ñ mñidty.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzin tñibi yaj'ixpiyii.

⁷ Ix ajcxy cí'm mnayhuin'iingix com Dios ca' yi' ni pin huaad nixigy yajxigy. Com pen miich ajcxy jibic-huinma'ñ mdumyb, Dios xychaachtunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espíritu Santo huinma'ñ ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espíritu Santo möhuiib. ⁹ Pení nduunim jabom jabom oy huinma'ñ ca' huaad ndzi-jpim, jébi nmecxtujcim ixti cooní anajty nbaatim oybi ma Dios. E ca' huaad njotmetzciiyim. ¹⁰ Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyim. Nigi tzoc pubejtim nmígügtijc huidibi mibijcp mijpidacp Cristo.

Ane'min, capxhuijin etz capxpocxin huidibi cijxnip je necy

¹¹ Ijxcix huindicxcix jada letra mijjatypi huidibi ñich cí'm njaayb, com ndzojcpyich co mnejhuñyigixipy nej yam nijayiyigixy. ¹² Yi jäy ajcxy huidibi mibijcp co Cristo o'cy ma yi cruudz mñid ajt nbocy ycixpi etz nañ jadu'n

mijpidacp yi tiy'ajttñhuii, hue' ajcxy tzach ñaygö-mayaanigixy ma yi judíojäy ajcxy, jigix ca' pin y'ixhuididiiyb ypahuididiiyb. ¹³ Yi huidi ajcxy tzach mijpidacp tiy'ajttñhuii, nañ ni ca' ajcxy cuydudäy tüg'óciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajttñhuiip jigix ajcxy jébi ñaygömáayigixy mñid co miich ajcxy ti myajtiy'ajttñyigixy. ¹⁴ Yi jäy ajcxy huidibi jim yaj'ixpijcp anii, cí'm ajcxy chach ñaygö-mayaanigixy. Per ñich ca' jadu'n naygömaya'ñyijich mñid huidibi ndumybich huidibi nyaj'ixpijcpyich. Hue' janchtiy ngapxpadaamybich ñich ajt nHuindzin Jesucristo ytiy'ajt, jadu'n nej yajcruudzpejti mñid ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyjäy yjibic-huinma'ñ. E paady cham ni nga'ocnijot'ajtnich yi jibic-huinma'ñ. ¹⁵ Co nmibijcim Jesucristo, oy ixipy ti nyajtiy'ajttñyim o oy ixipy ca' ti nyajtiy'ajttñyim, ca' ma choobaady. Huidibi tzoubatp yi' je' co nmibijcim Jesucristo, etz co nmñid'ajtim jemybi jot huinma'ñ. ¹⁶ Huen Dios xya-jjotcugñhuiipy etz xypa'ayoohuiipy, etz nañ jadu'n yajjotcugñhuiipy etz pa'ayoohuiipy nidüg'óciy jäy huidijaty cuydumb Cristo ytiy'ajt, tüg'óciy Dios yjäy janchypí tiydudägyipi.

¹⁷ Jadu'n nej jadachambi, etz jadu'n nej xii tiempo jacmiimb jaccidaacp, ca' ñich pin huaad xyjac'amayiyich, com nmñidich je tiy'ajt ma nninixich jadu'n nej jäy ajcxy ti xyhueenduñich ti xychaachtuñich mñid co ti nduñich mñid Jesucristo ycixpi.

¹⁸ Mígügtijc ajcxy, huen ñich ajt nHuindzin Jesucristo tunipí nigi may'ajt oy'ajt ma miich ajcxy. Jadu'n jada ngapxycixyich. Amén.

EFESIOS

1 İich Pablo, Dios jadu'n tzojcp co Jesucristo ti xya-jnibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtíp, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugñhuip ajcxy.

Nej je Espíritu Santo conucxy Cristo yjäy

³ Tzoc ñbaatim capxpaatim Dios ñich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tza-jpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huädz oy njot nhuinma'ñ, ca' ti bocy nmïd'ajtim. ⁵ Miid co Dios ooy xychojxim xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyïy, co xycöbigaanim nejjihuïy yci'm y'ung. Co Dios jadu'n quejxy je Cristo ya naaxhuingíxy, chi yi' yaj'oyïy nej jëbi xycöbixcim nej yci'm y'ung, e jadu'n xymiid'adaanim tzejpjoty. Dios jadu'n ytuñ jadu'n nej yi' anajty tzocyin. ⁶ Tzoc ñbaatim capxpaatim Dios ooy miid co mijmay'ajt mij'oy'ajt tuuñ miid ñich ajt ycixpi, co quejxy y'ung ya naaxhuiñ miid ñich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiy. ⁷ Miid co Dios ooy xychojxim xyjihuiyim paady ycixpi yi' y'ung ñi'py teemy yojcy co y'o'cy miid ajt nbocy ycixpi, ti ajt n'alma xyajnid-zoocim etz nbocy ajt ti xyhuinmeecxim. Co jadu'n ytu-ñ, chi Dios mijmay'ajt mij'oy'ajt tuuñ miid ñich ajt ycixpi. ⁸ Co Dios jadu'n mijmay'ajt mij'oy'ajt tuñ miid ñich ajt ycixpi, ti xyajhuinjhuïyim ti xyajnejhuïyim yi' ytiy'ajt yi' yhuinma'ñ. ⁹ Dios yjäygidacpy jadu'n co ti xyajnejhuïyim nej anajty miidity capxcöducy huidibi ca' pin jecy'ajty huinjhuïy. Nañ jadu'n Dios ti xyajnejhuïyim nej ti yhuinma'ñypidacy jecy'ajty nej ytuna'ñ anajty miid Cristo. ¹⁰ Je huidibi Dios jecy'ajty ti yajnihuinmayïy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayïy anajty co pidäga'ñ tüg'óciy huidi yajpatp tzejpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jilby tzejpjoty etz ya naaxhuiñ Dios jayijp capxcöduj. İich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty

tim jadu'n nej Dios jayijp capxcödujcy, e Dios ytumyb jadu'n nej yi' tzocy etz nej jäygidägy. ¹² Jadu'n Dios cuydumyb miid ñich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmïdooy je ayuc tiy'ajt nej jëbi m'alma ñidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espiritu Santo huidibi Dios y'ahuanïy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajnidzöga'ñ pin-jaty yjäy'ajtíp ajcxy. Jadu'n Dios tuna'ñ, jigix jëbi ñich ajt n'ñbaatim ngapxpaatim Dios miid y'oy'ajtin ycixpi.

Pablo mibijctzoy Dios co huen ajcxy yajmoy huij'ajt cujc'ajt

¹⁵ Com ti nnejhuïyich jadu'n nej tiydudägy miich ajcxy ti nmibijccixy ñich ajt nHuindzin Jesús, e nañ jadu'n ti nnejhuïyich jadu'n nej mdzojccixy mjihuïygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidacim ma Dios miid miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je xpijcin huidibi je Espiritu Santo yejcpy, etz nañ jadu'n xyajnejhuïhuipy xyajhuinjhuïhuipy ajcxy jac'oy yi' y'ayuc, e tüg'óciy nej yi' ti ytuñ. ¹⁸ Dios nmibijctzooybich miid miich ajcxy ycixpi, co xyaj'anïyip ajcxy mjot mhuinma'ñ miid yi' ytiy'ajt, jigix jëbi mnejhuïygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuïygixy nej ymijity yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtíp. ¹⁹ Dios nmibijctzooybich jigix jëbi ajcxy mnejhuïhuipy jadu'n nej Dios ymic'ajt miidity. Je' ymic'ajt ca' ycixipy ytigoyipy, e ni pin ca' quipxipy. Etz yi' ymic'ajt tumb ma ñich ajt njot nhuinma'ñ nidüg nidüg co ajt nmibijcim. Dios ti xyajnejhuïyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jilby tzejpjoty. Yi' iñaa'yb a'oy'amy ma Dios ymijc, etz ane'mdäy tüg'óciy naaxhuiñ etz tzejp quipxyi miid Dios. ²¹ Cristo jac mij'ane'min ymiid, jac mic'ajt miid, ca'ydi jacpinjaty huidibi yajajpatp tzejpjoty, etz

huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigí, ca'ydí jac pin huidibi cham tzinaayb, etz huidibi jacjiini tzinähuaamni. ²² Dios ti pidägy tüg'óciy ane'min ma Cristo jébi ane'mdäy. Jadu'n nipaady nej jihuiy Cristo nihuäcejtäy tüg'óciy ane'min. E nañ jadu'n Dios ti pidägy Cristo jigix jébi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinix, paady ycixpi yí' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'px-taayb tüg'óciy tijaty ji ajtp.

Dios chojpcy yjihuiyb jäy ajcxy, paady ñidzoocixy y'alma

2 Ca'ni miich anajty ajcxy mmibijccixy Cristo, ooy anajty mdundigooygixy mïd Dios ytiy'ajt, ooy anajty ajcxy mbocymïdity, e jadu'n nipaady nej jihuiy ti m'o'ccixy mïd mbocy ajcxy ycixpi etz Dios xyajjugypijcixy huinjemy mïd jemybi jugy'ajtin. ² Co ca'ni anajty miich ajcxy mgöbjiicixy mmijpidaaccixy Cristo, ooy anajty mguydungixy naaxhuiñjyä ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yí jäy ajcxy yjot yhuinma'ñ huidibi ca' capxymidoogixy Dios. ³ Ma je tiempo tibi ñaxy, nañ jadu'n anajty ndzi-naayim jadu'n nej yí jacjadyii naaxhuiñjyä ajcxy huidibi capxymidoob yí ca'oybi. Ngapxymidoohuim anajty nninix chojcin. Ndundigooyim anajty mïd ngi'mjot ngi'mhuinma'ñ. Nguipxyiyim anajty mïd yí jacjadyii naaxhuiñjyä ajcxy huidibi Dios tzaachytunaanip mïd ypocy ycixpi, etz nañ jadu'n nmihuaad'ajtim co Dios xychaachytuunim mïd ajt nbocy ycixpi. ⁴ Oy ixipy ñch ajt mihuaadity tzaachypí mïd ajt nbocy ycixpi, per Dios mij ooy ti xypa'ay-oohuim, e mij ooy ti xychojcin ti xyjihuiyim, paady ycixp tuuñ may 'ajt mïd ñch ajt ycixpi co yajjugypijc je Cristo. E jadu'n quipxy mïd Jesucristo ñch ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ mïd ñch ajt ycixpi co anajty nbadaanim o'cin mïd ajt nbocy ycixpi. Mïd co Dios may'ajt oy'ajt tuuñ mïd miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcim quipxy mïd Jesucristo, paady ycixp Dios xymöhuaanim it lugar jiby tzajpjoty quipxy mïd Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jébi tiy'ajt nmiid'ajtim jadu'n nej Dios xychojcin xyjihuiyim etz xypa'ayoohuim mijcajee, etz mijmay'ajt mij'oy'ajt tuun mïd ñch ajt ycixpi co nyaj-paatim ma Cristo. ⁸ Mïd co Dios miich ajcxy ti xychoj-cixy ti xyjihuiygixy, paady ycixp yí m'alma ajcxy ti patcixy nidzoocin co ti mmibijccixy Jesucristo. Ca' nmi-naanim co tijaty ti mdungixy, paady ycixp yí m'alma ajcxy ti patcixy nidzoocin. Hue' janchtiy Dios ti xy-mooygixy ninigoob ajcxy m'alma ñidzoocin. ⁹ Ca' nmi-naanim huin'it jäy ajcxy y'alma nidzoocin paadip co oy-bi tungixy. Hue'janchtiy Dios jadu'n c'm ti yaj'oyiyi ninigoob nej jäy ajcxy jébi patcixy y'alma ñidzoocin, jigix

ca' pin jébi huaad amij agix ñayjihuiy. ¹⁰ Com Dios c'm ti oyduñ ñch ajt njemybi tzinaayin jugy'ajtin mïd je may'ajt huidibi Cristo ytuun co y'o'cy mïd ajt nbocy ycixpi. Jadu'n Dios tuuñ mïd ñch ajt ycixpi, jigix jébi nduunim oyjäy'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yí' tzocy co nduunim oyjäy'ajtin.

Jotcujc cham n'ijtim mïd Dios, com Cristo xyajpcy-huaatzim

¹¹ Jadu'n miich ajcxy ocjäymejtzcodii nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäyity, e ni ca' miich anajty ajcxy myajtiy'ajttiygixy nej huaad mnyadjiigixy Dios yjäy. Paady ycixp yí judíojäy ajcxy ymina'ñ co Dios je' yjäy ajcxy, e miich ajcxy ca', mïd yí'da'ajty co miich ajcxy ca' myajtiy'ajttiygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbjiicixy, etz ni ca' anajty mbadaangixy huidibi Dios y'ahuaniiy ma yí judíojäy ajcxy, etz ni ca' anajty ti mijip'ixcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo mïd co yí' ñi'py teemy yojcy mïd miich ajcxy mbocy ycixpi. ¹⁴ Jesucristo c'm yaj'oyiiy je tzip je capxy nej anajty ñch ajcxy judíojäy etz miich ajcxy huidibi ca' yjudíojäyity nymidzip'ajtim, e cham jotcujc n'ijtim. Jesucristo c'm yajtigoy je judíojäy ycötujcin huidibi anajty tzipcojp capxycojp ma ñch ajcxy etz ma miich ajcxy. Jesucristo yajtügmuyc judío-jäy, etz huidi ca' yjudíojäyity. ¹⁵ Jesús mïd yci'm ninix yajtigoy je jecy'ajtypi cötujcin co oy yaj'ögyii cru-udzcixy. Co Jesús y'o'cy, huin'it yajtügmuycy judíojäy etz huidibi ca' yjudíojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcixy yajmay je tzip capxy. ¹⁶ Co Cristo oy yaj'ögyii cru-udzcixy, huin'it yajcixy yajnajxy je tzip capxy jadu'n nej yí judíojäy anajty midzip'adyii yí' ajcxy huidibi ca' yjudíojäyity. Etz nañ huin'it Cristo yajtügmuycy yí judío-jäy mïd huidibi ca' yjudíojäyity. Paady ycixp Dios ycöbi-ga'ñyii judíojäy ajcxy etz huidibi ajcxy ca' yjudíojäyity agujc jotcujc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jébi ajt nbaatim jotcujc'ajtin ma Dios. Ycapxhuäcxyp anajty ma miich ajcxy huidibi ca' yjudíojäyity, huidibi ca' anajty mïdity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ñch ajcxy judíojäy huidibi jamïd anajty Dios ytiy'ajt. ¹⁸ Mïd co Cristo may'ajt ti tuuñ co xy'adigiim xyjottigiim Dios yjihui'ñ ymic'ajt, paady ycixp nidüg'óciy ñch ajt nyajpaatim ma Dios jadu'n nej tügpicy jäy, tanto judío-jäy etz nañ jadu'n huidibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzi-naaybi ajcxy. Paady ycixp tú'ciy miich ajcxy mnyagomajtzigixy ma Dios mïd judíojäy ajcxy. Jadu'n miich

ajcxy etz judíoŷäy ajcxy nipaady cham nej jihuüy ajcxy mdügjuugy mdügmüg. ²⁰ Miich ajcxy ti mmijpidaac-cixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxiüybi ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy.

²¹ Dios jadachambi tiempo ycojyp ymacxyp jadügpicy jäy huidibi yjäy'adaanip huidibi tügjiip mijpidaaccixy Cristo, huidibi tú'ciy ijtcixyp miid Cristo. Jadu'n jadaaabi tügpiicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxyi miid nidüg'óciy yi mayjay ajcxy huidibi mijpidacp Dios etz huidijaty mi'ijtp je Espíritu Santo ma ajcxy yjot yhuinma'ñ, jadu'n miich ajcxy mjugy'ajtin nipaady nej Dios chinaydac.

Pablo yi' je' miid cötujcin co capxhuäcxy Dios y'ayuc ma pin ca' yjudíoŷäyity

3 Ich Pablo, nyajpatpich pujxtigoty miid co ndu-uñich ma Jesucristo ytung ma miich ajcxy huidibi ca' yjudíoŷäyity. Paady ycixp nmibijctzooybich Dios miid miich ajcxy m'oy'ajtin ycixpi. ² Mnejhuüyb ajcxy com Dios mijmay'ajt ti tuuñ miid miich ajcxy ycixpi, paady yi' ti xyajniibicyich ngapxhuäcxibich ma miich ajcxy yi' y'ayuc ytiy'ajt. ³ Dios ti xyajnejhuüyich yi' ytiy'ajt huidibi jecy'ajty yüch y'ijt. Jada tiy'ajt yinjaty hueeñjaty ich miich ajcxy ti nnijayüygixy jayjip'aty. ⁴ Co miich je necy mgapxip, huin'it ajcxy mnejhuühuipy co ich nnejhuüyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuüy jecy'ajty. Jadachambi xi tiempo Dios miid je Espíritu Santo yajnejhuüy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxiüybi ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíoŷäyity ypadamyb ajcxy Dios y'oy'ajtin quipxyi miid yi' judíoŷäy ajcxy, etz nañ jadu'n yi' ajcxy yajpaady ma Dios tú'ciy miid yi' judíoŷäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judíoŷäy co möhuaangixy pinjaty mibijccixp Jesucristo.

⁷ Dios mijmay'ajt ti tuñ miid ich ninigoob co ti xyajniibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi' jäy ajcxy huidibi ca' yjudíoŷäyity. ⁸ Ich jactimmudzip ma yi' maybi mibijcpidijc ca'ydí jacpin, per ca' ñejity. Dios may'ajt oy'ajt ti tuuñ ma ich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjihuüy jadu'ñyi ymijity. ⁹ Dios ti xyajniibicyich co ngapxtëcxibich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi miid tüg'óciy jäy ajcxy. Yi' je' Dios huidibi ti yajcojtäy tüg'óciy tijaty ya naaxhuiñ etz jiiby tzajpjoty yajpatp. ¹⁰ Jadu'n Dios capxcödujcy co je tzajpjoty tzi-naaybi ajcxy huidibi ane'min etz mic'ajt miid, tiy'ajt padaangixy ma yi' mibijcpidijc jadu'n nej Dios mijhuin-

ma'ñ canaagnax tuñ miid jäy ajcxy nidüg'óciy huidibi mibijccixp Cristo Jesús. ¹¹ Jadu'n Dios ti cuyduuñ miid ajt nHuindzin Jesucristo jadu'n nej jecy'ajty capxcödujcy. ¹² Miid co nyajpaatim ma Jesucristo paady ycixp aguyc jotcujc nmigapxim nmihuingonim Dios. Miid co nmibijcim Jesucristo paady ca' ndzigüyim ndzo'ydu-unim ma Dios yhuinduu. ¹³ Paady ycixp may'ajt nbijctzooyich miid miich ajcxy co ca' nigü m'ixtigühuäccixy ma ajcxy mmibijcin. Etz ca'ajcxy xyñidajipy xyñimayípyich co tzaachypi nminaxyich nyajnaxyich miid miich ajcxy ycixpi. Com miid co ti nyajnaxyich tzaachypi miid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuüyb jäy ajcxy

¹⁴ Com Dios mijmay'ajt ti tuuñ miid judíoŷäy etz miid huidibi ca' yjudíoŷäyity, paady njatyhuingoxtinaaybich Dios, ich ajt nHuindzin Jesucristo yTeedy, e nmibijctzooybich Dios miid miich ajcxy ycixpi. ¹⁵ Tüg'óciy tza-jpjoty tzinaayb etz tüg'óciy naaxhuiñyäy huidibi mibijccixp Dios, jëbi nidüg'óciy yminaangixy: "Dios ich ajt nDeedy." ¹⁶ Paady nmibijctzooybich Dios Teedy miid miich ajcxy ycixpi, co Dios je huidibi mic'ajt etz oy'ajt ymiid mijcajee, co xymöhuipy mic'ajt ma ajcxy mmibijcin miid yi' yjihuüñ ymic'ajt huidibi yajpatp ma ajcxy mjot mhuinma'ñ. ¹⁷ Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcxipy mjihuüygixipy mijcajee huinixi huinitempo je mibijcpidijc etz tüg'óciy jacjadyii jäy. ¹⁸ Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuüygixipy jadu'n nej Cristo xychojcm xyjihuüyim mijcajee. E yi' chojcin yjihuüyín jadu'n nipaady nej tüg tijc huidibi jac cixip jac mijip, jac yooñip jac cicyip ca'ydí ni huidi tijc. ¹⁹ Nmibijctzooybich Dios co xyajnejhuüygixy xyajhuinjihuüygixipy nej Cristo xychojcm xyjihuüyim mijcajee nidüg'óciy ich ajt, ixti ca' huaad nhuinjihuüydaayim jadu'n nej Cristo xychachchojcm xychachjihuüyim. Nmibijctzooybich Dios co xypubéjtcixip, ixti mabaad mmid'ajttaaygixy Dios y'oy'ajtin. ²⁰ Jadachambi, cömay Dios y'ity huidibi mic'ajt miid, etz huidi yejcp mijcajee jac'anaxy ca'ydí nej njapjctzoohuim etz nej njahuinmaayim, miid je ymic'ajt ycixpi huidi tumb ma ich ajt. ²¹ Huen tüg'óciy mibijcpidijc ajcxy jäymejtzcixy ojadajtcixy Dios etz Cristo Jesús jabom jabom huinixi huinitempo. Jadu'n jada. Amén.

Tú'ciy n'ijtim miid Espíritu Santo ycixpi

4 Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinma'ñ yung naxy, nicy xeemy jäy'ajtcixy,

naymecxtújcigix miñ xyipy, naymi'oyjäy'ájtigixy, jigix ñiguëxigip co mnaychójcigixy mnayjihuiyigixy miñ xyipy. ³ Miid'adipy ajcxy mjet mhuinma'ñ tú'ciy miid je Espiritu Santo ypubejtin jigix jëbi mdzinaaygixy jotcuje ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espiritu Santo huidibi yajpaady ma ajt njot nhuinma'ñ. Dios ti xyhuin'ijxim, jigix jëbi quipxyjaty njijp'ijxtaayim je oybi huidibi nbadaanim jilby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nñibejtin miid Jesucristo yxi. ⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'ñ.

⁷ Dios may'ajt oy'ajt ti tuñ miid nidüg'óciy ñich ajt co Cristo ymooyim mic'ajt, jigix jëbi nidüg'óciy tuunipy Dios ytung nej ypadyi. ⁸ Paady ycixp jaybety ymiñ ma Dios jadu'n ymina'ñ:

Co Cristo ypättigiy tzajpjoty, chi ymiidpättigiy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc ymina'ñ co je Cristo ypättigiy tzajpjoty? Hue' je' jadu'n ymina'ñ miid co je Cristo jayijp ycidacy etz ooy ayooy ya naaxhuiñgixy. ¹⁰ Je Cristo yi' je' huidibi cidaac ya naaxhuiñ choon tzajpjoty, nañ jadu'n ypättigiy jadüg'oc tzajpjoty jactim'oc'am. E yi' je' ymic'ajt yajpatp ma tüg'óciy huidijaty jilby tzajpjoty etz tüg'óciy huidijaty ya naaxhuiñ. ¹¹ Je Cristo ymooygixyp nidüg'óciy yi' ytumbi mic'ajt. Nijëjity mooygixy mic'ajt jëbi nidiy'ajt'ájtigixy co je' je' je' Cristo. Nijëjity mooygixy mic'ajt jëbi najzcapxiygixy Dios y'ayuc. Nijëjity mooygixy mic'ajt jëbi capxhuäcxixy yi' y'ayuc. Nijëjity mooygixy mic'ajt jëbi capxhuicixy yi' mibijcpidijc miid Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy miid ytung ycixp. E miid yi' ajcxy ytung yjacyujcpedipy yi' mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³ Jadu'n Cristo mic'ajt xy-mooyim, jigix jëbi nidüg'óciy ñich ajt ytüg'iyim nmibijcin, etz nañ jadu'n quipxyjaty n'ixpijtaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy.

¹⁴ Ca' n'idaanim miid ajt nhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadozic yhuinma'ñ ytigajtzixy. Jadu'n ajcxy nipaady nej je miy huidibi je poj yajpojmiy yajpojijpy. Co cixy ca'pxy nmiid'ajtim Cristo ytiy'ajt, ca' pinjaty xyhuin'ñim miid huing ayuc oymibijcnip huidibi ca' yjanchity. ¹⁵ Hue' janchity ngapxim je tiy'ajt tiybi miid tzojcin jihuiyín, jaydëbi njacyeecim ajt nmibijcin etz njacnejhuiyim tüg'óciy Cristo ytiy'ajt jadu'n nej ytuun ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg'óciy ninicx. Cristo ñipatp nej je ninicx cohuajc huidibi ane'mb etz mic'ajt mooyb je ninicx. Etz yi' mibijcpidijc ñipatp ajcxy nej je ninicx

huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtüg'iyip ajcxy ymibijcin etz nañ jadu'n yaj'ijtigixy tügmucy. Nidüg'óciy mibijcpidijc ymic'ajt patcixy ma Cristo, jëbi tungixy Cristo ytung nej ypadyi. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yjihuiyín miid ymigügtijc.

Je jemybi jugy'ajt huidibi nbaatim ma Cristo

¹⁷ Paady ycixp nñimäyich miich ajcxy etz nyajnbijcixy miid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaaady ma Dios, jadu'n nej jacjadyi jäy ytungixy huidibi ca' mijpidaacixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyi jäy ajcxy chinäy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinxiibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuiy co ytundigooygixy. Ooy ajcxy minicxnajcixy yi' jibic-huinma'ñ. Ooy ajcxy nijot'ajtcixy mijcajee co tungixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpijccixy co copicy m'ixmájtzcixipy yi' jibic-huinma'ñ nej anajty mni-jot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'ñigixy. ²³ Ixmajtzicx jibicjot jibic-huinma'ñ. Pidaaccix mjet mhuinma'ñ co mguy-dunaangixy Cristo ytiy'ajt jemybi. ²⁴ Miid'ajtcix jemybi jot jemybi huinma'ñ com Dios ti yajtigajch huinjemy ajcxy mjet mhuinma'ñ miid tudägy'ajtin etz huadz'ajtin.

²⁵ Paady ycixp ca' huaad m'indaacixy, nidüg'óciy cápxcixy huidibi janchip miid migügtijc, miid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi' mmigüg, ca' mmigüg migapxtigooygixy midundigooygixy, mic'amy ajcxy mjäydgóoygixipy yi' mjetmädi yajijp ca'ni anajty xi ycidacyñi. ²⁷ Ca' mnayyéjicigixy ma je mujcu' co je mujcu' xymimadägipy.

²⁸ Yi' jäy ajcxy huidibi meetzcixp, huen ixmajtzicixy meedzi, etz ixtähuiy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

²⁹ Ca' mgápxcixipy jibic ayuc. Cápxcixy oy ayuc huidibi jëbi migüg ajcxy jäygidaacixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp. ³⁰ Ca' huaad mgapxcixy mmiydaacixy ayuc huidibi yajjotmaybijcp je Espiritu Santo huidibi Dios yjë'ajtpy. Je Espiritu Santo huidibi miich ajcxy miid ma mjet mhuinma'ñ, yi' je' huidibi tiy'ajt yejcp co miich ajcxy Dios yjäy'ájtigixy, co anajty Cristo ymiñ ya naaxhuiñ jadüg'oc huin'it mbadaangixy jugy'ajtin etz tzi-naayin huidibi ca' ycixipy ytiyogipy ni mina.

³¹ Yajqueeccix yi jibicpi ma ajcxy mjet mhuinma'ñ, jadu'n nej co mjet mhuinma'ñ ta'm mjihuüygixy, jadu'n nej co tzojc mjetma'tcootcixy, jadu'n nej co mnaymijot-má'tigixy, jadu'n nej co mnayhuin'ójjigixy nayjijp'ójjigixy. Ca' huaad mmigüg mnigapxcixy mni'ojüygixy. Ca' jibicpi mnijot'ajt'adhtzcixy mñid ajcxy mmigüg ycixpi. ³² Hue' janchtiy oybi mhuinmáaygixipy mñid mmigüg ajcxy ycixpi. Nayba'ayóohuigixy nidüg nidüg. Nayméecxigix nidüg nidüg. Com nañ jadu'n Dios ti huinmecxy miich ajcxy mbocy mñid co myajpatcixy ma Cristo.

Nej jëbi chinaaygixy yi Dios yjây ajcxy

5 Com miich ajcxy ñipatpy nejjihuüy Dios y'ung'ájtigixy, e Dios ooy xychojccixy xyjihüüygixy, paady copicy naychójcigixy nayjihüüygixy miñ xyipy, jadu'n nej Dios ti xychojccixy ti xyjihüüygixy. ² Jabom jabom ma mdzinaayin naychójcigix nayjihüüygixy nidüg nidüg, tim jadu'n nej Cristo xychojcm xyjihüüym, e yjugy'ajt yejcy mñid ajt nbocy ycixpi, e jadu'n Dios jâygidacy nej Cristo ytuñ.

³ Mñid co miich ajcxy Dios xyjây'ájtigixy, paady tzi-naaygixy mñid huádz mjet mhuinma'ñ. Ca' huaad m'oc'ñbátcixyñi m'occapxpátcixyñi yi töxyjäy mi-gapxtigoyñi, etz yi jibic ayuc capxi, yi jibic-huinma'ñ nijot'adñ etz yi meeñ adzogñ. ⁴ Mñid co mDios miich ajcxy xyjây'ajtp, paady ycixp ca' huaad mgápccixipy ayuc huídibi tzo'ydu'ñ yejc, ni ca' huaad mgápccixipy huídibi ca' y'oyjäydaacñity, etz ni ca' huaad mguxiiccixy m'aniñdaaccixy, com yi jibic ayuc ca' Dios jâygidägy. Tzoc yajnaxim jâygidacñin ma Dios com Dios ti xya-jhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb mñid huingbi töxyjäy, pinjaty jibic-huinma'ñ mñid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meeñ adzojcp, Dios ca' tzocy, tim jadu'n nej yi' ca' tzocy pinjaty ojada-jtp tzaadzech etz quipychech. ⁶ Ca' mnayéjcigixy co jây ajcxy xyhuin'ñingixipy mñid ayuc huídibi ca' ytiy'ajti-ty ca'p choubaady. Mñid co jây ajcxy capxcixy ayuc huídibi ca' ytiy'ajtiy, paady ycixpi Dios tzaachytuna'ñ tüg'óciy jây ajcxy huídibi capxcömiodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' mñid mnayyöymújcigixy yi jadu'mbi jây ajcxy huídibi ca' capxymidoogixy Dios.

⁸ Jayjip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihuüy myajpaady ajcxy agootztuum. Jadachambi mnejhuüygixyp Cristo ytiy'ajt, e jadu'n nipaady nejjihuüy mdzinaaygixy ma tüg tiicxin. Paady ycixp jatyim cuydungixyp Cristo ytiy'ajt ma yi mdzinaayin mjugy'ajtin ajcxy, jadu'n nej jëbi huaad quëxgy co mmibijccixy Cristo. ⁹ Co nmñid'ajtim Cristo ytiy'ajt, chi nduunim huídibi y'oyip, huídibi tudägyip, huídibi tiy'ajtip. ¹⁰ Ixpjccix je tiy'ajt huídibi Dios jâygidacpy. ¹¹ Ca' miich ajcxy mnaymigüg'ájtigixy mñid yi jây ajcxy huídibi yajpatcixp agootztuum, huídibi tungixy huídibi Dios ca' jâygidägy. Miich ajcxy capxhuijicx mñid Dios ytiy'ajt yi' ajcxy huídibi agootztuum tziinaayb.

¹² Tzo'yduunim ajt co jay nigapxcixy nimiyaaccixy je jibicpi huídibi ajcxy ytumyb ayüch ameech. ¹³ Co n'ix-quixim yi jadu'mbi jây ajcxy ayuc mñid Dios y'ayuc, chi niguëxgy pen janch tiy'ajt o pen ca' ytiy'ajtiy, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tiicxin. ¹⁴ Paady ycixpi Dios y'ayuc jadu'n ymñañ:

Mäyhuijip miich ajcxy huídibi jadu'n nipatp nejjihuüy mdzachmaagixyp. Jugypjccix miich ajcxy huídibi jadu'n nipaady nejjihuüy ti m'öccixy. Cristo xycodñccixipy mñid yi' ytiy'ajt.

¹⁵ Paady naygüend'ájtigixy huídibi tiy'ajt yajtungixp ma yi chinaayin. Tziinaaygix jadu'n nejjihuüy mnejhuüygixy Cristo ytiy'ajt, e ca' mdzinaaygixy jadu'n nej huídibi ajcxy ca' nejjihuüygixy Cristo ytiy'ajt.

¹⁶ Ni'ix'ijtcix jabom jabom jëbi mguydungixy Cristo ytiy'ajt. Jadachambi xii tiempo mayjây ytundigooygixy mñid Cristo ytiy'ajt. ¹⁷ Ca' loci huinma'ñ myajtungixy, per nejjihuüygixyp nej Dios tzocy co mdüngixipy. ¹⁸ Ca' huaad m'ijtcixy amügy jây, com yi jocñi xyajñccixipy ayo'nduum. Niñi oy m'ijtcixy Dios yjihui'ñ ymic'ajt may'amya ma ajcxy mjet mhuinma'ñ. ¹⁹ Naymigápccixy miñ xyipy mñid yi salmo ayuc, mñid yi himnos. Huin'ñgix Dios mñid je iy huídibi je Espiritu Santo xymooygixyp. Huin'ñgix etz ojadajtccix Dios cixyot huinjot. ²⁰ Jatyim yajnaxcixy jabom jabom jâygidacñin ma ajt nDios Teedy ma ajt nHuindzin Jesús yxi, mñid tüg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Mñid co miich ajcxy mhuindziggy Dios, paady ycixp miich ajcxy mnayajmij'ájtigixy mnaygapxymidóohuigixy miñ xyipy.

²² Miich ajcxy töxyjäydijc yajmij'ajtcix capxymidoogixy yi mñây ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³ Com je töxyjäy ñây nigohuajc'ajtp ma ytöxyjic ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huídibi niñuñamb yajñidzögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi ñây ajcxy.

²⁵ Nañ jadu'n tzocy co je yëydijc huen tzocy jihuüy ytöxyjic, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin mñid yi' ajcxy ycixpi. ²⁶ Cristo yejc yjugy'ajtin mñid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzip yi mibijcpidijc ajcxy yjot yhuinma'ñ mñid yi'y'ayuc etz co niñbejt ajcxy mñid niñ. ²⁷ Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxgyyb ma yi' yhuinduu mñid huádz yjot yhuinma'ñ. Je mibijcpidijc ajcxy nipaady nej tüg niñen huídibi huádzip, ca' ma ytiy ymächity. ²⁸ Jadu'n tzocy co je yëydijc huen tzocy jihuüy ytöxyjic tim jadu'n nej c'i'm naychogyii. Yi yëydijc huídibi tzojcp jihuüyb ytöxyjic nañ jadu'n c'i'm ñaychogyii. ²⁹ Ca' ji ni pin huídibi ca' ñaychogyii c'i'm. Hue' janchtiy ycuend'ajtpy etz yajcüxyii yajpedyii yci'm ninicx, tim

jadu'n nej jäy ajcxy cuend'ajtcixy yci'm ñinïcix nañ tim jadu'n Cristo ycuend'ajtpy yi mibijcpidijc. ³⁰Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinïcix. ³¹Com copicy je yëydijc tzogëp jihuïhuip ytöxyijc jadu'n nej Cristo tzocy jihuïy yi mibijcpidijc. Paady ycixp je yëydijc ixmadzipy ytaj yteedy, e ypuDIGËhuipy ytöxyijc, e jadu'n ajcxy chinähuipy nej jihuïy ytügpajcity. ³²Ooy chachmijhuinma'ñity jada tiy'ajt huidibi yüch anajty ijtp, e yi' ñich jadu'n tijpy yi Cristo etz je mibijcpidijc. ³³Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mihuïhuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñäy.

6 Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ²Yi Dios ycötujcin huidibi minaamb: "Yajmij'ajtcix mdaj mdeedy", yi' ooy ytimycopicyity. Nañ jadu'n co nguyduunim jada cötujcin, huin'it Dios jecy xyajtzinaayim. ³Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcu-jc'ajtin, e nañ jadu'n xyajtzinaayigixipy jecy ya naax-huiñ.

⁴E miich ajcxy huidibi ungedeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc ytiy'ajt, jaydëbi capxymidöogixipy ajcxy Dios.

⁵Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiygix. Tim jadu'n nej jihuïy mgapxymidoogixy yi mhuindzin Jesucristo.

⁶Tungix yajxon miid ajcxy mhuindzin. Ca' janch xy-paat oy mic mduungixy co ajcxy mhuindzin jim xy-huindicxcixy, e chi co je' yjihuäcni, chi nigoo mhuäc-cixni mdinäaygixni. Tungix jadu'n nej huaad jäy ytu-ungixy yi huidibi mijpidaaccixp Jesucristo. Tungix cixyot huinjot jadu'n nej Dios tzocy mdüngixipy.

⁷Tumbidijc ajcxy, tungix mdung cixyot huinjot, tim jadu'n nej jihuïy mdungixy je Huindzin Jesucristo ytung, e ca' yjäydungity. ⁸Mnejhuïyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuñ, ca' ñejity pen yci'mdung ytumyb, o pen ytumb miid tüg huindzin.

⁹Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiygixipy ca' mdzaachytüngixipy. Ajihuïyigixy co miich ajcxy etz nañ jadu'n mdumbi ajcxy miid ajcxy mhuindzin tza-jpjoty, e yi mhuindzin tzajpjoty pi quipxyjaty tiyduna'ñ nidüg'öciy miich ajcxy.

Je mic'ajt huidibi je mibijcpidijc ajcxy ypatcixyp miid Dios yjihuï'ñ

¹⁰Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidity, paady jëbi miich ajcxy mbatcixy yi mmic'ajtin ma yi'. ¹¹Naygohuaanigixy miich ajcxy ma je mujcu' miid tüg'öciy tiy'ajt huidibi Dios xymooyim, huidi miid naygohuaanim ma je mujcu', e jadu'n ca'ydi

je mujcu' xymimadaacim miid anii. Jadu'n Dios ytiy'ajt nipaady nej tujt etz pujxnijen huidibi soldados ajcxy miid naygohuaangixy tzipjoty. ¹²Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'öciy mic'ajt miidpi huidibi midzip'ajtp Dios ya naax-huiñ etz jilby tzajpjoty, ca'p ñich ajt nmidzip'ajtim naax-huiñyjäy. ¹³Paady ycixp yajtüngixy tüg'öciy mic'ajt etz tiy'ajt huidibi Dios ti xymooygixy, jigix jëbi mmi-madaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi miid ajcxy mmibijcin. E co anajty ti mmimadactaaygixy, huin'it m'ijtcixipy mic ma ajcxy mmibijcin. ¹⁴Ca' m'ixtigëhuäc-cix ma ajcxy yi mmibijcin. Nayñi'ixiyigix miid Dios ytiy'ajt, jadu'n nej jäy ajcxy ñayhuindädzigixy co ytu-naangixy. Nayñi'ixiyigix tim jadu'n nej soldados ajcxy ñayñi'ixiyigixy miid pujx nijen ma caach co chiptu-naangixy. ¹⁵Nayñi'ixiyigix miid Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcu-jc'ajtin yejcp. Co jadu'n mdüngixipy, jadu'n nibaadip tim jadu'n nej soldados ajcxy ñayñi'ixiyigixy co ya-jtigiygixy yzapato co ytüyöyaangixy. ¹⁶Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jëbi mnaygohuaanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygo-huaanigixy ma je tip huidibi yajnajtztübiyb miid jijn. ¹⁷Nayñi'ixiyigix miid Cristo ytiy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygohuaanigixy co pidaaccixy ypujx cöjup co chiptunaangixy. Naygohuaanigixy miich ajcxy miid Dios y'ayuc huidibi jadu'n nipatp nej tüg espada huidibi je Espiritu Santo ti xymooygixy. ¹⁸Mibijctzoogix Dios miid tüg'öciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Es-piritu Santo ypubejtin. Huijy ycujc m'ijtcixipy, ca' mjet-metzcyigixipy. Mibijctzoogix Dios miid tüg'öciy mibijcpidijc ajcxy ycixpi. ¹⁹Nañ jadu'n mibijctzoogix Dios miid ñich ycixpi, co huen xymöyich ayuc etz jotcu-jc'ajtin, jigix jëbi ngapxhuäcxi bich huinmic jotmic yi' y'ayuc ytiy'ajt huidibi ca' pin jecy'ajty nejhuïyigixy. ²⁰Dios ti xyajnbicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyaj-paadyich pujxtigoty cham. Tungix may'ajt mibijct-zoogix Dios miid ñich ycixpi co xyajjotmicpigixyich jigix jëbi ngapxhuäcxyich yi' y'ayuc huinmic jotmic.

Capxpooxin huidibi cogixiyñip

²¹Ooy ndzocy njihuïyich je Tiquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tiquico miich ajcxy xyajmüdydägipy tüg'öciy je tiy'ajt nej nyajpaadyich ya, etz tüg'öciy tung huidibi ya ndumybich. ²²Nguexaamybich Tiquico ma miich ajcxy jigix jëbi xymüdydägipy ajcxy jadu'n nej nyaj-paadyich ya, e miid jada tiy'ajt jëbi miich ajcxy mjetcugiygixy.

²³Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcujc mdzi-naaygixy, etz nañ jadu'n jëbi mnaychöjigixy

mnayjihufiyigixy miñ xyipy, etz jigix jëbi mjacmibijccixy
Cristo. ²⁴ Huen Dios may'ajt oy'ajt tunipy miid miich
ajcxy huidibi yajmij'ajtcixp ajt nHuindzin Jesucristo

huinixi huinitiempo. E ca' m'ixmájtzcixp nimina nej
ajcxy mijpidaaccixy Jesucristo. Jadu'n jada. Amén.

FILIPENSES

1 Ich Pablo mid Timoteo tumbich ma Jesucristo ytung. Jada necy ich ajcxy nguejxpy ma tög'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajniguexyich yi' ajcxy migtungmidpi etz mutztungmidpi ma Dios ytung. **2** Huen ich ajt nDios Teedy etz ajt nHuindzin Jesucristo may'ajt etz oy'ajt tunipy mid miich ajcxy ycixpi etz xyajjotcugiygixipy.

Pablo mibijctzoy Dios mid je mibijcpidijc ycixpi

3 Naag'oc naag'oc njäytechich miich ajcxy njaty-timajnajxpyich jäygidaacin ma Dios mid miich ajcxy ycixpi. **4** Njatytimjotcujc'ajtpich ooy naag'oc naag'oc Dios nmibijctzooyich mid miich ajcxy ycixpi. **5** Jotcujc'ajtpich com miich ajcxy ti xypubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxych Jesucristo y'ayuc ixti chambaad. **6** Nejhuüybich tiydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiñ jadüg'oc ya naaxhuiñ mid y'ane'min etz ymic'ajt. **7** Ooy ytudägyity co jadu'n jotcujc'ajtpich mid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajnißicyich jada tung, etz miich ajcxy myajpaady quipxy mid ich ma Dios ytung, mid co miich ajcxy xyjäytechich etz nañ xypubetyich ajcxy, huenma'amy ich nyajpaady, oy ixipy pujxtigoty, oy ixipy ma tungmidpi yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. **8** Dios ñejhuüyb jadu'n nej mijcajee ooy ndzocy njihuüyich miich ajcxy mid je tzojcin jihüyichin huidibi Jesucristo ti xymöyich. **9** Nmibijctzooybich Dios mid miich ajcxy ycixpi co xypubedipy ajcxy jigix jëbi nigü mdzogy mjihuüipy migügtijc, etz jigix ajcxy nigü m'ixpigipy je tiy'ajt tudägyi, etz nañ nigü mhujhuüipy tög'óciy nej Dios tzocy co nduunim. **10** Nañ nmibijctzooybich Dios mid miich ajcxy ycixpi jigix jëbi mnejhuüyigixipy, etz nañ jigix jëbi mhujhuüipy hidibi jac'oy mdunggixipy. Co oy mdunggixipy, hujhuüyich jëbi mdzinaaygixy mid huadz jot huadz hujhuüyich, e ca' ni ti jotmay miich anajty ajcxy mmidiñ, co anajty je xii je tiempo paady co Jesús anajty miñ ya naaxhuiñ jadüg'oc mid y'ane'min mid ymic'ajt. **11** Dios nmibijctzooybich mid miich ajcxy ycixpi co ajcxy mbattähup tög'óciy oyjot oyhuinma'ñ, je oyjot oyhuinma'ñ hidibi Jesucristo tög'pajc jëbi xymoogyixy. E jadu'n jäy ajcxy

capxpaadip Dios etz nañ hujhuüyich Dios co ajcxy ixipy nej tudägy mdzinaaygixy.

Mid ich, yi njugy'ajtich, yi' yi' Cristo

12 Ndzojcpyich co miich ajcxy mnejhuüipy co mid je tzaachyipi ycixpi hidibi nmanaxyp nyajnaaxypich ya pujxtigoty, nigü mayjäy ti midoy Jesús y'ayuc ytiy'ajt.

13 Jadu'n ti yhuimbizimy co tög'óciy soldadtijc etz jacyadyii jäy ya ma je gobierno ymijtijc ti nejhuüydäy ajcxy co nbujxtijc'ihayich mid co nduunich ma Jesucristo ytung. **14** Nañ jadu'n mid co nbujxtijc'ihayich, paady ycixpi yi jacyadyii mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcx'yadichpy ajcxy Dios y'ayuc ytiy'ajt, ca' ma tzig'ñ jihui'ñ.

15 Janch tiy'ajt jada co nijëjity jäy capxhuäcx'y je Cristo y'ayuc ytiy'ajt mid co ca' xyajmidzojccixy, etz nañ mid co xyajmidzip'ajtcixy. Nañ tiy'ajt jada co jacyadyii migügtijc xychojcp xyjihüyib ajcxy, e capxhuäcx'y ajcxy je Cristo y'ayuc ytiy'ajt mid oyjot oyhuinma'ñ. **16** Janch tiy'ajt co nijëjity migügtijc capxhuäcxycixy Jesucristo y'ayuc mid co ñaygömaya'nyii ci'm, ca' nmianaanim ycapxhuäcxp ajcxy cixyot hujhuüyich. Yi' ajcxy y'ixtaayb nej xyajtajipy xyajmayipyich, jadu'n nej ich pujxtigoty n'ityich. **17** Yi' ajcxy hidibi xychojcpich xyjihüyibich ycapxhuäcxpy ajcxy Cristo y'ayuc com ñejhuüyb ajcxy co ich yam n'ityich pujxtigoty, mid co ti nhuinma'ñ nbidägyich co nnigapxpeda'ñich Jesucristo y'ayuc ytiy'ajt. **18** Pen jäy ajcxy capxhuäcxp Cristo y'ayuc mid co ñaygömaya'anigixy ci'm, o pen ycapxhuäcxyp mid oyjot oyhuinma'ñ, ca' ñejity, jotcujc'ajtpich co capxhuäcx'y ajcxy Jesucristo y'ayuc.

19 Com nnejhuüybich co miich ajcxy mmibijctzoogyx Dios mid ich ycixpi, e nañ nnejhuüybich co Jesucristo yjihui'ñ ymic'ajt xypubetyich, paady nigü njotcugyich, e nañ njijp'ijxpyich co nbidzima'ñich pujxtigoty. **20** Ndzojcpyich etz nañ njijp'ijxpyich co nmimadactähua'ñich tög'óciy ma ich mdzinaayin, e ca' ti tzoüdu'nbáadibich ma Dios yhuinduu. Ndzojcpyich nañ njijp'ijxpyich co njaccapxhuäcxibich Jesucristo y'ayuc hujhuüyich jotmic, jigix Jesucristo ycomay'idipy. Ca' ñejity pen jactzinaayb, o pen n'ocpich. **21** Ich ndzinaayin njugy'ajtin Cristo yi' ycixpi, e peni n'ocpich, ti ich anajty mij nmadägy. **22** Pen njactzinaaybich, mayjäy oybi pada'ñ mid ich ndung ycixpi. Ca' nnejhuüyich hidibi jac'oy nhujhuüyich co tzoj n'ögibich, o co njactzinaaybich. **23** Ooy chachchipity nnejhuüyibich hidibi jac'oy nhujhuüyich, co n'ögibich, o co njactzinaaybich. Ich ci'm najjihüyijich nigü jotcujc

co ixypy tzojc n'ögyich, jigix ixypy mic'amy nicxy n'ityich jii by tzajpjoty ma Cristo yajpaady. ²⁴ Per jac-copity mïd miich ajcxy m'oy'ajtin ycixpi, co njactzinähuibich. ²⁵ Com nnejhuüybich co copicy njacpubeda'ñich miich ajcxy, paady nnejhuüybich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n miich ajcxy nïgi mjotcu-jc'adipy ma mmibijcin. ²⁶ Miich ajcxy huidibi yajpaatp ma Jesucristo, nïgi jotcuyc m'idipy co nicxy n'ida'ñich jadüg'oc ma miich ajcxy.

²⁷ Jëyi janchtiy co mdzinaayin mjogy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma miich ajcxy, o pen ca' nnicxyich, per nd-zojcypich co xypaadibich tiy'ajt co miich mic m'ijtcixy ma mmibijcin, tú'ciy cixyjot huinijot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸ e ca'ajcxy mdzigihuip co jäy ajcxy xymidziptzöongixipy, jada je' tiy'ajt co tigoyamb ajcxy y'alma, e nañ jada je' tiy'ajt co miich ajcxy chóocixipy yi m'alma, e nañ jadu'n jada tiy'ajtip co Dios y'ity mïd miich ajcxy. ²⁹ Dios may'ajt oy'ajt ti tuñ mïd miich ajcxy ycixpi co yaj'oyiij nej jëbi miich ajcxy mibijccixy Jesucristo etz nañ nej jëbi tza-achypï mminajxcixy myajnajxcixy mïd Jesucristo ycix-pi. ³⁰ ñich etz miich ajcxy quipxyi ti nminajxim ti nyajna-jxim tung ayo'n mïd Jesucristo ycixpi. Miich ajcxy ti m'ixy ti mnejhuüy jadu'n nej ñich ndung n'ayo'n ti nmi-naxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuüyb nej ñich chambaad nminaxy nyajnaxyich ndung n'ayo'nich mïd Cristo ycixpi.

Cristo yung'ajt ñax'ajt etz ymij'ajt

2 Pen Cristo miich ajcxy mjot'amijmooyb mïd yjihui'ñ mïd ymic'ajt, pen ti jotcuyc'ajtin mbatcixy mïd co Cristo xychojccixy xyjihuiygixy, pen yi' yjihui'ñ ymic'ajt ijtp ma miich ajcxy, pen mdzojccixyp mjihuüygixyp etz nañ mba'ayoogixy migügtijc, ² jotcu-jc'adipich mïd co mdzinaaygixy ooy yajxon, xic xon, tü-gyi mnaychójcigixy mnayjihuiygixy miñ xyipy, tzi-naaygixy quipxyjot quipxyhuinma'ñ. ³ Ca' ajcxy ti mdunipy mïd mgi'mdzojcin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunípy ajcxy mïd yung naxy mjot mhuinma'ñ. Nidüg nidüg myajmij'adipy nïgi migügtijc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc myajmidzogyipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesu-cristo anajty yhuinma'ñ mïdity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yi' ymij'ajtin huidibi anajty yjamiid. ⁷ Jesucristo ahuingujc pidaactay je mij'ajt huidibi anajty ymiid, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naax-huiñyjäy, chi yung naxy pidacy yjot yhuinma'ñ, e nañ capxymidoy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cru-

udzciy. ⁹ Paady ycixp Dios ti cömay jacnigi Jesucristo, e ti pidäci yi' yxi jaccömay, ca'ydi jacpinjäy yxi. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñyjäy, etz tüg'óciy jäy ajcxy huidibi ti ñaaxtigäy, co anajty ajcxy nidüg'óciy mï-doogixy co Dios capxpaatip Jesús yxi, chi ycojxti-naay'ihuiydähuipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg tiicxin jajin

¹² Migügtijc ajcxy huidibi ooy ndzocy njihuüyich, com Jesucristo jadu'n ijxpejtin ti yecy, capxymidoogich cham co jigüegy nyajpaadyich ma miich ajcxy, tim jadu'n nej jayhuin ñich miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huadz mjot huadz mhuinma'ñ. Tungix Dios ytung mïd yung naxy ajcxy mjot mhuinma'ñ, e huindzigiygix Dios. ¹³ Com Dios yi' tumb jabom jabom ma miich ajcxy mjot mhuinma'ñ, jigix jëbi miich ajcxy mdunipy yi' ytung yi' chojcin cixyjot huinijot jadu'n nej Dios tzo-cy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' mïd tzip ejcin. ¹⁵ Jadu'n mdunipy ajcxy ca'ydi pinjaty yxigixy co ti mdundigoogixy. Miich ajcxy Dios xy'ung'adiib, ca' mnigix'adiyb ajcxy ti jibicpi. Tzinaaygix mïd oyjot oyhuinma'ñ ma yi' jäy ajcxy yaj-paady huidi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjogy'ajtin mooyb ma jibicjäydiic ajcxy, jadu'n nipaady nej tüg madzä ytiicxy coodz. Pen jadu'n mdungixy, co anajty Cristo ymiid jadüg'oc ya naaxhuiñ, jotcuyc'adipich co anajty nnejhuüyich co ca' ñich ndung etz nxi ndiempo yñadig'aty co n'ijtyich ma miich ajcxy. ¹⁷ Co n'ögibich mïd Cristo ytung ycixpi, jadu'n nipaady nejjihuiy ñich nni'py ti ndem ti nyocyich mïd miich ajcxy ycixpi co ti ngapxhuäcxich Dios y'ayuc ma miich ajcxy. E co miich ajcxy ti mmijpidaaccixy ñich n'ayuc, jadu'n nipaady nejjihuiy miich ajcxy ti myoxy ti mdoogy yi' mjogy'ajtin ma Jesucristo. Jotcuyc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuyc'adipy quipxy mïd ñich.

Timoteo etz Epafrodito

¹⁹ Pen ñich ajt nHuindzin Jesús tzojcpy, njijp'ijxypich co jëbi nguexipyich Timoteo ma miich ajcxy, jaydëbi njotcuyc'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tügpajc huidibi huinma'ñ tú'ciy mïd jadu'n nej ñich nhuinma'ñ nmídidyich, etz nañ huidibi janch naybidaacip mïd miich ajcxy m'oy'ajtin ycixpi. ²¹ Yi' jacjadyii migügtijc huidibi yajpatp ma ñich, yajcopijcyp ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy

mnejhuüyb jadu'n nej Timoteo tudägy ytuñ miid ñich co ngapxhuäcxyich Jesucristo y'ayuc ma miich ajcxy, tim jadu'n nej tüg ung ytuñ miid yteedy. ²³ Paady ycixp njijp'ijxypich co jëbi nguexyich Timoteo ma miich ajcxy mïna anajty nnejhuüyich nej ycixipy ñich njotmay huidibi nmiidich ya. ²⁴ Nañ nmibijcypich ajt nHuindzin Jesucristo co yaj'ahuädzip ñich nni'a ndü'a co jëbi ñich cï'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ñich, jëbi xypubetyich ma tüg'óciy huidijaty nyajmayajtypich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüy co ypiigyii. ²⁷ Janch tiy'ajt co Epafrodito ooy ti ypi-gyüi, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nig' ayo'n jot-may nbaadyich. ²⁸ Paady ycixp nig'i ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcug'ihuip co m'ixipy. E nañ jadu'n jëbi yquëgy ñich ndajin mayin miid yi' ycixpi. ²⁹ Cöbijcix Epafrodito jotcujc, jadu'n nej tüg migüg huidibi yaj-paatp ma ajt nHuindzin Jesús. Yajmij'ajtcix tüg'óciy migügtijc huidibi yjugy'ajtin yojxp toocp miid Jesu-cristo ytung ycixpi, jadu'n nej yi' ti ytuñ. ³⁰ Com jago ja-go Epafrodito ti yca'ögy miid Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' cï'm jëbi xypubéjtcixyich ya, paady yi' miich ajcxy ti xycodinäy.

Je tudägy'ajt je janchypï

3 Jadügnax, migügtijc ajcxy, jotcujc'ajtcix co myaj-patcixy ma ajt nHuindzin Jesucristo. Ca' ti adzjipin njihuüyich co nnigapxetyich jada tiy'ajt jadüg'oc huidibi jayhuin ti nyajnijayigixy. Jadu'n nduñich miid miich ajcxy m'oy'ajtin ycixpi. ² Naygüend'ájtigix miid yi' ajcxy y'ayuc huidibi ajcxy tundigooyb co ajcxy yajcopij-cy yi' tiy'ajt huidibi pidacp ma jäy ñinixc miid tzuic. Jibic jäy yi' ajcxy, jadu'n ajcxy nipaady nej uc. ³ Yi' jäy ajcxy huidibi tiydudägy mibijcp Dios, ca' nmiinaanim je' yi' ajcxy huidibi tiy'ajttiyip ñinixc. Yi' Dios yjäy ajcxy janchypï, yi' ajcxy cixyot huinjot mibijcp mijpidacp Dios ytiy'ajt jadu'n nej ñich ajt. ñich ajt n'ojadajtim Dios miid ajt n'espíritu, etz miid ajt njot nhuinma'ñ. Jotcu-jc'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixipy ytiy'ajtiy yi' jadu'mbi huinma'ñ, jëbi ixipy naygömayiijich cï'm, com jecy'ajty ca' anajty ni pin huidibi nig'i cuyduun yi' jadu'mbi tiy'ajt ca'ydi ñich. ⁵ Co nductujcxijiyich ma anajty ti nma'xung'atyich, chi oy nyajtiy'ajttiyich. Raza hebrea ñich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. ñich ndaj ndeedy hebreojäy ajcxy anajty. Nañ nmijpi-daacich fariseo y'ixpijcin, jadu'n nej ajcxy yajniügeey judíojäy ycötujcin. ⁶ ñich janchmictägy anajty nguy-duñich ngi'mhuinma'ñich, ixti mabaad anajty n'ixhuidi-ty nbahuidityich mictägy yi' jäy ajcxy huidibi anajty

mijpidacp Jesucristo. Ti nguydundäyich tüg'óciy judío-jäy ycötujcin. Ni pin ca' huaad yxëyich co ti ndundi-gooyich ma yi' ajcxy ycötujcin. ⁷ Tüg'óciy yi' judíojäy yhuinma'ñ huidibi ti nyajcopicyich anajty, jadachambi ca' ytimychobaady miid ñich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyaj-copijcypich, ti nnajtz'ixiidyäyich, jigix jëbi nnejhuühuibich etz nguydunipich yajxon ajt nHuindzin Jesucristo oybi y'ayuc ytiy'ajt. Miid co ti nmijpidägyich Jesucristo, paady nnajtz'ixiidyäyich tüg'óciy huidibi anajty nyajcopijcypich, yi' jadu'mbi huinma'ñ cham ca' chobaady miid ñich, jadu'n nipaady nej püx. Jadu'n nduñich miid Jesucristo ytiy'ajt oy'ajt ycixpi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiidyäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbáadibich je tudägy'ajtin huidibi Dios yejcyp co nmibijcim nmijpidaacim Jesu-cristo. ¹⁰ Ndzocpyich co njacnejhuühuibich Cristo y'ayuc ytiy'ajt. Nañ ndzocpyich co njacnejhuühuibich Cristo ymic'ajt, jadu'n nej yjugypijcy co y'o'cy. Nañ nd-zocpyich co njacminaxipyich njacyajnaxipyich tza-achypï jadu'n nej Jesús minaxy yajnaxy tzaachypï, ixti mabaad jadu'n njatyich jadu'n nej Cristo yjaty co y'o'cy. ¹¹ E paady ycixpi njijp'ijxpyich co n'ögibich nju-gypigipyich jadüg'oc co anajty Dios yajjugypicy yi' jäy ajcxy tiibi y'öccixy.

Naymic'ijxim jigix nbaatim huidibi Dios ti xyaj'ahuaniiyim

¹² Ca' nmiinaanim jadu'n nmiina'ñich co ti nmimadac-täyich nej Cristo ti mimadactäy. Nañ ni ca' jadu'n nmi-na'ñich co ñich njot nhuinma'ñ ti nyajhuäztäyich. Njac-tumnich, jigix jëbi Cristo y'oy'ajtin nbáadibich. Com Je-sucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca'ñich cï'm naygömayi-ijich, co ti nmimadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huidibi ti ñaxy, e mictägy nduñich jëbi nbáadibich je oy'ajtin huidibi Dios jilby tzajpjoty xymöhuaambich miid co nyajpaadyich ma Jesucristo. ¹⁴ Mictägy ndu-ñich miid tüg'óciy nmic'ajtich, jigix jëbi nbáadibich je oy'ajtin huidibi Dios jilby tzajpjoty xymöhuaambich. Jadu'n nipaady nejihuüy miid pin nayboyicquipxylijich co nbada'ñich tüg premio.

¹⁵ ñich ajt ti nhuinma'ñ ycijxni yca'pxni, tzoc panixim je xpijcin huidibi nmid'ajtim. E pen nidügti miich ajcxy tigachjaty huinma'ñ miidity, Dios xyajnejhuühuip ajcxy je tiy'ajt. ¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, panixcixc ñich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ijx-pejt mbigipy ma yi' ajcxy chinaayin huidibi ijxpejt ti patcixy ma ñich. ¹⁸ Canaag'oc ti nniimaayigixy, e nni-maayigixy jadüg'oc miid tajin mayin co may nmigügtijc chinaayigixy jadu'n nej jihuüy midzip'ajtcixy je Cristo huidibi o'c cruudzcixy miid ajt nbocy ycixpi. ¹⁹ Dios ya-jtgoyip je'ajcxy y'alma. Yi' ajcxy ypidacpy yhuinma'ñ

ma yi caayin uucin jicxy ypic, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygömáayigixy ci'm ma yjapadyii tzo'ydu'n jihuiyigixipy. Hue' pidaaccixy yhuinma'ñ ma naaxhuiñ jäy chinaayin. ²⁰ Hich ajt hue' nyajpaatim njäy'ajtim tza-jpoty, e njijp'ijxim co hich ajt nHuindzin Jesucristo mi-inaamb ya naaxhuiñ jadüg'oc, chona'ñ tza-jpoty, je huidibi xyajnidzögaanim ajt n'alma. ²¹ Jesucristo xyajti-gadzaanim ajt nninix pocymiidpi, e xymöhuaanim tüg ninix jemybi oybi, tim jadu'n nej yi' ñinix müidity. Cristo xyajtigadzaanim ajt nninix müid yi' ymic'ajt huidibi müid ane'mdäy mimadactäy.

Jotcuyc'ajtcixy ajcxy ma je mHuindzin Jesús

4 Com Jesús xyajtigadzaanim ajt nninix, paady ycixpi migügtjic huidibi ooy ndzocy njihuüyich, tiy-dudägy mibijccix ajt nHuindzin Jesucristo, ca' m'ix-tigühuäccixy ma mmibijcin. Migügtjic ajcxy huidibi ooy nicxy nja'ixa'ñich, ooy njotcuyc'atyich müid miich ajcxy ycixpi. Müid miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi' tzip etz huen naymigügpíjicixy jadüg'oc, com hue'ajcxy yajpaady mibijcpi ma Cristo. ³ Miich migüg huidibi ti xypubetyich ma Cristo ytung, may'ajt nbijctzooybich ma miich co mgapx'oyñhuipy je tzip ma ajcxy je metzpi töxyjäy. Yji-ibi metzpi töxyjäy tumb anajty ajcxy quipxyi müid hich co ngapxhuäcxyich Jesucristo y'ayuc ytiy'ajt. Yi' ajcxy xypubejtich quipxyi müid Clemente etz yi' jacjadyii huidibi anajty tumb quipxyi müid hich. Jada metzpi töxyjäy ajcxy yxi ycojayy ymiiñ ma Dios ñecy, je necy ma Dios müidity cojay je jäy ajcxy yxi huidibi padamb jugy'ajtin huinixibi.

⁴ Jotcuyc'ajtcix huinixii, müid co myajpatcixy ma hich ajt nHuindzin Jesucristo. Jadüg'oc nigapxpetyich co huen jotcuyc'ajtcixy. ⁵ Jadu'n tziinaaygix jadu'n nej jëbi jäy ajcxy nejhuiyigixy co miich ajcxy myajtungixy mecxtujcin ma mdzinaayin. Com huingon je xii je tiempo mina ymiina'ñ hich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxpizim-daaygix ma Dios tüg'óciy ti jotmay miich ajcxy mmüid. Mibijctzoogix Dios, e nañ yajnajcix jäydaacin ma Dios. ⁷ Co Dios mmibijctzöogixipy, huin'it ajcxy yi' xymöhuij jotcuyc'ajtin mijcajee, e mayñaaxhuiñjäy ajcxy ooy yhuinmay ahuididipy müid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinähuiipy ajcxy jotcuyc etz xymöhuij ajcxy huinma'ñ tudägyi.

Tzojccix nijot'ajtcix huidibi oyip

⁸ Jadügnax, migügtjic ajcxy, pidaaccix mhuinma'ñ ma tüg'óciy tiy'ajt huidibi janchip, tüg'óciy tiy'ajt huidibi jëbi nyajmij'ajtim. Pidaaccix mhuinma'ñ ma tüg'óciy tiy'ajt huidibi tudägyip. Pidaaccix mhuinma'ñ ma tüg'óciy huinma'ñ huidi huädzip etz tüg'óciy huinma'ñ huidi oy jäydaacni. Pidaaccix mhuinma'ñ ma tüg'óciy

huinma'ñ huidibi jëbi yajcapxpaady. Huinmaaygix tüg'óciy jada oybi huinma'ñ etz huidibi huaad njäygi-daacim.

⁹ Yajtungix je tiy'ajt huidibi ti nyaj'ixpijicixy, etz je cö-tujc huidibi ti nmooygixy, etz je ayuc huidibi ti mmi-doogixy co ti ngapxyich. Etz nañ tungix je ijxpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotcuyc'idipy ajcxy.

Filipenses ajcxy y'ofrendi müid Pablo ycixpi

¹⁰ Hich ajt nHuindzin Jesucristo ti ooy xyajjotcugyich co je tiy'ajt xypaadyich co miich ajcxy xyjäy mecich jadüg'oc. Ca' nmīnaanim nmīna'ñich co miich ajcxy ti xyjäy digoydaayñich. Hue' anajty ycanibidzimy nej jëbi xypubejtcixyich. ¹¹ Ca' nmīnaanim jadu'n nmīna'ñich co ooy ti jaty nyajmayajtnich. Com ti nhuinma'ñ nbidä-gyich co njotcuyc'adipyich müid tijaty nmüidich, oy tim mīnaaxii tim mīnaatiempo. ¹² Com hich ci'm nejhuiybich nej jay ajcxy y'ayoy yjottigooy, e nañ nejhuiybich nej jäy ajcxy chinäy co müid'aty tijaty may'amy. Ti nnejhuüdyäyich nej jëbi ndzinäyich, nej jëbi nyajna-jxich xii tiempo; pen cu'xyi ngaayich, o pen ca' cu'xyi ngayich, pen nmüidich conax, o pen ca' ti nmüiditych. ¹³ Jëbi ndzinähuiybich jotcuyc huenti huennejty, com Cristo xymic'ajtmooybich. ¹⁴ Ooy oy ti mdungixy co ti xypubejtcixyich ma hich n'ayo'n njotmay.

¹⁵ Jadu'n nej miich ajcxy huidi jim Filipos mnejhuüyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiyoxyich, e jac tigati ti mguejxcixy ma hich. E miich ajcxy jim Filipos huidibi mibijcpi Jesús, miich ajcxy tügpaajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajnigüejaxyich pubejtin metz'oc tugüg'oc, e jadu'n miich ajcxy xypubejtyich müid huidibi anajty nyajmayajtpich. ¹⁷ Ca' nmīnaanim ooy ndzachjijp'ixynich pubejtin, jada janchtiy ndzo-jcpxyich co miich ajcxy nigü oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadxy yi mbubejtin ixti nyajconajpich. Müid je pubejtin huidibi ti myajmigüejaxcixy Epafrodito cham nmüiditych ca'pxy, ca'ti n'ocyajmayajtnich. Müid jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigüiyi. ¹⁹ Hich nDios miich ajcxy xymöhuij tüg'óciy huidibi miich ajcxy myajmayajtpy. Mijcajee yi' miich ajcxy xymöhuij yi oybi mijpi oy'ajtin huidibi yi' ymüid ma yi Jesucristo. ²⁰ Huen hich ajt nDios Teedy cö-may'idipy huinixii huinitiempo! Jadu'n jada. Amén.

Capxpooxin huidibi cijxnip je necy

²¹ Tungix may'ajt capxpooxcix müid hich ycixpi tüg'óciy migügtjic huidibi yajpatp ma ajt nHuindzin Jesucristo. Je migügtjic huidibi yajpatp müid hich nañ jadu'n xyajnigüejaxcixy capxpooxin. ²² Tüg'óciy je mibijcpijic huidibi yajpatp ya cajpjoty xyajnigüejaxp ajcxy capxpooxin, yi' ooy ytimyjajjipity huidibi ajcxy

yajpatp ma je mij ane'mbi César ycötujctac xyajnigues-jxyp ajcxy capxpocxin.

²³ Huen ïch ajt nHuindzin Jesucristo may'ajt oy'ajt tunipy mïd tÿg'ócïy miich ajcxy. Jadu'n ngapxycïxyich. Amén.

COLOSENSES

1 Ich Pablo, Dios jadu'n tzojcp, paady Jesucristo ti xyajni bicyich jëbi ngapxhuäcxyich yi 'y'ayuc. ² Ich mïd ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjây'ajtip e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mïd miich ajcxy etz xyajjotcugïyigixip.

Pablo mibijctzoy Dios mïd mibijcpidijc ycixpi

³ Jabom jabom co ich ajcxy Dios nmibijctzoy, chi nyajnxich jäygidaacin ma Dios, nHuindzin Jesucristo ajt yTeedy, mïd miich ajcxy ycixpi. ⁴ Ti nnejhuïyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuïygixy tüg'óciy migügtijc. Mïd co miich ajcxy mjijp'ixy co Dios mïdity tijaty yujcpicy tzejpoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuïygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuïygixy co Dios mïdity tzejpoty huidi njijp'ijxyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'adiitzni ma tüg'óciy naax cajp etz mayjây mijpidaaccixy. Miich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ mïd jây ajcxy ycixpi, e nañ miich ajcxy mnejhuïyb tiydudägy Dios ytiy'ajt. ⁷ Jada tiy'ajt ti xyajnejhuïygixy je Epafra, ich ajt nmigüg huidibi ooy ndzocy njihuïyich, huidibi tudägy tumb ma Dios y'ayuc quipxyi mïd ich. Epafra ti xycodinäyich ma miich ajcxy, e tiydudägy miich ajcxy xyaj'ijxpijcy Cristo ytiy'ajt. ⁸ Epafra ti xyajnejhuïyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymooygixy, jigix ajcxy mdzogipy mjihuïhuipy tüg'óciy migügtijc.

⁹ Mïd jada ycixpi ich ajcxy jabom jabom Dios nmibijctzooyich mïd miich ajcxy ycixpi, jadu'n nduñich chondacy co oga'n nnejhuïyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhuiñhuïhuipy mnejhuïhuipy tüg'óciy Dios chojcin. Dios nmibijctzooybich co yi' Espíritu Santo miich ajcxy xyaj'ijxpijcy xyajnejhuïhuipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjugy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom

jabom yjacyujcpejtcixy yi m'ixpijcin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' mïdity ymic'ajt mijpi, jigix jëbi miich ajcxy jotcuyc myajnxipy etz mecxtujctähuip tüg'óciy tzaachypï etz ayo'n. ¹² Dios nmibijctzooybich co miich ajcxy agujc jotcuyc myajnxipy Dioscojuyip ma Dios Teedy, com Dios Teedy ajt xyajpocyñihuaatzim, e jadu'n ti xyñi'ixiym jëbi nbaatim tüg it lugar tzejpoty quipxyi mïd tüg'óciy mibijcpidijc huidibi tiydudägy tzi-naaygixp mïd Dios ytiy'ajt, jadu'n nipaady nejhuïy nej miich ajcxy mdzinäy ma je tixcin. ¹³ Ti Dios xyanhuädzäctuatim ma yi jibic-huinma'n ma je mujcu' xy'ane'mim, jadu'n nipaady nejhuïy ti xyajpidzimim agootztuum. Ti Dios xypidaacim ma y'ung y'ane'my, je' y'ung huidibi yi' ooy tzocy ooy jihuïy. ¹⁴ Dios y'ung ti xyajnihuädzäctuatim ma yi jibic-huinma'n co ñi'py temy yojcy ma yi cruudz mïd ajt nbocy ycixpi, e ti xypocy-huinmeecxim.

Co Cristo y'o'cy mïd ajt nbocy ycixpi, chi jotcuyc n'ijtim mïd Dios

¹⁵ Ca' pin ti ixyc Dios. Pinjaty ti ixyc Dios y'ung, jadu'n nipaady nej ti ixyc Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tüg'óciy tijaty yajpaatp jiiyb tzejpoty etz ya naaxhuiñgixy. Dios y'ung cojtay tüg'óciy huidibi jëbi huaad n'ijxim etz nañ cojtay huidibi ca' huaad pin ixyc. Dios y'ung pidaactay tüg'óciy y'ane'min tüg'óciy mic'ajt ya naaxhuiñ, etz nañ jadu'n pidactay ane'min mïd yi tzejpoty tzinaaybi. Dios y'ung ti yajcojtäy ti yaj'abadhiydäy tijaty mïd yägixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'óciy huidijaty ya yajpatp huijtz'ijtaayb. ¹⁸ Je Cristo ñihuindzin'ajtaayb ñigohuajc'ajtaayb, etz y'ane'mdaayb tüg'óciy jây huidibi mibijcip mijpidaacip. Je Cristo yajtzinaayb yajjugy'ajtpy tüg'óciy mibijcpidijc, com yi' je' huidibi jayijp ti yjugypicy co y'o'cy. Paady ycixp yi' cötujcin mijpi mïdity. ¹⁹ Dios hue' tzojcy co tüg'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñjây etz je tzejpoty tzinaayb ajcxy ca'oy'ijtcixy mïd Dios mïd je mijpocy ycixpi. Dios oy jäygidägy ooy jotcuyc najjihuïyi co y'ung y'o'cy cruudzäcixy mïd je mijpocy ycixpi e jadu'n oyñy nej jëbi je naaxhuiñjây etz je tzejpoty tzinaaybi ajcxy oy'ijtcixy mïd Dios.

²¹ Miich ajcxy co anajty ca' mmibijccixy je Cristo, ca' anajty oy m'ijtcixy mïd Dios. E jadu'n anajty m'ijtcixy nej tüg midzip ma Dios, mïd co jibicpi anajty

mdungixy, etz miidity ajcxy jibic ma mjot mhuinma'ñ. Per jadachambi je Cristo ti capx'oyy miich ajcxy je mdzip m'ejcin huidibi ajcxy miid Dios, co ti chinäy ya naaxhuiñ miid ñinix, e nañ co ti y'ögy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydëbi myajpáatcixipy ma Dios yhuindu duu janch oyjäy, janch huätzjäy, ca' ti pocy mmiidity, ca' ti xihuin yjac-hui'my ma Dios miid miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mijjp'ijxcixy co je Cristo xyajnidzögaani ajcxy yi m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adiichñi ma tug'óciy naax cajp, jadu'n nej jëbi jäy ajcxy y'alma yajnidzögipy. Nañ jadu'n ñich, Pablo ngapxhuäcxypich jada ayuc quipxy miid nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcujc nnayjihuiyijich co tzaachyp i minaxy nyaj-naxyich miid nninixich miid miich ajcxy ycixpi e jadu'n njacyajcixy njacyajca'pxich je tzaachyp i huidibi Cristo yajtzondac co yi' tzaachyp i minaxy yajnaxy miid je mibijcpidijc ycixpi e je mibijcpidijc ni paady nej Cristo ñinix. ²⁵ Dios ti xyyajniibicyich co ndunipyich miid yi jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tug'óciy Dios y'ayuc ytiy'ajt ma tug'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxëgy yi' ytiy'ajt. Cham Dios ti yajniguëxëgy yi' ytiy'ajt ma yi jäy ajcxy huidibi yi' yjäy'ajtipy. ²⁷ Dios oy nihuinmayi co anajty yajne-jhuñhua'ñ yi jäy ajcxy nidüg'óciy je oybi ayuc tiy'ajt huidibi jecy'ajty ca' pin nejhuñy. Yi' je' je' tiy'ajt co Cristo yajpaady ma miich ajcxy mjot mhuinma'ñ, paady ycixpi jëbi miich ajcxy mbaadip oy'ajtin jilby tzajpjoty.

²⁸ ñich ajcxy ngapxhuäcxypich Cristo y'ayuc, n'ñhuijpyich ngapxhuijpyich, nyaj'ixpijcpyich yajxon yi' Cristo ytiy'ajt ma tug'óciy jäy ajcxy, jaydëbi nyajquëxëgibich ma Cristo yhuindu nidüg'óciy mibijcpidijc ca'pxy yhuinma'ñ. ²⁹ Miid jada ycixpi nduñich mictägy miid tug'óciy je nmic'ajtich huidibi Cristo xymooybich jabom jabom.

2 Ndzojcpyich co miich ajcxy mnejhuñhuipy jadu'n nej mictägy nduuñich miid tajin mayin miid miich ajcxy ycixpi, etz miid yi' mibijcpidijc huidi jim Laodicea ycixpi, etz nañ tug'óciy mibijcpidijc ycixpi huidibi ti xy'ixyich ahuin ajijp. ² Mictägy nduuñich jaydëbi yi' mibijcpidijc paadipy jotcujc'ajtin ma y'ay yjot, etz jaydëbi ajcxy ñaychójcigixipy ñayjihuiyigixipy mabaad jëbi m'ijtcixy yjot yhuinma'ñ tú'ciy. Mictägy nduuñich jaydëbi je mibijcpidijc m'ijtcixy mij jotcujc'ajtin co ajcxy huinjhuidyähuñb Dios ytiy'ajt, je tiy'ajt huidibi jecy'ajty anajty ca' pin nejhuñy, je Dios ytiy'ajt maabi Cristo Jesús. ³ Ma je Cristo jim tug'óciy tiy'ajt janchyp i etz i-xpijcin janchyp i yajpaady. Jadu'n yi' ytiy'ajt etz y'ixpijcin nej tug'óciy jay'ajtin. ⁴ Jadu'n nimaaygixy jigix ca' pin oy cohuin'ñi e midigihuiipy oy ayuc ma miich ajcxy ooy ymibijcni, e ca'yjanchity. ⁵ Ooy ñich ngadim jimity, ixna' guëxna' ma miich ajcxy myajpatcixy. ñich njot nhuin-

ma'ñ ca' yi' jim ytigoy'ity ma miich ajcxy myajpatcixy. Jotcujc nayjihuiyijich co n'ijxcixy yajxon myajtüyögyixy tug'óciy etz mic'ajty mibijcin miidity ajcxy ma Cristo.

⁶ E miid jada ycixpi jadu'n nej miich ajcxy ti mgöbjcixy je Huindzin Jesús oga'n'aty, jadu'n ajcxy jactzi-naaygix jacjugy'ajtcix ma yi'. ⁷ Je tiy'ajt etz je mic'ajty jim yi' mbaatcixy ma Cristo. Yjacyujcpedipy ajcxy yi' m'ixpijcin ma Cristo ytiy'ajt jabom jabom. Ca' m'ixtigihuäcixy ma yi' mibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jäygidacacn ma Dios cixy jot huinjot jabom jabom.

Je jemybi jugy'ajtin huidibi Cristo xyajni'ixiijim

⁸ Ooy naygüend'ajtigix, ca' myajhuin'ingixy, co hu-ingjäy xyajhuinma'ñytigóoygixipy miid huingbi ayuc huingpi i-xpijcin huidibi jäy ci'm ti cojy ti macxy, huidi ca' choobaady, huidi nigooychachhuin'ingixp miid canaag ayuc huinma'ñ jadu'n nej poj naaxhuiñ huinma'ñ. Yi' jadu'mbi i-xpijcin huidibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tug'óciy ane'min ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy miid'ajttaayb tug'óciy huidi Cristo ymiid. ¹¹ Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'ñ je tiy'ajt co myajpatcixy ma Dios. Hue' je' yajtigooyb yi' pocytunñ huinma'ñ. Jada je' je' tiy'ajt huidi Cristo Jesús ypidac, ca' miich ajcxy xyjäy'adyii. Ca' miich ajcxy mdiy'ajttäy ma mninix. Tigach Jesús ytuuñ miid miich ajcxy, ca' yjadu'nity nej judíojäy ajcxy tiy'ajt pidaaccixy ma ñinix miid tzujc. ¹² Co ti mnibejtcixy miid Cristo yxii, jadu'n nipaady nejihuñy ti mnaax-tigiiygyixy quipxy miid Cristo co yi' ñaaxtigiiy. Co ti mmijpidaaccixy Dios ymic'ajty jadu'n nipaady nejihuñy quipxy miid Cristo ti mjugypijccixy co Dios yajjugypijcy y'ung co y'o'cy. ¹³ Co ca' anajty miich ajcxy Dios xyjäy'adyii, miid miich anajty ajcxy pocytunñ huinma'ñ jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tug'óciy mbocy, e jadu'n nipaady nejihuñy Dios ti xyajjugypijcixy quipxy miid Cristo. ¹⁴ Co Cristo y'o'cy ma yi' cruudz miid ajt nbocy ycixpi, jadu'n nipaady nejihuñy Dios ti xyjödzim xihuin huidi anajty xychaachtunaanim. Co Dios anajty yajtigooy ñich ajt nxihuin, jadu'n nipaady nejihuñy ti mijxojtzpety je xihuin necy ma Jesús ycrudz. ¹⁵ Co Cristo y'o'cy cruudzcxixy, chi ycodigooy je ca'oybi ymic'ajty, etz je poj naaxhuiñybi ymic'ajty. Chi je Cristo yajtzo'yduñ je ca'oybi etz je poj naaxhuiñybi co yajcijxy yajnaxy ma jäy yhuindu.

Tzojccix nijot'ajtcix tug'óciy huidijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihuipy etz xyñimähuipy:

—Amay'at jada jicxy picy, etz amay'at jada xii, etz amay'at je jemybo', etz amay'at yi' Sábado xii. ¹⁷ Jecy'aj-

ty jäy jadu'n ti yajtuñ yijadu'mbi huinma'ñ, jayijpni ca' anajty Jesucristo ymiñiñ ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyty. ¹⁸ Ca' huaad yi jäy ajcxy xypijci je Cristo y'oy'ajtñ huidibi ajcxy mbadamyb. Yi' ajcxy huidi oygohuin'ñiñ naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuüyigixy miid co tzachmijpidaaccixy yci'mhuinma'ñ etz ñinixc chojcín. ¹⁹ Yi jadu'mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpidijc. Je mibijcpidijc Cristo yajyeecp ma ajcxy ymibijcín jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg jäy ñinixc miid ycohuajc huidi ane'm je ñinixc etz miid emy huidibi yajyücxtaayb je ninixc.

²⁰ Co miich ajcxy ti mmibicy Cristo, jadu'n nipaady nejihuüy ti m'óccixy quipxy miid Cristo, e nañ ti mbidzimgixy ma yi' naaxhuiñy jäy yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej ihuüy yi' naaxhuiñy jay yhuinma'ñ xy'ane'mgixy? ¿Na'amy co mjaccuydungixy yi' jäy ajcxy ycötujcín huidibi minaamb co ca' huaad mgoniggy jada, ni ca' huaad mjicxgy jada, ni ca' huaad nidoñ yijimbi? ²² Tüg'óciy huidibi ngonixim, njicxim, e nnidonim, co ytundäy, chi ytigoydäy. Yi' jadu'mbi huinma'ñ ci'm jäy ajcxy cojcixy macxcixy, e nañ ci'm jäy ajcxy yaj'ixpajcixy huidibi ca' yajpaady ma Cristo. ²³ Yi' jadu'mbi cötujcín jadu'n yquëxiggy nej ooy y'oyity ooy y'oyimbijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachytungixy ñicx ycohuajc. Yi' jadu'mbi cötujcín ca' ti mic'ajt miidity, com co ca' jadu'n jëb yajtigoy jibic-huinma'ñ yi' jadu'mbi cötujcín.

3 Miich ajcxy huidibi ti mmibicy je Cristo jadu'n nipaady nejihuüy ti mjugypijccixy quipxy miid Cristo, e jemybi jugy'ajtñ ti myajtzondaaccixy. ² Ixtaaygixy je tiy'ajt huidibi tzomb tzajpjoy ma je Cristo yajpaady ma Dios ymijc a'oy'amybi, e yi' je' je mij'ane'mbi. ³ Co ti mmibijccixy je Cristo jadu'n nipaady nejihuüy co ti m'óccixy miid yi', etz ma je Cristo jemybi jugy'ajtñ miich ajcxy ti mbaady. Jadachambi yi' mjugy'ajtñ Cristo miid c'ám, e yi' yajpaatp ma Dios. ⁴ Co anajty je Cristo ñayguëxiggyii jadüg'oc ya naaxhuiñ, huin'it xii miich ajcxy mnaybada'ñyii miid yi' jilby tzaipjoy ma yi' oybi it.

Je jecy jugy'ajt etz je jemybi jugy'ajt

⁵ Yajtigooygixy je jibic-huinma'ñ huidibi miich ajcxy miid, huidibi naaxhuiñy jäy ajcxy yhuinma'ñ'ajtp. Ca' huaad miidcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninixc chojcín, etz huidibi ca'p y'oyhuinma'ñity. Ca' huaad m'adzogipy comeeñ'adii, com ñipaapty jadu'n nej ajcxy huidibi tzaadzech quipychech ojadajtp. ⁶ Miid co jäy ajcxy jadu'n ytundigooygixy, paady ycixpi jacjiini Dios

tzaachytunip jäy ajcxy huidibi ca' ycapxymidoogixy yi' ycötujcín. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty miid jibic-huinma'ñ quipxy miid je jacjadyii naaxhuiñy jäy co anajty mguydungixy yi' jäy ycötujcín huidibi ca' ytiy'ajtiy. ⁸ Jadachambi ixmajtzicx miich ajcxy yi' jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'ojijygixy, jadu'n nej co jibic ayuc mgapxcixy. ⁹ Ca' huaad mnayhuin'ñinigixy miñ xyipy. Co ti mmibijccixy Cristo ti m'ixmajtzicixy je jibicjot je jibic-huinma'ñ huidi anajty ajcxy miid. ¹⁰ Jemybi jot jemybi huinma'ñ ti mbatcixy e Dios yjacyejcy jemybi jot jemybi huinma'ñ jabom jabom ma miich ajcxy co m'ixpajccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ miidity, je Cristo huidibi ti yaj'oyy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijejity ajcxy miid griegojäy y'ixpajcín etz jacjadyii miid judíojäy y'ixpajcín, ca' ñejity pen ti myajtiy'ajttiy o ca' mdiy'ajttiyity. Ca' ñejity co nijejity ajcxy jiguëgy choñ, e ca' y'ixpicyty, etz jacjadyii ooy adzip ahua'n ñaybidáacigixy. Ca' ñejity co nijejity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuädzi ajcxy mjot mhuinma'ñ, paady ycixpi pidaaccix mjot mhuinma'ñ co mba'ayoohuaangixy migügtijc. Pidaaccix mjot mhuinma'ñ co oyjäy'ajtñ mdunaangixy etz co nicy xemy mnaybidáagaangixy. Pidaaccix mjot mhuinma'ñ yung naxy etz mimecxtujccixy migügtijc ajcxy.

¹³ Naymimecxtújcigixy nidüg nidüg. Co mmigüg ajcxy xymidundigooyipy jëbi mhuinmeecixy tim jadu'n nej iich ajt nHuindzin Jesucristo ti mecxy miich ajcxy mboocy. Com Cristo ti xyhuinmeecixy, paady copicy miich ajcxy meecixy yi' migüg huidibi ajcxy xymidundigooyb.

¹⁴ Mnaychójcigixy nayjihuiygixy nidüg nidüg. Co mnaychójcigixy nayjihuiygixy, chi jëb huaad mdzinaaygixy miid mjot mhuinma'ñ tú'ciy. ¹⁵ Je jotcujc'ajtñ huidibi Dios xymooyim, huen ajcxy xy'ane'mi mjot mhuinma'ñ. Dios ti xyajni'bijccixy, jaydëb tú'ciy m'ijtcixy miid mjot mhuinma'ñ. Mjatytim yajnaxipy ajcxy jäygi-daacin ma Dios jabom jabom.

¹⁶ Naybidáacigixy co je Cristo y'ayuc ytiy'ajt yajtigiy-dähuamyb ajcxy mjot mhuinma'ñ. Nayyaj'ixpajcigixy etz nay'ihuijigixy naygapxhuijigixy miid je Cristo y'ayuc ytiy'ajt, jadu'n nej Dios i'xpajcín yecy. Iigix Salmo etz igix himno etz yi' iy huidibi je Espiritu Santo ypidägy ma mjot mhuinma'ñ, e jadu'n jäygi-daacin m'ijtcixy ma ajcxy mjot mhuinma'ñ miid Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix miid ajt nHuindzin Jesús

yxii. Etz jatytim yajnajxcixy Dioscojuyip ma Dios Teedy ma Jesucristo yxii.

Je mibijcpidijc ajcxy chinaayin ma ypijchinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n ñich ajt nHuindzin Jesucristo tzocy co mgapxymidohuipy ajcxy mñäy. ¹⁹ Miich yëydijctijc ajcxy, tzojccix jihuiygix ajcxy mdöxyijc, ca' ejcin mmi'idipy miid mdöxyijc. ²⁰ Miich ajcxy ung anäg, mgapxymidohuipy ajcxy mdaj mdeedy miid tüg'óciy. Jadu'n Dios jäygidägy co ung anäg ajcxy capxymidooy ytaj yteedy. ²¹ Miich ajcxy ungedeedy ca' oyñinej mmi-gapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjocyty co nicxy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindñxcixy, e chi co je' yjihüacni, chi nigoo mhuäccixni mdinaaygixni. Hue' janchtiy oy tungixy miid oyjot oyhuinma'ñ, com je' je' je' tiy'ajt co Dios mhuindzigiygixy. ²³ Je tung huidibi mdungixyp, tungix cixyot huinijot. ²⁴ Com miich ajcxy mnejhuüyb co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumyb. ²⁵ Dios chaachytunipy pinjaty tundi-gooyb. Ca' Dios huin'ixpety tzaachytunipy jäy.

4 Miich ajcxy yajtumbidijc, yajtungix mdumbi nej ypadyii etz nej ytudägyty, com miich ajcxy mnejhuüyb co nañ miid miich ajcxy tüg mHuindzin jii by tza-jpjoty.

² Jabom jabom Dios mibijctzoogix, ca' m'ixmajtcixy Dios mibijctzoohuin. Huiyy ycuyc m'idipy ajcxy etz jatytim yajnajxcixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios miid ñich ajcxy ycixpi. Mibijctzoogix Dios co huen it lugar xymöhuübyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuüy. Miid co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios miid ñich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuiygixy, jadu'n nej ypadyii ngapxhuäcxybyich.

⁵ Tiydudägy mdzinäaygixipy miid yi jäy ajcxy huidibi ca' mibijccixy Cristo. Yajnigüexëccix miich ajcxy Dios ytung jabom jabom, ca' huaad xii tiempo myaj'ay-oogixy. ⁶ Yi mgapxin yi mmiydaacin yajtungix oy'amy huindzigif'amy nej jëbi huaad jäy ajcxy jäygidaaccixy. Copicy mhuinmayipy ajcxy jayijp nej jäy huaad m'ad-zoogixy.

Je capxpooxñin huidibi cogixiñiñip je ñecy

⁷ Tiquico co ñicxipy jim ma miich ajcxy, yi' xyyajmiid-miydäaccixipy tüg'óciy nej ytunyii yjadyii ma ñich. Ooy ndzocy njihuüyich ñich ajt nmigüg Tiquico. Yi' ooy tudägy ytuuñ quipxyi miid ñich ajcxy ma ajt nHuindzin Jesucristo ytung. ⁸ Paady yam nguexyich Tiquico ma miich ajcxy jigix ajcxy xyajmiidmiydägipy nej yam ñich ajcxy nyajpaatcixy, etz nañ jigix xyjotmicmigäpccixipy. ⁹ Quipxyi miid Tiquico yam nguexyich Onésimo, tüg ajt nmigüg huidibi ooy ndzocy njihuüyich, huidibi tudägy ti ytuuñ miid ñich ajcxy. Onésimo miich ajcxy yi mmi-gogajp. Tiquico y Onésimo xyajmiidmiydägip ajcxy tüg'óciy tijaty tuunip jajtíp yam ma ñich ajcxy.

¹⁰ Je Aristarco, huidibi pujxtijc iñaayb quipxyi miid ñich, cham quexy capxpooxñin ma miich ajcxy. Marcos, je Bernabé y'uch, cham quexy capxpooxñin nañ jadu'n ma miich ajcxy. Ti ñich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcuyc. ¹¹ Nañ jadu'n je Jesús huidibi jäy ytijpy Justo, cham quexy capxpooxñin ma miich ajcxy. Yi Aristarco, Jesús etz Marcos yi' ajcxy ni tugigpajc, judíojäy huidibi tumb miid ñich ma Dios ytung co ngapxhuäcxyich Dios y'ane'min. Yi nidugigpi ñich ooy ti xyajjotcuyc'atyich. ¹² Je Epafra, miich ajcxy mmigogajp je Cristo ytumbi, nañ jadu'n cham quexy capxpooxñin ma miich ajcxy. Je Epafra jabom jabom Dios mibijctzoy miid miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayyéjcgix amumdügjot ma Dios, e jadu'n ajcxy mguydunipy nej Dios tzocy. ¹³ ñich jëbi tiy'ajt nyecyich co Epafra ooy jotmay jihuiy miid miich ajcxy ycixpi, etz nañ ooy nidajy nimay miid yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuiygixy etz Dimas nañ cham ajcxy quexy capxpooxñin ma miich ajcxy.

¹⁵ Yajnajxcix ñich ngapxpooxñin ma yi mibijcpidijc jim Laodicea. Nañ yajnajxcix ñich ngapxpooxñin ma yi Ninfas etz ma yi mibijcpidijc huidibi yöymujccixp ma yi' ytijc. ¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nquexyich jim Laodicea. ¹⁷ Tungix may'ajt mniämähuipy je Arquipo co huen cuydudäy je tung huidibi ñich ajt nHuindzin je Cristo ti yajniibedyii.

¹⁸ ñich Pablo, ñich cí'm njaaybich jada capxpooxñin ma miich ajcxy. Ca' ajcxy mjäydigoyipy co ñich nbujxtijc iñäy. Huen Dios may'ajt oy'ajt tunipy miid miich ajcxy ycixpi. Jadu'n ngapxcixyich. Amén.

1 TESALONICENSES

1 Ich Pablo mid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy mid miich ajcxy etz xyajjotcugfiygixip.

Je mibijcin huidibi anajty yejcpy ijxpejt

²Jabom jabom ich ajcxy nyajnaxyich jäygidaacin ma Dios mid tüg'óciy miich ajcxy ycixpi. Jabom jabom ich ajcxy Dios nmibijctzooyich mid miich ajcxy ycixpi nidüg'óciy. ³Co Dios Teedy nmibijctzóoygixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyjäy'ajtin mdungixy etz jadu'n nej mdzojccixy mjihuüygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jii by tzajpjoty, e ca' mjetmetzciygixy.

⁴Migügtijc ajcxy, ich ajcxy nejhuüyb co Dios xychojccixy xyjihüügixy, e nañ ich ajcxy nejhuüyb co Dios ti xyhuin'ijxcixy. ⁵Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mjihuinma'ñ mid Dios yjihüü'ñ ymic'ajt. Jotcujc nduunich ma miich ajcxy. Miich ajcxy mnejhuüyb co tudägy nduunich jigix jëbi mmijpidáaccixy Jesús y'ayuc ytiy'ajt.

⁶Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigüygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷Co tzaachypit ti mminajxcixy ti myajnajxcixy mid Jesucristo ycixpi, chitiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸E jadu'n miich ajcxy ti myejccixy je ijxpejt mid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naaxcajp. Je mayjäy ti nejhuüydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹Je mayjäy ma canaag'it naaxcajp ooy ñaymidmydáacigixy jadu'n nej ich oy ngogapx'yich miich ajcxy, etz nañ jadu'n nej ich miich ti xycöb'ijccixyich e nañ je mayjäy ñaymidmydáacigixy jadu'n nej ti m'ixmajtzcixy yi tzaadzech ojadadä, e ti mbadüdigüygixy je Dios juugypit janchypit etz tudägypti.

¹⁰Nañ jadu'n je mayjäy ajcxy ñaymidmydáacigixy

jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuiñ, chona'ñ tzajpjoty. Je huidibi Dios ti yajjuygypit co ti y'ögy. Yi' je' je Jesús huidi ti xycohuaanim ma yi mijp'it tzaachypit huidibi Dios yquexamyb mid co jäy ajcxy chach pocytungixy.

Pablo ytung huibidi anajty ymid jim Tesalónica

2 Migügtijc ajcxy, mnejhuüyb ajcxy co ca' ñaadig'aty, co ich oy ngapxhuäcxy Dios y'ayuc ytiy'ajt ma miich ajcxy. ²Miich ajcxy mnejhuüyb co jayijp ca'ni anajty nmechich ma miich ajcxy ich ajcxy ooy tzaachypit etz ayo'n ti nyajnajxcixy jim Filipos. Ti jäy xyhuin'oy xyjijp'ojyich. Co nmejchich ma miich ajcxy, ca' ñejity co tzaachypit ti mminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcchich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ich jäy anajty xyca'ixa'ñ xycatzoga'ñ. ³Ca' ich ngapxhuäcxyich anñ, ni jibic ayuc, e ni ngamiydägyich jibic ayuc jibic huinma'ñ nej huaad huin'ingixy. ⁴Ca' ti huin'ingixy. Dios ti xyajnbicyich co ngapxhuäcchich yi' y'ayuc ytiy'ajt, e jadu'n nguyduunich. Ca' nduunich co huen jäy ajcxy jäygidägy ich ndung. Jada janchity ndumybich jigix Dios jäygidägypti ich ndung. Com Dios yi' ñejhuüyb nej jäy tüg'óciy yjot yhuinma'ñ midity. ⁵Miich ajcxy mnejhuüyb co ca' nyajxondaaccixy mid ayuc oyjatypit huidi ca' choobaady. Nañ ni ca' ich ajcxy huinma'ñ 'ijxtäy nej jëbi ich ajcxy nmeefybaat. E Dios nañ ñejhuüyb co yjanchity jada. ⁶Nañ ni ca' ich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcchich yi' y'ayuc, paady ycixp jëbi ixypit n'ane'myich co ixypit miich ajcxy xyajmij'atyich etz xypubetyich, per ca' jadu'n ti nduunich. ⁷Oygixy oy'amy ti nduunich ma miich ajcxy, jadu'n nej tüg'ungdaj midity y'ung y'anäg mid oytot oyhuinma'ñ. ⁸Ti ich miich ooy ndzojccixy njihuüygixy, canan jëyi Dios y'ayuc ytiy'ajt ti nmooygixy, nañ naygyegäänibich anajty ma yi o'cin mid miich ajcxy ycixpi. ⁹Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ich ajcxy nduun' n'ayooyich anajty xim tzuum mid ich ajcxy ngaayin n'uucin ycixpi. Ca' anajty n'adzibaangixy, paady ich ajcxy nduun' n'ayooyich xim tzuum mid ich ajcxy ngaayin n'uucin ycixpi.

¹⁰Miich ajcxy huibidi mibijcp mnejhuüyb ajcxy, e nañ ñejhuüyb Dios, co ich ajcxy ndzinaayich ma miich

ajcxy tudägy, huädz ðich anajty ajcxy njot nhuinma'ñ m'ðididyich. Ca' ma ndundigooyich ajcxy nej pin xy'oc-nihuambedyich ajcxy. ¹¹ Mnejhuuÿyb miich ajcxy nej n'ñhuuÿicy ngapxhuuÿicy etz njotmicmigapxcicy nidüg nidüg, ðim jadu'n nej tüg ungedeedy ðhuuÿy capxhuuÿy y'ung y'anäg. ¹² Tñ ngapxhuuÿicy co ooy chach copicyity co mdzinäaygixipy nej Dios jëbi jäygidägipy yi mdzinaayin. Com yi' miich ajcxy ti xyhuin'ijxcicy jëbi mdigÿyigixipy ma yi' chinaaydac, ma yi' müdity y'oy'ajtñ ymij'ajtñ.

¹³ Paady ycixpi nyajnajxpich jäygidacñ ma Dios jabom jabom, jadu'n nej miich ajcxy anajty ti mmi-do'mbijccicy etz ti mgöbijccicy Dios y'ayuc ytiy'ajt huidi ngapxhuäcxich ma miich ajcxy. Ti mmi-bijccicy anajty co ðich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp.

¹⁴ Migügtijc ajcxy, jadu'n ti mjajticy jadu'n nej yjajty müd je judfojy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuuÿijti ypahuijti. ¹⁵ Je judfojy ymidzipt-zoon ðich ajt nHuindzin Jesús, e chi yaj'o'cy ajcxy, ðim jadu'n nej ajcxy y'ap yteedy yaj'o'cy huudijaty anajty Dios y'ayuc najtcapxÿyipy jecy'ajty. Etz nañ jadu'n ajcxy xyajpidzimyich jim ma ajcxy judfojy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'ócy jäy. ¹⁶ Yi judfojy ajcxy ti cap'adujccicy co ca' huaad ngapxhuäcxyich je Cristo ytiy'ajt ma yi jäy ajcxy huidibi ca' yjudfojyity, nej huaad ajcxy y'alma ñidzóccixipy. Co jadu'n ajcxy ytundigooy, chi ajcxy ooy nigÿ ypocy ñibety ma Dios. Per Dios ti ooy chip y'ejcñ pidacy ma judfojy müd ajcxy ypocy ycixpi.

Pablo ñijot'ajtp co ñicxy cogapxñhuaangixy yi mibijcpidijc

¹⁷ Migüctijc ajcxy, cham hueeni xii tiempo ti ñaxy ma ca' n'oc'ijxcixni ajcxy, per ca' ðich miich ajcxy njäydigoy. Ooy ðich ajcxy nja'ñicxa'ñ ma miich ajcxy jadüg'oc, e ca' y'oyÿ nej ðich ajcxy ñicxÿyich ma miich ajcxy. ¹⁸ Ooy ðich ajcxy njanicxa'ñ anajty ma miich ajcxy. E ðich, Pablo, c'i'm anajty njanicxa'ñich mejtz'oc tugÿg'oc, e je mujcu' nn'aa ndü'aa ti xy'adujcich. ¹⁹ ¿Ti mij'ajt miich ajcxy mdijy njijp'ijxpich? ¿Ma mdijy ajcxy nbada'ñich njotcujc'ajtñ n'oy'ajtñ? Co anajty ajt nHuindzin Jesucristo yhuimbity ya naaxhuuñ, nbadaamybich jotcujc'ajtñ etz oy'ajtñ mij'ajtñ müd je tiibi nduun'ich ma miich ajcxy co ti mmi-jpidaaccixy Dios y'ayuc ytiy'ajt. ²⁰ Müd miich ajcxy ycixpi nmüdich jotcujc'ajtñ etz xon-daacin.

3 Müd jada tajñ mayin co ðich anajty ca' nmimadäga'ñ müd miich ajcxy ycixpi, paady ðich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich ðich ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi müd ðich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy ðich n'ayuc etz

xyjotmicmigapxip ajcxy, jigix jac mic ajcxy myajpaadip ma mmi-bijcin. ³ Jadu'n Timoteo ytunipy ma miich ajcxy jigix ca' mhuinma'ñytigóoygixip müd je tzaachyp huidibi ajcxy mminajxyp myajnajxyp. Miich ajcxy mnejhuuÿyb co copicy myajnajxipy ajcxy tzaachyp müd Jesucristo ycixpi. ⁴ Co oga'n n'ijtyich ma miich ajcxy, chi ðich miich ajcxy nnimaayich co tzaachyp mminajxcixipy myajnajxcixipy müd Jesucristo ycixpi. E miich ajcxy cham mnejhuuÿygixyp co janch tiy'ajt jadu'n nej nni-maaygixy, müd co cham tzaachyp mminajxcixy myajnajxcixy. ⁵ Com nejhuuÿybich co tzaachyp mminajxyp myajnajxyp ajcxy, paady ycixpi tajpich maybich müd miich ajcxy ycixpi. E com ca' nmimadäga'ñich je tajñ je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmi-bicy. Tzigÿyich anajty co ndijy je mujcu' ti xyajhuinma'ñytigóoygixy, etz jadu'n anajty ñaadig'ada'ñ ðich ndung ma miich ajcxy.

⁶ Jadachambi Timoteo ti xyñihuimbityich, chooñ ma miich ajcxy jim Tesalónica, etz ti xyajnejhuuÿyich jadu'n nej miich ajcxy mmi-dity mmi-bijcin, etz nañ ti xyajnejhuuÿyich jadu'n nej mnaychójcigixy mnayjhuuÿyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäyechich etz xychocy xyjihuuÿyich, etz nañ ooy miich ajcxy xyja'ixáangixyich jadüg'oc, jadu'n nej ðich miich ajcxy nañ jadu'n ooy nja'ixaangixy.

⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicy tiydudägy yi mibijcin, chi mij ooy ti njotcugÿyich. ⁸ Jadachambi jëbi njactzinäyich jotcujc, com ti nnejhuuÿyich co miich ajcxy ca' m'ixtigÿhuäccixy ma mmi-bijcin. ⁹ Nyajnajxpich jäygidacñ ma Dios yhuinduu müd miich ajcxy ycixpi, müd co janch jotcujc nayjhuuÿyijich co miich ajcxy ca' m'ix-tigÿhuägy ma mmi-bijcin. ¹⁰ Xim tzuum mmi-bijctzooyich Dios müd tüg'ócy njot nhuinma'ñich, jigix Dios xyaj'ahuáatzibich nn'aa ndü'aaajich, jëbi nnicxyich c'i'm ma miich ajcxy, jaydëbi njacyaj'ijxpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmi-bijcin ma mjacyajtigoy'ijtcixy.

¹¹ Njijp'ijxypich co Dios Teedy c'i'm etz ajt nHuindzin Jesús xyaj'ahuáatzibich nn'aa ndü'aa jigix ñicxy n'ijxcicy jadüg'oc. ¹² ðich ajcxy ndzojcpy co ajt nHuindzin Jesucristo xyjacmóoygixipy tzojcñ jihuÿyñ, jigix nigÿ ajcxy mnaychogÿyb mnayjhuuÿyib miñ xyipy, e nañ nigÿ mdzójcxipy mjihuÿyigixipy tüg'ócy je mayjäy, ðim jadu'n nej ðich miich ajcxy ndzocy njihuÿy. ¹³ ðich ajcxy ndzojcpy co Dios xyaj'ijtp ajcxy mjot mhuinma'ñ tüc-c'i'y ma Jesucristo ytiy'ajt, e ca' m'ixtigÿhuäccixy, jigix co anajty ðich ajt nHuindzin Jesús ymiñ jadüg'oc ya naaxhuuñ müd tüg'ócy je mibijcpidijc huidibi müd huädz yjot yhuinma'ñ, jëbi miich ajcxy mnayguëxÿgÿyb ma Dios Teedy yhuinduu müd huädz mjot mhuinma'ñ, ca' ti xñhuin ma Dios müd miich ajcxy.

Je tzinaayin jugy'ajtñ huidibi Dios yjäygidacyp

4 Jadüg nax, migügtijc ajcxy, jadachambi may'ajt nbijctzooyich, e nyajñibijccicy müd ajt nHuindzin

Jesucristo ycxipi co ajcxy mjaccuychinähuiipy Dios y'ayuc ytiy'ajt, jadu'n nej ti nyaj'ixpicyich miich ajcxy, etz mjactzinähuiipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuüyb je cötujcin huidibi ti nyaj'ix-pijccixy. Jada cötujcin ñich ajt nHuindzin Jesucristo ti xyajnißicyich. ³ Miich ajcxy mnejhuüyb je cötujcin jadu'n nej Dios tzocy co huädz jot huädz huinma'ñ myajtúngixipy ma yi mdzinaayin mjogy'ajtin. Ca' huaad mmigapxtigoogyixy tüg töxyjäy. ⁴ Miich ajcxy mnejhuüyb Jesús ycötujcin co copicy nidüg nidüg yëdijc pigipy tüg töxyjäy etz yajmij'adip ytöxyijc, etz nañ mïddzinähuiipy mïd oyjot oyhuinma'ñ. ⁵ Ca' Dios jadu'n tzocy co je yëydijc nijot'aty töxyjäy mïd jibic-huinma'ñ, jadu'n nej yi jäy ajcxy y'dëich huidibi ca' ne-jhuüy Dios ytiy'ajt. ⁶ Ca' huaad ni pin migapxtigooyi ymigüg ytöxyijc, com Dios y' tzaachytunïb mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xy-huin'ixim jigix oyjot oyhuinma'ñ ndunim, canan co ndunim jibic jot jibic-huinma'ñ. ⁸ Co tüg jäy ytundigooy mïd huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ñich ajt.

⁹ Miich ajcxy mnejhuüyb je cötujcin co copicy md-zogipy mjihuühuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijct-zooybich co jacnaychójcigix jacnayjihuüiyigix. ¹⁰ Janch tiy'ajt jadu'n co miich ajcxy mdzocy mjihuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnay-chójcigixy nayjihuüiyigixy etz mnayyajmij'ájtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'ñ ma mgi'mdzinaayin, etz nañ jatytim naymidúunigix. Jada tiy'ajt ti najtzcapxiy' ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojycpich co miich ajcxy mhuin-jihuühuip je tiy'ajt ma je' yajpaady y'alma je migügtijc tibi y'öccixy, jigix ca' mdájicixipy mmáyigixipy, jadu'n nej je jäy ajcxy nidajcixy nimaygixy huidibi ca' mibijc-cixy co Jesús yajjugypiga'ñ jadüg'oc je tibi ajcxy y'o'ccixy. ¹⁴ Jadu'n nej ñich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'ñ je öcpidijc huidijaty ajcxy mibijc Jesús.

¹⁵ Paady ycxipi ñich miich ajcxy nnimaaygixy co ajt nHuindzin Jesús tiy'ajt ti yecy co ñich ajt huidibi jacjuy'ajtp co anajty Jesús yhuimbity ya naaxhuiñ, tüg-mucy xyajnicxaanim mïd yi mibijcpidijc tibi y'o'ccixy. Ca' ñich ajt njayijp'adaanim yi tibi y'o'ccixy, yi' ajcxy jayijp'adamb. ¹⁶ ñich ajt nHuindzin Jesús c'm yhuimbida'ñ ya naaxhuiñ chona'ñ tzajpjoty mïd ycötujcin, mïd ymic'ajtin, e yi' mic capxamb ane'mamb. Huimbidamb Jesús quipxyi mïd tüg ángel mïjtungmïdipi huidibi nañ

jadu'n mic capxamb ane'mamb. E co anajty yhuimbity, chi Dios yajxuxa'ñ yi' ytrompeta, e tim huin'itiy Jesús xyajpidictähuaanim ya naaxhuiñ, e chi ajt nay-badaanim mïd Jesús jocjoty. ¹⁷ E chi ñich ajt huidijaty anajty jactzinaayim, naybadaanim mïd ajt nHuindzin Jesús jocjoty quipxyi mïd je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitempo mïd ajt nHuindzin Jesús. ¹⁸ Mïd jada ayuc tiy'ajt nayyajjotcugfiyigix miñ xyipy.

5 Migügtijc ajcxy, ca' ycopicity njacnijayfiyigixipy jadu'n nej je xii je tiempo yca'pxa'ñ. ² Miich ajcxy mnejhuüyb co ñich ajt nHuindzin Jesucristo yhuimbida'ñ ya naaxhuiñ tzaachytuna'ñ yi mayjäy mïd ypocy ycxipi. Jesús miinaamb mina anajty je mayjäy ca' ti ocjijp'ijxni. Jadu'n ymiina'ñ jadu'n nejjihuüy tüg meetzpi ymiñ coodz co ymeedza'ñ. ³ Co anajty je mayjäy ymiñ naangixy: "Cham ooy jotcujc ndzinaayim, ca' ma tzip capxy", chi timitiina jotcömoñi Dios yajtigoya'ñ je naax-huiñybi. Timitiina ayo'n ñimiiniyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'ñ. E ni pin huaad cacöguëgipy je tzaachypí co Dios anajty ymiñ ya naax-huiñ yajtigoydähua'ñ yi mayjäy. ⁴ Per migügtijc ajcxy mïd miich ajcxy Dios ytiy'ajt, paady miich ca' jadu'n myajpáatcixni nejjihuüy mdzinaaygixy agootztuuby. Ca' ajcxy mgixipy mgüedipy mina anajty Jesús miiñ jotcö-moñi, jadu'n nej jäy nigoobi ycixy ycuecy co ti ymeechy. ⁵ Com tüg'óciy miich ajcxy Dios y'ayuc ytiy'ajt mhuinjihuüiyigixy, jadu'n nipaady jadu'n nejjhuüy ti mgoximiygixy ti mgodixccixy. ñich ajt ca' njacyaj-paatim agootztuuby. ⁶ Paady ycxipi ca' huaad njaydi-gooyim Dios ytiy'ajt, ca' huaad nm'öctigooyim jadu'n nej yi jacjaydyii jäy ajcxy huidibi ca' cuenditun Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ym'öctigoy. Ijtcix ni'ixë mïd tüg'óciy Dios y'ayuc ytiy'ajt. Mi'ijtcix huivy cujc mjot mhuinma'ñ. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ ñich ajt huidibi nnejhuüyim Dios ytiy'ajt, copicy huivy ycuyc ajt ndzinaayim, e nañ copicy nmibijcim Jesucristo e nañ naychójcigix nayjihuüiyigix miñ xyipy, jadu'n nipaady nej soldadtijc ñaygohuáanigixy mïd pujx huidibi ymiñ ma ycaach. E mïd co njijp'ixim co Dios xyajnidzö-gaanim ajt n'alma, jadu'n nipaady nejjihuüy soldadtijc ñaygohuáanigixy mïd ypujxcöjup. ⁹ Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jëbi paatim nidzoocin co nmijpidaacim ñich ajt nHuindzin Jesucristo. ¹⁰ Jesucristo ti y'ögy mïd ajt nbocy ycxipi, jigix jëbi huaad ndzi-naayim jiiiby tzajpjoty quipxyi mïd yi', ca' ñejty pen ti anajty n'o'cim o pen jiiñ anajty njogy'ajtim co anajty Jesucristo yhuimbity ya naaxhuiñ. ¹¹ Paady ycxipi jac-nayjotmicmigápigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuivy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich

ajcxy miid Dios y'ayuc ycixpi. Yi' ajcxy huidibi xya-jni'ixiyb Dios y'ayuc ytiy'ajt, yi' ajcxy xycapxhuijip miid ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcixipy miid je Dios ytung ycixpi huidibi ajcxy ytumyb ma miich ajcxy. Tzi-naaygix jotcuyc ca' ma tzip capxy.

¹⁴ Nañ jadu'n, migügtijc ajcxy, nyajni'bijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjomimigapxip huidibi ajcxy tajp maayb, etz nañ mbubedipy ajcxy huidibi hueeni miid ymibijcin, etz yajtungix mecxtujcin miid tüg'óciy migügtijc.

¹⁵ ñich miich ajcxy nimaayb co ca' ni pin huaad yaj'ahuimbidip jibic ma ymigüg huidibi ti ymidundi-goyii. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyjäy'ajtin mdunipy ajcxy miid tüg'óciy naaxhuiñyjäy.

¹⁶ Jatytim miid'ajtcix jotcuyc'ajtin jabom jabom.

¹⁷ Capxtaaccix etz mibijctzoogix Dios jabom jabom.

¹⁸ Yajnajxcix jäygidaacin ma Dios pen ji ajcxy mjaajtcixy ayoogixy nejaty, com Dios ooy yjotcuycity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom miid tüg'óciy huidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymi-doohuim je Espíritu Santo huin'it nyajtigooyim Dios

yjihui'ñ ymic'ajt huidibi yajpatp ma ñich ajt. ²⁰ Yajjotcu-jc'ajtcix huenpinity pin Dios y'ayucpidzimb ma miich ajcxy. ²¹ Jëyi janchtiy m'ixipy peni quipxyiyb miid Dios y'ayuc huidibi ajcxy ycapxyp. Mijpidaaccix je ayuc tiiybi. ²² Ixmajtcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcu-jc'ajtin, co ajcxy xyajhuaatztaayip mjot mhuinma'ñ ma yi' jibicpi. Dios nmibijctzooybich co yi' ci'm xy-cuendi'ajtip huädz oy yi' m'alma ajcxy, etz yi' mjihui'ñ, etz mnïc x mgohuajc, ca' ma pocy yquëxgy, ixti mabaad anajty ñich ajt nHuindzin Jesucristo ymiiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc miid miich ajcxy.

Capxpooxin huidibi cijxnip je necy

²⁵ Migügtijc ajcxy, mibijctzoogix Dios miid ñich ajcxy ycixpi.

²⁶ Naygapxpóocxigix xic xon nidüg nidüg miid oyjot oyhuinma'ñ.

²⁷ Nhuindzin Jesucristo ajt ti xyajni'bicyich jada tung, paady nyajni'bijccixy co jada necy mgápccixipy ni'abidzimy ma tüg'óciy mibijcpidijc.

²⁸ Dios nmibijctzooybich co ñich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

1 Ich Pablo mid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy mid miich ajcxy etz xyajjotcugñygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnajxypich jabom jabom jäygidaacin ma Dios mid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcipy Jesucristo nigí jabom jabom, etz nañ nigí jabom jabom naychójcigixy nayjihuñyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachyipi etz ayo'n huidibi ajcxy mminajxyp myajnajxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijpajtíp co Dios ytudägyity mid ajcxy ytiyduunin, e xycöbajccixy co jëbi mdigñygixipy ma yi y'ane'mdac mid mmibijcin ycixpi. Mid jada ycixpi miich ajcxy mminajxcixy myajnajxcixy tzaachyipi ayo'n.

⁶ Mid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcujc'ajtin tim jadu'n nej xymöhuáangixyich jotcujc'ajtin je huin'it xii co anajty ajt nHuindzin Jesucristo ñayguexigyii co anajty miñ ya naaxhuiñ jadüg'oc choon anajty tzajpjoty. Nañ je ángel ajcxy mic'ajt midpi miinaamb quipxyi mid Jesucristo. Miinaamb Jesús mid ane'min cötujcin e yajt-goydähua'ñ pocyjäydijc, tim jadu'n nej tüg mijjin ya jhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi' jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixi huin'tiempo. Dios ypidägaanip yi' ajcxy y'alma jigüegy ma ni caminaxi ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xii huin'it tiempo co anajty ajt nHuindzin Jesús miñ ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy mid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich mid miich ajcxy ycixpi, jaydëbi tudägy ajcxy mdzinähuiipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy mid jada ycixpi co yi' cuydunipy huidibi miich ajcxy mbijctzooyb m'amidooyb mid oyjot oyhuinma'ñ. E nañ ycuydunipy yi' huidibi miich ajcxy mdumyb mid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxi capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

Je jibic jäy huidibi huin'imb mayjäy

2 Migügtijc ajcxy, cham nyajmidmiydaaccixy je xii je tiempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim mid yi'. Nminucxtaacpyich miich ajcxy, ca' mhuinma'ñyit-googyixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi' jäy ajcxy y'ayuc huidibi minamb co tüg espíritu ti yajnejhuñygixy co yjadu'nity, o co muum a'ijxnaxy amidoonaxy capxy ayuc, o co muum ijpudzimy jada ayuc ma tüg necy huidibi ajcxy ytiy co ich nnecy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguexigyib tüg jibic jäy mic jäy huidibi Dios yajcödigoyamy tücc'yi. ⁴ Jada jibic jäy ymidziptzonamyb tüg'ocy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yi' naybidägñb amij agix jadu'n nejhuñy yjacmijity ca'ydi Dios. E nañ yi' ypidägamb y'ane'mdac ma Dios ytiy, e naybidägaanip nejhuñy Diosity.

⁵ ¿Nej ca' mjäymejtzcixy co jadu'n nimiydacyich tüg'ocy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuñyb pin yajhuäcxijp jada mic jäy jada jibic jäy, jigix ca'ydi ñayguexigyii jayijpni ma ca'ni tiempo yhuaad'atyñi mi-na Dios a'ixhuiip co ymiinipy. ⁷ Je mic jäy je jibic jäy cham ñi'ixñyb ameech je jibicpi huidibi ytunamyb, jëyi ytigoy'ityñi mina je tü'aa y'ahuächyii, je huidibi yajhuäcxijp. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy mid tüg puxujin. Jesús yajcödigoyipy je jibic jäy mid yi' y'oy'ajtin etz

ymij'ajtín co anajty yhuimbity ya naaxhuiñ. ⁹ Je jibic jäy, yi' je' ymïd je mujcu' yhuinma'ñ etz ymic'ajt, e ytu-namyb mijhuinma'ñ etz ijxpejt huidibi añijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'ñip yi jäy ajcxy huidibi y'alma tigoyipy, miid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi miid jëbi y'alma ñidzooccixy. ¹¹ E je' ycixpi co ca' ajcxy cöbiga'ñ Dios ytiy'ajt, paady Dios y'ix-madzánigixy huen yajhuin'ñingixy, huen mibijccixy je mujcu' y'anii, e miid jada ycixpi jëbi Dios yajtigooyi yi' ajcxy y'alma nidüg'óciy huidibi ca' mibiga'ñ Dios ytiy'ajt. Jacjotcujc ajcxy co jibic-huinma'ñ tungixy.

Je jäy ajcxy tibi Dios yhuin'ixyii jigix ypocyñihuädzipy

¹³ Migügtijc ajcxy huidibi ajt nHuindzin Jesucristo ooy tzocy jihuïy, jabom jabom nyajnaxyich jäygidaacin ma Dios miid miich ajcxy ycixpi, miid co Dios ti xyhuin'ijxcixy oga'n'aty, jigix jëbi m'alma ñidzooccixy miid Dios yjihui'ñ ymic'ajt, etz nañ miid Dios y'ayuc ytiy'ajt huidibi ti mmibijccixy. Je Dios yjihui'ñ ymic'ajt xya-jhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy miid yi' y'ayuc ytiy'ajt huidibi ñich ajcxy ngapxhuäcxyp, jigix jëbi mbáatcixipy oy'ajtín ma ñich ajt nHuindzin Jesucristo.

¹⁵ Paady migügtijc ajcxy, mibijccix tydudägy, ca' m'ix-tigñhuäccixy, e ca' mjäydi-gooygixy je tiy'ajt huidibi ñich ajcxy ti ngapxhuäcxy ma miich ajcxy, etz jadu'n nej ti nnimaaygixy necyjoty. ¹⁶ Huen ñich ajt nHuindzin Jesucristo c'i'm etz ajt nDios Teedy may'ajt oy'ajt tunipy miid miich ajcxy, e xyajjotmicpñjccixipy etz xyajmibijccixipy tydudägy, jigix oybi ayuc mgápxcixipy etz mdunipy ajcxy tüg'óciy oybi huinma'ñ. ñich ajt nDios Teedy etz ñich ajt nHuindzin Jesucristo xychojcm xyjihuiyim, e ti xymooyim jotcujc'ajtín huinxiibi, e nañ ti tuñ may'ajt oy'ajt miid ñich ajt ycixpi, jaydëbi njijp'ijxim oy'ajtín jiihy tzajpjoty.

Mibijctzoogix Dios miid ñich ajcxy ycixpi

3 Jadügnax, migügtijc ajcxy, tungix may'ajt mibijctzoogix Dios miid ñich ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios miid ñich ajcxy ycixpi, jigix ñich ajcxy Dios xyñi-hua'nipy xycohua'nipy ma yi jäy ajcxy huidibi jibic-huinma'ñ ymïd, huidibi jibic ñich ajcxy xytunamb, com mayjäy ca' mijpidägy Jesús y'ayuc ytiy'ajt. ³ ñich ajt nHuindzin Jesucristo tudägy yi', e xypubedip xypudigñhuip ajcxy jigix miich ajcxy ca' mjetmetzcñhuipy ma yi mmibijcin, e nañ xypubedip ajcxy, jigix ca' xymi-madääccixipy je jibicjäy huidibi Dios ca' capxymidoy. ⁴ ñich ajt nHuindzin Jesús jotcujc'ajtín ti xymóoygixyich

miid miich ajcxy ycixpi. Nmibijcpiych co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ñich njaty nej njijpcogapxñhuibich, chi nguejxyich cogapxy, nnejhuñhua'ñich nej anajty ajcxy myajpatcixy ma yi mibijcin, tzigñyib ñich anajty co nicxy mujcu' xypidaaccixy jibictuum, chi ñich anajty ajcxy ndung ti ñaadigñ'aty.

Ooy ycopicyity co nduunim ma ajt ndung

⁶ Migügtijc ajcxy, miid ajt nHuindzin Jesús yxii etz ymic'ajt jada ane'min ajcxy nyajnbijcpi, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej ñich tiy'ajt ti nyecy. ⁷ Miich ajcxy mnejhuñyib jadu'n nej ñich ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ñich ndzinaayin nej jëbi miich ajcxy mdzinaaygixy. Co anajty ñich njimity ma miich ajcxy, ca' ñich n'ixmajch ngi'mdung. ⁸ Tüg'óciy ñich ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg.

⁹ Dios ti xymöyich mic'ajt ane'min co ixypy ajcxy mbubejtin ti nbijctzoohui o ti nbijctzoohui ixypy ajcxy mgaayin m'uucin, per ca' ñich ajcxy jadu'n ti ndungixyich, jigix ijxpejt ajcxy mbigipy ma ñich ajcxy.

¹⁰ Com co anajty n'ityich ma miich ajcxy jada cötujcin ajcxy nyajnbijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n ñich ti nnejhuïy co nijjëjity miich ajcxy ca' mdunaangixy mgi'mdung, jëyi myöygyx mnajcixy jäyjñ jäydijc. ¹² Yi jadu'mbi jäy ajcxy nyajnbijcpiych miid ñich ajt nHuindzin Jesús yxii co huen tungixy jabom jabom ma yci'mdung, ca' huaad pin adzijpcix anajcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' mjetmetzcñygyxipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajnijayñyib, ijxcix pin je', e chi ca' mjactungixip cuendi, e ni ca' miid myöymujc mnaxmújcixipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuicix oy'amy jadu'n nej tüg mibijcpi.

Capxpooxin huidibi cijxnip je necy

¹⁶ Huen ñich ajt nHuindzin Jesucristo huidibi jotcujc'ajtín yejcp, c'i'm xyajjotcugñygyxipy jabom jabom oytim minaaxñijity oytim yma'amyity. Huen je Huindzin Dios xypubejtcixy xypudigñygyxipy.

¹⁷ ñich, Pablo, jada capxpooxin c'i'm njaayich. Jadu'n nfirmajyich tüg'óciy ñich nnecy, e jadu'n miich ajcxy mnejhuñhuipy co ñich jada necy'adyii. ¹⁸ Huen ñich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n jada. Amén.

1 TIMOTEO

1 Ìich Pablo, Cristo Jesús xyaj'apóstol'ajtpich. Yí Dios huidibi xyñihuaanim xyyajnidzoocim ajt n'alma, etz Cristo Jesús huidibi xymöhuaanim jugy'ajtin huinixñibi, yí' ajcxy ti xyajñibicyich co yí' y'ayuc ngapxhuäcxibich. ² Cham ñich miich nijayñy Timoteo. Jadu'n njihuñy nej ñich miich ngí'm'ung'adyii, co miich Dios ytiy'ajt ti mbaady ma ñich. Huen Dios Teedy etz Cristo Jesús ñich ajt nhuindzin may'ajt tunipy miid miich, huen xypa'ayoohuipy etz xyajjotcugñhuipy.

Nijējity jāy yaj'ixpicy huidibi ca' ytiy'ajity

³ Hui'mi' miich jim Efeso, jadu'n nej nimay je taabi anajty ndzona'ñich jim Efeso nñicxa'ñich anajty Macedonia. Hui'mi' jim, jigix mgapx'adugipy je jāy huidibi najtzcaxñiyb je ayuc ca'p ytiy'ajity. ⁴ Mgapx'adugipy je nigoobi y'ayucity. Mgapx'adugipy yí' ajcxy huidibi tzachnigapxp tzachnimiydacpy yí' judiojāy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yí jadu'mbi ayuc nigoob yajhuinma'ñydgoy pinjaty ix-pijcp Dios ytiy'ajt.

⁵ Jadu'n Dios tzocy co huen jāy ajcxy naychojctāyñii miid oyjot oyhuinma'ñ. Huen ajcxy Dios yajmij'aty janch cixyjt huinijot. Co pin yajmij'aty Dios janch cixyjt huinijot, ooy ajcxy oy ñayñihuñyigixy. ⁶ Nijējity jāy ajcxy ti ixmajtzní je Dios ytiy'ajt, ti ajcxy jijptigiyñiñi je ayuc huinma'ñ huidibi ca'p choobaady. ⁷ Ooy yí' ajcxy jayaj'ixpiga'ñ yí' Dios ycötujcín, ni ca' huin-jihuñyigixy huidibi ycapxcixyp, ni huidibi ajcxy ñigapx-pejtpy.

⁸ Ìich ajcxy nnejhuñyim co yí' Dios ycötujcín oy yí' pen nyajtunim nej ypadyii nej ytiy'ajity. ⁹ Nejhuñyim co yí' Dios ycötujcín ca' yí' tzaachytuñ oyjāydijc, jēy tzaachytuñ pin ca' capxymidoy Dios, pin midundigooyb Dios ycötujcín. Je Dios ycötujcín chaachytumyb jāy huidibi ca' cuydungixy, jāy ajcxy huidibi ca' ytudāgyity, jāy huidibi ca' capxymidoogixy Dios, jāy huidibi pocytungixy, jāy huidibi ca' huindzig'ñ yajtungixy miid Dios, jāy ajcxy huidibi capxtigooyb, huidibi ytaj yteedy yaj'öccixy, huidibi jāy yaj'öccixy. ¹⁰ Je Dios ycötujcín chaachytumyb pin migapxtigooyb töxyjāydijc etz yēydijctijc, huidibi miyēydijc ymāhua'ñ. Dios nañ chaachytumyb je jāy huidibi jāy majtzip etz toognaxy, chaachytumyb indaacpidijc etz nihuambejtpidijc. Je Dios chaachytumyb jacjadyii jāy huidibi y'ayuc ca' ytiy'ajity nej Dios tiy'ajt miidity. ¹¹ Jadayaabi tiy'ajt huätzpi oybi tūgñiyb miid Jesucristo y'ayuc ytiy'ajt oybi huidibi ñich nDios, je conuucxy yTeedy, ti xyyajñibicyich co ngapxhuäcxibich.

Pablo yjāygidacpy co Dios may'ajt ti tuñ miid yí'

¹² Ooy njāygidāgyich co ñich ajt nhuindzin Cristo Jesús ti xyajmīcpicyich, yí' ti xy'ijxtiñyich, yí' ti xyajñibicyich Dios y'ayuc co ngapxhuäcxpich. ¹³ Ìich jecy'ajty jibic anajty nigapxy ni'ojñyich Jesús. N'ixhuidijty nbahuidijtyich Jesús yjāy. Ìich yí' ajcxy nmidundigooyich. Ti yí' Dios xypa'ayooyich com ñich jadu'n anajty ti n'adñich miid co nganejhuiñyich je tiy'ajt, ngamibicyich Jesús ngamijpidāgyich Jesús. ¹⁴ Paady ycixpi ñich ajt nHuindzin Dios may'ajt oy'ajt ti tuñ mijcajee miid ñich, co ti xyajmibicyich Jesús. E Jesús ti xymöyich tzojcín jihuiñyín miid yí' yjāy ycixpi.

¹⁵ Ooy jada yjanchity, e nidüg'óciy jāy ajcxy jēbi mibijccixy co Cristo Jesús miññ ya naaxhuiñ co yajpocyniñhuädza'ñ pocyjāydijc. E ñich niñi pocymñididyich ca'ydi ni pinjāy. ¹⁶ Miid jada ycixpi Dios ti xypa'ayooyich ti xymimecxtucyich, jigix co jāy ajcxy ijxip nej Dios ti ytuñ miid ñich, huin'it ajcxy mijpidāgipy yí' y'ayuc etz ypaadipy jugy'ajtin huinixñibi ma Jesús. ¹⁷ Paady chojcpy co ngōmayim Dios, je rey huidibi ane'mb huinixñi, huidibi niminaa yca'o'cy, etz nipin ca'ixy. Je Dios tūgpajc huidibi Dios'ajtp huen ycōmay'idipy cham etz tūg'óciy xñi tiempo huidibi mimb cidacp.

¹⁸ Timoteo, ooy ñich miich ndzocy njihuñy. Jada ayuc ñich miich nyajnimaydaayb. Miñhuindñahuip Dios y'ayuc ca' mhuinma'ñydgoyipy. Mguydunipy jadu'n nej Dios y'ayucnajtzcaxñiybi xy'ñhuñy xycapxhuñy co mdung mnimajch. ¹⁹ Miñhuindñahuip Dios y'ayuc ytiy'ajt, huin'it ca' jibic mnayñihuñy, jadu'n nej ajcxy jadyii huidibi nejhuñyib je tiy'ajt, e ca' cuydungixy, e jadu'ñy yhuinma'ñydgoyigixy. ²⁰ Jadu'n nej Himeneo miid Alejandro ajcxy jaty, huidibi ñich ti nyajcādigiyigixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

Jadu'n nej jēb Dios nmibijctzoohuim

2 Yí' njatyyajñimaayb co ooy ycopicyity capxtaac-cixy mibijctzoogixy Dios etz yajnaxcixy Dioscojuyip miid tūg'óciy jāy ajcxy ycixpi. ² Copicy nnibijctzoohuim ma Dios: reydiy, ane'mbidijc etz codungdiy, jigix jēbi jotcujc ndzinaayim, ca' ma tzip. Co jadu'n nduunim, yí' anajty ngoduunim Dios y'ayuc, etz huin'it tiy-dudāgy ndzinaayim. ³ Com yí' jadu'mbi huinma'ñ ooy yí' y'oyity, e Dios huidibi ñich ajt n'alma yajñidzoocp, oy yí' jāygidāgy. ⁴ Dios chojcpy co tūg'óciy je jāy ajcxy huen y'alma nīdzoocixy, huen ijxcixy nejhuñyigixy Dios

y'ayuc ytiy'ajt. ⁵ Tüg je' je nHuindzin'ajtm Dios, etz tüg je' je huingapxpi huidibi jëbi ytiy'ajtm ma Dios mïd ñich ajt ycixpi, etz huidibi jëb Dios y'ayuc capxnajxy ma ñich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci mïd ñich ajt nbocy ycixpi, ñaygïyejci huen jäy yaj'ögyii, jigix jëb ñich ajt nbidzïimim ma je mujcu' anajty c'ã'am xymïd'ajtm. Jadu'n nej Dios cham jäy yajnejhuïy co je tiempo yhuaad'ajtni, ⁷ paady Dios ti xyajniñicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajniñicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi jäy ajcxy huidibi ca' yjudíojäyity.

⁸ Ndzojpcyich co yi yëdyictijc huen mibijctzoogixy ojadajticy Dios ma tüg'óciy naymujctac mïd oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzojpcyich co yi töxyjäydijc huen yhuít yxoix yajtungixy nej ypadyii, huidibi quipxpaady ajcxy paatip. Huen yhuít yxoix pidaaccixy nej töxyjäydijc huidib tudägyip. Huen ycohuaý cüdïgy caaxïgy nej ypadyii, ca' ymïgügtijc huinnaxtugipy mïd yhuít yxoix, ca' nayxóixigixy mïd oori, mïd perla, e mïd tijaty ooy choohuïty. ¹⁰ Ca' huaad töxyjäydijc ñaygómáyigixy mïd yhuít yxoix, huen janch yajcómaygixy mïd y'oyjäy'ajtm, jadu'n nej je jäy ajcxy tungixy huidibi ti ñaygïyéjcgixy cixyot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy mïd yungnaxy yjot yhuinma'ñ. ¹² Yi töxyjäydijc ca'p niducyich yaj'ixpígipy jäy ajcxy ma je naymujctac. E ni ca' ypadyii nicxy yëdyijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi yëdyictijc huen ane'my yi töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi töxyjäydijc ca' ypadyii nicxy nigohuajc'aty yi mibijcpidijc. Dios jotcujc ñayjihuiyii mïd co jëyi y'ung'ijxcixy, etz yajmij'ajtcixy Dios, etz tzojctaaigy ymïgügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy mïd oyjot oyhuinma'ñ.

Nej jëbi ytungixy huidibi ajcxy nigohuajc'ajtp

3 Tiy'ajt jada nej jäy ymïnaangixy. Pen ji pin najtzogïy nigohuajc'ada'ñ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydijjib huidibi ca' ti tundigoy, huidibi tüg töxyjäy mïd ca'p ycanaagity, huidibi huijycujc jäy'ajtp, huidibi mïd oybi yhuinma'ñ etz tudägyipi yhuinma'ñ, huidibi oyjäy'ajtm tumb, huidibi jajtp nej jäy ajcxy yaj'ixpígipy. ³ Pin nigohuajc'ajtp chojcpy tüg jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tüg jäy huidibi tiydudägy tzinaayb ma yjïin ytiyc, huidibi y'ung y'anäg yajtzinaayb nicy yxeemy. ⁵ Pen ca' jaty nej y'ung y'anäg migapx ane'mip ma yjïin ytiyc, ¿nej oc'ane'ma'ñ yi mibijcpidijc? ⁶ Nañ ca'p yjëjity huidibi namni mibicy Dios y'ayuc ytiy'ajt. Ycadimjeyity nicxy ooy amij agix ñayjihuiyii, e nicxy

camadägy je ane'min, e yjadipy jadu'n nej Satanás yjajty co jibic tumb ñayyajhui'mi mïd Dios. ⁷ Chojcpy tüg jäy huidibi nidüg'óciy je mayjäy oy iixip. Pen ca' yjadu'nity nicxy pin yxïyii, e chi jada anajty je mujcu' ti ymïmadägyii co jäy jibic ñigapxïyb.

Yi mutz tungmïd nañ chojcpy huidibi oyjot oyhuinma'ñ mïd

⁸ Yi mutz tungmïd huidibi yajpat ma mibijcpidijc chojcpy jäy tudägyipi, huidibi nicy xeemy jäy'ajtp, huidibi ca' jäy'aty aguejtmïñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidáacigixy cixyot huinijot ma je tiy'ajt janchyp. Je tiy'ajt huidibi je mayjäy ca' huinjhuïy. Je tiy'ajt huidibi ñich ajt nmibijcim. Je' chojcpy pinjaty huidibi ca' ti jibicpi jot'adyii huinma'ñ'adyii. ¹⁰ Pinjaty mutztung yajnicxamb, jayijp jot'ix huinma'ñ'ix pen tudägy yhuinma'ñ. Huin'it jëbi mdungmöy. ¹¹ Yi mutz tungmïdpi ytoxyijc chojcpy co huen tudägy jäy'aty, huidibi ca' ñigapx ñi'ojy ymïgüg, huidibi nicy xeemy jäy'ajtp, huidibi cuydundaayb tüg'óciy. ¹² Yi jäy huidibi mutztung yajnicxamb chojcpy tüg jäy huidibi picy chinaayb, huidibi ca'p mïdity metz o tugïg töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjïin ytiyc. ¹³ Yi mutz tungmïdpi huidibi yajxon ytung cuydungixy, cömay yi' ajcxy idipy ma mibijcpidijc. Nañ nigti ajcxy ixpijcidich Cristo y'ayuc.

Dios mijhuinma'ñ tuun mïd ñich ajt ycixpi

¹⁴ Jada necy ñich miich nyajniguejxyp. Njijp'ijxypich co tzojc nnicxa'ñich jim ma miich. ¹⁵ Pen ca' y'oyy nej tzojc nñicxibich ma miich, ti yam nyajnijayy je janchyp. Mïd jada necy huaad jëbi nidüg nidüg mibijcpi yjäy'ajtigixy ma yi mibijcpidijc huidibi mijpidacp Dios juugyp, je Dios huidibi huijtz'ijttaayb etz cohuandaayb je tiy'ajt janchyp. ¹⁶ Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuiyim, je huidibi jecy'ajty ca' pin nejhuïy. Je tiy'ajt huidibi xyajnejhuiyim co quexy y'ung ya naaxhuiñ.

Dios y'ung hue' je' yaj'ijxy mïd ñinïcx. Tudägy nayguëxci mïd Dios yjihui'ñ ymïc'ajt. Je Dios y'áñgeles ajcxy ti ixyii. Ti yajnigapxy yajnimiydägy Dios y'ung ma huidibi ca' yjudiojäyity nañ ti jäy yajmij'ajtcixy Dios y'ung ya naaxhuiñybi. E ti ycöbigyii tzajpjoty ma yi oybit.

Mayjäy ixmadza'ñ yi Dios ytiy'ajt

4 Yi Espiritu Santo mïnaan co anajty je xii tiempo ycixa'ñ, mayjäy ixmadzaangixy yi Dios y'ayuc ytiy'ajt. Mijpidaaccixy anajty jäy ajcxy y'ayuc huidibi yi huin'ïmbi etz ca'oybi ytiy'ajt mïd. ² Jada jäy ajcxy mïd anii anajty naybidáacigixy nej ytudägyity, e ca' anajty yjanchity. Ca' ajcxy nej ñayjihuiyii co ajcxy ytiy'ajtm anii daacpi. Ti jadu'n yhuinma'ñyidaaccixy janch mic. ³ Yi' ajcxy ymïna'ñ co ca' huaad jäy ypijccixy, etz ca' huaad caaygixy nijëjity caayin uucin. Yi caayin uucin Dios yi' ti conucxy jigix jëbi jäy ajcxy huidibi mibijccixy etz huin-

jihuuygixy je tiy'ajt, jëbi yajnaxcixy Dioscojuyip ma Dios etz cöbigipy ajcxy agujc jotcuyc je caayin uucin. ⁴Tüg'óciy huídibi Dios ti yaj'oyïy, oy yí'. Ca' huaad pin ymina'n co ca' y'oyity. Agujc jotcuyc ngöbïjçim, jëyi nyajna-jim Dioscojuyip ma yí'. ⁵Dios ymina'n co huen huídibi caayin huídibi uucin ooy y'oy yí'. Jëyi co nyajna-jim Dioscojuyip, e huin'it Dios conuucxy je caayin uucin.

Ca' ajcxy mmijpidägip yi nigoobi'ayucity

⁶Pen miich ajcxy jada ayuc jada tiy'ajt myajnimaaayb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixyot huinjot, chi anajty myajyeegy yi mmibijcin. Ca' mjäydgoyipy yi oybi ayuc huídibi nyajnimaaayb, huídibi ayuc mbanicxyp mbayöyp. ⁷Ca' mmijpidägy yi nigoobi'ayucity huídibi ca' choobaady ma Dios. Panixi' payöyi' Dios ytiy'ajt. ⁸Jac'oy co n'ixpiçim Dios y'ayuc, ca'ydí co ninicx ymic'ajt nbaatim. Co yajuçtäy jäy ñinixç, chi ñinixç ymic'ajt paady jëyi. Co n'ixpiçim nguyduunim Dios ytiy'ajt, chi tiy'ajt nbaatim nej ya naaxhuñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹Jada tiy'ajt huídibi ti nyajnimäy, janch tudägy jada, jëbi ngöbïjçtaayim, e nidüg nidüg jëbi mibijccixy. ¹⁰Paady nduunim n'ayoohuim oy pin xy-ca'ixaanim. Njijp'ixçim co je Dios huídibi jugy'ijtp xya-jnidzögaanim n'alma. Jëyi yajnidzögipy ajcxy y'alma huídibi mijpidaacip Dios y'ayuc.

¹¹Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹²Huen jäy ajcxy m'ayuc xymijpidaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyyä'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huädz yhuinma'n mïd'ajtcixy. Co jadu'n mdunipy, huin'it ajcxy mijpidägipy miich m'ayuc. ¹³Mabaad ñich anajty nicxy ma miich, capx Dios ñecy ma yi naymujctac, capxhuäcx etz yaj'ixpic yi tiy'ajt. ¹⁴Yajtun yi huinj'ajt cujc'ajt huídibi Dios xymoy je taabi je mibijcpidijc mijtungmïdipi xy-cñixajy, e xy'ayucmoy xymic'ajtmoy ajcxy mïd je Espíritu Santo ymic'ajt.

¹⁵Naybidägii yajcopijc tüg'óciy huídibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶Nayguend'adii miich ooy cï'm, nañ jadu'n naygüend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy cï'm anajty nayyajnidzögyii, nañ jadu'n anajty myajnidzoocixy huídibi anajty ajcxy amidoo'ijtp miich m'ayuc.

Nej jëbi huaad migügtijc m'ihuijipy mgapxhuijipy

5 Ca'p huinjip m'ojip mij'anäctijc. Oy'amy ñhuijcixy capxhuijcixy jadu'n nej jihuüy mdeedy'adyii. Nañ jadu'n yi yujcyecytijc ñhuijcixy capxhuijcixy oy'amy jadu'n nej jihuüy mgi'mjuugy mgi'mmigüg. ²Yi mij'anäctijc ajcxy töxyjäybi nañ jadu'n oy'amy m'ihuijcixy capxhuijcixy, jadu'n nej jihuüy yi' ajcxy mdaj'adyii

mdzïtz'adyii. Yi töxy'anäctijc ajcxy mutz'anäcniç mïd'ijtcixy mïd tudägyi mjot mhuinma'n.

³Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögypí, huídibi janch ni ypin yca-ca'ty. ⁴Pen jim töxyjäydijc co'ögypí huídibi mïd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidipy mïd ytaj etz ñambiid. Com yi jadu'mbi huinma'n Dios yjäygidacpy. ⁵Je töxyjäy co'ögypí ca'p pin tim mïdity, yi yjijp'ijxyp co Dios ypubediiyb etz Dios ymibijctzooyb y'ojadajtpy jabom jabom xiim tzuum. ⁶Je co'ögy töxyjäy huídibi tzi-naayb mïd mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷Yajnimä' ajcxy huen cuydungixy Dios ytiy'ajt, jigix ca' jibic ajcxy yajnegapxy. ⁸Pen ji pin huídibi yajmij'ajtp Dios, e ca' pubeda'n y'amigüg, pen ca' y'ung ytöxyijc yajxon ixxy may'aty, ca' yi' cuyduní Dios y'ayuc ytiy'ajt. Nigi anajty yjibicity nej ti y'idich ca'ydí jadu'n nej huídibi ca' ymibicy.

⁹Yi töxyjäy co'ögypí ajcxy tiibi ytugi'px jimijty, jëbi mgojayiyyi yxii ma yi lista huídibi yi mibijcpidijc ypubedamyb. ¹⁰Yi mibijcpidijc ypubedamyb pen tüg ñäy anajty mïddzinäy, pen oyjot oyhuinma'n ymïd, pen ti y'ung yajxon yajyeegy, pen ti migügtijc m'oyjäy'aty, pen ti may'ajt tuñ mïd Dios yjäy, pen ti pa'ayooy huídibi ay-oob huídibi jottigooyb, pen ti yajtüyöy yajxon nej ytiy'ajty.

¹¹Yi co'ögy töxyjäy mutz'anäcniç ca' mgojayiipy yxii ma yi lista huídibi yi mibijcpidijc ypubedamyb. Pen capxytumb co tuna'n mïd Cristo ycxipi tijaty tung ma naymujctac, yajecyity co je oybi anajty yam y'oc-tumy, chi nijot'ajtni ypigaani, chi ytung ixmajtznip.

¹²Co yi mibijcpidijc ajcxy ca' jäygidaaci yi' ytung, chi jibic ñayjihuiyii co ca' cuyduñ y'ayuc nej ti ycapxytuñ mïd yi Cristo Jesús. ¹³Jadügnax ca' ytung yajcopicy, jëyi yhuídijtni jayjin jaydjic, e ca' yi'yity, nañ jadu'n ymigüg nigapxni ni'ojjiyñi, capxni miydaacni huídibi ca' y'oyity. ¹⁴Ndzojcpyich co yi töxyjäy co'ögy mutz'anäcniç huen pijccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytijc, jigix ca' ajcxy nihuambediyb ni'ojjihuiyb huídibi ca' Dios y'ayuc ixaani midohuaani. ¹⁵Nijëjity töxyjäy ajcxy co'ögypí ti ixmajtzcixni Dios y'ayuc ytiy'ajt, e ti ajcxy jijptigiyiygixni yi mujcu' yhuinma'n.

¹⁶Pen ji mibijcpidijc yëydijcpi o töxyjäybi mïdity y'aju-ugy y'amigüg co'ögypí, yi' je' paatip ixipy may'adipy je y'ajuugy y'amigüg co'ögypí, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögypí ca'p ti tim mïdity.

¹⁷Yi' ajcxy huídibi nigohuajc'ajtp yi mibijcpidijc huídibi yajxon tumb capxpaady y'idipy. Nigi ajcxy capxpaady y'idipy huídibi Dios y'ayuc capxhuäcxip etz yaj'ixpicy. ¹⁸Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miiy co yajpajc'ada'n yi trigo tiim." Nañ jadu'n jadüg'it yjaybetyity: "Yi huídibi tumb paatip yi' ymu-ju'n." Jadu'n jada ayuc yhuimbidzimy: Yi' huídibi yaj'ix-pijc Dios y'ayuc paatip huen yajmujuy.

2 TIMOTEO

1 Ich Pablo, Dios ti xyajñibicyich huen Cristo Jesús xy'apóstol'adyiijich. Yi' ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägipy Cristo Jesús yajjugypigipy co anajty ti y'ögy. **2** Ooy ich miich ndzocy njihuüy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt mïd miich, huen xypa'ayooy, huen xyyajjotcugëy.

Pablo jotcujc co Timoteo ti mijpidägy Dios y'ayuc

3 Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios mïd miich ycixpi jabom jabom xïim tzuum. Janch cixyjot huinijot nyajmij'atyich Dios, paady ooy oy nayjihuiyijich. Nañ jadu'n n'ap ndeedy jecy'ajty janch cixyjot janch huinijot yajmij'ajty Dios. **4** Ooy miich nicxy njaco'ixihua'n jigix njotcugihuibich. Ooy njajäymejtzcoodyiijich nej miich mjiy myaax mïd ich ycixpi je taabi jim ndzooñich. **5** Njäymejtzpich jadu'n nej miich mmijpidägy yi' Dios janch cixyjot huinijot co xymïd'ityich. Nañ njäymejtzpich co jayijp mnambiid Loida etz yi' mdaj Eunice mijpidacy Dios janch cixyjot huinijot. Minambich co chambaad miich mmijpidägy Dios janch cixyjot huinijot.

6 Jada nyajjäymejtzcootpy: Nijot'at yi' mic'ajtin huidibi Dios ti xymöy, je taab anajty Dios ytung mnïmadzaani co ngi'nixajy, jigix Dios ytung jacyajxon mduunipy. **7** Dios ca' xyajhuindzïgy'aty, hue' xyajjotmic'ajtp. Mïd Dios ymic'ajt jëb mnaychójcigixy mnayjihuiyigixy, jëb oyjot oyhuinma'n myajtuungixy. **8** Paady ca' mmïdzöy-duniiyb ich ajt nHuindzin Cristo Jesús ytiy'ajt. E nañ ca' xymïdzöyduniiybich co ti nbujxtijc iñäyich mïd ich ajt nHuindzin Cristo Jesús ytiy'ajt ycixpi. Mecxtuc yi' ayo'n yi' tzaachypi huidibi myajnajxpy co mgapxhuäcxxy yi' Cristo Jesús ytiy'ajt. Dios xyajjotmic'ajtp. **9** Canan paady ti xyajñidzocim n'alma co ajt ndzach'oyjäyity. Com Dios jadu'n ti yajnihuinmayëy tuna'n oy'ajtin mïd ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'n je Cristo Jesús ca'ni anajty pin ya naaxhuiñ. **10** Dios ti cham jada oy'ajtin yaj-niguëxëgy co yaj'ijxy ya naaxhuiñ ich ajt nnihuambi nyajñidzocpi, je Cristo Jesús, huidibi ti yajcödïgoy yi' o'cin. E ti yajnejhuüy yi' jäy mïd yi' ytiy'ajt nej jëb huaad ndzinaayim huinixi ma yi' Dios y'it oybi.

11 Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi' huidibi ajcxy ca' yjudïojäyity. **12** Paady ycixpi tzaachypi nbaadyich. Per ca' ndzo'yduñich, com ich nejhuüyb pin nmijpi-

dacpyich, nejhuüybich co yi' ymïd cötujcin etz mic'ajt jëb xycuend'adipyich, ixti huin'it xï minaa Cristo Jesús tiyduna'n yi' naaxhuiñyäjy.

13 Mijpidäg je tiy'ajt tiydudägypi huidibi ti nyaj'ixpicy, jada je' tiy'ajt iixpejt nej jëb mbanicy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. **14** Mihuinidina' yi' oybi ayuc tiy'ajt huidibi ti nyaj'ixpicy. Huen je Espiritu Santo huidibi miich mïd jotjoty huinma'njyoty xypubedipy xypudigihuiipy.

15 Ti jada' mnejhuüy co tüg'óciy yi' mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi' Figelo etz Hermógenes etz jacjadyii jadu'n ajcxy ti y'adihtzöxy. **16** Yi' Huindzin Jesús yi' pa'ayoohuiipy yi' Onesifero yjuugy ymïgüg, com ooy ich mij xypa'ay-ooyich etz xypubejtyich, ca' xymïdzo'yduunijich co nmach'iñäyich. **17** Co Onesifero oyja'ty ya Roma, chi mictägy xy'ixtaayich cooni xypatyich. **18** Huen yi' Huindzin Dios ypa'ayoohuiigy Onesifero co anajty Cristo Jesús tiyduna'n naaxhuiñyäjy. Huadz miich mnejhuüy nej yi' Onesifero xypubejtyich jim Efeso.

Huen Cristo Jesús may'ajt tunipy mïd miich Timoteo

2 Miich Timoteo, jadu'n njihuüy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmic'ajtp. **2** Miich ti mmïdoy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëdyjctijc huidibi oyhuinma'n ymïd, jigix yi' ajcxy nañ jadu'n capxnaxipy ma jacjadyii jäy.

3 Miich mïmadäg yi' ayo'n yi' tzaachypi huidibi mminajxyp myajnajxyp, jadu'n nej tüg Cristo Jesús ysoldado huidibi oy tumb. **4** Yi' soldado huidibi soldad'ajtp ca' huaad huingbi tung nicxy tuñ, jigix je' yjotcujc'adipy pin anajty ti ypidägyii soldado, nañ jadu'n miich adügijp Dios ytung mdunipy. **5** Pin jäy nayboyçquipxip ca' yi' premio pada'n, oy ti yjamadägy, pen ca' cuyduñ yi' tiy'ajt. Nañ tzocy co miich mguydunipy yi' tiy'ajt. **6** Je jäy huidibi tumb ma ycam ytu' je' jayijp huidib huen yajpidëgy yi' ujtztim huidibi ti y'ity. Nañ jadu'n miich co Dios ytung mduunip mbaadip yi' oy'ajtin. **7** Yajxon mhuinmayipy huidibi nyajñimaayb, yi' Huindzin Cristo Jesús xyajnejhuiydähuipy tüg'óciy je' ytiy'ajt.

8 Jäymetz jadu'n nej Jesucristo, yi' David y'ap y'oc, y'o'cy, chi Dios yajjugypijcy jadügtecy. Jada je' je ayuc tiy'ajt oybi huidibi nnajtzcapxiybich. **9** Mïd yi' ycixpi n'ayooyich etz tzaachypi nyajnajxyich. Nbujxtijc iñäyich

jadu'n nej jihuüy njibicjäyich. Oy njapujxtijc iñäyich ca' ñejity, Dios y'ayuc ca' yi' mach y'ity, yajcapx-huäcx'adihtzp nigü. ¹⁰ Paady ñich tüg'óciy jada tzaachypi ngöbijiçtäy nmeçtuxtäy, jigix jëbi je jäy ajcxy huidibi Dios ti yhuin'ijxigixy chinähuipy ajcxy huinixi ma yi' y'it oybi, Cristo Jesús yajñidzögüib yi' ajcxy y'alma.

¹¹ Tiy'ajt jada ayuc:

Pen ti ñich ajt n'o'cim miid Cristo ycixpi, yi' miid ndzi-naayim tzajpjoty.

¹² Pen nyajnajxim tzaachypi ayo'n miid Jesús ycixpi, nañ quipxyi miid yi' n'ane'maanim. Pen ca' ya Jesús y'ayuc ngöbijiçim, nañ ca' jiiib tzajpjoty xycöbigaanim.

¹³ Oy ñich ajt nyajmij'ajtim Cristo Jesús o ngaya-jmij'ajtim, Dios ycuymidaayb yi' y'ayuc. Com ca' huaad yci'm ayuc yajxigy.

Naybidägü cixyjot huinjot ma Dios ytiy'ajt

¹⁴ Yajjäymejtzcood yi mibijcpidijc jada tiy'ajt huidibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. Miid yi tzip capxy ca' ni ti oybi nbaatim, jëyi yajhuinma'ñyidgoy huidibi amidooljtp. ¹⁵ Naybidägü cixyjot huinjot ma Dios y'ayuc ytiy'ajt, nej jëb huaad cömay mbidzimy ma Dios, jadu'n nej Dios ytumbi huidibi ca' ni ti midzöyduyüi, huidibi Dios y'ayuc ytiy'ajt yajxon yajhuinjihuیداayb ymüggtijc. ¹⁶ Ca' mgöbigüpy yi ayuc huidibi ca' ytiy'ajtiy, yi nigoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii. ¹⁷ Yi huidibi ajcxy y'ayuc ca' ytiy'ajtiy yajhuinma'ñyidgoy ymüggtijc. Yi' ajcxy miid jibic ayuc yajhuinma'ñyidgoy yi mayjäy ajcxy, jadu'n nej pützpa'm huidibi ninix jicxp oñyägü. Jadu'n nej ti yjaty miid Hemeneo etz Fileto co ajcxy yhuinma'ñyidgoy. ¹⁸ Yi' ajcxy anajty Dios y'ayuc cuyduuni, chi oyhuinma'ñyidgoyüñi. Chi ajcxy yminángixni co je tiibi y'öccixni, ti ajcxy je' yjugypicy, e jadu'n ajcxy yajhuinma'ñyidgoy nijëjity jäy. ¹⁹ Huidibi Dios ti cojy ti macxy, niminaxi ycacixy ycatigooy, com yi' ytiy'ajt ijtp yi' huinixi. Tiy'ajt jada co yi Huindzin Dios y'ijxcajpy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jipphuäctüdy yi jibic-huinma'ñ yi jibic-tung.

²⁰ Ma tüg mij comeñyidijc jim oori taasi, oori texy, etz oori cuchara, etz tijaty oyjatypi. Nañ ymiid jim naax taasi, naax texy, quipy cuchara etz jactijaty ca'p y'oy-jatyty. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñimi-naa. ²¹ Jadu'n yi' pin jäy jibic-huinma'ñ ixmajtzp etz tuñ oyhuinma'ñ, jadu'n yi' nej oori taasi oori texy. Cö-may'idip yi' ma yi Dios. Huädz yi' yjot yhuinma'ñ, jëbi nHuindzin'ajtim Dios yajtunipy ma tüg'óciy oybi tung.

²² Ixmatz miich yi yujcyeec'anäg ajcxy yjibic-huinma'ñ. Tudägy mdzinähuipy. Yajmij'ajtcix Dios cixyjot huinjot. Mdunipy oyjäy'ajtin. Ixmatz yi tzip.

²³ Ixmatz yi nigoobi'ayucity yi loci huinma'ñ, ca' yi' y'oyity. Mnejhuüyb co yi nigoobi'ayuucity tzipcojp capxycojp yi'.

²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy

tzocy huen jäy'ajtcixy yung naxy miid tüg'óciy jäy etz pe'cy y'idipy miid yaj'ixpijcin. Nañ chojcpy co mimecxtugüpy ymüggtijc ajcxy. ²⁵ Miich miid yung naxy mjot mhuinma'ñ capxhuij je jäy huidibi midzip'ajtp je tiy'ajt. Ycadimjeyity co Dios ytiy'ajt nijothuimbijtcixipy, e n-jhuüyigixyipy je tiy'ajt oybi. ²⁶ Co anajty ajcxy ti ymejtzcixy yhuinma'ñ, chi ajcxy ycöguëgüyb je mujcu' huidibi ajcxy ycapxymidooyb ma anajty ymiid'ajtcixy cäjoty etz ycapxymidoogixpy yi Dios.

Jäy jotmay miid y'idaangixy

3 Miich mnejhuüyb ma je xii tiempo anajty ycixaani jadaanip ayo'n, je jäy ajcxy jotmay miid y'idaangixy. ² Ji adipy jäy huidibi adzojcp, huidibi amij agix nayjihuiyip, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'ñ ytaj yteedy, jäy huidibi ni ti ca' jäygidäga'ñ, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymügüg ixa'ñ tzoga'ñ, jäy huidibi ca' pa'ayo'n midity, jäy huidibi ymügüg nihuambejtp, jäy huidibi oy ahua'nity, jäy huidibi midzip'ajtp yi oybi. ⁴ Ji adipy jäy huidibi ymügüg agojix midundigooyb, jäy huidibi ytunamyb ti ytu-namyb, ca' ajcxy tuñ cuendi capxhuijin, jäy huidibi amij agix nayjihuiyip, huidibi tzachnijot'ajtcixy mayñaxy xondaacin, e ca' cuyduna'ñ Dios ytiy'ajt. ⁵ Ji adipy jäy huidibi naybidäacigixp jadu'n nej jihuüy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxcp co ca' tiy'ajt yaj-tuñ. Cöguëg yi' jadu'mbi jäy. ⁶ Ma yi' jadu'mbi jäy ajcxy jim chooñity huidibi coyöyib conaxiib ma je töxyjäy huidibi ca' ytudägyty, huidibi oy ypocyjäyity, huidibi jibic-huinma'ñ nijot'ajtp. ⁷ Yi' jadu'mbi töxyjäy ajcxy panixp payöyp canaagnax huinma'ñ, e niminaa ajcxy cahuinjihuüipy yi Dios ytiy'ajt. ⁸ Jadu'n nej Janes etz Jambres midziptzooñ je Moisés, yi' jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymiid. Naybidägüib ajcxy jadu'n nej jihuüy cuydungixy yi tiy'ajt, e ca' cuydungixy. ⁹ Ca' ajcxy mimadägüpy nej huin'iniipy Dios yjäy. Niguëxigüpy yi' ajcxy yjibic-huinma'ñ jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuüydäy nej ñich ti nyaj'ixpicy Dios y'ayuc nej njäy'atyich, nej nhuinma'ñ nduüñich, nej Dios nmijpidägyich cixyjot huinjot, nej ñich jäy nmimecxtucyich, nej oyjäy'ajtin nduüñich, nej ti nmihuindinäyich Dios ytung. ¹¹ Miich m'ijxyp mnejhuüyb nej ti nyaj'ixhuidityich nej ti nyajpahuidityich, miich mnejhuüyb je ayo'n je tzaachypi huidibi ti nm-naxyich ti nyajnaxyich jim Antioquia, jim Iconio, etz jim Listra. Jadu'ñyibaad yi ayo'n tiibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yaj-

pahuididipy. ¹³ Yí jibic jáydijc huidibi naybidáacigixp jadu'n nej jihuix cuydungixy yí tiy'ajt, e ca' yjanchity, nígi jibic y'idídzangixy. Huin'inaangixy ymígügtijc ajcxy, e ñayhuin'inaangixy c'i'm.

¹⁴ Miich Timoteo, ixmatz yí jadu'mbi jáy ajcxy etz panicx yí tiibi m'ixpic, yí tiibi myajníbic'aty. Mnejhuixy co ñich ti nyaj'ixpic, yí tiy'ajt. ¹⁵ Com miich pi'cni mutzni ti mjaty ti mnejhuixy yí Dios ñecy. Jada necy ti xyajnejhuixy nej huaad mijpidägy yí Cristo Jesús, e nígi jadu'n jéb huaad yí m'alma nízoozin paady. ¹⁶ Tüg'óciy Dios ñecy Dios c'i'm ti huinma'ñymöy je huidibi jaay. Paady jébi nyajtuunim co jáy nyajni'ixiyim nyaj'ixpicim. Jéb nyajtuunim co nijjpcogapxixiyim huidibi ca' ytiy'ajtity, etz co n'ñhuijim ngapxhuijim. Jéb nyajtuunim co nyaj'ixpicim nej jéb huaad tiy'ajt nbanicxim, ¹⁷ jigix yí jáy ajcxy huidibi mijpidacp Dios ytiy'ajt, jéb ni'ixi' y'idipy, tunipy tüg'óciy oybi huinma'ñ oybi tung.

4 Ooy ycopicity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yí jáy ajcxy juugypí etz yí jáy ajcxy tiibi y'o'ccixy, e chi yajjugypigipy jadüg'oc ajcxy. Yí' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajníbijcyp ngapxhuäcxip Dios y'ayuc ytiy'ajt hueñyitimyminaajity, oy pin midoohua'ñ o camidoohua'ñ. Copicy co mijjpcogapxixiipy huidibi ca' ytiy'ajtity, capxhuij pin yinjaty huenjaty camadacp, ñhuij capxhuij yí jáy ajcxy miid Dios y'ayuc ytiy'ajt. Mímecxtuc etz yaj'ixpic yí jáy ajcxy. ³ Minip je xii je tiempo ma jáy ajcxy ca' cöbiganí oybi tiy'ajt. Nijéjity miid yci'mdzocin miid yci'm-huinma'ñ ixtähuij ajcxy yhuindzin huidibi yaj'ixpicim nej ajcxy jäygidägy, oy ca' ytiy'ajtity. ⁴ Chi ajcxy anajty jiphuäctútcixni camidoohua'ngixni je Dios y'ayuc ytiy'ajt. Mijpidaacni anajty ajcxy nígi yí nígoobi'ayucity. ⁵ Miich huijy yucj m'idipy. Mecxtujcta' nej jáy ajcxy xy'ixhuidity xy-pahuidity. Yajníma' jáy ajcxy Dios ytiy'ajt, jéb ajcxy mijpidägipy etz jothuimbidipy ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzoonanich ya naaxhuiñ xyaj'ögaamich jäy, ti nayxoyiijich naydogyiijich miid Cristo Jesús ycipi. ⁷ Ti ñich ooy mic nñhuindinay Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yí y'ayuc ytiy'ajt. ⁸ Cham nijj'ixypich co Cristo Jesús je tiydumbi

tudägy yí xycömayipyich jii by tzajpjoty, miid co tiydüägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma yí'

⁹ Tun may'ajt tzojc yminipy ma ñich. ¹⁰ Yí Demas ti ñich yam xycögueecni co yjactzojcpy yí mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yí Tito ti ñicxy Dalmacia. ¹¹ Jéyi naydügpajc Lucas yam miid ñich. Co mminipy, miidminipy Marcos, com ooy ti xychachpubetyich ma Dios ytung. ¹² Yí Tíquico ti nguexyich jim Efeso. ¹³ Je jocxhuit huidibi nyajhuimñiyich jim Troas ma Carpo ytiy'ajt mminipy. Nañ jadu'n mimindähuiipy je necy. Je' ooy ytimycopicyity yí pergamino necy.

¹⁴ Alejandro je ca'tzpi ti yí' ooy mij xymidundigooyich. Yí nhuindzin'ajtim Dios paatip nej yajmizogyii.

¹⁵ Naygüend'adñ ca' miich yí' mmijyöybedipy, com ooy mic ti jipjpcogapxxy Dios y'ayuc huidibi ñich ajcxy nyaj'ixpicpy.

¹⁶ Co yí' oga'n xyxxyich ma je mij tungmiidpi, naydüg ayuc nñhuindinaayich. Nipin xycapubejtyich, nígi ajcxy xycögueectaayich. Huen Dios ocmeecxy nej ajcxy ti y'iditczixy. ¹⁷ Ca' y'ocnejity Dios ti xypubetyich ti xypudigxyich. Dios ti xyajjotmicpicyich, jigix ngapxhuäxtähuibich ytiy'ajt ma tüg'óciy jáy. Jéb tüg'óciy jáy huidibi ca' yjudiojäyity huen mido'mbijctaaygixy Dios ytiy'ajt. Dios ti xyñihua'ñich ti xycohua'ñich ma yí o'cin. ¹⁸ Yí Huindzin Dios yí' xyñihua'ñ xycohua'ñibich ma tüg'óciy jáy huidibi ajcxy jibic-huinma'ñ miid. Yí'xycuend'adipich, ca' ni ti xyjadipyich, cooni anajty njädyich jii by tzajpjoty ma y'ane'my. ¡Huen Dios cömay idipy janch huinixii huinítiempo!

Pablo ymígügtijc capxpooxin yajniquexy

¹⁹ Yajñax ñich ngapxpooxin ma yí Prisca etz ma Aquila etz ma Onesífero yjuugy ymígüg. ²⁰ Erasto ti je' yhuim'y jim Corinto. Je Trófimo com pijcip anajty, ñich je' n'ixmajch jim Mileto. ²¹ Tzojc mjatyminiipy ma ca'ni tiichpy ymiini. Yquejxyp ajcxy capxpooxin ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xy-pudigixiipy. Huen Dios tuñ may'ajt miid miich ajcxy. Amén. Jadu'n ngapxcxyich.

TITO

1 Ich Pablo, Dios jada m̄id nduuf̄ich, Jesucristo xy'ap̄ostol'ajtp̄ich. Ȳi' ti xyquexyich ma ȳi j̄ay ajcxy huidibi Dios ti yhuin'ixyii, jigix ajcxy mib̄igipy ȳi' ytiy'ajt. Nañ nyajnim̄ahuibich nej j̄eb ajcxy cuyduun̄i Dios ytiy'ajt. ²Jadu'n nduuf̄ich jigix co anajty y'o'ccixy, chi jadüg'oc yjugyp̄jccixipy e tzin̄aaygixipy huinix̄i. Dios yajhuinhuan̄iy je j̄ay ajcxy je jugy'ajtin huinix̄ibi, ca'ni anajty naaxhuiñybi chondägy. Jada tiy'ajt j̄eb nm̄ijpidaacim com Dios ca' ȳi' y'aniidägy. ³Jada jugy'ajtin huidibi ijtp huinix̄i, Dios ti yajnejhūy je j̄ay ajcxy cham co je tiempo ti yhuaad'ajtni, m̄id ȳi' y'ayuc huidibi ngapxhuäcx̄ibich. Je Dios huidibi xyajnidzoocim ich ajt n'alma ti xyajnībicyich co ȳi' y'ayuc ngapxhuäcx̄yich. ⁴Miich Tito, cham nijaȳy jadu'n nej j̄ihūy nijaȳyich ngi'm'ung. Com tú'ciy nm̄ij'ijxim nm̄ijpidaacim Dios. Huen Dios ich ajt nDeedy tzajp̄otpy etz Cristo Jesús ich ajt nihuambi yajtzoocpi tuñ may'ajt oy'ajt m̄id miich, huen xypa'ayooy etz xyajjotcujc'adipy.

Myajnībigipy ȳeyd̄ijc huidibi j̄eb nigohuajc'aty ym̄igügt̄ijc

⁵Paady ich miich jim Creta ñaaxjot nyajhui'my, jigix mjacyajnīx̄ihuipy je m̄igügt̄ijc jadu'n nej ich ca' ti nyajni'ix̄iyd̄yich ajcxy. Tügpi cajp nidüg nidüg myajnībigipy ȳeyd̄ijct̄ijc huidibi nigop'ad̄ib nigohuajc'ad̄ib ȳi mib̄ijcp̄id̄ijc, jadu'n nej ti nyajnim̄äy. ⁶Ȳi' myajnībigipy ȳi huidibi ca' ti tund̄igoy; huidibi tüg töxyj̄ay m̄id, ca'p ycanaaḡity; huidibi y'ung ajcxy ca' nijot'aty mayñaax tzin̄aayin; huidibi y'ung ajcxy ycapxym̄idooyb. ⁷Cop̄icy huidibi nigohuajc'adamb ȳi mib̄ijcp̄id̄ijc huen j̄ay'aty tiydudägy, ca' huaad ti tund̄igoy; huen yajxon cuend'adipy huidibi Dios yje'ajtpy; j̄ay huidibi ca' ycöjuuñity; huidibi ca' yhuindzip̄ity; huidibi ca' y'amügit̄y; huidibi ca' chip'ixt̄äy; huidibi ca' y'adzocy. ⁸Ȳi' j̄ebi myajnībigipy huidibi oyj̄ay'ajtin tuñ m̄id hueñy-timypin̄ity; huidibi ooy y'am̄igügit̄y; huidibi huijycujc; huidibi tiydudägy yhuinma'ñ; huidibi huindziḡib Dios; huidibi c̄i'm yajxon naygüend'ajtip. ⁹Huen cixyot huin̄ijot naybid̄aac̄igixy ma je ayuc tiy'ajt huidibi ti x̄ip̄jccixy, jigix j̄ebi ajcxy jot'am̄ijm̄ohuipy jacjadyii j̄ay ajcxy m̄id tiy'ajt janchypi, e capxjotcid̄ägipy ajcxy je pin ajcxy ca' ixa'ñ Dios y'ayuc.

¹⁰Com ji may judíōj̄ay huidibi ca' ycapxym̄idoogixy, huidibi nigoobi tijaty ayuc tzachnim̄yadap; huidibi ajcxy huin'imb ym̄igügt̄ijc, jadu'n nej ȳi' ajcxy huidibi m̄inamb co cop̄icy tüg'óc̄iy mib̄ijcp̄i huen yajtiy'ajt̄y ymang ajcxy, jadu'n nej judíōj̄ay tungixy. ¹¹Cop̄icy co mgapx'adugipy ȳi' ajcxy huidibi ym̄igügt̄ijc yajco'inīyib

tüg j̄in tüg tijc; huidibi ajcxy yaj'ix̄p̄jcp mujuy; huidibi ca' tiy'ajt yaj'ix̄p̄jccixy.

¹²Nidüg ȳi' ajcxy cohuinma'ñybi nigapxy ym̄igügt̄ijc ymina'ñ co ȳi' Creta j̄ay ooy ajcxy y'anīj̄ity, ooy ajcxy huinducity, ooy ajcxy ñuuxity, ooy ajcxy ycaaxity.

¹³Tiy'ajt jadu'n nej jada cohuinma'ñȳay ymina'ñ. Yaj'oj ajcxy m̄ictägy, huen huinj̄ihūiygixy yajxon Dios y'ayuc.

¹⁴Ca'p ajcxy mijpidaacipy ȳi' judíōj̄ay ycostumbre etz ni ca' ajcxy mijpidaacip̄y ȳi' y'ane'm̄in huidibi j̄ay c̄i'm ti ni-huinma'ñ'aty, huidibi ajcxy ti j̄ijpyöyduutni Dios y'ayuc ytiy'ajt.

¹⁵Pin j̄ay huädz yjot yhuinma'ñ m̄id, oy ti jacuyduñ costumbre, o oy ca' ti cuyduñ, Dios yj̄aygidacpy ȳi' co oyjot oyhuinma'ñ m̄idity. Pin j̄ay ca' huädz yjot yhuinma'ñ m̄idity, oy ti jacuyduñ costumbre, Dios ca' j̄aygidägy ȳi' com j̄ibic ajcxy yjot yhuinma'ñ m̄idity, ca' ajcxy nej ñayj̄ihūiygixy. ¹⁶Ȳi' jadu'mbi j̄ay hue' ñaybid̄aac̄igixy jadu'n nej j̄ihūy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniguëx̄icixy co ca' ajcxy cuydungixy Dios ytiy'ajt. Dios ca' ȳi' oy iix ajcxy yhuinma'ñ, ca' ajcxy capxym̄idoogixy Dios, ca' ajcxy Dios ytung m̄ihuaadity.

Nej j̄eb huaad chinaaygixy yjugy'ajtcixy

2 Miich huädz myaj'ix̄p̄igipy ȳi m̄igügt̄ijc nej j̄eb huaad cuydungixy Dios ytiy'ajt. ²Miich m̄ihuij̄ip mgapxhuij̄ip ȳi mijj̄ayd̄ijc huen ca' ajcxy y'amü-gyj̄ay'adipy; huen huijycujc j̄ay'ajtcixy; huen m̄id'ajtcixy oyjot oyhuinma'ñ; huen mijpidaaccixy Dios ytiy'ajt cixyot huin̄ijot; huen oyj̄ay 'ajtin tungixy m̄id huentimypin̄j̄ayity; huen ajcxy mecxtujc̄in yajtungixy ma ȳi chinaayin. ³Nañytimyjadu'n mijj̄ayd̄ijc ajcxy töxyj̄aybi huen ajcxy jadu'n j̄ay'ajtcixy nej huidibi ajcxy Dios yajm̄ij'ajtp; ca'p ajcxy ym̄igügt̄ijc nigapxip ni'oj̄ihūipy, ni ca' ajcxy nihuambedipy; nañ ni ca' ajcxy y'amügyj̄ay'adipy; huen ym̄igügt̄ijc h̄huij̄icixy capxhuij̄icixy m̄id ayuc oybi tudägy. ⁴Ȳi' mijj̄ayd̄ijc ajcxy töxyj̄aybi huen h̄huij̄icixy capxhuij̄icixy ȳi mutz'anäg töxyj̄ayd̄ijc ajcxy nej j̄eb huaad chinaaygixy yjugy'ajtcixy; nej j̄eb huaad ytīc ñay yajm̄ij'ajtcixy; nej j̄eb huaad tzojccixy j̄ihūiygixy y'ung y'anäg; nej j̄eb huaad oyjot oyhuinma'ñ yajtungixy. Ichuij capxhuij̄y mutz'anäc̄pi co huen tiydudägy chinaaygixy, ca' ti j̄ibic-huinma'ñ ajcxy mib̄idzimipy. Huen h̄huij capxhuij̄ ajcxy nej j̄eb huaad yj̄in ytīc cuend'ajtcixy yajxon; nej j̄ebi y'am̄igüg'ajtcixy, nej j̄eb huaad capxym̄idoogixy ñay. Pen j̄ibic-huinma'ñ anajty ajcxy ytumyb, chi anajty Dios ytiy'ajt yajnigapxy yajni'oj̄y.

⁶ Miich Tito, nañ jadu'n jaty ñhuj jaty capxhuij yujcy-
eecipidijc etz anäctijc nej jëb huaad oyjot oyhuinma'ñ
yajtungixy, ca' huaad ytundigooygixy ycapxtigooygixy.
⁷ Tito, tiydudägy mdzinähuipy, oyjot oyhuinma'ñ myaj-
tunipy. Jim yi migügtijc iixpejt pigipy ma miich, nej jëb
huaad ytungixy. Huädz ajcxy myaj'ixpigipy yi tiy'ajt,
huijyujc m'idipy. ⁸ Tito, m'ñhuijip mgapxhuijip yi
migügtijc miid oy'ayuc oyhuinma'ñ, jigix co pinjäy
jijpcogapxñhuaanip miich m'ayuc, chi tzo'ydu'ñ
jihuhua'ñ, e jadu'n ca' jadipy nej jibic xyñigápcixipy
xyñi'ojñiygixipy.

⁹ Je tumbidijc huidibi ijtp cojuyiy codoogiy, huen
yhuindzin ñmidoogixy capxymidoogixy nej ypadyi.
Huen tungixy nej huaad yhuindzin jäygidägy, ca' ad-
zo'nmay yjäy'adipy. Ca' meedzip tijaty yhuindzin yjé'ajt-
py, huen yajmij'adipy yajxon yhuindzin, huen yajxon
ytung tundaayí. Pen jadu'n ajcxy yhuindzin midungixy
yajxon, huin'it cömay y'idipy yi Dios ytiy'ajt, je Dios
huidibi xyajnidzoocim ajt n'alma.

¹¹ Cham n'ixxim nnejhuim nej Dios may'ajt ti tuñ
miid tüg'óciy jäy ajcxy ycixpi, co ti yaj'oyiy nej jëb
huaad hueñpinity pinjaty mijpidaacip yi' y'ayuc,
ypadamyb ajcxy y'alma ñidzoocin co anajty y'o'ccixy.
¹² Dios cham ti xyajnejhuim pen tözögamb ñch ajt
n'alma, chojcpy co n'ixmajtzim je jibic-huinma'ñ huidibi
Dios ca' jäygidägy. Ca' huaad ooy nijot'ajtm yi
mayñaxpi tzinaayin ma jadachambi xii tiempo yjacyöy.
Copicy ndzinaayim huijyujc etz tudägy, e nguydunim
Dios y'ayuc ytiy'ajt. ¹³ Njijp'ixxim mina Jesucristo, je
huidibi xy'ane'mdaayim, ymiina'ñ ya naaxhuiñ
jadüg'oc miid ñch ajt ycixpi. Njotcugiyim ñch ajt co
n'ixxim ymiin miid y'oy'ajtm ymic'ajtm, yi Dios huidibi
yajnidzögamb ñch ajt n'alma. ¹⁴ Yí Cristo Jesús ti ñayy-
oxyii ti ñaydoogyii co y'o'cy ma yi cruudz miid ñch ajt
ycixpi. Yí ti xyjuybidzimim ma anajty yi mujcu' c'äm
xymid'ajtm, co anajty ti nbocytuunim. Yí ti xya-
jpocyn'ihuätztaayim nidüg'óciy, jigix Dios xyjäy'ajtmip
miid huädz jot huädz huinma'ñ, jëb nduunim
oyjäy'ajtm cixyot huinijot.

¹⁵ Tito, jada tiy'ajt migügtijc myajnimaydähuipy.
M'ñhuijip mgapxhuijip ajcxy yajxon. Dios ti xymöy cö-
tujcin co m'ojipy pinjaty xycacapxmidoob, jëb ajcxy yi
m'ane'min xyajmij'ajtp.

Huen mijnicxpejtcixy yi gobierno ytungmiidpi

3 M'ñhuijip mgapxhuijip yi migügtijc huen capxymi-
doogixy yi gobierno ytungmiidpi etz cajpjäy
ytungmiidpi. Huen capxymidoogixy jadu'n nej
y'ane'myii ajcxy. Huen tungixy huidibi tiydudägyip
huidibi ajcxy yaj'ane'mip. ² M'ñhuijip mgapxhuijip yi
migügtijc ajcxy ca'p ajcxy ni pin nigapx ni'ojñhuip, nañ
ni ca' tzipcapxy ajcxy ixtähuip, huen ñaybidäacigixy
amigüg, huen mimecxtujctaaygixy yi ymigügtijc ajcxy,
huen nicy xyeemy jäy'ajtcixy miid yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús,
hue' anajty nyajpaatim miid jibic-huinma'ñ. Ca' anajty
n'ñmidoohuim ngapxmidoohuim. Je mujcu' anajty ti
xyhuin'ñinim, paady anajty nnidigooyim ndüdigooym.

Ndzachnijot'ajtm mayñaxpi tzinaayin, ni ngajajtm
anajty nej n'ixmajtzim yi jadu'mbi huinma'ñ. Jibic-huin-
ma'ñ nduunim. Jadu'n njäy'ajtm nijot anajty n'iditzm,
nga'oy'ixxim anajty nmigügtijc. Paady jäy anajty
xymiddziptoonim, chi naymijotma'tcootim miñ xyipy.
⁴ Jadu'n anajty nduunim ixti cooni Cristo Jesús
ñayguëxigiyb ya naaxhuiñ, etz nnejhuim jadu'n nej
Dios ñch ajt nihuambi yajtzoocpi may'ajt oy'ajt ti tuñ
miid tüg'óciy jäy ajcxy ycixpi. ⁵ Yí xyajnidzoocim ajt
n'alma canan co ñch ajt ndzach'oyjäyity. Hue' je' jadu'n
ti tuñ miid co pa'ayo'n ti yajtuñ miid ñch ajt ycixpi. Nini-
goob ti tuñ may'ajt oy'ajt miid ñch ajt ycixpi. Chi
yaj'oyiyñi ajt njot huinma'ñ huinjemy miid je Espiritu
Santo huidibi xyajtigiyim njot huinma'ñ, e jadu'n ajt
njogy'ajtm ndzinaayin chondaacni huinjemy. ⁶ Dios ti
yecy yi Espiritu Santo janch mijcajee ma ñch ajt njot
nhuinma'ñ. Jadu'n Jesucristo xytuunim, je huidi ñch ajt
nihuaanim yajtzoocim. ⁷ Yí ti xyaj'ahuimbijtm tudägy
miid je may'ajtm oy'ajtm huidibi ti tuñ co yí ti y'ögy
miid ñch ajt ycixpi. Jëyi cham y'oy'ahuixnity mina anaj-
ty nbadaanim je jugy'ajtm huidibi Dios miid huidibi ca'
ycixipy ni minaa xii.

⁸ Jada ayuc jada tiy'ajt ndzojcpyich co miich mnigapx-
pedipy. Ooy ycopicyty co yí ajcxy huidibi mijpidacp
Dios huen oyjäy'ajtm tungixyp. Ooy y'oyity co
oyjäy'ajtm tungixyp ajcxy. Yjäygidägyip yi jäy ajcxy miid
je oyjäy'ajtm huidibi anajty ajcxy ytumy etz ypadipy
ajcxy oy'ajt. ⁹ Xmatz yi jäy ajcxy huidibi nigapxy nimiy-
dägy yi nigoobi'ayucity, yi huidibi ca' choobaady. Nañ
jadu'n yi' ajcxy huidibi nigapxp nimiydacp huidibi
ñi'ap'ajtpy ñideedy'ajtpy. Ca' mijptigiyñhuipy yi tzip
capxy ma yi judiojäy ycotujcin huidibi ajcxy ypanicxyp.
Yí jadu'mbi tzip capxy ninigoob yí, ca' yí ni ma
choobaady, ca' jugy'ajt miidity.

¹⁰ Yí jadu'mbi jäy huidibi tzip capxy ixtaayb, miid
tüg'oc mejtz'oc myaj'ojipy pen ca' ycapxcöbicy, tm ix'oj,
huen nicxy. ¹¹ Mnejhuim co yí jadu'mbi jäy ajcxy ti ix-
majtzicixy je tiy'ajt, tundigooyb yí ajcxy, c'm jadu'n
nayyajpocycähuigixy.

Pablo nimay Tito co miid naybadaanip

¹² Nyajniguxepich nidüg, aver huidibi ñch anajty
n'ocquejxyp yi Artemas o yi Tíquico. Co yí jim yjädiy,
chi miich xyjatyñiminipyich mic'amy jim Nicópolis com
jim nyajnaxa'ñich yi tich poj tiempo. ¹³ Co yí Zenas, yi
huingapxpi, etz Apolo ajcxy jim yjädiy, quejxnajxcix
miich yí, e mooygixy ytu'amgixpi ca'ydí ti yajmayja-
jtcixy tú'am. ¹⁴ Huen yi nmigügtijc'ajt ixpjccixy nej jäy
y'oyjäy'aty, huen pubejtcixy pin tijaty yajmayajtp. Pen
ca' jadu'n tungixy, Dios ca' yí jäygidäacip yí ajcxy
yhuinma'ñ.

Pablo ycapxycixy miid Tito

¹⁵ Yí migügtijc ajcxy huidibi ya yquejxyp ajcxy capx-
pocxin ma miich. Nquejxpich ngapxpocxin ma
tüg'óciy yi nmigügtijc ajt huidijaty jim yajmij'ajtp Cristo

Jesús. Huen Dios mij may'ajt tunip miid miich ajcxy
ycixpi. Amén. Jadu'ñyi ngapxcíxyich.

FILEMÓN

1 Ìich Pablo etz Timoteo, ìich ajt nmigüg, nijayiy-bìch miich Filemón huidibi ooy ndzocyich, huidibi quipxyi m'ìd nduunim. Nmach'ìñäyich m'ìd co nya-jmij'atyich Cristo Jesús. **2** Nañ jadu'n nijayiybìch yì Apía, ìich ajt nmigüg töxyjäybi, etz yì Arquipo, huidibi capx-huäcx Dios y'ayuc tú'ciy m'ìd ìich ajcxy, etz tüg'óciy yì m'ìgügtijc huidibi naymújciçxp ma miich mdijc Dios ojadajtcixy. **3** Huen Dios Teedy etz yì Huindzin Jesu-cristo tuñ may'ajt oy'ajt ma miich ajcxy etz xya-jjotcug'iygixipy.

Pablo capxpaady Filemón co mijpidägy Dios

4 Nyajnajxpyich Dioscojuyip ma Dios m'ìd miich ajcxy ycixpi. Njatyimjäymejtzpìch miich ajcxy jabom jabom co Dios nmibijctzooyich. **5** Tì ìich ayuc nmidoj jadu'n nej miich mdzocy mijhuüy yì Huindzin Jesús etz tüg'óciy pinjaty yajmij'ajtp Jesús. **6** Nañ jadu'n nmibijctzooybìch Dios m'ìd miich ajcxy ycixpi, huen ojjäy'ajtin mdunipy m'ìd je m'ìgügtijc, jadu'n nej Dios tì xyajnejhuüy yì tìy'ajt jigix ajcxy tìy'ajt paadipy ma miich nej jèb ajcxy cuyduñ Cristo y'ayuc. **7** Hermano, tì ìich ooy njotcug'iyich m'ìd yì m'oyjäy'ajtin huidibi miich mdumyb co tì mbubety yì Dios yjäy.

Pablo pijctzoy tüg may'ajt ma Filemón m'ìd Onésimo ycixpi

8 Njapijctzoohuamybìch tüg may'ajt ma miich. Oy njam'ìdìdyich cõtujcìn huidibi Jesús xymooyich jèb nja'ane'my co miich mgöbigipy Onésimo oy'amy. Per ca' jadu'n n'ane'ma'ñ m'ìd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yì Onésimo oy'amy. Ìich Pablo, tì nmijjäyiy'ñich. Cham jäy tì xypidägyich pujxtigoty m'ìd co ngapxhuäcxich Jesús y'ayuc ytiy'ajt. **10** Cham may'ajt nbijctzooyich ma miich co mba'ayoohuipy yì Onésimo. Jadu'n njihuüyich nej n'ung'adyijich m'ìd co yì tì mijpidägy Jesús ya ma ìich nbujxtijc'ìñäyich co tì nya-jnimäyich Dios y'ayuc.

11 Tìbì xii tiempo ñaxy co yì Onésimo ca' yì tì xy'ìmi-doy tì xycapxymidoj. Jadachambi janchtiy capxymidoohuam jadu'n ma miich etz jadu'n ma ìich. **12** Cham nyajnigüexy Onésimo. Ooy njajihuüyich co yam nguexyich. **13** Ooy ìich yam njayaj'ida'ñich ma ìich jigix

ixyipy yam xym'ìd tuñich. Ytimyñipaapty ixyipy jadu'n nej miich xym'ìd tuñich ma yam nbujxtijc'ìñäyich m'ìd co ngapxhuäcxich je jemybi oybi ayuc nej Jesucristo yjaty ayoooy. **14** Per ca' ìich n'a'ixyich ñicxy nya-jhui'myich, pen ca' miich jadu'n m'ina'ñ. Ca'p ndzocyich adzip ahua'ñ tijaty miich mdunipy. Jèyì ndzocyich co miich oy'amy xypubedipyich. **15** Ca' yjocyity paady ycixpi tì xycöguëgy jèbi mijpidägy Jesús. Hueeni xii tiempo tì y'ity ya, e cham co yhuimbidipy ma miich, m'ìd y'idipy jim huinixii. **16** Ca' jadu'n m'ocm'ìd'ajtnip cham jadu'n nej jac'oyñipin cojuuyy codoogyy tumbi. Hue' je' mmi'adip jadu'n nej Jesús yjäy huidibi ooy mdzocy mijhuüy. Pues ooy ìich yì ndzocy njihuüyich. Jac nigì cham miich mdzogy mijhuüyich m'ìd co yì cham y'oyjäyity, etz co cham mijpidägy yì Huindzin Jesús.

17 Pen janch miich xymigüg'adyijich cöbìc yì Onésimo jadu'n nej ìich miich ixypy xycöbìcyich. **18** Pen tì yì yin-jaty huenjaty xymidundigoy o xym'ìnucx'adyii ìich miich nmigüedipy. **19** Ìich Pablo, ìich miich njaaybìch nfirma-jyich m'ìdich ngi'mgi' ngi'mletra. Hermano, nmigüedipyich nej Onésimo xym'ìnucx'adyii. Oy ìich yam ca' n'ìbaady ngapxpaady co miich xym'ìnucx'adyijich m'ìd co Dios ytiy'ajt tì mbaady ma ìich. **20** Xypubedipich m'ìd Onésimo. Yì nHuindzin'ajtim Jesús yjäygidägy pen jadu'n mduñ. Mdunipy may'ajt m'ìd Onésimo m'ìd Jesús ycixpi, e jadu'n ìich jèb huaad njotcujc'atyich.

21 Nnejhuüybìch co ooy m'ìmidoy mgapxmidoy, e jadu'n nej yam njacnijayy, jac'anaxy mduna'ñ. **22** Nañ jadu'n yam nimäy. Tun may'ajt ni'ixi tüg jättac. Njijp'ijxypich co nbujxtijcpidzimipyich tzojc m'ìd co miich ajcxy Dios mibijctzoogixy m'ìd ìich ycixpi, e jadu'n jèbi ñcxibìch ma miich.

Pablo ycapxycjxy m'ìd Filemón

23 Nañ nbìdacpyich necyjoty yam. Xycapxpooocxp Epafra ìich nmibujxtijc jäy m'ìd Cristo Jesús ycixpi.

24 Nañ xycapxpooocx Marcos, Aristarco, Demas etz Lucas. Ìich yì ajcxy xypubejtp ya. **25** Huen yì nHuindzin'ajtim Jesucristo may'ajt oy'ajt tunipy ma miich ajcxy, jèb miich ajcxy oy m'ity. Amén. Jadu'n ngapx-cxyich.

HEBREOS

1 Jecy'ajty Dios ayuc yecy ma ajt nmij'ap nmijteedy canaag'oc etz canaagnax miid je yprofetas ajcxy, je' ajcxy huidibi najtzcaxhiy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ich ajt miid je' y'ung. Dios miid y'ung yaj'oyiye je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymiid Dios y'oy'ájtín, yi' je' Dios ytiicxin'ajtpy yjajin'ajtpy. Yi' je' codinaayb etz yajniguëxigy nej je' je Dios. Dios y'ung huijtz'ijtaayb tüg'óciy miid je' y'ayuc etz ane'min mic'ajt miidpi. Co Dios y'ung ti xya-jhuaatzim ajt nbocy, chi cöbicy je mij'ane'min jilby tza-jpoty, jadu'n nej jihuÿy y'ixtacy a'oy'amy ma je mijpi Dios ymijc jilby tza-jpoty.

Dios y'ung jacmij yi'ca'ydí ángeles ajcxy

⁴ Je Dios y'ung jac mij je' ymic'ajt y'ane'min miidity, ca'ydí je ángeles ajcxy. Com yi' je' Dios y'ung, paady ycixpi mic'ajt miidity jaydëbi ane'my huidibi Dios yje'ajtpy, e ca'ydí yi' ángeles ajcxy yi' jadu'mbi mic'ajt miid. ⁵ Com Dios ca' yi' ni tüg ángel nimay:

Ich miich n'ung'ajtpy. Ich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adiibich, ich miich n'ung'adiiyb.

⁶ Co Dios y'ungoob oy quexy ma naaxhuiñyäjä chinäy, chi yi' ane'min pidacy:

Huen je ángeles ajcxy nidüg'óciy huindzigihuiipy pa'tjihuihuipy je' y'ung.

⁷ E miid je ángeles ycixpi, Dios ymina'n:

Yi' ángeles jadu'n yi' ajcxy nej poj. Yi' ajcxy huidibi tza-jpoty tzinaayb, jadu'n yi'ajcxy nej huidzuc, nej jhnye'n.

⁸ Jadu'n Dios ymina'n miid y'ung ycixpi:

Miich, Dios'ajtp, miich m'ane'min huinixii huinitiempo yi' y'idipy. Miid mdudägy'ajtin miich m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, miich mDios, ti xyhuin'ixy, e ti yejc-täy nigí ma miich je jotcuje'ajtin je xondaacín, ca'ydí ma yi' mmí'ane'mbidijc.

¹⁰ Dios nañ jadu'n ymina'n:

Miich, Huindzin Dios, oga'n'aty mbidac nej naax-huiñybi chondacy, e miid miich mmic'ajt myaj'oyiye je tza-jp.

¹¹ Cijxtähuiip yi' naaxhuiñybi etz yi' tza-jp, per miich hui'mip huinixii huinitiempo. Jadu'n yi' naaxhuiñybi etz yi' tza-jp y'amijydähuiipy nej huit.

¹² Jadu'n miich yi' naaxhuiñybi etz yi' tza-jp m'anëgipy nej tüg huit yaj'anëgyin. Jadu'n miich yi' naaxhuiñybi

etz yi' tza-jp myajtigadzipy nej jäy ajcxy yajtigach yhuít. Chi miich je'ni m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

İña' ma ich nmijc a'oy'amy, ixti mabaad ich miich je mmidzip nmimadactäyich, jadu'n yi'ajcxy nipaadipy nej yi' miich mdecypocxpejt'adyii.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyögyixy jigix pubedipy je jäy ajcxy huidibi ajcxy y'alma padam ñidzoocín.

Ca' n'ixnajx nmidonajxim nigoo yi' pocyhuinmeecxin

2 Miid jadayaabi tiy'ajt ycixpi, oy co yajxon n'ocjäygughiyim Dios ytiy'ajt huidibi ti nmi-doohuim, jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi. ² Pen je ayuc tiy'ajt huidibi ángeles ajcxy yecy jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miid ypocy ycixpi.

³ ¿Nej tijy ich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi' Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcaxhiy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ich ajt. ⁴ Jadu'n anajty capxhuäcxixy Jesús y'ayuc ma ich ajt, chi Dios yajniguëxíc Jesús y'ayuc co yjanchity co tuñ ijxpejt, mijhuinma'n etz milagro. E co Dios xymooyim je yjihui'n ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi' ángeles ajcxy ti cötujcín möy co y'ane'mi-ty ya naaxhuiñ, jadu'n nej xii tiempo min cidägy, je xii je tiempo huidibi ich ajt nnimiydaacim. ⁶ Hue' janchtiy ji tüg'it yjaybetyity ma Dios ñecy, ma ymina'n:

Miich Dios, ¿ti yi' je naaxhuiñyjäy, co miich yi' ajcxy mjäymedziyb? ¿Ti yi' je naaxhuiñyjäy, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñyjäy ajcxy e nañ ti mmöy jacminacy ymic'ajt y'ane'm'ajt ca'ydí yi' ángeles ajcxy. Per jac'axam miich mmöhua'n naaxhuiñyjäy ajcxy nigí ymic'ajt y'ane'm'ajt, ca'ydí je ángeles ajcxy. Tüg'óciy huidijaty miich ti myaj'oyiye ana-jty ti mbidactähuiip yi' ma yi' naaxhuiñyjäy ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuiy tüg'óciy tijaty huidibi ti myaj'oyiy, y'idipy ma yi' ajcxy ytecypat. E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixipy ca'ni cham n'ijxim co tüg'óciy tijaty ya naaxhuiñ etz tza-jpoty ca'ni amugi' ycapxcöbigyii. ⁹ Dios ti xyaj'ijxim co Jesús miid mij'ajt ane'm'ajt. Je ángeles ajcxy nigí mic'ajt oy'ajt anajty miidity, ca'ydí Jesús co yi' chinay ya naaxhuiñ. Jadu'n Dios tuñ jaydebi Jesús y'ögy miid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰ Tüg'óciy huidijaty ya jajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachy'pi huidibi ti minaxy ti yajnaxy. Miid co Jesucristo tzaachy'pi ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miid co Jesucristo, je huidibi jäy ajcxy yajpocyñihuaatzp, jilby mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E miid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuiy co yi' ymina'ñ co je mibijcpidijc jadu'n nipaady nej yi' yjugytijc ymüggtijc.

¹² Paady je Cristo ymina'ñ ma yjaybetyity:

Miich Dios, ñch miich ngaxpadipyich ma nmüggtijc. N'ñhuyich iy miid miich ycixpi ma je jäy ajcxy ti nayyöymújcgixy.

¹³ Nañ jadu'n Cristo ymina'ñ ma yjaybetyity:

Nmijpidägibyich Dios.

E jadüg'oc yminaanim:

Cha ñch, miid je ung anäg ajcxy tibi Dios xymöyich.

¹⁴ Ma jäy ajcxy ytügquëx'ajtcixy, tügpi xxiixy, tügpi ni'py je' ajcxy. Nañ jadu'n Jesús ymiid je' anajty xxiixy ni'py jadu'n nej jäy ajcxy ymiidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmid co jäy yaj'ög'iyb, je' je' je' mujcu'. ¹⁵ E jadu'n je Cristo yajnihuädzictuty tüg'óciy pinjaty anajty cojuyy codoogiy y'ijtp ma je mujcu', miid co tzig'igixy yi' y'o'cin. ¹⁶ Janch co Jesús ymiid ya naaxhuiñ, ca' nmi-naanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E miid jada ycixpi, Jesucristo jadu'n anajty miidity ñinicx etz yjugy'ajtin tú'ciy miid je jugytijc ymüggtijc ninicx etz jugy'ajtin, jigix jëbi yi' naydügpajc codinäy naaxhuiñyjäy ajcxy ma Dios yhuinduu miid tudägy'ajt etz pa'ayoohuin. Etz nañ jadu'n jigix jëbi huindzigy Dios miid yci'm ñinicx miid jäy ajcxy ypocy ycixpi, e jadu'n yajpocy-huaatztähuip yi' mayjäy ajcxy. ¹⁸ Com Jesucristo ci'm tzaachy'pi minajx yajnajx, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jëbi pubety pinjaty jadu'n tzaachy'pi minajxp yajnajxp, etz ma yjot'ixy yhuinma'ñ'ixyii je mujcu'.

Jesús jancigí mijty yi' ca'ydí Moisés

3 Miid co Jesucristo jadu'n ti tuñ, paady ycixp miich ajcxy migügtijc huidibi cixyot huinijot mijpidacp

Jesucristo, je huidibi ajcxy Dios ti xyhuin'ijxcixy co xy-je'adäänigixy. Pidaaccix mhuiñma'ñ yajxon ma je Cristo Jesús, je huidibi nehuiñim co Dios ti quexy ya naaxhuiñ, je huidibi tüg'pajc mijtungmiid ma Dios, huidibi tüg'pajc xycodinaayim ma Dios. ² Jesús tudägy yi' ti y'ity ma Dios yhuinduu, je Dios huidibi ti yajnibigiyii je mijtung, tim jadu'n nej Moisés y'ijty tudägy ma je ytung miid tüg'óciy jäy huidibi anajty ti cöbijccixy Dios ycötujcin ma Moisés. ³ Jesús ymihuaad nigí huindzig'ñ etz cömayin, ca'ydí Moisés. Tim jadu'n nej pin tüg tijccoipi je' je' ijtp cömay, ca' nmi-naanim je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyiydäy tüg'óciy huidibi ji'ajtp. ⁵ E jadu'n je Moisés tudägy je' ytuuñ miid tüg'óciy jäy huidibi ti paady Dios ycötujcin ma yi'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶ Je Cristo tudägy ytuñ miid tüg'óciy ñch ajt huidibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñch ajt nbaady nej Dios ytijc, e Cristo tudägy ytuñ miid ñch ajt, pen tudägy nmibijcim Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcuic ixti mabaad n'o'cim miid je' ycixpi huidibi njijp'ijxim ma Dios.

Dios yjäy ajcxy ypoocxin

⁷ Paady ycixp jadu'n yjaybetyity ma Dios ñecy ma je Espíritu Santo jadu'n ymina'ñ:

Jadachambi pen midooyb miich ajcxy nej Dios ymina'ñ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidigy Dios jecy'ajt (co ajcxy y'ijty jim mijtig'ëduum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios ymina'ñ:

Miich ajcxy mmij'ap mmijteedy ajcxy jim mijtig'ëduum xyjot'ijx xyhuinma'ñ'ijxich ajcxy jecy'ajty. Ca' ajcxy jäymech co ajcxy y'ijxy anajty canaag mijhuinma'ñ huidibi ndumyich anajty miid yi' ajcxy ycixpi huixchigüipx jimijt.

¹⁰ Paady njotma'tyich miid miich ajcxy mmij'ap mmijteedy jecy'ajty, e nmi-naañich: "Ñidigoy tädigoy ajcxy jabom jabom ma yjot yhuinma'ñ. E ca' ajcxy ne-jhuñhuaangixy anajty ñch nn'aa ndü'aa."

¹¹ Paady yi' ajcxy nmijotma'tyich, e janch janch nmi-maayich ajcxy, e ca' n'indägyich, co ca' ajcxy ytig'ëhuipy ma ñch nbocxtac.

¹² Migügtijc, naygüend'äjtigix nidüg nidüg co ni tüg miich ajcxy mgam'adap jibicjot jibic-huinma'ñ, e ni mga'ixmájtzcixipy Dios juugy'p y'ayuc, miid co ca' mmibijccixy. ¹³ Hue' janchtiy nayjot'amijmóoyigixy miñ xyipy jabom jabom nami xii tiempo yjancicxñi. Jadu'n miich ajcxy mdunipy, ca'ydí ajcxy yi' pocytunñ xy-huin'ingixy, e chi anajty mnaybidäacigixy jotjuuñ.

¹⁴ Pen nmibijcim nmijpidaacim Cristo y'ayuc tibi nbaatim oga'n'aty, e ca' n'ixtig'ëhua'cim mabaad n'o'cim, chi jëbi n'ijtim miid Cristo.

¹⁵ Je' je' je' huidibi jaybetyity ma Dios y'ayuc:

Cham, pen mmidooyb miich ajcxy nej Dios ymına'ñ, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty mïid co ajcxy mïbidïgy Dios.

¹⁶ ¿Pinjaty ajcxy huidibi jecy'ajty midou Dios y'ayuc e mïbidïgy Dios? Nidüg'óciy je' ajcxy huidibi tzomb Egip-to naaxjot jecy'ajty mïid Moisés. ¹⁷ ¿Pinjaty je Dios ymijotma't jadu'n huixchiguïpx jimijt? Je huidijaty ajcxy tundigoy mïid Dios ytiy'ajt, e je' ajcxy cijx y'öctaaygixy jim mijtigïduum. ¹⁸ ¿Pinjaty Dios ñimay co ni camina ytigïhuiipy ma je Dios y'it ylugar ma jëbi ypoocxcixy mïid y'i? Je' ajcxy huidibi ca' ycapxymïdoy. ¹⁹ Paady nnejhuiyim co janch ca' ajcxy jaty nej ytigïygyixyipy ma Dios y'it ylugar mïid co ajcxy ca' mïbijcy Dios y'ayuc.

4 Com nmïdñi ajt Dios y'ayuc, jadu'n nej ti xyaj'ahuanïyim co ndigïyim ma y'i chinaydac yjuy'ajttac, e nboocxim mïid y'i. Paady ooy tzocy co ndzigïyim Dios. Ca' jecyity co nidüg miich ajcxy ca' mdigïhuiipy mïid co ca' mmïbijccixy Dios y'ayuc. ² Nañ jadu'n ti ñich ajt nmïdoohuim je Dios y'ayuc oybi, tim jadu'n nej y'i ajcxy jecy'ajty ti midooy. Per ca' Dios y'ayuc ma ti ypubedyii ajcxy co ti jamïdoogixy je tiy'ajt. Com hue' ajcxy ymidou, e ca' ajcxy mijpidacy. ³ ñich ajt com ti nmïbijcim je Dios y'ayuc oybi, ñich ajt je' tigïyimip ma je it huidibi Dios ti tijy ma jëbi nboocxim mïid y'i. Com Dios jadu'n ymınañ:

Paady y'i ajcxy nmijotma'tyich, e nnimäyich ajcxy, n'ïbaadyich ngapxpaadyich n'ayuc, co ni camina xii y'i ajcxy ypocxtac capaadiipy ma ñich. Tüg'óciy huidibi Dios yajcojy yaj'oyïy, hue' ti yajcojy ti yaj'oyïy jayjpnï ca'ni anajty naaxhuiñybi chondacy.

⁴ Com ma yjaybetyity je tiy'ajt jilby muumity nigapxy je mïhuixtujcxïbi ma jadu'n ymına'ñ:

Dios ypoocxy je mïhuixtujcxïbi mïid je' ytung ycixpi tïbi anajty tuñ.

⁵ E jadüg it yjaybetyity ma Dios ñecy ma jadu'n ymınañ:

Ca'p y'i ajcxy ytigïygyixyipy ma ñich nbocxtac.

⁶ Hue' janchty Dios yjacmïd'ajtyñi it lugar ma ypocxtac ma jëbi pinjaty ytigïhuiip. Y'i ajcxy huidibi tzinay jecy'ajty huidibi jayjip midou Dios y'ayuc, ca' je' ajcxy ytigïy ma Dios ypocxtac, mïid co ajcxy capxycömidoodacy Dios. ⁷ Paady ycixpi Dios ti pidägy tüg xii tüg tiempo mïna jëbi pinjaty tigïhuiipy ma y'i ypocxtac. Je' jadachambi xii tiempo Dios ti pidägy. Dios ti xyñi-maayim nej David ymınañ tzach com jecy, nej miiñ jay-bety huidibi ti yajnigapxy co jadu'n ymına'ñ:

Jadachambi pen midooyb miich ajcxy nej Dios ymına'ñ, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je poocxin, ca' Dios canigapxy huingbi xii mïna ytigïhua'ñ ajcxy ma Dios ypocxtac. ⁹ Paady ycixp, jadu'n yjac-huim'yñi jadüg xii tiempo mïna Dios jäy ytigïhua'ñ ma Dios ypocxtac.

¹⁰ Com pinjaty tigïyb ma Dios ypocxtac hue' je' ypocxy mïid je' ytung ycixpi tïbi anajty tuñ, tim jadu'n nej Dios ypoocxy je mïhuixtujcxïbi mïid je' ytung ycixpi tïbi anajty tuñ. ¹¹ Hue' tzocy co naymic'ijxim nej huaad ndigïyim ma je Dios ypocxtac, ca' yjecyity co nijëjity

miich ajcxy mbaduunipy nej ajcxy y'idïch huidibi ajcxy ca' mïbijcy Dios y'ayuc, e ca' mdigïygyixyipy ma Dios ypocxtac.

¹² Com y'i Dios y'ayuc ijtp y'i huinixii huinitiempo, e ymïid mic'ajt. Nïgi yajtigiyñajxtäy ninïcx, jot almi, ca'ydi tüg espada huidibi mejtz'adu'm'amy jijpïp etz yjijpxu'ñity. E Dios y'ayuc nejhuiydaayb nej jäy ajcxy yjot yhuinma'ñ mïidity, e tüg'óciy tijaty ajcxy ñi-jot'ajtcixyp. ¹³ Ca' ji ni ti huidibi Dios ti yajcojy ñicxy ñayyüchyii ma y'i yhuinduu. Tüg'óciy nej ajt njot yhuinma'ñ nmïidity ñiguëxctähuip y'i ma Dios, je Dios ma ñich ajt nguendi ngïyegaanim, y'i ijxtaayb ajt njot yhuinma'ñ.

Jesús y'i je' je' mïjhuingapxpi ma Dios

¹⁴ Jesús, je Dios y'ung, y'i je' tügpaajc jacmïjtungmïid huidibi xycodinaayim ma Dios mïid ajt nbocy ycixpi. E Jesús ti ytigïy ma Dios yhuinduu, paady ycixp tzoc ijtim tudägy ma ajt nmïbijcin. ¹⁵ Pues com Jesucristo, je huidibi tügpaajc mïjtungmïidip ma Dios, je huidibi xycodinaayim etz xyhuingapxim ma Dios, com Cristo tzaachypï etz ijxta'ni canaagnax ti yajnaxy, tim jadu'n nej ñich ajt tzaachypï etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypï etz ijxta'ni. ¹⁶ Tzoc agujc jotcujc nmïhuingoonim je Dios y'ane'mdac e n'ojadajtim nmïbijctzoohuim Dios, jaydëbi co anajty jotmay nmïid'ajtim, chi Dios may'ajt oy'ajt tunipy mïid ñich ajt ycixpi.

5 Tüg tüg mïjtungmïidpi huidibi huingapxp jäy ajcxy ma Dios, hue' je' yajhuin'ijxp ma yëdyjctjic, etz yajnigapxpejty, jaydëbi yhuingapx jäy ajcxy ma Dios etz yajnaxipy Dioscojuyip mïid jäy ajcxy ma Dios, etz yegipy huindzig'iñ ma Dios mïid jäy ajcxy ypocy ycixpi. ² Je mïjtungmïidpi jäy ajcxy yajñibjic huidibi huingapxp jäy ajcxy ma Dios, jëbi y'i ajcxy pa'ayooy huenpïnity huidibi pocy ymïid, com nañ jadu'n y'i ajcxy pocy jihuïy. ³ E mïid yci'mbocy ycixpi copicy yegipy huindzig'iñ ma Dios etz mïid jacjadyii jäy ajcxy ypocy ycixpi.

⁴ Ni pin huaad cï'm ycanaymïyïi je jadu'mbi tung co yhuingapxity ma Dios. Dios yhuin'ijxpy pinjaty huingapxip ma y'i mïid jäy ajcxy ycixpi, tim jadu'n nej Dios huin'ijxy Aaron jecy'ajty etz yajñibjicy y'i jadu'mbi tung. ⁵ Jadu'n yajty mïid je Cristo, ca' cï'm nayñibjctzoohuïyï ma y'i jadu'mbi tung. Dios yajñibjicy co huingapxip mïid jäy ajcxy ycixpi, e ti ymïyïi je mïj'ajt jadu'n nej anajty ti nimäy:

Miich je' ñich n'ung. ñich miich mjygy'ajt ti mmïy cham.

⁶ Nañ jadu'n ymına'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitiempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mïbijctzoy janch mic je Dios huidibi jëbi ycohua'ñyïi ma je o'cin. Mïid co ooy mïbijcy ooy huindzigïy Dios mïid yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios

ja'ung'adyii, yjajti nej ycapxymidoohuipy Dios, miid je' ycixpi nej anajty ti y'ayoy ya naaxhuiñ. ⁹ Co Cristo yaj-ca'pxy yi' y'oy'ajtin miid je tzaachypi huidibi yminajxy yajnaxxy, chi ni'ixi' anajty y'ity jēbi cop'adyii alma nid-zoocin huinixii, jaydēbi tūg'óciy pinjaty capxymidoob Cristo, ypaadip ajcxy y'alma nidzoocin. ¹⁰ Dios jadu'n yajnibijcy Jesús co yajnicxip je jac mijpi tung ma yi' co huingapxip jāy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöduutim yi' mibijcin

¹¹ Ooy iich miich ajcxy mij nmidmiydäga'ñ ma jadaabi tiy'ajt, per ooy chachchip nimiyaacnity, com ca' miich ajcxy mic'amy mhuinjihuūhuipy Dios ytiy'ajt. ¹² Jadu'n nej jada xii tiempo ti yjecni ma miich ajcxy oga'n ti mmibicy. Hue' miich ixypy ajcxy mniyaj'ixpijcnip Jesucristo ytiy'ajt je tzijatyipi. Per miich ajcxy md-zojcyñi co myajnajtzcapxihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jēyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anactijc huidibi caagy caayb. ¹³ Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajticy je ayuc tiy'ajt tiybi. ¹⁴ Je' tzijatyipi tiy'ajt je je' winjihuiyigixp, je' huidibi ymibijkin mij may mid'ajtkixpin, jidu'n nej je' huidibi y'aa ytihtz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwiiygixichin je' huidibi oy, etz je' huidibi ka'oyin.

6 Paady tzoc niği yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jāy tiibi yhuinma'ñ yca'pxtaayñi. Ca' n'agapxiyocim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi' o'cin, e jadu'n nej nmibijcin Dios oga'n. ² Ca' jadüg'oc n'ixpijco'cim je ixpijcin miid je niibejtin ycixpi, etz jadu'n nej yajcniñaxj je mibijcpidijc jaydēbi paadip ajcxy je Dios yjihui'ñ ymic'ajt, etz jadu'n nej yi' öcpi ajcxy yjugypigipy co anajty ti öccixy, etz jadu'n nej Dios tzaachytuna'ñ huinixii pocyjäydijc. ³ Chi njac'ixpijcin Dios y'ayuc je tzijatyipi, pen Dios jadu'n tzojcpy.

⁴ Com pinjaty ti huinjihuūy Dios y'ayuc ytiy'ajt, e jāygidägy huidibi Dios yejcpy, etz miidity Dios yjihui'ñ ma y'ay yjot, jadu'n je' nipaady nejjihuūy chinay ma jün ytiicxin. ⁵ Etz ti ajcxy jāygidägy Dios y'ayuc ytiy'ajt, e ti jihuiyigixy Dios yjihui'ñ ymic'ajt huidibi yajtzinaayip ajcxy y'alma ma je xii je tiempo huidibi miimb cidacp. ⁶ Yi' jadu'mbi jāy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jēbi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je Dios y'ung miid ajcxy ypocy ycixpi, e niixicixy yajxiicixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy

ooy cosecha ma pin ti ñipy ti ytuñ, Dios je' anajty yconuucxin ymiid. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajti-goyamb etz nöctähuip ma je mij jün. (Jada naax jadu'n jada' nipaady jadu'n nej jāy huidibi ti ixmach ymibijcin.)

Yi' huidibi nmibijcin yi' xyhuijtz'ijtim tudägy

⁹ Migügtijc ajcxy huidibi ooy ndzocyich, oy iich ajcxy jadu'n njamidmiydägyich miich ajcxy, janch nejhuiybich co ca' ajcxy ti m'ixmach yi' mibijcin, etz nejhuiybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jāydgoy huidibi miich ajcxy mdumyb miid yi' ycixpi, jadu'n nej oyjāy'ajtin ti mdungixy miid jacjadyii mibijcpidijc, e chambaad jadu'n mdungixy. ¹¹ Hue' iich ajcxy ndzocyich co miich ajcxy nidüg nidüg mnixondaaccix tungix oyjāy'ajtin ixti mabaad m'öccixy, jigix mbaadipy ajcxy tūg'óciy huidibi ajcxy mijp'ijxyp ma Dios. ¹² Ca' iich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydēbi mbaatcixy tiibi Dios xyaj'ahuaniiygixy.

¹³ Co jecy'ajty Dios moy Abraham je' y'ayuc, ci'm je' niigapxpejty y'ayuc, com ca'anajty ji jac mijpi pin nigapxpedipy je' y'ayuc. ¹⁴ Chi Dios Abraham nimay: "Janch co iich miich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuijxy miid mecxtujcin, e jadu'n ycidigiiyi' huidibi anajty Dios ti yaj'ahuaniiyi. ¹⁶ Co ajcxy jāy ycapxcixy co yjanchity, jim je' pin niigapxpejtp je' y'ayuc, je' pin jacmijp, je' niigapxpejtpy jada ayuc. E co niigapxpety je' y'ayuc, chi je' ayuc y'ity, e ca' huaad pinjaty ymina'ñ co ca' yjanchity. ¹⁷ Paady ycixpi Dios niigapxpejty yci'm'ayuc, miid co anajty yajnejhuūhua'ñ je jāy ajcxy co cuyduna'ñ y'ayuc tiibi ahuaniiy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'aniidägy nimina. E co Dios jadu'n tuñ, chi xyajjotcugiiyim mij, iich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jijp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E miid co njijp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcuyc ijtım ca' ma tzig'iñ jihui'ñ. Jadu'n Dios y'ayuc nipaady miid iich ajt ycixpi nej tūg pujx huidibi je barco huon'ijtp mejyjoty, ca'ydi nej jyaty je barco. Iich ajt njijp'ijxim co ndigihuaanim ma Dios y'it tzajpjoty, tim jadu'n nej je judio sacerdote mijtungmiidpi ytigiy anajty jecy'ajty ma Dios y'it ma je Dios ytiyc, je it huidibi anajty adiyduciy miid huit. ²⁰ Tigihuaanim iich ajt ma je Dios y'it tzajpjoty ma Jesús ytigiy miid iich ajt ycixpi, Jesús ti yaj'ahuäch nej jēbi ndigiiyim ma Dios y'it. E jadu'n Jesús naydügpajc huingapxy etz codinäy mayjāy ma Dios yhuinduu huinixii huinitempo. Jesús ytung tim jadu'n nipaady nej Melquisedec ytuñ jecy'ajty.

Yi Jesús tim jadu'n ymijity nej Melquisedec

7 Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchypí Dios tzajpjotyí. Co anajty Abraham yhuimbity co anajty oy ti chiptuñ, ma anajty je reydijc oy ti yajqueec-huäcxtäy ti mimadactäy, chi Melquisedec choon oy jijpcoyöyí Abraham, e chi ooy Dios mijuydacy minucxtacy miid Abraham ycixpi. ² Huidibi anajty Abraham ti paady ma anajty oy ti chip-tuñ, chi je' pijc-huäcxy majcpicy, chi pugoon tüg-picy mooy je Melquisedec. Melquisedec yxii hue' yhuimbidity "rey tudägyí". E com co anajty yrey'aty jim Salem, hue' Salem yhuimbidity "jotcuyc'ajtin", paady jëbi nminanim jadu'n, "je rey huidibi jotcuyc'ajtin yejcp". ³ Je Melquisedec ca'p anajty yajnejhuüy ytaj yteedy, ni y'ap yteedy. Ni ycayajnimidyägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixii huinitiempo.

⁴ Occuenditungixy miich ajcxy nej je Melquisedec anajty ooy ymijity. Je Abraham, iich ajt nmij'ap nmij-teedy ci'm mooy Melquisedec je tüg picyí huidibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picyí huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'óciy. ⁶ Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picyí. Je' je' anajty huidibi cädigiiyí tibi anajty Dios yaj'ahuaniiy. Jadu'n Melquisedec yajpuhuaniiy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydí je pin yajconuucxp. ⁸ Ya ma iich ajt, pin cädigiiyíp tügpicy je majcpicyí (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymina'ní ma yjaybetyty co je' yjactzinaayni. ⁹ E jëbi yajmina'ní co je Leví etz jadu'niiyaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuüy ymiguetye je' ajcxy je Melquisedec huin'it co Abraham ymiguetye. ¹⁰ Jadu'n nipaady nej jihuüy Abraham niigix'ajtyni y'ap'ajtin yteedy'ajtin Leví etz jacjadyii je huidibi anajty ajcxy ca'ni ypi'c'atyni yma'xung'atyni co oy Melquisedec yjijp-cobadii.

¹¹ Je Israel cajp yajcädigiiyí je' je Dios y'ane'min ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyty co yajacquëxigy jadüg huidibi codinähuiip je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpí huidibi codinähuiamyb je mayjäy ma Dios, hue' copicy co tú'ciy naybadiiyb miid Melquisedec. ¹² Co ytigadzipy pinjaty huingapxp ma

Dios, nañ jadu'n ytigadzip je tiy'ajt je cötujcin. ¹³ Iich ajt nHuindzin Jesucristo, je huidibi niimiydacy ma Dios ñecy co huingapxa'ní je mayjäy ma Dios, huingbi ap huingbi Teedy je' anajty, ca' y'ocLevijin. E ni tüg yí y'amigüg ca' yhuingapxy ma Dios. ¹⁴ Huädz yajnejhuüy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yí capxpaty Judá y'ap y'oc co niimiydacy pinjaty anajty huingapxp je mayjäy ma Dios ytijc.

¹⁵ Jacnigüëxícip jada ooy co jadüg ytigiiyí huidibi tumb ma Dios, huidibi tú'ciy naybaatip miid Melquisedec.

¹⁶ Ca'p Jesucristo yajtungbijci co huingapxp je mayjäy ma Dios miid je cötujcin huidibi minaamb co yí y'amigügtijc patip yí jadu'mbi tung, je huidibi ajcxy yjuy'ajtin cixip tigoyip. Hue' je Jesucristo chinaayin yjuy'ajtin ca' ycixipy ytigoyipy ni mina, paady ycixp Jesucristo yajtungbijci huingapxp je mayjäy ma Dios.

¹⁷ Com miid je' ycixpi jadu'n Dios tiy'ajt yejcy co jadu'n ymina'ní:

Miich je' cham mhuingapxyp je mayjäy ma iich. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huidibi Moisés yejcy, ca' y'ocuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhui'm jecy'ajty, ca'p je' ni ti yaj'oy-bidity yajhuätzpidity. Miid je huingapxpí ycixpi huidibi niid'ajtim cham jac'oy yí' huidibi niijp'ixim ma Dios.

²⁰ Co Dios Jesucristo yajtungbicy, chi nigapxpejty yci'm ayuc co yjanchity. ²¹ Jacjadyii ajcxy huidibi anajty tungixp ma Dios ytijc, hue' je' ajcxy tungmooyi, e ca' Dios nigapxpejty yí' ajcxy y'ayuc. Per co Jesucristo ytungbijcy, chi Dios nigapxpejty yci'm ayuc. Com jaybety jadu'n ma Dios ñecy ma jadu'n ymina'ní:

Je Huindzin Dios ti nigapxpejty yci'm ayuc, e ni mina yajotmetzcühiipy.

Jadu'n Dios nimay y'ung:

Miich mhuingapxamyb etz mgodinähuiamyb je mayjäy ma iich huinixii huinitiempo. Jadu'n miich mdunipy nej Melquisedec ytuuñ.

²² Com Dios niigapxpejty yci'm ayuc co yjanchity co Jesucristo ytungbijcy, paady yí Jesús yí' je' majamoy mic'ajtmoy je jemybi ayuc huidibi yajhui'm miid jäy ajcxy ycixpi, je jac'oybi cötujcin. ²³ Jacjadyii huidibi anajty yhuingapxcixy ma Dios ytijc, nimay anajty ajcxy ooy. Com co tüg y'oc'y, chi huingbi ytigäy ma je' ytung.

²⁴ Jesús com ca' yí' yjuy'ajtin ycixipy ytigoyipy ni mina, paady ca' ytung ixmach, etz ca' yí'ytungmöy ni pin.

²⁵ Miid je' ycixpi Jesucristo mic'ajt miidity jaydëbi yajnidzoocy jäy ajcxy y'alma huinixii huinitiempo, pinjaty miibijctzooyb Dios ma Jesucristo yxii. Jesucristo jëbi tunipy jadu'n, com yí' yjuy'ajtin ca' ycixipy ytigoyipy ni mina. E yí' Dios miibijctzodii miid jäy ajcxy ycixpi jabom jabom huinixii huinitiempo.

²⁶ Je Jesús je' je' tügpajc je mijtungmiidpi ma Dios, huidibi iich ajt nyajmayajtim, je huidibi miid huädz yjot huädz yhuinma'ní, e ca' je' miidity ni ti jibicpi ni ti

pocy. Je' ca' tūgnax y'ity mīid pocyumbidijc. Nīgi je' ymijity ycixity, ca'ydi jac ti huidibi yajpat tzajpjoty. ²⁷ Ca' Jesús yjadu'nity nej ajcxy jacjadyii huidibi tuun ma Dios ytijc jecy'ajty, co yaj'óccixy iyujc, e je' ajcxy yejcpy huindzigi'ñ jabom jabom, midüg co je' ajcxy ñayya-jpocyñihuächyii, e chi jada' mīid jāy ajcxy ypocy ycixpi. Jesús tūgtecpajc je' yejc huindzigi'ñ mīid mayjāy ycixpi, co je' c'i'm ñayyejci ma yi o'cin jadu'n nej tūg huindzigi'ñ. ²⁸ Je Dios ycötujcin huidibi Moisés yjay-hui'm jecy'ajty, hue' y'ane'my co huen tungmōy jāy ajcxy huidibi pocy mīid, co mijtungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nigapxpejty yci'm'ayuc co yjanchity. E mīid je jemybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huidibi ijtp huinixi ca' ti bocy mīidity.

Jesús yi' je' je mijhuingapxpi ma yi Dios y'ayuc jemybi

8 Huidibi ooy nīgi ycopicyity, huidibi yajnimydaacp, co ñich ajt nmīd'ajtm pin xycodinaayim ma Dios, je' je' je Cristo, je huidibi jilby ijtp mij'ane'mbi tzajpjoty, jadu'n nipaady nej jihuixy yi' y'ñāy a'oy'amy ma Dios ymijc. ² Jiiby je' ytuñ ma je janchypi Dios y'it ylugar, je amaaybi, huidibi oyhuindzigi'ñ ijtp. Je it huidibi Dios yajcoj, e ca' nminaanim jāy ajcxy yajcoj. ³ Tūg'óciy pinjaty huingapxp ma Dios, yajniñicy je' paady, e copicyity co cāyegipy ofrenda etz tijaty huindzigi'ñ ma Dios mīid jāy ajcxy ypocy ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios mīid jāy ajcxy ypocy ycixpi. ⁴ Co Jesucristo ixypy ya y'ocyajpaady naaxhuiñ, ni ycahuingapxy ixypy mayjāy ma Dios. Com jini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tūg ijxpejt nej Dios y'it jilby tzajpjoty, jadu'n yi' nipaady nej tūg anecpi huidibi tzomyb jilby tzajpjoty. Co Moisés jecy'ajty Dios ytijc je' coji mīid huit, chi Dios ñimaayi: "Cuenditun yajxon co anajty mgojy je tijc tūgnax jadu'n nej je ijxpejt huidibi nyaj'ijx jim copcixy." ⁶ Per je mijtung huidibi Jesús ytumyb ma Dios mīid jāy ajcxy ycixpi, jac'oydung yi' ca'ydi je tung huidibi je jāy ajcxy ytumyb huidibi mijtung mīid ma Dios ytijc ya naaxhuiñ. Com jemybi etz jac'oy etz jacmic'ajt mīid je cötujcin huidibi Dios ymoy Jesús, ca'ydi je cötujcin huidibi Dios ymoy Moisés jecy'ajt. Com hue' je' jac'oy alma nīdzocin Dios yaj'ahuanñy jāy ajcxy ma je jemybi cötujcin.

⁷ Co je jayijp'atypi cötujcin huidibi Moisés ymooyi cayaj'oyiydaayi jāy ajcxy ypocy mīid Dios, ca' yi' ixypy ycopicyity je mimetzpi cötujcin huidibi Dios ymoy jāy huinjemy. ⁸ Per Dios y'ijx co je jāy ajcxy ca' yajxon cuydungixy je cötujcin huidibi Moisés ymoy, jadu'n nej ymīna'ñ ma yjaybetyity ma Dios ñecy mīid je' ajcxy ycixpi, ma jadu'n ymīna'ñ:

Jadu'n je Huindzin Dios ymīna'ñ: "Mimb xii tiempo ma huingbi cötujcin nmōhuibich yi Israel jāy etz Judā jāy ajcxy.

⁹ Ca' y'ocjadu'niñ nej ñich ngötujcin huidibi nmooyich je' ajcxy y'ap yteedy jecy'ajty, je huin'it tiempo taabi nyajtzoñich ajcxy jim Egipto naaxjot. Ca'p je' ajcxy cuyduñ je cötujcin huidibi ajcxy nmooyich, e paady ca' nduñich cuendi yi' ajcxy." Jadu'n ymīna'ñ je Huindzin Dios.

¹⁰ Jadu'n je Huindzin Dios ymīna'ñ:

Je cötujcin huidibi nyegaamybich ma Israel jāy ajcxy co anajty yjadu'mbi xii tiempo ti ñaxy, jadu'n je'. Nbidāgibich ngötujcin ma yi' ajcxy yhuinma'ñ, e jadu'n nipaady nej jihuixy ti njayich n'ayuc ma ajcxy y'ay yjot. E ñich yi' ajcxy xyDios'adiñb, e yi' ajcxy njāy'adiñybich.

¹¹ Tūg'óciy ajcxy nejhuñhuipy pin ñich. Ni pin ji cayaj'ix-pigipy pin je' je Huindzin Dios, ni pin, ni ymīgüg, ni ymijin ymidijc, ni pi'ctijc ni mij'anāctijc. Com nidüg'óciy ajcxy nejhuñhuipy pin ñich; ypi'city ymutzity, ymijjāyity, etz ymij'anācity.

¹² E ñich yi' ajcxy nmeecxip yjibicjāy'ajtin, ni camīna ngajac'ajihuñhuñybich ajcxy ypocy. Jadu'n Dios ymīna'ñ.

¹³ Co Dios je' ycötujcin jemybi nimiydāgy, je' je' co yaj'amijñyñi je jayijp'atypi cötujcin. Je huidibi amijñyñip ca' je' y'octuunip, tzojcy yi' yaj'ijxtigoyaañi.

Je Dios ytijc huidi ya naaxhuiñ etz Dios y'it huidi tzajpjoty

9 Je Dios ycötujcin jayijp'atypi ymīd je' anajty ñidiy'ajt nej huaad ytuñ ma Dios ytijc ya naaxhuiñ, ma jāy ajcxy huindzigi'ñhuipy Dios. ² Je Dios ytijc jadu'n je' ycojity. Je jayijpi cuarto hue' anajty xñijity Lugar Santo, jilby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jilby jadüg'it huidibi xñijip Lugar Santísimo (ma Dios ni'ixcidāgy je jāy). ⁴ Jiiby anajty tūg mij mesa ac tim ori je' anajty ma ajcxy ypoomjocixy, e ma je' jim anajty y'ity tūg cajoon ac ori je' anajty yñinixc huidityi. Jiiby cajoonjoty anajty y'ity tūg tu'tz ac ori huidibi anajty mīid je jicy ijxpejt huidibi Dios Israel jāy ajcxy ymooy jecy'ajty. Etz jilby anajty Aarón yta-jc huidibi huip huam. Etz jilby anajty je tzaa y'ity ma je' anajty yciyxjayity Dios y'ane'min. ⁵ Ma je cajoonnixc jim anajty je querubines ñigojtudyity huidibi Dios y'oy'ajtin mīid. Je querubines anajty codinaayb Dios, e je' anajty ajcxy yajniñigooyb mīid yqueec je cajonnixc ma ajcxy je huindzigi'ñ ñi'py ypidacy mīid jāy ajcxy ypocy ycixpi. Ca' huaad yjacyajnimydcy mijcajee jadachambi tijaty huidibi anajty yajpatp jilby ma Dios ytijc.

⁶ Jabom jabom co anajty jadu'n y'ijttāy ni'ixi', chi je huingapxpi ytiñygyxy ma Dios ytijc ma je jayijpi cuarto, je Lugar Santo, tuñ ajcxy huindzigi'ñ etz cuydungixy yi' ajcxy ytiy'ajt mīid Dios ycixpi. ⁷ Jimijt jimijt ma je mimetzpi cuarto huidibi je huit adiydujcp, jilby ytiñy tūgtecpajc je huingapxpi huidibi jacmijtungmīid ma Dios ytijc. E co jilby ytiñy, chi midigiy huaj ñi'py, huidibi mīid huindzigi'ñ Dios mīid yci'mbocy ycixpi etz mīid tūg'óciy jāy ajcxy ypocy ycixpi etz mīid ajcxy ypocy ycixpi co ca' nejhuñygyxy co ytundigoogyxy. ⁸ Mīid jada ycixpi je Espiritu Santo xyajnejhuñyim co je tungmīidpi huidibi huingapxi je mayjāy ma Dios, ma ajcxy jacyaj-

tungixy anajty je jayjip cuarto ma Dios ytijc, chi ca'ni je' anajty y'ahuächñi nej jëbi pinjaty ytigÿy ma je it lugar Santísimo ma Dios yhuinduu. ⁹ Je Dios ytijc huidibi ijtp anajty ya naaxhuiñ ca' je' yjëjity je janchypí. Hue' je' anajty ijxpejt'ajtp huidi Dios y'it'ajtpy tzajpjoty. Jiiby je tungmïdipi huindzigÿy Dios mïd ofrendas etz mïd huindzigÿñ. Per jada huindzigÿñ ca' yajtigoy je pocy-tunï ma je jÿy ajcxy yjot yhuinma'ñ. ¹⁰ Je judío jÿy ytiy'ajt huidibi tuun ma Dios ytijc jecy'ajty, hue' je' ñi-gapxy caayin uucin, etz jadu'n nej ajcxy ñayya-jpocyñihuáatzigixy mïd ñi etz canaag costumbre huidibi ajcxy cuydumy. Jadu'n ajcxy ytuñ ixti cooni Dios yajtigajztay tÿg'óciy y' y'cötujcïn.

¹¹ Per ti y'oy ya naaxhuiñ je Cristo, e y' je' cham ijtp jacmïjtungmïdipi ma Dios, y' ti mimiñ jemybi cötujcïn jac'oybi. E y' je' codinaayb je mayjÿy ma Dios y'it tza-jpjoty, je it jac'oybi jacmïjpi, jacca'pxypí, ca' nminañim jÿy ti cojy, e ca' yaajty naaxhuiñ. ¹² Cristo ti ytigÿy ma je Dios y'it, je lugar Santísimo. Ca' ti ytigÿy mïd co jiiby yajquëxiga'ñ pi'cchivo ñi'py o toro ñi'py, hue' yci'mni'py jiiby yejcyp ma Dios. Jadu'n ti ytigÿy tÿgtecy tÿgÿy huinixii huinítiepmo, etz xyajnidzoocim ajt n'alma huinixii. ¹³ Ooy yjanchity co y' toro ñi'py etz je chivo ñi'py etz y' cuyjam co ajcxy nõccixy huaj nïx ma je Dios ojadajtac, co ajcxy je pocyjÿy yajnihuäxcixy je ñi'py etz yajnixidujtcixy je cuyjam ymïd mic'ajt co yajpocy-huáatzigixy ñinïcx, per jotjoty ca' yajhuäch. ¹⁴ (Je huin-gapxpi huidibi tumb ma Dios ytijc ya naaxhuiñ ca' ymadägy co jÿy yajpocyhuádzipy mïd toro ñi'py), Jesucristo nigi ti ymadägy yajpocyhuäch jÿy ajcxy mïd yci'mni'py. Com Jesucristo ymïd je Dios yjihu'ñ ymic'ajt huidibi ca' yci'xipy ytigoyipy ni mina, chi ñaygÿyeyci ci'm ma Dios mïd Dios yjihu'ñ ymic'ajt, jadu'n nej tÿg huindzigÿñ huätzpi, com ca' ni ma ni ti tundigoy. E mïd yci'mni'py Jesucristo xyajhuaatzim je jibicpi ma ajt njot huinma'ñ, ca'ydí ndunim huidibi Dios ca' jÿygidägy, e jadu'n ajt huaad ndunim ma je Dios juugypí ytung.

¹⁵ Paady y' Jesucristo y' je' huin-gapx'ajtp ma Dios mïd ñch ajt yci'xipi mïd je jemybi y'cötujcïn huidibi Dios yajhui'm. Y' Jesucristo co y'o'cy, y' ajt je' nbocy xymeecxim tiibi ndundigooyim ma je jayjip'atyp cötujcïn huidibi Moisés jayhui'm. E jigix pinjaty Dios ti yhuin'ixy, jëbi ajcxy y'cädigÿyii je tzinaydac ma jëbi n'ijtim huinixii. Je tzinaydac huidibi Dios ti xy'ahuaniyim. ¹⁶ Co tÿg jÿy jip'ixy y'o'cin, e yajcojy tÿg testamento, ooy ycopicyity co yajnejhuñhuipy pen janch je' ti y'ögy je pin yajcoj je tiy'ajt jigix je' ytigÿyhuipy tumbi je tiy'ajt. ¹⁷ Co tÿg jÿy jip'ixy y'o'cin e yajcojy tÿg testamento, ca' je' ti mic'ajt mïdity je testamento pen jugy'ajtni pin je' anajty ti yajcojy. Huin'itni janchty co anajty ti y'ögy, huin'it je testamento mic'ajt mïdity. Je jemybi tiy'ajt huidibi Dios xyajhui'my jadu'n y' nipaady nej jÿy testamento yajcojy co anajty jip'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady yci'xipi jecy'ajty co Dios Moisés moy cötujcïn, yajtzoobaat je' mïd iyujc ñi'py. ¹⁹ Moisés je' capxhuäch je Dios ytiy'ajt ma tÿg'óciy mayjÿy. Chi jada'

hujtzigÿy tÿg lana tzaptzpi mïd tÿg quipy aacx huidibi ooy oy yxuugy. Je' yajxooc ma huaj mang ñi'py etz chi-vo ñi'py teemhuidity mïd ñi, chi Moisés yajnihu'ch je libro mïd je ñi'py, je libro huidibi anajty ti capxy etz nañ jadu'n jÿy ajcxy yajnihu'ch je ñi'py. ²⁰ Co Moisés jadu'n ytuuñ, chi yminañ: "Jada je' je ñi'py huidibi yajt-zoobatp je ane'min je tiy'ajt huidibi Dios ti yecy ma mi-ich ajcxy." ²¹ Moisés nañ jadu'n ñi'pyñihu'ch je cochac tijc ma anajty yDios ojadajticy, e tÿg'óciy tumbajt huidijaty jiiby tumb. ²² Dios y'cötujcïn, je jecyip, yminañ co tÿg'óciy huidijaty yajtungixyp co Dios ojadajticy, copicy yajhuádzipy mïd ñi'py. E pen ca' ajcxy teemy yocy ñi'py, Dios ca' huinmecxa'ñ y' ajcxy ypocy.

Co Cristo y'o'cy mïd ajt nbocy yci'xipi, y' yajnicxy ajt nbocy

²³ Ooy jada anajty ycopicyity iyujc ñi'py huindzigÿñ, jigix yhuádzip huidijaty tumb ma Dios ytijc ya naaxhuiñ, je huidibi ijxpejt'ajtp anajty nej Dios y'it jiiby tza-jpjoty. Per je Dios y'it huidibi jiiby tzajpjoty chojcpy jac'oybi huindzigÿñ ca'ydí huidi ya naaxhuiñ. ²⁴ Com Cristo ca' je' ytigÿy ma Dios ytijc huidibi jÿy ajcxy ti cojy. Je tijc huidibi jÿy ajcxy ti cojy, je' je' ñigojtuutïn je it lugar janch janchypí huidi jiiby tzajpjoty. Cristo tÿgÿy ma je Dios y'it ylugar jiiby tzajpjoty, ma je' cham xycodi-naayim ma Dios yhuinduu. ²⁵ Je judío mïjtungmïdipi huidibi huin-gapxp ma Dios ytijc, huinjimijity ytigÿy ma je Dios ytijc co yecy ñi'py huidibi ca' ci'mni'py'adyii. Cristo ca' y' ñay'ahuaniyii y'ögipy canaag'oc, jÿy tÿgte-cypajc ytigÿy ma Dios y'it mïd yci'mni'py. ²⁶ Co ixipy ca' yjadu'nity, canaag'oc Cristo ixipy patni chaachy'öcin maabi naaxhuiñybi chondagy. Per jadachambi ma xii tiempo yci'xaani ytigoyaañi, Cristo tÿgte-cypajc ñayguëxici ya naaxhuiñ, jigix codinahuipy tÿg'óciy jÿy ma Dios mïd ajcxy ypocy yci'xipi. Jadu'n Cristo tuuñ jigix yajtigoyipy pocytunï. ²⁷ Dios ane'min pidac ya naaxhuiñ co nidüg nidüg jÿy paadip y' o'cin tÿgte-cypajc. E Dios ti pidägy je xii je tiempo mina tiy-duna'ñ nidüg nidüg jÿy mïd ypocy yci'xipi. ²⁸ Je Cristo jotcujc tÿgte-cypajc nayyeyci ma je o'cin co yajpocyñihuaatztäy je mayjÿy. Chi jada' ñayguëxiga'ñyii je mimejtz'ocpi ya naaxhuiñ, e ca' nminañim co yajpocyñihuaatzaanip jadüg'oc je mayjÿy, hue' je' ni-hua'namyb ycohua'namyb tÿg'óciy pinjaty jip'ijxip cixyjot huinijot co je' miina'ñ mïd y' ajcxy yci'xipi.

10 Je Dios y'cötujcïn huidibi Moisés jayhui'my jecy'ajty, hue' je' anajty ñidy'ajt je oybi huidibi minamb. Ca'p je' anajty yjëjity je oybi. Paady je cötujcïn huidibi Moisés yjayhui'm ca' je' jëbi huádz yaj'ahuimbity pinjaty pocy ytumb, pinjaty mijhuäcp anajty ma Dios mïd je iyujc huidibi ajcxy Dios yajhuindzigÿy, huidibi ytun'ahuimbijtcixyp jimijit jimijit. ² Co ixipy je cötujcïn y'ocmadägy huidibi Moisés yjayhui'm yaj'ahuimbity ixipy huádz ajcxy je pocy ytumbi, ca' ixipy je jadu'mbi huindzigÿñ y'ocyajtuunï jimijit jimijit. Com pin je jadu'mbi huindzigÿñ yejcp, co ixipy je' ypocy yajnicxtäy, ca'p je' ma ñayjihuiñhuipy ti bocy mïdity jadüg'oc. ³ Co jadu'n yaj'öccixy je iyujc mïd

ypocy ycixpi, je' je' je tiy'ajt co ajihuiyigóotigixy ypocy jimijit jimijit. ⁴ Com yi huaj mang ñi'py etz yi chivo ñi'py ca' mic'ajt mñidty co pocyajnicxtähui'py nimina.

⁵ Paady co Cristo ymiññ ya naaxhuiñ, chi ñimay je Dios:

Ca' miich ni ti huindzigi'ñ mdzojcní ma ymiññ iyujc'ögy, ti miich xyñi'ixi'iyich tüg ninicx.

⁶ Ca' m'ocjäygidaa'cní huindzigi'ñ iyujc'ögy huindzigi'ñ yajno'cp. Ca' miich m'ocjäygidaa'cní co jäy xyajhuindzigi'y iyujc'ögy ypocy ycixpi.

⁷ Chi nmina'ñich: "Dios, cha nmiiññich jigix miich mdzojcní yajcuydunipy, jadu'n nej yjaybetyity ma miich mnecy miid ñich ycixpi."

⁸ Tim jayijp, Cristo ymina'ñ co Dios ca' octzojcní, ni ca'jäygidägy je iyujc'ögy huindzigi'y yajhuindzigi'yip, ni je huindzigi'y yajno'cp, jigix je pocyñicxtähui'py, oy yi' yjajëjity huindzigi'y ñigapxy yajtunipy ma je Dios ycötujcní huindzigi'y Moisés yjayhui'm. ⁹ Chi jada' jadüg'it yjaybetyity co Cristo jadu'n ymina'ñ: "Cha ñich nmiiññ, jigix miich mdzojcní yajcuydunipy, miich huindzigi'y Dios'ajtp." Hue' mñana'ñim, yajtigoy je cötujcní huindzigi'y ane'mb co jäy ajcxy huindzigi'y iyujc'ögy miid ypocy ycixpi, etz mic'ajt mo' je jemybi cötujcní huindzigi'y Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcní co cñm ñinicx tügtecpajc yejcy ma yi o'cin miid tüg'öciy jäy ypocy ycixpi.

¹¹ Tüg'öciy judío sacerdote huindzigi'y tudungmñid ma Dios ytijc'ajom jabom jadu'n tun'ahuimbijtcixy tügpí huindzigi'ñ, huindzigi'y ni camina yajnicxtaayi jäy ajcxy ypocy. ¹² Yi Jesucristo tügtecpajc yi' yejcy ñinicx ma yi o'cin huinixi' huinítiempo, chi jada' y'ixtacy a'oy'amy ma Dios ymijc'ajom ane'mdäy tüg'öciy. ¹³ Jiiby tzajpjoty Jesucristo cham y'ahuixy, ixti cooní Dios yi' ymidzip mñimadactaayip, e jadu'n ajcxy nipaadipy nej jihuixy Jesucristo ytecpocxpejt. ¹⁴ Miid tügpajc je huindzigi'ñ huindzigi'y Jesucristo yejc, tudägy yaj'ahuimbijttäy huinixi' huinítiempo pinjaty ti ypocyhuäch. ¹⁵ Yi Espiritu Santo nidiy'ajtp ma ñich ajt jadu'n nej Cristo ti tuñ. Com jaybety miññ ma Dios ñecy ma Dios jadu'n ymina'ñ:

¹⁶ Je huin'it xi' je huin'it tiempo nyajmñihui'maamybich je Israel jäy jemybi ayuc jemybi tiy'ajt. Nbidägibich ngötujcní ma ajcxy yjot, e njayamybich ngötujcní ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ miid pocyhuinmeecxñ ycixpi.

Chojcxy nmihuingoonim yi Dios

¹⁹ Paady miich ajcxy migügtijc, jëbi ñich ajt ndigüyim agujc jotcujc ma Dios yajpaady miid co Jesucristo ti temy ti yocy ñi'py miid ñich ajt nbocy ycixpi. ²⁰ Cristo ti yaj'ahuäch je ñi'aa je tü'aa miid ñich ajt ycixpi miid yci'm ñinicx, je ñi'aa tü'aa jemybi oybi huindzigi'y tigüyb ma Dios y'it. E je' yñinicx jadu'n nipaady nej je huit huindzigi'y anajty adujcp je Lugar Santísimo ma Dios ytijc ya naaxhuiñ, je huit huindzigi'y cñchhuäch co Cristo y'o'cy.

²¹ Jesucristo yi' je' je mñitungmñidpi huindzigi'y xycodi-naayim ma Dios ytijc jiiby tzajpjoty. ²² Paady ycixpi jëbi nmihuingoonim Dios miid oyjot oyhuinma'ñ, etz miid je mñibijcní janchypí. Cristo ajt ti xyajhuaatzim njot huinma'ñ co ñi'py temy yojcy miid ajt nbocy ycixpi jigix ca'ydi nayjihui'yim pocy miid, jadu'n nej jihuixy ti ndziihuim miid huädz ñi. ²³ Tzoc tudägy n'ijtim ma nmibijcní, ca' nyajtigajtzim nmibijcní, com Dios cuydunipy yi' tiibi xyaj'ahuani'yim. ²⁴ Tzoc huinma'ñypidaacim co njot'amijmooyim ajt nmigügtijc, jaydëbi naychojcní nayjihui'yim miñ xyipy, e nduunim oyjäy'ajtin. ²⁵ Ca' n'ixmajtzim je nayyöymugiñ, jadu'n nej ajcxy nijëjity costumbre mñidty co ca' ajcxy yöy ma naymujctac. Niñi' tzoc nayjot'amijmooyim, e jadu'n nej cham yaj'ijxní co yhuingooní ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ñich ajt jacpocytunim tzojcingixy ma anajty ti nejhuixyim Dios ytijc'ajom, ca'p ji huingbi huindzigi'ñ huindzigi'y yajpocyhuaatzim. ²⁷ Je' janchtiy njacjijp'ijxim miid tzigi'ñ jihuixy je tzaachypí co anajty Dios xtyidunim, e xypidaacim mñiijnjoty huindzigi'y yajhuindzigi'y dähua'eb Dios ymidzip. ²⁸ Co pin cacuyduun Dios ycötujcní huindzigi'y Moisés yjayhui'm, e jim metz o tugü'g tes-tigo co yjadu'nity, yajmoy je' y'o'cin ca' miid'ajty ti pa'ayoohuin. ²⁹ ¿Nej miich ajcxy mñanaangixy? ¿Nej cay jac'öctiy je tzaachypí mñhuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huindzigi'y yajpocyñihuaatzp, jadu'n nej je jemybi ayuc ymina'ñ huindzigi'y Dios yajhui'm. Etz nañ jadu'n ajcxy ni'ojijyigixy Dios yEspiritu huindzigi'y may'ajt oy'ajt tumb miid je' ajcxy. ³⁰ Nejhuixyim co je Huindzin Dios ymina'ñ: "Ñich xypatp ndzaachytunipyich jäy ajcxy miid ypocy ycixpi. Ñich yi' nyajcomidohui'py ajcxy ypocy." Etz nañ jadu'n yjaybetyity ma Dios ñecy: "Yi' Huindzin Dios yi' yjäy tiydunipy." ³¹ ¿Ooy chach mij y'ayo'nity pen je Dios juugypí xychaachytunim miid ajt nbocy ycixpi!

³² Per ajihui'yigixy miich ajcxy je xi' je tiempo tiibi ñaxy, je taabi miich anajty ajcxy ti xycidigüyigixy je tiy'ajt janchypí, ñipaty je' anajty nej tüg'öciyñ jajin ajcxy mñidty. Ti ooy mñiindinaayigixy mñijptinaayigixy tzaachypí ayo'n miid yi mñibijcní ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyii ti abaatcixy tzaachypí jadu'n nej je tiibi ajcxy ooy yajtzaachytungixy.

³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcní co ajcxy xypijc'ijoty anajty ajcxy miid. Nejhuixyim co jiiby tzajpjoty miich ajcxy mñidty ti jaty jac'oybi huindzigi'y huinixi' huinítiempo ijtp. ³⁵ Jacmijpidaaccixy Dios, ca' mñotmetzcixyigixy. Co mñijpidaaccixy Dios, huin'it ajcxy mbaadipy oybi may'amy ma Dios. ³⁶ Chojcxy co miich ajcxy myajtungixy mecxtujcní co mguydunaangixy nej Dios tzocy, e Dios xycidigüyigixy huindzigi'y ti ahuanixy. ³⁷ Jaybety jadu'n ma Dios ñecy ma jadu'n ymina'ñ:

Tzojc, janch tzojc ymiina'ñ je huindzigi'y tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty ñich ti ngöbicy co ytudägyjäyity, tzinähuip je' mïid ymibijcin. E pen ixtigïhua'cp ma ymibijcin, ca' jadu'n ntotcujc'adïpyich mïid je'.

³⁹ Ca'p ñich ajt njëjity huidibi ixtigïhua'cp ma nmibijcin, e ytigoy y'alma, je' ñich ajt pin mibijcp, e jadu'n n'alma paadïpy nïdzoocin.

Yi mibijcin

11 Jotcujc nayjihuiyim jadu'n co huidibi nmibijcin janch yi', oy co ca' n'ijxim. Je huidibi nmibijcin je' xymooyim jotcujc'ajtin mïid huidibi njijp'ijxim ma Dios. Je huidibi nmibijcin nejhuuiyim co janch janch jadu'n, oy ca' n'ijxim. ² Com mïid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Mïid ajt nmibijcin ycixpi nejhuuiyim co Dios oyduñ tüg'óciy huidibi jii'ajtp mïid y'ayucti'ajty, jigix huidibi cham n'ijxim je' yi' yaj'oyiïy huidibi ca' yaj'ixy.

⁴ Mïid co Abel mibijcy Dios, paady Abel ymoy Dios huindzig'ñ jac'oybi ca'ydi Caïn, e Dios cöbijci Abel yhuindzig'ñ, e mïid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuïy yjacmiydägyñi chambaad. Com mïid je mibijcin huidibi anajty ymïid yejc ijxpejt ma ñich ajt.

⁵ Mïid co Enoc mibijcy Dios paady yajnicxi jadügpi tzi-naydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinäayin." ⁶ Pen ca' nmïid'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihuingo-naanim Dios, hue' tzocy co nmibijcin co Dios yjiijity, e co yaj'ahuimbidipy oybi mïid pin mibijcip.

⁷ Mïid co Noé mibijcy Dios, paady Dios ñimaayi jayijp co ytuna'ñyii yjada'ñyii mijniïgom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñïgomdzögipy. Mïid co anajty Noé mïidity mibijcin, paady yajpocycäy je naaxhuiñyäjy ajcxy ca'pi ymibicy. Chi Dios cöbijcy Noé jadu'n nej tudägyjäy mïid co mibijci Dios y'ayuc.

⁸ Mïid co Abraham anajty Dios mibicy, paady Dios yhuin'ijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuaanip co je'adiïyb. Choñ, ni ca' anajty nejhuïy ma ñicxy. ⁹ Mïid co Abraham mibijcy Dios, paady chinay-dacpicy nej tüg huingjäy ma je naax huidibi Dios yaj'ahuaniïyi, huidibi ca' yjëjity. Chinay ma huittijc, nañ jadu'n ajcxy y'idïich Isaac etz Jacob huidibi ajcxy nañ jadu'n Dios yaj'ahuaniïyi je naax. ¹⁰ Abraham je' anajty y'ahuixyp mina jëbi chinaydacpicy ma Dios y'it ylugar huidibi jadu'n nipatp nej tüg cajp huidibi mïid y'ijx ta'tzpcy y'oyduñity, je huidibi Dios ñihuinmayiïy, je huidibi Dios yajcojy yaj'oyiïyb.

¹¹ Sara hue' anajty pumäy, ti anajty ymijäyïyñi, ti ñajxnï tiempo mina jëbi y'ung'ixy. Per mïid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'ñ tiibi ahuanïy. ¹² Mïid

tügpi jäy, je Abraham, ti choondacy tügpcy y'amigügtijc huidibi oy ti ymayïy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamï-cho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacïdigïiyi je tzinaydac huidibi anajty Dios ti yaj'ahuaniïyii. Mïid co ajcxy mibijcy Dios, paady nejhuuiy ajcxy co jacjiini Dios ymöhuïyb je huidibi ti yaj'ahuaniïyii. Com ymibijc ajcxy Dios, paady jotcujc ñayjihuiïyi co Dios möhua'ñyii jacjiini huidibi ti yaj'ahuaniïyii. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbizimy co chinaydac yjugy'aj-tac ajcxy y'ixtaayb. ¹⁵ Co ixipy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy nigï anajty nijot'ajtcixy it luga-jac'oybi, je' je' je' tzajpjtoty. Mïid jada ycixpi Dios ca' yi' cho'yduñ co ñaydiyii Dios ma je' ajcxy. Com ti ni'ixiïyi ajcxy chinaydac jiiyb tzajpjtoty.

¹⁷ Abraham mibijcy Dios, e co Dios Abraham y'ijxma-jtzi, chi yajmiiñ Isaac co anajty yajhuindzigïhua'ñ Dios. E janch cixyot je y'ung tügpaic anajty yecy, je y'ung huidibi Dios ti yaj'ahuaniïyii anajty. ¹⁸ Dios ñimay Abraham co mïid Isaac mïid'ada'ñ may y'ap y'oc. ¹⁹ Abraham yhuinmaayb anajty ooy co Dios tügpaic cötu-jcmïidip yajjugypigipy öcpi. Paady jëbi ñich ajt nmi-naanim co Abraham ycidigïiyi jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy mïid Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ögaani, chi ahuanïy conuucxin ma nidüg nidüg José y'ung y'anäg. E jadu'n Dios ooy huindzigïy ojadajty yam ñaygodajc'adyii mïid ytajc co anajty ooy ti ymijjäyïyñi. ²² José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjcy jim Egipto, chi yajhui'my tiy'ajt nej ypajc ytunïyb co anajty choñ ajcxy jim Egipto.

²³ Mïid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugig po'. Com co ajcxy ijxy co anajty ooy y'oyity je ma'xung, ca' ajcxy anajty tzigïy je rey y'ane'min co anajty yaj'öctähua'ñ tüg'óciy ungma'xung yëydijcpi. ²⁴ Mïid co Moisés mibij-cy Dios, paady co oy ymij'anäccojni, ca' tzojcy co ñaydi-jïyb co rey ñiix y'ung'adïb. ²⁵ Hue' janchtiy Moisés nigï nijot'ajty co ayo'n tzaachypi minaxipy yajnaxipy quipxy mïid Dios yjäy, ca'ydi co nixondägipy je jugy'ajtin ma je rey ytijc huidibi Dios ca' jäygidägy. ²⁶ Moisés nigï ñayjihuiïyi jotcujc co tzaachypi ayo'n anajty minaxy yaj-naxy mïid Cristo ycixpi, ca'ydi co mïid'ajttähuiy ju-gy'ajt comeeñ'ajt jim Egipto. Com Moisés ti anajty yhuinma'ñypidägy co Dios yega'ñ je oybi. ²⁷ Mïid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuïy ixy je Dios ca'pi yaj'ixy.

²⁸ Miid co mibijcy Dios paady Moisés tuuñ je pas-cuaxi, chi ni'ane'mdiy co huen tijc'aguu tüg tüg ya-jni'pyi, jigix co je ángel huidibi yaj'öcp, ca'p je' je is-raelitajäy y'ungoob yaj'o'cipy. ²⁹ Miid co ajcxy mibijcy Dios paady je israelitas ajcxy yajnaxxy je tzaptz mejy jadu'n nej jihuüy ñajxcixy huinditztuuy, e co ajcxy je Egipto jäy nañ jadu'n yjanaxañ, cijx ajcxy ñi'o'ctäy.

³⁰ Miid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtuyc xii. ³¹ Miid co Rahab, je töxyjäy jibic tzinaaybi, mibijcy Dios, paady ca' y'o'cy quipxyi miid je huidibi anajty ca' capxymidoogixy Dios. Com co je' yajjättacy ma ytiçin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcüyöygixy yajtecuyöygixy Canaán naaxjot.

³² ¿Ti njacmiydägibich? Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxi'iybi. ³³ Miid co ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuanñiyigixy.

Yaj'adujc ajcxy caa y'ahuac, yajxeem ajcxy jün huidi anajty ooy ymijity, tzoc ajcxy co anajty yaj'ögaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chip-tungixy, e ymimadactay ajcxy maymidzip. ³⁵ Jim anajty töxyjäy yjätigixy huidibi ajcxy cädigi'iyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxi'iybi ooy ñixiici yajxiici, yajc'ajty, etz tzumy mach ypujxtjic'iñäy.

³⁷ Jadyii Dios y'ayucnajtzcaxi'iybi y'o'cy ajcxy tza-agögäch, jadyii yaj'ajidñiy ajcxy janch tim cup y'ijxmajtzi ajcxy, jadyii yaj'o'ci miid espada. Ymiñ xyijpy xii yaa yhuuidijtcixy ymiid ajcxy ñinicx yüch miid cöbixy'ac etz miid chivo'ac, ayooob jäy ajcxy, jotmay miid, yajtzaachytungixy yajca'oydungixy. ³⁸ Yi jadu'mbi Dios y'ayucnajtzcaxi'iybi ajcxy ni je naaxhuiñyäjy anajty camihuaadity. Miid ymidzip pahuidijtcixy, paady yhuuidijtcixy anajty tiznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'öciy je' ajcxy oy cömay ajcxy yjanaxxy miid co mibijcy ajcxy Dios, ca' ajcxy paty tiibi anajty Dios y'ahuanñy. ⁴⁰ Com Dios jac'oybi je' anajty yegamyb miid ñich ajt, paady ca' ajcxy paty je oybi tiibi Dios y'ahuanñy. Ti anajty Dios nihuinmayñy co yajca'paxaani yi' ajcxy ytudägy'ajtin quipxyi miid ñich ajt co Cristo y'o'cy miid ñich ajt nbocy ycipi.

Tzoc ñich ajt nhuinma'ñybidacim ma Jesús

12 Com nmid'ajtim canaag ijxpejt nej jäy jecy'ajty mibijcy Dios, paady ñich ajt jadu'n nipaady nej jihuüy huinduy jajixci'py nmid'ajtim jäy huidibi ti yaj-niguëxgy ymibijcin. Paady ycipx tzoc ahuing pidaacim je huudijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydi-gooyim, e tzoc naymic'ijxim cuydunim yi' tiy'ajt miid mecxtujcin ma ajt ndzinaayin, jadu'n nej jäy

ñaymic'ijxigixy co nayboyicquípaxigixy. ² Tzoc nhuinma'ñybidacim ma Jesús. Jim ijxpejt nbaatim ma Jesús nej jëbi nmibijcin Dios. Jesús yi' je' ti xyajnejhuüyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuüyb anajty co jadu'n y'oc'ay-oohuipy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'o'jiigixy, etz ca' y'ix-aani, paady ca' mdzjpcigixy ni mgamijotmetzcixigixy.

⁴ Ca'ni miich ajcxy ayo'n tzaachypí myajnaxy mabaad ni'py ajcxy mxii'bidiyi jadu'n nej Cristo yjaty. ⁵ ¿Nej ti miich ajcxy mjäydi-gooygixy je capxhuijin huidibi Dios ti xymooygixy nej jihuüy yci'm'ung? Jadu'n ymina'ñ ma Dios ñeey:

Miich n'ungich, ca' mbidägy nej jihuüy ca' ytim ytiijity je tzaachypí huidibi Dios miid xycapxhuijy, ni ca' m'jot-metzcihuipy co xyaj'öjipy.

⁶ Dios ycapxhuijpy yi' pinjaty chojcpy yjihuüyb. Dios chaachytumby yi' ajcxy co ytundigooy, pinjaty yi' ti cöbicy nej jihuüy yci'm'ung.

⁷ Mímadaaccix miich ajcxy je castigo, com Dios jadu'n yi' xymiidity ajcxy nej jihuüy yci'm'ung. ¿Nej ji jada' tüg ung, e ca' yteedy chaachytunñyb co ytundigooy?

⁸ Pen ca' miich ajcxy Dios ti tzaachypí xymooygixy, jadu'n nej yi' moy castigo tüg'öciy y'ungdijc y'anäctijc, ca' miich ixypy ajcxy Dios xy'ung'adyii tydudägy. Jadu'n miich ajcxy m'idipy nej tüg pi'c'anäg huidibi yteedy ca' y'ixa'ñy. ⁹ Jadüg nax, taabi anajty ajt nbi'cnity, ñich ajt ndeedy ya naaxhuiñ xy'ñhuijim xycapxhuijim anajty, e xychaachytuunim co ca' ngapxymidoohuim

nhuindzigñiyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycipy yti'gooyi nimi-na. ¹⁰ ñich ajt ndeedy ya naaxhuiñ xy'ñhuijim xycapxhuijim anajty miid jada conbi jugy'ajt ycipi, jadu'n nej je' anajty ajcxy oy'ixy. Nañ jadu'n Dios ñich ajt xychaachytuunim miid ajt n'oy'ajt ycipi etz jigix nmid'ajtim huädz jot huädz huinma'ñ nej Dios ymiidity huädz yjot huädz yhuinma'ñ. ¹¹ Oy yjanchity co ca' ti tzaachypí ndzojcin ma yam nbaatim je tzaachypí, com ooy ndzajchihuüyim je tzaachypí, e ca' jotcujc nayjihuiyim. Per pinjaty ixpijcpí Dios chojcin miid je tzaachypí ycipi, chi je' yhuimbizimñygyxxy tüg jugy'ajtin tädägy'ajty etz jotcujcpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma mmibijcin, jadu'n nipaadip nej jihuüy myajpidiccixy mgi' tiibi y'anucxi'ñi, etz mgoxcohuajc mic'ajt paady huidibi anajty ca' mic'ajt miidity. ¹³ Ixtaaygix ni'aa tü'aa tiybi ma mdzinaayin, jadu'n nipaadip nej jihuüy yi' mdecy huidibi mädi'p ti chögy, e camina jadüg'oc yhuuidip.

¹⁴ Tzinaaygix miid oyjot oyhuinma'ñ miid nidüg'öciy jäy. Ca' mdungixipy ti tzip. Miid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin ca-

jijpyöydüdi py je pubejtin huidibi Dios ti ahuanïy, jigix nañ jadu'n ni pin ycajapaadi py janch mät yjot yhuinmañ, e yajhuindigoydäy yajmättäy jacjadyi ymigügtijc, tim jadu'n nej tüg ujtz ta'mbi ypa'mduñ. ¹⁶ Ni tüg miich ajcxy ca' huaad ti ayuc miid'aty miid huingbi töxyjäy huidibi ca' miich mdöxyijc'adyii. Ca' nañ jadu'n m'ixti-jijpy je ayuc huidibi Dios yajhu'i'my miid miich ajcxy ycixpi, jadu'n nej y'idiich Esaú. Miid tüg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Miich ajcxy mnejhuïyb co Esaú tocy huidi anajty paatip co japada'ñ je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbidip miid je' ycixpi tibi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty y'i israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidzucy yjidity etz mijpoj migtigoy ñaxy, ma anajty ooy y'agoodzïy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigäpxigixy com ooy anajty chigiiygixy. ²⁰ Je' je' anajty ycixpi co anajty ca' mimadägaangixy je ane'min cötujcin huidibi anajty minamb: "Pin anajty ytecy pidacp ma y'i cop, hue' y'i y'ooyaj'o'cnity cögäch miid tzaa o miid quipyijpxu'ñ, oy ixipy y'iyujcity." ²¹ Oy chigiiyñi huidibi anajty yaj'ijxp, Moisés ci'm minaan: "Tziyuuybich yam miid tzig'i'ñ."

²² Per miich ajcxy jadu'n nipaady nej jihuïy ti mmihuingoongixy y'i cop huidibi yxii Sión etz je Dios juugyp ycajp. Je' je' je Jerusalén tzajpjoty ma canaag mil je ángeles ajcxy yöymujccixy. ²³ Ti miich ajcxy mmihuingoongixy ma ti yöymujccixy je jaccömaaybi jäy huidibi ajcxy yxii cojaay ma Dios ñecy jii by tzajpjoty, je huidibi ajcxy huin'ñb huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihuingoñ y'i Jesús, y'i huidibi xycodinaayim ma Dios miid je jemybi cötujcin huidibi Dios yajhu'i'my miid ñich ajt ycixpi. Y'i Jesús huidibi mic'ajtmoy je Dios y'ayuc jemybi, co ñi'py teemy yojcy miid ajt nbocy ycixpi. Y'i Jesús co ci'm ñi'py teemy yojcy miid jäy ajcxy ypocy ycixpi, nigü oy y'i ca'ydí co Abel iyujc ñi'py teemy yojcy miid ypocy ycixpi.

²⁵ Paady ycixp ooy cuenditungix miich ajcxy, ca'ydí yaj'ixtij Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtij Dios co jecy'ajty yjamigapxi ajcxy ya naax-huiñ. O'cty ñich ajt ca' ndzoocim, pen nmooyim ajt njix je Dios, je pin y'ayuc xyajmihui'mim huidi tsoon tzajpjoty.

²⁶ Co Dios y'ayuc yecy jecy'ajty, chi yajtziyuuy ooy naax. Jadachambi Dios ymína'ñ: "Jadügtecpajc nyajtziyuua'ñich je naax, e ca' nminaanim naaxti'ajty, nañ jadu'n nyajtziyuua'ñich je tzajp." ²⁷ Co jadu'n Dios ymína'ñ: "Jadügtecpajc nyajtziyuua'ñich je naax." Hue' ya-jhuinjihuïy co ytigoydähuipy huidijaty yücxp huidibi

Dios yaj'oyiiy, e je' hui'mip je huidijaty ca' yu'cxy.

²⁸ Paady je Jesucristo ycötujcin huidibi Dios xya-jmihui'mim, ca' y'i' huaad ytigoy. Tzoc yajnaxim Diosco-juyip miid Jesús y'ayuc ycixpi, e nyajmij'ajtim n'ojada-jtim Dios miid tudägy'ajt etz miid huindzigi'ñ nej je' jäygidägyin. ²⁹ ñich ajt nDios jadu'n y'i' nej tüg jin huidibi nöctaayb tüg'óciy.

Nej jëbi nyajjäygidaacim Dios

13 Miich ajcxy huidibi mibijcp Jesucristo, ca' mjäy-digooygixy co ajcxy mnaychöjcgixipy miñ xyipy nej jihuïy ajcxy mdügquëxyity. ² Ca' ajcxy mjäy-digöoygixipy co ojäy'ajtin mdungixipy miid pinjaty ajcxy xycöjädiyb. Miid co ojäy'ajtin ajcxy tuñ, chi nijëjity ajcxy yajjätacy ángeles ajcxy, ni ca' ajcxy huinjihuïy co ángeles anajty ti yajjättaaccixy.

³ Mjäymedzip ajcxy pinjaty tzumy'ñaayb mach'ñaayb jadu'n nej jihuïy miich ajcxy nañ jadu'n mdzumy'ñaaygixy mmach'ñaaygixy quipxy miid je' ajcxy. Jäymedzip miich ajcxy pinjaty tzaachypí ayon minajxp yajnaxp, com nañ jadu'n miich ajcxy miidty je ninicx huidibi jëbi y'ayoy.

⁴ Huen nidüg'óciy jäy huindzigiygixy yajmij'ajtcixy je pijcin casada'ajtin. Huen je yëdyjc etz je ytöxyijc naymiidtzinääyigixy yajxon, com Dios y'i' tzaachytunipy pinjaty tundigooyb miid huingbi töxyjäy.

⁵ Ca' m'adzojccixy meeñ. Mijotcujc'ajtcixy ti ajcxy ii miid. Dios ti je' ymína'ñ: "Camina xii ñich miich ajcxy n'ixmadzipy, ni ñich miich ajcxy ngajäydgoyipy."

⁶ Jadu'n jëbi nminaanim aguyc jotcujc: "Yi Huindzin Dios y'i' xypubejtpich, ca' ndzigihua'ñich jäy nej xyjatu-na'ñich."

⁷ Jäymejtzcx miich ajcxy je pinjaty ti xyñigohua-jc'ajtcixy, je pinjaty ti xyajmiidmiydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy miidty ymibijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'ñ huinixii huinitempo, ca' y'i' yajtigadzip y'i yhuinma'ñ ni mina.

⁹ Ca' miich ajcxy myajhuin'ingixy miid canaag xpijcin huidibi ca' ytügnaxity miid Jesucristo ytiy'ajt. Nigi oy co ajt nbidaacim nhuinma'ñ ma je Dios y'ayuc, nej y'i' xychojcim xyjihuiyim, nej y'i' may'ajt tuñ miid ñich ajt. Ca' mbidaacim mhuinma'ñ ma je cötujcin huidibi adujcp nijëjity caayin uucin. Ni ti jotcujc'ajt ajcxy capaty pinjaty panicxp y'i jadu'mbi cötujcin.

¹⁰ Je judío tungmiidpi huidibi huindzigi'ñ tumb anajty ma Dios yhuittijc je jecyip, ca' y'i' jëbi yjactuuni ma ñich ajt nmibijcin jadu'n nej Jesucristo tuñ huindzigi'ñ miid ñich ajt ycixpi. ¹¹ Je judío mijtungmiidpi ma Dios ytijc ypidac iyujc ñi'py ma je Lugar Santísimo nej tüg huindzigi'ñ huidibi yajpocyñihuaatzp je mayjäy. Je iyujc ögy ñinixc jiguem je' yajnögy, ca' jii byity cajpjoty ma je Dios anajty huindzigiygixy. ¹² Tim jadu'n nej je judío sacerdote yajnögy je huindzigi'ñ iyujc ñinixc cajp ninaxy, nañ tim jadu'n Jesús paty tzaachy'o'cin cajp ninaxy jigix miid je' yci'mni'py pocyñihuaadzip je mayjäy.

¹³ Tzoc mijpidaacim je Jesús tibi y'ögy cajp ninaxy miid

ich ajt nbocy ycixpi. Tzoc minajxim yajnajxim je canayajmij'adii je canay'ixa'nii, tim jadu'n nej Jesús minajx yajnajx je canayajmij'adii je canay'ixa'nii. ¹⁴ Ya naaxhuiñ ca' ya ajt nmiiđity tüg ciudad ma jebi n'ijtim huinixii huinitempo, je' ich ajt njijp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii miid Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzig'iñ nmooyim. Tzoc ii mibijctzoohuim, tzoc ojadajtim miid ajt ngi'm'ahuac ngi'm'ayuc. ¹⁶ Ca' mjäyđigóoygixipy co oybi mdungixipy etz naybubéjtigix naybudig'iigix miñ xyipy. Co jadu'n mdungixipy jadu'n nipaady nej tüg huindzig'iñ ti myejjcixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuuyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb miid yi' ajcxy, jotcuyc ajcxy ñayjihuihuuyb. Pen jibic miich ajcxy mduñ miid yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcuyc'ajt mmiid'adipy.

¹⁸ Mibijctzoogix Dios miid ich ycixpi etz je pinjaty xymiidhuidijtpich. Jatytim naymic'ixibich tudägy nduñich ma tüg'óciy ich ndung, paady ycixp jotcuyc nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix miid ich ycixpi, jigix Dios a'ixihuipy co n'icxibich tzojc ma miich ajcxy.

Oy'ajt etz capxpoocxin huidibi cogixiñip je necy

²⁰ Dios nmibijctzooybich miid miich ajcxy ycixpi. Je Dios huidibi yajjugypijc jadüg'oc ich ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcuyc'ajtim je' huen xyaj'ahuimbijtcixy huadz etz ojjäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ich ajt njot nhuinma'ñ miid Cristo ymic'ajt nej yi' tzocy. ¡Huen Cristo y'idipy mij cömay huinixii huinitempo! Amén. Jadu'n jada.

²² Nmigügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiygixy. ²³ Nejhuuyigix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymidn'icxibich co ich anajty miich ajcxy nicxy n'ijxcixy.

²⁴ Nguejxpyich ngapxpoocxin ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijcixyp. Je migügtijc huidibi ajcxy yajpatp ya Italia yquejxyp ajcxy capxpoocxin ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

1 Ich Santiago, ndzojcingéx ich nduñ ma Dios etz je Huindzin Jesucristo ytung. Cham jada necy nya-jniguexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajt cajt mñid co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huídib tzoón ma Dios

² Migügtijc ajcxy co yi mmidzip ajcxy xychach'ijx-madzaangixy nej miich ajcxy mjot mhuinma'ñ mñidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñdigoyaaangixy, ca' mdajipy mmayipy ajcxy, jotcujc ajcxy mnayjihuihuüy. ³ Miich ajcxy mnejhuüyigixyp co jadu'n mmimecxtujc-cixyp je tzaachypí ayo'n huídibi mminajxcixyp myajna-jxcixyp mñid co ti mmijpidaaccixy Jesucristo, huin'it mbáatcixipy mic'ajt, jigix jébi mimadactaygixy tüg'óciy jibic-huinma'ñ. ⁴ Copicy miich ajcxy mimadactáaygixipy tüg'óciy jibic-huinma'ñ, ca' ma mdundigóoygixipy, e huin'it huädz mjot mhuinma'ñ mñid'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'ñ, co jäy ajcxy xychach'ijxmadzaani mjot mhuinma'ñ nej mñidity, mibijctzou Dios huen xymöy je oyhuinma'ñ, com yejcpy yi' oyhuinma'ñ mñid tüg'óciy jäy co pijctzoy. Ca' yi' cohuindugyii, ca' huaad xy'ojim co nbijct-zoohuim oyhuinma'ñ. ⁶ Copicy pijctzohui Dios huivy'ajt cujc'ajt cixyot huinjot, ca' y'ametz yjotmetzity. Pinjaty ametz jotmetz Dios mibijctzoob, ca' tú'ciy mñidity yjot yhuinma'ñ, janam jatzojc yajtigach yhuinma'ñ jadu'n nej je mey co ypidigy y'ixtägy mñid je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy mñidity, ca' tügijp yhuinma'ñ pidaaccixy ma Dios.

⁹ Yi ayoobitijc huídibi mijpidaaccixyp Dios, ooy jäygidágaangixy co Dios ypubediiyb ypubigihuiyb.

¹⁰ Yi comeñyjäy ajcxy huídibi mijpidaaccp Dios, ooy jotcujc ajcxy ñayjihuihua'nyii co ajcxy ymeeñ ytëx-tähuipy jadu'ñyi. Com yi' ajcxy ymeeñ tigoyamb yi' jadu'n nej tüg pijy co ñiicxni mñid xñ an. ¹¹ Co xñ ypejtni, chi ooy y'andaacni mic, e chi je jñnboj ypidzimy, chi je pijyquipy ytëch, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi' pijy, ñan tim jadu'n yjada'ñ comeñydijc ajcxy, jadu'ñyi ñitigoy-aangixy yjugy'ajtin.

Co yjot yhuinma'ñ chach'ijxmadza'ñyii

¹² Jotcujc pinjaty mimecxtujctaaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mimecxtujctáaygixipy, Dios möhuüb ajcxy jugy'ajtin huinixñibi, huídibi yajhuinhuaniy tüg'óciy jäy ajcxy huídijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaanip. Dios ca' ti jibicpi tuñ mñid jäy ajcxy. E nañ ni pin ca' huaad ijxmach Dios nej yjot yhuinma'ñ ymñidity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyñibejtni co ñicxy y'óccixni.

¹⁶ Migügtijc ajcxy, huídibi ooy ndzocy njihuüyich, ca' mnayhuin'ñigixy. ¹⁷ Ich ajt nDios Teedy huídibi tza-jpjoty tzinaayb, yi' huídibi yajcojtaay xñ madza' huídibi jajp tixcp, yi' je' yejctaaayb tüg'óciy tijaty oybi, tüg'óciy yhuinma'ñ huídibi ich ajt mñid'ajtim. Dios ca' yi' yjot yhuinma'ñ yajtigach jadu'n nej yi' xñ madza' yjajin ytiicxin ytigach. ¹⁸ Dios y'oydumybu huinjemy ich ajt njot yhuinma'ñ mñid yi' y'ayuc ytiy'ajt, jigix jébi ich ajt nmi'ijtim oyjot oyhuinma'ñ. Yi jäy ajcxy huídibi yajmij'ajtcixp Jesucristo, Dios ñigi tzocy ajcxy ca' jac ti huídibi oyduñ.

Je tiy'ajt tiydudäcypí

¹⁹ Migügtijc huídibi ich ooy ndzocy njihuüyich, mnejhuüyipy miich ajcxy jada co ooy ycopicyty mñido'mbijctähuipy ajcxy Dios y'ayuc ytiy'ajt, ca' mjäy-digóoygixipy, ca' mgapxmayiiygixipy, pen mjotmätcotp ajcxy ca' anajty mguydungixy Dios ytiy'ajt. ²⁰ Je jäy huídibi jotma'tp, ca' je' tuñ huídibi Dios yjäygidacyp. ²¹ Ixmajtztaaygix yi' jibic ayuc, ca' mnijot'ajtcixy yi' jibic-huinma'ñ. Cöbijccix mñid oyjot oyhuinma'ñ yi' Dios y'ayuc ytiy'ajt, yi' huídibi Dios ti yajnicödugy, huin'it jébi ajcxy m'alma nidzoocin paady.

²² Cuydungix ajcxy Dios y'ayuc ytiy'ajt, ca' ajcxy mjotcujc'adipy mñid yi'yi co m'amidoo'ijtcixy, hue' anajty ñigoo mnayhuin'ñigixy. Peni nigoob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pin yhuiñyijp aa'ijxnajxp ma tugi'ijx. Co ñay'aa'ijxnajxtäyii, chi yjihuaägy, e mic'amy jäydigoydäy nej yhuiñyijp ti icy. Naadigi' anajty ti ñay'aa'ijx-naaxyii. ²⁵ Pen miich ajcxy yajxon m'ixpajcyp Dios ytiy'ajt, je tiy'ajt huídibi yaj'oyihuij ajcxy mjot mhuinma'ñ, pen mmijpidaaccixyp, pen mguydungixyp Dios

y'ayuc, e ca' mjäydgooygixy, chi jada' Dios xyconu-
ucxip ajcxy miid jägixpi huidibi anajty mguydungixyp.

²⁶ Pen ji pin ñayjihuiyüii co cuyduni Dios ytiy'ajt, e ca' ñay'ahuijtzixyüii, ci'm anajty ñayhuin'ññyüii, tundigooyb anajty, e ca' yjanchity co mijpidaaci Dios ytiy'ajt. ²⁷ Pen miich ajcxy huädz mijpidaaccixy Dios etz mguydungixy yi' ytiy'ajt jadu'n nej jäbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyii naaxhuiñyäjy y'idihtzixy, huidi ca' mijpidaaccixy Dios.

Ca' huin'ixpety migüg myajmij'ajtcixipy

2 Migügtijc ajcxy, co m'ojadajtcixy co mmijnicxpe-
jtcixy ñich ajt nHuindzin Jesucristo, yi huidibi tza-
jpjoty ane'm, ca' ajcxy huin'ixpety migügtijc mya-
jmij'ajtcixipy. ² Pen jim jäy ytigäy ma mnayyöymújcgixy
comeeñybi miid oorí cñiitiz, etz miid yhuit yxoxj janch
oybi, etz pen nañ tigiyb tüg jäy ayoob huidibi yhuit
ytucxy cñtz tuc nibüdy ixpüdy. ³ Chi miich ajcxy je' jac
nigi myajmij'ada'ñ je comeeñybi huidibi oxoxoy, e chi
mnimähua'ñ: "Iña' miich ya ma jada oybi iñaaybejt." E
je ayoob jäy mnimähuaangixy: "Iña' naaxcixy o jim
jadu'n tina'." ⁴ Co jadu'n m'idtzip ajcxy, ca'p anajty
jadu'n ytiy'ajty. Mdundigooygixy anajty ma Dios
ytiy'ajt co huin'ixpety ajcxy migüg mdzogipy. Hue'
anajty myajtungixyp jibic-huinma'ñ co jadu'n m'ix-
tjicixipy jäy huidibi ayoob.

⁵ Migügtijc ajcxy, Dios ti huin'ixy yi ayoobitijc, jäbi
ajcxy mijpidägy Dios etz jäbi ajcxy paadipy it lugar ma
Dios y'it tzapjoty. Jadu'n Dios yajhuinhuaniiy pinjaty
tzojcp jihuüiy co it lugar möhua'ñ jilby tzapjoty.

⁶ Myajtzo'yduungixyp miich ajcxy ayoobitijc. ¿Nej cayi
comeeñyjäy ajcxy huidibi miich ajcxy ychachxip ma
cötujctac, e xyajnicxixy ma tungmiidpi yhuinduu, oy
ajcxy mdzocy mgatzocy? ⁷ ¿Nej ca yjéjity ajcxy huidibi
jibic nigapxp ni'ojiiyb Jesucristo, je oyjäy huidibi miich
ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi
jaybety ma Dios ylibro: "Mdzogipy mjihuühuipy
mmigügtijc hueñyitimypinity, jadu'n nej miich ajcxy
ci'm mnaychogyii mnayjihuiyüii." Pen jadu'n anajty
mdungixy, tüg anajty oybi mdungixyp. ⁹ Pen huin'ix-
pety ajcxy anajty jäy myajmij'ajtcixy jadu'n nej yhuit yx-
oxy ajcxy miidity, mdundigooygixp, e ti anajty mnayya-
jpocycähuiigixy ma Dios ytiy'ajt. ¹⁰ Pen tüg jäy cuydun-
daayi Dios ycötujcin, co nicxy tüg cacuyduñ, jadu'n ni-
paady nej jihuiy anajty janch ni tüg cötujcin ti cacuy-
duñ. ¹¹ Je Dios je cötujcin ti pidägy co ca' huaad mmi-
gapxtigooyipy töxyjäydijc, etz nañ ti cötujcin pidägy co
ca' huaad njäyayaj'o'cim. Pen mmigapxtigooyb töxyjäy-
dijc, oy ca' ti mjäyayaj'ögy, ti anajty mdundigooy mij ma
Dios ytiy'ajt. ¹² Capxcix miydaccix, tungix nej jäbi
huaad jäygidägy ñich ajt nHuindzin Jesucristo nej je'
cuyduñ yi' ytiy'ajt. ¹³ Ca' ti pa'ayoohuin paadipy ma
Dios, pin ca' tuñ ti pa'ayoohuin ma ymigügtijc. Pin
pa'ayoohuin tumb ma ymigügtijc, je' capxpaady y'idip
co anajty Dios tiyduñ yi' yjäy.

Je mibijcpi etz je oyjäy'ajtin

¹⁴ Migügtijc ajcxy, ni ti m'alma capada'ñ pen miich
mminaamb co myajmij'ajtyp Dios, e pen ca' mya-
jniguëxgy ni ma co oybi mduñ. Ca' Dios jajnidzöga'ñ
yi m'alma miid co nigoob mmina'ñ co Dios mmijpidä-
gy, e ca' mguyduni yi' ytiy'ajt. ¹⁵ Pen miich ajcxy miid
tüg migüg yëydijcpi o töxyjäybi huidibi yajmayajtp
yhuit ytucxy caayin uucin, e chi nigoo miich ajcxy
mnimähuiy: "Nixc agujc jotcujc, Dios xypubedipy xy-
pudigihuiy, ca' mdich'ögipy ca' myuu'ögipy." E miich
ca' anajty ti ti mmöy huidijaty yajmayajtpy. ¿Ti
oyjäy'ajtin anajty ti mduñ? ¹⁷ Pen miich minamb co
myajmij'ajtyp Dios, e ca' oyjäy'ajtin mduñ miid
mmigügtijc, ytimyñipatyp jadu'n nej ixypy ca' mmibicy
yi Dios ytiy'ajt.

¹⁸ Ca' yjegyty co tüg jäy xyñimähuibich jadu'n: "Miich
mdzachmijpidacy yi Dios ytiy'ajt, e ñich ndumylich oy-
bi." ñich n'adzohuiyich yi jadu'mbi jäy co ca' jadu'n
ytiy'ajty nej miich mina'ñ. Pen ca' miich mmijpidägy
Dios y'ayuc, ca' mjadipy nej mdunipy oybi jadu'n nej
Dios huaad jäygidägy. Co ñich oybi nduñ, jadu'n
ñigüexgy co nmijpidägyich Dios. ¹⁹ Miich mmibijcpi co
Dios ji tügpaic, e oy jadu'n co mmibicy. Nañ jadu'n yi
ca'oybi ajcxy mibijcpi etz chigiyb ajcxy Dios. ²⁰ Loci mi-
ich, ca' mhuinjihuühua'ñ je tiy'ajt. Co pinjaty mibicy
Dios, e ca' jajniguëxgy co oybi tuñ, ca' tiydudägy mibi-
cy Dios. ²¹ Je Abraham yejc tüg ixpejt nej jäbi huaad
ngapxymidoohim Dios co jecy'ajty je' ymang Isaac
cäyeyc nej tüg huindzigi'ñ ma Dios. ²² Je Abraham
ymibijc co Dios yjijity etz nañ ycapxymidou nej Dios ñi-
maayi. Paady nejhuüiy co yjanchity co Abraham
mijpidacy je' Dios miid co cuyduñ jadu'n nej Dios ñi-
maayi. ²³ E jadu'n oy cuydundäy nej yjaybetyty ma
Dios ñecy: "Yi Abraham ymijpidac Dios, paady Dios
ymecxtaayi ypocy, e ycöbijci jadu'n nej jihuiy ca' anajty
ytundigoy." Paady ycixpi Abraham oyñaydijyüii: "Co Dios
minaymigüg'adyii."

²⁴ Cham nejhuüiygix co Dios ycöbijcpi jäy huidibi cuy-
dungixp yi' ytiy'ajt, e ca' mninaanim miid jäy co
ymibijcixy. ²⁵ Tim jadu'n nej Abraham yjaty, nañ tim
jadu'n yjaty miid je töxyjäy huidi anajty yxi Rahab,
huidibi anajty ooy ti ytundigoy miid mayyëydijc. Je Ra-
hab ycoyudz ma ytiyc nimetz jäy huidibi anajty Israel
jäy yaj'ix'ijtyp, e chi yajqueegiy ma huingbi tü'aa, e
jadu'n ajcxy yajtzoocy ma ymidzip. Miid co jadu'n
oyjäy'ajtin tuñ miid je Israel jäy, chi Rahab oy paady je
nidzoocin ma Dios. ²⁶ Je ninicx huidibi ca' alma miidity,
ca' ni ti mic'ajt miidity. Nañ tim jadu'n pinjaty mibijcpi
co Dios yjijity, e ca' cuyduñ Dios ytiy'ajt, yi' ymibijcin
ca' Dios cuendipicy.

Co pinjaty nigapxy ni'ojy ymigüg

3 Migügtijc ajcxy, huinmaygix yajxon pen janch
mnajttzogygyixy co ajcxy mnihuindzin'adaangixy
Dios y'ayuc. Com ñich ajt huidibi nyaj'ixpicim Dios
y'ayuc, pen tundigooyim nigij mij nyajtydunaanim.

² Nidüg'óciy ñich ajt ndundigooyim mínaajity. Pen ji pin ca' y'ñidigooy ycapxtigooy, yí' tiydudägy anajty yjáy'aty, jëbi ñaygüend'adyii yajxon, e ca' huaad y'ocjactundi-gooyñi. ³ Ypidacpy jáy freno ma cohuay y'ahuac jigix jëbi ane'my je cohuay nej tzocy. Nañ jadu'n tzocy co jáy ajcxy huen y'ahuac ahuijtzicxy jadu'n nej jáy cohuay ane'my mïid freno. ⁴ Nañ jadu'n yí barco oy mabaad ooy yjamijity, per ooy poj ytiijminyí ytiixibyí. Je barco yaj'ane'm yajxon mïid tüg pi'c pujx yindi'cni huidib xiijip timón. Yajxon ytüyöy je barco ma je' timdzocy je huidibi ane'mip. ⁵ Nañ jadu'n yjaty mïid yí tootz, janch tim yindi'cni yí', per ooy mij cajee tuñ jibicpi, jëbi y'ñidigooy ycapxtigooy mij cajee. M'ijxyp miich ajcxy nej tim yindi'cni jün mij ooy nögy quipychaa miy'ujtz. ⁶ Yí jáy ajcxy y'ahuac nañ tim jadu'n nej pi'c jün, mïid nhuin n'ahuac mijcajee n'ñidigooyim ngapxtigooyim. Co jadu'n n'ñidigooyim ngapxtigooyim, chi jëbi mijcajee midundigooyim mayjáy. Co n'ñidigooyim ngapxtigooyim, etz nayajpocycähuim, chi ñiguëxgy canaagnax jibic-huinma'ñ huidibi n'ñid'ajtim. Jada jibic-huinma'ñ jim yí' nbaatim ma je mujcu' huidibi tzinaayb ma yí inferno. ⁷ Yí naaxhuiñyáy ti mimadaaccxy yí iyujc animal huidibi queegëcp queec-huidijtp, naag iyujc ahua'nbi, etz iyujc ñijotyp. Ti ooy yajmaxiygixy yajxon iyujc huindzicxy etz ahua'nbi. ⁸ Yí naaxhuiñyáy oy ti mimadaaccxy yí iyujc animal, per nitüg ycaca'ty pin yajxon y'ahuac ahuijtzigipy, ac'ñidigooyigixp capxtigooyigixp ajcxy. Pin ymigüg nigapxy ni'ojiiyb, huin'it je ymigüg ooy jibic ñayjihuiñhua'ñyí, jadu'n nej jihuüy veneno ti möy ymigüg. ⁹ Mïid jada' nhuin n'ahuac ajt ngapxpaatim ñich ajt nHuindzin Jesucristo etz ñich ajt nDios Teedy. Nañ jadu'n mïid nhuin n'ahuac nigapx ni'ojiiyim nmigügtijc. Dios ti yajcojy yí jáy mïid oyjot oyhuinma'ñ jadu'n nej yí' oyjot oyhuinma'ñ mïidity, paady ca' y'oyity co n'ñidigooyim ngapxtigooyim. ¹⁰ Mïid nhuin n'ahuac ajt mïid ngapxim oybi ayuc etz jibic ayuc. Mïid nhuin n'ahuac yí' mïid ngapxpaatim etz ni'ojiiyim nmigügtijc. Ca' jadu'n y'oyity co jadu'n n'aditzim. ¹¹ ¿Nej jëbi jada' ma tüg ñigop ypidzimy ñi päcpi etz ñi ta'mbi? ¹² Migügtijc ajcxy, ¿nej jëbi jada' yí higueryi ytiim'aty aceituna etz yí muuxy'aadz ytiim'aty higos? Nañ tim jadu'n ma ñi ymuxy tamtzpi, ca' jim ypidzimy ñi päcpi. Paady ycixp ca' y'oyity co jáy ajcxy capxcxy oybi etz jibicpi.

Je tiy'ajt janchypi

¹³ Pen miich ajcxy huijycujc mnayjihuiyi, pen oyhuinma'ñ ajcxy mmïid, yajtungix m'oyhuinma'ñ ma mdzinaayin mjogy'ajtin. Ca' huaad ci'm ñaygómáayigixy. Mïid je oyjáy'ajtin huidibi ajcxy mdumyby huen jáy ci'm nejhuiygixy co oyhuinma'ñ miich ajcxy mïid'ajtcixp. ¹⁴ Pen ta'm mjot mhuinma'ñ mjihuüygixy, pen mga'oy'ijxcixyp ymigügtijc, pen mhuinnaxtugaangixyp ymigügtijc, pen jadu'n mjihuüygixy mhuinmaaygixy, huin'it ca' huaad mnaygómáayigixy ci'm co mdzachcuydungixy Dios ytiy'ajt, com ca' yjanchity, ñigoo m'anñdaaccxy. ¹⁵ Jada jibic-huinma'ñ ca' jada chooñ ma Dios huidibi tzinaayb tzajpjoty. Ya naaxhuiñ

jada jibic-huinma'ñ yajpaady, mïid co jáy tzachni-jot'ajtcixy jibic-huinma'ñ. Yí mujcu' yejcpy jada jibic-huinma'ñ, e ca' nminanim co Dios yecy jada jibic-huinma'ñ. ¹⁶ Paady ycixp co jáy ajcxy ycanay'ixa'ñyí, co huinnaxaangixy ymigüg, chi ca' oy y'ijtcixy, oy ajcxy ñaymidundigóoyigixy mijcajee. ¹⁷ Je huijy'ajt cujc'ajt huidibi Dios yejcpy, ooy yí'. Yí Dios huidi tzinaayb tzajpjoty oyhuinma'ñ ymïid. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmimecxtujcim nmigügtijc, etz yung naxy jot huinma'ñ nmïid'ajtim, etz nba'ayoohuim nmigügtijc, etz nduunim oyjáy'ajtin, etz tudägy nhuinma'ñ nmïid'ajtim. E ca' ñigoo naybidaacim jadu'n nej jihuiy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim mïid tudägy njot nhuinma'ñ, jadu'n nej jëb Dios jáygidägy.

Co pinjaty nijot'ajtcixy mayñax tzinaayin

4 ¿Ma'amy ajcxy mdijy chooñ je tzip capx huidibi yajpatp ma miich ajcxy? Tüg'óciy yí jadu'mbi jibicpi yajpatp ma ajcxy mjot mhuinma'ñ, paady ycixp mganay'ayuc-huinjihuiygixy, e tzipcapxy myajcojicxy myaj'abadiygixy. ² Ooy miich ajcxy tijaty mjatzojccixy, e ni ti mgapaatcixy, e huin'it mjäyay'öccixy. Ooy m'adzozccixy tijaty migüg yjé'ajtyp, paady ycixpi mdzitungixy, etz mganay'ixáanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, mïid co mbijctzoogixy mïid jibic-huinma'ñ. Mbijctzoogixyp co myajtunaangixy ma ca' ypadyí. ⁴ Mdundigooyb ajcxy. ¿Nej ca' mnejhuüygixy co Dios ca' jáygidägy pen mdzachnijot'ajtyp ajcxy yí mayñax tzinaayin? Pinjaty nijot'ajtcixyp yí mayñaxpi tzinaayin, jadu'n yí' ajcxy nej yí jacjadyí jáy ya naaxhuiñ huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: "Je Espíritu Santo huidibi Dios ti xy'adigiiyim ti xyjottigiiyim ooy ychojicim xyjihuiyim mijcajee." ⁶ Dios ninigoobi may'ajt oy'ajt tuuñ mïid ñich ajt ycixpi, paady ycixpi ymina'ñ ma Dios ñecy co ca' yí' oy'ixy pinjaty amij agix nayjihuiyip. Dios yejcpy may'ajt oy'ajt ma yí jáy ajcxy huidibi yung naxy jot huinma'ñ mïidity. ⁷ Naybidáacigix cixy jot huinijot ma yí Dios. Mic mihuindi-naaygix yí mujcu', e jihuägipy yí' ma miich ajcxy. ⁸ Ojadajtcix Dios mïid oyjot oyhuinma'ñ, e Dios xypubedipy xypudigihuiy ajcxy. Miich ajcxy pocyjäydijc, ixmajtcix yí jibic-huinma'ñ. Yajhuaatzcix yí mjot yí mhuinma'ñ miich ajcxy huidibi ametz jotmetz mibijcp. ⁹ Tajcix maygix, amutzciygix. Huen yí mxiicin yí mxondaacin ahuimbity jiiyin yaaxin. E yí mjotcujc'ajtin huen ahuimbity tajii mayii. ¹⁰ Pidaccix yung naxy yí mjot yí mhuinma'ñ ma yí mHuindzin Dios, e yí' may'ajt oy'ajt tunipy mïid miich ajcxy ycixpi.

Ca' huaad nigapxcixy ni'ojjyigixy ymigügtijc

¹¹ Migügtijc ajcxy, ca' mnayñigápxigixy mnayñi'ojjyigixy miñ xyipy. Pen mnigapxyp mni'ojjyib mmigügtijc, hue' mnixiicpy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayajmij'adyii ci'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixypy miich minañ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojjyigixy.

Dios tügpajc nejhuÿ nej je jabombi mimb cidacp

¹³ Tungix cuendi ñich n'ayuc miich ajcxy huidibi minamb: "Cham o jabom nnixim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim." ¹⁴ E miich ajcxy ni mganejhuÿigixy ti je' anajty je jabombi mimb cidacp. Je jugy'ajtin ni pin ca' nejhuÿ nej pin chinähuañ yjugy'adañ. Jadu'n miich ajcxy mjogy'ajtin nej joc co y'ocquëxigycham, e tim tügjaxigycham ti ñitigooyñi. ¹⁵ Jac'oy ajcxy mminañ: "Pen Dios jadu'n tzojp, pen xy-mooyim jugy'ajtin, jëbi cham o jabom nduunim tijaty." ¹⁶ Miich ajcxy ci'm mdzachyainiunmaayigixy ti mdunamyb, ci'm mdzachyainiunmaayigixy ti mdunamyb, ca' jadu'n y'oyity co ci'm mnaygömáayigixy; co ci'm mnaybidáacigixy amij agix, ni Dios mgamibijccixy. ¹⁷ Pin janejhuÿyb je oybi, e ca' tuñ, pocytumb anajty.

Je comeeñyäjy yjugy'ajtin nitigoyam

5 Comeeñydijc, oc'amidoo'ijtcix nej cham mminañich. Amutzciygix, tajcix maygix co xyñimi-naangixy ayo'n. ² Miich ajcxy mmeen etz ajcxy mjogy'ajt ñitigoyamb yi', miich ajcxy mhuit mduchy ti uucxyting yjictäy. ³ Miich ajcxy m'oori, ajcxy mplata, ajcxy mmeen naadigi' ti myujpijccixy ti m'amay'ajtcixy. Ti ixypy myajtungixy miid oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooyigixy ma Dios. Miid co yi' mmeen ca' ti myajtungixy miid oyjäy'ajtin, paady ycixpi ayo'n mbadaangixy miid je xii tiempo huidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooyigixyp co ca' ca'pxy ti mmujuyigixy mdumbidijc huidibi ti myajtungixy ma ajcxy mgamdu'. Yi mdumbidijc cham ooy miich ajcxy xäy ma Dios. Yi Dios, je Huindzin mijpi, huidi ane'mdaayb tuc'óciy jilby tzajpjoty etz ya naaxhuiñ, yi' ñejhuÿydaayb nej miich mdumbi ajcxy yminaangixy. ⁵ Ti miich ajcxy agujc jotcujc mdzinaayigixy ya naaxhuiñ miid mayñax xondaacin. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachyp yi ayo'n huidibi ajcxy mbadamyb ma Dios, jadu'n nej huaj nicxpi ahuixy co jäy ajcxy chüdzañy. ⁶ Miich ajcxy comeeñyäjydijc ti miich ajcxy mxigixy mnihuambe-

jtixy, mdzaachytungixy ti myaj'óccixy jäy ajcxy tudägypi, e ca' yi' ajcxy xymiñhuimbijty.

Je mecxtujcin etz je capxtägii

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tiibi nidungiyigixy, ahuijxcixy miid mecxtujcin je oga'n tuu etz je poj tuu huidi miid je' ypidägy yhuindhuipy. ⁸ Miid'ajtcix nañ jadu'n ooy mecxtujcin, etz ca' mjotmetzcixy, com huingomb je tiempo mina ymiinañ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápxigixy nayñi'ojjyigixy. Pen jadu'n mdungixy Dios miich ajcxy xyajpocycähuipy, com tim huingonip je xii je tiempo mina Dios tiydunañ jäy ajcxy miid ypocy ycixpi. ¹⁰ Migügtijc ajcxy, pijccix je ijxpejt jadu'n nej tzaachyp minajxy yajnaxxy je profetas ajcxy huidibi ajcxy ñhuäcxp capxhuäcxp je Huindzin Dios y'ayuc. ¹¹ Minaanim jadu'n, miid co ajcxy ooy mimecxtucy nej jäy jibic ytuuñ miid yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachyp minajxy yajnaxxy, e ymimecxtujc je'. Miid co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidipy, tiydudägy ajcxy m'adzohuipy: "Janch jadu'n o ca' yjadu'nity", ca' ajcxy m'indägipy. Ca' Dios nigoo m'ibaadipy mgapxpaadipy. Ni ca' m'ibaadipy mgapxpaadipy yi naaxhuiñybi o tijaty ya naaxhuiñ. Huin'it ca' mnayajpocycähuÿyb ma Dios.

¹³ Pen ji pin ma miich ajcxy ti ayo'n miidity, huen mibijctzoogixy Dios miid yi jäy ycixpi huidibi ayo'n miid. Pen miich ajcxy jotcujc nayjihuiyip, huen huin'igixy Dios. ¹⁴ Pen ji pin nidügti ypiyii ma miich ajcxy, huoomiingixy yi' huidibi ajcxy nigohuajc'ajtp yi mibijcpidijc, jigix ajcxy mibijctzoohuipy Dios miid je pa'mjäy ycixpi, etz pidägipy hueeni aceite ma je jäy ycohuajc etz capxpaadipy yi Huindzin Jesús xii. ¹⁵ Miid co miich ajcxy mmijpidaaccixy e mibijctzoogixy Dios, paady ycixpi tzögipy yi pa'mjäy. Chi je Huindzin Dios yejcnip mic'ajt oy'ajt, etz ymecxtaayipy yi' ypocy huidibi anajty ti tuñ. ¹⁶ Capxidzim yi mbocy nidüg nidüg. Ñayñibijctzoohuÿiyigixy nidüg nidüg ma Dios, jigix ajcxy mdzögipy. Pen tüg tudägypi jäy ymibijctzooyb yi Dios cixyot huinjot, madägipy yi' miid y'oración. ¹⁷ Elías nañ tim jadu'n anajty yothuinmañ miidity nej ñich ajt. Janch cixyot huinjot mibijctzooy Dios ca'jity ytüy, e ca' je' jadu'n ytuuy tugüg jimijt ja tudujc po'. ¹⁸ Chi jadüg'oc Elías mibijctzoy Dios co huen tüy, chi Dios yajtuuy, e chi ya naaxhuiñ yhuindiy je jäy ajcxy ypidägy. ¹⁹ Migügtijc ajcxy, pen ji miich ajcxy nidüg ñidigoy ytüdigoy ma yi Dios ytiy'ajt, e huin'it tüg quëxigipy pin ymigüg yajhuimbidipy ma Dios ytiy'ajt, nejhuÿyigixy miich ajcxy co pin huidi yajhuimbijtp ymigüg ma Dios ytiy'ajt, huidibi ti ñidigooy ti ytüdigoy, ti je' anajty tüg alma yajtzögy ma yi o'cin, e ti anajty yajpocynñhuaatzäy.

1 PEDRO

1 Ich Pedro, Jesucristo ti xyajniḃicyich ngapx-huäcxibich yí' y'ayuc. Jada necy nyajniejxyp mi-ich Israel jāy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy miḡügtjic Dios Teedy ti xyhuin'ijxcixy, jayijp Dios ti ne-jhuḡy co xyjāy'ada'ñyii ajcxy. Dios ti yajtigiyḡy yí' yjihui'ñ ymic'ajt ma miich ajcxy mjot mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymoogyx. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj miid miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jāy ytuñ, je taab anajty Moisés yaj'ögy iyujc etz yajniḡidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcu-j mdzināaygixipy.

Jijp'ijxcix jugy'ajtin huinixibi

³ Yi Dios, ich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid ich ajt co ti oyduñ huinjemybi ich ajt njot huinma'ñ, jēbi ni'ijtim Dios yjāy. Jadachambi ooy nijp'ijxim je jugy'ajtin huinixibi, miid co Jesús yjugypjicy huinjemy ma anajty ti y'ögy. ⁴ Nañ ooy nijp'ijxim tijaty Dios xymöhuaanim jiiḃy tzajpjoty, huidibi ca' yhuindigoy, huidibi ca' yjibicḡy, etz huidibi ca' ycixy ytigoy. ⁵ Dios xycuend'adip ajcxy miid yí' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy yti-goy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcuja'ajtcixp. Oy cham tzaachyp m'ocminajxcixy m'ocyajnajxcixy miid co jāy tzach'ijxmadza'ñ miich ajcxy mjot mhuinma'ñ. Niḡi ooy jotcuja'ajtcixp co ajcxy yí' m'alma nidzoocin pada'ñ. ⁷ Dios y'ixamyb ñejhuḡhuamyb pen janch miich ajcxy cixyot huinijot mmijpidaaccixy yí' y'ayuc. Paady miich ajcxy ayo'n tzaachyp mminajxcixy myajnajxcixy jēbi niḡi myajhuaatzcixy mjot mhuinma'ñ, tim jadu'n nej jāy yajhuaatzcixy yí' oori miid jñ. Dios niḡi tzocy miich ajcxy huidib yí' ytiy'ajt mijpidaaccip, ca'ydi oori. Pen tudāgy miich ajcxy mhuinma'ñ, pen ca' mhuinma'ñytigajtcixy co tzaachyp mminajxcixy myajnajxcixy, chi capxpaady ajcxy m'idipy etz mbaadipy ajcxy jotcuja'ajtin co anajty Jesús ñayguēxḡyii jadügtecy ya naaxhuiḡybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yí' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjhuḡyii niḡi jotcuja'ajtcixp. Je jotcuja'ajtin huidib miid Dios je' yejcp.

⁹ Paady ycixpi ti mmijpidaaccixy Jesucristo co ajcxy m'alma xyajniḡzögaani.

¹⁰ Jadu'n nej Jesucristo xyajniḡzögaani miich ajcxy m'alma je Dios y'ayuc najtzcapxiiybi ooy anajty jecy'ajty janehuḡhuaangixy nej Dios y'ayuc ñiguejy, e ca' ajcxy huinjhuḡy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi. ¹¹ Je Dios y'ayuc najtzcapxiiybi jecy'ajty ooy ajcxy jahuinmay, ooy ajcxy jahuinjhuḡhuaañ nej yhuimbizimy je ayuc huidibi ajcxy ymiid jotjoty huinma'ñyoty, je ayuc huidibi Jesucristo yajmiguejx yí' yjihui'ñ ymic'ajt, je Espíritu Santo, jadu'n nej ajcxy najtzcapxiiy co je Cristo tzaachyp m'inxaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuḡy yí' y'ayuc najtzcapxiiybi co je' huidib ajcxy ycapxhuäcx jiini je' ytuna'ñyii yjada'ñyii, ca' ajcxy ixa'ñ. Miḡügtjic ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayuc najtzcapxiiybi najtzcapxiiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jāy capxhuäcxty ma ich ajt nidüg'öcy. Je jāy huidibi capxhuäcx je tiy'ajt ymiid anajty ajcxy je Dios yjihui'ñ ymic'ajt huidibi Dios anajty yajniejxip, chooñ tzajpjoty. Ixti je ángeles huidibi ajcxy tzajpjoty tzinaayb yjanehuḡhua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy ne-jhuḡy.

Chojcyp Dios co tudāgy ndzinaayim

¹³ Paady ycixp ni'ixē pidaaccix mjot mhuinma'ñ. Huijy ycuja'ajtcixp mdzināhuip. Jijp'ijxcix je may'ajtin oy'ajtin huidibi Dios tunamyb miid miich ajcxy ycixpi co anajty Jesucristo yhuimbity ya naaxhuiñ. ¹⁴ Capxymidoogix Dios jadu'n nej pi'c'anāg capxymidoogixy ytaj yteedy. Ca' huaad m'octundigóoygixni jadu'n nej anajty mdundigooygixy co anajty ca'ni mnejhuḡygyx Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶ Com jadu'n ymiñ jaybety ma Dios ñecy, jadu'n Dios miḡapxy je' yjāy: "Mi'idip ajcxy oyjot oyhuinma'ñ jadu'n nej ich ni'ityich oyjot oyhuinma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yí' jāy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuin-

ma'ñymiidity, pen jibic-huinma'ñ ymiid, chi tzaachytunipy niigi. Paady ycixp tiydudägy ajcxy mdzinähuipy. Tzigiiygix Dios. ¹⁸ Je Dios canan hue' ti xya-jpocyñihuaatzim co ti cojuy iich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajity. ¹⁹ Hue' janchtiy Dios ti xyajpocyñihuaatzim miid Cristo co y'o'cy cruudzcixy, e chi ñi'py teemy vojcy miid iich ajt nbocy ycixpi. Jadu'n nej anajty Israel jäy ñayya-jpocyñihuaatzigixy co yaj'ögy tüg boregi ung, huidibi ca' anajty ti jibicpi miidity, e chi ñi'py teemi cuji. ²⁰ Jadu'n nej Cristo y'o'cy miid iich ajt nbocy ycixpi, Dios jayijpni jadu'n yajnihuinmayiiy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pin nejuhiy, e jadachambi Dios ajt ti xyajnejhuñiyim. ²¹ Paady ycixp miich ajcxy mijpidägy Dios. Dios yajjuygijy huinjemy je Cristo co y'o'cy, e Cristo cömay ooy ypidzimy jilby tzajpjoy. Yajmij'ajtcix Dios etz jip'ijxcix co Dios xyajnidzögaanip ajcxy m'alma.

²² Ti myajhuaatzicixy mjet mhuinma'ñ co ti mmijpidaaccixy Dios ytiy'ajt. Naychójcigix nayjihuiñyigix nidüg nidüg cixyot huinijot, ca' y'ametz yjotmetzity. ²³ Com ti Dios oyduñ miich ajcxy mjet mhuinma'ñ huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy ytiyoy, huidibi huinixii jipt, je tiy'ajt huidibi jugy'ajt yejcpy. ²⁴ Jadu'n ymiin jaybety ma Dios y'ayuc:

Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytihtzn, chi je pijy jadu'ñyi yca'ni, e chi jadu'ñyi je pijy y'oy'ajtin yti-gooy.

²⁵ Dios y'ayuc ytiy'ajt huinixii y'ity, ca' ycixy ytiigooy nimina.

Jada je ayuc je tiy'ajt huidibi Dios yjäy ycapxhuäcxyp ma miich ajcxy.

2 Paady ycixp copicy co m'ixmájtzcixipy yi jibic-huinma'ñ nej migüg ajcxy jibic mnigapxcixy. Ca' m'anidáaccixipy. Ca' ajcxy mnaybidägiiyb jadu'n nej jihuiy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ² Jadu'n nej yi ma'xungdijc tzocy chidz, nañ tim jadu'n miich ajcxy zojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'ñ mi'idipy ajcxy miid je ixpijcin huidibi Dios xymoogyixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuñyigixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴ Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñyjäy etz ooy tzocy. Yi naaxhuiñyjäy ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'ñ ma yi tzaadij ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tügpicy jäy huidibi yi' yjäy'adaanip, huidibi ojadadaangixp Dios, huidibi Dios ytung tunaangixp.

⁶ Jadu'n yjaybetyity ma Dios ylibro, Dios jadu'n ymina'ñ:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tigihuaamb ma tijc-taatz co tzaadij ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyeb nej ymina'ñ ma jaybetyity:

Pinjaty ca' capxymidohua'ñ Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadij cojixy. Yi Cristo yi' je' je mij'ane'mbi huidibi ane'mdähuamb tüg'öciy.

⁸ Nañ jadu'n yi' ajcxy huidibi ca' mijpidägy Jesús cuydumyeb nej ymina'ñ ma yjaybetyity:

Jadu'n je Cristo nipaady nej tüg tzaa ma jäy ajcxy ycönejpcixy etz ycidaagixy.

Je jäy ajcxy huidibi ca' mijpidägy Jesús, jadu'n nipaady nej jihuiy ycönejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypii miid ypocy ycixpi, jadu'n nej Dios ti yajcöducy.

Je huidibi Dios yjäy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'ñ miich ajcxy myajtumyeb. Dios miich ajcxy xyjäy'ajtp. Miich ajcxy je' xypaat mnidiy'ajt'adipy jadu'n nej Dios ti xya-jpidzimgixy ma anajty mdundigooygixy, e ti xyajhuin-jihuiygixy je' ytiy'ajt nej jëb huaad mguydungixy. Jadu'n nipaady nej jihuiy Dios ti xyajtzoongixy agootz-tuuyb, e ti xyajtigiiygixy ma ytiicxy yjajy. ¹⁰ Co anajty ca'ni mmijpidaaccixy Jesucristo, ca' anajty Dios xy-tungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

¹¹ Migügtijc ajcxy huidibi ooy ndzocy njihuiyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'ñ, jadu'n nej je jäy ajcxy ma m'adzinaaygixy nijot'ajtcixy jibic-huinma'ñ. Je jibic-huinma'ñ ca' ñaygodigiiygixy miid oyhuinma'ñ. ¹² Tiydudägy mdzinähuipy ajcxy, yajtungix oyhuinma'ñ miid je jäy ajcxy ma miich ajcxy m'adzinaaygixy, je jäy ajcxy huidibi ca' nejuñyigixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpätcixipy ma Dios, mina anajty Dios ñinmiñyii ajcxy.

¹³ Miid je Huindzin Jesucristo ycixpi, capxymidoogixy tüg'öciy gobierno tungmiidpi etz cajp tungmiidpi

y'ane'min ycötujcín, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmüdpí ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. ¹⁵ Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuüygixy Dios ytiy'ajt, huidibi tzuu huinma'n müd, ca' ajcxy mihuinma'nbybaady nej jibic xyñigapxip.

¹⁶ Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmüdpí y'ane'min ycötujcín, ca' huaad mnaybidáacigixy jadu'n nej jihuüy Dios xylugarmoogixy jigix jëbi mdundigoogixy. Copicy mdzináhuipy ajcxy jadu'n nej Dios ytumbi huidibi oy tumb. ¹⁷ Migüg'adii ajcxy tüg'óciy jäy. Naychójcigix nayjihüüygix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypí yajnaxj

¹⁸ Tumbidijc ajcxy, imidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'n müdity, o pen ahua'njäy jibicjäy, ca' yñejity, capxymidoogix. ¹⁹ Yjäygidägipy Dios pen mmecxtujctaaygixyp nej jäy ajcxy xychaachtungixy müd co oyhuinma'n miich ajcxy mmüdity. ²⁰ Pen ti anajty mdundigoogixy, e paady anajty myajtzaachytungixy, ca' pin xycómáaygixipy xycapxpáadygixipy, oy ti mjamecxtujctaaygixy huidijaty tzaachypí. Pen ooy mdungixy etz tzaachypí mbaatcixy, chi janchtiy Dios jäygidägipy nej mmimecxtujctaaygixy. ²¹ Dios chojcyp co mmecxtujctáaygixipy je tzaachypí huidibi mminajxyp myajnaxcixyp müd co oybi mdungixy. Paady ycixpi je Cristo tzaachypí ayo'n minajxy yajnaxj müd ich ajt ycixpi, e yejc ijxpejt jadu'n nej jëbi huaad mminajxcixy myajnaxcixy tzaachypí ayo'n, nañ nej jëbi huaad mbanicxixy mbayöygixy yi' y'ijxpejt. ²² Je Cristo ca' je' ma ytundigooy, e nañ ca' pin huin'iiñ. ²³ Je Cristo co jäy ajcxy y'ojí, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nigí Dios yajpuhuaniiy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx ich ajt ndzaachypí co y'o'cy cruudzcixy. E müd co jadu'n y'o'cy cruudzcixy müd ajt nbocy ycixpi, chi jëbi n'ixmajtzm jibic-huinma'n etz tudägy jëbi ndzinaayim. Müd co Cristo je tzaachypí minajxy yajnaxj müd ich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mniidigooyb mdüdigoooyb anajty ajcxy ma Dios, mgí'mhuinma'n anajty ajcxy myajtumyb nidüg nidüg, jadu'n nej jäy yborregi ñidigoy ytüdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'nymech ti mmijpidaaccixy Jesucristo je huidibi xycuend'ajtp ajcxy.

Nej huaad chinaaygixy pinjaty ti pijccixy

3 Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'n

Jesucristo, müd co miich oyjot oyhuinma'n myajtunipy müd yi', ycadimjetyity huin'it mñäy yhuinma'nymedzip etz mijpidägipy Jesucristo, co y'ixipy nej miich mmüdity tudägy'ajtin. ³ Töxyjäydijc ajcxy, ca' mnaygömayiib müd mhuit mxojx oyjatpyi tzoujatpyi, müd oori cäjiltz etz oori taatzty, müd co mgöhuay mdzachtüdigy müd cüd oyjatyp. ⁴ Hue' janchtiy jäy miich ajcxy xycómayip müd co oyjot oyhuinma'n anajty myajtungixy, müd co yung naxy mjot mhuinma'n ajcxy müdity. Co jadu'n mdungixipy jada je' oy jäygidaaeni ma Dios huinixii. Yi mhuit yi mxojx etz oori taatzty cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'n, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xigoyäxy Abraham: "Tich nhuindzin." Pen myajtumyb miich ajcxy oyjot oyhuinma'n jadu'n nej Sara, jadu'n miich ajcxy anajty nej jihüüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n müd mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy müd miich ajcxy, paady ycixpi copicy yajxon naymüddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'n m'ijtcix, naymigüg'ajtigix yajxon, naychójcigix nayjihüüygix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'n. ⁹ Co ajcxy migüg xymidundigoyipy, ca' myaj'ahuimbidity jadu'n nej anajty ti xytuñ. Co ajcxy migüg xyñi'ojhuipy, ca' myaj'ahuimbidity jadu'n nej anajty ti xyñi'ojy. Nigi nibijctzohui' ma Dios müd yi' ajcxy ycixpi, nigí mi'oyjäy'at mmigüg. Huin'it nigí Dios xyconuucxip. ¹⁰ Com jilby ymiñ jaybety ma Dios ñecy:

Pinjaty jotcuyc tzináhuamb e yajnaxa'n xii tiempo agujc jotcuyc, nay'ahuijtzigüib ca'ydi y'idigoooy ycapxtigooy, ca'ydi y'anidägy.

¹¹ Huen jihüägy ma je jibicpi e huen oyjäy'ajtin tuñ. Huen ixmach tüg'óciy tzipcapxy, ca' tzipcapxy itähuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypudigiygixyp migügtijc co tijaty mbijctzoy. Dios ymijotma'tpy je jäy ajcxy huidibi jibic-huinma'n tumb.

¹³ Pen mdumyb oyjot oyhuinma'n ajcxy, huin'it ca' pin ajcxy xymijotmädipy. ¹⁴ Co oyjot oyhuinma'n myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigüygixipy, ni ca' mhuinma'n ydigooogixipy. ¹⁵ Mijpidaaccix yi Jesucristo ich ajt nHuindzin Dios cixyot huinjot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy müd yung'ajt nax'ajt jadu'n nej mijp'ijxcixy co Jesucristo xyajnidzögaani ajcxy yi m'al-

ma. ¹⁶ Ca' mgapxipy ajcxy je ayuc huidibi xyajtzo'ydu-unip. Pen jāy ajcxy xymi'iidigooygixp xymigapxti-gooygixp, chi ajcxy jihuihuamyb tzo'ydu'n miid co ca' yjanchity nej ajcxy ymina'n com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminajxcixipy myajnajxcixipy, jac'oy co tzaachypi mminajxcixipy myajnajxcixipy miid yi m'oyjāy'ajtin ycixpi, e ca' anajty tzaachypi mminajxcixy myajnajxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnajxy co y'o'cy cruudzcxixy miid jāy ajcxy ypocy ycixpi. Oy je' anajty ca' tibocy miidity, chi je' ti codināy je jāy ajcxy ypocy, e jadu'n ich ajt ti naymi'oyiim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy miid jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jāy y'alma ajcxy huidibi jibictuuyb ijtp. ²⁰ Je jāy ajcxy je' jiiyby y'alma ijtp jibictuuyb huidibi anajty ca' capxymidooy Dios. Je taab Noé yajcojy je mij barco, ooy Dios ajcxy jecy ymimexxujci, huen tijy cayjothuimbijty ajcxy. Jēyi niductjic je jāy choocy ma je mijtuu je mijniigom. Je' co je jacjadyii ca' ajcxy yjothuimbijty. ²¹ Jadu'n nej je niductjicpi ajcxy mijpidacy Dios y'ayuc, e chi ajcxy choocy, nañ tim jadu'n ich ajt co nniibejtīm je' ich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninix, etz ti xyajhuaatzim njot nhuinma'ñ jigix ooy oy nayjihuiyim, etz nañ jadügtecy co anajty n'o'cim xyajjugypijcim miid jemybi ninix. Co nniibejtīm, je' je' je' tiy'ajt co Dios ti xyajhuaatzim njot nhuinma'ñ. ²² Je Cristo ti je' ñicxy tzaajpjoty. Jiiyby je' cham y'ity mij'ane'mbi ma Dios, yi' je' ane'mb je ángeles ajcxy huidi tzaajpjoty tungmiid etz huidijaty mic'ajt miid tzaajpjoty.

Yajtungix je mic'ajt huidibi Dios ti xymooygixy

4 Je Cristo ayo'n tzaachypi minajx yajnajx co yhuidijty ya naaxhuiñybi, e chi yajtuuñ oyjot oyhuinma'ñ miid jāy ajcxy ycixpi. Paady ycixpi copicy miich ajcxy myajtunipy oyjot oyhuinma'ñ miid migügtijc jadu'n nej Cristo yajtuuñ. Pen miich ajcxy mminajxyp myajnajxyp tzaachypi miid co oyjot oyhuinma'ñ myajtuñ, chi ca' mjacnijot'ajtip ajcxy jibic-huinma'ñ. ² Jadu'n nej ajcxy mjactzināhua'ñ mjacjugy'ada'ñ, ca' huaad mjacnijot'ajtcixy je jibic-huinma'ñ. Hue' janchtiy mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuiygixy Jesucristo ytiy'ajt, jibic-huinma'ñ anajty ajcxy myajtumyby ma mdzinaayin mjogy'ajtin, jadu'n nej jāy ajcxy jacjadyii huidibi ca'ni nejhuiygixy Dios ytiy'ajt. Chi anajty myajtungixy canaagnax je jibic-huinma'ñ, ooy ajcxy mnijot'ajtcixy maynax jibic-huinma'ñ. Ooy anajty anaxy mdzax'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididii, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychch huidibi Dios ca' jāygidägy. ⁴ Paady ycixpi je jāy ajcxy huidibi ca' nejhuiygixy Dios ytiy'ajt, ca' ajcxy jāygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy

xyñi'ojiiygixy. ⁵ Ca' mdungixy cuendi yi' ajcxy, com Dios paatip nej ytiyduna'ñ ajcxy. Je Dios je' tiydunamb nidüg'óciy jāy ajcxy huidibi cham jugy'ajtp, etz tiibi y'öccixy. ⁶ Paady ycixpi ti yajnimāy Jesucristo ytiy'ajt je jāy tiibi y'öccixy jigix yajtiydunipy ajcxy miid Dios ytiy'ajt jadu'n nej yajtiyduna'ñ yi' ajcxy huidibi jacjugy'ajtp cham. Jēbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani yti-goyaani tüg'óciy tijaty ya naaxhuiñybi. Paady ycixp tzo-cy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohipy ajcxy Dios.

⁸ Ooy ycopicity co jacnaychójcigix jacnayjihuiygix nidüg nidüg. Miid co mnaychójcigixy, paady ycixpi jēbi mnayméecxigixy. ⁹ Naymi'oyjāy'ajtigix nidüg nidüg aguujc jotcujc, ca' y'ametz yjotmetzity. ¹⁰ Yajtungix miid je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigijigix miñ xyipy jadu'n nej jāy ajcxy huidibi yajxon Dios ytiy'ajt padungixp.

¹¹ Pen Dios ti xymooygixy ixpijcin jigix jēbi capxhuäcxy yi' y'ayuc, yajxon Dios y'ayuc mgapxhuäcixp. Pen miich xypaat puñgii jēdzgii, yajxon mdunipy ajcxy jadu'n nej Dios huinma'ñ ti xymooygixy. Co yajxon Dios ytiy'ajt mguyduunipy, huin'it Dios cōmaya'ñ miich ajcxy, miid co ti mmijpidaaccixy Jesucristo. Je Jesucristo je' cōmay'idip etz ane'mip huinixii huinitiempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuiyich, ca' ooy mhuinmay'ahuidijtcixy co jāy xy'ixhuidijtcixy xypahuidijtcixy, co jāy xychaachytunaangixy jigix jēbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuihuuyb jigix jēbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigiyii ya naaxhuiñ miid ymic'ajt y'oy'ajt, jēbi ajcxy jotcujc mnayjihuihuuyb.

¹⁴ Pen xymi'iidigooyb xymigapxtigooyb jāy ajcxy, miid co miich ajcxy ti mmijpidaaccixy Jesucristo, jotcujc mnayjihuihuuyb, miid co miich ajcxy miid je Dios yjihuiñ etz Dios ymic'ajt ma mjot mhuinma'ñ. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjāy'aj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjāy ti ytundigooy, ¹⁶ pen miich ajcxy tzaachypi mminajxyp myajnajxp miid co ti mmijpidaaccixy Jesucristo, ca' ti tzo'ydu'n mjihuihuuyb, niigi Jesucristo cōmay'idipy.

¹⁷ Ti xii tiempo tim paatni mina Dios tiyduna'ñ je jāy ajcxy huidibi cuydumb je' ytiy'ajt. Pen Dios ich ajt huidi nmibijcim xytiyduunim e nbaatim hueeni tzaachypi, niigi tzaachypi padaangixy ajcxy huidibi ca' mijpidaaccixy Dios. ¹⁸ Pen je jāy huidibi oyjot oyhuinma'ñ miid mic'ajt padaangixy je' y'alma nidzocin, zti jada ytunaangixy pinjaty jibic-huinma'ñ miid, pinjaty pocytungix? ¹⁹ Pen tzaachypi mminajxyp myajnajxyp ajcxy miid co Dios jadu'n chojcyp, ca' ajcxy mjetmetzcixy, niigi ajcxy panicxix payöygix oyhuinma'ñ, niigi cixyot

huinijot mijpidägiipy ajcxy Dios; com yi' miich ajcxy xya-jcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

Pedro capxhuijp je mibijpidijc

5 Jada ñch miich ajcxy yajnamaayb huidibi nigohuajc'ajtp je mibijcpidijc, ñch nañ jadu'n nigohuajc'ajtpyich mibijcpidijc. ñch n'ixyich co je Cristo ayo'n tzaachypí minajxy yajnaxxy. Nañ jadu'n ñch yi' nmïd'idaamybich jadüg'oc co anajty ymiñ ya naaxhuiñ mïd y'oy'ajtpin ymij'ajtpin. ²Jada ñch miich ajcxy nyajnamaayb: yaj'ixpijccix etz cuend'ajtcix Dios yjây agujc jotcuyc. Ca' myaj'ixpijciipy ajcxy ametz jotmetz, cuend'ajtcix Dios yjây, tim jadu'n nej jây ycöbixy cuend'aty. Ca' meeñgíxy myaj'ixpijciipy ajcxy. Mïd oyjot oyhuinma'ñ myaj'ixpijccixy. ³Ca' adzip ahua'n m'ane'miipy Dios yjây. Hue' janchtiy ijpexy oyb yejccix. Cuydungix Dios ytiy'ajt. ⁴Co anajty Jesucristo, je huidibi nihuindzin'ajttaayb tüg'óciy, ñayguëxigiyi ya naaxhuiñ jadüg'oc, chi cömay miich ajcxy mbidzimipy. Tim jadu'n nej jây ajcxy co y'iyigixy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idipy huinixii.

⁵Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayajmij'ajtigixipy miñ xyipy mïd oyjot oyhuinma'ñ. "Dios ca' je' jäygidägy pinjaty amij agix jäy'ajtigixy. Dios ypubejtyp mïd y'oyjot pinjaty yung naxy yjot yhuinma'ñ mïd." ⁶Mgapxcöbigipy ajcxy tiydudägy Dios, je mij'ane'mbi, chi Dios xycömayipy mina anajty. ⁷Mibijctzougix Dios mïd tüg'óciy tijaty jotmay ajcxy mïd'ajtyp, chi jëbi Dios xypubedipy xypudigihuiipy ajcxy.

⁸Huijycujc m'idipy ajcxy. Nixi' m'idipy ajcxy. Com je mujcu' huidibi xymïdzip'ajtim, ooy je' xy'ix'ixim xypa'ixim. Hue' xyajhuinma'ñyidigoyaanim, tim jadu'n nej je caa co ixtay ti chüdzaamyb. ⁹Huindina' jijptina' ajcxy je mujcu'. Yi jacjadyii jây huidibi mijpidaaccixy Jesucristo, nañ yminajxcixyp yajnajxcixyp tzaachypí nañ jadu'n. ¹⁰Co anajty ajcxy hueeni tzaachypí ti m'ocyaj-naxy, huin'it Dios xyaj'oyiipy ajcxy yi mjet yi mhuinma'ñ, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee mïd nidüg'óciy jây ajcxy. Yi' je' huidibi ti yaj'oyiy nej jëbi cömay huinixii n'ijtim mïd Jesucristo jilby tzajpjoty. ¹¹Huen Dios y'oy'ajtpin etz ymij'ajtpin idipy huinixii.

Capxpooxín yajnaxjp

¹²Jada necy nyajniguejxy ajcxy mïd Silvano ñch ajt nmigüg huidibi ndijpyich co ooy yajmij'aty Jesucristo. Hueeni jada ayuc huidibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ mïd miich ajcxy ycixpí. Mijpidaaccix nigí Dios ytiy'ajt, ca'ydí mhuinma'ñyidigooygixy.

¹³Je jây huidibi ya Babilonia huidibi ajcxy yajmij'ajtcixp Jesucristo, je jây ajcxy huidibi Dios ti huin'ixy, xyajniguejxp ajcxy capxpooxín. Nañ jadu'n Marcos ñch nmigüg, je huidibi njihuuybich nej jihuüy ngi'm'ung'adyiijich xyajniguejxp capxpooxín nañ jadu'n. ¹⁴Naygapxpóocxigix xic xon nidüg nidüg miñ xyipy. Je' je' je' tiy'ajt co mnaychójcigixy mnayjihuiyigixy miñ xyipy.

Jotcuyc mnayjihuiyiyb ajcxy nidüg'óciy huidib yajmij'ajtp Jesucristo. Amén.

2 PEDRO

1 Ìich Simón Pedro, tumbich ma Jesucristo ytung. Yí' xy'apóstol'ajtpich etz ngapxhuäcpxyich yí' y'ayuc. Cham ìich miich ajcxy jada necy nyajnijay'iygixy huidibi ajcxy ti mbaatcixy mibijcin janch oybi, tim jadu'n nej ìich ajcxy ti nbáatcixyich mibijcin janch oybi. Ìich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ mïd ìich ajt nidüg'óciy. ² Huen Dios mijmay'ajt tunipy mïd miich ajcxy, etz jotcuyc'ajtin xymöhuipy mijcajee, mïd co tiy'ajt ti mbaatcixy ma Dios etz ma je Jesús ìich ajt nHuindzin.

Je mibijcpidijc chinaayin jugy'ajtin

³ Dios mïd je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguydu-unim yí' ytiy'ajt etz nej yí' huaad nyajmij'ajtim. Dios jadu'n mijmay'ajt tuun mïd ìich ajt ycixpi co ti xyajnejhuüyim Jesucristo y'ayuc ytiy'ajt. Je Jesucristo ti xy-huin'ijxim jigix jëbi nmïd'ajtim yí' ymij'ajtin y'oy'ajtin, etz jigix jëbi nduunim ojjäy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jëbi miich ajcxy mbaatcixy Dios yjihui'ñ ymic'ajt huidibi xyajtzinaaygixy mïd huadz jot huinma'ñ, etz jigix jëbi mïd jada ycixpi tiibi xyaj'ahuaniiyim, miich ajcxy mijjpyöyduutcixy je jibicpi huidibi naaxhuiñyäj ajcxy ñijot'ajtcixyp. ⁵ Com Dios mïd ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtig'iygixipy tudägy'ajtin; e mïd mdudägy'ajtin mja-cyajmijtig'iygixipy ajcxy Dios y'ixpijcin; e mïd je Dios y'ixpijcin mjacyajmijtig'iygixipy yí' Dios yjihui'ñ ymic'ajt ma ajcxy mjot mhuinma'ñ huidibi mïd mmimadägipy ajcxy yí' jibicjot jibic-huinma'ñ; e mïd je mic'ajt ma ajcxy mjot mhuinma'ñ jacyajmijtig'ihuiipy ajcxy mecxtujcin; e mïd je mecxtujcin mnejhuüyigixipy nej jëb huaad myajmij'ajtcixy etz mdzig'iygixy Dios; e mïd je mecxtujcin mjacyajmijtig'iygixipy je tzojcin je jihuiyin mïd migügtijc; e nañ mijtig'ihuiipy nañ jadu'n je mibijcin nej jëb huaad Dios myajmij'ajtcixy etz nej jëb huaad cixyot huinjot mjacyajtungixy ojjäy'ajtin. ⁸ Pen ma miich ajcxy mdzinaayin mjugy'ajtin yajpat-täy e ymijy ymayy, yí' mjugy'ajt ajcxy ca' yí' ñaadig'aty; nañ ca' anajty ajcxy naadigi' ti mmibijccixy ìich ajt nHuindzin Jesucristo, ti mnejhuüyigixy yí' y'ayuc ytiy'ajt. ⁹ Pin jada ca' capxymidooy tüg'óciy jadyaabi capxhuijin ma yjugy'ajtin, jadu'n yí' nipaady nej tüg huiintzpi o huidibi y'ijxin con, ti jaydigoy co Jesucristo ti yajpocyñhuaatzp. ¹⁰ Paady ycixp miich ajcxy

migügtijc, naymic'ijxigixy tungix tüg'óciy jada jigix mnejhuüyipy ajcxy tiydudägy co Dios ti xyajmibijccixy e ti xyhuin'ijxcixy. Pídaaccix mhuinma'ñ co jada tiy'ajt huen copicy, huen tictztig'iy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhuiipy tiydudägy tigiydac mijpi ma ìich ajt nHuindzin Jesucristo y'ane'my, je huidibi xyajnidzoocim ajt n'alma. E yí' y'ane'min ca' ycixipy ytiyoyipy nimina.

¹² Paady ycixp ìich miich ajcxy jatyimy yajjäymejtz-coodaangixy jada tiy'ajt. Oy miich ajcxy jada tiy'ajt mja-jajtcixy mjanejhuüyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham mïd.

¹³ Minaambich co yjanchity nami njactzinaayñich co ìich miich ajcxy nmöhuiipy capxhuijin. ¹⁴ Ìich ajt nHuindzin Jesucristo ti xyajnejhuüyich co tzojcin n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuij-cixy jigix co anajty n'ogyich mjäymetziyb ajcxy tüg'óciy jada tiy'ajt.

Yí' ajcxy huidibi y'ijxy je Cristo ymij'ajtin y'oy'ajtin

¹⁶ Ìich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt mïdity, e jadu'n nej je' yhuimbida'ñ jadüg'oc ya naaxhuiñ. E ca' ìich ajcxy nyaj'ixpicy nigoo'ayuc anii'ayuc huidibi ci'm ti ngojyich ti nmacxyich. Mïd ìich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx ìich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' ìich n'ung huidibi ooy ndzocyich njihuyich, e ooy jotcuyc nayjihuyijich mïd yí' ycixpi." ¹⁸ Ìich ajcxy nañ jadu'n ci'm ti nmidóogixyich je ayuc huidibi anajty tzomb tzajpjoty. Jim ìich ajcxy anajty quipxyi mïd je Huindzin Jesús ma je amay gop.

¹⁹ Nañ jadu'n nmïd'ajtim je ayuc jac'oybi jactiiybi. Je' je' je' tiy'ajt je ayuc huidibi ajcxy yjay je Dios y'ayucna-jtzcapxiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jñ tñcxp agootztuum etz jadu'n nipaady nej je xi co yximiydäy, etz jadu'n nipaady nej je mijmadza' jayhuixtucpi co ypidzimy. Jada tiy'ajt xycodñcixp ajcxy mjot mhuinma'ñ. ²⁰ Cuenttungix miich ajcxy jada: tüg'óciy je tiy'ajt, huidibi Dios ytiy'ajtmïdipi yejc huidibi ijtp jaybety ma Dios ylibro, ca' huaad pin yajniigejip mïd yci'mhuinma'ñ. ²¹ Com je Dios y'ayucna-jtzcapxiybi camina je' ajcxy ayuccapxhuäcxy mïd yci'mdzojcin yci'mhuinma'ñ. Dios anajty ajcxy

huin'ixyip jëbi ayuccapxhuäcxy miid Dios ycixpi com je Espiritu Santo anajty ajcxy mooyip ayuc huidibi ajcxy ycapxhuäcxy.

Yi' ajcxy huidibi yaj'ixpijcp anii

2 Per nañ ji anajty nañ jadu'n ayucnajtzcaxpiybi huidibi anajty ajcxy anidaacp ma je Israel jäy. E nañ jadu'n yji'adipy ayuccapxhuäcxyi hidibi anii yaj'ix-pigipy ma miich ajcxy. Je' ajcxy ayüch ameech yaj'ix-pigipy yci'm'ayuc yci'mhuinma'ñ hidibi ajcxy yajhuinma'ñyidigooyipy je mibijcpidijc. Ymina'ñ ajcxy co ca' yjanchity je Huindzin Jesús y'ayuc, je hidibi yajnidzooc ajt n'alma, e jadu'n ci'm ñay'ayo'nmooyigixy miid Dios mic'amy. 2 Mayjäy ooy panicxa'ñ je jibicpi hidibi ajcxy ytungixyp, e miid je' ajcxy ycixpi yajnidgápipy yajnimiy-dägipy ajcxy jibic je hidibi ajcxy cuydumb je tiiybi ayuc, je Jesucristo y'ayuc oybi. 3 Miid co anajty tzach'adzojccixy meeñ, chi anajty xyhuimbijccixy xyhuimmeetzcixy miid ajcxy y'ixpijcpin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejcni maabi ajcxy ypocyca'ni ma Dios. Dios tzaachytunib ajcxy miid ypocy ycixpi.

4 Dios ca' je' huinmeecxy je ángeles ajcxy hidibi tundigooyigixp. Hue' janchity ycotijnajtaayb ayoodac-tuuyb etz yajhui'my agootztuuyb, cadenijy y'ijtcixy cuend'aty, ixti cooni anajty paady xi tiempo co anajty yajtyiduna'ñ naaxhuiñyjäy miid ypocy ycixpi. 5 Nañ ni ca' Dios huinmeecxy je naaxhuiñyjäy hidibi tundigooy jecy'ajty. Chi quejxy ayo'nduu etz mijñigom ma je jibicjäydijc. Jëyi yajtzoocy je Noé hidibi capxhuäcx je tiy'ajt. Quipxy miid Noé yajtzoocy jahuixtujc y'amigügtijc. 6 Dios nañ jadu'n tzaachytuñ miid ypocy ycixpi etz yajhuindigoy miid jin metz cajp, Sodoma etz Gomorra, ixti cooni yajhui'my accuyjam jigix y'idipy je ijxpejt ma je jibicjäydijc hidibi ajcxy jac'axam jactzinahuam jacjugy'adam. 7 Dios yajtzooc je Lot, hue' je' anajty janch oyjäy, e janch ymiid anajty jotmay co anajty je jibicjäydijc ajcxy ijxi chinaayin yjugy'ajtin janch jibic. 8 Jabom jabom anajty je Lot, je jäy oyjäybi hidibi anajty tzinaayb quipxy miid je jibicjäydijc, ni ca' anajty yjotcujc'aty co anajty ixymidooy nej anajty ytundigooyigixy je jäy ajcxy ca'pi ytudägyity. 9 Dios miid mic'ajt jëbi nihua'ñ yajtzögy pinjaty mibijccixp cixyot huinjot co je mujcu' yjot'ijxigixy huinma'ñ'ijxigixy. Nañ jadu'n Dios mic'ajt miidity jigix jëbi yaj'ijtcixy je jibicjäydijc miid tzaachypiy ayo'n, hidibi ymoahuamy co anajty naaxhuiñyjäy tyduñ miid ypocy ycixpi.

10 Dios ymiid mic'ajt jëbi tzaachytunipy pinjaty tumb jibic-huinma'ñ nej ñinicx nijot'ajtcixy, e ca' isaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyii. Ytumb ajcxy yci'mjot yci'mhuinma'ñ. Ni ycatzigigixy co oyñinej ajcxy ni'ojigixy pinjaty mic'ajt miid ma Dios ytung. 11 Oy je ángeles ajcxy miidity mijcötujcin etz ane'min, ca'p je' ajcxy yjot yhuinma'ñ miidity nicxy ni'ojigixy ma Dios yhuinduu pinjaty mic'ajt miid ma Dios ytung.

12 Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz

yma'xun'ajtcixy jigix jäy ymadziyb etz yaj'ögiiyb. Ñixi-icpy yajxiicpy ajcxy yi' hidib ca' huinjhu'i'y. Per nañ tim jadu'n ajcxy y'ögipy nej iyujc y'ögy ytiogoy.

13 Cobadïhuaangixy jadu'n nej ti ytundigooyigixy. Hue' nayjihuiyigixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaayigixy yjugy'ajtcixy. Tüg tzo'ydu'n co ajcxy nañ jadu'n ymijyöybejtcixy ma m'amugiiygixy.

14 Co ajcxy huindicxixy töxyjäydijc, chi ajcxy ooy nijot'ajtcixy co miid tundigoya'ñ. Ca'p ajcxy chijpigixy y'anucxiygixy miid pocytunii. Yajtundigooyigixy pinjaty amúzzip ma mibijcin, ooy ajcxy yhuijity ycuicity ycohuinma'ñity ma meeñ'adzoogii. Dios yajtigoyii ajcxy y'alma. 15 Tigoyjäy yi' ajcxy, je' co ti ñidigajtcixy ti ytudigajtcixy ma je tiiybi je janchypiy tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeeñybada'ñ anajty miid yjibic-huinma'ñ. 16 Chi Balaam oy yaj'ojyiy ypocy tüg töxyburro, ycapxy jadu'n nej tüg jäy, e jadu'n je' yajhuäcxijpy je profeta Balaam miid je' ylochuinma'ñ.

17 Com jada jäy ajcxy ca' panicxixy je janchypiy tiy'ajt, paady ycixp jadu'n ajcxy nipaady nej tüg niipozotut ca'pi ñii miidity, etz jadu'n ajcxy nipaady nej joc hidibi poj yajyöyip (ca' ytu'y). Dios möhuiib ajcxy tzaachypiy miid ypocy ycixpi, idam ajcxy agootztuuyb huinixii huinitiempo. 18 Com ycapxyp ajcxy ayuc hidibi ca' choubaad. E miid je jibic-huinma'ñ ycixpi hidibi ajcxy chachnijot'ajtpy yajtundigooyigixy pinjaty tiihi choongixy ma je hidibi ajcxy tzinaayb miid jibic-huinma'ñ. 19 Yi' ajcxy yaj'ixpijcp je mayjäy co jëbi tungixy huentim ti hidibi ajcxy nijot'ajtpy. Per yi' ajcxy hidib jibic-huinma'ñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuy ajcxy ane'my y'ity. 20 Pinjaty ti ymibijccixy ti ñejhuiygixy je Huindzin Jesucristo ytiy'ajt hidibi yajnidzoocp ajcxy y'alma, e jadu'n ti yjihuaäcixy ma je naaxhuiñyjäy yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty niigi yhuimigixy ca'ydi nej je yaj'ijp'atypiy. 21 Niigi oy co ixypiy je' ajcxy ca' ytimnejhuiygixy je janchypiy tiy'ajt. Com ti ocnejhuiygixyp, e chi jada' y'ixtigihuaäcixy ma je huätzpi Dios ycotujcin huätzpi Dios ytiy'ajt tiihi anajty y'ocjamóoyigixy. 22 Per je' yi' ajcxy ytimycuydumy nej je ayuc y'ity: "Je uc yci'm'ich ñihuimbijtpy, e je idzim hidibi namzidaayb, nicxy je' yajtznip yquitnup mo'ntzjoty jadüg'oc."

Je Huindzin Jesús huimbidaamb ya naaxhuiñ

3 Miich ajcxy migügtijc hidibi ich ooy ndzocyich ooy njihuixyich, jada je' je mimetzpi necy hidibi ajcxy nyajnijayiiyb. Ma jada metzpi necy hue' ich ndzoga'ñich co nyajhuinma'ñymedzip ajcxy ma Dios ytiy'ajt miid jada capxhuijin hidibi ti njaayich. 2 Ti nni-jayiiygixy jigix m'ajihuixhuiyb ajcxy je ayuc hidibi ajcxy pa'tcipy'aty ñajtzcaxpiy je Dios y'ayucnajtzcaxpiybi ajcxy hidibi huadz yhuinma'ñ anajty ymiid. Nañ ajihuixyigixy je Huindzin Jesucristo je' y'ane'min hidibi

yajnidzoocp ajt n'alma, je ane'min huidibi apóstoltijc miich ajcxy xyajniimaayb.

³ Nejhuüygixy miich ajcxy jada jayjip ma yam ca'ni yhuaad'ajtni mina naaxhuiñ ycixipy, miinip jäy ajcxy huidibi nixigip yajxigip huidibi Dios yje'ajtpy. Chi-naaygixy yjugy'ajtcixy anajty miid jibic-huinma'ñ huidibi ci'm ñijot'ajtcixyp. ⁴ Chi ajcxy ymina'nip: "¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ," jadu'n yminaangixy. ⁵ Yí' ajcxy ca' huinjihuühuaangixy cuendtunaangixy co miid Dios y'ayuc yí' tzajp j'ajtp anajty yí' tzachjeyip, e miid Dios y'ane'min huin'it je naax oy yguëxigy huidibi ijtp anajty niijoty.

⁶ Nañ jadu'n miid Dios y'ayuc je jecy'ajtpy naaxhuiñyjäy y'ayo'nbaty, ñijicxatay nidüg'óciy e ytigoyday niijoty.

⁷ Per Dios miid yí' y'ayuc yaj'ijtpy jada naaxhuiñybi etz tzajp huidibi cham j'ajtp ixti coon yajtigoydähuipy miid jün. Je jün huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huidibi ooy ndzocy njihuüyich, ca' mjäydgoooygixy co ma yí' Huindzin Dios, tüg xü jadu'n yí' nej tüg mil jimijt, e tüg mil jimijt jadu'n yí' nej tüg xü. ⁹ Ca' nminaanim co yí' Dios yajhuäcxibaamyñi yí' mina cuyduna'ñ huidibi yí' ti ahuanü, jadu'n nej nijëjity jäy a'ixüygixy. Dios yajtumyb mecxtujcin miid miich ajcxy, com hue' yí' tzocy co ni tüg jäy ayo'n paadipy. Yí' chojcpy co nidüg'óciy jäy huen jothuimbijtcixy etz ixmajtcixy pocytni.

¹⁰ Co anajty je Huindzin Jesús ymiiñ jadüg'oc ya naaxhuiñybi chaachtunipy je' tüg'óciy jibicjäydijc, hue' je' ytunüyb yjadüyb ma anajty ca' pin jijp'ixy, jadu'n nej tüg meetzpi ymiiñ coodz co meedza'ñ tijaty. Huin'it je tzajp yhuindigoydähuipy miid tüg ne'min jidijtin oy-chigüñip. E tüg'óciy huidibi miid ndzinaayim njugy'ajtim toydähuip yí' miid jün, yí' naax toydähuip yí', etz tijaty yajpatp ya naaxhuiñ toydähuip nañ jadu'n.

¹¹ Com tüg'óciy tijaty huidibi j'ajtp yhuindigoydähua'ñ miid jün, paady ycixpi nigí' copicy miich ajcxy co mdzinaaygixp tudägy e myajmij'ajtcixyp Dios.

¹² Ahuijxcix ajcxy je xü tzuu mina Dios anajty yajhuaad'aty co yajhuindigoya'ñ je naaxhuiñybi. Naymic'ijxigix co tzojc yminipy yí' jadu'mbi xü tzuu. Co yhuaad'ajtnip huin'it xü, je tzajp yhuindigoydähuip miid jün; je xü po', je pojpx xemembi, je tuu enee jadu'ñy yticxtähuipy yjydähuipy jünjoty. ¹³ Per ñich ajt n'ahuijxim je jemybi tzajp jemybi naax huidibi Dios ti xyaj'ahuanüyim, tüg tzinaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huidibi ñich ooy ndzocyich njihuüyich, namí' m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yí' mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz huinma'ñ anajty mid'ajtcixy. ¹⁵ Cuenditungix je mecxtujcin huidibi ñich ajt nHuindzin Jesucristo yajtumyb miid ñich ajt jigix jëbi xyajnidzoocim ajt n'alma. Nañ jadu'n yí', ñich ajt nmigüg Pablo huidibi ooy ndzojcim, ti miich ajcxy xyñijayüygixy, jadu'n nej ixpijcin Dios ti ymöyüi ma yí' y'ayuc. ¹⁶ Ma tüg'óciy Pablo ñecy tibi xyajniguejxcixy, jada tiy'ajt ti xyajmidmydaaccixy. Nijëjity Pablo ñecy ooy chachchiphuinjihuüñity, e nijëjity jäy ajcxy tígach ajcxy huinjihuüy Pablo y'ayuc, ca' ajcxy huinjihuüy nej Pablo yjamina'na'ñ. Huingjaty ajcxy niguej Pablo y'ayuc, e ci'm ñayyajhuinma'ñydgoooygixy.

¹⁷ Paady ycixp miich ajcxy migügtijc huidibi ooy ndzocy njihuüyich, miich mnejhuydaaygix jada tiy'ajt. Nayguend'ajtigix ca'ydi jibicjäydijc miid y'anü xyajndigajtcixy xyajtüdigajtcixy, e ca'ydi m'ixtigühuäccixy ma ajcxy mmibijcin jadu'n nej tiydudägy ti mmibijccixy.

¹⁸ Huen ñich ajt nHuindzin Jesucristo huidibi yajnidzoocp ajt n'alma nigí' may'ajt oy'ajt tunipy miid miich ajcxy, e nañ nigí' yujcpedipy ajcxy yí' m'ixpijcin ma yí' ytiy'ajt. Huen Jesucristo cömay y'idipy etz m'idipy oy'ajtin mij'ajtin jadachambi xü tiempo etz jadu'n nej xü tiempo miimb cidacp. Jadu'n ngapxycixyich. Amén.

1 JUAN

1 Dios y'ayuc jiiyim anajty co naaxhuiñybi chondacy. E tiy'ajt nyejcy pich jadu'n nej nmidooyich ci'm yi' y'ayuc, jadu'n nej n'ixyich miid ngi'mhuiñich, jadu'n nej nhuindicxyich yi' ci'm, e nañ jadu'n nej nnidoñich miid ngi'mgijich. Nyajnijayñybich miich ajcxy jada necy jadu'n nej je Cristo je Dios y'ung yjugy'ajtin yega'ñ huidibi ca' cixa'ñ tigoya'ñ niminaabi. ² Ti ñayguëxgyii ya naaxhuiñ je Dios y'ung huidibi ymiid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyëccixyich co ti ñayguëxgyii ya naaxhuiñ, etz ti n'ixyich jigix jëbi nyajnimaaagyixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jilby ijtp ma Dios Teedy, nayguëxci je' ma ñch ajcxy. ³ Je huidibi ñch ajcxy n'ixyich nmidoohuich, cham miich ajcxy nyajnimaaagyixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyñy ajcxy jigix ajcxy jotcuyc'ajtin mbattäaygixipy miid jada ayuc tiy'ajt.

Dios y' je' je' tixxin jájin

⁵ Jadyaabi Dios y'ayuc ytiy'ajt Jesucristo ti xyanimäyich e nañ cham ñch miich ajcxy nyajnimaaagyixy. Dios huadz ytiy'ajt miidity, ca' ma Dios aniidägy. Jadu'n Dios nipaady nej tüg jin ytixy ma tüg it e ni ca' ni mna ypich. ⁶ Co nminaanim co Dios ajt miid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuñy ndzinaayim agootztuum. Ni-goo n'ñndaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt miidity, jadu'n nipaty nej jihuñy ndzinaayim ma jin ytixy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy miid ñch ajt nbocy ycixpi.

⁸ Co ixypy nminaanim co ca' nbocytuunim, nigoob nayhuin'ñinim ci'm, e ca' jadu'n Dios ytiy'ajt yajpaady ma ñch ajt njot nhuinma'ñ. ⁹ Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajni-maayim co ymexamy ajt nbocy, e nañ tudägy ytuñ miid ñch ajt ycixpi. Dios xyhuinmeecxim ajt nbocy etz xyajhuaatzim njot nhuinma'ñ jëbi n'ixmajzim jibic-huinma'ñ. ¹⁰ Co ajt nminaanim co ca' nbocytuunim, hue' anajty Dios nyajnajxim anñ, e ca' anajty ti ngöbjicim cixyot huinjot yi' ytiy'ajt.

Cristo, ñch ajt nhuingapxpi ma Dios

2 Miich ajcxy migügtijc huidibi ooy ndzocy njihuñyich jadu'n nej ixypy ngi'm'ungich

ngi'm'anäcich, cham jada tiy'ajt nyajnijayñygyixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi miid ypocy ycixpi. Jesucristo yi'je' huingapxp ma Dios Teedy miid ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy miid ñch ajt nbocy ycixpi, paady ycixp jëbi capx'oyñy ma Dios miid ñch ajt ycixpi e xycapx'oyñyim ñch ajt nbocy etz nañ capx'oyñyip tüg'óciy naaxhuiñy jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it ne-jhuñyim tiydudägy jadu'n nej Dios may'ajt oy'ajt ti tuñ miid ñch ajt ycixpi. ⁴ Co ixypy pinjaty ymına'ñ co ñe-jhuñyi Jesucristo ytiy'ajt e ca' cuychinaayy yi' ytiy'ajt hue' yi' tzach anidaacpi, e ca' miidity Dios ytiy'ajt. ⁵ Yi' jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuñyim co nyajmij'ajtim Dios. ⁶ Yi' jäy ajcxy pinjaty minamb co ymiid Jesucristo y'ayuc ytiy'ajt ma je' y'ay yjot, copicy ajcxy chinäaygixipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huidibi ooy ndzocy njihuñyich, ca' nminaanim jemybi tiy'ajt ajcxy nyajnimähuamy ma jada necy. Je' jada je' tiy'ajt huidibi jecy'ajty ti mnejhuñyigixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy nmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimaaagyixyp ma jada necy. Jada je'je' tiy'ajt huidibi Jesucristo ymiid ma yjot yhuinma'ñ etz nañ ñch ajt nmid ma ajt njot nhuinma'ñ. Yi' jecyip ayuc huidibi ca' ytiy'ajtity, ti yi' ñaxy e cham Dios ytiy'ajt tiydudägy nyajtuunim, jadu'n nej jihuñy je coodzpi ti ñaxy e cham ti yximñy.

⁹ Yi' jäy ajcxy huidibi minam co Dios y'ayuc ytiy'ajt ajcxy cuyduuni e ca' ixäänigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizim y jadu'n nej jihuñy agootztuuy ijtcixy. ¹⁰ Yi' jäy ajcxy pinjaty tzojcp jihuñyb ymigügtijc hue' yi' yajpaatcixy miid Dios ytiy'ajt ma ajcxy yjot yhuinma'ñ, jadu'n nipaady nej jihuñy y'ijtcixy ma xi' ytixy, ca' ajcxy ñidigoy ytüdigoy ma Dios ytiy'ajt. ¹¹ Yi' jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuñy agootztuuby y'ijtcixy, ca' ajcxy

chinaaygixy nej Dios ytiy'ajt yja'ané'migixy, ca' ajcxy nejhuuigixy huidibi tiy'ajt jébi yajtungixy, com jibic-huinma'n chachtuumyb ajcxy huidibi ca' Dios tiy'ajt'adyii.

¹² Miich ajcxy migügtijc huidibi ooy ndzocy njihuüyich ajcxy jadu'n nej ixypy ngi'm'ung ngi'm'anäcich, com Dios ti miich ajcxy mbocy xyhuinmecxtayi co Jesucristo y'o'cy miid ajcxy mbocy ycixpi, paady ycixp cham nni-jayiiygixy. ¹³ Cham nnijayiiygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naax-huiñybi oga'n choondacy etz chambaad yjii'atyñi. Cham nnijayiiygixy miich ajcxy anäctijc, com ti mmi-madaaccixy je ca'oybi.

Cham nnijayiiygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayiiygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayiiygixy miich ajcxy anäctijc, com mic mjot mhuinma'n miidity ajcxy etz Dios ytiy'ajt yajpatp ma ajcxy mjot mhuinma'n, paady ycixp ajcxy ti mmi-madaaccixy yi ca'oybi.

¹⁵ Migügtijc, ca' anaxy m'adzójccixip yi huidibi miid ndzinaayim ya naaxhuiñ. Yi jäy ajcxy huidibi adzojctaayb anaxy yi huidi miid ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzojctähuipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'n tzojcm, jadu'n nej tijaty n'ixim, jadu'n nej huidibi amij agix miid ndzachnayjihuiyim. Com yi jadu'mbi huinma'n ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'n huidijaty yi huinma'n y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anii

¹⁸ Miich ajcxy migügtijc huidibi ooy ndzocy njihuüyich nej ixypy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuüygixy co miinaam jäy ajcxy huidibi nayyajnaxaanip nej Cristo' e ca' yjanchity. Miid co cham ji mayjäy ajcxy huidibi nayyajnaxip jadu'n nej Cristo, paady nejhuüyim co tim cijxnip yi tiempo miid ñch naaxhuiñyäjy ajt ycixpi. ¹⁹ Yi jäy ajcxy huidibi nayyajnaxaanip jadu'n ixypy nej Cristo, naybajc-huäcxaanip yi' ajcxy miid ñch ajt, ca' anajty ajcxy ytüggy yi' ajcxy yhuinma'n miid ñch ajt nhuinma'n, tüg-mucy ixypy ajt xymiid'ijtim. Ji jadu'n ñiguëxy co ca' ytüggy yhuinma'n miid ñch ajt nhuinma'n co ti ajcxy xy-puhaäutuutim.

²⁰ Ti miich ajcxy xy'adiggy xyjottiggy Dios yjihui'n ymic'ajt, paady miich ajcxy mhuinjihuüy tüg'óciy Dios y'ayuc ytiy'ajt. ²¹ Ca' nminaanim paady miich ajcxy nijayiiygixy co ca' mhuinjihuüygixy Dios ytiy'ajt. Paady nnijayiiygixy miich ajcxy jigix mnejhuüygixyip Dios ytiy'ajt etz mnejhuüygixyip co yi jäy ajcxy huidibi indaacp, ca' yi' ajcxy Dios ytiy'ajt miidity.

²² Yi' je' indacp huidibi minamb co Jesús ca' yi' yjējity je Cristo huidibi Dios yquejx. Yi indacpi je'midzip'ajtp

Jesucristo etz ca' miibicy Dios Teedy etz nañ ca' miibijci Dios y'ung. ²³ Je jäy ajcxy huidibi indacp minam co Jesús ca' yjējity je Cristo, e nañ ca' ajcxy miidity Dios Teedy ytiy'ajt. Yi jäy ajcxy huidibi minam co Jesús yjējity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydüngixyipy e ca' mjäydigóoygixipy. Pen mmi'ijtcixp yi ayuc huidibi Dios yjäy oga'n ajcxy xyaj'ixpij, huin'it jébi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuaniiyim co xyajtzinähuaanim ajt n'alma huinixi huinñtiempo.

²⁶ Jada tiy'ajt ajcxy nyajnijayiiyb jigix ca' mmijpidäccixipy yi' ajcxy y'ayuc huidibi xyajhuinma'nydigoyaam ajcxy. ²⁷ Yi Dios yjihui'n ymic'ajt huidibi ti xy'adiggygixy ti xyjottiggygixy ijttiiib yi' ma miich ajcxy mjot mhuinma'n. Paady ycixp ca' myajmayajtcixy pin xyaj'ixpigip ajcxy com je Espiritu Santo xyaj'ixpigip ajcxy. Je Espiritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'aniijity. E jadu'n nej je' xya-jni'ixiiygixy, jadu'n mguydunipy ajcxy. Mi'ijtcix Dios yjihui'n ymic'ajt ma mjot mhuinma'n ajcxy.

²⁸ Miich ajcxy migügtijc, mi'idipy ajcxy Jesucristo ytiy'ajt ma mjot mhuinma'n jigix co ñayyajniguëxygiiyb Jesucristo ya naaxhuiñ jadüg'oc, huin'it jotcujc ajt nnyajhuüyim etz ni ca' jibic nayjihuiyim co anajty xyñimiinim. ²⁹ Ti mnejhuüygixy co yi Jesucristo tiydudägy ytuñ, e ti mnejhuüygixy nañ jadu'n co tüg'óciy yi jäy huidibi tiydudägy tumb, yi' je' ajcxy Dios y'ung'ajtip.

Dios ñch ajt xy'ung'ajtim

3 Jihuñybijccix tüg'óciy je mijpi may'ajt Dios Teedy ti tuñ miid ñch'ajt ycixpi jigix jébi naydijim Dios y'ung. Yi naaxhuiñyäjy ajcxy huidibi ca' mijpidaaccixy Jesucristo ca' ajcxy nejhuüygixy huinjihuüygixy Jesucristo ytiy'ajt, paady ycixp ca' ajcxy nejhuüy huinjihuüy co Dios xy'ung'ajtim. ² Miich ajcxy migügtijc huidibi ooy ndzocy njihuüyich, jadachambi Dios ñch ajt xy'ung'ajtim. Jadachambi ca'p y'ocniguëxygiiñ nej ñch ajt jiini n'idaanim. Co anajty Jesucristo ymiid jadüg'oc ya naaxhuiñ, huin'it nguipxyjatyiiyim miid je', com n'ixaanim ajt Jesucristo jadu'n nej je' yajpaady. ³ Tüg'óciy jäy ajcxy huidibi jii'ijxp co Jesucristo ymiina'n jadüg'oc ya naaxhuiñ, copicy yajhuädziipy ajcxy yjot yhuinma'n. Huen mi'ijtcixy oyjot oyhuinma'n jadu'n nej Jesucristo mi'ity oyjot oyhuinma'n.

⁴ Tüg'óciy jäy ajcxy huidibi pocytumb, hue' ajcxy ymi- dundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵ E mnejhuüyb miich ajcxy co yi Jesucristo ti ñayguëxygii ya naaxhuiñ jigix jébi xyajpocyñihuaatzim. Jesucristo ca' anajty ti pocy miidity, ca' anajty ma ti ytundigoy.

⁶ Tüg'óciy jäy ajcxy huidibi cuydunähuaam Jesucristo ytiy'ajt, ca' huaad pocytuñ. Yi jäy ajcxy huidijaty pocy-tundiiib, ca'ni ixypy yi' Jesucristo, nañ ca'ni ajcxy huinjihuüy yi' ytiy'ajt. ⁷ Miich ajcxy migügtijc huidibi ooy ndzocy njihuüyich jadu'n nej ngi'm'ung

ngi'm'anäcìch, ix ni pin xychahuin'ingix. Yì jây ajcxy huidibi oyjot oyhuinma'n yajtumb, tiydudägy yì' ajcxy chinäy yjugy'ajty, tim jadu'n nej Jesucristo tiydudägy chinäy yjugy'ajty. ⁸ Yì jây ajcxy huidibi tzachpocytundibni, yì' ajcxy mujcu' yjây'ajtip. Com jadu'n nej chondacy je naaxhuiñybi oga'n yì mujcu' jëni anajty jadu'n chachpocytuñ. Paady ycìxp Dios quejxy y'ung ya naaxhuiñ co je mujcu' yhuinma'n yajcödìgoyaani.

⁹ Yì jây huidibi Dios ajcxy ti ymöyii jemybi jot jemybi huinma'n, ca' ajcxy ypocytundiiy com je'co tú'ciy ajcxy yjot yhuinma'n miidity, jadu'n nej anajty Jesucristo yjot yhuinma'n miidity, ca' huaad ajcxy ypocytundiiy com Dios ti ymöyii ajcxy jemybi jot jemybi huinma'n.

¹⁰ Paady ycìxp yñiguëxgy yì jây ajcxy pinjaty Dios y'ung'ajtip etz pinjaty mujcu' ung'ajtip. Yì huidibi ajcxy ca' tiydudägy cuydungixy Dios ytiy'ajt etz ca' ajcxy ixa'n ymìgügtijc, etz ca' ajcxy tzocy jihuïy ymìgügtijc, hue' ca' ajcxy Dios ymöyii jemybi jot jemybi huinma'n, mujcu' ajcxy y'ung'ajtip.

Naychojçim nayjihuiïyim miñ xyipy

¹¹ Jada je' je ayuc tiy'ajt huidibi miich ajcxy ti mmi-doogixy co oga'n ajcxy mmijpidacy Jesucristo co copicy naychojçim nayjihuiïyim nidüg nidüg. ¹² Ca' huaad jadu'n n'idiitzim nej Caín y'idich co anajty mujcu' huinma'n miidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'n yajtuñ, e je' y'uch oyhuinma'n anajty yajtumy paady ycìxp je y'uch yaj'o'cy.

¹³ Miich ajcxy migügtijc, ca' ooy mdzachhuinmaay ajcxy co ca' yì naaxhuiñyây ajcxy xy'ixa'n, huidibi ajcxy ca' Dios y'ayuc mijpidaaci. ¹⁴ Com iich ajt nnejhuïyim co je nmigügtijc ajcxy ndzojçim njihuïyim co n'o'çim, huin'it njugypigaanim e ndzinahaanim jilby tzajpjoty huinixi huinitempo. Yì jây ajcxy pinjaty ca' ymìgügtijc ixa'n ajcxy co ajcxy y'ögipy, huin'it ca' ajcxy chinähua'n jilby tzajpjoty. ¹⁵ Huenpinjäyity huidibi ca' ymìgüg ixa'n, nipatpy nej ytundigoy jadu'n nej jâyaj'o'cpi ytundigoy e nañ jadu'n nejhuïyim, co je' y'ögipy, ca' chinähua'n jilby tzajpjoty. ¹⁶ Ya ixipy jëbi iich ajt ijxpejt nbjçim nej huaad migügtijc ndzojçim njihuïyim, jadu'n nej Jesucristo ijxpejt yejcy co ñayyojxi ñaydooci co y'o'cy miid iich ajt nbocy ycìxpi. Paady ycìxp iich ajt jëbi huaad ndzojçim njihuïyim nmigügtijc, oy jada ndimco'ögiiyim.

¹⁷ Janch pinjaty yjamid ymadaacin, e yja'ijxpy co ymìgüg tigati yajmayjaty, e amij agix ñayjihuiïyii, ca' pa'ayo'n miidity, ca' pubeda'n ymìgüg, ca' je' anajty tzocy jihuïy ymìgüg jadu'n nej Dios chogyii yjihuiïyii.

¹⁸ Miich ajcxy migügtijc huidibi ooy ndzocy njihuïyich jadu'n nej ixipy ngi'm'ungich, miid oyjäy'ajtin etz miid Dios ytiy'ajt tzoc yajxon naychojçim nayjihuiïyim miñ xyipy. Ca' nminaanim nigoo ngapxim nmiydaacim ahuac aguuy.

Cixyot huinijot naybidaacim ma Dios

¹⁹ Co nyajtuunim oyjäy'ajtin miid iich ajt nmigügtijc, huin'it nejhuïyim co Dios ytiy'ajt nguyduunim e jotcuyc nayjihuiïyim co Dios n'ojadajtim. ²⁰ Co jibic njot nhuin-

ma'n ajt njihuïyim, miid co ca' oyjäy'ajtin nduunim, jac nigi Dios jibic ñayjihuiïyii com yì' jacmijhuinma'n miid, ca'ydì iich ajt, e yì' nejhuïydaayb tüg'óciy tijaty ajt nduunim. ²¹ Miich ajcxy migügtijc huidibi ooy ndzocy njihuïyich, co ca' ti jibicpi njihuïyim ma ajt njot nhuinma'n miid co oybi nduunim, huin'it jotcuyc ajt n'ijtim miid Dios. ²² E huentimtiijity huidibi iich ajt Dios nya-jmibijctzoohuim, yì' xymooyim miid co yì' y'ayuc nguyduunim, e nduunim je huidibi yì' yjäygidacy. ²³ Dios jada ti xyajnajtz'ane'miiyim co tzoc mibijçim mijpidaacim yì' y'ung Jesús etz tzoc naychojçim nayjihuiïyim miñ xyipy, jadu'n yì' ti xyajnajtz'ane'miiyim. ²⁴ Yì jây ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuïyim co Jesucristo ytiy'ajt yajpaady ma iich ajt miid co je Dios yjihui'n ymic'ajt ti xy'adigiiyim xyjottigiiyim.

Dios yjihui'n ymic'ajt etz je ca'oybi yjihui'n

4 Miich ajcxy migügtijc huidibi ooy ndzocy njihuïyich, ca' ajcxy mmibijctähuipy tüg'óciy jây huidibi Dios y'ayuc capxhuäcxip. Mido'mbijccixy jayjip peni janch ajcxy miidity Dios yjihui'n ymic'ajt. Com ji mayjäy ya naaxhuiñ huidibi minam co Dios y'ayucapxhuäcxì yì' ajcxy e ca' yjanchity. ² Jada je' je tiy'ajt ma huaad mjihu'iñybijccixy pen janch miidity ajcxy Dios yjihui'n ymic'ajt, yì' ajcxy huidibi Dios y'ayuccapxhuäcxip: tüg'óciy jây huidibi capxhuäcxp co Jesucristo yma'xung'ajty ya naaxhuiñ miid ñinìcx, Dios yì' ytiy'ajt ymiid. ³ E tüg'óciy jây ajcxy huidibi ca' ñigapxpety ajcxy co Jesucristo chinäy ya naaxhuiñ miid ñinìcx, ca' yì' Dios ytiy'ajt miidity. Ti miich ajcxy ayuc midoogixy oga'n co miinaam yì naaxhuiñyây ajcxy miid je mujcu' yjihui'n ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' ñigapxpejtcixy co Jesucristo yma'xung'ajty ya naaxhuiñ miid ñinìcx.

⁴ Migügtijc huidibi Dios yjihui'n ymic'ajt ti xy'adigiiygixy ti xyjottigiiygixy, e ti miich ajcxy mmi-madaaccixy yì' huidibi ajcxy nigapxpejtp co Jesucristo ca' ma'xung'ajty ya naaxhuiñ miid ñinìcx. Com Dios huidibi miich ajcxy xy'ane'mb, jac mij yì' ca'ydì je mujcu', paady miich ajcxy ti mmimadaaccixy je mujcu'. ⁵ Je huidi ajcxy jadu'n jaminaamb co Dios y'ayuc capxhuäcxì e ca' yjanchity ya naaxhuiñ ajcxy tiy'ajt ti patcixy ma je mujcu', paady ycìxp yì naaxhuiñ yhuuij'ajtin ajcxy tzachcapxhuäcx, e yì naaxhuiñyây tzachmijpidaaccixy etz amidoo'ijti ajcxy y'ayuc. ⁶ Iich ajt tiy'ajt ti nbaatim ma Dios. Tüg'óciy jây ajcxy huidibi Dios ytiy'ajt huinjihuiïyip, y'amidoo'ijtyp ajcxy iich ajt n'ayuc. Yì jây ajcxy huidibi ca' Dios ytiy'ajt miidity, ca' ajcxy amidoo'ijtcixy iich ajt n'ayuc, paady ycìxp n'ijxajpim je jây ajcxy huidibi tudägyip, etz je jây ajcxy huidibi nigoo tzach'aniidaacp.

Dios ooy xychojçim xyjihuiïyim

⁷ Miich ajcxy migügtijc huidibi ooy ndzocy njihuïyich, tzoc oy yajxon naychojçim nayjihuiïyim miñ xyipy. Dios

ti yecy ymic'ajt ma ajt njot nhuinma'n jigix jëbi ajt naychojcm nayjihuiyim miñ xyipy. Tüg'óciy jäy huidibi ymigügtjic chojccixyp yjihuiygixyp, ti Dios yjihui'n y'adigiyigixy yjottigiyigixy etz ñejhuiyip yhuinjhuiyip ajcxy Dios y'ayuc ytiy'ajt. ⁸ Pinjaty ca' ymicüg tzocy jihuiy, ca' yi' nejhuiyi huinjhuiyi Dios ytiy'ajt, com Dios tüg'óciy yi' tzojctäy. ⁹ Jada je'je tiy'ajt co Dios ajt xychojtaayim co je y'ung huidibi tügpajcpi ymiid, quejy ya naaxhuiñ jigix ñich ajt nbaatim Dios yjihui'n ymic'ajt miid yi' ycixpi. E Dios yjihui'n ymic'ajt ca' ycixa'n ytigoya'n nimina, paady ñich ajt njugy'ajtin ca' ycixa'n ytigoya'n. ¹⁰ Dios ti xychojcm ti xyjihuiyim, paady quejy y'ung ya naaxhuiñ jigix jëbi xycodi-naayim ma yi' Dios ycötujectac miid ñich ajt nbocy ycixpi. Ca' nminaanim miid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ miid ñich ajt ycixpi.

¹¹ Miich ajcxy migügtjic huidibi ooy ndzocy njihuiyich, miid co Dios jadu'n ajt ti xychojcm ti xyjihuiyim mijcajee oga'n, paady ycixp tzoc ñich ajt naychojcm nayjihuiyim miñ xyipy. ¹² Ni minaabi pin ca' ixyni Dios. Co naychojcm nayjihuiyim miñ xyipy, huin'it Dios yjihui'n ymic'ajt ijttiy ma ñich ajt njot nhuinma'n. Jadu'n Dios yjihui'n ymic'ajt xypubejtim xypudigiyim, jëbi nigä naychojcm nayjihuiyim nidüg nidüg jadu'n nej Dios jäygidägy. ¹³ Nejhuiyim ñich ajt co nyajpatim ma Dios, e nañ jadu'n Dios yajpaady ma ñich ajt, miid co yi' yjihui'n ymic'ajt ti xy'adigiyim ti xyjottigiyim. ¹⁴ E ñich ajcxy, ti ñich ajcxy yi' Jesucristo n'ixyich, paady ñich ajcxy nidiy'ajt'ajtyich co je Dios Teedy quejy y'ung ya naaxhuiñ co yajnidzöga'n tüg'óciy naaxhuiñyäjy co anajty Dios nbocy ajt xyajcomidoohuaanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ ñich ajt nnejhuiyim etz nmijpidaacim jadu'n nej Dios ajt xychojcm xyjihuiyim nidüg'óciy. Dios chojctaaayb yi' nidüg'óciy yi' jäy. Pinjaty tzojccixp jihuiygixp ymigügtjic, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Miid co yajxon nmijpidaacim Dios paady jotcuyc nnaaxanim ma Dios ycötujectac, mi-na anajty xyajcomidouhuim ajt nbocy. Com tú'ciy ñich ajt nyajpaatim ya naaxhuiñ, tim jadu'n nej yi' Jesucristo. ¹⁸ Co nmijpidaacim Dios, huin'it ca' ajt nmidzigiyim nmidzo'yduunim. Peni yajxon nmijpidaacim Dios, huin'it jëbi tzig'iñ nyajqueecim. Yi' jäy ajcxy huidibi tzigiyb etz tzo'ydum, ca' ajcxy Dios mijpidägy yajxon.

¹⁹ Com Dios jayjip ti xychojcm ti xyjihuiyim, paady ycixp tzoc ajt naychojcm nayjihuiyim nidüg nidüg etz nañ nmijpidaacim Dios. ²⁰ Yi' jäy ajcxy pinjaty jadu'n minamb co mijpidaaccixy Dios, e ca' ymicüg tzogaangixy ixaangixy, hue' je' ajcxy anidaacp. Com peni ca' jajtciy nej tzojccixipy jihuiygixipy yi' ymigügtjic huidibi ajcxy ix'yajtpy, ca' ajcxy jadip nej mijpidaaccixipy Dios huidibi ca' ix'yajtigixy. ²¹ E Dios ñich ajt xyña-jtz'ane'miyyim co pin Dios mibijcp mijpidacp, huen nañ jadu'n ymigügtjic tzocy jihuiy.

Yi pin huidibi ca' ixa'n midohua'n Cristo y'ayuc

5 Tüg'óciy jäy huidibi mibijccixp co Jesús je' je' je' Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiygixy je' ajcxy huidibi Dios y'ung'ajtip. ² Co ndzojcm njihuiyim huidibi Dios y'ung'ajtip, je' jada je' je' ijxpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miyyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miyyim e yi' y'ayuc ca' ooy chipity co nguyduunim. ⁴ Com tüg'óciy yi' jäy ajcxy huidibi Dios ti y'adigiyii ti yjottigiyii yjihui'n ymic'ajt, ymihuindinaayb ajcxy yi' jibic-huinma'n ya naaxhuiñ. Co nmibijcm Dios, huin'it jëbi mihuindinaayim yi' jibic-huinma'n ya naaxhuiñ. ⁵ Yi' jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi' jibic huinma'n ya naaxhuiñ.

Je ayuc huidibi nidiy'ajt yi' Dios y'ung

⁶ Yi' Jesucristo je' je' je' huidibi miin ya naaxhuiñ, je' je' je' huidibi ñibejt etz ñi'py teemy gujy co y'o'cy miid jäy ajcxy ypocy ycixpi. Ca' nminaanim jëyi anajty ti ñibety, hue' nañ jadu'n ti y'ögy miid ajt nbocy ycixpi. ⁷ E yi' Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymiid. ⁸ Ji tugügnax huidibi tiy'ajt yejcp co Dios Jesús y'ung'adyii: je Espiritu Santo, je ñibejtin, etz Jesús ñi'py co teemy cujy miid ñich ajt nbocy ycixpi. E jadu'n nidugüg ñaybáatigixy tügnax, e tügnax ytiy'ajt yejccixy. ⁹ Mijpidaacim ñich ajt jäy y'ayuc co Dios Jesús y'ung'adyii, nigä copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'ydi jäy ajcxy. ¹⁰ Yi' jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'n. Yi' jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajcixy Dios nej anidägyin co ca' mibijccixy yi' Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy yti-goyipy nimina. Dios y'ung ca' y'alma ycixipy yti-goyipy nimina, paady yi' ti yaj'oyiy nej jëbi ajt n'alma y'ijtim huinixi huinitempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy yti-goyipy nimina. Pinjaty ca' mijpidägy Dios y'ung, yi' ajcxy y'alma cixipy ti-goyipy co y'ögipy.

Capxycixin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jëbi mijpidaaccixipy Dios y'ung, etz jëbi mnejhuiygixy tiydudägy co mjugypjccixipy jadügtecy co anajty ti m'o'ccixy e ca' ajcxy m'alma ycixipy yti-goyipy.

¹⁴ Jada jotcuyc'ajtin ñich ajt nmid'ajtim co nmibijct-zoohuim Dios jadu'n nej Jesucristo xyñajtz'ane'miyyim, yi' ñich ajt jëbi xymidouhuim. ¹⁵ Miid co nnejhuiyim co yi' ajt xymidouhuim ma tijaty Dios nyajmibijctzouhuim, paady ycixp nejhuiyim co nmid'ajtim tijaty anajty ti nyajmibijctzou.

¹⁶ Co pinjaty ixy co ymigüg ypocytuñ huidibi huaad jëbi Dios meecxy, huen mibijctzooyi Dios miid yi' ycixpi, e Dios yajtzinähuiyb pen ca' anajty ooy ymijpocyity je tiihi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani.

¹⁷ Tüg'óciy jibic-huinma'ñ huidibi jäy ytumyb, pocy yi', per ji jibic-huinma'ñ huidibi jäy ytumyb, huidi jëbi Dios huinmecxy e ca' y'alma ytigoyip.

¹⁸ Nejhuüiyim co tüg'óciy pinjaty Dios ti ymöyii jemybi jot huinma'ñ, ca' yi' y'ocpocytuni. Yi Dios y'ung, huidibi ti ymóoyigixy jemybi jot huinma'ñ, cuend'ajtip yi' ajcxy, ca'ydí je mujcu' xyajhuinma'ñydgóoyigixy.

¹⁹ Nejhuüiyim iich ajt co Dios jadu'n xy'ane'mim njot nhuinma'ñ etz nejhuüiyim co tüg'óciy jacjadyii naaxhuiñyäjy huidibi ca' mijpidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuüiyim co yi' Dios y'ung ya y'oy naaxhuiñ e ti xyajnejhuüiyim yi' y'ayuc ytiy'ajt, jigix jëbi nejhuüiyim huinjihuüiyim yajxon je Dios janchypi tudägypi. Nmí'ijtim ma iich ajt ndzinaayin je janchypi je tudägypi je Dios y'ung je Jesucristo. Jada jëdu'n je tiydudägypi Dios, etz je Dios yjugy'ajtin caminaabi ycacixy ycatigoy.

²¹ Miich ajcxy migügtijc huidibi ooy ndzocy njihuüiyich jadu'n nej ixyipy ngi'm'ung ngi'm'anäcich, ca' nigoo mdzachDios'ájtigixy tijaty huidibi ca' ni ti mic'ajt miidity, jadu'n nej Dios Teedy tzajpjotypi ymic'ajt miidity.

2 JUAN

1 Ich Juan huidibi nigohuajc'ajt Dios yjāy. Nya-jniguejxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniguejxpich jada necy tüg'óciy miich m'ung m'anäc ajcxy. Ooy ndzocy njihuïyich miich ajcxy. Ca' nmīnaanīm ich naydügpajc ndzojcy njihuïybich miich ajcxy, nañ jadu'n tüg'óciy jäy ajcxy, huidibi huinjihuïygixp Dios ytiy'ajt, xychojccixp xyjihuïygixp ajcxy. ² Ich miich ajcxy ndzojccixyp njihuïygixyp com Dios ytiy'ajt yajpatp ma ich ajt njot nhuinma'ñ, etz yi' ijtp huinixi ma ich ajt. ³ Huen Dios Teedy etz ich ajt nHuindzin Jesucristo, yi' Dios y'ung oy'ajt may'ajt tuñ mīd miich ajcxy, huen xypa'ayoogixy huen xyajjotcugixy mīd co mguydungixy yi' ytiy'ajt etz mnaychójcigixy mnayjihuiyigixy miñ xyipy.

⁴ Ti nmīnaybadyiijich nijējity miich m'ung m'anäc, e ooy njotcugixy mīd co tiydudägy ajcxy payöy' Dios ytiy'ajt, jadu'n nej Dios Teedy ajt ti xyñajtz'ane'miïyim. ⁵ Cham njacnimäyich miich ajcxy co jēbi ajcxy mnaychójcigixy mnayjihuiyigixy miñ xyipy. Ca' nmīnaanīm huinjemy jada tiy'ajt huidibi cham nyajnijayiyigixy. Je' jada je ayuc huidibi oga'n'aty ti nbaatim co ti nmībajcīm Jesucristo. ⁶ Co ndzojcm njihuïyim nmigügtijc, jada je' tiy'ajt co nguyduunim nej Dios ajt ti xyajnajtz'ane'miïyim. Jada huidibi Dios ti xyajnajtz'ane'miïyim huidibi miich ajcxy ti mbaatcixy, co oga'n ti nmībajccixy Jesucristo, copicy co ajcxy mnaychójcigixy mnayjihuiyigixy.

Yi jäy ajcxy huidibi anīdaaccixp

⁷ Com ji mayjäy ya naaxhuiñ huidibi huin'imb yi jäy ajcxy. Yi' ajcxy ti puhuäctüdy mībajcpidijc, yaj'ixpijcp

ajcxy co Jesucristo ca' ñayguëxici ya naaxhuiñ mīd ñinīcx. Jadayaabi jäy ajcxy yhuin'īmyb yhueñypinīty etz Jesucristo ymidzip'ajtyp ajcxy. ⁸ Naygüendi'ájtigix cī'm. Ix mgamijpīdaaccixy yi' ajcxy y'ayuc. Co ajcxy myajhuin'īngixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydüngixipy Jesucristo ytiy'ajt, huin'it mbāatcixipy tüg oy'ajt ca'pxy'ijby tzajpjoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy mīdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydunīb je Cristo y'ayuc ytiy'ajt, ymīd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp huidibi ca' ytiy'ajtity, ca' ajcxy mgöbiguipy ma mdijcīn, e ni ca' ajcxy mjijp'ixihipy. ¹¹ Com Dios yjāy pinjaty anajty jijp'ixiib je jäy ajcxy huidibi yaj'ixpijcp huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuiy ti jijptigixyñi ajcxy je huingbi ixpijcin huidibi ca' ytiy'ajtity.

Capxycíxin

¹² Oy ich ooy mij may miich ajcxy njamīdmiydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co cī'm nninīcx-aangixy jim, e nmīd miydägaangixy au'am jigix ajcxy ooy jotcuyc mnayjihuiyigixy.

¹³ Je mdzi' y'ung ajcxy huidibi ya yajpatcixp xya-jniguejxp ycapxocxin, je huidi ajcxy Dios nañ jadu'n ti yhuin'ijxigixy. Jadu'n ngapxycixyich mīd miich. Amén.

3 JUAN

1 Señor Gayo:

Nguejxypich capxpocxin ma miich. Iich miich nyajniguejxyp jada necy. Nnigohuajc'ajtypich ma je mibijcpidijc. Ooy ndzocy njihuixich miich.

² Miich migüg, ooy nmigüg'adyii. Dios nmibijctzooybich miid miich ycixpi, huen agujc jotcujc mdzinähuipy etz mmic'idipy m'oy'idipy. Nejhuixibich co oy m'ity ma Dios. ³ Com oy ti njotcugixich co je mibijcpidijc ajcxy ymiin ya huidibi jim tsoon ma miich ajcxy, e yi' ajcxy xytij'ajtmooyich jadu'n nej tiydudägy mdzinäy e nañ jadu'n nej yaxxon mguyduní Dios ytiy'ajt. ⁴ Ooy njotcújcidyich jac nigí co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuixich, ooy njäygidägyich co oyjäy'ajtin mduñ miid je migügtijc. Nigi oy co oyjäy'ajtin mduñ miid je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yaxxon jadu'n nej Dios jäygidägy. ⁷ Yi jadu'mbi jäy huidibi mguejxnaxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuixi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidity. Co jadu'n nbubejtim, chi jadu'n paady nej jihuixy tú'ciy nduunim miid yi' ajcxy ma Dios y'ayuc capxhuäcxii.

Je Diótfrefes yjibic-huinma'ñ

⁹ Ti nnijayixich jayhuin je mibijcpidijc huidibi nayyömyújcigixp jim. Jim yajpaady tüg jäy huidi xii Diótfrefes huidibi ca' cöbiga'ñich n'ayucich etz ngötújcínich. Amij agix jada jäy chachñayjihuiyii, yi' ci'm tzach'ane'mam ma miich ajcxy. ¹⁰ Paady ycixp

nnicxibich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótfrefes ytumyb, jadu'n nej jibic xyñigapxy xyñi'ojixich etz jadu'n nej anii yaj'ixpicy. E nañ ni yi' ca' mmidity jotcujc'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios miid ycixpi yhuidity. E co iich ajt nmigüg pinjaty yajjättäga'ñ, chi yi' capxaducy e yajpidizmy je mibijcp hidibi jäy yajjättäc, e ca' je' cöbiga'ñ ma miich mnayyöymujctac.

¹¹ Miich hermano, huidibi ooy ndzocy njihuixich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymiid Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuixi.

Je Demetrio tüg y'ixpejt oybi

¹² Yi jäy, huidibi yxii Demetrio, tüg'óciy jäy ajcxy ymi-naangixy co ooy y'oyjäyity, e janch yajpaady ma Dios ytiy'ajt. Iich nañ jadu'n nmına'ñich co ooy y'oyjäyity yi Demetrio, e miich mnejhuixyb co iich ajt ndiy'ajt janch janch yi'.

Capxycijxin

¹³ Ooy iich anajty miich mijcajee ayuc njayajmiidmiydäga'ñ. Per ca' nijayihua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmidmiydäga'ñich miich ajcxy ci'm.

¹⁵ Jotcujc'ajtcix. Yi mibijcpidijc ajcxy huidibi ya yajpatp yajnaxpy ajcxy capxpocxin ma miich ajcxy. Tun may'ajt yajnaxigich ngapxpocxin ma nmigügtijcich jim nidüg nidüg etz xiibety xiibety. Cham ngapxycixyich, Juan je Apóstol.

JUDAS

1 Ich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jébi mibijccixy yi' y'ayuc huidibi jébi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymiid. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuiygixy.

Yi' ajcxy huidibi yaj'ixpijcp anii

³ Miich ajcxy migügtijc huidibi ooy ndzocyich njihuiyich, miid je nidzoocin ycixpi miid ajt n'alma huidibi miich ajcxy etz ich cham nmüd'ajtim, ooy chachycopicity co nijayihuibich miich ajcxy miid yi' mibijcin ajcxy ycixpi, e ngohuaniiyb ajcxy co jébi mic m'ijtcixy ma ajcxy yi' mibijcin e ca' m'ixtigihua'ccixy ma yi' ayuc tiy'ajt huidibi Dios yejc ma tüg'óciy naax-huiñyäj. ⁴ Naagity jäy ajcxy ti ytigiygixy ma miich ajcxy ayüch ameech miid anii. Jecy'ajty Dios tiy'ajt yejcy ma yi' y'ayuc co yi' jadu'mbi jäy tigoyam ajcxy y'alma miid ypocy ycixpi. Hue' yi' ajcxy jibic jäy huidibi ca' huindzigiygixy Dios. Anii daacp yi' ajcxy co ymi-naangixy co Dios ti xypa'ayoohuim etz ti xyhuin-meexim ajt nbocy paady ycixpi jébi nduunim huen tijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy ich ajt nHuindzin Jesucristo.

⁵ Oy miich ajcxy ti mjanejhuیداایgixy jada tiy'ajt, per nyajjäy metzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'ax-am tzaachytuuñ miid o'cin je huidibi anajty ajcxy nijëjity ca' ymibijccixy. ⁶ Je angeles huidibi ajcxy ca' yhuim'y ma Dios ytung huidibi ajcxy capxycömidodacy Dios, y'ixmajztay ajcxy y'it chinaydac. Dios je' cham miid'ajtp ajcxy ahuing. Mach ajcxy y'ity agoodztuuby huinixii huinitempo ixti cooni je mij xii anajty Dios ti yajhuaad'aty, mina anajty tiyduna'ñ naaxhuiñyäj ajcxy miid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuydungixyp ñinicx chojcin, naygëyejci ajcxy ma je jibic-huinma'ñ. Yëdijctijc ytundigooygixy miid huingbi yëdijc. Je' jadu'n huim' ixpejt ma tüg'óciy jäy co je tzaachyp ajcxy paatcixy.

⁸ Jim yajpaady ma miich ajcxy jäy huidibi nejhuüy co Dios jecy'ajty tzaachytuuñ angeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinicx miid pocytunii. Jijpcogapxiygixy je Dios ycotujcin, nigapxcixy ni'ojiiygixy je huidibi ajcxy Dios mooyip mij'ajtin. ⁹ Je ar-

cángel, Miguel, je ángel huidibi mij'ane'min miid, co anajty ychiptuñ miid je mujcu', yajcapxyoongixy yaj'ayucyoongixy je Moisés ñinicx, ca'p je' miid'ajty huinma'ñ nicxy yajpocycäy je mujcu' miid nay'ojii. Jëyi janch co ñimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuüyigixy. Tügiiyb ajcxy yhuinma'ñ miid iyujc animal yhuinma'ñ, etz iyujc animal ca' ajcxy miidity huinma'ñ tiydudägyi. C'i'm jada jäy ajcxy ñayyajhuinma'ñy-digóoyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypii mijcajee miid pocy ycixpi com je' yi' ajcxy ypadumyby nej Caín y'idiich. Miid co meeñ tzach'adzojccixy, paady ñiidigooygixy ytüdigoooygixy jadu'n nej Balaam ñiidigoy ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucijpco-gapxiyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügumucy miid yi' ajcxy, e jadu'n ixpejt yejccixy co mnaychöjcgixy. Caaygixp uuccixp tügumucy miid miich ajcxy agujc jotcuyc per ni ca' ajcxy miidity huindzigiiñ miid ymigügtijc. Jadu'n ajcxy nipaady nej cöbixycuend'ajtpi huidibi c'i'm ñaygüend'ajtigixyp, e ca' tungixy cuendi je cöbixy. Jadu'n ajcxy nej joc huidibi ca'pi nii miidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyii, jayijp y'ocniicxy, e chi jada ytiich, e ytimypidigy miid ñidictz. ¹³ Yi' ajcxy ytundigoyii ooy cho'ydu'n yecy, tim jadu'n nipaady nej je mejy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huinitempo, mij'agootztuuyb y'idipy ajcxy.

¹⁴ Nañ jadu'n Enoc, je mihuixtucjcp co anajty Adán ti yjayijp'aty, yminañ co Dios yhuinma'ñymooyi miid jada ycixpi, e yminañ: "N'ijxich je Huindzin Dios co anajty ymiiñ miid janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naax-huiñyäj miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy miid yjibicjäy'ajt etz miid jibic ayuc tiibi miid nigapxcixy ni'ojiiygixy Dios." ¹⁶ Jada jibic jäydijc ca' ajcxy ni ti mijotcuyc'ajtcixy, ooy nigapxcixy ni'ojiiygixy ymigügtijc. Jëyi ajcxy yci'm jotcuyc'ajt ixtaaygixy. Ycapxcixy amij agix. Ooy oy nigapxcixy nijëjity jäy miid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huidibi ich ooy ndzocy, jäymejtzcix je ayuc huidibi jëcyip ti najtzcapxiygixy je

Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: "Ma anajty xii tiempo ycixaani, ji'adip jāy ajcxy huidibi nixigipy yaxigipy huidibi Dios yje'ajtpy, e chináaygixipy jadu'n nej yi' ajcxy ci'm tzach-nijot'ajtcixy jibic-huinma'ñ." ¹⁹ Je' ajcxy yajnaybijc-huäcxib mibijcpidijc co ca' ajcxy mĩdity je Dios yjihui'ñ ymic'ajt.

²⁰ Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtzcix mibijctzoogix Dios miid je Espíritu Santo ypubejtin. ²¹ Naygüend'ájtigix jigix jēbi Dios xychojcixy xyjihuiygixy ajcxy, e ahuijxcix je xii mina anajty iich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ay-oohuim.

²² Capxjotcidaaccix pinjaty ca' ti mijpidägy janhypidägy. ²³ Yajmĩdmiydaaccix jacjadyii migügtijc jigix ajcxy jēb paatcixy nañ jadu'n nĩdzoocin miid ajcxy

y'alma. Jadu'n anajty paady nej jihuiy myajpidzimgixy jijnjoty. Yajtungix pa'ayo'n miid jacpinjaty pocytumbi. Naygüend'ájtigix ma yi' ajcxy ypocytunñ, ca' mbocytungixy nañ jadu'n. Jadu'n yi' ajcxy ypocytunñ nipaady nej huit huidibi ti yjibicci'y.

Judas capxcixy miid je' ymigügtijc

²⁴ Je Dios tügpajcpi, je Dios huidibi xyajnidzoocim ajt n'alma, je huidibi yajtaayb ñejhuiydaayb, ymiid je' mic'ajt etz cötujcin jēbi miich ajcxy xycuend'adipy jigix ca' mbocycägixipy, etz je' ymiid mic'ajt jigix jēbi xyaj-ja'tcixy agujc jotcuyc ma Dios yhuinduu, ma yi' yaj-paady miid y'oy'ajtin ymij'ajtin ca' ti mbocymĩdity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tiiyip etz cham etz huinixñ. Amén. Jadu'n ngapxcixyich.

APOCALIPSIS

1 Jayhui'my ity ma jada necy je Jesucristo y'ayuc ytiy'ajt huidibi ca' pin nejhuiy huinjihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ixy Juan jada y'ayuc etz ijxpejt. **2** E Juan yejcy tiy'ajt janchypí tüg'óciy jadu'n nej anajty ti huin'ixy ti huinmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüiyi.

3 Janch jotcujc je' pinjaty capxp jada necy etz pinjaty mido'mbijc jada Dios y'ayuc huidibi Juan nidiy'ajtpy etz ñajtcapxiiyb. E jotcujc je' pinjaty cuydumb tüg'óciy huidibi jaybety ma jada necy, com je xii je tiempo huin-gooniñ je' mina ytuna'ñyii yjada'ñyii.

Juan nijayiiy huixtujc'itpi mibijcpidijc

4 Ich Juan nijayiiybich yam je mibijcpidijc huixtujcpi-cypí huidibi yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcujc'ajtin. Dios je' huidibi cham ijtp, je huidibi jecy'ajty ijtp, etz je huidibi miinaamb. **5** Huen Jesucristo may'ajt oy'ajt tunipy miid miich ajcxy etz xymóoygixipy jotcujc'ajtin. Jesucristo je' huidibi tiydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcin xyjihuiyim, ti xyñihuaanim miid ñi'py ma je tzaachypí huidibi mihuaad'ajtim miid ajt nbocy ycixpi. **6** Jesucristo ti xycötujcmooyim etz ti xytungmooyim miid Dios Teedy, huidi yi' yteedy'ajtpy. Jadu'n ich ajcxy ndung etz ngötujcin nipaady nej je tung etz cötujcin huidibi reydiyc etz teedytjyc ajcxy ymiid. Huen Jesucristo y'idipy cömay huinixii huinitempo etz huen yi' y'ane'min cötujcin y'idipy huinixii huinitempo. Jadu'n jada. Amén.

7 Cuendtungix ich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huidi-jaty Cristo yaj'ayoo yajtzaachypijc. Tüg'óciy naaxhuiñyjäy yjihuihua'ñ yäxa'ñ ytaja'ñ ymaya'ñ miid je'ycixpi. Jadu'n jada. Amén.

8 Jadu'n je mijpi Dios huidibi tüg'óciy mic'ajt miid ymi-na'ñ:

—Ich je' huidibi yajtzondacp je naaxhuiñybi, je tzajp etz je huidibi jaccogixiiyb. Jadu'n ich nej letra A huidibi

yajzondacp je alfabeto etz je letra Z huidibi cogixiiyb ma je alfabeto. Ich je' huidibi cham'ijtp, etz huidibi jecy'ajtpy ijtp etz huidibi miinaamb.

Juan ijxy yi Cristo oybi ymijity

9 Ich Juan, miich ajcxy mmigüg, quipxyi miid miich ajcxy nminaxy nyajnaxyich ayo'n tzaachypí. Quipxyi miid miich ajcxy ndzinäyich ma Dios y'ane'my. Etz quipxyi miid miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuüiyim. **10** Jadu'n tügte-cy ti njatyich, hue' anajty tüg domingo xii co ich Dios n'ojadajtyich, e Dios yjihui'ñ ymic'ajt ti anajty xymi-madactayich njot nhuinma'ñich. Chi nmidooyich jix-c'ipy'amy tüg'óciy mic capx, jadu'n yi' ycapxin nmidooyich nej tüg trompeta yxüxy. **11** Chi je' huidibi xymi-gapxpich anajty ymiinañ:

—Ich je' huidibi yajtzondacp etz je' huidibi yajcogixiiyb tüg'óciy tijaty ya naaxhuiñybi etz tzajpjoty. Jadu'n ich nej je letra A huidibi yajtzondacp je alfabeto etz je letra Z huidibi yajcogixiiyb je alfabeto. Cojaay miich ma tüg libro huidibi mhuiñ'ijxyp, e quex je necy jim Asia naaxjot ma je huixtujc picypi mibijcpidijc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

12 Chi n'ijxhuimbityich n'ixa'ñich pin ich anajty xymi-gapxpich. Co nnayjii'ixich, huin'it nhuin'ijxyich huixtujc candelero ac tim oori. **13** E cujc'amy ma je huixtujc candelero nhuin'ijxyich tim jadu'n nej je jäy huidibi tzoon tzajpjoty (je Cristo), yxoxyity miid tüg huit yjädy anajty mabaad ytecy, e yhuiñity ma ycaach miid tüg oorihuñ. **14** Yi' ycohuajc etz ycohuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jiiñye'n. **15** Je' ytecy tim jadu'n nej latón huidibi janch oy, nej jihuiy jiiñjoty ornojoty yam ypidzimy. E je ymiydaacin janch mic, tim jadu'n nej canaag mijniñ y'a'ñich y'agimimy. **16** E ymiid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjijpity. E yhuiñyijp jadu'n anajty nej xii janch mic y'añ.

17 Co je' nhuin'ijxyich, chi janch ögy oy ngidägyich ma ytecy ymijc, chi xycñixajtyich miid y'a'oygi', chi xyñi-maayich:

—Ca' mdzigäy; ich je' huidibi jayijp'ajtp ya naaxhuiñ etz tzajpjoty etz ich je' je' huidibi cogixiihuamb. **18** Jucy'ajtpich; ti n'ögyich, e ti njugypicyich jadüg'oc, e ju-

gy'adipich huinixii huinitiempo. Nmüidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuüy nmüididyich je öcpi it ahuaazti. ¹⁹ Cojay cham tijaty mhuin'ijxpy mhuinmi-dooyb, jadu'n nej huidibi tunaanip jadaanip jadachambi xii tiempo, etz huidibi tunaanip jadaanip jacjiini. ²⁰ E jadu'n yhuimbidezimy je tiy'ajt janchypi huidibi ca' pin nejhuüy maabi je huixtujcpi madza' tiibi mhuin'ixy ma iich n'a'oygi', etz je huixtujcpi oricandelerero. Je huixtujcpi madza', je' je' je ángeles ajcxy huidibi cogapxy'ajtp müid Dios ycixpi ma je huixtujcpi cypi müibijcpidijc. E je huixtujcpi candelero huidibi ti m'ixy, je' yi' je huixtujcpi cypi müibijcpidijc.

Je ayuc huidi yajmoy yi müibijcpidijc jim Efeso

2 Nijayi' miich je ángel huidibi cogapxy'ajtp jim ma je huidibi ajcxy mübijcp jim Efeso: "Nima' ajcxy co jadu'n yminañ je huidibi huixtujc madza' müid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² Ich nejhuüybich tüg'öciy ti miich ajcxy mdumyb, jadu'n nej mictägy mdungixy ma Dios ytung, etz jadu'n nej mmimecxtujcixy migügtijc. Nejhuüybich co ca' m'ocmimecxtugaani ajcxy jibicjäydijc, e ti m'ijxmajtzcixy je ajcxy huidibi naydijp co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuüy co ajcxy ooy y'anüdaacixy. ³ Nejhuüybich co ooy ayo'n mij miich ajcxy mminajxcixy myajnajxcixy müid ich ycixp, etz ooy mij mecxtujcjin ajcxy myajtungixy, etz ooy janch mic mdungixy müid ich ycixp, e ca' ti mmidzjipigixy ich ndung. ⁴ Per nejhuüybich ma miich ajcxy mdundigoy. Ca' miich ajcxy xyajmij'atyich mijcajee, jadu'n nej anajty xya-jmij'atyich ajcxy mijcajee co oga'n ajcxy mübijcy. ⁵ Müid jada ycixpi jäy Metz miich ajcxy ma oy m'agänajxcixy. Jothuimbijtcix, e tungix nej anajty m'octungixp co oga'n ajcxy mübijcy. Pen ca' ajcxy jadu'n mdungixy, chi tzojc nécxibich ma miich ajcxy, chi huingbi nbidägiybich ma miich ajcxy xyjapaady, tim jadu'n nipaady nej jihuüy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinma'n. Nej je nicolaítas ajcxy ytungixy, miich ajcxy ca' mjäygidaacixy e nañ jadu'n ich ca' njäygidägyich. ⁷ Pinjaty ytädzac müid huen amido'ity nej je Espiritu Santo ymina'n ma je mübijcpidijc huidibi yajpatp xi ya. Pinjaty madacp ma ymübijcjin, ich yi' nmöhuipy tzi-naayin jugy'ajtin ma Dios y'ane'my, jaydeb jotcuyc chinähuipy ma Dios y'it, jadu'n nipaady nej jihuüy ajcxy jicxy je quipytim ma Dios y'it huidibi jugy'ajtin yejcp."

Je ayuc huidi yajmoy yi müibijcpidijc ajcxy jim Esmirna

⁸ Nijayi' je ángel, je cogapxy'ajtpi huidibi yajpatp ma je mübijcpidijc jim Esmirna: "Jadu'n ymina'n je huidibi yajtzondac je naaxhuiñybi etz tzajp etz huidibi cogixhuip, je huidibi o'c e yjugy'aty jadüg'oc: ⁹ Ich nejhuüybich tüg'öciy ti miich ajcxy mdumyb. N'ijxcajpyich

nejhuüybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuüybich co ayoob jäy miich ajcxy, per müid miich ajcxy Dios y'oy'ajtin, e jadu'n nipaady miich ajcxy nej comeeñydijc. Nejhuüybich co nijëjity jäy miich ajcxy xyñigapxyp xyñi'ojüyb. Naydijyij ajcxy co yjudiojäyity, e ca' yjanchity. Hue' ajcxy müid y'ijtcixy je mujcu'. ¹⁰ Ca' ni ti mdzigixy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xyajpujxtijccähuamb, m'ocyaj'ijxmadzangixy pen janch miich ajcxy nidüg'öciy myajpatcixy ma Dios. Jadu'ny' miich ajcxy m'ayohuipy majc xii. Ijtcix tudägy mabaad ajcxy m'öccixy. E ich miich ajcxy je jugy'ajtin huinixiibi nmöhuipy jadu'n nej premio co ti mmadaacixy ma mübijcjin. ¹¹ Pinjaty müid ytädzac, huen mido'mbijccixy nej je Espiritu Santo nimäy je pinjaty mübijcp Dios. Pinjaty mimaacp cuyduñ Dios y'ayuc ytiy'ajt, ca' je' y'alma ayohuipy ayoodactuuyb, ca' y'öga'n mimejtz'ocpi."

Je ayuc huidi yajmoy yi müibijcpidijc jim Pérgamo

¹² Nijayi' je ángel huidibi cogapxy'ajtp jim ma je mübijcpidijc ajcxy jim Pérgamo: "Nijayi' je ayuc co jadu'n yminañ je huidibi y'espada müid mejtz'adu'm'amyb yjijpity: ¹³ Ich nejhuüydaaybich jadu'n nej miich ajcxy mdzinaaygix mjogy'ajtcix. Nejhuüybich co miich ajcxy mdzinaaygixy mjogy'ajtcixy ma tüg cajp ma je mujcu' y'ane'my. Per müijtyñi je nxijich, e ca' m'ixmach je mübijcjin ma ich. Ni mga'ixmajch je mübijcjin je huin'it xii co Antipas yaj'o'ci jim ma miich ajcxy, tüg ich nmügüg, je tudägyti testigo, jim je' y'o'cy ma mujcu' chinäy. ¹⁴ Nmüidich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'n je Balaam y'ixpijcin, je huidibi yaj'ixpijc jecy'ajty co huen jicxcixy je huidibi anajty tzaadzech quipychech ti yajhuindzigiygixy. E nañ jadu'n yaj'ixpic co huen tundi-gooygixy müid huingbi töxyjäy. ¹⁵ Nañ jadu'n miich ajcxy müidity nije' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi ich ca' ndim'ixa'nich. ¹⁶ Paady jothuimbijtcixy miich ajcxy, yajtigajtzni ajcxy mjot mhuinma'n. Pen ca' jadu'n mdunipy, nécxibich jim tzojc ma miich ajcxy. Chi jada' ndziptunipyich müid yi' ajcxy huidibi midundigooyb ich ngötujcjin huidibi ngapxpich. Ich n'ayuc jadu'n nipaady nej espada. ¹⁷ Pin ytädzac müid, huen mido'mbicy je ayuc huidibi je Espiritu Santo ñigapxyp ma je huidibi ajcxy Dios y'ayuc ytiy'ajt mübijcp. Pin jada tiydudägy mimadacp cuyduunni Dios ytiy'ajt, ich yi' nmöhuipy oy'ajtin huidibi Dios yjé'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n ich yi' nmöhuibich tüg pi'cpoobtzaa, e ma je poobtzaa jim yjaayity tüg xii jemybi huidibi ca' ni pin ijxcabipy, jëyi janchtiy ijxcabip je xii pin anajty cöbijcp je tzaa."

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huídibi cogapxy'ajtp ma je mibijcpidijc jim Tiatira: "Nima' ajcxy, jadu'n je Dios y'ung ymina'n, je huídibi yhuin miid jadu'n nej jihuüy jñnye'n, e ytecy jadu'n miidity nej bronze tiibi ytoy-huäch ma jñin: ¹⁹ Jadu'n yi' ymina'n: Nejhuüybich tüg'óciy ti ajcxy mdumyb. Nejhuüybich jadu'n nej miich ajcxy mijcajee myajmij'ajtcixy Dios etz mdzocjixy mjihuüygixy ymigügtijc; jadu'n nej mmibijccixy mmijpi-daaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcín ma mdzinaayín; etz nejhuüybich co cham nigí mdungixy ma Dios ytung, ca'ydi jadu'n ajcxy nej myajtzondacy. ²⁰ Ji tüg huídibi miich ajcxy mdumyb huídibi ñch ca' n'oy'ixyich. Mdzachmimexctujccixy yi töxyjäy Jezabel huídibi naydijp co ycapxyp Dios y'ayuc e ca' yjanchity. Je' yajñidigooyb yajtüdigooyb ñch ndumbi miid anñ. Jadu'n je' ymina'n co jëbi huingbi töxyjäy migapxtigooygixy e co jëbi caaygixy jñcxcixy je huídibi ajcxy yajhuindzigiüyb quipychech tzaadzech. ²¹ Ti ñch je Jezabel nmöy tiempo co ixypy yjothuimbity, per yi' ca' ixmadza'n yjibic-huinma'n. ²² Jadachambi nyajcähua'ñich je Jezabel cijx'am miid pa'm, e jadu'n ajcxy nmöhua'ñich ayo'n je yëydijc ajcxy huídibi miid chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'n huídibi je Jezabel ymiid. ²³ E nyaj'öctähuibich tüg'óciy ajcxy pinjaty panixp cixyjot huinijot je Jezabel y'ixpijcin jigix nidüg'óciy je mibijcpidijc ajcxy nejhuüy-dähüpy co ñch je' nejhuüydaayb tüg'óciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii miich ajcxy jim Tiatira ca' mbanixcixy mbayöygixy Jezabel y'ixpijcin, e ni ca' mmijpidaaccixy huídibi ajcxy ytiipy mujcu' y'ixpijcin huídibi tzip huinjihuüyb. ñch miich ajcxy nimaayb co ca'p ñch miich ajcxy huingbi ixpijcin njacmóoygixipy. ²⁵ Mij'ajtcixy je Dios ytiy'ajt huídibi miich ajcxy miid, ixti cooni anajty nhuimbityich. ²⁶ Pin madacp ma ymibijcin etz pin cuydumb ñch ndiy'ajt mabaad anajty je' y'ögy, ñch je' nmöhuibich je cötujcín, jaydeb ane'my naaxhuiñyäjy ajcxy. ²⁷ ñch je' nmöhüipy je ane'min cötujcín ma naaxhuiñyäjy huídibi Dios Teedy, ñch nDeedy, ti xymöyich. E je' ane'mipy miid Dios ymic'ajt. E je' yajhuindigoydähüpy naaxhuiñyäjy y'ane'min, tim jadu'n nej jäy püy pochtu'tz miid pujxtajc. ²⁸ Nañ jadu'n ñch je' nmöhüipy ñch nmic'ajt huídibi nipaady nej je madza' jayhuixtujc. ²⁹ Pin ytädzac miid, pin midoohuamb, huen midoy nej je Espiritu Santo ymina'n ma yi mibijcpidijc nidüg'óciy."

Je ayuc huidi yajmoy yi mibijcpidijc jim Sardis

3 Nijayi' je ángel huídibi cogapx'ajtpi ma yi mibijcpidijc ajcxy huídibi yajpatp jim Sardis: "Jadu'n ymina'n je pin miid je huixtujcpi Dios y'espíritu, huídibi miid je huixtujcpi madza': ñch nejhuüyb ti

mdumyb. Nejhuüybich co cömay ajcxy m'ijtcixy co mmidity yjugy'ajtin huinixiibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huídibi ajcxy mjacmiidity. Ti ñch n'ixy co huídibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtz-cootcixy je Cristo ytiy'ajt je tiibi m'ixpijccixy, je tiibi mmidoogixy. Panixcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy jadu'n nej tüg meetzpi, ni mganejhuüygyixipy anajty nnicxyich. ⁴ Miich jacmiid-ni mibijcpi ajcxy jim Sardis huídibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy miidity poob huit huídibi ca' yjibicüy. Yi' ajcxy xymid'idipich miid huädz jot huädz huinma'n, tim jadu'n nipaady nej ypoob huit ajcxy miidity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymiid'adipy ajcxy je huätzpi jot huinma'n, huídibi jadu'n nipatp nej poob huit ajcxy miidity. E ni ca' ajcxy yxii yajjödzip ma je libro ma ycojaayity je tudägyipi jäy ajcxy yxii. E ñch yi' ajcxy ngapxquëxcccixy yxii ma nDeedyich yhuinduu, e nañ jadu'n ma nDeedyich y'ängeles yhuinduu ajcxy. ⁶ Pin midoohuamb, pin ytädzac miid, huen midoy nej je Espiritu Santo ymina'n majaty je huídibi ajcxy Dios y'ayuc ytiy'ajt mibijcip."

Je ayuc huidi yajmoy yi mibijcpidijc jim Filadelfia

⁷ Nijayi' je ángel huídibi capxy'ajtp ma je mibijcpidijc jim Filadelfia: "Jada ayuc tiy'ajt ñgapxyp je tügpajcpi huätzpi, tügpajcpi janchypí, huídibi ane'my Dios yjäy jadu'n nej David ane'my Dios yjäy jecy'ajty. Je huídibi yaj'ahuatp e co yaj'ahuäch ni pin ca' huaad yaj'aducy. Je huídibi yaj'adujcp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'ñich: ñch nejhuüybich nej mdungixy. Ti nyecyich mic'ajt ma miich ajcxy huídibi nipaady nej tüg tigiydac ahuätzpi ma miich mhuinduu, huídibi ni pin ca' huaad yaj'aducy. Nejhuüybich co hueeni Dios yjihu'iñ ymic'ajt miich ajcxy miidity. Per ti mguydungixy ñch n'ayuc, e ca' nxijich xycoyützi. ⁹ Cuenditungix nej nmina'ñich. Yi' ajcxy huídibi mijpidacp Satanás y'ayuc, je huídibi anñ-dacp ajcxy co ñaydijgixy judíojäy, e ca' yjanchity. ñch yi' ajcxy nmimadägibich jigix yi' ajcxy miich xyhuingo-jxtinähuipy xyajmij'adipy. E chi nejhuüy ajcxy co ñch miich ajcxy ti ndzocy. ¹⁰ Miid co ti myajtungixy mecxtujcín ma mdzinaayín, ti mguydungixy ñch n'ayuc n'ane'min. Paady ñch nihua'ñip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xii je tiempo mina je mujcu' jot'ixipy huinma'n'ixipy tüg'óciy je mayjäy huídibi yajpatp ya naaxhuiñ. ¹¹ ñch tzojc nnicxa'ñich jñby naax-huingíxy. Mij'ajtcixy yi' Dios y'ayuc huídibi miich ajcxy miid jigix ni pin xycapijcp ajcxy mbremio, huídibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, ñch yi' nbidägibich mij'ane'mbi ma ñch nDios y'it, jadu'n yi' nipaadip nej

tüg pilar huidibi midinaayb jemxypi ma Dios ytijc. E yi' ni camina ypidzimipy ma Dios y'it, e njayiyibich ma yi' ñinix ñich nDios yxi, e nañ jadu'n njáayibich je ñich nDios ycajp yxi, je Jerusalén jemybi huidibi tzoon tza-jpoty ma Dios yajpaady. E nañ jadu'n njáayibich nxii jemybi ma yi' ñinix. ¹³ Pín ytádzac miid huen midoy ti je Espíritu Santo ñigapxyp ma tüg'óciy je mibijcpidijc."

Je ayuc huidi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: "Jadu'n ymína'ñ je huidibi janchip tudägyip, je huidibi tudägy yecp Dios ytiy'ajt e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ: ¹⁵ Nejhuiybich nej mdungixy. Nejhuiybich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej ñi' huidibi ni ca' ytichity, e ni ca' y'anity. Jac'oy ixypy co ooy mij mmibijccixy, o co ca' ixypy mdimmibijccixy. ¹⁶ Miid co tim yinjaty tim huenjaty ajcxy mmibijccixy, ca' ooy mmibijcin ymijty ajcxy, e ni ca' ajcxy mmibijcin ytigoydaaygixy, miid jada ycxpi ñich miich ajcxy njjpcogapxihuipy miid je ndzip n'éjcinich, tim jadu'n nej jäy ajcxy ixtzujy huidibi y'ahuac yca'tzojcpy. ¹⁷ Miich ajcxy mánamb co ooy ajcxy mgomeeñity, ooy ajcxy mij mdzinaayin mjuy'ajtin mmidity, e ca' ti ajcxy myajmayjajtcixy, e ni ca' miich ajcxy nejhuiygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi nihuadz ixhuadz huidijtp. ¹⁸ Paady ñich miich ajcxy nimaaygixy co copicy ajcxy mbaadip ma ñich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huadz oori ma ñich, huidibi ti y'oybidzimy miid jin jigix mgomeeñ'ajtcixip. Nañ jadu'n ñich miich ajcxy nni-maaygix co copicy ajcxy mbáatcixip pocyhuinmeecxin ma ñich, huidibi jadu'n nipaady nej jihuüy huit oyjatypi poopjatypi mjuuygixy ma ñich, jigix mxóxcixipy mn-inix ca'ydi tzo'ydu'n mbáatcixipy. Nañ jadu'n ñich miich ajcxy nni-maaygix co mbaadip tiy'ajt ma ñich nlibro, huidibi jadu'n nipaady nej jihuüy huindzooy mjuuygixy, jigix mdzoydúngixipy huin e huin'it ajcxy m'ijxcixipy huadz. ¹⁹ N'ojpich etz ndzaachtumyb tüg'óciy pinjaty ndzojcpyich njihuüyibich, paady ycxpi miich ajcxy mhuindina'mjijptina' mic ñich ndiy'ajt etz jothuimbijtcix nej mbocytungixy. ²⁰ Cuenditungix nej cham nni-maaygix. Jadu'n nipaady nej jihuüy ndinayich ma nidüg nidüg jäy ytijc'aguu e ngojxnojcih ajcxy ytijc agi'. Nbijctzooybich co xyajtigihuibich ajcxy ma ytijcin. Pin-jaty xyoöcmidoobich, e yaj'ahuäch ytijc, tigihuibich ma yi', e cayipich miid yi', e yi' miid ñich. ²¹ Pinjaty cuydundaayb Dios y'ayuc ytiy'ajt, ñich je' nmöhuipy it lugar tzejpoty quipxyi miid ñich ma ñich n'ane'mdac. Ti nguydundaayich Dios y'ayuc, e nmíidich it lugar ma ñich nDeedy y'ane'mdac, paady ycxp jébi nmöhuibich miich ajcxy it lugar ma nyajpaadyich. ²² Pín ytádzac miid, pín midoohuamb, huen midoy huidibi je Espíritu Santo ycapxyp majaty mibijcpidijc huidibi canaagpicy yajpatp."

ñibaatcixy capxpaatcixy yi Dios huidibi tzejpoty tzi-naayb

⁴ Co jada jadu'n yjajti, chi nhuindixyich tzejpoty, e nhuin'ijxyich tüg tijc aguu ahuadz jiiby tzejpoty. E nmidooyich tüg ayuc janch tim jadu'n nej tüg trompeta yxüxy huidibi ñich anajty jayijp ti xy'ocmi-gapxpi, xyñimäyich:
 —Pet ya ma ñich, cham nyajni'ixihua'ñ tijaty copicy tunaanip jadaanip co anajty jadayaabi xi tiempo ñaxy.
² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jiiby tzejpoty. E ma je ane'mdac jim anajty tüg iñäy. ³ E je huidibi anajty jim iñaayb ma je ane'mdac, jadu'n anajty yquëxgy nej tüg tzaa janch oybi janch adixcp. E jühuidity ma je ane'mdac je Dios yhuätz'ajt quëxgy nej tüg i'ñich janch oycolor huidibi janch adixcp nej tüg tzaa tzuxjatypi. ⁴ Nañ jadu'n jühuidity ma je ane'mdac jiiby anajty iipx madaax silla, e ma je silla iñäy iipx madaax mijjäy, ac poob huit miid. E ymiid anajty ajcxy ma ycohuajc coroní ac tim oori. ⁵ Ma je ane'mdac anajty ypidzimy huidzuc, e ooy anajty enee yjidijtin ñe'my. E ma je ane'mdac huinduu jiiby anajty Dios yjihui'ñ ymic'ajt je huixtucpi, huidibi quëxg nej huixtuc tzinhuaty huidibi ooy mic ytixy. ⁶ E je tigot ma je ane'mdac huinduu jadu'n quëxgy nej vidrio mejy, janch huadz janch adixcp.
 E cujc'amy jühuidity ma je ane'mdac midaax iyujc huidibi miid mayhuin jahuinduuy jajxcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midügigpi tim jadu'n anajty yhuifnyjip nej jäy. Je mimadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymiid anajty ajcxy nidüg nidüg tudujc yqueec, e ymiid anajty ajcxy yhuin queecnigixy etz queecpa'tci'py. E ca' anajty ajcxy ypocxy xim tzuum, chachmínaangixy:
 Santo, Santo, Santo, je Huindzin Dios huidibi tüg'óciy nejhuydaayb, huidibi tüg'óciy mic'ajt miid, je huidibi anajty jil'ajtp, je huidibi cham jil'ajtp, etz je huidibi miinaamb.
⁹ Je iyujc ajcxy huin'igixy etz huindzigiygixy etz yajmij'ajtcixy Dios, etz yajnajcixy Dioscojuyipy ma Dios je huidibi anajty iñaayb ma je ane'mdac, je huidibi tzi-naayb jugy'ajtp huinixi huinítempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjäy ycojxtinaydaaccixy ma je' yhuinduu huidibi anajty iñaayb ma je ane'mdac. E ooy anajty huindzigiygixy je huidibi tzi-naayb huinixi huinítempo. Pidaaccixy anajty ajcxy ycorona ma je' yhuinduu, cham chachmínaangixy:
¹¹ Miich, ñich ajt nHuindzin, ñich ajt nDios, miich mihuaad co mmidity tüg'óciy oy'ajtin mij'ajtin etz mic'ajtin, mihuaad co miich nyajcomayip, mihuaad co miich miid'ity tüg'óciy mic'ajt etz mij'ajtp. Jadu'n miich mihuaad, com miich ti myajcojy, ti myaj'abadxy tüg'óciy huidibi jil'ajtp. Com miich jadu'n ti mdzocy, paady ycxpi tüg'óciy tijaty jil'ajttäy.

Je libro etz je Dios y'ung, je Cordero

5 Chi jada' nhuin'ijxyich ma je huidibi anajty ifñaayb ma je ane'mdac mīdity anajty ma y'a'oygi' tūg li-bro abugucy, yaayity jotjoty'amy etz nigixy'amy, yco'aducyity mīd huixtujc selli. ² Chi nañ jadu'n nhuin'ijxyich tūg ángel huidibi mij cōtujcīn mīd, yajtiy mīd ycapxīn janch mic:

—¿Pin jada' janch tudāgyip co yaj'ahuādzip jada libro etz migādzydāhuipy yi ysellī?

³ Ni tzajpjoty, ni naaxhuiñ, ni naaxpa'tci'py ycacá'ty pin tudāgyip huidibi mīhuaad je libro co yaj'ahuādzip, o oy nigoodi'ajty ja'ixaanip. ⁴ Ich janch yaaxpich mīd tajīn mayīn anajty, com ca' anajty yajpaady pin je libro mīhuaad co yaj'ahuādzip, o oy nigoodi'ajty huindīcxip.

⁵ Chi nidūg je mijjāy xyñīmaayich:

—Ca' myāxy. Chi je' je mic'ajt mīdpi ma yi judíoja, je David y'ap y'oc huidibi nipatp nej tūg ama'ycaa, yi' ti mīmadactāy tūg'óciy jibīcpi. Yi' mīhuaad yi libro yaj'ahuādzip, etz miguejyidāhuipy je huixtujcpi ysellī.

⁶ Chi nhuindicxpejtyich, e agujc'amy ma je ane'mdacīn, etz agujc'amy ma je midaaxpi iyujc, etz agujc'amy ma je mijjāy dīc ajcxy, jīm anajty ytināy je Dios y'ung, je Cordero. Ooy anajty ñiguēxgy chaachē'au nej anajty ayo'n tzaachypī ti yajnaxy. Ymīd anajty huixtujc ymu'n, e huixtujc yhuīn, je' je' je huixtujcpi Dios yjīhuī'ñ ymic'ajt huidibi yquejx huīndu'my naaxhuiñ. ⁷ Chi je Cordero, je Dios y'ung, ninīcxy je huidibi anajty ifñaayb ma je mij'ane'mdac, e chi oy ciychoy je libro huidibi je mij'ane'mbi anajty ymīd ma je a'oy'amybi yci'. ⁸ Co je' anajty ti cychoy je libro, chi je mīdaaxpi iyujc etz je iipxmīdaaxpi mijjāy ycojxti-nay'ahuyday ajcxy ma je Dios y'ung, je Cordero, yhuīnduu. Ymīd anajty ajcxy nidūg nidūg y'arpa etz oori copī ujtzy mīd poom, je' je' anajty nipaady nej ajcxy chajpcapxy capxy je huidibi ajcxy mībijcp Dios. ⁹ Janch y'īyb anajty ajcxy iy jemybi, ymīnaangixy:

Miich mīhuaad co mgīygy yi libro, e mmiguejydaayi je huixtujcpi ysellī. Com miich ti myaj'ōgyii, ti mgojuy jāy ajcxy ypocy ma Dios mīd mgī'mni'py. Ti mgojuy ma Dios nidūg'óciy jāy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciōnity.

¹⁰ Miich ti xymóoygixyich ane'mīn etz je tung mijpi nej huaad ich ajcxy n'ojadajtcixy nmībijctzoogixy Dios, jigix jēbi ich ajcxy n'ane'mgixy yi naaxhuiñy jāy etz n'ojadajtcixy nmībijctzoogixy Dios mīd jāy ajcxy ycixpi.

¹¹ Chi ich oy nhuin'ixyich e nhuinmīdooyich may ángeles ajcxy ycapxīn ymīydaacīn jūhuidity ma je ane'mdac, ma je iyujc ajcxy yajpatcixy, etz ma je mijjāy ajcxy yajpatcixy. E janch canaag millon je ángeles anajty ajcxy. ¹² Janch mic je' anajty ajcxy chachmīnaangixy:

Je Dios y'ung, je Cordero, je huidibi óc mīd jāy ajcxy ypocy ycixpi, yi' mīhuaad paadip ane'm'ajtīn, comeēñ'ajtīn, ixpīcīn, mic'ajt, cōmayīn, oy'ajt mij'ajt, etz huīn'īhuīn huīnyaaxīn.

¹³ E tūg'óciy iyujc animal je huīdijaty Dios ti yajcojy ti yaj'abadīy huīdibi jīby tzajpjoty, etz huībi ya naaxhuiñ

etz naaxpa'tci'py, huīdibi jīby mejyoty, nhuīnmīdooyich co tūg'óciy ajcxy chachmīnaangixy:

Tzoc huīn'īhuīm tzoc cōmayīm, tzoc mooyīm oy'ajtīn etz mij'ajtīn huīnixī huīnītiempo je Dios y'ung, je Cordero, etz je huīdibi ifñaayb ma je ane'mdaacīn.

¹⁴ Je mīdaaxpi iyujc anajty chachmīnaangixy:

—Jadu'n huen tuñyī jadyī. Amén.

Chi nañ jadu'n je iipxmīdaaxpi je mijjāy ajcxy ycojxti-naygidactay, chi ajcxy ooy huīndzīgīy patjīhuīy je huīdibi huīnixī huīnītiempo tzīnaayb.

Je huixtujcpi selli

6 Huīn'it nhuīn'ijxyich je Dios y'ung, je Cordero, quejtzciich tūg selli ma je huixtujcpi chi nmīdooyich, co nidūg je mīdaaxpi iyujc ycapxy, jadu'n nmīdooyich nej enee yjīdity, chi ymīnañ:

—Min ya, e chi m'ixīpy.

² Chi nhuīndīcxpejtyich, chi nhuīn'ijxyich tūg poob cohūay. E je huīdibi yaj'ifñaayb je poob cohūay ymajtz'ijtpy anajty tūg tip ma yci'. Chi je' yajmoy tūg coronī co yrey'adīpy. Chi jada' choñ tziptūnaangixy jigix jacmīmadāgīpy ymīdzip.

³ Co je Dios y'ung, je Cordero, yaj'ahuaach je mīmetzpi selli ma je necy, huīn'it nmīdooyich je mīmetzpi iyujc ma je mīdaaxpi ymīna'ñ:

—Min ya, e chi m'ixīpy.

⁴ Chi ypidzīmy jadūg cohūay tzaptzpi ycolor. E huīdibi yaj'ifñaayb je cohūay chaptzpi, ycīdīgīyī cōtujcīn co je naaxhuiñy jāy canayyajotcujc'adīb ajcxy, e ñayyaj'ōcīgīxīpy mīñ xyīpy. E yajmooy tūg espada mijpi.

⁵ Co je Dios y'ung, je Cordero, agītztuudy je mīdugīgpi selli ma je necy, chi nhuīnmīdooyich je mīdugīgpi iyujc ma je mīdaaxpi, ymīna'ñ:

—Min ya, e chi m'ixīpy.

Chi nhuīndīcxpejtyich, chi nhuīn'ijxyich tūg cohūay tzixypī. E je huīdibi anajty yaj'ifñaayb je cohūaychixy, ymīd tūg pujxtzīm ma yci'. ⁶ Huīn'it nhuīnmīdooyich tūg ayuc choñ ma je mīdaaxpi je iyujc ajcxy yajpaatcixy, ymīna'ñ:

—Tūg denario meeñ chohūy tūg libra trigo; nañ jadu'n tūg denario meeñ chohūy tudujc libra cebada, ca' myaj'ayoohūipy aceite etz vino.

⁷ Co je Dios y'ung, je Cordero, yaj'ahuaach je mīmadaaxpi selli ma je necy, chi nhuīnmīdooyich co je mīmadaaxpi iyujc ma je madaaxpi ymīna'ñ:

—Min ya, chi m'ixīpy.

⁸ Huīn'it nhuīn'ijxyich tūg cohūay nitzuxy pu'tz, e je huīdibi anajty yaj'ifñaayb je cohūay, hue' anajty yxī ōcpi. Axam anajty ymīñ je huīdibi ane'mb je it ma je ōcpi ñīmucy. Chi ajcxy yajmoy cōtujcīn je huīdibi yaj'ifñaayb je cohūay, jigix yaj'ō'ccīxīpy je tūgpīcypī ma je madaaxpīcypī naaxhuiñy jāy ajcxy. Chi yaj'ōgīp ajcxy mīd tzīp, mīd yuuba'm, etz mīd iyujc ahua'nbi huīdibi ya naaxhuiñ.

⁹ Co Dios y'ung yaj'ahuaach je mīmīgooxpi selli ma je necy, chi nhuīn'ijxyich pa'tci'py'amy ma y'ane'mdac yhuīnduu, je' ajcxy y'alma huīdibi ajcxy yaj'ōcpat mīd Dios y'ayuc ycixpi, huīdibi anajty ajcxy capxhuācxīp

etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ögy patp mïid Dios y'ayuc ycixpi chachmi-naangixy janch mic:

—Huindzin, janch mijpi janch huätzpi, huidibi cuy-
dundaayb yi m'ayuc huidibi myejc ma ñich ajcxy.
¿Jadu'ñyi jada' mjac-huäcxiba'ñ mina anajty yi jäy ajcxy
mdiyunaangixy mdzaachytunaangixy mïid ypocy
ycixpi huidibi xyaj'o'c ñich ajcxy, yi' ajcxy huidibi tzi-
naayb naaxhuiñygyíxy?

¹¹ Huin'it ajcxy yajmoy nidüg nidüg poobhuit, e yajni-
may ajcxy co huen jacpoocxcixy jayinjaty jahuenjaty,
ixti cooni anajty yajca'pxy je mibijcpidijc micho'n, je'
ajcxy huidibi quipy mïid miich ajcxy tumb ma Dios
ytung, je' ajcxy huidibi yaj'ögy paadipy mïid Dios y'ayuc
ytiy'ajt ycixpi, tim jadu'n nej miich ajcxy ti mbaatcixy
yaj'ögy.

¹² Chi n'ijxyich co je Dios y'ung, je Cordero,
yaj'ahuaach je midudujcpi selli ma je necy, huin'it ooy
naax yhuiñyijty, chi je xii yajty janch tzixy, jadu'n nej
tzixyhuit huidibi co'ögytjic ypidacpy, e je po' y'ahuimbi-
jty nej ni'pyin. ¹³ Chi madza' ooy yca'y naaxcixy tim
jadu'n nej piidztiim tzuxpi ycäy co micpoj mixidiy. ¹⁴ Chi
je tzajp yjihuaçni jadu'n nej tüg libro'abidity. Tüg'öciy
tungop huidibi naaxhuiñygyíxy etz huidibi mejy'aguic,
cijx chondägy ypidçtäy ma anajty y'ity. ¹⁵ Huin'it
ñayyütztaayi je reydiy, je mjtungmïidpidijc, gener-
altijc, comeeñydiy, pinjaty ymic'ajt mïid, je tumbidijc
etz je midumbidijc ñayyütztaayi ajcxy nidüg'öciy ma-
jaty tzaajut tzaa'ang. ¹⁶ Tzachniimaaygixy anajty tungop
tzaajot:

—Nigägootchich nigägootchich, ca'ydi ñich ajcxy
njac'ijxi yhuiñyijp je huidibi ñnaayb ma Dios
y'ane'mdac, e nañ ca'ydi nbaatcixyich je tzaachyp
ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz
Dios y'ung y'ahua'ndägaangixy etz tzaachytunaangixy
naaxhuiñyjäy. ¿Pin je' ocmimadägip ajcxy chip y'ejcin?

Huidibi anajty ajcxy tiy'ajtmïid ma je Israel jäy ajcxy

7 Chi co jadu'n yajti, chi nhuin'ijxyich madaax án-
geles ajcxy ytinaaygixy ma madaax'itpi naax-
huiñybi ytatzcäy. Adujccixy anajty je midaax'it poj ca'ydi
ypoju ya naaxhuiñ, ni ma mejy, ni ma quipy. ² Chi
nhuin'ijxyich jadüg ángel ymiinñy anajty
xiibidzimy'amy, mïidity ma yci' je Dios juugypí yselli. Ja-
dayaabi ángel ooy mic miyaaxy je jamidaaxpi ángeles
ajcxy huidibi anajty ajcxy ti ycädigñyigixy je mic'ajt je
cötujcin nej huaad yajhuindigoogygixy tijaty ya naax-
huiñ etz ma ni mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma
quipy chaa, ixti cooni anajty Dios ytiy'ajt y'ijxpejt nbi-
daacim ma je' ajcxy yhuimbocin, je tiibi ajcxy huin'ixy
huidibi tungixp ma Dios ytung.

⁴ Chi nmidooyich jadu'ñyi je' tiibi anajty ajcxy Dios
ytiy'ajt y'ijxpejt ti ymóoyigixy. Migo'px jahuixchiguipx
midaax mil je' ñaybaati huidibi anajty ajcxy tiy'ajt mïid
ma yhuimboc ma nidüg'öciy Israel jäy ajcxy. ⁵ Majmetz

mil anajty ajcxy tiy'ajt y'ijxpejt mïidity je Judá jäy, ma-
jmetz mil je Rubén jäy, majmetz mil je Gad jäy, ma-
jmetz mil je Aser jäy, majmetz mil je Neftalí jäy, ma-
jmetz mil je Manasés jäy, majmetz mil je Simeón jäy,
majmetz mil je Leví jäy, majmetz mil je Isacar jäy, ma-
jmetz mil je Zabulón jäy, majmetz mil je José jäy, etz
majmetz mil je Benjamín jäy.

Je mayjäy ajcxy huidibi yxoxip mïid poob huit

⁹ Chi jada' nhuin'ijxyich janch mayjäy chooñ ma
canaag nación, hue' ajcxy canaagnax raza'adyii, e
capxy ajcxy canaagnax ayuc, etz chooñ ajcxy ma
canaag cajp. Hue' je mayjäy ytinay'ahuiday ma je
mij'ane'mdac huinduu, etz ma Dios y'ung, je Cordero
yhuinduu. Janch mayjäy ñimujcy ma je Dios y'ung
yhuinduu, ni pin je' anajty huaad camichoudäy ajcxy.
Ac poob huit anajty ajcxy mïid yxoxyity, e ymïid anajty
ajcxy tiixy'aay ma yci'. ¹⁰ E janch mic anajty ajcxy
miyaaxcixy Dios, chachmi-naangixy:

Ñich ajt nDios yi' je' tügpajc huidibi xyajpocyhuaatzim.
Ñich ajt nDios yi' je' huidibi ane'mdaayb tüg'öciy, e nañ
jadu'n yi' y'ung, je Cordero.

¹¹ E nidüg'öciy je ánelestijc anajty ajcxy ytinaaygixy
jühuidityi ma je Dios y'ane'mdac. E cham je mijjäy
ajcxy etz je midaaxpi iyujc huijoj'i huñy ajcxy ma je
ane'mdac huinduu, huindzigñygyíxy yajmij'ajtcixy je
Dios. ¹² Chachmi-naangixy:

Jadu'n jada. Amén. Ñich ajt nDios, je' mihuaad huinixi
huinitempo tüg'öciy je ñhuin, je xondaacin, je oy'ajtín,
je xpijcin, je jäygidacin, je cömayin, je ane'min, je
mij'ajtín. Amén. Jadu'n jada.

¹³ Huin'it nidügti je mij jäy ycapxy, e xy'amidooyich:
—¿Pin jada ajcxy jada' huidibi poob huit mïid yxoxyi-
ty, e ma yi' jada' ti choongixy?

¹⁴ Chi ñich je' n'adzooy:

—Huindzinich, miich mnejhuñyb.

Huin'it je' xy'adzooyich:

—Jada je' ajcxy tiibi je mij ayo'n minajxcixy yajnax-
cixy, e ti ypocyhuaatzcixy mïid je Dios y'ung, je Cordero
ñi'py, tim jadu'n nej jihuñy yhuin ti yajhuaatzcixy janch
poob ma Dios y'ung ñi'py. ¹⁵ Paady yi' ajcxy yajpaady
ma Dios chinaydac yjugy'ajttac, e ytungixy xim tzuum
ma Dios ytijc tzajpjoty. E yi' Dios y'ung huidibi ñnaayb
ma je mij'ane'mdac, yi' yi' mi'ijttaayb cuend'aty ma yi'
yhuinduu. ¹⁶ Ca'p ajcxy jacjihuñygyixipy yuu tidzibi, ni
xi'an ycajacnögñyb ajcxy, ni anbi ycajacyajtziñyb
ajcxy. ¹⁷ Com je Dios y'ung, je Cordero, huidibi cu-
jc'amy yajpatp ma je Dios y'ane'mdac, je' yi' cuend'ajtp
ajcxy, jadu'n nej jihuñy cöbixy cuend'aty, e yajnicxip ma
je ni huätzpi ymxy huidibi yejcp jugy'ajtin. Dios ya-
jquägipy yi' ajcxy ytajin ymayin jigix ca' yjacñyigixipy
yjacyáaxcixy mïid tajin mayin.

Je mihuixtucpi selli etz je poomjogi'ñ ac oori

8 Co Dios y'ung, je Cordero, yaj'ahuaach je mihuix-
tucpi selli, huin'it y'ijty oy jahuengi cup hora
amoñi jiby tzajpjoty. ² Chi nhuin'ijxyich Dios y'ángeles

huixtujc ajcxy ytinaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel miññ, chi je' ytinaay'ihuññ ma mesi huinduu ma je Dios ojadajttac. Je ángel ymiid anajty tüg poomjog'iñ ac oori. Chi ymooyi poom may'amy huidibi jojcp. E je poomjoc tigñyb ma Dios yhuinduu quipxi miid juy-dacin nuuctacin huidibi je jäy ajcxy ytumyb huidibi Dios ti huin'ixy ajcxy. ⁴ Ma je ángel ycñ'am jim je poomjoc chooñ ñicxy ma Dios yhuinduu quipxyi miid je oración huidibi ajcxy ytumyb je tiibi ypocy-huaatzcixy. ⁵ Huin'it je ángel majch je poomjog'iñ, chi yaj'ujch miid jijnbajc huidibi anajty jim ma je Dios ojadajttaacin, chi najtzjibibñy naaxcixy, huin'it ooy yajmidooy jidjitin micpi etz huidzuc e je naax ooy yücxy.

Je maytrompeti

⁶ Je huixtujcpi ángeles ajcxy huidibi anajty miid je huixtujcpi trompeti, ñayni'ixñy ajcxy co yaxxüxaangixy.

⁷ Je midügpi ángel yajxuuxy je ytrompeti, e huin'it ooy eneediitz yca'y mihuididii jijn etz n'py. Chi oy ycäy naaxcixy. E jahueengi cujc-huäcxy oy nögy je naax, je quipy etz je aay ujtz tzuxjatypi etz nöctay miy.

⁸ Je mimetzpi ángel yajxuuxy ytrompeti, chi ooy ycäy mejyoty jadu'n nej tüg mijcop janch tooyb anajty miid jijn, e jahuengi cujc-huäcxy je mejy oy y'ahuimbity n'py. ⁹ E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, ñañ jadu'n jahuengi cujc-huäcxy oy ytimy-huindigoydäy.

¹⁰ Chi je midugñgpi ángel yajxuuxy je' ytrompeti, e huin'it oy tüg madza' mijpi ycäy. Je madza' jadu'n ni-paady nej tüg mijjijn huidibi nayajcodiñcxim. Je madza' oy ycäy ma jahuen cacujc-huäcxy mijññ, etz ma niñ muxy. ¹¹ Je madza' hue' je' anajty xii'adyii ta'm'ujtz. E je niñ jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy miid je niñ ycxipi co anajty ti y'ahuimbity ta'm.

¹² Je mimadaaxpi ángel yajxuuxy je' ytrompeti, e huin'it jahuen cacujc-huäcxy je xii oy yhuindigooy, e ñañ jadu'n je po' etz je madza' jahueng cacujc-huäcxy oy yhuindigooy. E miid jadu'n ycxipi je po' etz je madza' yhui'mgixy jahuen cacujc-huäcxy agootz, e jahuen cacujc-huäcxy ytiñcin ocyejcnñ ajcxy xim tzu-um.

¹³ Chi nhuin'ijxyich tüg me'ty anajty yqueec-huidity cuptzajp, e nmidooyich co ymína'ñ janch mic:

—¡Ay! ¡Naaxhuiññy jäy ajcxy ayoobidijc! co anajty trompeti yaxxüxy je jatugñgpi ángeles ajcxy, huin'it ayo'n ypada'ñ je naaxhuiññy ajcxy, ayo'n ypadamy ajcxy, ayo'n ypadamy ajcxy.

⁹ Chi je migooxpi ángel yajxuuxy je' ytrompeti, chi nhuin'ijxyich tüg madza' anajty ti ycäy naaxcixy. E chi je madza' yajmoy je ahuaasti huidibi miid yaj'ahuädzip je ayoodac ma Dios cuend'aty miidity je ca'oybidijc. ² Chi je ángel yaj'ahuaach je jut ma je ayoodac, e ma je jut jii by ypidzimy jadu'n nej jijnjoc huidibi pidzim ma tüg horni. ³ E ma je joc ypidzimy ooy maymu' naaxhuiññy chachqueec-huidijtcixy ooy, e

je mu' ajcxy ymooyi mic'ajt, jadu'n nej ca'ty miidity ytiyp. ⁴ Chi je' ajcxy yajcötujcmoy co ca' ni ti aay ni ti ujtz yajhuindigooygixipy huidibi yajpatp naaxhuiññ, ni ujtz ni quipy. Jëyi janchtiy ycötujcin mooyi co huen yaj-tzaachñhuipy je jäy ajcxy huidibi ca' miidity Dios ytiy'ajt y'ijxpejt ma yhuimboc. ⁵ Ca' ajcxy yajcötujcmoy co yjäyayaj'ócixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcpy jadu'n je' nej co ca'ty jäy yajtzaachñy miid ytiyp. ⁶ Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ajtcixy o'cin, e cöguëgñb ajcxy je o'cin.

⁷ Je maymu' jadu'n je' anajty yquëxigy nej maygo-huay huidibi ni'ixñ'ijtcixp co yajñicxáanigixy ma tzip ytuna'ñyii. Ymiid anajty je maymu' ma ycohuajc jadu'n anajty quëxigy nej oori coronñ. E je maymu' yhuiññy jip jadu'n yquëxigy nej jäy yhuiññy jip. ⁸ Je maymu' ymiid anajty ycohuay jadu'n nej töxyjäy ycohuay, e ytiitz jadu'n nej jamgaa ytiitz. ⁹ E je maymu' ymiid anajty ajcxy jadu'n nej pujx huidibi miid ñinicx cohuangixy. E co ajcxy queec-huidity, ooy ajcxy yqueec yaj'amüy jadu'n chachne'mñy nej je carro huidibi cohuay ajcxy yjugujcyp co ñicxcixy ma tzip ytuñyii. ¹⁰ Je maymu' ymiid anajty ajcxy ypixy tim jadu'n nej ca'ty ypixy, e ma ajcxy ypixy ymiid anajty ytiyp. E ma ajcxy ypixy miidity anajty je mic'ajt co jäy ajcxy yajtzaachñhuipy migoox po'. ¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiioty Apolión, hue' je yxii yhuimbizimy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je midudujcpi ángel yajxuuxy je ytrompeti, chi nmidooyich tüg ayuc chooñ ma je midaaxpi huaj mu'n ity ma je altar ac óoriñbi, huidibi anajty ijtp ma Dios yhuinduu. ¹⁴ Je ayuc ymína'ñ:

—Nima' je midudujcpi ángel huidibi anajty trompeti miid: "Najtzmadzi' yi midaaxpi ángeles huidibi ajcxy coxoch ijtp ma Eufrates mijññba'."

¹⁵ Huin'it oy yajcoguejtuttcixy je midaaxpi ángeles, jigix yjäyayaj'ócixipy jahuen cacujc-huäcxy huidibi yajpatp ya naaxhuiññ. Je midaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiññybi jäy ajcxy. ¹⁶ E nmidooyich co ajcxy michoy je soldadtijc huidibi anajty ajcxy cohuaygix. E hue' mejtz migo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohuay ajcxy, e miid je ñijäy ajcxy huidibi anajty yaj'ñaaayb. E je ñijäy ymiid anajty ajcxy pujx ma ycaach, je' miid ñinicx cohuangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamgaa ycohuajc, e ma ajcxy y'ahuac ypidzimy nej jijn, nej jijnjoc, etz nej azufre. ¹⁸ E miid jada jahueng cacujc-huäcxy naaxhuiññy chach'o'cy ajcxy miid je jijn, je jijnjoc etz je azufre ycxipi huidibi anajty pidzimb ma je cohuay ajcxy y'ahuac. ¹⁹ Je cohuay ajcxy ymiid anajty mic'ajt ma

y'ahuac etz ma p'ixy. Com je' ajcxy yp'ixy jadu'n je' anajty nej xoox m'iid ycohuajc, e je cohuay ajcxy chach'ahua'ndaacc'ixy m'iid yp'ixy.

²⁰ E je jacjadyii j'ay ajcxy huidibi ca' y'o'cy m'iid jadaayaabi ayo'n, ca' ajcxy yjothuimbijty ma Dios, ca' ajcxy ixmajch je j'ibicpi huidibi ytungixp. E ni ca' ajcxy ixmajch nej ajcxy je ca'oybi huindzig'iygixy. Nañ jadu'n ca' ajcxy ixmajch nej ajcxy huindzig'iygixy huidijaty ajcxy oyduñy'ip m'iid plata, m'iid bronze, etz tzaadzech etz quipychech. Je huidijaty ajcxy y'oydumy'et etz ñidzejtztuut'icixy, ni yca'ijxcixy, ni ycamidoogixy, ni yca'yöygixy. ²¹ E ni ca' je j'ay ajcxy yjothuimbijtcixy ma Dios, ca' ajcxy ixmajch jadu'n nej ajcxy chachj'ayaj'o'ccixy, jadu'n nej ajcxy tzachcaxpojccixy ym'igügt'ijc, jadu'n nej ajcxy huingbi töxyj'ay tzachm'igapxtigooygixy, etz jadu'n nej ajcxy chachmeetzcixy.

Je ángel m'iid je mutz libro

10 Nhuin'ijxyich co chooñ tzajpjoty t'ug ángel micpi ñiducyity m'iid joc, e m'iidity i'ñich ma ycohuajc. Je yhuifñy'ijp yquëx'igy nej xii. Je' ytecy jadu'n yquëx'igy nej m'ijj'inye'n. ² E ma yci' m'iidity t'ug libro yëphuäcxy, e pidacy y'a'oydecy mejyhuing'ixy, e y'anajtytecy pidacy naaxhuifñg'ixy. ³ Chi je ángel oy janch mic yaaxquency jadu'n nej t'ug jamgaa yäxy. E co anajty jadu'n ti yaaxquëgy, chi oy yajm'idoy huixtujc j'idijtin huidibi ycapxyci'm'ayuc. ⁴ Co je huixtujcpi j'idijtin oy ycapxtaaygixy, chi ñich anajty njaaya'ñich huidibi ti capxy. Chi nmi-dooyich t'ug ayuc chooñ tzajpjoty xyñimäy'ich:

—M'it jada ayuc y'uch huidibi yi huixtujcpi j'idijtin ti capxy, ca' mjaay.

⁵ Chi je ángel huidibi nhuin'ijxyich co mejyhuing'ixy etz naaxhuifñg'ixy ytinäy, yujcxajy yci' a'oy'amybi tzajpc'ixy. ⁶ Chi je ángel capxcödujcy co je Dios huidibi jugy'ajtp huinixii huin'tiempo, je huidibi yajcojy je tzajp, je naaxhuifñybi, je mejy etz t'ug'öcyi' hudibi jilby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachyp'i ayo'n ya naaxhuifñ. ⁷ Co yhuaad'ajtnip je xii je tiempo ma anajty je mihuixtujcpi ángel yxuux yajx-uxt'ondägy, chi cuyduunip je Dios y'ayuc ytiy'ajt huidibi ca'pin anajty huinj'ihuüy, je ayuc huidibi je Dios ytumbidijc je profetas ajcxy ñajtzcapx'iy jecy'ajty.

⁸ Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaay'ich: —Ñicx miich etz c'iy'ig yi libro huidibi yëphuäcxy yi ángel ym'iid ma yci'. Je' je' je ángel huidibi anajty ti-naayb mejyhuing'ixy etz naaxhuifñg'ixy.

⁹ Chi n'öy'ich ma je ángel nbijctzooy'ich co huen xymöy'ich je pi'clibro, chi je' xyñimaay'ich:

—Matz e coj'icx'nax, e xyajta'mm'iiy'ip mjot e ma miich m'ahuac mjihuühuipy päg jadu'n nej ceripäg.

¹⁰ Huin'it ñich je pi'clibro ngiy'igy hudibi je ángel anajty ym'iid ma yci', e chi ñich je' ngöj'icxnajxy. Ma ñich n'ahuac njihuüy'ich janch päg jadu'n nej ceripäg. Co oy ngoj'icxnajxtäy'ich, chi oy y'ahuimbijtni janch ta'm ma ñich njot. ¹¹ Chi mic'amy najj'imaay'ich:

—Ñicx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydiyc ajcxy.

Je metzpi testigo

11 Chi jada' najjmooy'ich t'ug paxy, jahuengi jadu'n anajty yquëx'igy jadu'n nej baari huidibi quipx yajhuamb. Chi ajcxy xyñimaay'ich:

—Pid'ig e quipxta' yi Dios ytiyc, nañ jadu'n quipx je mesi ma Dios yajhuindzig'iy, etz nañ jadu'n michou naag j'ay ajcxy jilby Dios huindzig'iygixy. ² Je Dios yt'iba' ahuing miich je' pidäg, ca' mguipx'ipy. Com yi' yi' ti yci'dig'iyii yi j'ay ajcxy huidibi ca' yjudío'yäyity. Yi j'ay ajcxy huidibi ca' yjudío'yäyity ym'imadägamyb ajcxy je Jerusaléngajp ma Dios m'iidity tzinaydac etz ane'mamb ajcxy jilby huixchigui'ipx metz po'. ³ ñich metz testigo nguex'ipy'ich ma je cajp ma Dios m'iidity tzinaydac, e yi' ajcxy capxhuäcxamb ñich n'ayuc t'ug mil jametzmigo'px jatugi'px xii. Yxoxyity ajcxy m'iid huit ñicuyjaam ixcu-yjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuifñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy j'ijn ma y'ahuac, yjicxtähuipy yj'indähuipy je' ymidzip. E jadu'n je' y'ög'ipy pinjaty anajty je metzpi testigo midundigooyb. ⁶ Je metzpi testigo ym'iid yi' ajcxy cötujc co ahüäctüjccixity je tzajp, ca'ydi' ytüy jadu'ñyi' tiempo anajty ñhuäcxcixy capxhuäcxcixy Dios y'ayuc ytiy'ajt. E nañ jadu'n ym'iid ajcxy cötujcin co ñi yaj'ahuimbijtcix'ipy n'ipy. Yi' ajcxy yaj-tun'ib yaj'jad'ib canaagnax ayo'n ya naaxhuifñ, naag'oc anajty ytimdz'ojccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzimb ma je ayoodac, je abismo, je' je' tziptuunip m'iid je metzpi testigos etz yaj'öctähuip je metzpi testigo. ⁸ Chi je metzpi testigo ñin'icx ajcxy yhuim'ipy mijñigujc m'ijt'ugujc jim ma je mij ciudad ma je Huindzin Jesucristo yajcruudzpejt'i, je cajp huidibi tundigooy m'iid Dios tim jadu'n nej Sodoma etz Egipto ytundigooy jecy'ajty. ⁹ Nij'ejty j'ay ajcxy huidibi xi ya conaaxip cogajp'ip, oy ypinjäy'ity, oy ti ayuc capxcixy, y'ix'ipy ajcxy tug'ig xii jagup je metzpi testigo ñaaxñicx m'ijt'ugujc, e ni ca'a'ix'ihuipy ajcxy co yajnaaxtig'ihuüyb. ¹⁰ Huidijaty ajcxy tzinaayb ya naaxhuifñ ooy yxondäac-cix'ipy etz yjotcug'iygix'ipy m'iid je' yci'xp co je metzpi Dios ytestigos ajcxy anajty ti y'o'ccixy. Chi je mayj'ay ajcxy miñ xy'ipy ñaymóoyigix'ipy tijaty, e ñayya-jniguéjxigix'ipy tijaty. Com je metzpi yëdy'icx huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuifñy'ay ajcxy. ¹¹ Codug'igxii jacup naxy, chi Dios c'ijx yajjugypijctäy je metzpi öcp'i, e chi ajcxy jadüg'oc ypid'igy, e pinjaty je' i'ix, ooy je' ajcxy chachchig'iy. ¹² Je metzpi testigo huidibi nidiy'ajt Dios, midoy ajcxy t'ug ayuc janch mic jilby tzajpjoty anajty ñimäyigixy:

—Pejtcix yeeby cix.

Chi ajcxy ypa'ttigüy tzajpjoty ma tüg joc, e ijxi ajcxy ymidziptijc. ¹³E janch huin'ítüy ooy naax yücxy müd tüg mic ujx. E tüg picypü je majc picypü jäy jim Jerusalén oy ymijähuüygixy. E müd je ujx ycixpi y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigüygixy yjihüygixy, e ojadajtcixy mibijctzoogixy ooy je Dios tzajpjoty.

¹⁴Ti ñaxy je mimetzpi ayo'n, chi tzojc ymiiñ je müdugiipi.

Je mühuixtujcpi trompeti

¹⁵Chi je mühuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic ymíñañ:

Je ane'min huidibi ya naaxhuiñ, yí' je' cham müd ajt nHuindzin Dios etz yí' yCristo, e yí' je' ane'mip huinixü huinitiempo.

¹⁶Je iipxmídaaxpi mijjäy huidibi anajty ajcxy ñaayb ma y'ane'mdac ma Dios yhuinduu, cijx je' ajcxy yhuijoj'ihuüyaaygixy, e chi ajcxy ooy Dios íbaty capxpaty, ymínaangixy:

¹⁷Huindzin Dios, Dioscojuyip nyajnájxcixpich ma miich, huidibi jac mic'ajt müd ca'ydi jac pin. Miich tüg'óciy mdundaayb mjajtaayb mnejhuüyaayb. Miich je' huidibi ijtñaayb, e ti m'ijtnäy, e m'ida'ñyi, com miich ti m'ijxcugüy je mgötujcín, e ti mbidägy m'ane'min.

¹⁸Mayñaax maygajp mayñaaxhuiñyäjy ooy yjotmäty ajcxy, müd co ti xü hori paady co miich mdzaachytunañ je jäy ajcxy müd ypocy ycixpi. Ti je xü je hora paady co miich mdüyduna'n je jäy ajcxy tíbi y'o'ccixy. Ti je xü je hori paady co miich mmöhua'ñ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxü yxchigüyüp, huen ymij'ana'city huen ymutz'ana'city. Ti je xü je hora paady co miich myajtigoya'ñ je pinjaty yajhuindügooygixyp naaxhuiñyäjy ajcxy.

¹⁹Je huin'it tiempo oy Dios je ytijc y'ahuäch jiiiby tzajpjoty, e chi nhuin'ijxyich je caax ma Dios ycötujcín y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjijitín, etz njhuüyich tüg ujx, etz ooy yca'y eneedütz mijatypü.

Tüg töxyjäy etz je ama'y tza'ñ

12 Je huin'it hora oy yquëxgy tzajpcíxy tüg ijxpejt mijpi. Tüg töxyjäy ñidigooyity müd xü, jadu'n nej jihüy müd tüg huit ñimochity, e jadu'n yquëxgy nej jihüy anajty po' yajhuäcpety, e ymüd ma ycohuajc tüg corona ac oori huidibi majmetz madza' müd. ²Jadayaabi töxyjäy hue' anajty ungmijäy'ajtp, e janch yaax tinaayb je' anajty müd je tzaachypü, müd co y'ung anajty yajma'xung'ada'ñ. ³Huin'it oy yquëxgy jadüg tiy'ajt ijxpejt tzajpcíxy. Tüg ama'y tza'ñ janch mij, tzaptz ycolor, e müdity huixtujc ycohuajc, majc ymu'n, e tüg corona majaty ycohuajc. ⁴Je mij tza'ñ müd je' ypixy jugujc-mujcy jahueng cacujc-huäcxy je madza' jim tzajpcíxy. Chi je' najtzyemiyday je maymadza' naaxhuiñyägxy. Je mij tza'ñ oy yhuäcxiy ma je töxyjäy yhuinduu huidibi

anajty ungbadamb tzojc, chi tüzda'ñ je pi'c'ung-ma'xung janch tim jëyi anajty yma'xung'aty. ⁵Chi je töxyjäy yajma'xung'ajty tüg pi'cyëydijc, huidibi ane'mip müd Dios ymic'ajt, ymüd yí' tüg pujxtajc huidibi ijxpejt ajt co mij ane'min müdity ya naaxhuiñ. E yajpijcy je y'ung, chi yajnicü ma Dios etz ma je' y'ane'mdac. ⁶Chi je töxyjäy yqueecy ñicxy migtigüduum, ma anajty Dios ti ñi'ixüyü y'it ylugar co jim y'idipy, e jim ymöhüüyb ycaayin y'uucin tüg mil jamejtzmgö'px jatugi'px xü.

⁷Je huin'it tiempo tüg tzip yjajti tzajpjoty müd je' ycixpi. Chi Miguel huidi mij cötujcín müd, müd jadyü y'ángeles ajcxy, ooy chiptuñ müd je ama'y tza'ñ etz yí' y'ángeles ajcxy. ⁸E ca'p je ama'y tza'ñ ajcxy ymadacy ma je tzip, e ca'p je' ajcxy müd'ajty tigüydac tzajpjoty. ⁹E jadu'n Dios yajqueecy je mujcu', je ama'y tza'ñ mijjäybü, jiiiby tzajpjoty. Je' je' je ama'y tza'ñ huidibi xü'ajtp diablo etz Satanás, je huidibi huin'ümb tüg'óciy naaxhuiñyäjy. Je mujcu', je ama'y tza'ñ, müd je' y'ángeles ajcxy oy yajcötijnajxtäy ya naaxhuiñ.

¹⁰Je huin'it hora nhuinmidooyich tüg ayuc janch mic tzajpjoty chooñ, ymíñañ:

—Ti je xü je tiempo nigoody mina Dios ti nihua'ñ ti yajnidzögy jäy ajcxy ma je mujcu'; mina Dios ti yajniügüxgy yí' ymic'ajt; mina Dios ti yajniügüxgy yí' y'ane'min; etz mina Cristo ytigüy ane'mbi müd ymic'ajt. Com ti Dios cötijnaxy je mujcu' huidibi tzachxip ích ajt nmügügtijc, je mibijcpidijc. Je mujcu' anajty tzachxip ajcxy xüm tzuum ma Dios. ¹¹Ích ajcxy nhermanotijc ti yí' mimadaaccixy je mujcu' müd je Dios y'ung ñi'py, etz müd je' y'ayuc yty'ajt tíbi mibijccixy, je huidibi ajcxy nidiy'ajtcixp ma yí' mayjäy. Ca' ajcxy tzigüy anajty co yjuy'ajt ytigüoygixip. Nigü ni'ixü y'ijtcixy anajty müd ymibijcín oy ytimy'óccixipy. ¹²Jotcujc'ajtcix etz jotcugüygixy huidibi jiiiby tzinaaygixp tzajpjoty. Ayo'n ypadamyb ajcxy huidibi tzinaayb naaxhuiñyägxy etz mejjoty. Com je mujcu' ti je' ycidägy ma miich ajcxy müd chip y'ejcín. Com je mujcu' ñejhuüyb co tim jayinjaty jahuenjaty xü tiempo jacmüdity.

¹³Co je mujcu' ijxy co ti yajcötijnaxy ya naaxhuiñyägxy, chi ooy pahuidijttacy je töxyjäy huidibi anajty ti yajpi'c'aty pi'cyëydijc. ¹⁴Chi je töxyjäy metz me'tyqueec mijpi yajmoy, jigix cöguëgipy je ama'y tza'ñ, ñicxip agueegüccip migtigüduum ma je ama'y tza'ñ ca' ñijädüby. Jim migtigüduum yajmoy ycaayin y'uucin tugüg jimijt ja cup. ¹⁵Chi je ama'y tza'ñ ooy nü yajpidzimy ma y'ahuac, jigix y'ahuümbidipy mij nü huidi je töxyjäy pagujip mij njoty. ¹⁶E yí' naax ooy je töxyjäy pubejty, chi je naax y'ahuäcxy, e uuctüztay je nü huidibi anajty je ama'y tza'ñ ti yajpidzimy ma y'ahuac. ¹⁷Müd jada ycixpi je ama'y tza'ñ ooy y'ahua'ndacy müd je töxyjäy, chi ñicxy tziptumbi müd je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min ycötujcín, je' ajcxy huidibi cuydumb je ayuc huidibi Jesucristo anajty capxhuäcxyp.

Je metzpi ca'oy'iyujc

13 E jim ndinay'ihuüyich ma püjot mejypäbi. Chi nhuin'ijxyich co tüg iyujc janch oy chigüyñi

ypidzimy mejjoty ymïd anajty huixtujc ycohuajc, e majc ymu'n. E ma ymu'n mïdity majc corona. E ma ycohuajc mïdity anajty cojaay yxii huidibi yajjotma'tp Dios. ² Jadayaabi ca'oy'iyujc huidibi nhuin'ixch, jadu'n anajty yquëxïgy nej tüg cuuxyubijy. E ytecy jadu'n anajty yquëxïgy nej osi ytecy, e y'ahuac jadu'n anajty yquëxïgy nej jamgaa y'ahuac. Chi je ama'y tza'ñ oy cõtujc möy, mic'ajt möy, mij'ane'min möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachïjity, nej jihuiy je' yaj'ögïib. Chi je chaachï'au oy choogy, e tüg'óciy naaxhuiñyäjy ooy janch jihuiyigixy huinmaaygixy mïd jada ycixpi co ti choocy. Chi je mayjäy ajcxy panïcxy je ca'oy'iyujc. ⁴ Je mayjäy ajcxy ooy huindzigïygixy je ama'y tza'ñ, je mujcu', com je' co anajty ti möy cõtujcïn ane'min je ca'oy'iyujc. Chi ajcxy nañ jadu'n ooy huindzigïygixy je ca'oy'iyujc, chachmi-naangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip mïd y'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi mïd'adipy ane'min cõtujcïn huixchiguiïpx metz po'. ⁶ E jadu'n je' tuuñ. Nigapxy ni'ojïy ooy Dios. Nigapxi Dios yxii oy ca'oy, etz nigapxi ni'ojïy Dios ytijc. Nañ jadu'n nigapxy ni'ojïy huidibi ajcxy jilby tzinaayb tzajpjoty. ⁷ Chi mic'ajt ymooyi, jigix chiptuunip mïd je huidijaty mibijcp Dios, huidijaty mïd ity Dios, ixti mibaad mimadaaccixy. Nañ jadu'n mooyi cõtujcïn mic'ajt, jigix ane'mip naaxhuiñyäjy huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñyäjy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ymïd. Dios yhuinma'ñypidacy jayijp ca'ni naaxhuiñyabi anajty chondägy co y'ung y'öga'ñ mïd jäy ajcxy ycixpi, jaydëbi cijjaayt ajcxy yxii ma yi jugy'ajt li-bro.

⁹ Pinjaty tädz'ac mïd, pinjaty mïdo'mbigamb jada ayuc, huen mïdo'mbijccixy. ¹⁰ Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp y' ajcxy huidijaty mibijcp Dios, huen yajtungixy mïd ymigügtijc mecxtujcïn etz mibijcïn.

¹¹ Huin'it nhuin'ixyich jadüg ca'oy'iyujc chooñ naaxjoty, e ymïd anajty metz ymu'n, tim jadu'n nej pi'ccöbixy-mang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymïd ane'min huidibi je jayijpi ca'oy'iyujc ti ymöy. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyäjy huen ojadajtcixy huindzigïygixy je jayijp'atypi ca'oy'iyujc huidibi anajty je chaachï'au ti chögy. ¹³ Nañ jadu'n ooy anajty tijaty mijhuinma'ñ tuñ, ixti jïin yajcödigïyb tzajpcixy, yajcäy naaxcixy ma jäy ajcxy yhuinduu. ¹⁴ E mïd je mijhuinma'ñ huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'ññ huidijaty ajcxy tzinaayb naaxhuiñ.

Nañ jadu'n je' pidacy y'ane'min co yajnïgojtúutcixipy je ca'oy'iyujc huidibi anajty tzachïjip mïd espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tïibi anajty yajnïgojtúutcixy, jigix je' ycapxipy etz nañ jadu'n jigix je' ane'min pidägy co yaj'öctähuiïpy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeeñydijc, ayoobitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymïd je ca'oy'iyujc tiy'ajt y'ijxpejt, o yxii, o je' yxii ñinúmero. ¹⁸ Jadayaabi ayuc chojcpy ixpjicïn, pinjaty huinjihuïyb jëbi mihuinma'ñybaady ti número je ca'oy'iyujc mïd. Je' je' je' número huidibi tüg jäy mïdity. Je jäy ñinúmero hue' je' tudujc migo'px jatugïpx tudujc.

Je nimïgo'px jahuixchiguiïpx milbi yëydijc ajcxy y'iy

14 Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögop huidi yxii Sión. Ymïd anajty migo'px jahuixchiguiïpx madaax mil jäy huidibi anajty ajcxy mïd cojay ma yhuimboc je Dios y'ung yxii, etz y' yTeedy yxii, je Dios Teedy. ² Nhuinmi-dooyich tüg ayuc chooñ tzajpjoty, jadu'n nmïdooyich nej mijniñ y'a'ñch, nej enee yjidity. Hue' je' anajty nmi-dooyich nej mayjäy y'arpa yajcoogixy. ³ Ooy anajty ajcxy ñgixy tüg iy jemybi ma je mij'ane'mdac yhuinduu, ma je midaaxpi iyujc jugy'ajtmïdpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchiguiïpx midaax milbi jëbi ixpjicixy je iy, je huidibi ajcxy Dios ti yhuin'ixyii etz ti yajnïdzögy ya naaxhuiñ. ⁴ Jada je' ajcxy huidibi ca' ajcxy migapxtigooygixy töxyjäydijc, huädz tudägy ajcxy yjot yhuinma'ñ mïdity, ca' ajcxy pjicixy. E ypanïcyp ajcxy je Dios y'ung, je Cordero, oy tim ma'amy ñicxy. Y' ajcxy je jayijp'atypi jäy ya naaxhuiñ huidibi Dios ti yjuybidzimy ma anajty ijtcixy codoogïy mïd ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anï ti ycaaypaady ma je' ajcxy. Com ca' ajcxy tibocy mïdity, ca' ti xëhuin ajcxy mïdity ma Dios y'ane'mdac.

Je nidugïgpi ángeles ajcxy y'ayuc ytiy'ajt

⁶ Chi nhuin'ixyich jadüg ángel yqueec-huidity cuptzajp, e ymïd anajty Dios ytiy'ajt jemybi oybi huidibi ijtp huinixi. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'ñ anajty janch mic:

—Tzigïygix Dios, huin'ñgix huinyaaxcix cömaygix Dios. Ti paady je xii je hori mina Dios tiyduna'ñ yajt-goya'ñ y' ajcxy huidibi jibic tumb. Ojadajtcix je huidibi yaj'oyïy je tzajp etz je naax, je mejy etz majaty niñ ymuxy.

⁸ Co je midügpi ángel ycapxtaay, chi je mimetzpi ángel yminañ:

—Tí ymic'ajt ytigoydäy je Babilonia je mijpi cajp. Yí Babilonia jäy tí yajhuinma'ñdydigoydäy je naaxhuiñjäy mñid yjibic-huinma'ñ, paady yí Babilonia jäy ayo'n mñidty cham, com je Dios tí ymijotmättäyij ajcxy. Jadu'n Babilonia nipaady nej tüg töxyjäy huidibi huin'ñmb yëdyijctijc mñid añi etz jocñi.

⁹ Co je mimetzpi ángel ycapxtay, chi je midugiigpi ángel yminañ janch mic:

—Pen pinjaty huindzigñyb yajmij'ajtip je ca'oy'iyujc etz je ñigojtuutin etz nañ jadu'n cöbijccxy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytunñb yí jadu'mbi jäy ajcxy mictägy, ypaadip ajcxy Dios chip y'ejcñ. Tím jadu'n nipaady nej jihuñy Dios yaj'üguyij ajcxy je vino ñi huidibi yí' tí ni'ixñy. Dios tí ni'ixñy je it ma ajcxy ayo'n pada'ñ, tím jadu'n nipaady nej je tasí ma Dios yvinonñ ijtp. Chi je' ajcxy ayo'n paadipy ma ytoy je mijñin mñid azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹ Je jñnjoc huidibi anajty pidzimb ma anajty je mayjäy ayo'n paatcxy, pidzimip je' huinixñi huinñiempo. E ni poocxin ycaca'ty xiim tzuum mñid je pinjaty anajty huindzigñyb pa'tjihuiñyb je ca'oy'iyujc etz mñid y'ahuinax, o pen ycöbijcipy anajty je ca'oy'iyujc yxñi ycojayity ma yhuimboc o ma yci'. ¹² Com Dios chaachytunamyb je jäy ajcxy huidibi ijtp mñid je ca'oy'iyujc, paady ycixp copicy co yí jäy ajcxy huidibi ijtp mñid Dios huen cuydungixy yajxon Dios y'ane'min ycötujcñ etz huen mibijccxy mijpidaaccxy tudägy Jesús, etz nañ jadu'n yajtungixy mecxtujcñ ma ajcxy chinaayin.

¹³ Nmidoohuich tüg ayuc tzajpjoty choon xyñimäyich anajty:

—Coyay jada ayuc: "Jadachambi etz jacnicxpi xñi tiempo, jotcujc ajcxy huidijaty öccixp co mibijccxy je Huindzin Jesús." Je Espíritu Santo ymina'ñ co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhuñhuip je' ajcxy tzajpjoty tzinaaybi jadu'n nej je mibijcpi ajcxy anajty oybi tí tungixy.

Co Jesús anajty miñ tiyduñ tzaachytuñ jibicjädyijc

¹⁴ Chi jada' nhuin'ijxyich tüg joc janch poob. E ma je joc ñicx iñäy tüg yquëxgy nej je jäy huidibi tzoon tzajpjoty (je Cristo). Je' ymñid anajty ma ycohuajc tüg corona ac oori, e ma yci' mñidty tüg hoz janch jijpi. ¹⁵ E ypidzimy ma je Dios chinaydac jadüg ángel, je' tzachmñyäxy anajty janch mic je huidibi anajty iñaayb jocñigixy, ymina'ñ:

—Pidäg yí mhoz, e yajpidig yí cosecha, com tí paady je xñi je hori etz je cosecha tí chamni jilby naaxhuiñ.

¹⁶ Huin'it je' pidacy je' yhoz ya naaxhuiñ, je' huidibi anajty iñaayb jocñigixy, chi ya naaxhuiñ yajpidigy je ycosecha.

¹⁷ Nañ tím jadu'n huin'it jadüg ángel ypidzimy ma je Dios chinaydac jilby tzajpjoty. Nañ jadu'n je' anajty mñidty yhoz janch jijp. ¹⁸ Chi jadüg ángel ypidzimy ma je Dios ojadajttac huidibi anajty cötujc mñid ma je jñin.

Chi yaaxi janch mic je huidibi anajty je' yhoz janch jijpi mñid, chi nimay:

—Pidäg yí mhoz janch jijpi ma yí muuxycha'm cosecha huidibi yajpatp jilby naaxhuiñ, com tí ooy chamni.

¹⁹ Chi je ángel yajnaxy je' yhoz naaxhuiñ, chi yajpidigy je camuuxycha'm cosecha, chi tüg'itñy yajnñigidacy ma huaad yajhuinmñicxy. Hue' je' yhuimbizimy co je' je' je mij ayo'n je mijtzaachypí huidibi Dios yquexamyb mñid jäy ajcxy ypocy ycixpi. ²⁰ Je camuuxycha'm hue' je' oy yajhuinmñicxy Jerusalén cajppa'. Ma anajty tí y'ocñigidacpi ypidzimy ooy ni'py janch com, ycoody mabaad je cohuay ajcxy mñidty yfreno, e ymijhuin'ajtñ hue' anajty mñidty tugiig migo'px kilómetro.

Yí ángeles ajcxy mñid je huixtujcnajxpi ayo'n

15 Huin'it nhuin'ijxyich jadüg tiy'ajt ijxpejt janch mijpi tzajpjoty, e janch oy huinmaayñi. Huixtujc ángeles anajty mñidty cñ'am je huixtujcpi tzaachypí ayo'n huidi cogixñyñip, e mñid jadu'n ycixa'ñ ytigoya'ñ Dios chip y'ejcñ.

² E nhuin'ijxyich jadu'n nej tüg mejy ac vidrio, e je vidrio mihuididñi jñin. E jim anajty je jäy ajcxy huidijaty madac co ca' huindzigñy anajty je ca'oy'iyujc etz je' y'ahuinax, je' huidijaty ca' ajcxy cöbijci je ca'oy'iyujc yxñi ñinúmero. E jim anajty ajcxy ytinaaygixy ñigixy ma je mejy ac vidrio huidibi janch adñicxp ajajp anajty, ymñid ajcxy je arpas huidibi ajcxy Dios mooyi. ³ Ooy anajty ñigixy je Moisés y'iy, je Dios ytumbi etz nañ jadu'n anajty ñigixy je Dios y'ung, je Cordero, y'iy huidibi minamb: Mij ooy, etz janch mijhuinma'ñ huidibi miich tí mduñ. Huindzin, miich Dios huidibi jac mic'ajt mñidip ca'ydi jac pin. Janch tudägy miich mñi'aa mdu'aa. Miich rey'ajtp huindu'myñaaxhuiñ huinixñi huinñiempo.

⁴ ¿Pin miich xyca'octzigñhuamb, Huindzin? ¿Pin miich xyca'occömayaanip mxñi? Tug'óciy naaxhuiñjäy xajmij'adipy xyhuindzigñhuipy, com miich naydügpajc je huätzpi Dios, com miich nyaj'ijxp mgötujcñ co ytudägy.

⁵ Co jadu'n yjajti, chi n'ijxyich co y'ahuaach je Dios y'it jilby ma Dios ytijc huidibi yajpatp tzajpjoty, ma y'ity je tzaa ma yjaybetyity Dios ycötujcñ. ⁶ E ma je Dios yajhuindzigñy yajpa'tjihuiñy, jilby ypidzimy huixtujc ángeles. Ymñid anajty ajcxy ycñ'am huixtujc ayo'n tzaachypí. Hue' anajty ajcxy yxoxity mñid huit janch oybi janch huätzpi, e janch adñicxp ajajp anajty. Ymñid anajty ajcxy oorihuiñ mabaad ycaachyjijp. ⁷ Nidüg je mñidaaxpi iyujc jugy'ajtmñidpi moy je huixtujcpi y'ángeles huixtujc tasí ac tím oori, janch ujtz je tasí mñid je Dios chip y'ejcñ. ⁸ E je it ma Dios yajhuindzigñy yajpa'tjihuiñy yajpa'tjihuiñy ujtztay je' mñid je jñinjoc huidibi jadu'n ñipatpy nej je Dios y'oy'ajtñ etz Dios ymic'ajtñ. E ni pin anajty huaad ca' jilby ytiñy ma je Dios ytijc jilby tzajpjoty, ixti cooni je' ycijxtahuiñy je huixtujcpi ayo'n, je tzaachypí huidibi je huixtujcpi ángeles ajcxy ymñid.

Je tasi huidibi ujtz mïd ayo'n tzaachypi

16 Chi nmidooyich tûg ayuc chooñ ma Dios ytijc jii-by tzejpjtoty, nimay anajty janch mic je Dios y'án-geles nihiuxtujcpi:

—Nïcx ajcxy yajyojctuatcix jii-by naaxhuiñ yi huixtu-jcpi tasi huidibi ujtzity mïd Dios chip y'ejcïn.

² Chi ñicxy je midûgpi y'ángel, chi je' ytasi yajtemduty jii-by naaxhuiñ ujtz mïd may'ayo'n. E tûg'óciy je mayjây huidibi anajty ajcxy mïd ma yhuimboc je ca'oy'iyujc ytiy'ajt, pinjaty anajty je ñïgojtuutin huindzigïyip pa'tjihuiyïp, chi je' ajcxy ypaati ñibidzim tûg nibûdz janch jibicpi, e huidibi janch pijcp.

³ Je mimetzpi y'ángel yajyojctuty je' ytasi huidi anajty ujtz mïd ayo'n mejyhuingíxy. Chi je mejy y'ahuimbijty ni'py, jadu'n nej jihuiy öcpi ñi'py. E huidijaty iyujc jii-by tzinaayb mejyjtoty, cijx je' y'öctây.

⁴ Je midugïgpi y'ángel yajyojctuty je' ytasi huidi anajty ujtz mïd may'ayo'n maajaty je mijniï, etz maajaty niï ymuxy, nañ jadu'n ac ñi'py je' y'ahuimbijttay. ⁵ Chi nmidooyich co je ángel ymina'ñ huidibi ane'mb je niï:

—Huindzin Dios, tudägy mduñ co ti mdiyduñ je naaxhuiñjây ajcxy mïd ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypi huätzpi miich, huidibi ijtnaayb etz ti m'ijtnây. ⁶ Com je naaxhuiñjây ajcxy tundigooy co ajcxy teemi yojci je mïbijcpidijc ñi'py, je huidibi mhuin'ijx, je huidibi ajcxy miich m'ayuc najtzcapxiyb anajty. Paady ycixp miich je niï huidibi yi naaxhuiñjây y'uuccixyp, ti myaj'ahuimbity ni'py, com jadu'n ajcxy mihuaadity je tzaachypi mïd ajcxy ypocy ycixpi.

⁷ Nmidooyich co pinjaty ma je it ma yajhuindzigïy Dios, ymina'ñ:

—Janch jadu'n, Huindzin Dios, huidibi tûg'óciy mic'ajt mïd, mïd mdiy'ajt etz mïd mdudägy'ajtin, ti mdiyduñ je naaxhuiñjây ajcxy mïd ypocy ycixpi.

⁸ Je mïmadaaxpi Dios y'ángel yajyojctuty ma je xii je' ytasi huidi anajty ujtz mïd Dios chip y'ejcïn. Chi je xii yajmoy ymic'ajt co jây nögiib mïd je' yjïñ. ⁹ E tûg'óciy jây ajcxy yxïdzaydaayi janch mic. E ni ca' ajcxy yhuinma'ñ yajtigajch, ni ca'ojadajtcixy ni ca' cömaygixy Dios. Nïgi ajcxy ooy jibic Dios nigapxy ni'oñiï, je Dios huidibi ane'mdaayb tûg'óciy ayo'n mïd ymic'ajt.

¹⁰ Je mïmigooxpi y'ángel yajtemduty je ytasi, huidi anajty ujtz mïd Dios chip y'ejcïn, ma je ca'oy'iyujc y'ane'my etz ma tûg'óciy it lugar ma je ca'oy'iyujc y'ane'min, e huin'it oy ycoodziygidactây. Yi jây ajcxy ooy ytoodz oc'adzütmújccixni mïd je ayo'n tibi anajty ytuñyï yjadyï. ¹¹ Per ni jadu'n ajcxy ca'ixmajch je jibicpi huidibi anajty ajcxy ytumyb. Nïgi ajcxy ooy oyñinej ycapxcixy etz ni'oñiïgixy Dios tzejpjtoty mïd je jübï pa'mï etz je nibûdz ycixpi.

¹² Je midudujcpi y'ángel yajtemduty je ytasi huidi anajty ujtz mïd Dios chip y'ejcïn ma je Eufrates mijniï. Chi je mijniï ytiich jigix jëbi ajcxy je reydiyc ñaxy huidibi ajcxy tzoomb xïbidzimy'amy.

¹³ Chi huin'ijxyich co ypidzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta

falso y'ahuac ypidzimy tugïg ca'oybi. E je tugïgpi ca'oybi jadu'n anajty yquëxïgy nej tugïg Tuc. ¹⁴ E je tugïgpi Tuc hue' ajcxy ca'oybi ymïd, e tungixy anajty mijhuinma'ñ mïd je mujcu' ymic'ajt. E oy ajcxy huoomucy huidijaty anajty rey'ajtp huindu'my naaxhuiñ, jigix je' ajcxy chiptungixipy mïd je mijpi Dios huidibi tûg'óciy mic'ajt mïd, co anajty je xii je tiempo yhuaad'ajtni huidibi Dios ti yajniögödugïy. ¹⁵ Jadu'n Dios ymina'ñ:

—Cuenditungix iich n'ayuc. Ameerch nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcuyc pinjaty ni'ixï xy'ahuijxpich, je huidibi ypocy ti ymecxyii, e tudägy'ajtin ti paady ma iich jigix ca' jadu'n paadip nej tûg jây huidibi yhuït ti meechyï, e jadu'n je' yhuï'my nihuadz, e tzo'ydu'n jihuiy co jây yhuindicxyii. ¹⁶ Chi je tugïgpi ca'oybi huoomujctay ajcxy je reydiyc ma tûg it huidibi yxii Hebreo'amy Armegedón.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzigïy Dios etz ma je' y'ane'mdac tzejpjtoty, jii-by tûg ayuc chooñ janch micpi ymina'ñ anajty:

—Ti ytuñyï yjadyï.

¹⁸ Huin'it ooy yjajti huïdzuc, ne'min micpi etz jidiñtin, ooy naax yücxy mïd tûg uyx janch micpi, niminaabi jadu'n ycajadyï maabi jây chinay'ïjtigixy naaxhuiñ.

¹⁹ Chi je mij ciudad, je Jerusalén, oy yhuäcxy tugïg picy, nañ jadu'n je may ciudad huidibi huindu'myñaaxhuiñ, cijx ymïjahuiydây. Chi Dios jâymejtzcoty je Babilonia cajp nej je jây ajcxy jim ytundigooygixy, e chi quejxy may ayo'n jim mïd chip y'ejcïn ycixpi. ²⁰ Tûg'óciy je naax mejy'agujcpi ytigoyday. Etz tûg'óciy tungop naaxhuiñgyxy cijx je' ytigoydây. ²¹ Nañ jadu'n ooy ycäy chooñ tzejpjtoty eneedïtz mijjatypï majaty jây ajcxy, janch jempxy anajty je eneedïtz, tûgjatypï huïchïguipxy kilo. Chi jây ajcxy ooy oyñinej nigapxy ni'oñiï je Dios mïd je eneedïtz ycixpi, com ooy je' mij chachjajti je ayo'n je castigi.

Je töxyjây jibictzinaaybi chaachypi ycastigi

17 Nidûg je huixtujcpi ángeles huidibi anajty ajcxy mïd je huixtujcpi ytasi ymïñ. Chi ajcxy ymydacy mïd iich, yñiimaaygixich:

—Min yam, mïñ nyajni'ixïy je tzaachypi huidibi ypadamyb je töxyjây pocytumbi, huidibi iñaayb mejyhuingíxy. ² Je reydiyc ya naaxhuiñ ti ooy ytundigooygixy mïd jada töxyjây, e je naaxhuiñjây ajcxy ti ooy huinma'ñyidigooygixy mïd jada töxyjây ypocytunï huinma'ñ, jadu'n nej jihuiy ajcxy ooy ti ymúucigixy.

³ E Dios yjihui'ñ ymic'ajt xyajcumäyich e cumäyjtoty xyajnicxyich je ángel mijtigïduum. E jim n'ijxyich tûg töxyjây yaj'ñây tûg ca'oy'iyujc huidibi ycolor tzaptz, e janch niducy mïd pinjaty yxii cojaayip huidibi yajjotma'tp Dios, e ymïd anajty huixtujc ycohuajc etz majc ymu'n. ⁴ Je töxyjây hue' anajty yxojx mïdity mïd huit janch oyjatypï, ycolor ucy etz tzaptz, ooy anajty yaj'oyguëxïgy mïd oori, mïd pi'ctzaa janch oybi etz perla. Ymïd anajty ma yci' tûg tasi ac tim oori janch

¹¹ Je ajuybidijc adoocpidijc huidibi ajcxy naaxhuiñ jñiygixipy yáaxcixipy ajcxy miid je Babilonia cajn ycxipi, com ca'p anajty pin juuyip ajcxy yjuy ytoocy. ¹² Je ajuybidijc adoocpidijc ajcxy ymiid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey yhuit, huit color tzaptzpi, nañ jadu'n ymiid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymiid ajcxy canela, etz tijaty ooy oy xuucin miidity, poom, mirra, perfume, vino aceite, trigo tiim, iyujc animal huidibi tzimy yajyöyb, cöbixy, cohuay, carreti, tumbi huidibi codoogiyip, etz jacjadyii jäy juugypí. ¹⁴ Je ajuybidijc adoocpidijc ajcxy ñimähuiipy je Babilonia jäy ajcxy:

—¡Ca' ajcxy m'ocmiidiñ je tiim tza'm huidibi ajcxy mjot yjatzojcipy, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmiid, ca' ma ocyajpatnip jadüg'oc!

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cajpin, jiguem ajcxy yhuimähuiipy miid tzigi'ñ jihu'iñ, co nañ jadu'n je tzaachyipi castigi padaangixy. Yäxip ajcxy etz nidájicixipy nimáaygixipy je Babilonia cajn. ¹⁶ Chi ajcxy yminaanipy:

—¡Ay! ¡Miich mij cajn huidibi ayo'n patp! Jadu'n miich anajty nej tüg töxyjäy huidibi xoxyip miid huit oyjatypi, huidi ycolor ucy etz tzaptz, yaj'oyguëxgy miid oori, miid pi'ctzaa oyjatypi, miid perla. ¹⁷ ¡Janch tim tüg jaxigy, janch tim tüg hori, ti ycixy miich mmijjugy'ajtin mmijcomeeñ'ajtin!

Tüg'öciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhuimäaaygixy jiguëgy. ¹⁸ Co ajcxy ijxy nej anajty ytoy yjocy je mij ciudad, chi ajcxy yminañ:

—¿Huidibi cajn jada' ji jadu'nip nej jada anajty jadayaabí mij cajn?

¹⁹ Chi ajcxy ooy naax ñayyajcöhuoogyi miid jotmay, cham ooy yaaxcixy, ytajcixy ymaygixy, e mic chachmi-naangixy:

—¡Ay! ¡Je mijpi oybi cajn huidibi ayo'n patp, ma je tüg'öciy pinjaty anajty ymiid barco ma mejy, ti ycomeeñygojcixy anajty miid je'! ¡Janch tim tüg mij jaxigy, tim tüg hori, ti yhuindigoydäy miich mmijjugy'ajtin mgomeeñ'ajtin!

²⁰ Jotcugiygyx miid je Babilonia cajn ycxipi, miich tza-jpoty tzinaayb ajcxy, etz miich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n miich ajcxy huidibi najtzcaxiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajn, je' yi' ti yaj'adigach jadu'n nej ajcxy xymiiddundigoy.

²¹ Huin'it tüg ángel janch mic'ajtmiiipi congy tüg tzaa, jadu'n nej tüg molino paandzaa mijpi, chi je' cogädziy mejyoty, e yminañ:

—Nej jada tzaa ti ytigooyin, nañ tim jadu'n je mijpi oybi Babilonia cajn ytigoydähuiipy. E janch ni mina pin cajac'ixipy. ²² E ni camina ajcxy mgajac'midohuiipy jim

Babilonia co pin arpi coob etz flauta yajxuuxp trompeti yajxuuxp mijniñ mijtu'. E ca' jacyajpaadip pinjaty ti dung ii jajt, ti oficio jajt, ni mgamidohuiipy je molino paandzaa ñe'min. ²³ Ni mina ti ycatixipy jadüg'oc ma je Babilonia cajn. Ni mina ycajamidohuiipy jadüg'oc je xii je xondaacin huidibi jajt co jäy ypiy. Oy je Babilonia ajuuybi y'adoocpi ajcxy anajty ooy yjamicjäyity ya naaxhuiñ, e ti ajcxy huin'iiñ mayñaaxhuiñyjäy miid ajcxy brujerías.

²⁴ Jim ma je Babilonia cajn jim yajpaady je' ajcxy ñi'py je tiibi ajcxy Dios y'ayuc najtzcaxiyi, je huidibi ajcxy huin'ixyip ma Dios etz tüg'öciy mibijcpidijc tiibi yaj'ögy-paatcixy naaxhuiñygyx.

19 Co jadu'n yjati, chi nmidooyich may'ayuc micpi co mayjäy ajcxy ooy ycapxcixy ymiydaaccixy tza-jpoty, ymina'ñ ajcxy:

¡Aleluya! Hch ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt miid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajn huidibi ti yajhuinma'ñy-digoy je naaxhuiñyjäy miid je ycatudägy'ajtin ycxipi. Yi' je' ti yaj'adigach ma je Babilonia cajn je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc yminaanip:

—¡Aleluya! Je jijnjoc huidibi jim Babilonia co ytoy je cajn, pa'ttigihuiip tzaajpcixy huinixii huinitiempo, ca' yjin ypidzip ni mina.

⁴ E je iipx madaaxpi mijjäy etz je madaaxpi iyujc, huidibi jugy'ajt miid ñaygojxtinaygidaaci naaxcixy, chi ajcxy ooy Dios ojadajty huidibi anajty ane'mb ma je mij'ane'mdac, e yminaangixy:

—¡Jadu'n jada! ¡Aleluya!

⁵ Huin'it yajmidooy jilby ma je Dios y'ñaydac ycötujctac tüg ayuc ymina'ñ:

Huindzigiygyx hbatcix capxpatcix hch ajt nDios nidüg'öciy pinjaty tumb miid yi', pinjaty yi' tzigiyb, huen mutztjcity huen ymij'anäctjcity.

Je jotcujc'ajtin huidibi nbadaanim co anajty Cristo yjäy nimiñ

⁶ Nmidoohuich nañ jadu'n nej jihuüy ooy mayjäy ycapxy ymiydägy, nej canaag mijniñ y'a'hch, nej enee micpi yjidity, yminaangixy:

¡Aleluya! Ti y'ane'mdigiy jilby naaxhuiñ je Huindzin Dios huidibi tügpajc mñip.

⁷ Agujc'ajtim jotcujc'ajtim, tzoc cömaayim Dios, tzoc mooyim mij'ajt. Com ti paady je xii je tiempo mina Dios y'ung naybadáanigixp tümugáanigixp miid yi' yjäy, tim jadu'n nej jihuüy ypiğa'ñ miid yi' ajcxy. Ti Cristo yjäy ñayñ'ixiyigyx, jaydëbi ñaybaatigixip ytügmújccixip miid yi', tim jadu'n nej tüg jäy ñayxoxyii co ypiğa'ñ.

⁸ Dios ti a'ixiy co Cristo yjäy ajcxy ñayxoxiyb miid yhuit oyjatypi, huidibi adicxp ajajp.

Je huit xojx oyjatypi jadu'n nipaady nej je tudägy'ajtin huidibi je mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcuyc ajcxy pinjaty huooyip ma yajhuinxhiduna'ñ Dios y'ung, je Cordero, co naydüg-mugaanigixy miid y' yjäy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuiiyich ma je ángel yhuinduu co njahuindzigihuaañich. Chi je' xyñimaayich:

—Ca' jadu'n m'idäch. Dios iich xytumbi'ajtp jadu'n nej miich etz nej jacjadyii migügtijc huidibi mijpidaaccixp cixyot huinjot je ayuc tiy'ajt janchypi huidibi Jesús ycapxhuäcx. Huindzig' Dios.

Jadayaabi ayuc tiy'ajt janchypi huidibi Jesús ñidiy'ajt'ajt, y' je' je' Dios y'ayuc huidibi je profetas ajcxy ñajtzcapxiiy.

Je mij'ane'mbi huidibi poobcohuay yaj'iñaayb

¹¹ Chi nhuin'ijxyich tzajp'ahuädz, chi yquëxigy tüg poobcohuay, e je pin anajty yaj'iñaayb hue' anajty naydijyii je tudägypi je janchypi. Je huidibi tiydumb naax-huiñyjäy miid tudägy'ajtin etz huidibi tziptumb miid tudägy'ajtin. ¹² E je' huidibi yaj'iñaayb je poobcohuay, je' yhuin jadu'n je' nej jñnye'n, e ymiid anajty ma ycohuajc maycoroni huidibi nidiy'ajt'ajtp co yrey'aty ma tüg'óciy jäy. E je' ymiid anajty tüg xi cojaay, e je' anajty naydügpaic nehuiiyb yxi ca' jac pin. ¹³ Hue' anajty yxoxity miid huit y'uucyity miid n'ipy, e je' yxi hue' anajty xi'adyii Dios y'ayuc. ¹⁴ Je ángeles ajcxy huidibi soldad'ajtp tzajpjoty ypayoyii anajty ajcxy ac poobcohuaygixpi, yxoxity ajcxy miid sedi huit janch oybi, poobi etz huätzpi. ¹⁵ Je huidibi yaj'iñaayb je poobcohuay, ma y' y'ahuac ypidzimy anajty tüg espada janch jijpi, e je' miid yajtzaachihua'ñ je maynaaxhuiñyjäy. E je' ane'ma'ñ miid Dios ymic'ajt. E miid y' y'ayuc castigi möhua'ñ je mayjäy miid ypocy ycixpi huidibi tzinaayb ma je may it lugar ya naaxhuiñ. Y' y'ayuc jadu'n y' nej tüg espada janch jijpi. E y' miid'adaanip je mijpi Dios chip y'ejcin, je Dios huidibi tüg'óciy mic'ajt miid. E mic'tägy tzaachypi castigi yega'ñ ma je mayñaaxhuiñyjäy miid ypocy ycixpi, jadu'n je maynaaxhuiñyjäy nipaady nej jihuüy Dios y'ung tenmicx uvas miid ytecy. ¹⁶ E ymiid anajty cojaay ma yhuic etz ma ypu yjadayaabi ayuc: “Reydijc ajcxy yrey. Huindzindijc ajcxy yHuindzin.”

¹⁷ Huin'it nhuin'ijxyich tüg ángel ytinäy xii'aguyc, chi ooy janch mic miyaaxy tüg'óciy je joon huidijaty queec-huidijtp tzajpcujc ymiñañ:

—Miingix naymujctäayigix ma Dios adzoo'ibi yecy.

¹⁸ Miingix, jigix mdzüdzcixipy reydijc ajcxy ñinicx, capitán ajcxy etz micjäydijc ajcxy ñinicx, cohuay chüch etz nañ jadu'n je' ajcxy ñinicx huidibi yaj'iñaayb. Mdzüdzip tüg'óciy jäy ñinicx: tumbidijc midumbidijc, je huindzindijc, comeeñydijc etz je ayooobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ miid tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymújcigixy co chiptunaangixy midziptzonaangixy je huidibi poobcohuay yaj'iñaayb quipxyi miid je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxyi miid je profeta ca'pi yjanchity, je tñibi anajty tuñ

mijhuinma'ñ ma je ca'oy'iyujc yhuinduu. Miid je mijhuinma'ñ ycixpi je profeta, ca'piy yjanchity, ti anajty ooy huin'ññ tüg'óciy je huidijaty ajcxy nayyejci co je ca'oy'iyujc ytiy'ajt iixpejt cöbiji ma yhuimboc etz co huindzigiiyi je ñidzejtzuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jñn ytoy miid azufre, jadu'n je jñn nej tüg mejy huädz jñn. ²¹ Jacjadyii jäy hue' ajcxy o'cin patcixy miid espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimyucxuatäayigixy ytimypejtäayigixy miid may öcpi chüch.

Je mil jimijtpi

20 Huin'it nhuin'ijxyich tüg ángel ycidägy chooñ tzajpjoty miidity je ahuasti huidibi miid yaj'ahuäch je mij jut huidibi oy yciicyity, ymiid anajty nañ jadu'n tüg mijcadena ma yci'. ² Jadayaabi ángel majch je ama'y tza'ñ huidibi yajtijp mujcu' etz Satanás, chi yajcadentiigiiy, e yajhui'my mach tüg mil jimijt. ³ Chi je ángel cötijnajxy je mujcu' ma je mij jut, chi cö'agiiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'ññ je mayñaax-huiñyjäy, ixti cooni tüg mil jimijt yca'pxipy. E co jadu'n anajty mil jimijt ti ñaxy, ooy ycopicyity co yajnajtzmazihuiipy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy tñibi ajcxy patcixy cötujcin co tiydüngixipy naax-huiñyjäy. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujcttuuticixy miid co ajcxy capxhuächy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiiygixy je ca'oy'iyujc, ni je' ñidzejtzuutin. E nañ jadu'n ni ca' ajcxy cöbiji je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi miid Cristo tüg mil jimijt. ⁵ Je jacjadyii je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jimijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'ñibi tiempo mina öcpi ajcxy yjugypijccixy, e ca' y'oc'óccixnip jadügtecy. ⁶ Jotcuyc etz huädz, ca' tibocy miidity, je' ajcxy öcpidijc huidibi jugypigipy co Jesús yajjugypigipy y' tügpicy öcpi huidibi jayijp'adamb. Je mimetzpi o'cin ca' ni ti mic'ajt miidity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy miid y'ane'mip tüg mil jimijt.

⁷ Co anajty ti ñaxy je mil jimijt, huin'it je Satanás yajcoguejttüdiipy ma ymach'ity. ⁸ Chi Satanás nicxy huin'ññ je mayñaaxhuiñyjäy huindu'mybi ñaaxhuiñ. Je' nicxy huin'ññ Gog jäy etz Magog jäy. E y' ajcxy y'ane'mbidijc yajmujctähua'ñ soldado ajcxy, jigix chip-tüngixipy miid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypä'am. ⁹ E jadu'n ajcxy ypediiy ma ymijhuiinity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojpcy. Chi Dios quejxy jñn huidibi tzoomb tzajpjoty, huidibi oy ñöcigixy huädz huädz je may soldados ajcxy.

¹⁰ Je mujcu', huidibi anajty ti huin'ihñ je mayjäy, oy yajcötijnaxy ma je mij jñn ytoy miid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiilby je' ajcxy ayo'n tzaachypa paadipy xiim tzuum huinixii huinitempo.

Je tiyduunin ma je mij'ane'mbi yhuinduu

¹¹ Nhuin'ijxyich tüg mij'ane'mdac janch poob, miid je huidibi anajty ifaaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹² Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huidibi miid je jäy yxii cojay huidijaty ajcxy jugy'ajtin huinixii miid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je mejy ycäyeyctay je' je öcpi ajcxy huidibi anajty jiilby yajpatp. E je o'cin etz je öcpijut ycäyeyctay je' je öcpi huidibi jiilby yajpatp, e tüg'öciy je' yajtiydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajztijyday jñnjoty ma je mijjñn ytoy. Je' je' je' mimetzpi o'cin ma je mijjñn ytoy. ¹⁵ E huidijaty anajty ajcxy ca' yxii ymiñ ma je libro huidibi jugy'ajtin huinixii miid, hue' je' ajcxy yajnajztijy jñnjoty ma je mijjñn ytoy.

21 Huin'it nhuin'ijxyich tüg tzajp jemybi etz tüg naax jemybi, com je jayjipi tzajp etz je jayjipi naax ti je' anajty ytigoydäy, e ni ma anajty mejy ycacädy. ² Ich, Juan, nhuin'ijxyich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñii ñayxoxyii co ypiğa'ñ miid yëydijc. ³ Nmidoohuich tüg ayuc micpi chooñ anajty tzajpjoty, e ymiñañ:

—Cuenditun ich n'ayuc. Dios tzinaydac pigamb ma naaxhuiñyäjy ajcxy. Yi' tzinähuiipy miid yi' ajcxy, e yi' ajcxy Dios yjäy'adiiyb. E Dios ci'm idaamb miid yi' ajcxy jigix yi' ajcxy Dios'adiiyb. ⁴ Dios yajquëgiiib ajcxy ytajin ymayin etz yajtädziib ajcxy yhuinnii, e ca'p yjadiiib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtnaayb, ti je' ñaxy.

⁵ Huin'it je' ymiñañ huidibi anajty ifaaayb ma je mij'ane'mdacin:

—Cuenditungix ich n'ayuc. Hujemy ngojtigadza'ñich tüg'öciy huidibi jii'ijtp.

Nañ jadu'n ymiñañ:

—Jaay jada ayuc. Com jadayaabi ayuc ooy jada yjanchity, e ooy yi' jot'amij'ajt miidity.

⁶ Huin'it je mij'ane'mbi xyñimaayich:

—Ti tüg'öciy ytunyii yjadyii. Ich je' nyajtzondacp tüg'öciy tijaty, etz ich nyajcogixiiyb tüg'öciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiiyb je alfabeto. Pinjaty zozjcp jemybi jugy'ajtin ich yi' nmöhuip. Jadu'n nipaady nej jihuiy ajcxy ytidziyigixy, e nyaj'ügich ma ymuxy je niñ huidibi yejcp jugy'ajtin, ni ca' ajcxy mimeeñyduunip ni jadu'ñi. ⁷ Pinjaty mimadactaayb jibic-huinma'ñ etz

pocytunii, yi' je' cidigihuiib huidibi një'ajtpy, e ich yi' xyDios'adiib, e yi' ich n'ung'adiiyb. ⁸ Je huindzicytjic ajcxy, pinjaty ca' ymibicy ich ndiy'ajt, pinjaty tumb huidibi ca' y'oyjäygidaacnity, pinjaty jäy yaj'öcp, pinjaty migapxtigooyb töxyjäydijc, pinjaty tumb capxpogii, pinjaty mijpidacp huijyäjy yhuinma'ñ, pinjaty huindzigiiyb quipychech tzaadzech, etz pinjaty anii-dacp, je' ajcxy nidüg'öciy nibidzimib ñicxipy ma mijjñn ytoy miid azufre, huidibi quëxäcp nej jñnmejy. Je' je' je' mimetzpi o'cin.

Yi jemybi Jerusalén

⁹ Huin'it nidüg ángel je nihuixtujcpi huidibi anajty miid huixtujc tasi ujtjzatyti miid je huixtujcpi ayo'n tzaachypa huidibi jac'axam tunaanip jadaanip, je' xyñimaayich:

—Min, e cham nyajni'ixihua'ñ je mibijcpidijc huidibi tügmugamb miid Dios y'ung, je Cordero, jadu'n nej tüg yëydijc ytügmucy miid ytöxyjic co ajcxy ypicy.

¹⁰ Je huidibi Dios yjñhui'ñ ymic'ajt xyaj'ijxyich cumäyjoyty, chi je ángel cümäyjoyty xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty chooñ tzajpjoty jiilby ma Dios yajpaady. ¹¹ Je mij ciudad santa janch adicxp je' anajty miid Dios y'oy'ajtin. Jim jadu'n anajty y'adixcy nej tüg tzaa janch oybi nej mármol, janch yaj'ijxnajxp nej iixin. ¹² Juhuidityi anajty miidity je ciudad santo ac poch janch mij etz cixy. Je poch ymiid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpi ángel ma tügjaty ciudad aguu. Etz yjaybetyity je' ajcxy yxii je majmetzpi Israel tribu, tügpi tribu yxii yjaybetyity ma tüg tüg poch y'aguu. ¹³ Tugüg anajty y'aguu miidity xhibidzim'amy, tugüg y'aguu ma tichypo ymiiniy, tugüg y'aguu ma jñnboj ymiiniyin, etz jatugüg y'aguu ma xigidägy'amy. ¹⁴ Je poch huidibi anajty ymiid je cajp, ymiid anajty majmetz tzaa huidibi y'ij'ajtip, e majmetzpi tzaa ymiid anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpi apóstol yxii ma tüg tüg tzaa.

¹⁵ Je ángel huidibi anajty miydacp miid ich, ymiid anajty tüg quipx ac tim oorí je' anajty. Je' anajty miid quipxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n y'aj'ajt. Chi je ángel quipxy je ciudad santa miid je' yquipx. E hue' quipxy mejtz mil jamejtz migo'px kilómetros, y'ay-oñ'ajtin y'aj'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchiguipx midaax cñuux, jadu'n nej naaxhuiñyäjy ajcxy y'aj'ajtin, huidi je ángel yajtumy.

¹⁸ Je poch hue' je' anajty ypochity miid tzaa oyjatypí, e je cajp hue' je' anajty ac tim oorí, yguëxigy nej iix huätzpi. ¹⁹ Je tzaa huidibi je poch y'ij'ajtip hue' je' anajty y'oyduñity huidi miid y'oyguëxigy, tzaa janch oyjatypí canaagnax color. Je jayjipi poch y'ijx hue' anajty y'oyduñity miid jaspe tzaa, je mimetzpi poch y'oyduñity miid safiro tzaa, je midugüigpi poch y'oyduñity miid

ágate tzaa, je mimadaaxpi y'oyduñity miid esmeralda tzaa, je mimigooxpi poch y'oyduñity miid ónice tzaa, je midudujcpi poch y'oyduñity miid coralina tzaa, je mihiuxtujcpi poch y'oyduñity miid crisólito tzaa, je mituctujcpi poch y'oyduñity miid berilo tzaa, je midaxtujcpi poch y'oyduñity miid jacinto tzaa, je mimajmetzpi poch y'oyduñity miid amatista tzaa. ²¹ Je majmetzpi poch'aguu hue' anajty y'oyduñity miid tügpi perla. E je mijtu' huidibi najxp cajpcujc hue' y'oyñiy miid oori huätzpi, e yquëxigy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi' huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anñhuip yaj'ticxñhuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je' ticxin jajin huidibi amb ticxp ma je Jerusalén jemybi. ²⁴ Je mayñaaxhuiñyäjy' yaj'huip yaj'ticxñhuip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je' ticxin jajin huidibi amb ticxp ma je Jerusalén jemybi. ²⁵ E je cajp aguu ni camina je' agy yca'idipy xim, com jim ca' jim ycood'z'idipy, paady ni mina yca'agi' y'idipy. ²⁶ Jim je naaxhuiñyäjy, canaag agajp, minicxip ajcxy ymij'ajt y'oy'ajt ycomay'ajt ma je Jerusaléngajp, je jemybi. ²⁷ Ca'p jim ytigñhuip ni pin hidibi ca' y'oy'ajtin huächñi, ni pin hidibi tumb ca'pi y'oy'ajtin huächñi, etz hidijaty jäy huin'imb. Jeyi jim tigñhuip pinjaty ijtp yxi cojay ma je libro hidibi Dios y'ung, je Cordero, ymiid, ma cojay y'ity je jäy ajcxy yxi hidibi ymiid jugy'ajtin huinixibi.

22 Huin'it je ángel xyajni'ixñiyich tüg mijni huätzpi, je ni hidibi yejcp jugy'ajt hidibi ca' y'oy'ajtin yti-goyip. Janch huadz janch ticx je' anajty je ni nej tüg ijxin. E je ni jim anajty ymuxy ma Dios etz je Cordero y'ane'mdac. ² Jada mij ni hue' je' anajty ñaxy ciudad mijtüguc, etz ma je mejtz'adu'm'amybi mijñ'ba', jim anajty je quipy hidibi jugy'ajt miid, hidibi t'im'ajt majmetz'oc tügpi jimij, po' po' y'tim'aty, e je quipy y'aay hue' anajty ytuñ jigix huaad naaxhuiñyäjy choocixy. ³ Ca'p jim y'adipy ni ti ayo'n ni ti jotmay miid pocytunñ y'oy'ajtin. E je Dios etz je' y'ung je' jim y'ane'mdac ycotujctac yajpaadipy. E je' ytumbidijc je' ajcxy jim yajmij'adñib ojadadñib. ⁴ Y'ijxipy ajcxy je Dios y'ung yhuin'ijjip etz ymnicxip ajcxy je' yxi ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xñicxpi, com Dios ñich ajt nHuindzin yi' yi' ajcxy codicxñib. Je Huindzin Dios etz je' y'ung je' ajcxy jim ane'mip huinixi huinitempo.

Huingooniñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jebi miich myajmij'adipy. Je Huindzin, je Dios hidibi ayuc moy je profetas ajcxy jecy'ajty, que-

jy y'ángel jigix yajni'ixñhuip je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—iMiimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt hidibi jaybetyip ma jada libro.

⁸ ñich Juan, nmidoohuich etz nhuin'ijxich jadyaabi hidibi jaybety ma jada necy. E co oy jadu'n nhuin'ixyich, chi nhuijoi'ñhuin'iyich ma je ángel ytecymijc hidibi anajty yam xyajni'ixñiyich. ⁹ Chi je' xyñimaayich:

—Ca' jadu'n m'idñich. ñich, Dios xytumbi'ajtp jadu'n nej miich etz jacjadyi migügtijc hidibi Dios y'ayuc najtcapxiyip, e tüg'óciy pinjaty tumb cuendi hidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxí je Dios y'ayuc hidibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'ñ yi y'ayuc hidibi yjahuim ma jada necy. ¹¹ Pinjaty ca' ytudägyity, huen jadu'n jacyajpaady miid ycatudägy'ajt. Pinjaty jibicjot jibic-huinma'ñ tumb, huen nigí jibicjot jibic-huinma'ñ tuñ. E pinjaty tudägyi tumb, huen jactuñ tudägy'ajtin. Pinjaty huadz yjot huadz yhuinma'ñ miid, huen huadz yjot huadz yhuinma'ñ jacmi'ity ma Dios.

¹² Chi je Cristo yminañ:

—Timetiini nhuimbidiyich jadüg'oc naaxhuiñ. Co anajty ti nmiñich, huin'it nyajjotcugñhuibich pinjaty oybi ti tuñ, e ndzaachytunipyich pinjaty jibicpi ti tuñ.

¹³ ñich je' ti njayjip'atyich ya naaxhuiñ, etz ñich je' cogixñhuamb, tim jadu'n nej je letra A chondägy ma je alfabeto etz je letra Z y'ogixñy ma je alfabeto. ñich ti nyajtzondacyich je naaxhuiñ etz nyajcixipyich.

¹⁴ Jotcujc ajcxy pinjaty ti y'oy'ajtin huächñi, jadu'n nipaady nej ajcxy yhuin'it ti pujcixy e miid ajcxy yhuin'it huätzpi. Com ti ajcxy y'oy'ajtin huächñi, paady jebi jñicxixip je ujt tza'm hidibi jugy'ajt yejcpy hidibi ca' y'oy'ajtin yti-goyipy ni mina, e jadu'n jebi yti-gy ma je jemybi Jerusaléngajp. ¹⁵ Dios ca' yi' ajcxy cöbiga'ñ ma je jemybi Jerusalén etz huim'ip ajcxy cajppa' tüg'óciy pinjaty hidibi jibic-huinma'ñ miid, pinjaty ca' mibicy Dios, pinjaty mijpidacp huin'ijyäjy yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigi'yb quipychech tzaachech, etz tüg'óciy pinjaty tzachnixondacp anñ ayuc.

¹⁶ ñich Jesús hidibi capxp. Ti nguexyich n'ángel ma miich jigix jada tiy'ajt capxticxipy majaty mibicpidijc ma tüg tüg cajp. ñich je' ijx'ajtp cop'ajtp ma je rey David miñ. Etz ñich je' nmij'ap'ajtpyich nmijteedy'ajtpyich je rey David. Jadu'n ñich nipaady nej je mijmadza' hidibi yajtijp jayxim.

¹⁷ Je Espíritu Santo etz je mibicpidijc hidibi jadu'n nipatp nej Cristo ytöxyijc yminaangixy:

—Min ma Jesucristo.

E pin amidoo'ijtp ñich n'ayuc yminaangixipy:

—Min ma Jesucristo.

E pin tzojcp jugy'ajtın huidibi ca' ycixipy ytigoyipy nimina, jadu'n nej jihuıy ytidzıyii e tzocy jada nıı, huen miiñ, e nmöhuıbyıch jugy'ajtın, jadu'n nej jihuıy nya-jnıı'ügıch je nıı huidibi jugy'ajtın mııd e ni ca' mımeeñy-dunıpy ni jadu'ñyi.

¹⁸ Tüg'óciy pinjaty amıdoo'ıjtp Dios y'ayuc ytiy'ajt huidibi jaybetyıp ma jada libro, ııch miıch ajcxy ni-maaybıch co pinjaty jacyaj'anajxp jada ayuc ma jada necy, Dios jac'anaxy möhuıb tzaachypi ayo'n, ca'ydi huidi jaybetyıp ma jada libro. ¹⁹ E pin puuhıjtzp hueeni jada Dios y'ayuc huidibi jaybetyıp ma jada Dios

ylibro, Dios yi' jötziıb yxıı huidi cojaayıp ma je jugy'ajt libro. Nañ jadu'n ypuhuidziıyb huidi anajty japaatıp ma je jemybi Jerusaléngajp, huidi jada libro ñimıydacpy.

²⁰ Yi Jesucristo huidibi jada ayuc capxp, yi' minamb:

—Ca' ooy jecy njac-huäcxıba'ñıch co nhuımbidıpyıch naaxhuiñ jadüg'oc.

Jadu'n jada. Amén. ¡Min, Huındzin Jesús!

²¹ Huen je nHuındzin Jesucristo may'ajt oy'ajt tunıpy mııd miıch ajcxy huidibi mıbijcp. Jadu'n ngapxycıxyıch. Amén.